


Naul On Nga Mimerr
Uripiv



The New Testament in the Uripiv language of Vanuatu

Naul On Nga Mimerr Uripiv

The New Testament in the Uripiv language of Vanuatu

copyright © 1996 Wycliffe Bible Translators

Language: Uripiv (Uripiv-Wala-Rano-Atchin)

Dialect: Uripiv

Translation by: WBT

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

96303ce7-aa0a-513c-862d-415957a542e1

Contents

Matiu	1
Mak	42
Luk	69
Jon	115
Majingen	146
Rom	186
1 Korin	205
2 Korin	224
Galesia	235
Epesas	242
Pilipae	249
Kolosi	254
1 Tesalonaeka	259
2 Tesalonaeka	263
1 TIMOTI	266
2 Timoti	272
Taetas	276
Pilimon	279
Ibrus	281
Jemes	296
1 Pita	302
2 Pita	308
1 Jon	312
2 Jon	317
3 Jon	318
Jut	319
Bori se Jon	321

**Nosþen nga Mirres se
Iesu Kristo nga
MATIU
Muli
Batu nale nga mivsvseni
lut nga parmeteni naul
ngel puto suri**

Naul nga Matiu muli ngel osþe suri nosþen nga mïrres, nga Iesu evi jinibb nga Atua muloli rijrijen tevi jinibb sen nir tuwi pa vini, nga pivini þïla mauren tevi jinibb sen nir. Ko suri Iesu ngok, ololi rijrijen nga Atua muloli renge Naul On Tuwi arremali. Iesu eak renge vanu se mïeri Isrel nir, ko elik ko emaur tevi nir ie. Ko nosþen ngok sete evi se nir kobbong, ko evi ma se jinibb jïlle ne iel ngatan.

Womujnen re naul ngel, Matiu osþe suri daron nga Iesu mïiak e, ko ejilwer suri eta-ger van re daron nga Jon mipaptaese Iesu, ko Demij mia-rrowrrowe ni. Ko vitunen, ejilwer suri daron nga Iesu mïtipatune majingen sen re vanu ne Galili, nga muwrai tweni nosþen nga mïrres sen tevi jinibb nir, ko okvisvisenir ko okloli jinibb arres re mesien ser. Ko vitunen, owrai tweni kele daron nga Iesu nïlinglingi Galili e ko mian Jerusalem e. Ko osþe suri nanu nga Iesu muloli vitue re majingen sen. Ko bongsin, osþe suri mijen se Iesu ko daron nga mimaur luwi kele e.

Matiu osþe kele nga Iesu evi jinibb nevsvisenien nga mïrres þelak nga orongwose puwrai tweni nale nesesreien se Moses lat nga muto suri. Ko owrai suri kele batun vanu se Atua, nga Atua mivini mivi Numal se jinibb sen nir.

Iesu metka sen nir

¹ Ngel evi naul ne metka se Iesu Kristo metka se Devet, ko metka se Epram.

² Ko nise jinibb nir re metka nen: Epram womu jer. Ko Epram evesi Aesak, ko Aesak evesi Jekop, ko Jekop evesi Juta ko niaken sen nir.

³ Ko Juta evesi Peres ko Sera, nuru ko tasu se nuru ko Tamar; ko Peres evesi Ebron, ko Ebron evesi Ram.

⁴ Ko Ram evesi Aminatap, ko Aminatap evesi Nason, ko Nason evesi Salmon.

⁵ Ko Salmon evesi Boas nga tasu sen Reap, ko Boas evesi Opet nga tasu sen Rut, ko Opet evesi Jese.

⁶ Ko Jese evesi Numal Devet, ko Numal Devet elesi luwe kele nesevin se Uria, ko evesi Solomon.

⁷ Ko Solomon evesi Reopoam, ko Reopoam evesi Apia, ko Apia evesi Asa.

⁸ Ko Asa evesi Jeosapat, ko Jeosapat evesi Joram, ko Joram evesi Usia.

⁹ Ko Usia evesi Jotam, ko Jotam evesi Eas, ko Eas evesi Esekia.

¹⁰ Ko Esekia evesi Manasa, ko Manasa evesi Amon, ko Amon evesi Josia.

¹¹ Ko Josia evesi Jekonia ko niaken sen nir. Renge daron nen ko aron tertere nir arteka twenir van re Babilon e suri nuval.

¹² Arteka twenir jile osuw, ko Jekonia evesi Sealtiel, ko Sealtiel evesi Serupapel.

¹³ Ko Serupapel evesi Apiut, ko Apiut evesi Eliakim, ko Eliakim evesi Asor.

¹⁴ Ko Asor evesi Satok, ko Satok evesi Akim, ko Akim evesi Eliut.

¹⁵ Ko Eliut evesi Eliesar, ko Eliesar evesi Matan, ko Matan evesi Jekop.

¹⁶ Ko Jekop evesi Josep diwen se Merri, nga mivi tasu se Iesu nga marveruse Mesaea.

¹⁷ Mitipatun re metka renge Epram, musuwsuw re Numal Devet, evi metka esngavöl drromon ivij (14). Ko mïtipatun kele renge Devet, musuwsuw re daron nga marteka twenir van re Babilon, evi metka esngavöl drromon ivij kele. Ko mïtipatun kele renge daron nga marteka twenir van Babilon mijpari daron nga Kristo mïiak e, evi metka esngavöl drromon ivij kele.

Iesu eak

¹⁸ Iesu Kristo ermmali iel ngatan erpel. Arlingi ore Merri, Iesu tasu sen. Ko setewor evan ji diwen sen Josep, ko Merri etaule nga mïlesi nga ni mïtetaur. Suri Nemïn On ko esilvi ni.

¹⁹ Ko Josep, Merri diwen sen, evi jinibb nga mumomsawos mïrres, ko orrorrmi þilinglingi silveni nesen sen bbong; omusus puwrai tevi jinibb nir, tuloli Merri non tiwis.

²⁰ Ko daron nga murrorrmi nanu ngel e nir, ko anglo san se Atua eplari jin reenge bori san ko owrai owra "Josep, nik kuvi metka se Devet, sete kupmetutu kuptekai ko wor Merri pivi nesevin som. Suri bipi nga musloi ngok, Nemïn On ko elai tevi.

²¹ Mian ko vinok Merri pia-wosi natun norman san, ko kupa-lingi nisen piwajie Iesu. Suri ni pia-tekai tweni jinibb sen nir renge nololien ser."

²² Nanu ngok eplari jile osorsan tevi nale san se Atua nga propet sen san owra wowomue tuwi pa:

²³ "Nesen mïelakel osloi bipi mian ko pia-wosi natun norman san, ko para-lingi nisen piwajie Emanuel." Ko nais nen arieni erpel: "Atua eptevi kerr."

²⁴ Mian ko Josep emra re meturen sen; ko ololi suri erpe nga anglo se Numal

muwrai tevi ni, ko etkai nesevin sen. ²⁵ Ko sete evan jin ejpari daron nga muwosi natun norman miak. Ko daron nga miak jile musuw, ko elngi nisen ewajie Iesu.

2

Jinibb sopor nga norongwosien ser milep arini arwera parlesi Iesu

¹ Iesu eak rengo Betliem ne Jutia, ko rengo daron nen, Erot evi batu numal. Ko sete epriv, ko jinibb sopor nga norongwosien ser milep arivel re vanu mīnij san nga muto ngasu rengo Is, ko arini Jerusalem e.

² Ko arsus arwera “Nibeni bipi wel nga miak nga pivi numal se mīri Isrel nir? Namlesi moju sen eplari, ko namini tweni nablotoe ni.”

³ Daron nga numal Erot murunge nanu ngel e ko eririr elep, ko erpok kele re mīri Jerusalem kele nir aririr elep kele.

⁴ Ko Erot everus kortoni jinibb nga marlelep ne sulsulen nir ko jinibb nevisvise-nien ne nale nesesreien nir, ko osusi tevir owra “Nibeni lat nga Mesaea piak ren?”

⁵ Ko nir arij weli ni, arwera “Mesaea piak rengo Betliem re Jutia. Suri nale san se Atua nga propet san muli wowomue tuwi ngel, owra

⁶ “Ko nik, Betliem re Jutia, setete kuwelili rengo jinibb nga marlelep nir rengo Jutia. Natum san nga pia-pelari jim pivi numal nga pia-metmete jinibb suk nir mīri Isrel.”

⁷ Mian ko vitunen vajin numal Erot everus silveni bbonge jinibb nen nir ne Is vini ji ni, ko osusi tevir owra “Moju nen eplari re daron sev?”

⁸ Arwera suri jile tevi, ko Erot ekrekrasir owrai tevir, “Erres, kapan kappej bipi wel nen pīrres, ko poro kaplesi ni, ko kaploli inu borongwose; ko inu kele ban bolotoe ni.” Ko Erot okoni twenir arivel van Betliem e.

⁹⁻¹⁰ Ko daron nga marivel kele vajin, ko arlesi kele moju nga; ko artaole, ko arir temijpal. Ko moju nga owowomu kele nir, ko nir arvijuri. Arvijuri moju nga mian ko oto jer mare momsawose naim nga Iesu miak ren.

¹¹ Ko daron nga maran loloim e, arlesi bipi wel nen nuru tasu sen Merri. Ko arjipa van ngatan ko arlotoe ni. Arlotoe jile ko arsaro van rengo nolo narr ser, ko arlai merrenien ser tevi ni, arla gol ko prangkingsens ko mir.

¹² Mian ko vitunen vajin arlesi bori san nga Atua ewer orer sete parkali lweni ji Erot e. Ko arkali lweni re sel mīnij e van rengo vanu ser e.

Josep ko Merri orwosi natu nuru arwolu van Ijip e

¹³ Ko daron nga lartul nga norongwosien ser milep marivel e vajin, ko anglo san se Atua eplari ji Josep rengo bori san ko owrai tevi owra “Kuptur imare kupwosi bipi wolok ko tasu sen, kapwolu van Ijip mun e. Ko kaplik iok pijpari daron nga bea-wera lweni nale tevim. Suri Erot owra pirevji pini, ko otomori pa pipej.”

¹⁴ Daron nga anglo muwrai jile tevi Josep nat nga mupong nen, ko Josep otur imare, owosi bipi wel nen, ko nir tasu sen arwolu van Ijip mun e.

¹⁵ Ko arlik iok ejpari nga Erot mimij.

Ngok eplari osorsan tevi nale se Atua nga propet sen san muwrai wowomu pae tuwi, “Inu beberuse natuk piplari Ijip ko vini.”

Erot okoni jinibb nuval sen nir nga parevji pini bipiwarreng nir

¹⁶ Mian ko vitunen vajin Erot orongwose jinibb ne Is nen arkerkerasi, ko ololar lengleng. Ko okoni jinibb ne nuval sen parevji pini bipi norman nir re Betliem ko rrale pētpēti Betliem, nga sia ser ejpari eru ko sia ser mulwi vitan. Ngel osorsan tevi daron nga jinibb ne Is marwerai tevi.

¹⁷ Ngok eplari erpe nale se Atua nga Jeremaea muwrai wowomue tuwi:

¹⁸ “Arunge dengen san rengo ngaim ne Rama, arting nga arting lengleng. Rejel ko etengsi natun, ko omusus parjinge, suri natun armij pa osuw.”

Josep arivel lingi Ijip, ko arluwi van Nasret e

¹⁹ Mian ko Erot emij vajin, ko anglo se Atua eplari kele ji Josep rengo bori san rengo Ijip ko owrai tevi, owra

²⁰ “Kuptur imare, kupwosi bipi wolok, ko kami tasu sen, kapluwi van re vanu Isrel kele e. Suri mīer nga muwra pirevji pini bipi wolok emij pa osuw.”

²¹ Ko Josep otur imare ko owosi bipi wel nen, ko arluwi van re vanu Isrel e.

²² Mian ko Josep ornge kele nga Arkelaos ela wani milnge tata sen Erot, evi numal ne Jutia. Murunge ko emtutu pian iok e. Mimtutu pian iok e, ko elesi bori san kele nga Atua ewer ore sete pian, ko arwolu van re vanu ne Galili e.

²³ Ko arini arlik rengo ngaim san nga nisen Nasret. Ngok eplari wor osorsan tevi nale se Atua nga propet sen san muwrai wowomu pae suri Kristo, “Ni parveruse mīri Nasret ko.”

3

Jon Baptaes ewerwer rengo lolo merwer

¹ Mian mian ko vitunen Jon Baptaes evini ewerwer re lolo merwer ne Jutia, owra

² “Nolo kami pulululwi, suri otomori le pa batun vanu ne melrin p̄irmali.”

³ Suri Jon evi m̄er nga Atua m̄ijilwer suri renge nale ngel nga propet Aesea muli tuwi pa, muwra “Jinibb le san ekail renge lolo merwer, owra ‘Kaploli lilane sel se Numal puto metmet terai. Kaploli mesekle sel sen nir parmetet p̄irres.’

⁴ Jon sunsun sen erpe propet Elaeja tuwi. Ori nevluk kamel, ko netatuw sen arloli nevluk buluk e. Ko re devjen nga re nanen sen e, elai nato nga mok-rowrow re mösmös ko narllu sukabak nga m̄ierri orivi nanen sen.^A

⁵ Ko nir jijle ne Jerusalem ko ne Jutia ko rrale nuwi seser ne Jortan arivel ko arini jin.

⁶ Arini jin, ko daron nga marwera tweni nololien ser; ko Jon epaptaes nir renge nuwi seser ne Jortan.

⁷ Ko daron nga m̄ilesi Parasi ko Satusi, nga marivi jinibb nga marlelep re m̄eri Isrel nir, ko Jon owrai tevir: “Kamivi jinibb nga kamsij O! Kamirpe metka ne nuñet. Ko weta, kami kamrongwos kapwolu asi ko renge lolaren se Atua nga pia-vini?”

⁸ Poro nolo kami pulululwi, rrek erres kapviseni wenen nen.

⁹ Sete kapwerwera tevi kami: ‘Epram evi metka se kerr; ko ngok rramivi pa jinibb se Atua ko.’ Nu nuwrai tevi kami: Atua orongwos p̄ilai nevöt nawon ngel nir ko p̄irienir parivi metka se Epram.

¹⁰ Lelingen ngel artori batu deli oto metmet nga parta ototvi lape nai nir; ko nai jijle nga marsij, sete wener marres mun, parta twenir parwirr nir van renge nabb nga m̄in.

¹¹ Nu nupaptaes nuwi e kami, kami nga nolo kami mulululwi. Ko san nga pivivitu suri inu, ni ean wor mare renge inu. Inu sete nures rragrrag nuvter re besai but sen nga m̄irae. Ni pia-paptaese kami re Nem̄in On ko nabb.

¹² Ni otori nai juljule san renge nevren nga pujujle wene wit e nir, ko dokolvir parwirr lingi jelangir; ko p̄iser kortoni jelangir p̄ilngir renge bepeim sen, ko pusli dokolvir renge nabb nga sete san orongwose pivsi pini.”

Jon epaptaese Iesu

¹³ Vitunen Iesu evel re Galili vini re nuwi seser ne Jortan, pian ji Jon p̄ipaptaese ni.

¹⁴ Ko Jon owra p̄iwer ore ni, owra “Erpese nik kuvini jik nga inu bepaptaese nik? Erres ma poro nik kuppaptaese inu.”

¹⁵ Ko Iesu erij weli, owra tevi ni: “Puto p̄irpok ko wor, nga rroporloli nanu jijle nga Atua mimrreni parpelari.” Ko ni epaptaese ni vajin.

¹⁶ Ko Iesu daron nga m̄ipaptaes jile, evel lingi nuwi evesane, ko elesi melrin etp̄ir; ko elesi Nem̄in se Atua ojubbul erpe wum̄er, ko evini esilvi ni.

¹⁷ Ko drrelan san eplari re melrin, owra “Morok evi natuk nga memrreni, nurnge erres elep suri ni.”

4

Demij orrowrowe Iesu

¹ Daron nga Jon m̄ipaptaes jile Iesu musuw vajin, Nem̄in On etkai Iesu van re lolo merwer nga Demij purrowrowe ni.

² Ko Iesu elngi tweni nanen, owra pulot van ji Atua. Ko mulot mian mian mijpari vajin nabong ngavöl ivij (40), vitunen ko ornge numer eaji lengleng.

³ Ko Demij, nga mok-rrowrowe jinibb, evini jin, owra puloli Iesu pivitan. Ko owrai tevi ni: “E, nik kuvi pa Atua natun, ko numer ajim. Kupwera tevi nevöt nawon ngel nir, parivi niv.”

⁴ Ko ni erij weli ni, owrai tevi ni, “Ejki, sete bololi, suri aruli erpel renge Nale On se Atua, ‘Jinibb sete orongwose pimaure kis e niv kobbong; pimaure e nale jile ngok nga miplari renge jingo Atua.’ ”

⁵ Vitunen Demij etkai Iesu van renge ngaim nga muon renge Jerusalem, ko elngi renge drromdrromo Naim On mare jer,

⁶ ko owrai tevi, “E, nik kuvi pa Atua natun. Kuprow jubbul vitan. Suri aruli erpel renge Nale On se Atua: ‘Atua pia-koni anglo sen nir, parwosinik renge nevrer mare, suri nik tukjilaklak wos belam renge nevöt.’ ”

⁷ Ko Iesu owrai tevi: “Ejki, sete bololi, suri aruli kele erpel renge Nale On se Atua: ‘Nik sete kuprowrowe Numal Atua som te, pijki.’ ”

⁸ Vesan kele Demij etkai Iesu van re botwen san nga muwu mare jer, ko evise-nie ni batun vanu jile ne iel ngatan nir, ko nosrövien nen nir.

⁹ Ko owrai tevi, “Poro nik kupjipa van ngatan kuplotoe inu, ko bea-lai nanu jile ngel nir tevim.”

¹⁰ Ko Iesu owrai tevi ni, “Kupruj ngasu, Demij, suri aruli erpel renge Nale On se Atua: ‘Nik kuplotoe Numal Atua som, ko ni kobbong nik kupmajing sen.’ ”

¹¹ Muwrai jile tevi, ko Demij elinglingi ni. Ko anglo sopor arini ji ni ko armetmete ni.

¹² Vitunen Iesu ornge nale nen nga marlingi Jon renge naim ne nekaien, ko ni olwi van Galili e.

^A 3:4 narllu sukabak nga m̄ierri: eg blong sugabag; honey.

¹³ Mivini Galili, ko setemun evan Nasret, elinglingi Nasret ojpon ko etajer van Kapaneam e, ko elik ie. Kapaneam evi ngaim san nga muto devje nuwito nga milep nga mubbun rrerrale nisen Galili, renge vanu ne metka se Sepulon ko Naptali.

¹⁴ Ngok eplari osorsan tevi nale san se Atua nga propet Aesea muli tuwi pa, owra

¹⁵ “Vanu se Sepulon ko vanu se Naptali re devje nuwi seser ne Jortan van re devjen nga ngalu e renge dis; jinibb nen nir arivi jinibb ne vare.

¹⁶ Arivi jinibb nga marlik renge nemalik, mian ko arlesi vajin moron nga milep. Ko jinibb nir nga marlik renge vanu ne namol ne mijen, moron ngok eplari jir.”

¹⁷ Renge daron nen, Iesu etipatun nga mīwerwer, owra “Nolo kami pululwi, suri otomori le pa batun vanu ne melrin pīrmali.”

Iesu everuse jinibb sen ivij

¹⁸ Renge nabong kele san, Iesu evel sere renge jeli nuwito ne Galili. Ko elesi niaken eru, Saemon nga marveruse Pita, ko Antru. Ortuwe niva renge nuwi, suri orivi jinibb nga morok-revrevei nai.

¹⁹ Ko Iesu owrai tevi nuru, “Kopor-vijuri inu, ko inu bea-loli kamru kopor-ivi jinibb nga morok-revrevei jinibb.”

²⁰ Ko ngavilvil nuru orlinglingi niva se nuru ko orvijuri ni.

²¹ Ko Iesu evel rujruj kele sapon ko elesi niaken kele eru, Jemes ko Jon, nuru tata se nuru Sepeti renge drrav ser, arilile niva ser. Ko everuse nuru.

²² Ko ngavilvil nuru orlinglingi drrav ko tata se nuru, ko orvijuri ni.

Iesu evisviseni jinibb nir, ko ololi nir nga marmesi arres luwi

²³ Ko Iesu evel jile re Galili, ko ok-visviseni renge naim gortien ser, ko ok-werwer suri nale nga mīrres suri batun vanu ne melrin. Ko ok-loli nir nga marmesi mesien lele arres luwi.

²⁴ Mian ko nospen sen arsupe renge Siria jile. Ko jinibb nir arwosi jinibb jijle nga marmesi vini jin. Armesi mesien lele: sopor niber arerer, ko sopor demij esisilvir, ko sopor nemī nai ololir armijmij, ko sopor nga niber sopor mimij. Ko ololi nir arres luwi.

²⁵ Ko delung elep arvijuri ni, jinibb ne Galili nir, ko Dekapolis nir, ko Jerusalem nir, ko Jutia nir, ko nir nga marlik van devje Jortan e.

5

Iesu evisviseni jinibb sen nir renge botwen mare

¹ Daron nga Iesu mīlesi delung nir, ko otongsa van mare renge botwen san ko elik ngatan. Ko jinibb sen nir arini jin, arlik rrale.

² Ko ni esa jingon etipatun evisvisenir owra

³ “Neiren renge nir nga norrorrmien ser mian ngatan,

suri batun vanu ne melrin evi pa se nir ko.

⁴ Neiren renge nir nga marok-taure dauren ne nololien,

mian ko Atua pia-jinge nir ko.

⁵ Neiren renge nir nga nolor maran ngatan jer,

suri mian ko dan pia-ivi se nir ko, ko nanu jile nga marto rengen.

⁶ Neiren renge nir nga marmerrmerreni nga murrun nga mīrres puto pīrres, erpe jinibb armerrmerreni nanen ser ko nuwi numēr,

mian ko Atua pia-la nanu nga marmerrmerreni tevir ko.

⁷ Neiren renge nir nga marok-telasi jinibb, mian ko Atua pia-telasi tweni nir ko.

⁸ Neiren renge nir nga nolor marwokwok, mian ko nir para-lesi Atua ko.

⁹ Neiren renge nir nga marok-loli demat, suri mian ko jinibb nir para-veruse nir Atua natun ko.

¹⁰ Neiren renge nir nga jinibb marloli mīsij tevir suri arloli nanu nga marres, suri batun vanu ne melrin evi pa se nir ko.

¹¹ “Ko neiren renge kami poro jinibb nir parwor suri kami, ko poro nir parloli pīsij tevi kami, ko poro nir parkerkeris pīsij tevi kami, parwera nanu lele nga marsij suri kamivi inu jinibb suk nir.

¹² Kami kaḡir pilep, suri nowli kami elep re melrin, osorsan tevi nowli propet san. Suri propet nir nga marwowomue kami tuwi, jinibb arloli esij ko pa tevir erpok.

Sol ko Moron

¹³ “Murru kami nga mīrres arirpe sol se jinibb jijle nir nga marok-lingi re nanen ser. Ko poro nga sol dilten nga mīrres pivel lingi jijle, ko pīrres luwi pīrpese ko? Erres re parlai ko parsor tweni, ko jinibb parivivel ren parbōtōtōtō ren vajin.

¹⁴ “Ko murru kami nga mīrres erpe moron se jinibb jijle nir. Moron sete orongwos puto teptepi; osorsan tevi ngaim nga milep san nga muto limjer mare re botwen.

¹⁵ Ko poro jinibb san pusli nasul, ko sete orongwos putori ngatan; putori mare sapon, ko puloli jinibb jile parlesi moron.

¹⁶ Kami kamivi nasul nen. Moron se kami pimor wor van ji jinibb jile, puloli jinibb jijle parlesi majingen se kami nga mīrres, ko parsurōvi Tata se kami nga mīlik renge melrin.

Iesu ošpe suri nale nesesreien se Moses

¹⁷ “Sete kaprrormi inu nuvini tweni bolokloksi nale ne nesesreien nir ko nale se propet nir nga marto re Naul On. Inu sete nuvini tweni bolokloksir, ejki, nuvini tweni bololir parpelari le.

¹⁸ Nuwretun nuwrai tevi kami, pia-jipari daron nga melrin ko iel ngatan pora-asi, sete bebje nale nesesreien san piasan nawon, pia-jipari nga nanu ngel jikle nir para-pelari.

¹⁹ Poro jinibb pisan putor otvi nale nga welwelili jer nen san reнге nale nesesreien, ko pivisviesie jinibb nga parloli pipok kele, mernen parveruse pivi jinibb nga welili jer reнге batun vanu ne melrin.

²⁰ Inu nuwrai tevi kami, kaploli nanu nga parres, parasie jinibb nevisviesien ne nale nesesreien nir ko Parasi nir. Poro pijki, setete kami kamrongwos kapan reнге batun vanu ne melrin.

Iesu evisvieseni suri sel ne lolaren

²¹ “Kami kamrunge pa nga marwerai pa tevi birtera ne tuwi nir reнге Naul On, ‘Sete kuprevji pini jinibb pisan. Ko poro jinibb san pivevji pini jinibb pisan, mernen pia-sij ren re daron nga Atua puwra suri lat nga puto suri tevi jinibb nir.’

²² Ko inu ma nuwrai tevi kami vajin, Poro jinibb pisan pulolarsi tuwan kobbong, mernen pia-sij ren re daron nga Atua puwra suri lat nga puto suri tevi jinibb nir. Ko poro jinibb pisan puwrai tevi tuwan, ‘Kulengleng,’ mernen pia-sij ren re nospen se numal nir. Ko poro jinibb pisan puwrai tevi tuwan, ‘Kuvi jinibb nga kumloli sagraut nanu,’ mernen pia-sij ren reнге nabb ne norongen nga misij.

²³ “Ko erpok, daron nga kumla merrenien som vini re nawot nga marok-sulsul ren tevi Atua, ko iokporo kuprrormi jipari nga nik kumloli tuwam ololar,

²⁴ kuplingi merrenien nen puto mun, ko kupan kuploli pirres tevi tuwam, pusuw, ko kupluwi vini kele kupa-la merrenien som vajin.

²⁵ “Ko poro nga jinibb san nga kumloli mulolar pitkai nik nga koporan re nospen se numal nir, kupsaro pingavil, kuploli pirres tevi ni. Poro mijki, ko ni tia-lingi nik tevi numal nga mok-wera suri lat nga puto suri re jinibb nir, ko ni tia-lingi nik tevi jinibb ne naim ne nekaien, ko mernen tia-lingi nik reнге naim ne nekaien.

²⁶ Nuwretun nuwrai tevi nik, sete kurongwos kupivare re naim ne nekaien pijpári daron nga nik kupkele lweni nevöt nen jikle.

Iesu evisvieseni nir reнге sel nga marloli misij tevi nesevin

²⁷ “Ko kami kamrunge nga marwerai kele reнге Naul On arwera ‘Sete kupvenae nesevin minij.’

²⁸ Ko inu ma nuwrai tevi kami vajin, Poro nga jinibb pisan pimenteni rres nesevin kobbong ko nolon pivnae, ngok nolon ololi pa esij jile ko tevi vinnen.

²⁹ Ko poro nga metem rres puloli nik kupvitan pipok, ko kupla tweni re nik, kupwirre. Erres pelak kobbong re metem devjen pijkie, evi nanu nga welili kobbong, reнге poro nga parwirre nibem totoklai pian reнге lat ne nejikien.

³⁰ Ko poro nga nevrem rres puloli nik kupvitan pipok, ko kupta tweni re nik ko kupwirre. Erres pelak kobbong re nik nevrem devjen pijkie, evi nanu nga welili kobbong, reнге poro nga nibem totoklai pian reнге lat ne nejikien.

³¹ “Ko arwerai kele reнге Naul On arwera ‘Isi nga pilngi kurtweni nesevin sen puli naul san suri, ko pilai tevi vinnen.’

³² Ko inu ma nuwrai tevi kami vajin, Poro nga jinibb san nesevin sen sete puloli womue batun, ko mernen bbong pilngi kurtweni nawone, ko mernen ololi esij nga nesen sen pian pivitan re norman minij. Ko poro nga san pilesi vin nga mner nga milngi kurtweni ngok, mernen evitan re nesevin ngok.

Iesu evisvieseni nir nga marok-loli rijri-jen nga marterter

³³ “Ko kamrunge kele nga marwerai tuwi reнге Naul On, ‘Sete kurongwos kupwera nise Atua nga puloli rijrijen som pitertter, ko mian ko vitunen ko kuptor otvi nale nen. Poro kupwera nise Atua, ko kuploli ko wor pusorsan tevi kumwera.’

³⁴ Ko inu ma nuwrai tevi kami vajin, Sete kupwera rragrag nise nanu san nga puloli rijrijen som pitertter. Sete kupwera nise melrin, suri evi lat seksakel se Atua;

³⁵ sete kupwera nise dan, suri evi lat nga milngi belan ren daron nga misakel re nai seksakel se ni; sete kupwera nise Jerusalem, suri evi ngaim nga milep se Numal nga milep.

³⁶ Ko sete kupwera nise batum kele daron nga kumloli rijrijen e, suri nik sete kurongwos kuploli rao batum san puwuwer rrek pitotmot.

³⁷ Ko daron nga ma kumrijrij nga kuploli nanu san, ko kuploli ko wor nanu nen; ko daron nga kumrijrij nga sete kuploli nanu san, ko sete kuploli nanu nen. Murrun nga parwera nawon nise nanu daron nga parijrij, arivel ji Demij kobbong vini.

Iesu evisvieseni nir nga marwera parkele lweni murrun nga marsij nir

³⁸ “Kamrunge nga marwerai kele reнге Naul On, ‘Poro san pulokloksi metem

tuwen, ko nik kupkele lweni kuplokloksi meten tuwen. Ko poro san puti rrawe liwem san, ko nik kupkele lweni, kuputi rrawe liwen san.'

³⁹ Ko inu ma nuwrai tevi kami vajin, Sete kapwewer ore jinibb nga n̄isij. Poro pun-gasim, ko puwje vasum rres, ko kuprieni nom, ko puwje kele vasum devjen kele.

⁴⁰ Ko poro jinibb san puwra p̄ilngim renge nospen se numal nir ko p̄ilai sun-sun som tuwen, ko kuplinglingi kele p̄ila sunsun ne melas som.

⁴¹ Ko poro jinibb san puon terter nik kupsa narr sen van ngasu, ko nik kupsai van ngasu jer wor.

⁴² Ko poro jinibb san pungoni nanu san ji nik, kuplai tevi ni; ko poro jinibb san owra p̄ilai mun jorom, sete kapwewer ore ni.

Iesu evisviseni nir nga parmerreni ko wor devje nuval ser

⁴³ "Kamrunge nga marwerai kele renge Naul On, 'Kupmerreni selem ko kupungasi jinibb nga mok-loli n̄isij tevim.'

⁴⁴ Ko inu ma nuwrai tevi kami vajin, Kapmerreni wor jinibb nga marok-loli n̄isij tevi kami, ko kapverus suri nir nga marungasi kami.

⁴⁵ Pīrpok ko kapivi natu Tata se kami mawos nga m̄ilik renge melrin. Suri ni ololi nial sen esin ji jinibb nga marres ko nga marsij, ko okoni naus ous ji jinibb nga marres ko nga marsij.

⁴⁶ Poro kapmerreni lartul nga bbong marmmerreni kami, ko ngok sev ko pivi nowli kami ren? Iok jinibb nga marok-lai takis kele, nga jinibb jijle nir marungasir, nir kele arok-loli kobbong erpok.

⁴⁷ Ko poro nga kapwera 'erres' tevi tuwa kami nir kobbong, kamloli nanu nga jinibb jijle kobbong nir marok-loli. Jinibb nga marlik re devjen nga vare nir arok-loli kele erpok.

⁴⁸ "Ngok pīrpel ma, kami kapivi wor jinibb mawos nga kapmomsawos p̄irres jijle ko, pīrpe Tata se kami nga m̄ilik re melrin ni omomsawos erres jile."

6

Sel nga marla nanu tevi beres (puaman) muto suri

¹ Ko Iesu owra "Kapmetmet, sete kaploli nanu nga n̄irres nga jinibb nir parlesi nawone. Poro pīrpok, ko nowli kami nga Tata se kami nga m̄ilik re melrin pia-lai tevi kami tijkie, suri jinibb arsurōvi pa kami osuw.

² "Erpok, daron nga nik kumlai nevōt tevi beres, sete kupsuṣuṣe kele tevi jinibb nir, pīrpe lartul nga marivel re sel eru

marok-loli re naim gortien nir ko renge sel nir, nga marwera jinibb parsurōvir. Nuwretun nuwrai tevi kami, nir arlai pa nowlir ko osuw.

³ Ko nik ma, daron nga nik kuplai nevōt tevi beres, kuplai silveni kerīkamē, sete jinibb san purongwose.

⁴ Ko Tata som vajin nga m̄ilesi nanu nga muto silveni pia-lai nowlim tevim.

Iesu evisviseni nir renge sel momsawos ne loten

⁵ "Ko daron nga kamlot e, sete kaploli pīrpe lartul nga marivel re sel eru. Nir armerreni partur renge naim gortien nir ko partur ore mesakelkel ne sel nir, nga jinibb nir parlesi nir parlot. Nuwretun nuwrai tevi kami, nir arlai pa nowlir ko osuw.

⁶ Ko nik ma, daron nga nik kuplot, kupan renge naim som ko kupkiorore metalī, ko kuplot van ji Tata som nga m̄ilik silveni. Ko Tata som nga m̄ilesi nanu nga muto silveni pia-lai nowlim tevim.

⁷ "Ko kami, daron nga kaplot, sete kapwewer lululweni nanu nga kami sete kamrongwose, pīrpe jinibb nga marlik vare marok-loli. Suri nir arrorrmi poro nga nir parwer lululweni pīrpok, ko atua ser nir parunge loten ser.

⁸ Sete kami kaploli pīrpok pīrpe nir, suri Tata se kami orongwose womu pae sev nga nevre kami marmnumrrol ren, vitunen ko kama-ungoni ni.

⁹ Ko ngok kami sel nga kaplot ren pīrpel le: Kapwera

"Tata se kem, nik nga kumlik renge melrin, Nik nisem on. Nammerreni jinibb jijle nir partori nisem.

¹⁰ Nammerreni nik batun vanu som pivini iel ngatan.

Nammerreni nik marongen som piplari iel ngatan, pīrpe nga muto pa re melrin.

¹¹ Kupla nanen pivter tevi kem lelingen, nabaani.

¹² Ko kuptelasi tweni nololien se kem, pīrpe nga kem namok-telasi pa nanu nga marsij nga jinibb nir marok-loli tevi kem.

¹³ Ko sete kuploli nanu parini parrowrow p̄elake kem. Ko kuptor ore Demij, sete pivini pulokloksi kem.

[Suri batun vanu evi som, ko derteren evi som, ko nosrōvien evi som, ko parto pījpari tuwi ngok vini. Amen.]^B

¹⁴ "Suri poro kami kaptelasi tweni nololien se jinibb nir nga marok-loli tevi kami, ko Tata se kami nga m̄ilik re melrin

B 6:13 Nale nga muto re nolo [], rrek sete Matiu oli, ko jinibb san ea-uli vitue daron nga muli tweni kopi san ne naul ngel.

kele ðitlasi tweni nololien se kami kele vajin.

¹⁵ Ko poro sete kaptelasi tweni nololien se jinibb nir, ko Tata se kami kele sete mia-telasi tweni nololien se kami kele vajin.

Murrun nga parlingi kurtweni nanen lat nga muto suri

¹⁶ “Ko daron nga kamlingi kurtweni nanen nga kaplot van ji Atua, sete kaploli pirpe lartul nga marivel re sel eru. Arloli nor ous nawon nga jinibb nir parongwose nga marlinglingi tweni nanen ser. Nuwretun nuwrai tevi kami, nir arlai pa nowlir osuw, suri jinibb arsurövör pa.

¹⁷ Ko nik, daron nga nik kuplingi kurtweni nanen nga kuplot, kupwirap vaseni nom ko kuploli lilane nom ðirres pirpe bbong nabong jijle komok-loli.

¹⁸ Pirpok, ko jinibb nir sete parongwose nga nik kumlingi tweni nanen. Ko Tata som ma nga milik silveni, ni kobbong purongwose; ko Tata som nga nūlesi nanu nga muto silveni pia-lai nowlim tevim.

Nijor renge melrin

¹⁹ “Sete nolo kami parkul, ko sete kapok-ser kortoni kis joro kami nga marres iel ngatan. Suri momom tuti ko doto nir tarurro lokloksir, ko jinibb venao tubbri lut nabbu ko tian tivevna loloin.

²⁰ Nolo kami parres, ko re sel ngok, kapok-ser kortoni joro kami nga parres parto renge melrin mare. Suri momom sete orongwos puti, ko doto sete arongwos parurro lokloksir, ko jinibb venao sete orongwose pubbri lut nabbu ko pian pivevna loloin.

²¹ Ngok poro nga jorom puto renge lat nga mūrres, ko nolom kele ðirres, suri jorom oto pa lat nga mūrres osuw.

Moron ne niben

²² “Mete jinibb erpe moron ne niben. Poro nga metem ðimērer, ko moron puwun saut re nibem totoklai. Ngok owra puwra, poro nga nolom ðirres, ko mauren som totoklai kele ðirres.

²³ Ko poro nga metem ðisij, ko nemalik puwun saute nibem totoklai, suri metem erpe moron ne nibem. Ngok owra puwra, poro nga nolom pukul, ko mauren som totoklai kele ðisij jile.

²⁴ “Sete jinibb san orongwos ðimajing se numal ðieru pivesane. Poro pirpok, ko tungasi nuru tuwen, ko timrreni nuru tuwen nen. Erpok ko, sete Atua orongwos pukonim re majingen sen poro nevöt mukonim pa renge majingen sen. Suri sete kurongwos kupmajing se nuru korti pivesane.

Atua orongwos pimetmet kami ðirres

²⁵ “Suri nanu ngel, nuwrai tevi kami, sete kaprorrmi ðelake mauren se kami. Sete kapok-wera ‘O, rrapurroi sev le?’, rreknga ‘O, rrapmini sev le?’, rreknga ‘O, rrapuri sunsun sev le?’. Mauren se jinibb nir evi nanu nga milep nga Atua nūlai pa tevi jinibb nir. Nanen evi nanu nga welili jer kobbong—Atua orongwos ðilai kele kobbong. Ko nibe jinibb nir kele evi nanu nga milep nga Atua nūlai pa tevir. Sunsun evi nanu nga welili jer kobbong—Atua orongwos ðilai kele kobbong.

²⁶ Kaprorrmi ta numön nga marok-il suri mesa ngok nir. Nir sete aruw ko sete arili tweni, ko sete arilingi nanen ser renge ðepeim; ko Tata se kami nga mok-lik ko re melrin ok-wunganir. Ko kami kamrres womu nen ko wor re numön ngok nir re no Atua, ngok ni puwngani kami kele ko wor.

²⁷ Kaprorrmi ta mēr nga murrormi ðelake mauren nga murrrol. Orongwos puloli kele mauren sen pipriv kele renge sel ngok? Ejki rres nawon!

²⁸ “Ko suri sev kamrorrmi ðelake sunsun se kami? Kapmeteni wose renge nevngun nga marmaur suri orsel ngok nir. Armaur erpese? Sete armajing erpe jinibb te, ko sete arilile wose.

²⁹ Ko nuwrai kele tevi kami, numal Solomon, daron nga nūlgi sunsun sen nga mūrres ðelak, ko sunsun sen emau erres, sete erpe nga nūtra. Ko sunsun se nevngun, nūsen arres easi.

³⁰ Ko mösmös ne orsel nir armaur erres, ko Atua ololi orsel emau erres e lelingen ngel; ko mevinen mun parsulir ko pa. Ko kami sete kamrorrmi nga Atua ðilai sunsun se kami nga parres? O, lartul, nosurien se kami ewelili jer.

³¹ “Setete kaprorrmi ðelake piprel: ‘Rrapurro ısev? Rrapmini ısev?’ rreknga ‘Sunsun sev rrapuri?’

³² Jinibb nir nga marlik vare arok-pej nanu nga ngok nir. Ko Tata se kami nga nūlik re melrin orongwos pae nanu jijle nga nevre kami murrrol ren.

³³ Ko nanu nga milep nen nga kami kaploli, kappelak nga kapsil van renge batun vanu se Atua, ko nga kaploli suri murrun nga mūrres sen. Ko vitunen ni pia-lai kele nanu ngok jile nir tevi kami.

³⁴ Sete erres kaprorrmi ðelake nanu ne mevi nir. Suri mevi evi nabong nga kaprorr mi suri nanu nga parpelari kis ren. Nanu nga nūsij nga piplari renge nabong san evtere kaprorrmi suri re nabong nen kis kobbong.

Iesu evisviseni nir nga sete parwer lokloksi jinibb san

¹ “Sete kapwer lokloksi jinibb p̄isan, puloli Atua sete mia-wer lokloksi kami.

² Pusorsan tevi nga kami kamwer lokloksi jinibb nir, Atua kele pia-wer lokloksi kami. Ko tevi norngov sev nga kami kamrrongvie jinibb, Atua pia-rrongvie lweni kami e re nabong nga vitunen.

³⁻⁵ Ko erpese kumlesi nate nato nga tuwam m̄ikrae re nolo ðelan, ko sete kulesi suri nate buluk nga milep nga nik kumkeræ re nik nolo ðelan? Ko poro pirpok, ko nik kupwera pirpese tevi tuwam, ‘Tuwak, kuplingingi ðesre tweni nate nato nga kumkeræ re nolo ðelan,’ daron nga nik sete kumleslesi nate buluk nga milep nga nik kumkeræ re nik nolo ðelan? O, nik nga kumiæl rege sel eru, tukbböt re aseni ni ðelan, tuloli ni ðelan turro tiasi! Womunen kupseræ tweni nate buluk nga milep nga nik kumkeræ re nolo ðelan jile pusuw, ko kuplesi nolo ðelan owokwok erres, ko kurongwos kupa-sere tweni vajin nate nato nga tuwam m̄ikrae mibbölji ðelan.^C

⁶ “Ngok orrongrongvi nololien nga wowarreg se kalesia nir. Ko re devjen nga re nir ne vare nga marivi jinibb ngamarsij p̄etp̄eti, kapmetmet re nir. Daron nga poro kapan ji nir nga kapwera tweni nale suk, ko nir arongwose parpalpal p̄iterter tevi kami pirpe guli, ko parungasi nale suk pirpe ðerp̄er marbbötbböt re nanu nga m̄irres.

Loten nga jinibb p̄ilai sev nga mungoni ji Atua

⁷ “Kapungoni, ko Atua pia-lai tevi kami. Kappej, ko Atua puloli kapa-lesi. Kapututi, ko Atua pia-tasi metali nen tevi kami.

⁸ Suri nir jikle nga marok-ungoni paralai, ko nir jikle nga marok-pej para-lesi, ko nir jikle nga marok-ututi, para-tasi tevir.

⁹ “Jinibb si re kami poro nga natun pungoni niv tevi ni, ko ni p̄ikrekrasi pia-læ nevöt tevi natun?

¹⁰ Ko poro nga natun pungoni mesal, ko rreknga ni pia-la numet tevi? Ejki rres nawon, sete orongwos puloli pirpok.

¹¹ Ko ngok, kami nga kamivi jinibb nga kamsij kamrongwos sel nga kapla nanu nga marres tevi natu kami nir. Ko Tata se kami nga m̄ilik re melrin pia-lai ko wor pumomsawos nanu nga marres tevi nir nga marungoni ni.

¹² “Nanu jikle nga kami kamwera jinibb parloli tevi kami, kami kele kaploli ko wor tevi nir pirpok kele. Ngok kobbong evi

murrun ne nosp̄en jile se Moses ko propet nir nga maruli re Naul On.

Sel ne mauren ko sel ne nejjikien

¹³ “Kapasi rege metali nga m̄ikel, nga pian re lut ne mauren. Suri metali ko sel nga poran rege lut ne nejjikien, metali nen nolon elep, ko sel nen kele elep, ko nir elep nga marvijuri.

¹⁴ Ko metali ko sel nga poran rege lut ne mauren, metali nen nolon ewelili jer, ko sel nen kele nolon ewelili jer; ko nir pievis kobbong para-vijuri.

Rraplesi wose jinibb rege wenen ne mauren sen

¹⁵ “Kapmetmet rege propet ne gerisen nir. Arirpe guli rrum nga numer m̄iajir, ko aruri nevlu sipsip arkerkeris arirpe sipsip nga sete marongwose parlokloksi nanu san.

¹⁶ Kaplesi wose nir rege wenen nga marpelari rege mauren ser. Sete jinibb arongwose partawe wene drra rege moku, ko wene nitapol rege jiberimj, ejki.

¹⁷ Erpok, nai jikle nga marres parwen kele wenen nga marres, ko nai jikle nga marsij parwen wenen nga marsij.

¹⁸ Nai jikle nga marres sete arongwos parla wenen nga marsij, ko nai jikle nga marsij sete arongwose parla wenen nga marres.

¹⁹ Ko nai jikle nga sete parwen wenen nga m̄irres, parta twenir, ko parwirrer van re nabb.

²⁰ Erpok, kaplesi wose nir rege wenen nga miplari re mauren ser.

Jinibb mawos nir se Iesu

²¹ “Sete nir jikle nga marok-veruse inu ‘Numal, numal’ tetajer paran rege batun vanu ne melrin. Rrek nir pievis kobbong, nir nga bbong marok-loli marongen se Tata suk nga m̄ilik re melrin mare ko.

²² Erpok, rege nabong nga vitunen, nir elep parwera tevi inu, ‘Numal, numal, sete kurrormi wos nga kem namsupe nosp̄en som re nisem, ko nga kem namoji tweni demij nir rege nisem, ko nga kem namloli majingen nga marterter marlelep marres nir rege nisem?’

²³ Ko vitunen bea-wera limjer tevi nir, ‘Setete nurongwose kami. Kapruj ngasu inu, kami nga kamok-majing nanu nga m̄isij.’

Jinibb lele eru nga morili naim

²⁴ “Ngel, jinibb jikle nga marunge nale suk ngel nir ko marlolir, osorsan erpe jinibb san nga norongwosien sen otoa, nga m̄ili naim sen rege dan nga m̄iterter m̄irres.

^C 7:3-5 Erpe iel, Matiu ospe suri nanu nga muto re mete jinibb, ko kem namrieni nga namvijuri murrun ne rijen ne nale nga iel.

²⁵ Mili jile vajin, mian ko naus ous elep, ko nuwi owluni, ko ling eser elep ko owi naim eterter. Ko setete evitan, suri arili pa eterter renga dan nga miterter mürres.

²⁶ Ko jinibb jile nga mülengleng, norongwosien sen mükjie, nga müli naim sen renga depinan.

²⁷ Mili jile vajin, mian ko naus ous elep, ko nuwi owluni, ko ling eser elep ko owi petpate naim. Ko emav ko omobburbur jile."

Nevisvisenien se Iesu orrow erres

²⁸ Iesu evinvinini ore nale sen osuw iok. Ko bbösa nga milep elai delung e nir.

²⁹ Suri ni nevisvisenien sen orrow erres, sete erpe nevisvisenien se jinibb nevisvisenien ne nale neseseien nir.

8

Iesu ololi jinibb sopor arres luwi re mesien ser

¹ Daron nga Iesu mujubbul vajin e renga botwen, ko delung nga milep nir arvijuri ni.

² Ko jinibb san nga mimsi mesien nga niber mämemaual evini ejiol vitan jin, ko owra "Wurru, numal, oto ji nik, poro nga nik kupmarong, ko kurongwos kuploli nibek puwokwok luwi."

³ Ko Iesu esareni nevre ejari märenen niben, ko owra "Inu numarong, nibem puwokwok luwi." Ko ngavilvilisen mesien nga nibem mämemaual evel lingi ni, ko niben owokwok luwi erres.

⁴ Ko Iesu ewer ore, owrai tevi: "Kuplesi sete kupwerwerai tevi jinibb pisan, ko kupan kupviseni nibem tevi jinibb ne sulsulen san, ko kuplai merrenien pisan pusorsan tevi Moses muli tuwi suri nir nga marres luwi re mesien ngok, miviseni nir nga nibem muwokwok pa musuw."

⁵ Ko daron nga Iesu mian renga Kapaneam e, ko numal san se jinibb ne nuval ne Rom nir evini ji ni

⁶ ko ongoni ni, owra "Wurru, numal, nanwarreng weli ne majingen suk emsi, ematur renga naim. Emsi mesien nga nibem mokmijmij e, ko ornge esij pelak."

⁷ Ko Iesu owra lweni tevi: "Inu bevinuk le pa, rroporan bololi ni pürres."

⁸ Ko mänen ewer ore, owra lweni tevi Iesu: "Numal, sete nures nga nik kupini re loloim suk. Ko kuptur iok kobong, kupwera bbong nale, ko nanwarreng suk wel nen pürres luwi re mesien sen.

⁹ Ko inu kele derteren suk otoo, ko numal suk sopor kele derteren ser arasie inu wor. Ko poro nga bowrai tevi jinibb ne nuval suk san, 'Kupan,' ko ni pian ko wor; ko poro nga bowrai tevi san kele, 'Kupini,' ko ni pivini ko wor; ko poro nga bowrai tevi

jinibb ne majingen suk, 'Kuploli pürpel,' ko ni puloli ko wor pürpok."

¹⁰ Ko daron nga Iesu murunge nale sen ngel, ko etaole, ko owrai tevi nir nga marvijuri ni: "Nuwretun, nuwrai tevi kami, setete nulesi jinibb san ne Isrel nga nosurien sen milep mirpe märel.

¹¹ Nuwrai tevi kami, nir pilep nga paravel re Is ko re Wes ko ngatan jile vini, para-lik ngatan tevi Epram ko Aesak ko Jekop renga batun vanu ne melrin, ko para-aani nanen.

¹² Ko märi Isrel nir nga marrorrmi nawon nga paran renga batun vanu ne melrin, para-sor twenir, paran renga lat nga mimalik jerjer. Iok ngok jinibb parating ko para-runge pürsij pilep."

¹³ Ko Iesu owrai lweni kele tevi jinibb nuval nen, "Kupiel; nanu nga kumosuri piplari ko jim." Ko renga mete nial mawos nen, nanwarreng wel nen erres luwi re mesien sen.

¹⁴ Ko vitunen, Iesu evan loloim se Pita, ko elesi Pita pürilen lektek ematur emsi mesien dowalul.

¹⁵ Ko Iesu ejari nevre nesevin, ko mesien dowalul osuw re ni. Ko emra, ko etabbuni nanen se Iesu.

¹⁶ Ko rivriv jer, re daron nga nial muwaj pini, ko nabong on ser musuw, ko artektekai jinibb elep vini ji Iesu nga demij marsisilvir; ko ni oji tweni nemün nga marsij rer tevi nale sen, ko ololi nir nga marmesi arres luwi re mesien ser.

¹⁷ Ngok eplari osorsan tevi nale san se propet Aesea nga muli tuwi mirpel: "Ni ela tweni mesien se kerr ko norongen nga müsij se kerr."

Jinibb eru ormerreni porvijuri Iesu

¹⁸ Ko vitunen Iesu elesi delung elep nga martur rrale ni, ko owrai tevi jinibb sen nir, "Rrapan re devje nuwi Galili e."

¹⁹ Ko jinibb nevisvisenien ne nale neseseien san evini ji ni, ko owra "Jinibb nevisvisenien, ngabe nga kupa-van e, ko inu bea-vijuri nik."

²⁰ Ko Iesu owra lweni tevi ni, "Guli rrum nga wowarreng nir ßelaur otoo, ko numön nir menuner otoo; ko inu Jinibb Mawos, milngek ejkie. Ngok, kuprorrmi mun pürres poro nga kumrreni kupvijuri inu."

²¹ Ko san re jinibb sen owra tevi ni, "Numal, kuplinglingi inu puwomu ban ßetevni luwe tata suk."

²² Ko Iesu owrai tevi, "Ejki, kupvijuri inu, ko kuplinglingi nir nga sete marla mauren ko pa partevni lartul nga marmij."

Iesu ewer ore ling serser nga milep

²³ Erij jile erpok musuw, ko ean esa renga drrav se nir, ko jinibb sen arsa tevi

ni. Ko ni evan, ematur lolo drrav. Ko drrav owl.

²⁴ Ko mian ko ling serser nga milep etewut vini re nuwito, ko owi nuwi daptap nen elelep nga marjerjeravi drrav ser, ko drrav ser otomori purron. Ko Iesu ematur malum, sete emra wor.

²⁵ Ko jinibb sen aran arwuni ni, ko arwerai tevi ni: "Numal, kupla se kerr, otomori rrapmij!"

²⁶ Ko ni owra tevi nir: "Erpese kami kammetutu? Nosurien se kami ewelili jer." Ko otur mera, ko ewer ore ling ko daptap ne nuwi, ko ormol kenīkanīe.

²⁷ Ko nir artaole, ko arwerwerair e, "Jinibb nga mirpese le mirpel ngel, nga mirij tevi ling ko nuwi kele, ko morosuri ni?"

Iesu oji tweni demij rengo mēri Gatara eru

²⁸ Ko vitunen arjipari devje nuwi rengo ngaim se mēri Gatara. Ko jinibb eru nga demij nīsīsilvi nuru orpelari re lat ne dubb vini, orivel ore selen. Nuru orivi jinibb rrum, ko orloli jinibb sete arangwose parasi rengo sel ngok.

²⁹ Ko orkail ko orwera "Nik Atua natun, kuvini iel tweni kuploli sev le tevi komru? Kuvini tweni kuploli komru nobor-runge pišij puwomu, vitunen ko daron nen vajin?"

³⁰ Ko mori bbong nir, nior berper artur arok-susung malum.

³¹ Ko demij nen nir arungoni tevi Iesu, arwera "Wurru, poro kupoji tweni kem, ko kuplinglingi kem naban nabsilvi berper ngok nir."

³² Ko ni owra tevi nir: "Kapan." Ko daron nga marivare, aran arsilvi berper nir; ko nir jille arwolu rengo botwen nga mivjivjar san ko arowrow jubbul van rengo nuwi nga milep nen, ko arron ko armij.

³³ Ko jinibb nga marok-metmete berper nir, daron nga marlesi, arwolu suri sel van ngaim e, ko arsupe nanu jile nga marpelari. Ko nanu nga milep nga marsupe suri, sev nga miplari ji laru nen nuru.

³⁴ Ko nir nga marlik rengo ngaim nen jille nir arivel ore parsesewute Iesu. Ko daron nga marini ji ni ko arungonie eterter, arwera pivel lingi lut nga nir.

9

Iesu ololi jinibb san nga devje niben mimij erres luwi kele

¹ Ko mian ko Iesu esa luwi kele rengo drrav nen, olwi kele vini rengo ngaim sen e.

² Ko jinibb sopor arwosi jinibb san re maling sen nga mimsie mesien nga niber

mok-mij e vini jin. Ko Iesu elesi nosurien ser elep, ko owrai tevi mēri nga mimsi, "Natuk, nolom pirres, betlasi tweni nololien som le pa."

³ Ko jinibb nevisvisenien ne nale nesereien sopor arwerwera lululwenir e, "Aro, mērel erij melmela ko osopsope pa Atua!"

⁴ Ko Iesu orongwose norrorrmien ser, ko owra "Suri sev norrorrmien nga mīsij muto re nolo kami ngok?"

⁵⁻⁶ Evi nanu nga mīsisarow bbong nga bowrai tevi mērel, 'Nololien som nutlasi tweni pa,' suri si pīlesi poro nuwretun rrek nukrekris kobbong? Ko evi nanu nga mīterter kele wor asi ngok nga poro bowra 'Kuptur imare kupla milngom ko kupiel van rengo naim som e,' suri jinibb jille parles lelingen poro pipari pirpe nga mowrai ngok. Ko bololi vajin nanu nga mīterter nen, puloli kaprongwose kele nga inu Jinibb Mawos derteren suk otoo rengo iel ngatan nga betlasi tweni nololien." Ko ni owrai tevi mēri nga devje niben mimij, owra "Nuwrai tevi nik, Kuptur imare kuplai maling som kupwosi, ko kupiel van rengo naim som e."

⁷ Ko ni erres luwi, ko otur imare ko evan rengo naim sen e.

⁸ Ko delung nir arlesi nanu nga muloli, ko armetutue, ko arsurōvi Atua rengo nga mīlai derteren nga mirpok tevi jinibb.

Iesu everus Matiu nga pivi jinibb sen

⁹ Ko Iesu evel lingi lat ngok, orujruj sapon. Ko elesi jinibb san nisen Matiu esakel rengo lat nga mok-lai nevōt netakis e. Ko owrai tevi, "Kupvijuri inu." Ko ni otur imare, evijuri ni.

¹⁰ Ko vitunen Iesu ean loloim se Matiu ko esakel re tep nga piaan. Ko nir elep nga marok-lai nevōt ne takis arini kele, ko nir nga jinibb marok-ungasir arini arsakel tevi Iesu ko jinibb sen nir.

¹¹ Ko Parasi nir marlesi ko arwerai tevi jinibb sen nir, "Erpese numal se kami māian tevi lartul ngok nga marok-loli nanu nga mīsij?"

¹² Ko Iesu ornge nale ser ko owrai tevir: "Nir nga marres sete armerreni dokta; nir nga bbong marmesi ko."

¹³ Kapan kapmeteni suri re mining ne nale se Atua ngel: 'Nanu nga memrreni milep evi murrun nga partelasi jinibb. Murrun nga parsulsul tevi Atua evi nanu nga welili jer kobbong.' Sete nuvini tweni nga beverage jinibb nga marvilvil ore marsij marwera marres, ko nuvini tweni nga beverage nir nga sete markerkeris, ko marwer limjere nga marsij."

Murrun nga mimerr ko murrun nga mītra

¹⁴ Ko vitunen vajin jinibb se Jon Baptaes nir arini ji Iesu, ko arsusi tevi ni: "Erpese kem ko Parasi nir namlingi tweni nanen nga nablot van ji Atua, ko jinibb som nir sete arloli erpok?"

¹⁵ Ko Iesu owra lweni tevir, "Daron nga nesevin muwra pilik ji diwen sen, ko elik malum tevi selen nir renge nanen, sete arongwos partengsi wor. Ko daron nen pia-vini ko nga pia-ivel lingir vajin, ko arongwos parunge pisij vajin ko parlingi tweni nanen ser suri.

¹⁶ "Ko sete jinibb san orongwose pilai bejbe kalik nga mimerr puwol ore lat nga mimarrerr renge sunsun nga mitra e. Poro pipropok, ko kalik nga mimerr nen tia-sakuk ko tia-teri kele sunsun nga mitra, ko tia-loli lat nga mimarrerr tia-lep temijpal.

¹⁷ Ko erpok kele, sete jinibb san orongwos pujongjongi norro nga mimerr van renge botel nga mitra nga marloli nevlunanikot e. Poro pipropok ko norro nga mimerr tut, tuloli nevlunanikot nga mitra tirrerren ko tiap rrrersi, suri etra pelak. Ko norro timejivjiv tisij, ko nevlunanikot kele tisij. Piprel ko, norro nga mimerr parlingi ko wor renge nevlunanikot nga mimerr mimalum mirres."

Iesu ololi nesevin san erres luwi kele, ko nesenwarreng san nga mimij pa emaur luwi kele

¹⁸ Ko daron nga mirij mirpok tevi nir, ko numal san se meri Isrel evini ji Iesu. Ko ejiol ko owra "Natuk nesenwarreng eamij bbong lelingen wolok. Ko poro nga nik kupini, kupa-jipari kobbong ni tevi nevrem, ko ni pia-maur luwi kele."

¹⁹ Ko Iesu otur imare ko evijuri ni, ko jinibb se Iesu nir kele arvijuri.

²⁰ Ko nesevin san nga mok-mesi mesien se nesevin nir tetajer, sete orongwos pumosi ejpari sia esngavöl drromon eru (12), evini evitu suri Iesu re duren, ko ejpari bongsi sunsun sen.

²¹ Nesevin norrorrmien sen erpel: "Poro bbong bejpari bongsi sunsun sen, ko inu bea-rres ko."

²² Ko Iesu erieni lweni ko elesi vinnen ko owrai tevi: "Natuk, nolom pirres, nosurien som ololim kumrres." Ko vinnen erres jer ko pa evesane.

²³ Ko daron nga Iesu mivini vajin re naim se numal nen, ko elesi nir nga marok-uw davö ne mijen, ko nir nga marting vijajeng.

²⁴ Ko ni owrai tevir, "Kapiel, suri nesenwarreng ngel setete emij, ko ematur kobbong." Ko daron nga marunge nale sen, ko armen kerajie.

²⁵ Ko daron nga delung nir maran vajin vare e, ko ni evan re loloim nga nesenwarreng mimatur ren, ko erveinevre nesenwarreng nen imare, ko nesenwarreng emra.

²⁶ Ko nospen nen arsupe re lat nen jile nir.

Iesu ololi metrorrr eru orkulu luwi

²⁷ Daron nga Iesu mivul rujruj lingi ie, ko metrorrr eru orvijuri ni. Ko orkail, orwera "Wurru, kuprorrrmi komru, nik metka se Devet!"

²⁸ Ko daron nga Iesu mian loloim e, ko metrorrr nuru oran jin. Ko ni owra tevi nuru, "Komor-osuri nga inu nurongwos bololi nanu ngel?" Ko nuru orwera lweni, "O-o, numal."

²⁹ Ko ejpari mete nuru, ko owra "Piplari pusorsan tevi nosurien se kamru."

³⁰ Ko mete nuru orres. Ko Iesu ewer ore eterter owrai tevi nuru, "Kopor-lesi sete jinibb san purongwose."

³¹ Ko nuru daron nga morivel, ortur imare ko ortewijreni nospen ne Iesu renge vanu nen jile nir.

Iesu ololi nabbut san erij luwi

³² Ko daron nga nuru morivare re naim e, ko jinibb sopor arpitevi nabbut san nga demij misisilvi vini ji Iesu.

³³ Ko Iesu oji tweni demij, ko nabbut erij luwi vajin. Ko delung nir artaole, ko arwera "Sete pa nabong san rramlesi nanu nga mirpok eplari renge Isrel."

³⁴ Ko Parasi nir arwera "Wi, ok-ojoi tweni demij suri ni elai derteren sen ji numal se demij nir."

Iesu orrorrrmi delung nir

³⁵ Ko Iesu evel rrrerale ngaim nga mar-lelep nir ko nga wwarreng nir, ko ok-visviseni renge naim gortien ser. Ko ok-werwer suri nale nga mirres suri batun vanu ne melrin, ko ok-loli nir nga marmesi mesien lele, mesien ser osuw, arres vajin.

³⁶ Ko daron nga mulesi delung nir, ko orrorrrmi elep suri nir. Suri arirpe sipsip nga sete san mok-metmeter, armaob nawon, setemun arongwose parwolu.

³⁷ Ko owrai tevi jinibb sen nir, "Numös elep pelak, ko nir evis bbong nga partawer ko parilir.

³⁸ Ngok, kapungoni tevi Atua, nga mivi numal ne numös, nga pukoni kele jinibb nga marok-tawe ko marok-ili sapon van re orsel sen."

10

Aposol esngavöl drromon eru se Iesu

¹ Ko Iesu everus jinibb sen esngavöl drromon eru (12), nga marveruse nir aposol, parini mori. Ko elai derteren tevir nga

paroji nemîn nga marsij nir, ko nga parloli nir nga marmesi mesien lele parres luwi.

² Ngel evi nise aposol esngavöl drromon eru: nga womuj nen Saemon, nga maveruse kele e Pita, ko Antru Pita tasin, ko Jemes natu Sepeti ko Jon Jemes tasin,

³ ko Pilip, ko Batolomiü, ko Tomas, ko Matiu nga mok-lai nevöt ne takis bonevis, ko Jemes natu Alpeas, ko Tateas,

⁴ ko Saemon nga bonevis mülük ji nir nga marmerrreni paroji tweni mēri Rom nir, ko Jutas Iskariot, nga vitunen pia-teka kerasi Iesu.

Iesu okoni tweni aposol sen nir

⁵ Jinibb esngavöl drromon eru ngel Iesu okonir van. Ko daron nga mukonir e, ko ewer sesese erpel tevir: "Sete kapan ji jinibb ne vare nir, ko sete kapan renge ngaim san se mēri Sameria nir, pijki.

⁶ Rrek kapan wor ji mēri Isrel nir. Nir arirpe sipsip nga marivel sarrsarr.

⁷ Ko daron nga kapan, ko kapok-werwer pirpel, kapwera 'Otomori le pa batun vanu ne melrin pīrmali.'

⁸ Kaploli nir nga marmesi parres, ko kaploli nir nga marmij parmaur luwi, ko kaploli nir nga marmesie mesien nga niber mīmemaül parwokwok, ko kapoji tweni demij nga marsisilvi jinibb nir. Ngok evi derteren nga marlai nawone tevi kami. Sete kamwuli. Ko kami kele kaplai nawon tevi jinibb nir.

⁹ Sete kapsongni nevöt renge baos se kami; poro pivi nevöt nga milep, rreknga nevöt nga welili, ko sete kapsongni, pijki.

¹⁰ Ko sete kapsa narr se kami daron nga kapiel e, ko sete kaptori sunsun pīeru, rreknga but se kami, rreknga nai nga mokter etete kami. Sete kaptori nanu ngok nir, suri oto ji lartul nga kammajing ser para-lai nanu ngok nir tevi kami.

¹¹ "Ko daron nga kapan renge ngaim nga milep san, rrek nga welili san, kappej siko nga mīrres ren, ko kaplik tevi, pijpari daron nga kapa-ivel.

¹² Ko daron nga kapan renge naim sen, ko kapwera erres tevi nir nga marlik ren.

¹³ Ko poro nga nir parivi jinibb nga marres, ko kaplinglingi rijen se kami nga mīrres ngok putu jer jir. Ko poro nga nir sete parivi jinibb nga marres, ko kaploli rijen se kami nga mīrres ngok pulwi vinuk ji kami.

¹⁴ Ko poro sopor sete parmarong kami kapan ji nir, ko sete parunge nale se kami, daron nga kapiel lingi lut nen, erres kapwirrwirreni tweni maw nga muto re but se kami, nga piviseni tevir nga marloli mīsisij.

¹⁵ Nuwretun nuwrai tevi kami, renge nabong nga Atua pia-wera suri lat nga

puto suri tevi jinibb nir, pia-sij wor pia-asie renge nir ngok renge nir ne Sotom ko nir ne Gomora, nga marsuŕe tuwi pa suri nololien ser nga marsij.

Jinibb nir para-loli pīsij tevi jinibb se Iesu nir

¹⁶ "Kapmurrong. Bokoni tweni kami kapipe sipsip nga paran renge livö ne guli rrum nir. Kapkulu metmet pīrres pirpe numēt, ko kapipe kele wuñer nga sete orongwos puloli pīsij.

¹⁷ Kapmetmet re jinibb nir. Para-tekai kami van re nosŕen se numal ser nir, ko renge naim gortien ser, para-revji kami tevi nai

¹⁸ ko para-tekai kele kami van re no numal nga marlelep sopor kele, suri kamivi jinibb suk. Ko kapa-wera tweni nale suk tevi nir ko tevi jinibb ne vare nir.

¹⁹ "Ko daron nga para-tekai kami, sete kaprrormi pēlake sev nga kapwerai ko pīrpese nga kapwerai. Suri Nemîn On pia-lai nale tevi kami nga kapa-werai renge mete nial mawos nen.

²⁰ Suri sete kami kis kaprij, ko Nemîn On se Tata se kami nga pia-rij renge jingo kami.

²¹ "Ko tuwan pia-tekai tasin pia-lingi re mijen, ko tata kele pia-loli pīrpok tevi natun; ko natur kele nir para-tur imare, para-teka tata ser ko tasu ser para-lingi van re mijen.

²² Ko jinibb jile para-ungasi kami suri kamivi jinibb suk. Ko si nga pia-tur pīterter pijpari bongsin, Atua pia-la maworen tevi.

²³ "Ko poro nga parloli esij tevi kami renge ngaim san, ko kapwolun van re ngaim nga surie. Nuwretun nuwrai tevi kami, setete kapiel pētpēti re ngaim ne Isrel nir, pijpari inu Jinibb Mawos bea-luwi vini.

²⁴ Sete jinibb san elep asi ni nga mokvisviseni, ko sete jinibb ne majingen san elep asi numal sen.

²⁵ Jinibb san purnge pīrres kobbong nga pīrpe numal sen. Ko poro san piveruse numal san puwra 'Bielsepal' (ngok evi nise numal se demij nir), ko pia-rij pia-sij kele wor tevi jinibb sen nir, suri jinibb sen nir arivi jinibb nga welili kobbong.

Sete erres jinibb se Iesu pimtutu

²⁶ "Ngok, sete kapmetutue nir. Suri nanu jijle nga mītiwtawi ore, para-raji putu limjer; ko nanu jijle nga muto teptepi, para-rongwose kele e.

²⁷ Sev nga mowrai silveni tevi kami, ko kapa-werai limjer; ko sev nga mowra renge boro kami, kapkail van mare, kapwerai tevi jinibb nir.

²⁸ "Ko sete kapmetutue nir nga marokrevji nibe jinibb, ko sete arongwose parevji

neñir. Kapmetutu wore Atua kobbong, suri ni orongwose pivevji kortoni niben ko neñin rengo lat ne norongen nga mñisij.

²⁹ “Arok-wulwule numõn nga wowar-reng nir nowlir ean ngatan temijpal. Ko sete nir san pivitan aseni ngatan poro nga Tata se kami sete pimarong.

³⁰ Ko kami, kamelelep lingi nir wor ji Tata se kami. Erpe kami kamrrommi rao batu kami evi nanu nga welili kobbong; ko suri kamelelep ðelak ji Tata se kami, ni orongwose jille rao batu kami nir.

³¹ Ngok, sete kapmetutu. Kamelelep temijpal wor asi numõn nga wowar-reng ngok nir, ko Tata se kami pimemetete kami kele wor.

Jinibb nga muwra tweni nga ni evi se Iesu

³² “Si nga puwrowrai inu rengo no jinibb nir, inu kele bea-werwerai ni rengo no Tata suk nga mñilik re melrin.

³³ Ko si nga pivilvil ore inu rengo no jinibb nir, inu kele bea-vilvil ore ni rengo no Tata suk nga mñilik re melrin.

Iesu ololi jinibb nir arwirr sarrsarr

³⁴ “Sete kaprrommi nga nuvini tweni bokoni demat vini iel ngatan. Sete nuvini tweni bokoni demat, ko nuvini tweni ðeti wukari jinibb nir, pivi meling ðieru e.

³⁵ Ko nuvini tweni bololi jinibb ðitre tata sen, ko nesenwarreng ðitre tasu sen, ko nesevinli ðitre ðilen lekter.

³⁶ Ko devje nuval se jinibb nir parpelari re nir lulweni kobbong niaken.

Jinibb se Iesu nir parloli ko wor Iesu puwomu rengo mauren ser

³⁷ “Ko poro jinibb san pimrreni tata sen rrenga tasu sen womu re inu, ko sete erres re pivi jinibb suk. Ko ni nga mimrreni natun norman rrenga nesevin womu re inu, ko sete erres kele re pivi jinibb suk.

³⁸ Ko si nga sete muwosi nai pelaot sen pivijuri inu, ko sete erres re pivi jinibb suk.

³⁹ Si nga putor totoni mauren sen ðiterter iel ngatan, mian ko pia-tor jabble; ko si nga pimaronge mauren sen suri mñimajing suk, ko mian ko pia-tor sweri mauren nga mñirres.

Atua pia-la nowli jinibb mawos

⁴⁰ “Ko si nga pimarong kami kapan ji ni, ko erpe emarong kele inu ban ji ni. Ko ni nga pimarong ban ji ni, erpe emarong kele nga Tata suk nga mukoni inu pian ji ni.

⁴¹ Ko si nga pimarong nga propet san pian ji ni suri evi propet, ni kele pia-lai nowli propet ji Atua. Ko si nga pimarong nga jinibb nga mñirres san pian ji ni suri evi jinibb nga mñirres, ni kele pia-lai nowli jinibb nga mñirres san ji Atua.

⁴² Ko si nga ðilai biles nuwi kobbong nga mimemrrali san tevi jinibb suk nga welili ngel san nga pimni, suri evi jinibb suk, erpe ololi nanu nga welili kobbong. Ko nuwretun nuwrai tevi kami, mñernen pia-lai nowlin nen ko wor ji Atua.”

11

Jinibb se Jon Baptaes arini arlesi Iesu

¹ Iesu evinvini ore nga muwer sesesre jinibb sen esngavõl drromon eru iok. Ko evel rujruj sopon kele vini re ngaim sopor nga marto rrale ie, nga pivisviseni ko piwerwer rer.

² Renge daron nen, Jon Baptaes elik rengo naim ne nekaien, ko ornge majingen se Kristo nga mulolir. Ko okoni jinibb sen sopor van ji Iesu.

³ Ko arsuvi tevi, “Erpese? Nik kuvi ni nga kem mñir Isrel nir namok-teravi, rrenga ejki, nabtiriv mñinij malum?”

⁴ Ko Iesu erij weli tevi nir, owra “Kapan ji Jon, ko kapa-werai tevi ni nanu nga mñirres nga kamlesi ko kamrunge, piprel:

⁵ ‘Metrorr arkulkulu erres luwi, ko naroj nir arivel erres, ko jinibb nga marmesie mesien nga niber mñimemaul arwokwok luwi, ko borwon nir arongrong luwi, ko mijen nir armaur luwi, ko arwerwer nale nga mñirres tevi ðeres nir.

⁶ Ko neiren re ni nga sete mñilesi nanu san rengo inu nga puloli ni purnge pisij rengen.’”

Iesu osþe suri Jon Baptaes

⁷ Ko daron nga nir marivel e vajin, ko Iesu etipatun nga puwrai tevi delung nir suri Jon, owra “Sev ko kamiel tweni van kaplesi re lolo merwer bonevis? Kamiel tweni kaplesi jinibb san nga mirpe mavir nga ling mok-uwu sarrsarre? Ejki.

⁸ Ko suri sev kamiel? Kaman tweni kamlesi jinibb san nga muri sunsun nga mimau mñirres? Ejki, nir nga maruri sunsun nga mirpok arlik re naim se numal nga marlelep nir.

⁹ Ko suri sev kamiel? Kaman tweni kamlesi propet san? Nuwrai tevi kami, ewretun, ni evi propet, ko elep kele wor asi propet nir.

¹⁰ Ni ngel ko tuwi aruli suri rengo Naul On, erpel: ‘Kapmurrong, bokoni jinibb suk san nga puwowomu re Mesaea, ko puloli sel se ni pimemet.’

¹¹ Nuwretun nuwrai tevi kami, rengo nir ðetþeti nga mariak iel ngatan, sete san erpe Jon Baptaes. Ni elep wor asi nir. Ko rengo nir nga paran re batun vanu ne melrin, nir ðetþeti arlelep asi wor Jon.

¹² “Mitipatun rengo daron nga Jon Baptaes mok-werwer e evini mijpari lelingen, ko jinibb ne balpalen nir arpalpal tere

batun vanu ne melrin, ko arwera parpal-pal ore jinibb nir sete paran rengen.

¹³ Nale se propet nir, ko nale neseseiren nga maruli tuwi pa, arsupe wowomue ko pa osuw, mijparimian ko Jon mia-pelari.

¹⁴ Ko nanu nga bowrai rreknga piterter nga parosuri le, ko Jon le evi Elaeja nga nir marsupe wowomue nga pia-luwi vini.

¹⁵ Isi nga boron otoa, purnge re nolo boron!

¹⁶ “Ko bowrai rrongrongvi dul nga lelingen ngel aripese? Arirpe bipiwarreng nga marlik renga mesa nga mirres sopen, ko markikail marververuse seler nir parini jir partetnij.

¹⁷ Ko arwera ‘Namuwi nabbu, ko kammusus kapsew e; namla nubo nga martaur e, ko kammusus kaptng. Kammusus kaptetnij detnijen ne neiren, ko detnijen ne dauren.’

¹⁸ Ko erpok kele, dul nga lelingen ngel arungasi murru Jon ko murru inu Jinibb Mawos kele. Suri Jon mivini, ko sete ean elep, ko sete emni norro ejki, suri ok-lot tetajer. Ko dul ngel arlesi esij, ko arwera ‘Demij san esisilvi.’

¹⁹ Ko inu Jinibb Mawos nuvini nomok-aan ko nomok-mini norro. Ko dul ngel arlesi esij kele, ko arwera ‘Kaplesi, leorr lep, ko lemni kis norro! Ni evi sele jinibb nga marok-lai nevöt ne takis, ko jinibb nga marsij nir.’” Ko Iesu owrai tevir, “Ko norongwosien sete eplari re sel sansan, eplari wer re sel elep ko. Ko komru Jon, komru kes nomor-vijuri.”

Iesu otortori jinibb nga sete marosuri ni

²⁰ Ko vitunen Iesu etipatun ko erij terter tevi nir nga marlik renga ngaim sopor suri nelesien jikle nga muloli re nir marlesi, ko sete nolor arlululwi ren.

²¹ Ko owra “Wi, kami mēri Korasin! Wi, kami mēri Betsaeta! Kami nga kamok-ungasi jinibb ne vare nir; erpe mēri Taea ko mēri Saeton nir. Ko poro nga san puloli majingen nga marinijnij nawone ngel nir nga mololi ji kami renga Taea ko Saeton, ko nolor pulululwi pa tuwi nen renga nolien ser; ko paruri sunsun tera nga marmerrmerris nir; ko parlik renga niavi nabb parpelpalose, parviseni nga arrormi nanu nga marsij nga marloli sarsarre nir.

²² Ko nuwrai tevi kami, pia-sij wor renga kami pia-asi nir mēri Taea ko Saeton renga nabong nga Atua pia-wera suri lat nga puto suri tevi jinibb nir, suri nolo kami sete olululwi.

²³ Ko kami, mēri Kapaneam, kamok-rrormi nga kapa-van mare re melrin, a? Ejki, ko kapa-van ngatan jer re lat ne mijen. Poro nga san puloli majingen nga marlelep ngel nir nga

mololi ji kami renga Sotom tuwi, ko nolor pulululwi, ko Atua sete pusli ngaim ser; puto p̄irres pijpari lelingenok.

²⁴ Ko nuwrai tevi kami, pia-sij wor renga kami pia-asi nir mēri Sotom renga nabong nga Atua pia-wera suri lat nga puto suri tevi jinibb nir, suri nolo kami sete olululwi.”

Iesu owra erres wor tevi Tata sen

²⁵ Ko renga daron ngok, ko Iesu owra “Nuwra erres wor tevi nik, Tata. Kuvi Numal ne melrin ko ne ngatan. Ko kusilveni nanu ngel nir suri batun vanu ne melrin renga nir nga marwera ‘Norongwosien se kem otoa, ko namrongrongwos,’ ko kuviseni tevi nir nga nolor maran ngatan mirpe bipiwarreng.

²⁶ Erpok, emawos re nik, Tata, nelesien som.

²⁷ “Nanu jikle Tata suk elair pa tevi inu. Ko sete jinibb san orongwose inu Natu Atua, Tata suk kobbong. Ko sete san orongwose Tata suk kele, inu kobbong Natun nusan, ko si nga memrreni kele beviseni Tata suk tevi ni.

Kapini kaplai mosien ji inu

²⁸ “Kapini ji inu, kami nga kam̄elak milep ko kamtetaur milep, ko inu bea-lai mosien tevi kami.

²⁹ Ko kapwosi nai soloslo suk re birpari kami, ko kapivi jinibb ne majingen suk, ko kapmeteni re inu. Suri inu numalum, ko nolok ean ngatan temijpal, ko kapa-lesi mosien re nēni kami.

³⁰ Suri nai soloslo suk sete majingen nen orrow, ko detauren suk nga bea-lai tevi kami kapsoloi esisarow kobbong.”

12

Jinibb se Iesu nir arsesri tweni wene wit re nabong ne mosien

¹ Renge daron nen, renga nabong ne Sapat san, ko Iesu ko jinibb sen nir arivel rrurrngj orsel ne wit san. Ko jinibb sen nir, numer ajir, ko artipatun arsesri sursele wene wit nir, ko arurroi.

² Ko daron nga Parasi marlesi, ko arlesi esij, suri evi nabong ne Sapat. Ko arwerai tevi Iesu: “E, kuplesi, jinibb som nir artor otvi neseseiren ne nabong ne Sapat!”

³ Ko ni owrai tevi Parasi nir, “Nurrorrmi sete kammeteni suri nanu nga Numal Devet muloli nabong san tuwi, daron nga numer nūaji ni ko jinibb sen nir.

⁴ Ko ean loloim se Atua ko elai niv nga jinibb ne sulsulen marlai pa tevi Atua musuw, ko ni ko jinibb sen nir nga marpitemi ni arurroi. Ngok nale neseseiren ewer orer nga sete parurroi, jinibb ne

sulsulen kis kobbong parurroi. Ko nosþen nen ejkie ji Atua.

⁵ Ko rreknga sete kammeteni kele renge nale nesereien nga renge nabong ne Sapat nir, ko jinibb ne sulsulen nir ne Naim On se Atua arok-tor ototvi nesereien ne nabong ne Sapat daron nga marmajing majingen ser, ko nosþen nen ejkie ji Atua. Kammeteni ko pa, ko kamrrelenge.

⁶ Ko nuwrai tevi kami, inu ngel, nulep asi Naim On.

⁷ Ko poro nga kaprongwose mining ne nale ngel nga mutoto kele re Naul On, 'Atua owra sete kaprroirmi sulsulen ko nanu nga marirpok nir, ko kaprroirmi suri jinibb,' ko sete kapsupe suri nir ngok nga nosþen ser mijkie.

⁸ Ko inu Jinibb Mawos nuvi numal ne Sapat."

Iesu ololi nevre jinibb san erres luwi kele

⁹ Ko Iesu evel rujruj kele sopen, ko ean re naim gortien ser san.

¹⁰ Ko jinibb san nga nevren mimij elik iok. Ko Parasi nir armerreni parloli Iesu puloli nanu san nga nosþen nen putoe. Ko arsusi tevi, arwera "Erpese? Evi nanu nga mïrres nga parloli jinibb þirres luwi re nabong ne Sapat, rreknga ejki?"

¹¹ Ko ni owrai lweni tevir, "Poro nga kami san sipsip sen san otoo, ko sipsip nen pivitan re bbulwil san re nabong ne Sapat, ko ni sete mia-van mia-rrul ren ko pirvei tweni, ko þilngi kurtweni kobbong, puto iok? Ejki, pian ko wor, pirvei tweni.

¹² Ko jinibb elep asi wor ean mare re sipsip. Ngok, erres ko pa nga parloli þirres re nabong ne Sapat."

¹³ Vitunen, ko ni owrai tevi jinibb nga nevren mimij, "Kuþete nevrem." Ko ni ete nevren emetet, ko nevren erres luwi erpe nevren devjen.

¹⁴ Ko Parasi nir arlolarsi, ko arivare ko armurri suri sel nga parevji pini Iesu ren.

Iesu evi jinibb ne majingen se Atua

¹⁵ Iesu orongwose norroirmien ser, ko evel lingi ie. Ko delung arvijuri ni, ko ni ololi nir jijle nga marmesi arres luwi.

¹⁶ "Ko ni ewer ore nir nga nir sete parsupsupe ni.

¹⁷ Ngok eplari osorsan tevi nale san se Atua nga propet Aesea muwrai tuwi:

¹⁸ "Merel evi jinibb ne majingen suk nga motobbobbue ko nga memrreni, ko nurnge erres elep suri ni. Bea-loli Nemik pia-silvi ni, ko ni pia-van pia-wer tweni nesereien suk nga mimawos tevi mïri vare nir.

¹⁹ Sete orongwos þilat, ko sete orongwos þikail vijajeng þelak; ko sete san orongwos

purngedrelan re sel nga marlelep nir nga nir elep marivel asasi ren.

²⁰ Ni pivi jinibb malum tevi nir nga marmeljakov ko tevinir nga derteren ser mijkie. Ko ni pok-loli pirpok pijpari daron nga ni pia-loli jile pa nesereien nga mimawos nga pia-asi ko pia-to þiterter jer.

²¹ Ko jinibb ne vare nir parlingi nolor þiterter re ni."

Parasi nir arwera Iesu ela derteren sen ji Demij

²² Ko vitunen arpitevi jinibb san nga demij misilvi ko mivi metrorr ko nabtu vini ji Iesu. Ko ni ololi erres luwi, ko erij vajin ko okluklu.

²³ Ko delung nir bbösa elair e, ko arwera "A, rreknga ni evi metka mawos se Numal Devet nga rramok-teravi!"

²⁴ Ko Parasi nir daron nga marunge, arwera "Merel elai derteren nga pok-ojoi demij e ji Bielsepal kobbong, numal se demij nir."

²⁵ Ko Iesu orongwose norroirmien ser, ko owra tevir: "Poro vanu þisan jinibb nen nir parteri wukari meling nen þieru e, ko vanu nen pivitan þisij. Ko poro nga ngaim þisan rreknga niaken þisan jinibb nen nir parteri wukari devjen þieru e, ko ngaim nen rreknga niaken nen setete orongwos porlik þirres, porvitan ko.

²⁶ Ko poro nga Demij pok-ojoi demij sen nir, ko ololi meling eru e, ko ortertere lweni nuru, ko batun vanu sen þirres pirpese? Pivitan ko. Ngok kamsarr nga kamwerai inu nulai derteren suk ji Bielsepal, numal se demij nir.

²⁷ Ko poro nga pivi weretunen nga inu nomok-lai derteren suk nga boji tweni demij e nir ji Bielsepal, ko pirpese kele re jinibb se kami nir? Suri nir kele arok-ojoi demij nir. Ko arok-lai derteren ser ngabe ko? Erres nir parlesi suri nale se kami nga kamwerair ngok.

²⁸ Ko poro nga þelai derteren suk nga boji tweni demij e nir ji Nemïn On se Atua, ngok batun vanu se Atua eplari le pa ji kami. Kaprroirmi þirres suri nanu ngok.

²⁹ Ko erpok kele, sete jinibb san orongwos pian nawon lolo naim se jinibb nga mïterter san ko þila nijor sen nir. Ejki, pian puwomu ko þisre totoni mïernen, ko vitunen vajin pia-lai þetþeti nijor sen jile nir. Ko mïernen erpe Demij, nga Nemïn On esre totoni pa osuw.

³⁰ Ko poro san sete þimajing tevi inu, erpe etre inu ko; ko poro san sete þisre kortoni tevi inu, ngok erpe ewirrwir sisamis nir.

³¹ Niko nuwrai tevi kami, nololien jile nir ko nale nga misij jile nir, Atua orongwose þitlasi tweni renge jinibb nir. Ko nale nga

marsopsoŕe ma Nem̄in On e, Atua sete orongwose ƕitlasi tweni rragrrage reнге jinibb.

³² Ko poro san ƕirij ƕisij ko pusopsoŕe inu Jinibb Mawos, ko Atua orongwose ƕitlasi tweni rengen. Ko poro san ƕirij ƕisij ko pusopsoŕe Nem̄in On, ko Atua sete orongwose ƕitlasi tweni rengen lelingen ngel, ko tuwi ngok vini. Ngok kapmetmet nga sete kapwerai nga inu nula derteren suk ji Dem̄ij.

Kapmeteni virinḡsi duru nai reнге we-nen nga miplari ren

³³ "Poro nai san ƕirres, ko wenen kele ƕirres. Ko poro nai san ƕisij, ko wenen kele ƕisij. Suri nai jijle arlesi wose reнге wenen.

³⁴ Kamivi jinibb nga kamsij, kamivi metka ne num̄et. Kapwera nanu nga parres sopen ƕirpese? Suri, sev nga muwun saut re nolor, niko jingor marwera tweni.

³⁵ Jinibb nga m̄irres okwera tweni nanu nga m̄irres kobbong nga muto reнге nolon; ko jinibb nga m̄isij okwera tweni nanu nga m̄isij kobbong nga muto reнге nolon.

³⁶ Nuwrai tevi kami, bebje nale jijle nga jinibb sete murrormi muwomue, ko muwra tweni, Atua pia-lesi suri nir jijle reнге nabong nga puwra suri lat nga puto suri tevi jinibb nir.

³⁷ Renge rijen som ko nir, Atua pia-werai ko nik kurses, rrenga kusij."

Jinibb nga marlelep sapor arwera par-lesi nelesien san

³⁸ Vitunen ko jinibb nevisvisenien ne nale neserei en sapor ko Parasi sapor arkerkerasi Iesu, ko arsusi tevi, arwera "Jinibb nevisvisenien, nammerreni kupviseni nelesien san tevi kem, nablesi. Ko ngok nabrongwose nga weretunen nik kuvel ji Atua vini."

³⁹ Ko ni owra lweni tevir, "Kamivi dul nga m̄isij, kamok-loli esij tevi Atua erpe nesevin san nga mok-loli m̄isij tevi diwen sen. Erpese kammerreni beviseni nelesien san tevi kami kaplesi? Kapa-lesi kobbong nelesien ƕisan, nga pusorsan tevi nelesien se propet Jona nga miplari tuwi.

⁴⁰ Erpe Jona elik nutrin itul ko nutpong itul reнге depai nai nga milep nen, ƕirpok ko inu Jinibb Mawos bea-lik nutrin ƕitul ko nutpong ƕitul reнге lolo dan.

⁴¹ Ko reнге nabong nga Atua pia-wera suri lat nga puto suri tevi jinibb nir, jinibb nir ne Nineve para-tur imare ko para-suŕe suri kami. Suri nir nolor arlululwi daron nga Jona m̄iwerwer tuwi. Ko kaplesi inu ngel, nulep asasi Jona, ko kami sete nolo kami olululwi daron nga inu m̄iwerwer tevi kami.

⁴² Ko reнге nabong nga Atua pia-wera suri lat nga puto suri tevi jinibb nir, nesevin nga tuwi nga mivi kwin se nir ne Saot pia-tur imare ko pia-suŕe suri kami. Suri ni evel ngasu ƕelak reнге bongsi vanu vini, owra purongwose norongwosien se Numal Solomon. Ko kaplesi inu ngel, nulep asasi Solomon. Ko suri sev kami sete kamini ji inu?

Nem̄in nga m̄isij nga miv̄el olwi kele vini

⁴³ "Moro nga nem̄in nga m̄isij san nga m̄isilvi jinibb san miv̄el lingi ni, ko evel rrrurrngi lat nga nuwi mijki e, epejpej lat nga ƕilik ƕirres ren; ko sete otor sweri san.

⁴⁴ Mian ko owra 'O, bolwi kele van re naim suk, lat nga mevel lingi vini.' Ko daron nga mijpari, elesi naim sen obbbil, ko elesi aruruk vaseni pae osuw, ko arjuroi erres.

⁴⁵ Elesi jile naim sen musuw, ko olwi van ko elesi nem̄in ebut kele nga marsij asie ni, ko nir jijle aran loloim ko arlik iok. Ko morok vajin nga nem̄in nga marsij marsilvi elik esij easi re nga m̄ilik womu. Ko ƕirpok kele ko tevi kami nga kamivi dul nga kamsij."

Iesu tasu sen ko tasin nir arini parlesi ni

⁴⁶ Daron nga m̄irij malum mirpok tevi delung nir, ko tasu sen ko tasin nir arini. Ko artur vare ko arngoni tevi jinibb sen nir nga parij tevi Iesu.

⁴⁷ Ko san owrai tevi Iesu, "Tasu som ko tasim nir nir le vare, ko arngoni nik nga parij tevi nik."

⁴⁸ Ko Iesu owra lweni tevi ni nga muwrai tevi ni, "Isi evi tasu suk, ko isi arivi tasik?"

⁴⁹ Ko ni esareni nevren mawos jinibb sen nir ko owra "Nir ngel le arivi tasu suk ko tasik nir.

⁵⁰ Suri si nga puloli marongen se Tata suk nga m̄ilik re melrin mare, ni ko evi pa tasik ko jojik ko tasu suk osuw."

13

Nale rrongrongvi ne jinibb nga mok-jijreni jelangin

¹ Re nabong mawos nen, Iesu eivare lingi naim nen, ean elik re devje nuwito ne Galili.

² Elik, ko delung nga milep sapor arini arkorti rrale ni. Ko suri nir elep ƕelak, ni otur imare ko esa van reнге drrav san ko esakel rengen. Ko delung jile artur jer ngaut.

³ Ko ni osŕe suri nale rrongrongvi elep tevi nir. Owra "Kapmurrong. Jinibb san nga mok-jijreni jelangin ean tweni ƕijjireni jelangin orsel.

⁴ Ko daron nga mok-jijreni e, ko ejjireni aseni sapon, ko jelangin sopor arvitane re devje sel e. Ko numön nir arini artasi twenir.

⁵ Ko sopor arvitane van re dan ne nevöt, lat nga sete dan mimtul e. Ko moro marektiv, arpelari ngavilvilsen imare, suri sete arto ngatan pelak re nolo dan.

⁶ Ko daron nga nial mäsner, ko armeli. Ko suri laßer sete evter, ko armij.

⁷ Ko sopor arvitane van re lolo moku, ko moku emra tevteve nir, ko emelngi orer.

⁸ Ko sopor ma sete arwij lingi dan nga mürres nen, armatur jer rengen dan nga mürres nen, ko armaur erres, ko arwen. Ko sopor wener ongut (100), ko sopor wener ngavöl ouwon (60), ko sopor wener ngavöl itul (30).

⁹ Isi nga boron otoa, purnge re nolo boron!”

Iesu owra tweni suri sev ni mokrij re nale rrongrrongvi

¹⁰ Ko Iesu jinibb sen arini ji ni ko arsusi tevi: “Suri sev komok-suße suri nale rrongrrongvi tevi nir?”

¹¹ Ko ni owra lweni tevir, owra “Atua elai tevi kami nga kaprongwose nanu nga marto teptepi rengen batun vanu ne melrin, ko sete elai tevi nir nga ngok nga parongwose.

¹² Si nga norongwosien sen mutoe, Atua pia-lai pilep kele tevi ni. Ko si nga norongwosien sen muwelili jer, Atua pia-la tweni jin.

¹³ Nomok-suße suri nale rrongrrongvi tevi nir, suri arok-lesi ko sete arok-lesi wose, ko arok-runge ko sete arok-rongwos kele e.

¹⁴ Renge nir ngel eplari erpe nale san se Atua nga propet Aesea osße wowomue, owra ‘Kapa-runge pilep, ko setete kama-rongwose; ko kapa-lesi pilep, ko setete kama-lesi wose.

¹⁵ Suri jinibb ngel nir batur eterter ko boror arwonwon ko meter arpil, ko arwera “Rratlesi tevi meterr, ko rratrunge tevi bororr, ko rratrongwose re nolorr, ko nolorr tulululwi, ko Atua tia-loli kerr rratres luwi!”

¹⁶ “Ko kami ma, kamlik erres, suri mete kami arok-lesi, ko boro kami arok-runge.

¹⁷ Nuwretun nuwrai tevi kami, propet elep ko jinibb nga marres elep ne tuwi armerreni elep parlesi nanu nga kamlesir ngel nir, ko sete arlesir; ko arwera elep parunge nanu nga kami kamrunger ngel nir, ko sete arunger.

¹⁸ “Kaprunge kele ta jilweren rrongrrongvi suk suri jinibb nga mok-jijreni jelangin, bowra tweni vajin.

¹⁹ Poro jinibb san purnge nga marsuße suri batun vanu ne melrin ko sete purongwose nale nen, Demij pivini ko piteseni tweni nale nga mietiv rengen nolon. Ngok erpe pa jelangin nga marvitane re devje sel.

²⁰ Ko jelangin nga marvitane rengen dan ne nevöt, erpe pa jinibb san nga murnge nale, ko mülai ngavilvil, ko eir elep.

²¹ Ko laßen ejki malume, ko orongwos puto bbong beblen; ko daron nga nanu nga mütterter mivini, rreknga poro nga jinibb sopor partur imare parloli pisis tevi ni suri nale nga muosuri, ko ni elngi kurtweni evesane.

²² Ko jelangin nga marvitane rengen lolo moku, erpe pa jinibb san nga murnge nale; ko suri orrorrmi pelake nanu ne lel ngatan nir, ko suri emrreni joron pilep, nanu ngok nir armelngi nale nga mimaur ren, ko arloli wenen ejkie.

²³ Ko jelangin nga marvitane re dan nga mürres, erpe pa jinibb sopor nga marunge nale, ko marongwose, ko marlai wener. Ko wenen nir sapon ejpari ongut (100), ko nir sapon ngavöl ouwon (60), ko nir sapon ngavöl itul (30).”

Nale rrongrrongvi ne mösmös nga müsij nga mimaur korti tevi wit

²⁴ Ko Iesu ela nale rrongrrongvi münij kele san tevi nir, owra “Renge batun vanu ne melrin, Atua puloli pusorsan tevi murru jinibb ngel: Jinibb san ean ejjireni jelangin nga mürres ne wit re orsel sen.

²⁵ Ejjireni jikle osuw, ko daron nga jinibb marmatur e, ko ni devje nuval sen evini ko ejjireni jelangin nga müsij oto tevi wit nen, ko evel.

²⁶ Ko mian ko jelangin nen nir aretiv vajin, ko armaur, ko arwen. Ko arlesi wose vajin mösmös nga müsij nen mutur tevir, suri wenen enije.

²⁷ Ko jinibb ne majingen se mēr nga orsel sen nir arini jin ko arwera tevi ni: ‘Numal, erpese? Kujjireni jelangin nga marres rengen orsel som, ko mösmös nga müsij ngel evan erpese?’

²⁸ Ko ni orongwose ko owrai tevi nir, ‘Devje nuval ko ololi nanu ngel.’ Ko jinibb sen arwera kele tevi ni, ‘Ko kumarong kem naban nabrrangi twenir?’

²⁹ Ko ni owra ‘Ejki, pijki, daron nga poro kaprrangi mösmös nga müsij e, takrrangi tweni wit nga mürres tuto tevir.

³⁰ Kaplinglingir parmaur korti pijpari daron ne numös. Ko rengen daron ne numös ngok, bea-wera tevi nir nga partawer, “Kapsere kortoni mösmös nga marsij puwomu, ko kapsere parivi bböbbti nga para-sulir. Ko kapsere wit nen pian rengen bepeim suk.”

Nale rrongrrongvi ne jelangi nubek ko ne is

³¹ Ko ni ela nale rrongrrongvi m̄inij kele san tevi nir, owra “Batun vanu ne melrin osorsan tevi jelangi nubek nga mivitan re nai san.

³² Jelangin nen ewelili jer lingi jelangin m̄inij nir, ko daron nga mimaur, elep lingi nai nir. Ko numōn ne mesa nir arini arok-loli menu ner reнге rengsin nir.”^D

³³ Ko ni ela nale rrongrrongvi m̄inij kele san tevi nir, owra “Batun vanu nemelrin osorsan tevi is nga nesevin m̄ilai m̄ilngi reнге besin nga milep san nga muwune plaoa, ko m̄ikiskisi. Ko setemun arlesi is nen, ko ololi niv jile epau.”

Iesu ok-la nale rrongrrongvi kis tevi delung nir

³⁴ Nanu ngel jile nir, Iesu os̄pe tevi delung nir reнге nale rrongrrongvien. Poro nale rrongrrongvi pijki, ko sete mia-sūpe nanu san tevi delung nir.

³⁵ Ngok eplari osorsan tevi nale san se Atua nga propet san muwrai tuwi: “Bea-sa jingok, ko bea-lai nale rrongrrongvi, bea-werwera i tweni nanu nga martepeti re iel ngatan m̄itipatun mivini mijpari lelingenok.”

Iesu owra tweni vajin nale rrongrrongvi ne mösmös nga m̄isij lat nga muto suri

³⁶ Vitunen ko Iesu evel lingi delung nir, ko evan loloim re naim. Ko jinibb sen nir arini ji ni ko arwera “Kupwera suri ta tevi kem nale rrongrrongvi ne mösmös nga m̄isij reнге orsel ngok.”

³⁷ Ko ni owra lweni tevir, owra “Jinibb nga m̄ijijreni jelangin nga m̄irres ngok erpe pa inu ko, Jinibb Mawos.

³⁸ Orsel ngok erpe pa iel ngatan ko. Ko jelangin nga marres ngok arirpe pa jinibb nir ne batun vanu ne melrin ko, ko jelangin nga marsij ngok arirpe pa jinibb se Demij ko nir.

³⁹ Ko devje nuval nga m̄ijijrenir erpe pa Demij ko. Ko numōs ngok erpe pa iel ngatan ko bongsin nga pia-suw e ko pa, ko nir nga martawe ngok arirpe pa anglo ko nir.

⁴⁰ Pusorsan tevi nga marser kortoni mösmös nga marsij nir ko marsuli, pia-sorsan kele tevi iel ngatan bongsin nga pia-suw e.

⁴¹ Inu Jinibb Mawos bea-koni anglo suk nir, ko nir para-sere kortoni nir nga marok-loli jinibb parong tweni nale suk ko nir nga marok-loli nololien nga marsij reнге batun vanu suk.

^D 13:32 Erpe iel, Matiu orrongrrongvi batun vanu se Atua erpe jelangi mastat, ko suri mastat ejki iel, namlingi nubek, nga puloli mining ne nale se Matiu piplari limjer.

⁴² Para-sere kortonir jile, ko para-wirrer van re nabb. Lok ngok jinibb para-ting ko para-runge p̄isij pilep.

⁴³ Ko reнге daron nen jinibb nga marres nir pia-irpe nial, para-mor reнге batun vanu se Tata ser. Kaprunge reнге nolo boro kami!

Nale rrongrrongvi ne nanu itul

⁴⁴ “Batun vanu ne melrin osorsan tevi nijor nga m̄irres san nga muto teptepi reнге orsel, nga poro jinibb san putor sweri, ko p̄ir pilep ren, ko p̄isilveni kele. Ko suri eir elep ren, ko pian puwulwule joron jijle nir, ko puwli tweni orsel ngok, nga nijor nen pivi sen ko vajin.

⁴⁵ “Ko erpel kele, batun vanu ne melrin osorsan tevi nevōt san nga marok-lai lolo botrrum. Ko jinibb san nga mokwuli nevōt ngok nir,

⁴⁶ daron nga mutor sweri nevōt nga nowlin milep temijpal ngok san, ko olwi van owulwule joron jijle nir ko ela nevōt nen, ko owli tweni vajin nevōt ngok evi sen.

⁴⁷ “Ko erpel kele, batun vanu ne melrin osorsan tevi niva san nga marwirre reнге dis, ko nai jijle maron ren.

⁴⁸ Ko daron nga niva nen puwun, parevei van ngaut e. Ko parlik ngatan, ko parla mesal nga marres parsongni van re narr; ko nga marsij nen, parwirr twenir.

⁴⁹ Pia-irpok kele ko reнге daron ne iel ngatan bongsin. Anglo nir para-vini para-la tweni jinibb nga marsij re nir nga marres,

⁵⁰ ko parwirrer van re nabb. Lok ngok jinibb para-ting ko para-runge p̄isij pilep.”

Nale rrongrrongvi ne jinibb san nga m̄ilngi nanu nga mimerr ko nanu nga mitra

⁵¹ Iesu osusi tevir, “Kamrongwose nanu ngel nir?” Ko nir arwera lweni tevi: “O-o.”

⁵² Ko ni owrai kele tevir: “Ko jinibb nevisvisenien ne nale nesese-reien san nga marok-visvisenie pa reнге murru batun vanu ne melrin erpe jinibb san nga murongwos p̄ila tweni nanu nga mimerr ko nanu nga mitra reнге narr sen. Suri jinibb nevisvisenien nen ne nale nesese-reien orongwos pae suri nale se Atua ne tuwi ko ne lelingenok kele.”

⁵³ Daron nga Iesu musuw re nale rrongrrongvi ngel nir vajin, ko evel lingi ie,

⁵⁴ ko olwi vajin vini re ngaim sen e. Ko evisviseni jinibb nir re naim gortien ser; ko jinibb nen nir bbōsa elair e, ko arwera “E, m̄erel ela norongwosien ko derteren ngel ngabe?”

⁵⁵ Ni ngel evi metusu lebbong san natun, ko tasu sen marveruse Merri, ko tasin nir Jemes, ko Josep, ko Saemon, ko Jutas.

⁵⁶ Ko jojnin le ngel nir marlik tevi kerr. Ko m̄merel ela nanu ngel nir ngabe ko?"

⁵⁷ Ko arong karkare ni. Ko Iesu owrai tevir, "Propet san parosuri ko wor, sete mia-jiki; ko renge nir nga re ngaim sen ko nir nga niaken sen, san pijki."

⁵⁸ Ko setemun ololi majingen elep iok, suri arong tweni nale sen.

14

Mijen se Jon Baptaes

¹ Renge daron nen, Erot natun san nga marveruse Erot Antipas, ornge nospen nga marsupe Iesu e.

² Ko owrai tevi jinibb sen nir, "Merel evi Jon Baptaes le. Ni emra renge mijen, niko derteren sen mutoe nga muloli majingen nga marinijnij nawone nir."

³⁻⁴ Owrai erpok suri nanu san nga miplari seveling nga, erpel: Erot etka luwe Erotias, nesen se tuwan Pilip. Ko Jon owra tevi Erot, "Sete evi nesesreien nga mimawos nga nik kupteka luwe nesen se tuwam." Daron nga muwrai mirpok, ko Erot orrul totkoni ni ko esre totkoni, ko elngi ni van re naim ne nekaien, suri Erotias sete emrreni Jon p̄irij p̄irpok.

⁵ Ko Erot owra p̄irevji pini Jon, ko emtutue delung nir, suri nir arwera ni evi propet san.

⁶ Mian ko vitunen vajin, nir arloli nabong san suri sia se Erot ejp̄ij̄pet. Ko Erotias natun nesevin m̄elakel esew re no nir, ko Erot elesi erres.

⁷ Ko ololi rijrijen tevi, owra "Sev nga kupungoni, ko inu bea-lai ko tevim."

⁸ Ko nesen m̄elakel nen erij nale se tasu sen, owra "Kuplai tevik iel batu Jon Baptaes renge narov san."

⁹ Ko Erot ornge esij e; ko suri n̄irijrij pa ko nir nga marini maraan tevi marunge pa, ko ololi owra nale tevi jinibb sen nir nga parlai tevi nesen m̄elakel nen.

¹⁰ Ko okoni jinibb sen san pian renge naim ne nekaien ko p̄ita otvi batu Jon Baptaes.

¹¹ Mernen evan, ololi erpok, ko elngi batu Jon Baptaes re narov san. Ko esale tevi nesenwarreng, ko nesenwarreng esale elai tevi tasu sen.

¹² Ko vitunen, Jon jinibb sen nir arini, arwosi Jon niben, ko arivel tevi van, artevni. Artevni jile Jon, ko vitunen aran arwerai tevi Iesu.

Iesu owngani delung nga milep

¹³ Ko daron nga Iesu murnge nanu ngel nir, esa re drrav ko evel lingi ie; owra pian re lolo merwer, ko p̄isan p̄ilik sapon. Ko

delung nir, daron nga marunge, ko arivel lingi ngaim ser nir, ko arvijuri, arivel re jeli nuwi.

¹⁴ Ko Iesu, daron nga mujubbul re drrav, elesi delung elep. Ko orrorrmi nir elep, ko ololi nir nga marmesi arres luwi.

¹⁵ Mian ko nat erivriv vini, ko jinibb sen arini jin, arwerai tevi ni, "Iel evi lolo merwer le, ko nat tupong mun. Kupkoni tweni lartul ngok nir parivel paran re ngaim nir parwuli nanen ser."

¹⁶ Ko Iesu owra lweni tevir, "Nir sete mara-ivel. Kami ko kapla nanen tevir paraani."

¹⁷ Ko nir arwera lweni tevi "Ai, kem namtori bbong niv elim le ko nai eru."

¹⁸ Ko ni owra "Kaplair ta vini jik."

¹⁹ Ko owrai tevi delung nir parlik ngatan re m̄ösmös. Ko ni ela niv nga elim nga ko nai nga eru nga, ko oklu imare van re melrin owra erres tevi Atua rengen, musuw ko otpoi ko elai tevi jinibb sen nir; ko nir arlai tevi delung nir.

²⁰ Ko nir jile arurroi, mian ko arup vajin. Ko jinibb sen nir arsere kortoni bebjen nga marjijpon nen nir van renge narr esngavöl dromon eru arwun saute.

²¹ Ko nir nga marurroi ngok arever erpe nuvasngavöl nuvalim (5000) norman kis, ko nesevin ko bipiwarreng kele sete arever.

Iesu evel mare re nuwi

²² Ko ngavilvil ololi jinibb sen nir arsa kele re drrav, parwowomu van re devje nuwi, parteravi ni nga ni pukoni tututweni delung nir parivel.

²³ Daron nga mukoni tututweni delung nir marivel musuw, ni esan otongsa van re botwen nga pulot. Olot mian, ko nat opong vajin, ko ni esan malum iok.

²⁴ Ko jinibb sen nir nga marla drrav aran vajin re liven mesa re nuwito. Ko daptap ne nuwito arus renge drrav, suri arwolu tere ling.

²⁵ Marwolu tere ling mirpok mian, ko nat otomori p̄isal p̄irin vajin, ko Iesu evel mare re nuwi vini pivini ji nir.

²⁶ Ko jinibb sen nir arlesi ni mivel mare re nuwi ko armetutu, arwera "O, neñin ko san!" Ko arkail mare suri armetutu.

²⁷ Ko Iesu erij tevir evesane, owra "Nolo kami p̄irres, inu lebbong, sete kapmetutu."

²⁸ Daron nga ni muwrai mirpok ko Pita erij weli lweni ni, owra "Numal, poro weretunen evi nik, kupwerai tevi inu nga inu bevel mare re nuwi vinuk jim."

²⁹ Ko ni owra "Kupini." Ko Pita orow jubbul re drrav, ko evel mare re nuwi pian ji Iesu.

³⁰ Mivel mian, ko elesi ling eser eterter, ko emtutu vajin, ko etipatun purron. Ko ekail owra "Numal, kupla se inu!"

³¹ Ko Iesu esareni nevren ngavilvil ko orrul ren, ko owra tevi, "Nik nosurien som ewelli, ko erpese norrorrmien som eru e?"

³² Ko daron nga morini morsa re drrav, ko ling omol vajin.

³³ Ko jinibb se Iesu nir nga renge drrav arlotoe ni ko arwera "Weretunen, nik kuvi Atua natun."

Iesu ololi nir nga marmesi Genesaret arres luwi

³⁴ Ko arwolu re drrav, arwolu toku renge devje nuwito renge ngaim san, nisen Genesaret.

³⁵ Ko daron nga jinibb ne lat nen nir marlesi wose Iesu, arla nale van ji nir nga marlik rrale ie. Ko jinibb nen nir artekai jinibb nga marmesi vini ji ni,

³⁶ ko arungoni tevi Iesu nga parjipari kobbong bongsi sunsun sen. Ko ni emarong, ko nir jikle nga marjipari arres luwi.

15

Parasi ko jinibb nevisvisenien artere Iesu suri sete evijuri sel mawos ser

¹ Renge daron nen ko Parasi sopor ko jinibb nevisvisenien ne nale neseseien sopor arivel Jerusalem vini ji Iesu, ko arwerai tevi

² "Erpese jinibb som nir martor otvi nale se Birterawarrend nir? Suri sete arjevavöl daron nga maraan e."

³ Ko ni erij weli lweni nir owra "Erpese kami kele kamtor otvi nale neseseien se Atua nga kamok-vijuri nale se Birterawarrend se kami nir?"

⁴ Suri Atua nale neseseien sen owra 'Kuprormi lilane tata som ko tasu som,' ko nale san kele erpel: 'Mer nga mirij misij tevi tata sen rreknga tasu sen sete orangwos pimaur, kaprevji pini ko wor.'

⁵ Ko kami ma kamwera 'Isi nga pia-werai tevi tata sen rreknga tevi tasu sen: "Nulai pa merrenien tevi Atua, setemun inu mealai kele tevi nik,"

⁶ erij erres, ko sete mia-osuri mun tata sen ko tasu sen renge nalu ngok.' Erpok nale se kami owra nale minij re nale se Atua, nga setemun parvijuri.

⁷ Kamiel re sel eru! Aesea orrongvi kerikame kami erres, daron nga muwra wuwomue suri kami:

⁸ 'Lartul ngel nir arosuri inu tevi nevlv jingor kobbong, ko nolor oto ngasue inu.

⁹ Arloto nawone inu, arvisviseni nevisvisien nga mivi se jinibb bbong.' "

Nanu nga marloli jinibb murrokitkit renge no Atua

¹⁰ Ko Iesu everuse delung nir ko owrai tevir, "Kaprunge nanu ngel ko kaprongwose.

¹¹ Sete nanu nga mian re nolo jinibb ololi ni orro (ngok evi norrorrmien se nir nga marok-jevavöl tajer kobbong); ko ngel ko ma, nanu nga miplari re nolo jinibb ololi jinibb orro."

¹² Ko vitunen jinibb sen nir arini jin, arwerai tevi ni: "Nik kurongwose nga Parasi nir marunge misij e nanu nga kumwerai ngok?"

¹³ Ko ni erij weli lwenir, owra "Nanu jikle nga Tata suk nga milik re melrin sete murwir, pia-rangi tweni ko.

¹⁴ Kaplinglingi nir parirpok. Arivi metr-rorr pa osuw, ko arwera parviseni sel. Ko poro nga metrorr puwowomue metrorr renge sel, ko nuru kes pora-vitan van renge bbulwil."

¹⁵ Ko Pita owrai tevi ni: "Kupwera suri nale rrongrongvi ngok ta tevi kem."

¹⁶ Ko ni owra "Kami kele norongwosien se kami ejki malume?"

¹⁷ Sete kamrongwose nga nanu jikle nga mian re nolon evan renge depain e, ko parta lev tweni piasia kobbong?

¹⁸ Ko nanu nga mivare re jingon eplari re nolon, ko ngok kobbong ololi jinibb orro.

¹⁹ Suri eplari re nolo jinibb ko, norrorrmien nga marsij, nga parevji pini jinibb suri, nga norman pian ji nesevin nga sete evi nesen sen, nga nesevin pian ji norman nga sete evi diwen sen, nga parvenae joro jinibb, nga parkerkeris re kot, nga parsopsopë pisij Atua rreknga parij pisij tere jinibb.

²⁰ Nanu ngel le nir arloli jinibb orro; ko nga paraan sete parjevavöl, sete ololi jinibb orro."

Iesu oji tweni demij re nesenwarrend san

²¹ Ko vitunen Iesu evel lingi ie, evel rujruj sapon evan morie Taea ko Saeton.

²² Ko daron nga mivel mori ie mirpok, ko nesevin ne Kenan san nga milik ie sapon ermali ko ekail van jin, owra "Kuprormi inu, numal, nik metka se Devet! Natuk nesenwarrend, demij arsisilvi ni esij elep."

²³ Ko Iesu sete erij nale weli san tevi nesevin. Mian ko jinibb sen nir arini jin ko arungoni tevi ni: "Kupkoni tweni vinok, suri ekail vijajeng suri kerr."

²⁴ Ko ni erij weli lweni tevir, owra "Atua okoni inu nga ban ji mēri Isrel kis kobbong, nga marirpe sipsip nga marijiki, sete ban ji jinibb minij nir. Ko vinok evi nesevin ne vare san."

²⁵ Ko vinnen evini ejjol vitan ji Iesu ko owra "Wurru, numal, kupla se inu."

²⁶ Ko ni erij weli lweni tevi ni, owra "Sete erres nga parla nanen se bipiwarreng nir ko parwirre tevi guli nir." Ni erij erpok suri mēri Isrel nir arok-veruse jinibb ne vare nir arwera "guli" e nir.

²⁷ Ko vin nga owra "Ewretun, numal, ko guli nir arok-urroi ko wor bebje nanen nga marvitvitan re numal ser tep sen."

²⁸ Daron nga murnge nale se nesevin ngok, ko Iesu owra lweni tevi: "O, nesevin, nosurien som elep temijpal. Puto pirpe nga nik kumarong." Ko re mete nial mawos nen vinnen natun erres luwi.

Iesu ololi jinibb elep nga marmesi arres luwi

²⁹ Iesu evel lingi iok ko evini re nuwito ne Galili ko otutur sapon iok; mian ko otonga van mare re botwen, ko elik ngatan iok.

³⁰ Ko delung elep arini ji ni, arpitevi jinibb nga marmesi sopor; sopor ßelar rreknga nevrer arsi, sopor meter arorr, sopor arivi naroj, sopor arivi nabbut, ko nga marmesi mesien lele kele nir; ko arlingir ngatan re ßela Iesu. Ko Iesu ololi nir arres luwi.

³¹ Ko daron nga jinibb nir marlesi nabbut marij, ko nir nga ßelar ko nevrer marsij arres luwi, naroj marivel, ko metrrorr markulu, bbōsa elair e, ko arsurōvi Atua se mēri Isrel nir.

Iesu ela kele nanen tevi delung nir

³² Vitunen ko Iesu everus jinibb sen nir vini ji ni, ko owrai tevi nir, "Nurrormi lengleng delung ngel nir, suri arpitevik nabong itul le pa, ko nanu nga parurroi ejki. Ko numus bokoni tweni nawon nir, suri numer ajir pa, ko tarmaob re sel."

³³ Ko jinibb sen nir arwerai tevi: "Rrapla nanen ngabe ko, suri iel evi lolo merwer, ko delung elep ßelak?"

³⁴ Ko Iesu owrai tevir, "Kamtori niv evis?" Ko nir arwera "Ebut, ko nai wowar-reng sopor."

³⁵ Ko ni owrai tevi delung nir parlik ngatan re dan.

³⁶ Ko ni ela niv nga ebut nga ko nai nga nir, ko olot owra erres tevi Atua suri, ko otpoir ko elair tevi jinibb sen nir; ko jinibb sen nir artututwenir tevi delung nir.

³⁷ Ko nir jijle arurroir, mian ko arup jile. Ko arsere lweni bebje nanen nir nga marjijpon nir van re narr ebut arwun saut.

³⁸ Nir nga marurro niv ko nai nir evi nuvasngavöl vavij (4000) norman kis, ko sete areve nesevin ko nanwarreng nir.

³⁹ Ko Iesu okoni tweni delung nir arivel; ko ni esa re drrav, ko evan morie ngaim san nisen Makatan.

16

¹ Ko Parasi sopor ko Satusi sopor arini. Arwera parrowrowe Iesu, armerreni ni puloli nelesien san rengo derteren ne mel-nir tevi nir parlesi.

² Ko ni erij weli lweni tevi nir owra "Daron nga nat mirivriv, ko kami kamok-wera 'Nat ßirres ko, suri rramlesi nabor arsongsong.'

³ Ko daron nga nial pimraej, ko kami kapok-wera 'Lelingen naus puto tevi ling, suri rramlesi nabor arsongsong ko armot-mote.' Erpese kamlesi wose nabor nir ko kamrongose nat nga pirpese nga piplari suri, ko kami sete kamrongose nabong se inu nga meplari ren?

⁴ Kamivi dul nga mēsi, kamok-loli esij tevi Atua erpe nesevin san nga mok-loli mēsi tevi diwen sen! Erpese kammerreni beviseni nelesien san tevi kami kaplesi? Kapa-lesi kobbong nelesien ßisan, nga pursoran tevi nelesien se propet Jona nga miplari tuwi." Ko daron nga Iesu mērij jijle mirpok tevir, ko evel lingir.

Iesu erij tevi jinibb sen nir suri nosurien ser ewelili

⁵ Ko Iesu evini ji jinibb sen nen nir, ko arsa re drrav, arwolu van re devje nuwito e. Ko jinibb sen nir arlesi vajin nga sete arla niv sopor partori suri.

⁶ Ko Iesu owrai tevir, "Kapmetmet ßirres rengo is se Parasi nir ko Satusi nir."

⁷ Ko nir arwerwai lweni tevir, arwera "O, suri sete rramtori niv, niko mērij mirpok."

⁸ Ko Iesu orongose norrorrmien ser ko owrai tevir: "O, kami nga nosurien ewelili, suri sev kami kamwerweraie kami mirpok suri sete kamtori niv?"

⁹ Setewor kamrongose? Rreknga setemun kamrorrmni suri niv nga elim, nga nir evi nuvasngavöl valim (5000) marurroir ko marup e, ko narr evis kele nga kamsere marwun?

¹⁰ Rreknga niv nga ebut nga nir evi nuvasngavöl vavij (4000) marurroir ko marup e, ko narr evis kele nga kamsere marwun?

¹¹ Erpese sete kamrongose nga inu sete nuspe suri niv? Kapmetmet rengo is se Parasi nir ko Satusi nir."

¹² Ko nir arongwos vajine nga ni sete owrai nga nir parmetmet rengo is ne niv, ko rengo nevisvisenien nga mēsi se Parasi nir ko Satusi nir.

Pita owra tweni nga Iesu evi Mesaea

¹³ Ko nir artutur kele sapon. Ko daron nga marini mori re Sisaria Pilipae, ko ni osusi tevi jinibb sen nir, owra "Jinibb nir arwera inu Jinibb Mawos nuvi isi?"

¹⁴ Ko nir arwera “Sopor arwera nik kuvi Jon Baptaes, sopor arwera nik kuvi Elaeja, ko nir sapon kele arwera Jeremaea, rreknga propet san ne tuwi.”

¹⁵ Ko ni owra tevir, “Ko kami, kamwera inu nuvi isi?”

¹⁶ Ko Saemon Pita erij weli lweni owra “Nik kuvi Mesaea, Atua nga mimaur natun.”

¹⁷ Ko Iesu erij weli lweni owrai tevi ni: “Nik kulik erres ko pa, Saemon natu Jon, suri sete jinibb san ololi kurongwose nanu ngel, ko Tata suk ko nga milik re melrin ololi kurongwose.

¹⁸ Ko inu nuwrai tevim, nik kuvi Pita (nais ngok Pita renge nale se n̄eri Gris nir owra ßereng). Nik kupivi batu jinibb suk nir totoklai, pirpe nga marili naim san renge ßereng. Ko mijen sete derteren sen epter nga pīasie nir.

¹⁹ Bela ki ne batun vanu ne melrin tevi nik. Ko poro nga nik kupwer ore nanu san renge iel ngatan, Atua kele pīwer ore; ko poro nga nik kupmaronge parloli nanu san iel ngatan, Atua kele pimaronge parloli.”

²⁰ Mirij jile mirpok, ko ewer ore jinibb sen nir nga sete parwerwrai tweni tevi jinibb san nga ni evi Mesaea.

Iesu owra wowomue nga ni pimij ko vitunen pia-maur luwi kele

²¹ Etipatun re daron ngok ko Iesu ok-wera suri tevi jinibb sen nir nga ni pian renge Jerusalem ko wor; ko ßirterawarrendre nir ko jinibb nga marlelep re sulsulen nir ko jinibb nevisvisienien ne nale neseseien nir para-loli pīsij tevi re nanu pilep, niben pia-runge pīsij e, ko para-revji pini; ko nabong pītul ko Atua pia-loli ni pia-tur imare kele.

²² Mirij jile mirpok, ko Pita ervei tweni ni nuru orsan, ko etipatun erij terter tevi, owra “Numal, Atua pia-rorrrmi nik. Setete pia-pelari pirpok ji nik.”

²³ Ko Iesu erieni ni ko owrai tevi Pita, “Demij, kupruj ngasue inu! Kuwer ore inu nga sete bololi majingen se Atua. Norrorrmien som sete erpe norrorrmien se Atua, erpe norrorrmien se jinibb kobbong nir.”

²⁴ Muwrai jile tevi Pita mirpok, ko owrai vajin tevi jinibb sen nir: “Poro san pimaronge pivijuri inu, ni putor ore nanu nga ni bbong mimrreni, puwosi nai pelaot sen, ko pivijuri inu.

²⁵ Ko poro san puwra putor totoni mauren sen, mian ko pia-tor jabble; ko poro nga san pimaronge mauren sen suri mivijuri inu, ko mian ko pia-lai vajin mauren nga m̄irres.

²⁶ Pia-rres pirpese re jinibb san poro pīlai petpeti nijor ne iel ngatan nir, ko

mauren sen pijiki? Pia-la sev ko pia-wuli lweni mauren sen e?”

²⁷ Inu Jinibb Mawos bea-luwi vini re nosr̄ovien se Tata suk tevi anglo suk nir; ko renge daron nen bea-wuli jinibb jikle nir pusorsan tevi majingen ser sisamis.

²⁸ Nuwretun nuwrai tevi kami, kami sopor nga kamtur iel setete kama-mij wor pijpari nga kapa-lesi inu Jinibb Mawos tevi batun vanu suk vini.”

17

Atua erieni nibe Iesu enije

¹ Nabong ouwon easi osuw, ko Iesu etka Pita ko Jemes ko Jemes tasin wor Jon, ko nir arsan aran arongsa van re botwen nga mian mare san.

² Ko Atua erieni nibe Iesu re no nir; ko Iesu non erinrin erpe nial, ko sunsun sen ow erpe moro nial.

³ Ko artaol arvesane ko arlesi Moses ko Elaeja kele orpelari jin, orjiljilwer tevi.

⁴ Ko Pita erij van ji Iesu, “O, numal, erres kem namlik pa iel. Poro kumarong, inu ßeli gorkoraim pītul iel, san pivi se nik, san pivi se Moses, ko san pivi se Elaeja.”

⁵ Daron nga mok-rij malum mirpok, ko nabor nga m̄irinrin san esalsal orer, ko arunge drrelan san eplari re nabor, owra “Morok evi natuk nga memrreni, ko nurnge erres elep suri ni. Kaprunge ni pīrres.”

⁶ Ko daron nga jinibb sen nir marunge, ko armetutu temijpal, ko arsusweni nor van ngatan.

⁷ Ko Iesu evini jir ko ejarpari ko owra “Kapmera, sete kapmetutu.”

⁸ Ko daron nga markulu imare, sete arlesi jinibb san, Iesu esan bbong.

Jiljilweren tweni Elaeja

⁹ Ko daron nga marok-jubbul re botwen malum, ko Iesu ewer orer, owra “Sete kapwerwera nanu nga Atua miviseni kamlesi re mete kami tevi jinibb pīsan, pijpari nga inu Jinibb Mawos bea-tur imare luwi re mijen.”

¹⁰ Ko jinibb sen nir arsusi rongorngre tevi ni arwera “Erpese jinibb nevisvisienien ne nale neseseien nir marwera Elaeja pia-vini womu ko wor?”

¹¹ Ko Iesu erij welir, owra “Arweretun nga marwera Elaeja pia-vini ko wor ko pia-loli nanu jikle pia-sorsan.

¹² Ko inu nuwrai tevi kami, Elaeja evini pa osuw; ko nir sete arosuri, ko arloli wor sev nga m̄isij nga marmmerreni tevi ni. Pirpok kele kobbong nir para-loli pīsij tevi inu Jinibb Mawos, nibek purnge pīsij.”

¹³ Daron nga m̄irij mirpok ko jinibb sen nir arongwose vajin nga ni sete ospe suri

Elaeja weretun, ko osþe suri Jon Baptaes tevi nir.

Iesu oji tweni demij reнге bipiwarreng san

¹⁴ Ko musuw vajin, arini ji delung nir; ko jinibb san evini ji ni ko ejipa ngatan jin,

¹⁵ ko owra "Wurru, numal, kuprroormi natuk norman; nai ok-loli, ko ornge niben esij e elep. Ko nabong elep ok-wajeni re nabb nga m̄in ko re nuwi.

¹⁶ Ko nutkai van ji jinibb som nir, ko nir sete arongwose parloli þirres luwi."

¹⁷ Ko Iesu owra "Kamivi dul nga nosurien se kami ejkie ko norrorrmien se kami m̄ilengleng. Belik tevi kami pijpari seveling? Bornge þisij suri kami pijpari seveling? Kaptekai ta bipiwarreng nen vini jik iel."

¹⁸ Ko Iesu otortori demij nga m̄isisilvi ni, ko eivare evel lingi ni. Ko bipiwarreng nen erres luwi re metos nial mawos nen.

¹⁹ Ko vitunen, jinibb se Iesu nir arsan arini jin, ko arwera "Erpese kem sete namrongwose naboji tweni demij ngok?"

²⁰ Ko Iesu owrai tevir, "Suri nosurien se kami ewelili jer. Nuwretun nuwrai tevi kami, poro nosurien se kami putoe pirpe jelangi nubek nga welili bbong, ko pivtere nga kapwerai tevi botwen nga milep ngel, 'Kupruj ngasu iok,' ko puruj ko. Sete nanu þisan kele nga kami sete kamrongwos kaploli.

²¹ [Ko nga paroþi tweni demij nga pirpok, parlot ko wor, ko parlinglingi nanen ser, ko niko paroþi tweni.]"E

Iesu owra tweni kele nga ni pimij

²² Ko mian ko daron nga marini marlik korti re vanu ne Galili vajin, ko Iesu owrai tevir: "Inu Jinibb Mawos para-teka kerasi inu van re nevre jinibb.

²³ Ko jinibb nen nir para-revji pini inu; ko reнге nabong itolin, Atua pia-loli inu bea-maur luwi kele." Ko jinibb sen nir, daron nga marunge nale ngok, ko arunge esij lenglengen e.

Iesu owli takis ne Naim se Atua

²⁴ Ko daron nga marini vajin re Kapaneam, ko lartul nga marok-lai nevõt ne takis nga mivi se Naim On ne Jerusalem arini ji Pita. Ko arsusi tevi arwera "Jinibb nevisvisenien se kami ok-wuli takis ngel, rrek ejki?"

²⁵ Ko ni owra "O-o. Ni ok-wuli ko."

Ko daron nga Pita mian vajin loloim ji Iesu, ko Iesu erij womu tevi, owra "Kurrorrmi sev, Saemon? Numal nga marlelep nir ne iel ngatan arok-lai nevõt ne takis ser

ji isi? Ji jinibb ser nir, rreknga ji jinibb neturvitun nir?"

²⁶ Ko Pita owra tevi, "Ji jinibb neturvitun nir." Ko Iesu owrai tevi ni: "Niko muloli jinibb ser nir sete arongwos parwuli. Ko erpok kele, jinibb se Atua nir, Atua sete arongwose pok-la nevõt jir.

²⁷ Ko rromormusus rroporloli nir nga marok-lai takis ne Naim On parlolar. Kupjubbul van ngatan re nuwi kuptutumun, ko nai nga kupa-revei womue, kupwaki nisen; ko kupa-lesi beþje nevõt san oto ren nga pivtere kerru korti rroporawuli takis se kerru e. Ko kupan kupwulie tevir."

18

Jinibb nga mian mare wor

¹ Re daron mawos nen malum ko jinibb se Iesu nir arini jin ko arsusi tevi arwera "Isi elep womunen reнге batun vanu ne melrin?"

² Ko Iesu everuse bipi san vini jin ko ololi otur liven re nir,

³ ko owra "Nuwretun nuwrai tevi kami, Poro norrorrmien se kami sete pulwi pivini pirpe bipiwarreng nir, ko kami setete kamrongwos kapan re batun vanu ne melrin.

⁴ Isi nga puloli lweni ni pivi jinibb malum pirpe bipi ngel, ni pilep womunen reнге batun vanu ne melrin.

⁵ Ko isi nga muosuri inu ko mimaronge bipi nga mirpel san pian ji ni, erpe emaronge nga inu kele ban jin.

Nanu nga marongwos parloli jinibb pivitan van reнге nololien

⁶ "Poro isi nga puloli nir san nga welili ngel nga muosuri inu pivitan van reнге nololien, erres þelak reнге m̄ernen poro nga parrul totoni womue, ko parruloni nevõt nga milep san reнге nowen, ko parjubbuli maure re liven mesa re dis, purron van ngatan e.

⁷ Esij wor elep niko re jinibb ne iel ngatan ngel nir suri nanu jijle nga marok-loli jinibb nir parvitan. Nanu ngok nir parini ko wor, ko esij elep niko re jinibb nga m̄ilai nanu ngok san vini.

⁸ "Ko pirpel ko, poro nga nevrem rreknga þelam porloli kupvitan reнге nosurien som, erres ma kupta tweni nuru kupsor tweni nuru van ngasue nik. Evi nanu nga m̄irres reнге nik poro kupan reнге mauren tevi nevrem þisansan rreknga þelam þisansan, easi re poro nevrem korti nuru ko þelam korti nuru, ko parwirre nik van re nabb nga þin tuwi ngok vini.

E 17:21 Nale nga muto re nolo [], rrek sete Matiu oli, ko jinibb san ea-uli virtue daron nga muli tweni kopi san ne naul ngel.

⁹ Ko poro nga metem puloli kupvitan, kupla tweni ko kupwirre van ngasue nik. Evi nanu nga mīrres renge nik poro kupan renge mauren tevi metem pisan, easi re poro metem korti nuru ko parwirre nik van re nabb ne norongen nga mīsij.

Nale rrongrrongvi ne sipsip nga mijijki

¹⁰ “Kapmetmet renge kamkulu wutane re san nga welili ngel. Nuwrai tevi kami, renge melrin anglo ser nir nga marokmetmete nir arlesi tetajer no Tata suk nga mīlik re melrin.

¹¹ “Ko inu Jinibb Mawos nuvini tweni Bēla se nir nga marijijki.

¹² Kami kamrormi erpese? Poro nga jinibb san sipsip sen ongut (100), ko san rer evel sarsarr ko esarr, ni sete orongwos pilinglingi ngavōl esiw drromon esiw (99) ngok renge botwen parurroi mōsmōs ko pian pipej nga mīsarr? Ni pian ko wor.

¹³ Nuwretun nuwrai tevi kami, poro putor sweri, ko pīr pilep wor ren suri sipsip ngok, piase nga ngavōl esiw drromon esiw nga sete marivel sarsarr.

¹⁴ Erpok kele, sete evi marongen se Tata se kami nga mīlik re melrin nga san nga welili ngel pijijki.

Tuwam nga muloli mīsij tevim

¹⁵ “Poro nga kalesia nga mivi tuwam e puloli pīsij tevim, ko kupan ji ni, kamru koporsan bbong, ko kuptortorie suri. Ko poro purnge nik, ko ololi ni evi luwi tuwam.

¹⁶ Ko poro sete purnge nik, ko kupla kele jinibb pisan rreknga pīeru, nga pirpe nale san nga Naul On muwrai: ‘Nale jijle nir, nir pīeru ko wor rreknga pītul parwilwil ren.’

¹⁷ Ko poro pumusus malum purnge nir, kupwerai tevi nir nga marivi kalesia. Ko poro pumusus malum purnge nir, ko kaploli ni vajin pirpe jinibb ne vare san, rreknga jinibb nga mok-lai takis san.

Loten ne gortien

¹⁸ “Nuwretun nuwrai tevi kami, nanu jile nga kapwer orer renge iel ngatan, Atua kele pīwer orer renge melrin; ko nanu jijle nga kapmaronge parlolir iel ngatan, Atua kele pimaronge parlolir renge melrin.

¹⁹ Nuwretun kele nuwrai tevi kami, poro kami pīeru kobbong pormarong korti renge iel ngatan suri nanu pisan nga porungoni, ko Tata suk nga mīlik re melrin pia-loli wor nanu nen tevi nuru.

²⁰ Poro jinibb pīeru rreknga pītul parkorti nga parlotoe inu, ko inu kele Bēlik livō nir.”

Nale rrongrrongvi ne mēr nga mumus pīwer tweni nivnon se selen

²¹ Vitunen ko Pita evini jin ko osusi tevi owra “Numal, pivavis nga tuwak puloli pīsij tevik ko βetlasi ni? Pijpari pivabut?”

²² Ko Iesu owra lweni tevi “Inu nuwrai tevi nik, sete pivabut te, ejki, ko pijpari ma pingavōl piebut pivabut (77) kis.

²³ Suri renge batun vanu ne melrin, Atua pia-loli pirpe jinibb ngel le: Numal nga milep san owra pieve nivnon se jinibb sen nir.

²⁴ Ko daron nga mītipatun pieve, ko artekai san nga muloli nivnon mijpari nevōt elep nga elep.

²⁵ Ko suri sete orongwos puwli, ko numal sen ololi nale nga parwuli ni pivi demij maur, tevi nesen sen ko natun nir, ko parwuli kele joron jile nir, nga puloli parwuli tweni nivnon sen e sopon nga muloli.

²⁶ Ko jinibb ne majingen nen ejjol vitan ongoni eterter tevi, owra “Wurru, numal, kuplinglingi inu beblen, pian ko bea-wuli tweni jile kobbong nivnon suk nir.”

²⁷ Ko numal sen orrorrmi ni, ko owra lweni tevi ni, “Nivnon som osuw ko pa.” Ko elinglingi ni evel.

²⁸ “Ko jinibb ne majingen nen evel. Ko daron nga mivini vare e, elesi selen nga mok-majing tevi ni san nga muloli pa nivnon jin, mijpari nevōt nga welili bbong. Ko ololarsi ko orrul totoni ni, ekinji βirislan ko owrai tevi: “Kupwuli nivnon som!”

²⁹ Ko selen nen ejjol vitan ko ongoni tevi ni, owra “Wurru, kuplinglingi inu beblen, pian ko bea-wuli twenir kobbong tevim.”

³⁰ Ko ni omusus pilinglingi ni; otur imare, etkai ni ean elngi re naim ne nekaien, pijpari nga pia-wuli jile wor nivnon sen.

³¹ Ko daron nga selen nir marlesi nanu nga muloli tevi, ko arunge esij elep e; ko aran arwerai nanu nga muloli tevi numal ser nga womu nūwer tweni mīnren nivnon sen jile.

³² Ko daron nga numal ser murngre jile, ko ololar lenglengen; ko vitunen everus mīnren, ko owrai tevi: ‘Kuvi jinibb nga mīsij pēpē! Nuwer tweni pa nivnon som ngok pēpēti nga sete kupwuli, suri nik kumngoni tevi inu.’

³³ Ko suri sev nik sete krongwos kuploli pīrpok, kuprorrmi selen pusorsan tevi nga inu morrorrmi nik?”

³⁴ “Ko numal sen ololarsi lenglengen e, ko etkai ni van ji jinibb nga marok-telmaji nir re naim ne nekaien, pīlik iok pijpari nga pia-wuli jile nivnon sen.”

³⁵ Ko Iesu owrai kele, “Ko erpok Tata suk nga mīlik re melrin etlasi tweni pa nololien se kami nga marlelep nir. Ko poro nga kami nolo kami weretunen sete

ƣitlasi tweni nanu nga tuwa kami muloli m̄isij tevi kami, nga mirpe nanu nga welili kobbong, ko Tata suk pia-loli tevi kami pusersan tevi numal ngok muloli tevi jinibb sen ngok.”

19

Iesu osƣe suri sel nga marlingi kurtweni nesen ser

¹ Daron nga Iesu musuw re m̄irij vajin, ko evel lingi Galili, evini re Jutia re devje nuwi seser ne Jortan.

² Ko delung elep arvijuri ni, ko ni ololi nir nga marmesi arres luwi ie.

³ Ko Parasi kele nir arini jin, arwera parrowrrowe ni. Ko arsusi, “Erpese? Evi nanu nga m̄irres nga jinibb ƣilngi kurtweni nesevin sen suri nanu jile?”

⁴ Ko ni erij luwi, owrai tevir: “Rreknga kami sete kameve nga ni nga muloli nanu jile womu, ololi norman ko nesevin,

⁵ ko owra ‘Ko ngok niko suri mirpel ngel ko, norman pivel lingi tata sen ko tasu sen, pian vajin pipitevi nesevin sen. Nuru nga eru ngok porivi vajin niben sansan ko metka sansan.’

⁶ Ko ngok niko nuru setemun orivi eru, ko orivi vajin niben sansan ko metka sansan. Sev nga Atua m̄ijipteni kortoni nuru, sete erres jinibb san ƣila tweni kele.”

⁷ Ko nir arwera lweni tevi: “Poru pipok ngok ko, suri sev Moses owra ‘Poru jinibb san ƣilngi kurtweni nesevin sen, ko puli naul ƣilai tevi, ko ƣilngi tweni vajin?’”

⁸ Ko ni owra lweni tevir, “Suri batu kami nga m̄iterter, niko Moses mimarong nga kaplingi kurtweni nesevin se kami nir. Ko renge womunen sete erpok.

⁹ Ko nuwrai tevi kami, Poru nga jinibb san nesevin sen sete puloli womue batun, ko m̄nernen bbong ƣilngi kurtweni nawone, ko ƣitka kele nesevin ƣisan kele, ni evitan re nesevin ngok ko vajin.”

¹⁰ Ko jinibb sen nir arwera tevi ni, “Poru pipok tevi jinibb san ko nesevin sen, rrek erres sete portektekai nuru.”

¹¹ Ko ni owra lweni tevir, “Sete jinibb jile orongwose puloli pirpe nga kamwera ngok, nir nga bbong Atua m̄ilngi re nolur arongwose parloli pipok.

¹² Jinibb sapor sete arongwose partekai nesevin suri arivi demaw, rreknga ariak erpok ko wor, rreknga jinibb ololi arirpok. Ko inu nomok-supe suri nir nga marivi jinibb rres ko wor, ko sete arteka nesevin suri armajing suri batun vanu ne melrin. Si nga murongwos puloli pipok, puloli pipok ko wor.”

¹³ Ko vitunen jinibb sapor arteka bipiwarreng ser vini ji ni nga ni ƣilngi nevren rer ko pulot. Ko Iesu jinibb sen nir artortori lartul nen nir:

¹⁴ Ko Iesu owrai tevir: “Sete kapwerorer. Kaplinglingi bipiwarreng nir parini jik, suri batun vanu ne melrin evi se nir nga marirpe bipiwarreng ngok nir.”

¹⁵ Ko elngi nevren rer jile osuw, ko evel lingi ie.

Jinibb san emrreni ƣila mauren nga sete mia-suw nabong sapon

¹⁶ Mian ko vitunen vajin, ko jinibb san evini jin ko osusi tevi ni: “E, jinibb nevisvisenien, bololi majingen sev nga ƣirres pivtere nga bea-lai mauren nga tuwi ngok vini?”

¹⁷ Ko Iesu owra lweni tevi: “Erpese kumsusi tevik suri nanu nga m̄irres? Jinibb san bbong erres, Atua. Ko poro kupwera kupla mauren ngok, kuptori nale nesesreien se Atua.”

¹⁸ Ko m̄nernen osusi kele tevi Iesu: “Sev nale nesesreien ko kumwera ngok?” Ko Iesu owra lweni tevi ni: “Nale nesesreien nen le ngel: ‘Sete kuprevji pini jinibb, sete kupvenae nesevin, sete kupevna, sete kupkerkeris re nosƣen se numal nir;

¹⁹ kuposuri tata som ko tasu som, ko kupmerreni selem pirpe nik luwi.’”

²⁰ Ko m̄elakel nen owra lweni tevi Iesu: “Nomok-loli jile pa erpe nale nga kumwera ngok nir. Sev ojpon kele wor nga bololi?”

²¹ Ko Iesu owra lweni tevi ni, “Poru kupmerreni kupivi jinibb mawos jile ƣirres, kupan kupwulwule jorom jile nir; ko kupla nevot nen tevi beres nir; ko jorom nga marres putoe mare re melrin. Ko kupini kupvijuri inu.”

²² Daron nga m̄elakel murngue nale se Iesu ngok e, ko orngue esij e elep, suri ni joron nir elep. Ko evel.

Eterter renge jinibb nga joron milep pian re batun vanu ne melrin

²³ Ko Iesu owrai tevi jinibb sen nir, “Nuwretun nuwrai tevi kami, Eterter elep renge jinibb nga joron milep pian re batun vanu ne melrin.

²⁴ Ko howrai kele tevi kami: Eterter temijal renge nato liwen pietiv.^F Ko nga jinibb san nga joron milep poro pian re batunvanu se Atua, eterter wor elep asi wore ngok.”

²⁵ Ko daron nga jinibb sen nir marunge nale ngel, ko bbosa elair e elep, ko arwera “Poru pipok, ko si ma orongwos ƣila mauren?”

^F 19:24 Erpe iel, Matiu osƣe kamel ƣisil rurrngi batu nitel san nolon. Ko suri kamel ejki iel, namsuƣe nato ela wani.

²⁶ Ko Iesu emtenir ko owrai tevir: "Eterter re devjen nga jinibb puloli. Ko re devjen nga Atua, ni orongwos puloli nanu jijle."

²⁷ Ko Pita erij weli, owra lweni tevi: "Kuplesi kem, namlinglingi joro kem jile arjipon, ko namini namvijuri nik. Naba-la sev p̄irres ren?"

²⁸ Ko Iesu owrai lweni tevi nir: "Nuwretun nuwrai tevi kami, renge daron nga Atua pia-loli nanu jijle parmerr p̄irres, ko inu Jinibb Mawos bea-sakel rege nai seksakel suk tevi nosrövien suk; ko kami nga kamok-vijuri inu, kami kele kapa-sakel re nai seksakel pisngavöl drromon pieru, ko kapa-wera suri lat nga puto suri tevi metka ne Isrel nir esngavöl drromon eru.

²⁹ "Ko nir jile kele nga marivel lingi naim ser nir rreknga tuwar nir rreknga jorir nir rreknga tata ser rreknga tasu ser rreknga natur nir rreknga dan ser suri marongen suk, lartul nen nir para-la weli vajin rege iok pijpari pungut pivesan, ko para-lai kele mauren ne tuwi ngok vini.

³⁰ Ko nir elep nga marwowomu mian ko para-vivitu, ko nir elep nga marvivitu, mian ko para-wowomu."

20

Nale rrongrrongvi ne jinibb sopor nga marmajing tweni nowlir

¹ Ko Iesu owrai kele tevir, "Renge batun vanu ne melrin, Atua pia-loli pusorsan tevi jinibb ngel le: Jinibb san naut nga milep sen san otoa. Ko nabong san emremra rorpong susu, owra pilai jinibb ne majingen sopor nga parmajing rege orsel sen.

² Mian ko eskai jinibb sopor, osp̄e suri nowli nabong tevir, mian ko nir armarong rege nowli nabong nen; ko ni okoni nir vajin van re orsel sen.

³ Ko re mete nial esiw sapon, ko ni otutur sapon kele; ko daron nga mututur e, ko elesi jinibb sopor kele artur nawon re maket.

⁴ Ko owra tevir, 'Kami kele kapan re orsel suk, ko nowlin sev nga pumomsawos bea-wuli kami ren.'

⁵ Ko nir aran. Ko re mete nial esngavöl drromon eru sapon, mian ko re kele mete nial itul sapon re nat mirivriv, otutur kele, ko ololi erpok kele.

⁶ Ko mijpari re mete nial elim sapon rivriv, ko otutur kele; ko elesi jinibb sopor kele artur nawon, ko owrai tevir: 'Erpese kamtur nawon iel mirpel nabong totoklai san?'

⁷ Ko nir arwera lweni tevi: 'Suri sete jinibb san elngi majingen re kem.' Ko ni owrai tevir: 'Kami kele kapan re orsel suk.'

⁸ "Ko rivriv jer ko vajin, numal nga naut sen nen owrai tevi n̄er nga mok-metmete

joron nir, 'E, kupverus kortoni jinibb ne majingen nir, ko kupwulir. Ko kuptipatun kupwuli re nir nga marvivitu, pian pusuwu re nir nga marwowomu.'

⁹ Ko nir nga martipatun majingen re mete nial elim sapon rivriv arini ko arlai nevöt ser, osorsan tevi nowli nabong san totoklai.

¹⁰ Mian ko nir vajin nga marini wowomu re majingen arini, arrorrmi rreknga nir nowlir parasi wor van mare wor. Ko ejki, nir erpok kele bbong, arlai nevöt nga musorsan tevi nowli nabong san.

¹¹ Ko daron nga malair e, ko nir arwor suri jinibb nga naut sen.

¹² Mian ko arwera tevi: 'E, erpese nir ngel arvivitu armajing bbong mete nial sansan, ko nik kuwlr osorsan tevi kem nga nammajing rege nabong totoklai, namrunge misij rege nial nga milep?'

¹³ Ko ni owra lweni tevi nir san, owra 'Selek, sete nuloli esij tevim, suri nik kumarong pa tevi inu rege nevöt ngok.

¹⁴ Kupla nevöt som ko kupiel. Inu numreni bowli nga mivitu ngel pusorsan tevi nik.

¹⁵ Rrek kulesi nga sete evi nanu nga n̄irres nga inu bololi sev nga memrreni re jorok? Ejki ma, erres ko wor. Rreknga nolom eleplep kobbong suri inu nolok erres.'

¹⁶ Ko Iesu owrai kele: "Pirpok ko, nir nga marvivitu mian ko para-wowomu, ko nir nga marwowomu, mian ko para-vivitu."

Iesu owra tweni vatolin nga ni pimij

¹⁷ Ko vitunen Iesu owra pulwi kele van Jerusalem e. Ko jinibb sen nir esngavöl drromon eru arpitevi ni re sel. Marivel mian, ko Iesu etkai talev nir van re devje sel e, ko owrai tevir:

¹⁸ "Kaplesi, rraman Jerusalem le ngel. Ko daron nga rrapa-jipari, ko para-teka kerasi inu jinibb Mawos van ji jinibb sulsulen nga marlelep nir, ko ji jinibb nevisvisenien ne nale nesereien nir. Ko para-wera inu ban re mijen,

¹⁹ ko para-tekai inu van ji jinibb ne vare nir nga para-tetnije inu ko para-telmaji inu, ko para-rruloni inu para-wuse maure inu re nai pelaot. Ko mian ko re nabong itolin, Atua pia-loli inu bea-maur luwi kele re mijen."

Tasu se Jemes ko Jon ongoni nanu san ji Iesu

²⁰ Mian ko vitunen Sepeti nesen sen eptevi natun nuru Jemes ko Jon, nga morivi pa jinibb se Iesu, arini ji Iesu ko arjipa jin. Ko vinnen owra pungoni nanu san ji Iesu.

²¹ Ko Iesu owra tevi: "Kumrreni sev?" Ko vinnen owra lweni tevi ni: "Numrreni kupwera nale san nga natuk norman ngel

nuru porivi jinibb nga morlelep jer renge batun vanu som, tuwen pisakel re nevrem rres, ko tuwen re nevrem mair."

²² Ko Iesu owra lweni: "O, sete komorrongwose nanu nga komor-ngoni ngok. Kamru komor-vitere kopor-minmin re biles ne norongen nga m̄isij nga inu beminmin ren?" Ko nuru orwera lweni tevi ni: "O-o, komru nomor-vitere."

²³ Ko ni owra tevi nuru, "Kopora-minmin ko re biles nga inu beminmin ren. Ko re kopora-sakel re nevrek rres rreknga re nevrek mair, sete evi nanu nga inu bea-lai. Evi nanu nga Tata suk ko pia-lai tevi nuru nga mutobbobbu tweni nuru pae musuw nga pia-lai tevi nuru."

²⁴ Ko daron nga nir esngavöl marunge, arlolarsi niaken nen e nuru, suri nuru orwera poran mare parasi nir.

²⁵ Ko Iesu orongwose norrorrmien ser, ko everus kortoni nir jikle vini jin ko owrai tevir: "Kami kamrongwose numal nir se jinibb ne vare nir aron tertere jinibb ser, ko jinibb nga marlelep ser nir arokrrowrowe derteren ser elep.

²⁶ Sete pirkok re livö ne kami. Isi nga mimrreni pivi jinibb nga milep re livö ne kami, ni puloli lweni ko wor ni pivi jinibb nga welili, nga pivi jinibb ne majingen se kami.

²⁷ Ko isi nga mimrreni puwowomu re kami, ni pivi demij maur se kami.

²⁸ Osorsan tevi inu Jinibb Mawos, sete nuvini tweni nga jinibb parmajing se inu, ko nuvini tweni bemajing se nir, ko nga belai mauren suk puto wani milnge delung nir re mijen, ko bowli lwenir."

Iesu ololi metrorrr eru orkulu luwi kele

²⁹ Ko nir artutur mian, ko daron nga marivel lingi Jeriko, ko delung elep arvijuri ni.

³⁰ Ko rengen devje sel, metrorrr eru orlililik ren. Ko daron nga morunge Iesu m̄iasi re sel, orkail orwera "Warru, Numal, metka se Devet, kuprorrmi komru!"

³¹ Ko delung nir artortori nuru, arwera "Kopor-þerþer!" Ko nuru orkail van mare lengleng kele, orwera kele: "Warru, Numal, metka se Devet, kuprorrmi komru!"

³² Ko Iesu otur murrong ko everus nuru ko owrai tevi nuru: "Komor-marong bololi sev tevi kamru?"

³³ Ko nuru orwera lweni tevi: "O, numal, nomor-marong mete komru porkulu luwi."

³⁴ Ko Iesu orrorrmi lengleng nuru, ko ejpari mete nuru. Ko ngavilvil orkulkulu luwi erres vajin, ko orvijuri ni.

21

Iesu ean Jerusalem ko eviseni nga ni evi batu Numal

¹ Ko mian ko vitunen arini morie Jerusalem, ko arini re ngaim san nisen Betpas nga muto morie botwen san nga marveruse Botwen ne lolnai ne olip. Ko Iesu owrai tevi jinibb sen eru:

² "Koporan re ngaim nga muto ngokwan ngok. Ko pingavil kopora-lesi arile totkoni dongki san tevi natun. Kopor-rupaji dali nuru ko kopor-ile nuru vini jik.

³ Ko poro san þirij tevi kamru suri, ko kopora-werai tevi, 'Numal emrreni nuru.' Ko pingavil ko þilinglingi kamru kopor-ile nuru vini."

⁴ Ngok eplari osorsan tevi nale san se Atua nga propet sen san muli wowomue tuwi mirpel:

⁵ "Kapwerai tevi jinibb nir nga marlik re Saeon, 'Kaplesi Numal se kami evini ji kami, evi jinibb malum, ko esakel re dongki nga welili kobbong, nga mivi natu dongki ne majingen.' "

⁶ Ko nuru oran ko orloli osorsan erpe Iesu muwrai tevi nuru,

⁷ ko orile dongki nen tevi natun vini ji Iesu; ko arþelsen sunsun ser re nuru, ko Iesu esakel mare ren.

⁸ Ko delung elep arla sunsun ser arþelsenir rengen sel, ko nir sopor kele artitai rengsi nai tevi raor, arþelþelsenir rengen sel. Ngok eviseni nga artori Iesu evi jinibb nga milep.

⁹ Ko delung elep sopon, sopor nga marwowomu ko sopor nga marvivitu arkikail, arsurövi ni ko arwera "Osana van ji metka ngel se Devet! Numal Atua, nik kurij pa erres tevi ni nga mivini re nik nisem. Osana re melrin mare!"

¹⁰ Ko daron nga mivini Jerusalem e, ko jinibb ne ie nir arore, arwera "Isi ko ngok?"

¹¹ Ko delung nir arwera lweni: "Ngel evi propet Iesu ne Nasret rengen Galili."

Iesu oji tweni nir nga marwulwule nanu rengen Naim On

¹² Mian ko vitunen vajin ko Iesu evan re loloim ne Naim On. Ko oji tweni nir nga marok-wulwule nanu nir iok tetajer, ko nir nga marok-wulwuli nanu nen nir, ko evatpuse tep se nir nga marok-kelkele nevöt nir, ko evatpuse kele nai seksakel se nir nga marok-wulwule wurner nir.

¹³ Ko owrai tevir: "Aruli pa tuwi nale se Atua san ngel, owra 'Naim suk, parveruse naim ne verusen.' Ko kami kamtur imare vajin ko kamloli evi 'naim ne venao res.' "

¹⁴ Mian ko jinibb nga meter marrorr nir ko naroj nir arini jin rengen Naim On, ko ni ololi arres luwi.

¹⁵ Ko daron nga jinibb nga marlelep re sulsulen nir ko jinibb nevisvisenien ne nale nesesreien nir marlesi muloli majingen nga marinijnij nawone, ko nanwarreng nir markikail rengo Naim On, nga marwera "Osana van ji metka se Devet!", ko lartul nen arlolarsi lenglengen e Iesu suri.

¹⁶ Ko arwera tevi: "E, erpese? Nik kurnge nanu nga nanwarreng ngel nir marwerair ngok?" Ko Iesu owrai lweni tevir: "O-o. Ko kami sete kameve nabong san nale ngel se Atua nga muwra tuwi: 'Eplari re jingo bipi nir ko bipiwarreng nga marsus malum nir, Atua ololi nir arsurövi ni erres pelak.' Kami kameve ko pa osuw." ¹⁷ Ko elinglingir ko evel van re ngaim ne Betani ko omosi ie.

Nai pik nga wenen mijkie

¹⁸ Mian ko mevinen vajin rengo rorong susu, olwi van ngaim e re Jerusalem. Ko daron nga mututur mian, ko numer eaji.

¹⁹ Ko elesi nai san nisen nai pik otur re devje sel, ko emawose evan ren, owra purro wenen. Ko elesi raon kiskis bbong, sete wenen otoo. Ko owrai tevi nai pik nen, "Setemun wenem puto kele e nabong san pijpari tuwi ngok vini." Ko daron momsawos e nen ko pa, nai pik nen emli.

²⁰ Ko jinibb sen nir, daron nga marlesi e, ko artale ko arwera "Erpese nai pik ngel mimli mivesane?"

²¹ Ko Iesu erij welir, owrai tevir: "Nuwretun nuwrai tevi kami, poro nosurien se kami putoe, ko sete kaprorrmi karkare le, ko ngok kami kele kaprongwose kaploli kobbong pirpe nga mololi ngel tevi nai pik ngel. Ko mare re iok, kapwera kele tevi botwen ngel nga Atua pila tweni ko puwirre van re dis, ko piplari pusorsan tevi.

²² Ko nanu jijle, sev nga kapa-ngoni rengo verusen, poro kapa-osuri, ko kapalair ko."

²³ Ko Iesu olwi kele van re Naim On e, ko ok-visviseni jinibb nir. Ko jinibb nga marlelep nir ne sulsulen ko birterawarreng nga marivi pa jinibb nga marlelep arini jin ko arsusi: "E, kula derteren ngok nir ngabe ko nga komok-loli nanu ngok e nir? Siko elai tevim?"

²⁴ Ko Iesu erij welir owrai tevir: "Inu kele bosusi kami e nanu pisan, ko poro kami kapwera tevik, ko inu kele pipok bowrai tevi kami nulai derteren ngel nir ngabe le nga mololi nanu ngel le nir.

²⁵ Kami kapwera ta tevik: Jon ela derteren sen nga mok-paptaes e ngabe? Ji Atua, rreknga ji jinibb kobbong?" Ko nir arwerera tevir: "Poro rapwera, 'Evel ji

Atua vini,' ko ni tia-wera lweni tevi kerr, 'Erpese kami sete kamosuri ni?'

²⁶ Ko poro rrapa-wera, 'Evel ji jinibb kobbong vini,' ko rrammetutue delung nir, suri nir jile artori pa Jon osuw evi propet."

²⁷ Ko nir arwera lweni tevi Iesu, arwera "Sete namrongwose." Ko Iesu owra lweni tevir, "Ia, ko inu kele sete nurongwose bowrai tweni tevi kami rengo derteren sev nga mololi nanu ngel e nir."

Iesu owra nale rrongrongvi tweni jinibb nga natun eru

²⁸ Ko Iesu owrai kele, "Kaprorrmi ta nanu ngel: Jinibb san natun otoo, natun eru. Ko evini ji merwomu nen ko owrai tevi, 'Natuk, lelingen kupa kupmajing re orsel suk.'

²⁹ Ko natun owrai lweni tevi, 'Numusus.' Ko mian ko vitunen ko vajin, ko norrorrmien sen olwi, ko evan.

³⁰ Ko tata se nuru evini kele ji merwitu nen, ko owrai kele erpe nga muwrai tevi merwomu. Ko merwitu nen owra lweni tevi: 'Bean ko tata.' Mian ko setemun evan."

³¹ Ko Iesu osusi suri re nuru nga eru ngok tevir, owra "Nuru si nen ko ololi marongen se tata sen?" Ko nir arwera lweni tevi: "Nga womu nen." Ko Iesu owra lweni tevir: "Nuwretun nuwrai tevi kami, kami kamsorsan temijal tevi merwitu nen. Ko lartul nga marok-la nevöt ne takis nir ko nesevin ne sel nir nga kamungasir ngok arsorsan tevi merwomu nen, ko nir parlai wani milnge kami van re batun vanu se Atua.

³² Suri Jon evini ji kami, evisviseni sel nga momsawos mirres, ko kami sete kamosuri ni. Ko nir ma, lartul nga marok-la nevöt ne takis nir ko nesevin ne sel nir, arosuri ni. Ko kami, daron nga kamlesi nir nga marosuri mirpok ngok, ko norrorrmien se kami sete olwi kele nga kami kele kaposuri ni.

Nale rrongrongvi tweni jinibb nga marsij nga marok-metmet orsel ne grep

³³ "Kaprunge ta nale rrongrongvi minij kele, ngel: Jinibb san orsel sen otoo. Ko orwi grep. Ololi nalut owlu rrale live laut. Ko eli bulwil ko elngi besin san ren, ko san oto mare e nga parjngteni wene grep ren ko jinibb parok-bböt ren, suwen pisese van re besin nga muto ngatan e. Muloli jile mirpok, ko eli naim san nga muwu mare nga jinibb nga marok-kulkulu parsara parantur mare ren, ko parok-kulkulu pej nanu nga marok-vevna nir. Erpok, ololi jile osorsan tevi nga marok-loli daron nga maruwi nanu nen. Koelinglingi tevi jinibb sopor parmetmete, ko ni evel van re vanu minij e.

³⁴ “Ko mian ko daron nga wenen muto-mori pimirr; ni okoni jinibb sen sopor van ji nir nga marok-metmete orsel sen, nga nir parla wenen nen sopor, pusorsan tevi nga marijrij e.

³⁵ Ko jinibb nen nga marok-metmete orsel arrul totonir; ko nir san artelmaji, nir san arevji pini, ko nir san artuwe.

³⁶ Mian ko ni okoni kele jinibb sen sopor nir elep asi vajin nga womu, ko lartul nga arloli kele tevir osorsan tevi nga marloli tevi nir nga womu.

³⁷ “Mian ko vitunen jer vajin, okoni natun norman; orrorrmi nga nir parloli p̄irres le tevi ni natun.

³⁸ Ko jinibb nen nir, daron nga marlesi ni natun, arwerwera tevir, ‘O, ngel evi natun nga pia-la joro tata sen. Rraprevji pini, ko puloli orsel pia-ivi vajin se kerr!’

³⁹ Ko arrul totoni, ko arevei van vare re orsel, ko arevji pini.”

⁴⁰ Ko Iesu osusi tevi nir, owra “Ko daron nga jinibb nga orsel sen pivini, ko puloli sev tevi jinibb ngok nir?”

⁴¹ Ko nir arwera lweni tevi ni, “Suri nir arivi jinibb nga marsij, ni kele puloli p̄isij pusorsan luwi tevir, p̄irevji pinir. Ko pia-linglingi orsel sen tevi jinibb sopor kele nga parok-metmete ko para-la wenen nen tevi re daron mawos nen.”

⁴² Ko Iesu owrai tevir: “Sete kameve nabong san nale ngel ne Naul On? ‘Nabur nga lartul nga marok-ili naim marungasi marwirre, ni ko vajin evi nabur nga murul totoni naim m̄iterter.^G Ngel evi majingen se Numal nga muloli, ko rramtaole rramlesi m̄irres p̄elak.’ Kameve ko pa osuw.

⁴³ “Ngok, nuwrai tevi kami: Atua pia-la tweni batun vanu sen ji kami, ko pia-lai tevi jinibb sopor kele nga para-la wenen nga musorsan tevi.

⁴⁴ Si nga pusnge nabur ngel, niben pimabbur. Ko si nga nabur ngel piravij ren, niben pumoloplop p̄etp̄eti.”

⁴⁵ Ko jinibb nga marlelep nir re sulsulen ko Parasi nir daron nga marunge nale rrongrongvi sen ngok, arongwose nga ni owra suri nir.

⁴⁶ Ko arwera parrul totoni Iesu, ko armetutu delung nir. Suri delung nir artori ni evi propet san.

22

Nale rrongrongvi ne dabbuen ne totkoien

¹ Ko Iesu ela nale rrongrongvi kele tevi nir, owra

² “Renge batun vanu ne melrin, Atua pia-loli pusorsan tevi numal ngel le: Numal san ololi dabbuen ne totkoien se natun norman.

³ Ko okoni jinibb sen nir nga parveruse nir nga m̄ila pa nale tevir nga parini. Ko nir armusos parini.

⁴ Ko okoni kele jinibb sen sopor kele, owra ‘Kapwera tevi nir nga m̄ela nale tevir nga parini, “Kaplesi, nuloli lilane jile nanen, nutor pini pa buluk suk nir ko natu buluk suk nga marlelep marres nir, ko nanu jille oto omomsawos pa nga parurroi. Kapini renga dabbuen ne totkoien.” ’

⁵ Ko nir arong melmelase bbong, ko arivel; san evan orsel sen, ko san evan emajing re sto sen.

⁶ Ko nir sopon nga marlik jer nen arrul totoni jinibb nga mukonir nen, ko arloli esij tevir, ko arevji pinir.

⁷ Ko numal nen, daron nga murunge nanu nga marloli ngok, ko ololar lenglengen. Ko okoni jinibb nuval sen nir aran ko arpir pinpini jinibb nen nir nga marok-revrevji pini jinibb, ko arsuli ngaim ser.

⁸ Muloli jile mirpok tevir musuw, ko owrai vajin tevi jinibb sen nir, ‘Nanen ne totkoien arloli jile osuw, artiriv ko vajin. Ko nir nga marwera tevi nir nga parini, sete arres re parini.

⁹ Kapiel ta vajin suri sel nir, ko jinibb si nir nga poro kapa-sewute re sel, kapa-wera tevir nga nir parini re nanen ne totkoien.’

¹⁰ Ko jinibb sen nir arloli erpok, arivel suri sel nir; ko daron nga marsewute jinibb tama san, poro pivi jinibb nga m̄isij rreknga jinibb nga m̄irres, ko arwera tevi, ‘Kupan re nanen ne totkoien.’ Marok-loli mirpok mian, konaim ne nanen ne totkoien owun saute nir nga marini vajin.

¹¹ “Ko daron nga numal nen ne nanen mivini loloim nen, owra p̄ilesi nir nga marini, ko otor sweri jinibb san loloim nga sete muri sunsun mawos ne totkoien.

¹² Ko numal nen owrai tevi m̄ernen, ‘Selek, erpese kumini loloim ko sete kumuri sunsun mawos ne totkoien?’ Ko ni omurrong jer.

¹³ Ko numal nen elesi esij ko owrai tevi jinibb sen nir, ‘Kaprrul kokortoni nevren nuru ko belan nuru, ko kapsere totkoni. Ko kapwos tweni van vare e, ko kapwosi van kapwirre van re lat nga mimalik jerjer. Iok ngok jinibb para-ting ko para-runge p̄isij pilep.’

¹⁴ “Nir elep nga Atua m̄iveruser nga parini jin, ko nir ewelili bbong m̄ilai twenir parivi sen.”

^G 21:42 Erpe iel, Matiu os̄pe nevöt, ko murrun nga nir marili naim muto suri; ko kem namrieni erpe kerr rram̄ili naim iel, nga puloli mining ne nale se Matiu piplari limjer.

Erres nga jinibb puwli takis tevi Sisa, rreknga ejki?

¹⁵ Ni m̄irij jile mirpok musuw, ko Parasi nir arivel van lut san e ko arkorti, ko arsuṣuṣe suri parloli pīrpese nga Iesu puon luwi re nale sen.

¹⁶ Arsuṣe jile osuw, ko arkoni jinibb ser sopen tevi jinibb se Erot sopor aran arkerkerasi Iesu, arwera “Jinibb nevisvisenien, namrongwose nik kuwretun, kuvisviseni sel se Atua renge weretunen. Sete kuwor suri jinibb san, suri sete kumtutue jinibb san.

¹⁷ Ngok, kupwera ta tevi kem norrorrmien som. Evi nanu nga m̄irres rraplai nevöt ne takis tevi Sisa, batu numal se m̄eri Rom nir, rreknga ejki?”

¹⁸ Ko Iesu orongwose nga arwera parkerkerasi ni, ko owra tevir: “Suri sev kamrrowrowe inu, kami nga kami re sel eru?”

¹⁹ Kapviseni ta inu nevöt nen.” Ko nir arlai nevöt nen san tevi.

²⁰ Ko ni elai, emteni, ko osusi tevir, “Isi le nisen ko non maruli rengen ngel?”

²¹ Ko nir arwera lweni tevi, “Rrekma Sisa ko.” Ko ni owrai tevir, “Kaplai tevi numal se m̄eri Rom sev nga marivi se ni, ko kaplai tevi Atua sev nga marivi se Atua.”

²² Ko daron nga marunge nale ngel e nir, bbösa elair e, suri arorrmi Iesu sete orongwose p̄iasie nir renge nanu ngok. Ko arlinglingi ni ko arivel sisamis.

Pirpese re jinibb nga mimij ko mimaur luwi kele

²³ Ko vitunen, re nabong mawos nen malum, ko Satusi nir sopor arini jin kele. Nir arok-wera jinibb sete orongwos p̄imaur luwi kele renge mijen. Ko arsusi kerkerasi tevi, arwera

²⁴ “Jinibb nevisvisenien, Moses owrai tuwi, ‘Poru jinibb p̄isan pimij ko natun pijkie, ko tasin p̄itkai nesevin sen ko pivesi wani metka se tuwan nga mimij ngok.’

²⁵ Ko renge kem bonevis jinibb ebut arivi niaken erpok. Ko m̄erwomu nen etka nesevin sen; mian ko orongwose otomori pimij, ko owrai tevi tasin, ‘Natuk ejkie, kuptekai nesevin suk.’ Ko m̄erwomu emij.

²⁶ Ko m̄ervitu kele ololi erpok kele, etka kele nesevin nga, mian ko emij. Mian ko epari ebutun nga vitu jer nen, nir jijle artekai nesevin nga, mian ko nir jijle armij lingi vin nga.

²⁷ Mian ko vitu jer nen vajin, ko nesevin emij vajin.

²⁸ Ko namwera nabsusi tevim: Renge daron nga jinibb nir parmaur luwi kele re mijen, siko re nir niaken nga ebut ngok pia-ivi nesen sen e vinnen? Kupwera ta we!”

²⁹ Ko Iesu erij welir owrai tevir: “Kamsarr, suri sete kamrongwose Nale On se Atua, ko sete kamrongwose derteren se Atua.

³⁰ Suri renge meraien ne mijen, sete arongwose para-totko kele mun, ko para-irpe vajin anglo ko re melrin.

³¹ Ko nga kami kapjipari meraien ne mijen evi weretunen, ko belai nale san se Atua nga kamrongwose pae nga muwrai tevi kami ngel, muwra

³² ‘Inu nuvi Atua se Epram, ko Atua se Aesak, ko Atua se Jekop.’ Atua sete evi Atua se jinibb nga marmij nir, ko evi pa se jinibb nga marmaur nir. Suri derteren sen elep nga elep lingi mijen.”

³³ Ko daron nga delung nir marunge nale ngel, ko bbösa nga milep elair renge nevisvisenien nga m̄irres sen.

Nale nesesreien nga mian mare wor re nale nesesreien m̄inij nir

³⁴ Ko Parasi nir, daron nga marunge Iesu muloli Satusi nir marmurrong jer mirpok, ko nir arververus kortonir arkorti lat san.

³⁵ Mian ko san re nir nga norongwosien sen mutoe re nale nesesreien se Atua osusi rongorngi tevi ni, owra purrowrowe ni, owra

³⁶ “Jinibb nevisvisenien, renge nale nesesreien, kulesi nale ngabes nen ko elep womunen?”

³⁷ Iesu owra lweni tevi: “ ‘Kupmerreni Numal Atua som tevi nolom totoklai, tevi mauren som totoklai, ko tevi norrorrmien som totoklai.’

³⁸ Ngok evi nale nesesreien nga milep womu jer nen.

³⁹ Ko nga suri nen e, mutomori pirpe ngok, ni le ngel: ‘Kupmerreni selem pirpe nik luwi.’

⁴⁰ Ngok ko nuru orivi batu nale nesesreien nir, ko nale se propet nir kele.”

Mesaea evi metka se Devet, ko evi kele Numal sen

⁴¹ Parasi nen nir arlik korti malum, ko Iesu osusi tevir,

⁴² owra “Kamrorrmi Mesaea erpese? Isi ko metka sen?” Nir arwera lweni tevi, arwera “Se Numal Devet.”

⁴³ Ko ni owra lweni tevir, “Poru p̄irpok, ko Mesaea piveruse Devet puwra ‘Numal,’ suri Devet owowomu. Ko ejki, Nem̄in On ololi Devet miveruse Mesaea muwra Numal, nga muwra

⁴⁴ ‘Numal Atua owra tevi Numal suk, “Kuplik renge nevrek rres pijpari nga bealingi devje nuval som nir parirpe lat nga kupbböt ren renge nolon belam ngatan.’”

⁴⁵ Poru nga p̄irpok Numal Devet miveruse Mesaea mivi Numal sen, ko evi metka sen erpese?”

⁴⁶ Ko daron nga m̄irij jile mirpok, ko sete jinibb kele san orongwos p̄irij weli nale san tevi ni. Ko n̄itipatun re daron nen jinibb jijle armetutu, setemun san orongwos pususi rongornge nanu san tevi ni.

23

Iesu erij tere jinibb nevisvisenien nir ko Parasi nir

¹ Mian ko Iesu erij tevi delung nir ko jinibb sen nir, owra

² “Jinibb nevisvisenien ne nale nesereien nir ko Parasi nir arla wani milnge Moses, arivi pa jinibb nga parvisviseni jinibb nir re nale nesereien nga Moses muli tuwi.

³ Suri iok ko, nanu jijle nga marwerai tevi kami, kaploli tevir pirpe nga marwerai kobbong. Ko re devjen nga nanu nga marlolir, sete kaploli surir e pirpok. Suri nir arok-werai, ko sete arok-majing suri.

⁴ Arsere bb̄bb̄tti nga marrow milep ko enterter nga jinibb nir parsoloir, ko arjingtonir re birpari jinibb nir; ko nir mawos ma armusus parsu tweni bb̄ös nevrer e san.

⁵ Ko renge majingen ser arlolir armerreni jinibb parlesir. Kamrongwose narr nga wewarrenc nir nga marsongni naul nga maruli tweni nale se Atua rer, nga jinibb nir parruloni re borngir ko nevrer. Ko nir arloli se nir arlelep nga jinibb parlesir ko parsur̄ovir renger. Ko suri norrorrmien ngok kobbong, muloli marloli kele sunsun ser marpepriv.

⁶ Ko renge nanen kele, arok-merreni parsakel re lat nga jinibb nga marlelep nir marok-sakel rer; ko arloli erpok kele re naim ne gortien nir.

⁷ Ko armerreni jinibb partorir re maket, ko jinibb nir parveruse nir, ‘Jinibb nevisvisenien.’

⁸ Ko kami, sete kaplolir parveruse kami san ‘Jinibb nevisvisenien,’ suri jinibb sansan bbong evi jinibb nevisvisenien se kami, ko kami jijle kamivi niaken.

⁹ Ko sete kapveruse jinibb san pivi tata se kami rege iel ngatan, suri jinibb sansan bbong evi tata se kami, ni nga m̄ilik re melrin.

¹⁰ Ko sete kaplolir parveruse kami ‘Numal,’ suri Numal se kami sansan bbong, Mesaea.

¹¹ Ko ni nga mivi jinibb nga milep temijal re liv̄o rege kami, pivi wor jinibb ne majingen se kami kele.

¹² Ko si nga musustur lweni ni mian mare, Atua pia-loli ni pian ngatan. Ko si

nga puloli lweni ni pian ngatan, Atua pia-sustur ni pian mare.

Iesu ewer lokloksi jinibb nevisvisenien nir tevi Parasi nir

¹³ “Wi, kami jinibb nevisvisenien ne nale nesereien, ko kami Parasi, kami nga kami re sel eru! Suri kamkikiorore batun vanu ne melrin tevi jinibb nir. Ko kami kele sete kaman, ko sete kamlinglingi kele nir nga marmerreri paran.

¹⁴ [Wi, kami jinibb nevisvisenien ne nale nesereien, ko kami Parasi, kami nga kami re sel eru! Kami nga nolo kami mok-venaē pa naim se nesevin nir nga diwen ser marmij lingir, ko kamkerkeris re kamloli nawon verusen nga marpepriv. Suri nanu ngok, puloli Atua putor vitrangi kami pilep.]^H

¹⁵ “Wi, kami jinibb nevisvisenien ne nale nesereien, ko kami Parasi, kami nga kami re sel eru! Kam̄pelak kamwolu otvi dis ko kami suri vanu nga kaplai jinibb p̄isansan pivini piptevi kami. Ko daron nga miptevi kami mirpok, kamloli ni evi pa jinibb nga pian re lat ne norongen nga m̄isij, evi jinibb nga m̄isij varu re kami.

¹⁶ “Wi, kami metrorr nga kamok-wowomue jinibb re sel. Kamok-wera ‘Isi nga p̄irijrij rege Naim On, ololi nanu nawon. Ko isi nga p̄irijrij rege gol ne Naim On, ngok ni puloli nanu nen ko wor.’

¹⁷ Kamlenglang, kamivi metrorr. Ngabes nen evi nanu nga milep nen, gol nen, rreknga Naim On? Suri Naim On kobbong ololi gol nga muto ren on.

¹⁸ Ko kamok-wera kele, ‘Isi nga p̄irijrij rege nawot nga marok-sulsul ren re Naim On, ololi nanu nawon. Ko isi nga p̄irijrij rege merrenien nga muto ren, ngok ni puloli nanu nen ko wor.’

¹⁹ Kamivi metrorr! Ngabes nen evi nanu nga milep nen, merrenien nen, rreknga nawot? Suri nawot kobbong ololi merrenien on.

²⁰ Suri isi nga p̄irijrij re nawot, erpe erijrij ren ko nanu jijle nga pa marto ko ren kele.

²¹ Ko isi nga p̄irijrij re Naim On, erpe erijrij ren, ko erijrij kele rege Atua nga pa m̄ilik ko ren kele.

²² Ko isi nga p̄irijrij re melrin, erpe erijrij rege nai seksakel se Atua, ko erijrij kele rege Atua nga m̄isakel ren kele.

²³ “Wi, kami jinibb nevisvisenien ne nale nesereien ko kami Parasi, kami nga kami re sel eru! Ko kamok-eveve roi wowarrenc nir nga marok-lingi re nana, min ko til ko kamin, nga kaploli pusorsan p̄et̄p̄eti tevi nale nesereien se

^H 23:14 Nale nga muto re nolo [], rrek sete Matiu oli, ko jinibb san ea-uli virtue daron nga muli tweni kopi san ne naul ngel.

Atua, ko kaplai songovlön pian ji Atua. Ko kamlinglingi nanu nga marlelep re nale neseseieren, erpe neseseieren mawos, murrun nga marrormi jinibb, ko murrun nga marosuri weretunene. Ngok, nanu nga marlelep e nir, kaplolir ko wor, ko sete kaplinglingi nanu nga wowarreng, pirpe murrun nga parlai songovlön pian ji Atua, parjipon.

²⁴ Kamivi metrorr nga kamok-wowomue jinibb re sel. Daron nga kamwera kapmini nuwi, ko kamlesi nunu n̄isal ren, ko kamjuljule tweni, musuw ko kammini nuwi nen vajin. Ko poro kaplesi buluk san^I n̄isal re nuwi se kami, ko sete kamjule tweni, kammini kobbong, ko kamrolmi nuwi tevi buluk nen!

²⁵ “Wi, kami jinibb nevisvisenien ne nale neseseieren, ko kami Parasi, kami nga kamiel re sel eru! Kamok-rrawe vare ne biles nir ko plet nir arwokwok, ko renge nolor arrokkitkit temijpal. Erpe kami, nolo kami arwun saute venao. Ko kamwera malum kapevna, nolo kami sete orongwos pusuw ren.

²⁶ Kami Parasi, kamivi metrorr! Womuj nen, kaprrawe vaseni nolo biles ko plet puwomu, ko vare nen keke puwokwok p̄irres vajin.

²⁷ “Wi, kami jinibb nevisvisenien ne nale neseseieren ko kami Parasi, kami nga kamiel re sel eru! Kamirpe dubb nga marbbölji laen er, vare ner marow n̄irres, ko lolor marwun saute ji jinibb nga marmij nir, ko nanu jille nga marrokkitkit nir.

²⁸ Erpok keke re kami, jinibb arlesi re vare ne nibe kami armomsawos erres; ko renge nolo kami arwun saute gerisen nir ko nololien nga marsij nir.

²⁹ “Wi, kami jinibb nevisvisenien ne nale neseseieren ko kami Parasi, kami nga kamiel re sel eru! Kamok-tuwe nevöt re dubb se propet nir ne tuwi pa ko kamok-juroi dubb se jinibb nga marres nir ne tuwi

³⁰ ko kamok-wera ‘Poro nga nablik re nabong nga tuwi nir se b̄irterawarreng se kem nir, sete nama-pitevi nir nga marevji propet nir drra mibböljir.’

³¹ Ko ngok, kamwer lokloksi kami lweni kobbong, suri kamwera kamivi metka mawos se nir nga marevji propet nir.

³² Iow, erres kobbong, majingen nga marsij se b̄irterwarreng se kami nga marmajing linglingir, kami vajin kapmajing jijler.

³³ O, kamivi num̄et! Kamivi metka se num̄et nir nga marsij ko marok-wolu. Kapwolu asi re lat ne norongen nga n̄isij p̄irpese?

^I 23:24 Erpe iel, Matiu os̄pe kamel, ko suri kamel ejki iel, namsūpe buluk ela wani, nga puloli mining ne nale se Matiu piplari pin̄erer.

³⁴ Erpok ko, kaplesi, bokoni propet sopor ko jinibb sopor nga norongwosien ser mutoe, ko jinibb nevisvisenien ne nale neseseieren sopor vinuk ji kami. Ko nir sopor kapa-revji pinir, ko nir sopor kaparrulonir kapa-wuse maur nir re nai pelaot, para-rrul pijpari para-mij. Ko nir sopor kapa-telmajir re naim gortien se kami, ko kapa-ojir re ngaim ko ngaim.

³⁵ Ngok puloli drra jinibb jille nga marres nga marevji iel ngatan parbbölji kami, etipatun re drra jinibb nga n̄irres nen Epel, ejpari drra Sekaria natu Barakaea nga b̄irterawarreng se kami marevji pinir re Naim On mawos, liven ne lat nga muon ko nawot.

³⁶ Nuwretun nuwrai tevi kami, drra jille ngel nir para-bbölji kami nga lelingen ngel nir.

Iesu orrorrmi elep suri n̄eri Jerusalem nir

³⁷ “O Jerusalem, Jerusalem, nik nga komok-revji pini propet nir, ko komok-tuwe pini jinibb nir nga Atua mukonir vini jim. Vavis nga mowra b̄eser kortoni natun nir parkorti pirpe nato dosevin nga n̄isrew ore natun nir; ko ejki, kammusus.

³⁸ Kaplesi, Atua evel lingi pa kami ko Naim On se kami.

³⁹ Ko nuwrai tevi kami, setete kamalesik keke sopen pijpari nga kapa-wera: ‘Atua erij pa erres suri ni nga mivini re ni nisen.’”

24

Iesu owra tweni nga partingtinge Naim On

¹ Ko Iesu eivare, owra pivel lingi Naim On. Ko jinibb sen nir arini jin, arwera parviseni tevi ni majingen nga marres milep ne Naim On.

² Ko Iesu erij welir, owra “Kamlesi nanu ngok nir? Nuwretun nuwrai tevi kami, pian ko sete nevöt ngok nir san pia-jek jer re p̄isan, para-wirr sisamis p̄etp̄eti.”

Norongen nga n̄isij nga pia-vini

³ Mian ko vitunen vajin, Iesu ok-lik ngatan re Botwen ne lolnai ne olip, ko jinibb sen nir arini malum bbong jin, ko arsusi tevi: “Kupwerai ta tevi kem, nanu ngok nir para-rremali seveling? Ko sev piviseni daron nga kupa-luwi e vini ko ngatan ngel bongsin nga pia-suwsuw e?”

⁴ Ko Iesu owra lweni tevir, “Kapmetmete jinibb san tia-kerkerasi kami.

⁵ Suri nir pilep ko para-vini renge inu nisek, ko para-wera ‘Inu le Mesaesa,’ ko para-kerkerasi jinibb pilep para-vijurir.

⁶ Ko kapa-runge naror ne nuval nir ko nospen ne nuval nir. Kapmetmet, takmetutue. Nanu ngok jile nir para-pelari ko wor, ko ngatan ngel bongsin ejki wor.

⁷ Ko jinibb nir para-tur imare para-val tevi jinibb nir, ko batun vanu nir para-tur imare para-val tevi batun vanu nir, ko numer pia-to, ko namŋi pia-nŋi re lat lele.

⁸ Nanu ngel nir arivi nanu womunen re martipatun, erpe nesevin san nga murnge rrongvi depain.

⁹ “Renge daron nen, ko para-te kai kami van ji jinibb nga para-loli pŋisij tevi kami, ko para-revji pini kami. Ko jinibb jŋile para-ungasi kami suri kamivo jinibb suk.

¹⁰ Ko renge daron nen nir pilep nolur pia-vitan, ko para-tektekai kerasi lululwenir, ko para-ungungasi lululwenir.

¹¹ Ko propet ne gerisen nir pia-lep para-tur imare ko para-kerkerasi jinibb pilep, para-vijurir.

¹² Ko suri nololien se jinibb nir pia-wun saut, pia-loli merrenien se kalesia nir pilep pia-melmelas.

¹³ Ko si nga pia-tur pŋiterter pijpari bongsin, mŋernen pia-la mauren nga mŋirres.

¹⁴ Ko nospen nga mŋirres suri batun vanu ne melrin para-supe tevi jinibb jŋile nir puwomu renge iel ngatan, nga jinibb ne vare nir para-runge; pia-suw vajin, ko bongsin pia-vini ko vajin.

Nanu nga milep nga pia-pelari Jerusalem

¹⁵ “Ko nabong san kapa-lesi atua se jinibb ne vare nir nga mŋisij nga mŋisij, nga propet Daniel muspe tuwi pa, para-sireni putur renge lat nga muon, ko pia-loli nir para-wolu lingi lat on nen.” (Si nga mok-eve purongwose.)

¹⁶ “Korenge daron nen, kami nga kamlik Jutia kapwolu van re botwen e nir.

¹⁷ Ko kami nga kamlik vare renge naim se kami, sete kapluwi kele van loloim se kami kapla joro kami pŋisan, ejki, kapawolu lingir pingavil.

¹⁸ Ko kami nga kammajing re orsel se kami, sete kapa-luwi kele van re ngaim se kami kapa-la sunsun se kami, ejki.

¹⁹ Wi renge nesevin nir nga marsolo malum bipi, ko renge nesevin nir nga marloli bipi ser marsus renge nabong nga marsij nen nir.

²⁰ Kapungoni ko wor tevi Atua nga woluen se kami sete pia-vini re daron ne naus, rreknaga re nabong ne Sapat.

²¹ Suri daron nen pia-ivi daron nga mŋiterter mŋisij temijpal san. Mitipatun re daron nga Atua muloli iel ngatan e, mivini mijpari lelingen ngel, nanu san setewor

eplari erpok, ejki wor; ko vitunen, sete pia-irpok kele pia-vesan.

²² Numal Atua orrorrmi pa nga pia-ta tweni nabong nga marsij ngel nir; poro pijki, ko sete jinibb san mia-maur. Ko suri orrorrmi nir nga ni mutobbobbu pae nir, ko niko muloli nabong nen nir sete pilep pŋelak.

²³ “Ko renge daron nen, poro jinibb san pia-werai tevi kami, ‘Kaplesi, Mesaea ngokwan,’ rreknaga ‘Ngelan,’ sete kapa-osuri.

²⁴ Pian, ko pia-irpok ko wor renge iel ngatan; mesaea ne gerisen nir pilep para-tur imare, ko propet ne gerisen nir pilep para-tur imare, ko para-viseni nevisenien ko nelesien nga marlelep nir, nga para-kerkerasi jinibb nir, ko jinibb se Atua kele nir. Ko sete arvitere para-kerkerasi jinibb se Atua nga mutobbobbu nir.

²⁵ Kaplesi, nuwrai wowomu pae kami le ngel.

²⁶ Erpok, poro para-werai tevi kami, ‘Kaplesi, Mesaea nika lolo merwer!’ kami sete kapan. Ko poro para-werai tevi kami, ‘Kaplesi nika, elik teptepi loloim sopen re naim ngok san,’ ko sete kapa-osuri.

²⁷ Erpe navil nga mivil, daron nga mivil renge devje melrin ko mimor vaseni melrin pŋetpeti mivesane mijpari devjen, nga jinibb jŋile nir marlesi, ko ngok pia-irpok renge inu jinibb Mawos renge daron nga bea-luwi vini.

²⁸ Pirpe daron nga nanu san emij, ko numon nir nga marok-tasi parmot rrare; orongwos kaplesi wose kobbong ngasu.

Jinibb Mawos pia-pelari re melrin

²⁹ “Ko vitunen vajin re daron nga mŋisij nen, ngavilvil nial pia-mot, ko navol sete mia-ser, ko moju ne melrin nir para-vitvitan, ko nanu nga marterter ne melrin nir para-terrterring.

³⁰ Mian ko vitunen nelesien se inu Jinibb Mawos pia-pelari re melrin. Ngok pia-loli metka se jinibb ne iel ngatan nir para-ting nga para-lesi inu Jinibb Mawos bea-vini re nabor ne melrin nir tevi derteren ko nosrovien nga milep.

³¹ Ko vitunen, daron nga para-uwi davö nga milep san, ko inu bea-koni anglo suk nir para-van re iel ngatan bongsin ivij jŋile, tevi lat pŋetpeti nir nga melrin mŋisalsal orer, ko para-ser kortoni jinibb suk nir nga motobbobbu.

Sete jinibb san rragrag orongwose nabong nen

³² “Kaprorrmi renge nale rrongrongvi ne nai pik, ngel: Daron nga rengsin mimalum vajin, ko etengriv luwi kele nga puloli raon nir parpelari. Ngok, kamrongwos pae daron ne dorvusavus oruj mori.

³³ Kami pīrpok ko, daron nga kapa-lesi nanu ngok nīr, kapa-rongwose nga inu nuruj mori pēlak, erpe nutur ko vajin roro metali.

³⁴ Nuwretun nuwrai tevi kami, dul nga lelingen ngel sete pia-asi wor pijpari nga nanu ngel nīr para-pelari.

³⁵ Melrin ko ngatan, mian ko pora-asi; ko nale suk nīr setete mara-asi, ejki, para-pelari ko wor.

³⁶ “Ko nabong nen, ko mete nial nen, sete jinibb san rragrag orongwose, ejki; sete anglo ne melrin san kele orongwose, ejki; ko inu kele Atua Natun, inu sete nurongwose; ko Tata suk kobbong, ni esan orongwose.

³⁷ Inu Jinibb Mawos bea-vini pia-sorsan pia-irpe Noa nabong sen tuwi nga naus nga milep mus ko iel ngatan murrōn ko nanu jille nīr marmij. Suri re daron nen, jinibb nīr arlelea nawon. Pia-sorsan kele ko pia-irpok tevi inu daron suk nga bea-luwi e.

³⁸ Suri nabong nga wowomu nen nīr, mian ko vitunen naus pia-us, jinibb nīr aran ko arminmin ko arloli totkoiennīr, ejpari nabong nga Noa mian re lolo drav nga milep e.

³⁹ Ko sete arongwose naus nga pilep nga pivini, ejpari nga mian ko mivini misale twenir. Pia-sorsan kele ko pia-irpok tevi inu daron suk nga bea-luwi e.

⁴⁰ Renge daron nen, jinibb pīeru portur re orsel; ko parla luwe nuru tuwen, ko tuwen putur jer.

⁴¹ Ko nesevin pīeru porlik korti portabbu nurrer; ko parla luwe nuru tuwen, ko tuwen pīilik jer.

⁴² Erpok ko, kapkulkulu. Suri kami sete kamrongwose nabong sev nga inu Numal se kami bea-luwi ren.

⁴³ Kaprongwose nanu ngel: Poro jinibb san purongwose daron sev re nutpong nga jinibb venao pivini pīrarrre naim sen, ko ni puklu pimemet ko putur ore nga jinibb nen sete pīrarrre naim sen.

⁴⁴ Pīrpok ko kami kele kapmetmet nga kaptiriv ko wor; suri inu Jinibb Mawos dea-pelari re mete nial nga sete takarongwose.

Nale rrongrrongvi tweni jinibb ne majingen eru

⁴⁵ “Jinibb si nga erpe jinibb ne majingen nga muosuri mīrres, ko batun otoa? Numal sen ololi ni emetmete jinibb ne majingen sen nīr, ko puwngani nīr rege daron momsawos.

⁴⁶ Jinibb ne majingen nga mīrres nen pia-runge pīrres daron nga numal sen pivini ko pia-lesi ni nīmajing mīrres mīrpok.

⁴⁷ Nuwretun nuwrai tevi kami, numal nen pia-loli mīnren pia-metmete joron totoklai nīr.

⁴⁸ Ko poro nga mīnren pivi jinibb nga mīsij, ko puwrai re nolon, ‘O, numal suk ololola nga pulwi vini. Poro nga bololi nanu san, ni sete orongwose purongwose,’

⁴⁹ ko etipatun vajin pivrrali selen nīr nga marmajing tevi nga numal sen mīlengi ni mivi jinibb nga milep rer, ko ean ko eminmin tevi jinibb nga marok-minmin nīr.

⁵⁰ Ko numal se mīnren pia-luwi vini re nabong nga mīnren sete murrōrmi, ko rege mete nial san nga sete murongwose.

⁵¹ Ko numal nen pia-oji tweni mīnren pia-suw, ko pia-tor vitrangī ni pusorsan tevi lartul nga marivel re sel eru, re lat nga jinibb para-ting ko para-runge pīsij pilep.”

25

Nale rrongrrongvi ne nesenwarreng mēlakel esngavōl

¹ Ko Iesu ela nale rrongrrongvi mīnīj kele, owra “Re daron nen, batun vanu ne melrin pia-pelari pusorsan tevi nanu ngel nga miplari ji nesenwarreng mēlakel esngavōl ngel: Nesevin mēlakel esngavōl arsa laet ser, ko aran arwera parivel ore jinibb san nga muwra putotko re nabong nen.

² Nir elim norrōrmien ser ejkie, ko nir elim norrōrmien ser otoa.

³ Suri nīr nga norrōrmien ser mijkie arsa laet ser, ko sete artori karsin;

⁴ ko nir nga norrōrmien ser mutoe, artori botel karsin ser oto tevi laet ser.

⁵ Ko jinibb nen nga muwra putotko nen ololola malum. Mian, ko nesenwarreng nen nīr meter arrurruwel, ko armatur.

⁶ “Ko muruj mori nat nga mīrrang sopen, ko san ekail owra ‘Kaplesi, jinibb nga putotko evini. Kapiel ore!’

⁷ Ko nesenwarreng nen nīr armera, ko arrowrowe laet ser.

⁸ Ko nīr nga norrōrmien ser mijkie arwera tevi nīr nga norrōrmien ser mutoe, ‘E, kapla karsin se kami sopen tevi kem, suri laet se kem artep.’

⁹ Ko nīr nga norrōrmien ser mutoe arwera lweni tevir, ‘O, ejki rres, sete tivtere kem ko kami. Erres pēlak kapluwi van re sto ko kapwuli wor nga pivi se kami.’

¹⁰ Ko daron nga marluwi van parwuli e, ko jinibb nga putotko evini. Ko nīr nga martirive aran arptevi ni aran re totkoiēn, ko mian ko arkikiore metali nen.

¹¹ “Mian ko vitunen vajin, nīr nga norrōrmien ser mijkie nen arini arwera ‘Numal, numal, kuptasi metali tevi kemi!’

¹² Ko ni owra lweni tevir, 'Nuwretun nuwrai tevi kami, Sete nurongwose kami.' "

¹³ Ko Iesu owra kele: "Erpok, kapkulkulu, suri sete kamrongwose nabong nen rreknga mete nial nen nga inu bealuwi vini ren.

Nale rrongrrongvi ne jinibb itul nga martori nevõt se numal

¹⁴ "Suri renge batun vanu ne melrin, Atua pia-loli pusorsan tevi numal ngelle: Jinibb san owra pivel van re vanu nga ngasu san. Ko everus jinibb ne majingen sen nir, ko elngir parmetmete joron nir.

¹⁵ Ko ela tevi nir san bebje silva nevõt nuvasngavöl valim (5000), ko tevi nir san kele ela nuvasngavöl varu (2000), ko tevi nir san kele, nuvasngavöl vesan (1000). Ngok, elai tevir osorsan tevi norongwosien ser sisamis. Elai jile tevir, ko evel.

¹⁶ Ko ni nga mïla nuvasngavöl valim nen esaro van ngavilvil ko emajing ren, ko ololi kele epari nuvasngavöl valim kele.

¹⁷ Ko ni nga mïla nuvasngavöl varu nen ololi osorsan erpok kele, ko ni ololi kele epari nuvasngavöl varu kele.

¹⁸ Ko ni nga mïla nuvasngavöl vesan evan ko eli dan ko etevni silveni ren nevõt se numal sen nen.

¹⁹ "Mian ko vitu jer nen vajin, numal se jinibb ne majingen nen nir olwi vini, owra pïlesi suri ta nevõt sen nen ji nir, ko everuse nir.

²⁰ Ko ni nga mïla nuvasngavöl valim evini; ko otori nuvasngavöl valim kele oto tevi, ko owrai tevi numal sen owra 'Numal, nik kula nuvasngavöl valim ko tevik; ko kuplesi, nuloli kele nuvasngavöl valim kele ngel oto tevi.'

²¹ Ko numal sen owra tevi ni, 'Erres pïlak! Nik kuvi jinibb ne majingen nga mïrres, ko komok-osuri erres. Suri kuosuri erres re nanu nga welili ngel, ko inu bealoli nik kupa-metmete nanu pilep kele wor. Kupini re neiren se inu numal som.'

²² Ko ni nga mïla nuvasngavöl varu evini, ko owra 'Numal, nik kula nuvasngavöl varu ko tevik; ko kuplesi, nuloli kele nuvasngavöl varu kele ngel oto tevi.'

²³ Ko numal sen owra tevi ni, 'Erres pïlak! Nik kuvi jinibb ne majingen nga mïrres, ko komok-osuri erres. Suri kuosuri erres re nanu nga welili ngel, ko inu bealoli nik kupa-metmete nanu pilep kele wor. Kupini re neiren se inu numal som.'

²⁴ Ko ni nga mïla nuvasngavöl vesan evini, ko owrai tevi: 'Numal, nurongwose, nik kuvi jinibb nga mïterter. Komok-tawe wenen nga nik sete kumruwi, ko komok-ser kortoni wenen nga nik sete komok-juljule tweni dokolvin ren, arivi som.

²⁵ Ko inu numtutu, ko nuan nusilveni nevõt som lolo dan. Kuplesi ngel, nanu nga mivi som.'

²⁶ Ko numal sen owra lweni tevi: 'Nik kuvi jinibb ne majingen nga mïsi! Nibem emijmij temijjal. Kurongwose pae nga inu nomok-tawe wenen nga inu sete nurwi, ko nomok-ser kortoni wenen nga inu sete nomok-juljule tweni dokolvin ren, arivi suk.

²⁷ Ko erpese sete kulngi nevõt suk re bang, ko re daron nga bea-luwi vini, ko bea-lai nevõt suk tevi majböl nen nga bang mok-wuli lwenie?'

²⁸ Ko owra tevi jinibb sen sopor, 'Kapla tweni nevõt suk jin, kaplai tevi ni nga mutori nuvasngavöl valim ngok.

²⁹ Suri nir jikle nga martori pa, para-lai pilep kele ko wor tevir. Ko ni nga sete mutori milep para-la luwe ko wor jin.

³⁰ Ko kapwirre jinibb ne majingen ngoknga sete muloli nanu san mïrres van re lat nga mimalik jerjer. Iok ngok jinibb para-ting ko para-runge pïsi pilep.'

Daron nga Jinibb Mawos pia-wera suri lat nga puto suri re jinibb jikle nir

³¹ "Re daron nga inu Jinibb Mawos bealuwi vini tevi nosrövien suk, ko anglo nir para-pitevik. Ko bea-sakel re nai seksakel ne nosrövien suk.

³² Ko anglo nir para-ser kortoni jinibb nir ne vanu jikle renge nok. Ko inu bea-tututweni nir sisamis rer, bea-loli pivi meling pïeru e, pirpe jinibb nga mok-metmete sipsip mok-tututweni tweni sipsip sen nir rengen nanikot nir.

³³ Ko bea-lingi nir nga marirpe sipsip nir re nevrek rres, ko nir nga marirpe nanikot nir re nevrek mair.

³⁴ Ko bea-ivi numal, ko bea-werai tevi nir nga re nevrek rres, 'Kapini, kami nga Tata suk mïrij mïrres suri kami, kapla vajin batun vanu nga Tata suk muloli terai kami re daron nga womu jer nen nga iel ngatan mïtipatun.

³⁵ Suri inu numer ajik, ko kamla nanen tevik. Nolok emesmes, ko kamloli numinmin. Nuturvitan, ko kamtekai inu van loloim e.

³⁶ Numalmaal, ko kami kamlai sunsun nuri. Numsi, ko kami kamini kamkulkule inu. Nulik re naim ne nekaien, ko kami kamini jik.'

³⁷ Ko nir nga marres nen para-taole, para-werai tevi inu, 'E,

numal, seveling namlesi nik, numer ajim, ko namwunganim, rreknga nolom emesmes, ko namloli kuminmin?

³⁸ Rreknga seveling namlesi nik kuturvit-tan, ko namtekai nik van loloim se kem,

rreknga kumalmaal ko namloli kuri sunsun?

³⁹ Rreknga seveling namlesi nik kumsi, rreknga kulik re naim ne nekaijen, ko naminuk jim?’

⁴⁰ Ko inu numal bea-werai lweni tevi nir, ‘Nuwretun nuwrai tevi kami, Erpe nga kamloli erres tevi tasik nga welili jer ngel san, ko erpe kele kamloli ko tevi inu.’

⁴¹ “Ko mian ko bea-werai kele tevi nir nga renge nevrek mair vajin, ‘Kapruj ngasu inu, kami nga Atua mirij pa misij suri kami, ko kapan re nabb nga min tuwi ngok vini, nga Atua muloli terai Demij ko anglo sen nir.

⁴² Suri numer ajik, ko sete kamla nanen tevik. Nolok emesmes, ko sete kamloli numinmin.

⁴³ Nuturvitan, ko sete kamtekai inu van loloim e. Numalmaal, ko sete kamloli nuri sunsun; numsi, ko nulik re naim ne nekaijen, ko sete kami kamkulkule inu.’

⁴⁴ Ko nir para-taole ko para-werai lweni tevi inu, ‘E, numal, seveling namlesi nik, numer ajim rreknga nolom emesmes rreknga kuturvitan rreknga kumalmaal rreknga kumsi, rreknga kulik re naim ne nekaijen, ko sete namloli nanu san tevi nik?’

⁴⁵ Ko inu bea-wera lweni tevir, ‘Nuwretun, nuwrai tevi kami, Erpe nga kami sete kamloli tevi san nga welili jer ngel, erpe sete kamloli ko tevi inu.’

⁴⁶ Ko nir paran re lat ne norongen nga misij ne tuwi ngok vini. Ko nir nga marres nen paran re mauren ne tuwi ngok vini.”

26

Numal nir se meri Isrel armurri suri sel nga parevji pini Iesu

¹ Ko daron nga Iesu mivinivini ore rijen sen ngok vajin, ko owrai tevi jinibb sen nir,

² “Kamrongwose, teru le pa evi nabong ne nanen ne Asien se meri Isrel nir, daron nga marrormi lweni nga marivel lingi Ijip tuwi. Ko inu Jinibb Mawos para-tekai kerasik nga para-ruloni inu para-wuse maure inu re nai pelaot, pijpari nga bemij pin.”

³ Re wosenen mawos bbong ko jinibb nir nga marlelep re sulsulen ko birtera nir nga marivi pa jinibb nga marlelep nir re meri Isrel nir, arini arlik korti re batu jinibb ne sulsulen nir naim sen. Ko batu jinibb ne sulsulen nir nisen ko Kaeapas.

⁴ Ko armurri suri nga pipese parrul re venae Iesu nga parevji pini.

⁵ Ko nir arwerwerai lweni tevir, “Re nabong ne nanen pijki, jinibb nir tara-revji kerr.”

Nesevin san ejvi nanu nga mapun mirres pelak re batu Iesu

⁶ Ko vitunen vajin, Iesu evan Betani re naim se jinibb san nisen Saemon nga tuwi mimsi e mesien nga niber mimemaual.

⁷ Re lat nen, nesevin san evini jin, otori botel san nga marmajing e nevöt nga mirres san, nisen alapasta. Ko renge botel nen, nuwi nga muto ren, mapun erres elep, ko nowlin ean mare jer. Ko ejvi re batu Iesu daron nga misakel pia-aan e.

⁸ Ko daron nga jinibb sen nir marlesi, nolor esij e ko arlolar e, ko arwerwera lweni tevir, “Erpese vinel mulokloksi nanu ngok mirpok?”

⁹ Suri poro parwulwule nuwi ngok, nowlin pilep temijpal, ko parlai tevi beres nir.”

¹⁰ Ko Iesu orongwose norrorrmien ser, ko owrai tevir, “Erpese kamlokloksi vinel? Suri ololi majingen nga mirres san tevik.

¹¹ Beres ngok nir arlik tetajer ko pa tevi kami, ko inu sete inu mea-lik tetajer tevi kami.

¹² Renge nga nesevin ngel mijvi nuwi ngel re inu nibek, ololi lilane nga pa partevni inu.

¹³ Nuwretun nuwrai tevi kami, re iel ngatan totoklai ngabe nga parwerwere nospen nga mirres ngel ren, ko parsupei kele nanu nga nesevin ngel muloli kele pivu now se ni.”

Jutas emarong nga pitkai kerasi Iesu

¹⁴ Mian ko san re nir esngavöl drromon eru, nga marveruse Jutas Iskariot, evan ji nir nga marlelep re sulsulen nir

¹⁵ ko owrai tevir: “Kapa-la sev tevik poro nga inu bea-teka kerasi Iesu tevi kami?” Ko arla bebje nevöt silva evi ngavöl itul (30) tevi ni.

¹⁶ Ko etipatun re daron nen, epejpej nabong san nga mirres nga pitka kerasi Iesu ren.

Jinibb se Iesu nir arloli lilane nanen ne Asien oto metmet

¹⁷ Mian ejpari nabong womunen ne nanen ne niv nga is mijki ren. Ko Iesu jinibb sen nir arini jin, arwerai tevi: “Kumarong kem nabloli lilane ngabe nga nik kupaani nanen ne Asien ren?”

¹⁸ Ko ni owra “Kapan re ngaim ne Jerusalem ji jinibb san ngok, ko kapwerai tevi ni, ‘Jinibb nevisvisenien owra “Daron suk oto mori pa. Bea-tori nanen ne Asien tevi jinibb suk nir re naim som.” ’

¹⁹ Ko nir arloli erpe nga Iesu muwrai tevir, ko arloli lilane nanen ne Asien etriv.

Iesu owra tweni nga Jutas pitkai kerasi ni

²⁰ Mian ko rivriv jer ko vajin, nial muwaj pini, ko Iesu esakel tevi jinibb sen nir esngavöl drromon eru, para-aan.

²¹ Ko daron nga maraan e, ko owrai tevi nir: "Nuwretun nuwrai tevi kami nga san re kami pia-teka kerasi inu."

²² Ko nolor arrum elep, ko artipatun arwerwerai tevi ni, "Numal, evi inu?"

²³ Ko ni owra lweni tevir, "San re kami nga rramok-saro rramok-la nanen re plet ngel, pia-teka kerasi inu."

²⁴ Inu Jinibb Mawos bea-van pirpe nga maruli suri inu renge Naul On pa. Ko wi, isi ko pia-ivi mïernen nga pia-teka kerasi inu Jinibb Mawos. Erres p̄elak bbong re mïernen poro sete piak."

²⁵ Ko Jutas nga p̄itka kerasi ni owrai tevi ni, "Jinibb nevisvisenien, evi inu?" Ko Iesu owrai tevi, "Erpe nik kumwerai."

Iesu orro tuloni nanen ne Asien tevi nir

²⁶ Ko re daron nga marok-aan malum e, Iesu ela niv ko owra erres tevi Atua suri, ko otpoi ko owngani tevi jinibb sen nir ko owra "Kaplai kapurroi, ngel evi nibek."

²⁷ Ko elai kele biles ko owra erres tevi Atua suri, ko elai tevir, ko owra "Kami jijle kapmini."

²⁸ Ngel evi drrak nga puloli marongen se Atua putur imare. Inu mejvi ngel suri netlasan ne nololien se delung nir.

²⁹ Nuwrai tevi kami, Sete nurongwose bemni kele norro ngel pijpari nabong nga bea-mini nga mimerr tevi kami renge batun vanu se Tata suk."

³⁰ Mian ko arla nubo nga marok-lai daron nga maraan jile re nanen ne Asien osuw, ko arivel vajin van re Botwen ne lolnai ne olip.

Iesu owra tweni nga Pita pia-vilvil ore ni

³¹ Ko Iesu owrai tevir, "Kami jijle nolo kami pia-vitan suri inu renge natmupong ngel, suri aruli re Naul On, 'Bea-revji jinibb nga mok-metmete sipsip, ko sipsip para-wolu sarrsarr."

³² Ko bea-tur imare kele, ko vitunen vajin ko bea-womu bea-ivel ore womu kami re Galili."

³³ Ko Pita owra lweni tevi: "Poro nolo jinibb ngel jijle nir pia-vitan suri nik, ko inu ma nolok setete mia-vitan."

³⁴ Ko Iesu owrai tevi, "Nuwretun nuwrai tevi nik,

rengel nat nga mupong ngel puwomu, vitunen ko nato pia-kokrou, ko nik kupa-vilvil ore inu pivatul."

³⁵ Ko Pita owra lweni tevi: "Setete bea-vilvil ore nik ko, poro bea-mij wor tevi nik!" Ko jinibb sen jijle nir arwerai kele erpok.

³⁶ Vitunen Iesu eptevi jinibb sen nir aran re lat san nisen Getsemene. Ko owrai tevir, "Kaplik iel, daron nga inu ban beverus sapon iok."

³⁷ Ko etkai Pita ko natu Sepeti nuru, arivel rujruj sapon. Ko ni nolon orrum elep vajin ko ornge esij.

³⁸ Ko owrai tevir, "Inu nolok orrum temijpal, otomori puloli bemij e. Kaplik iel ko kapkulkulu p̄irres tevi inu."

³⁹ Ko ni evel rujruj kele sapon van ngasu ko ejiol non van ngatan ko olot ko owra "Tata suk, poro pivi nanu nga p̄isisarow, kupla tweni biles ne norongen nga m̄isij ngel, inu sete bea-minmin ren. Ko piplari pusorsan tevi nik marongen som, sete inu marongen suk."

⁴⁰ Ko olwi kele vini ji jinibb sen nir nga itul nga ko elesi armaturrwel; ko owra tevi Pita, "Erpese kami sete kamviter kapkulkulu tevi inu mete nial p̄isansan?"

⁴¹ Kapkulkulu p̄irres, ko kapverus nga sete nanu parini parrowrow p̄elake kami. Nem̄i kami emarong lengleng, ko nibe kami emijmij."

⁴² Ko evel lingir kele varwen ko olot kele, owra "Tata suk, poro pivi nanu nga p̄isisarow, kuploli biles ngel pia-asi re inu, nga inu sete beminmin ren. Ko pipok ko wor, piplari ko wor pusorsan tevi marongen som."

⁴³ Ko olwi kele vini; ko elesi armatur kele, suri meter orrwel.

⁴⁴ Ko elinglingir ko evel lingir kele ko olot vatolin, owra kele nale mawos nga muwrair womu.

⁴⁵ Vitunen, olwi kele vini ji jinibb sen nir nga itul nga, ko owrai tevi nir, "Erres, kapmatur vajin, kapmosi p̄irres. Kaplesi. Daron suk evini

nga parteka kerasi inu Jinibb Mawos van re nevre lartul nga marsij nir.

⁴⁶ Kapmera, kerr pivel. Kaplesi m̄er nga p̄itka kerasi inu otomori le pa pivini."

Devje nuval se Iesu arini arrul totkoni ni

⁴⁷ Ko daron nga ni m̄irij malum e, ko Jutas, san re esngavöl drromon eru evini, eptevi delung nga milep san ngamartori nesip ne nuval ser nir ko ßetiluk ser nir. Arivel ji jinibb nga marlelep re sulsulen nir ko ßirtera nir nga marivi pa jinibb nga marlelep re m̄eri Isrel nir vini.

⁴⁸ Ko ni nga p̄itka kerasi ni owrai pa tevir lat nga pia-loli surie, owra "Kaplesi si nga bea-rromji, ni evi ni nen ko. Kapa-rrul ren."

⁴⁹ Marini vajin, ko ngavilvil ni evan ji Iesu ko owra "O, erres, jinibb nevisvisenien." Ko orromji ni.

⁵⁰ Ko Iesu owrai tevi ni, "Selek, kuploli vajin nanu nga kumini suri." Ko nir arini, ko arrul totoni Iesu.

⁵¹ Ko san re nir nga marpitevi Iesu esaro ko ervei tweni nesip ne nuval sen ko eta jinibb san, ko eta tweni boron. Ko mïernen evi jinibb ne majingen se batu jinibb ne sulsulen nir.

⁵² Ko Iesu owrai tevi, "E, kuplingi lweni nesip ne nuval som ngok re milngen. Suri nir jijle nga marla nesip ne nuval, para-mij ko renge nesip ne nuval.

⁵³ Nik kurrormi sete nurongwose beveruse Tata suk, ko ni lelingen wolok pukoni meling nga marlelep ne anglo ne nuval pisngavöl drromon pïeru (12) parpitevi inu?

⁵⁴ Ko poro pipok, ko pipese nga nale se Atua nga maruli rengo Naul On nga pia-pelari ko wor suri inu pia-rremali mawos?"

⁵⁵ Ko re daron mawos nen, Iesu owrai tevi delung nir, "Erpese? Kamloli erpe nuvi jinibb nga mok-revji jinibb san. Kamini tweni kaprrul totkonik, ko kamtori nesip ne nuval nir ko ßetiluk nir. Ko tetajer nomok-lik rengo Naim On, nomok-visviseni, ko sete kamrrul totkonik.

⁵⁶ Ko nanu ngel jijle nir arpelari osorsan tevi nale se Atua nga propet sen nir aruli wowomue tuwi pa." Erij jile erpok, ko jinibb sen nir arivel arwolu lingi.

Iesu otur re no Kaonsel

⁵⁷ Ko delung nga marrul totkoni Iesu arevei tweni van ji Kaeapas, nga mivi batu jinibb ne sulsulen nir, lat nga jinibb nevisvisenien ne nale nesereien nir ko ßirtera nir nga marivi pa jinibb nga marlelep re mïeri Isrel nir markorti pa ren.

⁵⁸ Ko Pita evitue nir vitu jer van re lolo naworr ne naim se batu jinibb ne sulsulen nir nga mutur ren. Ko elik ngatan tevi jinibb nga marok-metmete lat nen, owra pïlesi bongsi nanu nga parloli tevi Iesu.

⁵⁹ Ko jinibb nga marlelep ne sulsulen nir tevi nir jijle nga marok-tori gortien nga milep arpepej nale gerisen san nga pïtre Iesu, puloli parlingi ni re mijen suri.

⁶⁰ Ko sete artor sweri san, ewretun nir elep arini ko arkerkeris bbong. Mian ko vitu jer nen ko vajin, jinibb eru orini

⁶¹ orwera "Merel owra 'Inu nuvter bolokloksi Naim On se Atua ngel, ko nabong pïtul kobbong, bea-ili lweni.' "

⁶² Ko batu jinibb ne sulsulen nir otur imare ko owrai tevi ni: "Sete kupwera nanu san? Erpese re nale se nuru nga morij terem e ngok?"

⁶³ Ko Iesu omurrong. Ko batu jinibb ne sulsulen nir owra kele tevi, "Nungoni nik re nise Atua nga mimaur, kupwera

weretunen tevi kem poro nik kuvi Mesaea Atua natun, rreknga ejki!"

⁶⁴ Ko Iesu owrai, "Erpe nik kumwerai. Ko nanu san kele bowrai tevi kami: Vitunen kapa-lesi inu Jinibb Mawos beasakel rengo Atua nga derteren sen mutoe nevren rres. Ko bea-luwi re nabor ne melrin vini."

⁶⁵ Daron nga batu jinibb ne sulsulen nir murnge nale se Iesu ngok, ko errersi sunsun sen, ko owra "A, ni erij melmelas ko osopsoþe pa Atua! Erpese kerr rrampej malum jinibb kele san nga puwra nale kele sopen? Kaplesi, lelingenok kamrunge ni erij esij.

⁶⁶ Kamrormi erpese?" Ko nir arwera lweni tevi, "O, ni erres re pimij ko wor!"

⁶⁷ Ko arlutövi non ko aruti, ko nir sopen arwuje

⁶⁸ ko artetnije ni, ko arwerai tevi, "Kupwera tevi kem, nik Mesaea, isi ko muwjem ngok?"

Pita evilvil ore nga sete orongwose Iesu

⁶⁹ Ko Pita elik malum vare re naim rengo lolo naworr nen. Ko nesenwarreng ne majingen san evini jini, ko owrai tevi ni: "E, nik kele komok-pitevi Iesu ne Galili."

⁷⁰ Ko ni evilvil ore rengo no delung nir, owra "Sete nurongwose nanu nga kumwerai ngok!"

⁷¹ Ko ni orujruj van morie metali ne naworr nen. Ko nesenwarreng mïnij kele san elesi ni, ko owrai tevi nir nga marlik ie, "Merel okpotevi Iesu ne Nasret."

⁷² Ko ni evilvil ore kele ojuji mare, owra "O ejki, sete nurongwose morok!"

⁷³ Mian ko beblen kele, ko nir nga martur lok arini ji ni ko arwerai tevi Pita, "Ewretun nik kuvi nir san, suri rijen som erpe mïeri Galili nir."

⁷⁴ Ko Pita ololi nale nga mïterter temijpal san, ko ojuji mare ren ko owra "Mowra sete nurongwose morok!" Ko mian ko ngavilvil nato okokrout.

⁷⁵ Ko Pita orrormi vajin nale se Iesu nga muwrai tevi ni, "Puwomu, vitunen ko nato pia-kokrout, ko nik kupa-vilvil ore inu pivatul, nga kupwera sete kurongwose inu." Ko ni eivare ko eting temijpal.

27

Arlingi Iesu van re nevre Paelat

¹ Daron nga rorpong susu mivini e, ko jinibb nga marlelep ne sulsulen nir ko ßirtera nir nga marivi pa jinibb nga marlelep nir artori gortien san, armurri suri parlingi Iesu re mijen.

² Armurri jile osuw, ko arsere nevren ko arpotei tweni ko artekai van ji numal Paelat, nga batu numal se mïeri Rom nir mïlengi ni nga pok-metmete mïeri Isrel nir.

Mijen se Jutas

³ Ko daron nga Jutas, nga mītkka kerasi Iesu, mīlesi nga marwera Iesu pimij, ko norrorrmien sen olwi. Ko ela lweni bebje nevöt silva ngavöl itul nen elai van ji jinibb nga marlelep nir re sulsulen ko bīrtera nir nga marivi pa jinibb nga marlelep nir,

⁴ ko owrai tevir, “O, nuloli nololien re nga mirpel ngel nga mētkka kerasi jinibb nga mīrres pian re mijen!” Ko nir arwera “Ko erpese kumini kumngoni tevi kem? Sete evi nga kem, evi nga nik ko wor. Kuprunge surim tevi!”

⁵ Ko Jutas ewirr tweni nevöt nen van loloim re Naim On, ko evel, ko evan orruloni lweni ni tevi dil, ko emij.

⁶ Ko jinibb nga marlelep re sulsulen nir arla nevöt nen, ko arwera “Sete erres rraplai rraplingi re nevöt ne Naim On bokis nen, suri evi nowli drra ne mijen.”

⁷ Ko armurri suri, mian ko arla nevöt nen, arwuli tweni dan sopen se mēr nga mok-majing sospen dan, ko arloli pivi lat san nga partevni jinibb neturvitan nir ren.

⁸ Ngok dan ngok arveruse “dan ne drra ne mijen” ejpari lelingenok.

⁹ Ko ngok kele eplari erpe nale se Atua nga propet sen Jeremaea muwrai wowomue tuwi pa ngel: “Ko nir arlai bebje silva nevöt ne ngavöl itul, nowli ni nga mēri Isrel sopen arlingi nowlin.

¹⁰ Ko arlair arwuli tweni dan se mēr nga mok-majing sospen dan, erpe nga Numal Atua muwrai tevi inu bololi.”

Iesu otur rengo no Paelet

¹¹ Musuw, ko Iesu vajin otur womu re no numal Paelet. Ko numal Paelet osusi tevi, owra “Nik kuvi numal se mēri Isrel nir?” Ko Iesu owrai tevi, “Erpe nga nik kumwerai.”

¹² Ko daron nga jinibb nga marlelep re sulsulen nir ko bīrtera nir nga marivi pa jinibb nga marlelep nir marwera tweni nale ser nga marij tere Iesu ren, ko ni sete owra lweni nanu san.

¹³ Ko daron nga nir marij jile musuw, ko numal Paelet owrai tevi ni, “Erpese? Sete kurnge nale ser nga muwun saut ngok nga marij terem ngok?”

¹⁴ Ko ni sete owra suri lweni nanu san tevi, ololi numal Paelet etaol lengenge.

Paelet owra tweni nga Iesu pimij ko wor

¹⁵ Ko sia jijle, re daron ne nanen ne Asien mirpok, ko numal Paelet ok-marong pok-la tweni jinibb nga mīlik re naim ne nekaien san nga delung nir poro parwera nisen.

¹⁶ Ko jinibb san elik re naim ne nekaien re daron nen, arveruse nisen Iesu Barapas. Jinibb jijle arok-runge nanu nga marsij nga mok-lolir.

¹⁷ Mian ko delung arkorti vajin, ko numal Paelet osusi lesi owrai tevir, “Kammarong isi bea-la tweni tevi kami, Iesu Barapas, rrekgnga Iesu nga marveruse Mesaea?”

¹⁸ Suri numal Paelet orongwose nolor eval tevi Iesu ko niko martekai vini jin.

¹⁹ Ko daron nga mīsakel ngatan re lat nga mok-sakel ren mok-wera suri lat nga puto suri tevi jinibb nir e, ko nesen sen oli naul ko elai tevi jinibbsan elai van jin, ko owra “Sete kuploli nanu san tevi jinibb nga mīrres ngok, suri numatur lesi bori natmupong suri ni, ko nurnge esij elep e.”

²⁰ Ko jinibb nga marlelep re sulsulen nir ko bīrtera nir nga marivi pa jinibb nga marlelep nir arververus delung nir nga parungoni pīla tweni Barapas ko pīrevji pini Iesu.

²¹ Ko re daron nga numal Paelet mususi kele e tevir, “Kammarong isi ko re nuru nga eru ngel bea-la tweni tevi kami?”, ko nir arwerai lweni, “Barapas!”

²² Ko numal Paelet owra lweni tevir, “Poro pipok, ko bololi sev tevi Iesu nga marveruse Mesaea?” Ko nir jijle arwera lweni tevi, “Pimij re nai pelaot!”

²³ Ko numal Paelet owra “Suri sev? Ololi sev esij?” Ko nir arkail van mare kele, “Pimij re nai pelaot!”

²⁴ Ko numal Paelet elesi vajin sete orongwose puloli mun nanu san, suri delung artoni lweni ni eterter, ko otomori vajin parloli laten nga milep san. Ko elai nuwi sopen ko ejejavöl e rengo no delung nir ko owra “Inu drra jinibb ngel sete pubböljik. Kaprunge suri kami tevi!”

²⁵ Ko nir jijle arwera lweni tevi, “Rrek erres, drran pubbölji kem ko metka se kem nir.”

²⁶ Marwera jile mirpok, ko numal Paelet ela tweni Barapas tevir. Ko etelmaji Iesu ko etkai vini ji jinibb ne nuval sen nir, nga pimij re nai pelaot.

Jinibb nuval nir artetnije Iesu

²⁷ Ko nir vajin artekai Iesu van re naim nga milep se numal Paelet, ko arser kortoni delung ne jinibb nuval nir.

²⁸ Ko nir aruri tweni sunsun sen ko aruri lweni sunsun nga nulsen musongsong van ren; ngok arrongrongvi nulse sunsun se numal ser nir.

²⁹ Ko artali dil moku arrongrongvi erpe nuvan se numal san, ko arlingi re batun ori; ko arla mavir otori orrongrongvi nai se numal nga mok-tori. Musuw ko arjipa vajin baur ngatan jin arkerkerasi, arwera “O, erres, numal se mēri Isrel nir!”

³⁰ Ko arlutövi ni, ko arla mavir nen ko arvirrvirrale batun e.

³¹ Ko arkerkerasi ni mirpok jile musuw, ko aruri tweni sunsun ren ko aruri lweni sunsun sen van ren, ko arpotei tweni ni van re lat nga pimij re nai pelaot e.

³² Ko daron nga marivel mirpok vini, ko arlesi jinibb san ne Saerin nga nisen Saemon. Ko aron tertere ni nga puwosi nai pelaot se Iesu.

³³ Ko mian ko arini vajin re lat san nisen Golkota. Nais ngok rengo nale se mēri Isrel nir owra "Lat ne bongur."

³⁴ Ko arla norro, ko arlingi nanu san nga mirpe melu van ren nga puloli poro pimni ko niben puprus e. Ko arlai tevi. Ko ni, daron nga mimni lesi bbong, ko omusus pimni.

³⁵ Ko arruloni arwuse vajin re nai pelaot, musuw ko artutweni sunsun sen, ko artuwe daes arwera parlesi isi nga poro pia-asi, niko sunsun se Iesu pivi sen.

³⁶ Musuw, ko arlik ngatan vajin, ko armetmet suri Iesu ie.

³⁷ Ko aruli tweni nale san ngel suri nga marevji pini ni, "Merel evi Iesu, numal se mēri Isrel nir," ko arwuse mare re batun.

³⁸ Ko arruloni kele jinibb eru nga morok-vevna ko morok-revrevji jinibb tevi Iesu, nuru tuwen arwuse re nai pelaot san re nevren rres ko tuwen re nevren mair.

³⁹ Ko lartul nga marasasi ie arij esij tevi, arwirrwirrleni batur tevi, ko armen keraji.

⁴⁰ Ko arwera tevi, "A, nik nga kumwera kuplokloksi Naim On ko nabong p̄itul ko kup̄ili lweni, kupla lweni nik poro kumivi Atua Natun, ko kuprow jubbul re nai pelaot vitan!"

⁴¹ Erpok kele re jinibb nga marlelep re sulsulen nir, arkerkerasi Iesu tevi jinibb nevisisenien ne nale neseseien nir ko firtera nir nga marivi pa jinibb nga marlelep re mēri Isrel nir, ko arwera

⁴² "Poro weretunen m̄ila se jinibb m̄inij nir, ko erpese ni sete orongwose p̄ila lweni se ni? Evi numal ne Isrel, ko purow jubbul re nai pelaot vitan, ko rrapa-osuri ni vajin!

⁴³ Ni ebibto Atua, Atua p̄itka tweni vajin lelingenok poro pimrreni ni. Suri owrai pa, 'Inu nuvi Atua Natun.' "

⁴⁴ Erpok kele, nuru nga morok-revrevji jinibb nga marruloni nuru tevi Iesu oraji liwe nuru tevi Iesu.

Mijen se Iesu

⁴⁵ Ko mian ko levial ko vajin, nial muwosput, ko nat emalik p̄etpeti re vanu ejpari mete nial itul.

⁴⁶ Ko momsawos mete nial itul sapon, ko Iesu ekail drrelan elep, owra "Eli, Eli, lama saptaktani?" Ngok rengo nale se mēri Isrel nir owra "Atua suk, Atua suk, erpese kumieli lingi inu?"

⁴⁷ Ko nir sopor nga martur ie arunge jabble, ko arwera "Merel everuse Elaeja ko."

⁴⁸ Ko ngavilvil nir san owlu van ko ela nanu san erpe nalum, ko ololi ervei norro nga mimelme van ren, ko elngi re mavir ko esareni tevi Iesu pimni.

⁴⁹ Ko nir m̄inij nen nir arwera "Pirpok pa! Rraplesi ta poro Elaeja pivini pia-la sen."

⁵⁰ Ko Iesu ekail kele drrelan elep ko osrow pini.

⁵¹ Ko kalik nga murrul ore lat nga muon emarrerr devjen eru e, m̄itipatun re bongsin nga mare osuw re bongsin nga ngatan. Ko nar̄i er̄i ko bereng nir armoworwor.

⁵² Ko dubb nir arpefir, ko nibe jinibb on elep nga marmij armera.

⁵³ Ko vitunen daron nga Iesu mimra jile re mijen sen ko nir arivel lingi dobbir, ko aran re Ngaim On Jerusalem; ko arpelari ji jinibb elep arlesir.

⁵⁴ Ko daron nga numal se jinibb nuval nen nir ko jinibb nga marpatevi ni marmetmet suri Iesu marunge nar̄i m̄ir̄i ko nanu jijle nga marpelari ngok, ko armetutu temijpal, arwera "Ewretun, m̄erel evi Atua Natun!"

⁵⁵ Ko nesevin elep nga marok-majing sen ko nga marvijuri re Galili vini, artur ngasu bbong ko armeteni.

⁵⁶ Livō re nir, Merri ne Maktala ko Merri tasu se James ko Josep, ko Sepeti nesen sen.

Josep etevni Iesu

⁵⁷ Mian ko rivriv jer vajin, jinibb ne Aramatia san nga joron milep, nisen Josep, evini. Ni kele evi jinibb se Iesu san.

⁵⁸ Ko evan ji numal Paelet, ongoni nibe Iesu. Ko numal Paelet owra nale san nga parlai.

⁵⁹ Ko Josep ela niben, ko onbe ore kalik nga muwokwok e m̄irres.

⁶⁰ Ko elngi rengo dubb sen nga mimerr nga m̄itai rengo bereng. Ko eitini nevōt bereng nga milep san oto ore metali ne dubb, ko evel lingi.

⁶¹ Merri ne Maktala ko Merri m̄inij nen kele san orlik mori bbong ie, no nuru orlik ormauos e dubb.

Jinibb nuval sopor armetmete dubb se Iesu

⁶² Ngok evi nabong nga parloli lilane nanu parto pumomsawos parteravi nabong ne Sapat. Mevinen jinibb nga marlelep re sulsulen nir ko Parasi nir arini arkorti ji numal Paelet,

⁶³ ko arwera "Numal, namrrommi iok. Jinibb ne gerisen ngok daron nga mimaur malum e, ko owra 'Vitunen, nabong p̄itul, ko bea-maur luwi kele re mijen.'"

⁶⁴ Ngok, kupwerai ta nale san nga parmetmet ore dubb þirres pijpari nabong þitul. Jinibb sen nir tarini ko tarvenae tweni ni ko tarwerai tevi jinibb nir, 'Ni emaur luwi re mijen.' Ngok poro pirpok gerisen nga vitu jer nen tia-sij tia-asie nga womuj nen."

⁶⁵ Ko numal Paelet owrai tevir, "Kamrongwose kapla jinibb nuval sopor. Kapiel vajin kaploli parmetmet ore nanu jijle puto þirres pirpe nga kami kamrongwose."

⁶⁶ Ko arivel aran ko arlingi nanu san rengen nevöt nga muto ore metali nga puloli parongwose poro jinibb san þiasi van loloim. Ko arlingi jile osuw, ko arlingi vajin jinibb ne nuval nen nir parmetmet ore.

28

Iesu emaur luwi keke

¹ Mian ko vitunen ko vajin, nabong ne Sapat osuw ko nial etipatun nga pimraej re nabong womu re wik, ko Merri ne Maktala ko Merri münij nen keke oran orwera porlesi dubb.

² Ko nanü nga milep san emü, suri anglo san se Numal Atua ojubbul re melrin vini; evini eitini tweni nevöt ne metali, ko esakel ren.

³ Non erinrin erpe moro navil ko sunsun sen eraprap temijjal erpe numow.

⁴ Ko nir nga marmetmete dubb armetutue ko aririr lengleng, arirpe jinibb nga marmij nir.

⁵ Ko anglo erij, owrai tevi nesevin nen nuru, "E, sete kopormetutu, suri nurongwose komorpej Iesu nga mimij re nai pelaot.

⁶ Ni ejki iel. Suri emaur luwi keke, erpe nga muwrai wowomue. Koporini ta koporlesi lat nga mimatur ren."

⁷ Nuru orlesi jile osuw, ko anglo owrai keke: "Koporan pingavil, koporwerai tevi jinibb sen nir nga ni emaur luwi keke pa rengen mijen. Ko ni puwowomue kami van re Galili e, ko kapa-lesi ie. Pirpe nga inu mowrai ngel tevi kamru."

⁸ Ko orivel lingi dubb ngavilvil tevi metutuen ko neiren nga milep, ko orwolu van porla nale tevi Iesu jinibb sen nir.

⁹ Ko ortaole orsorrviþ lengleng Iesu miplari ji nuru, ko owra "O, erres." Ko oran orjipa ngatan jin ko orrul totoni þelan, ko orsurövi ni.

¹⁰ Ko Iesu owrai tevi nuru, "Sete kopormetutu. Koporan koporwerai tevi tasik nir nga para-wowomu iak Galili, ko paraselik ie."

Nale se jinibb nuval nir

¹¹ Ko daron nga nuru moran e, ko jinibb sopor nga marmetmet dubb nen arluwi

van Jerusalem e, ko arwerai tevi jinibb nga marlelep re sulsulen nir nanu jijle nga marpelari.

¹² Ko nir arkorti tevi þirtera nga marivi pa jinibb nga marlelep nir ko armurri suri parloli pirpese partawi ore nanu nga miplari. Mian ko vitunen ko vajin arla nevöt elep tevi jinibb nuval nen nir,

¹³ ko arwerai tevi nir, "Kami kapwerai tevi jinibb nir, 'O, jinibb sen nir arini natmupong ko arvenae tweni niben daron nga nammatuur e.'

¹⁴ Ko poro numal Paelet purnge nale ngel, ko kem naba-van naba-löli þirres tevi ni, ko kami sete kapa-la norongen nga müsij ren."

¹⁵ Ko jinibb nuval nen nir arla nevöt nen evi se nir, ko arloli erpe nir marwerai suri tevir. Ko nosþen ne gerisen ngel mēri Isrel nir arsuþe eþari lelingen ngel malum.

Iesu errmali ji jinibb sen nir

¹⁶ Ko Iesu jinibb sen nir esngavöl dr-romon san (11) arivel van re Galili van re botwen nga Iesu muwrai pa tevir.

¹⁷ Ko daron nga marlesi ni, ko arsurövi ni; ko nir sopen sete arosuri erres.

¹⁸ Ko Iesu evini mori jir, ko owrai tevir, "Atua elai pa derteren jile tevi inu re nanu jijle ne melrin ko iel ngatan.

¹⁹ Ngok, kapan re vanu jijle, kapvisviseni jinibb nir, para-ivi jinibb suk. Ko kappap-taes nir re nise Tata suk ko re nise inu Atua Natun, ko re nise Neþin On.

²⁰ Ko kapvisvisenir nga parloli suri nanu jijle nga mowrai tevi kami. Ko kaplesi, inu beþtevi kami tetajer, pian pijpari ngatan ngel bongsin."

**Nospen nga Mirres se
Iesu Kristo nga
MAK
Muli
Batu nale nga mivsviseni
lut nga parmeteni naul
ngel puto suri**

Naul ngel etipatun re nale san nga muwra “Batu nospen nga mirres se Iesu Kristo, Atua Natun.” Mak eviseni nga Iesu evi jinibb ne majingen, ko nale sen derteren nen otoa. Rramrongwose rraplesi derteren sen reнге murrun nga mokvisviseni jinibb e nir, ko nga derteren sen otoa nga puoji tweni demij e nir, ko nga pitlasi tweni nololien se jinibb e nir. Iesu owrai tweni nga ni evi Jinibb Mawos, ko evini nga elai mauren sen nga pitlasi tweni nololien se jinibb nir nga puloli parivel sisarow. Mak ospe suri nanu nga marinijnij nawone nir (merikel) nga Iesu mulolir easi nga muspe nale se Iesu.

Re naul ngel womujnen Mak ospe suri Jon Baptaes ko majingen sen, ko nga Jon mipaptaese Iesu. Ko vitunen ospe kele suri Demij nga murrowrowe Iesu. Ko vitunen beblen, etajer nga muspe suri majingen se Iesu nga muloli jinibb nga marmesi arres luwi kele, ko okvisviseni kele jinibb nir. Ko jinibb sopor arok-tere ni ko tetajer arok-lolarsi, ko lolaren ser ean ma mare elep.

Batun 11 eipari 16 arsupe kis bbong wik nga Iesu pimij ren, mian ko arsupe kele nga mimaaur luwi re mijen.

Jon elik reнге lolo merwer ewerwer

¹ Batu nospen nga mirres se Iesu Kristo Atua Natun. Ko etipatun erpel:

² Erpe Atua owrai reнге naul nga Aesea propet sen muli tuwi pa, owra “Kap-murrong, bokoni jinibb suk san nga puwowomu re Mesaea, ko puloli sel se ni puto metmet.

³ Drrela mernen ekail reнге lolo merwer owra “Kaploli lilane sel se Numal puto metmet terai! Kaploli mesekle sel sen nir parmetet p̄irres.’”

⁴ Erpok ko Jon evini, ko ewerwer owra “Kaprieni lweni nolo kami reнге nololien se kami nir, ko kappaptaes, ko Atua pitlasi tweni nololien se kami.” Ko Jon ok-paptaes reнге lolo merwer.

⁵ Ko reнге ie jinibb jijle ne vanu ne Jutia nir ko nir jijle nga reнге Jerusalem nir arivel tweni. Arwerwera tututweni

nololien ser nir, ko Jon epaptaese nir reнге nuwi seser ne Jortan.

⁶ Jon ori bbong silvi kamel nga marvati mivi sunsun, ko etatuwe nevlul buluk reнге netutwen, erpe Elaeja tuwi. Ko orro bbong nato nga mok-rowrow reнге mösmös ko narllu sukabak nga m̄ierri.^A

⁷ Ko ewerwer owra “San nga pivivitu suri inu vini niko, ni evan wor mare reнге inu. Inu sete nurres rragrag nuvter nga ßejiol vitan nga ßetlasi tweni dil reнге but sen.

⁸ Inu nomok-paptaese kami bbong e nuwi le, ko ni ma pia-paptaese kami e Nem̄in On.”

Jon epaptaese Iesu

⁹ Sete epriv ko Iesu evel lingi sisen Nasret, ngaim nga welili ne Galili san, ko evini ji Jon. Ko Jon epaptaese ni reнге nuwi seser ne Jortan.

¹⁰ Ko daron nga mitawij reнге nuwi imare, ko elesi evesane melrin eteri wukari eru e etp̄ir; ko elesi Nem̄in On erpe wum̄er orow jubbul reнге vini ko esakel reнге ni.

¹¹ Ko drrela Atua evel reнге melrin vini owra “Nik kuvi natuk nga numrrenim elep, nurnge erres surim.”

Demij orrowrowe Iesu

¹² Daron mawos nen ko pa, Nem̄in On owowomue Iesu orujruj kele wor van reнге lolo merwer liven sapon.

¹³ Ko ni elik reнге ie eipari nabong ngavöl ivij (40) nga Demij mok-rrowrowe, ni elik reнге lat nga nanu rrum ne lolo merwer nir marok-tur reнге. Ko anglo arok-kuluklu metmet re ni erres kemkan̄e.

Iesu olwi van Galili e ko etipatun majingen sen

¹⁴ Arlingi womue Jon reнге naim ne nekaien, mian ko vitunen vajin ko Iesu ea-vini reнге Galili, evisviseni nospen nga mirres se Atua.

¹⁵ Ko ni owrai owra “Nabong suk mawos le pa, ko batun vanu se Atua oruj mori pa pivini. Nolo kami pulululwi ko kaposuri nospen nga mirres.”

Iesu everus jinibb ivij nga marok-tutumun

¹⁶ Vitunen vajin ko Iesu evel sere suri jeli nuwito nga milep ne Galili. Ko elesi Saemon nuru tasin wor Antru orok-juröni niva se nuru van reнге nuwi ngatan, suri nuru orivi jinibb nga morok-revrevei nai.

¹⁷ Ko Iesu owrai tevi nuru owra “Laru, koporini koporvitu surik, ko inu bololi kamru

^A 1:6 narllu sukabak nga m̄ierri: eg blong sugabag; honey.

koporivi jinibb nga morok-revrevei jinibb.”

¹⁸ Ko orsaro ngavilvil orlingi kurtweni niva se nuru ojon jer, ko orvijuri suri ni.

¹⁹ Ko daron nga mivel rujruj kele beblen e ko elesi Sepeti natun nuru, Jemes ko tasin wor Jon, orsakel rengo drrav ser orok-llile lweni niva ser lat nga marmarrerr nir.

²⁰ Ko Iesu everus nuru kele, ko nuru orlingling tata se nuru Sepeti rengo drrav ser tevi jinibb ne majingen sen nir, ko orvijuri Iesu.

Iesu oji tweni nemin nga misij rengo jinibb san

²¹ Ko Iesu eptevir aran rengo ngaim ne Kapaneam e. Ko rengo Sapat aran rengo naim ne loten ser, ko Iesu evisviseni jinibb nir.

²² Ko daron nga jinibb nir marmurrar-rong suri ni nevisvisenien sen e ko bbösa elair e. Suri ni nevisvisenien sen orrow erres, sete erpe nevisvisenien se jinibb nevisvisenien ne nale neseseien nir.

²³ Ko re daron nen rengo naim ne loten, jinibb nga nemin nga misij misisilvi san elik rengen, ko ekail van mare, owrai tevi Iesu

²⁴ owra “Sev som oto ni le iel, nik Iesu ne donasret? Kuvini nga kuplokloksi kem? Inu nurongwos nik, isi nik. Nik kuvi jinibb on se Atua.”

²⁵ Ko Iesu ewer ore nemin nga misij ko owrai tevi owra “Sete kuprij, kupivare lingi ni.”

²⁶ Ko nemin nga misij ololi ni elilawij ko eririr lengleng. Ko ekail van mare ko esil ivare, ko owlu lingi.

²⁷ Bbösa nga milep elair e, ko arsur vijvij, arwerwera lululweni tevir, “Sev le ngel? Nevisvisenien nga mimerr san! Nale sen orrow otutun erres, owrai bbong tevi nemin nga marsij nir ko arosuri ni.”

²⁸ Ngavilvilsen nospen nen arsupupe rrrerale petpeti vanu ne Galili jile nir.

Iesu ololi Pita pilen ko jinibb elep nga marmesi arres luwi

²⁹ Mian ko nir arivare lingi naim ne loten vini vare e, ko artajer van rengo naim se Saemon e ko Antru; ko Jemes ko Jon orpitevir.

³⁰ Ko iok Saemon pilen leker emsi mesien dowalul ematur, ko arwerai tevi Iesu.

³¹ Ko ni evan ko orrul re Saemon pilen nevren ko esa raji imare. Ko mesien dowalul evel lingi vin nga, ko ean etabbu nurrer.

³² Ko rengo nat nga mirivriv daron nga nial miwaj pini e ko nabong on ser musuw, ko jinibb nir arwowski vajin jinibb nga

marmesi nir, ko artekai jinibb nga nemin nga marsij marsilvir kele arini ji Iesu.

³³ Ko jinibb jikle nga rengo ngaim nen arini arlik korti arnot rrale metali vare e.

³⁴ Ko ni ololi nir elep nga marmesi mesien lele arres luwi, ko oji tweni nemin nga marsij elep. Ko ewer orer nga sete parij, suri arongwose ni.

Iesu ewerwer rengo vanu ne Galili petpeti

³⁵ Renge rorong susu nat nga pial pirin, ko Iesu emremra esan evel van rengo lat nga nat mubbubbil e san, ko olot ie.

³⁶ Mian ko sete epriv ko Saemon ko nir nga marlik tevi ni, arpej ni ko arvivitu suri ni.

³⁷ Mian ko artor sweri ko aran jin. Daron nga maran jin e, ko arwerai tevi ni arwera “Ai, jinibb jikle arok-pej nik.”

³⁸ Ko ni owrai tevir owra “Kerr pian kele wor re ngaim minij e nir, nga inu bewerwer kele renger. Suri nuvini tweni iok le ngel.”

³⁹ Ko ni evan rengo loloim ne naim loten ser petpeti nir rengo Galili ko ok-werwer rengo nir, ko okoji tweni nemin nga marsij nir.

⁴⁰ Ko nabong san jinibb nga mimsi mesien nga niber minemaul san evini ejipa jin ngatan, ko ongoni tevi ni owra “Wurru, poro nga nik kupmarong ko kurongwos kuploli inu bowokwok.”

⁴¹ Ko Iesu orrorrmi lengleng ni, ko sete ering e mesien sen, ko esaro elngi nevren rengen; ko owrai tevi owra “Inu numarong. Kupwokwok ko.”

⁴² Ko ngavilvilsen mesien nga niber minemaul evel lingi ni, ko ni owokwok ko ornge erres luwi.

⁴³⁻⁴⁴ Ko rengo daron mawos nen ko pa Iesu ewer ore ni, owrai tevi, “Kuplesi sete kupwerai nanu pisan tevi jinibb pisan, ko kupvijuri sel van re Naim On, ko kupasi ji jinibb ne sulsulen san pilesim.

Ko kuplai nanu ne sulsulen nga Moses muwrai rengo nale neseseien sen tevi ni. Suri kumwokwok pa.” Ko ni elinglingi evel.

⁴⁵ Evel van ko etipatun osupsupe limjer, etewijreni nanu nga elep. Ko ololi Iesu setemun orongwos pivel limjer rengo ngaim mun nir, ni elik jer ko pa rengo lolo merwer. Ko ngok ololi bbong jinibb ne lat petpeti arivivel tweni malume.

2

Iesu ololi jinibb nga devje niben mimij san erres luwi

¹ Nabong evis arasi osuw, mian ko Iesu olwi kele van rengo Kapaneam e, ko elik

re naim se Pita. Ko jinibb arunge nospen nen nga ni elik renge loloim nen.

² Ko delung elep aran jin renge loloim; ko loloim setemun evter nir; ko vini vare e kele renge roro metali setemun evter kele. Ko ni ewerwer renge nale nga mürres tevir.

³ Ko nir sopor ara-vini vivitu tevi jinibb san nga devje niben mimij; nir ivij arwosi renge maling sen.

⁴ Ko sete arongwos parini mori ji Iesu, suri jinibb elep pelak. Ko arsa van mare renge drru naim, ko arrarre drru naim mare momsawos lat nga Iesu mülük e etpir. Arrarre jale osuw, ko arla dil sopor, ko arile renge maling nga marsale mñernen ren, ko arjuröni van ngatan e.

⁵ Ko Iesu elesi nosurien ser; ko owrai tevi mñer nga devje niben mimij nen, owra "Natuk, nololien som nir nutlasi twenir pa osuw."

⁶ Ko jinibb nevisvisenien ne nale nesese-rien sopor arlik ie renge daron nen ko arrorrmi sarrsarre renge nolor, arwera

⁷ "Erpese mñerel mñirij mirpok? Ni erij melmelas ko osopsope pa Atua! Isi orongwos pitlasi tweni nololien nir; Atua kobong esan bbölbö!"

⁸ Ngavilvilsen Iesu ornge niben nen, orongwose nga nir arrorrmi erpok renge nolor. Ko owrai tevir, owra "Suri sev kami kamrorrmi nanu ngel nir renge nolo kami nir mirpok?"

⁹ Evi nanu nga mñisarow bbong nga bowrai tevi mñerel, 'Nololien som nutlasi tweni pa,' suri si pñilesi poro nuwretun rrek nukrekris kobbong? Ko evi nanu nga mñiterter kele wor asi ngok nga poro bowra, 'Kuptur imare kupla milngom ko kupiel van renge naim som e,' suri jinibb jijle parlesi lelingen poro piplari pirpe nga mowrai ngok.

¹⁰ Ko bololi vajin nanu nga mñiterter nen, puloli kaprongwose kele nga inu Jinibb Mawos derteren suk otoa renge iel ngatan nga betlasi tweni nololien." Ko ni owrai tevi mñer nga devje niben mimij, owra

¹¹ "Nuwrai tevi nik, Kuptur imare kuplai maling som kupwosi, ko kupiel van renge naim som e."

¹² Ko ni otur mera kasi ngavilvil, ko owosi maling sen ko evel limjer renge nor evan vare e. Ko nir jijle bbösa elair e, ko arsurövi Atua arwera "Sete pa rramlesi nanu san erpe nga ngel tuwi, ejki rres nawon wor."

Iesu everuse Livae pivi jinibb sen, pivi-juri ni

¹³ Ko Iesu evel olwi kele van renge nuwito ne Galili e. Ko jinibb elep aran ji ni, ko ni evisviseni nir.

¹⁴ Ko renge daron nga mivel asi, ko elesi Livae natu Alpus elik renge naim ne takis nga mok-majing rengen. Ko owrai tevi ni owra "Merel, kupini kupvijurik." Ko ni otur imare kasi ko evijuri ni.

¹⁵ Musuw vajin ko vitunen daron nga mülük renge nanen mñaan, ko jinibb elep nga marok-la nevöt ne takis, ko jinibb nga marok-loli nololien nga marsij nir nga marwirr twenir arlik tevi, ko jinibb sen kele wor nir, ko nir elep kele wor nga marvijuri.

¹⁶ Ko jinibb ne nevisvisenien ne nale nesese-rien nga marivi Parasi sopor arlesi esij ko arlolar e. Ko aran arlesi jinibb se Iesu nir; ko arwor suri Iesu tevir, arwera "Erpese ni aan ko eminmin tevi jinibb nga marok-la nevöt ne takis ko jinibb nga marok-loli nololien nga marsij nir!"

¹⁷ Daron nga Iesu murunge nale ser ngok e ko owrai tevir owra "Nir nga marres sete armerreni dokta, ko nir nga bbong marmesi ko armerreni dokta. Erpok ko, inu sete nuvini tweni beveruse nir nga marok-wera tetajer nga nir lweni marres, ejki, ko nuvini tweni bbong beverus nir nga sete markerkeris, ko marwer limjere nga marsij."

Nosusien suri murrin nga parlinglingi nanen parvil

¹⁸ Jon jinibb sen nir ko jinibb se Parasi nir arvil. Ko jinibb sopor arlesi, ko arini ji Iesu ko arwerai tevi, arwera "Suri sev Jon jinibb sen nir ko Parasi nir jinibb ser nir marvil, ko nik jinibb som sete marvil?"

¹⁹ Ko Iesu owrai tevir, owra "Orongwos jinibb nga mutotko selen parvil daron nga mülük malum tevir e? Daron nga mülük malum tevir e, ngok sete arongwos parvil.

²⁰ Mian ko nabong nen nir para-vini vajin, ko para-te kai tweni jir; ko ngok ko, nir para-runge pñisij ko para-vil ko renge nabong nen nir.

²¹ "Ko erpok kele sete jinibb san orongwos pñila kalek nga mimerr ko puwol ore lat nga mñimarrerr e renge sunsun tera, ko pñilile ore rengen. Poro pirpok, ko nga mimerr tia-sakuk ko tia-teri kele kalek nga mñitra, ko tia-loli lat nga mñimarrerr tia-lep temijjal.

²² Ko erpok kele, sete jinibb san orongwos pujongjongi norro nga mimerr van renge botel nga mñitra nga marloli nevlu nanikot e. Poro pirpok, ko norro nga mimerr tut, tuloli nevlu nanikot nga mñitra tirrerren ko tiap rreersi, suri etra pelak. Ko norro timejivjiv tisij, ko nevlu nanikot kele tisij. Pirpel ko, norro nga mimerr parlingi ko wor renge nevlu nani nga mimerr mimalum mñirres."

Jinibb se Iesu nir arsesri wene wit reнге nabong ne Sapat

²³ Mian ko Iesu evel otvi naut ne wit san reнге nabong ne Sapat. Eptevi jinibb sen nir, ko jinibb sen nir artipatun arsesri wene wit nir ko arlair arurrurro surseler.

²⁴ Ko Parasi sopor arlesi, ko arwerai tevi ni, arwera "Kuplesi ta! Nir arloli nanu nga sete mumomsawos reнге nabong ne Sapat ko!"

²⁵ Ko ni owra lweni tevir, owra "Aro, ejki ma, ko rreknga ma kami sete kameve reнге Naul On, nanu nga Numal Devet muloli daron nga nanen ser mijkie, numer mīajai ni ko nir nga marlik tevi ni?"

²⁶ Ni ean reнге Naim On se Atua daron nga Apiata mivi batu jinibb ne sulsulen, ko ela niv nga sete erres reнге jinibb nawon parurroi, evi kis bbong se jinibb ne sulsulen ko; ko orroi, ko ni elai kele tevi nir nga marlik tevi ni arurroi kele."

²⁷ Ko Iesu ewer oti nale sen vajin tevir, owra "Atua elngi Sapat nga pīla se jinibb, sete elngi jinibb nga pīla se Sapat, ejki!"

²⁸ Ko niko erpok ko inu Jinibb Mawos nuvi Numal ne Sapat."

3

Iesu ete nevre jinibb san nga mīkati emetet luwi

¹ Iesu olwi kele evan reнге naim ne loten. Ko reнге loloim ne loten nen, jinibb san nga nevre mīkati elik reнге.

² Ko Parasi sopor armeteni suri ni, poro nga ni puloli mīer nga nevre mīkati nen pīrres reнге nabong ne Sapat; ko ngok nir partor sweri sel san nga parevei ni pian re ko suri.

³ Ko ni owrai tevi mīer nga nevre devjen mīkati nga, owra "Kupini ta iel, kuptur womu iel."

⁴ Ko ni owrai tevi nir, owra "Reнге devjen ne nale nesereien, erres nga parloli nanu nga mīrres reнге nabong ne Sapat? Rrek poro pijki, parloli pīsij? Erres nga parloli jinibb san pīrres luwi re nabong ne Sapat? Rrek poro pijki, ko parlokloksi jinibb rrek!" Ko nir armurrong.

⁵ Ko Iesu vajin oklu rrale nir jijle nga martur rrale ni, ko ololarsir ko ornge esij, suri nolor eterter elep erpe nevōt. Ko owrai tevi mīer nga nevre mīkati, owra "Kupete ta nevre pimetet." Ko ni ete nevre emetet erres luwi.

⁶ Ko Parasi nen nir aravan vini vare e, ko arsaro ngavilvilsen aran arkorti tevi jinibb se Erot nir. Ewretun Parasi nir ko jinibb se Erot nir tetajer orok-lololarsi lweni nuru, ko arlik lat sansan vajin, ko arsupsupe suri parevji pini Iesu pīrpese.

Delung elep arvitu suri Iesu

⁷⁻⁸ Iesu eptevi jinibb sen nir, arjubbul luwi kele van reнге nuwito ne Galili e ngalu. Ko delung nga delung nga milep nga marunge nanu nga marlelep nga ni mok-lolir arinini jin ko arvijuri, nir ne Galili ko nir ne Jutia ko nir ne Jerusalem ko nir ne Itumia, ko nir ne devjen nga mutoto roroni van Jortan e, ko rrale Taea ko Saeton.

⁹ Ko Iesu owrai tevi jinibb sen nir nga parwer totoni ngarr drrav san puto terai ni, suri delung elep pēlak, ko tarlilji ni.

¹⁰ Ko ni ololi nir elep pa arres luwi, ko niko nir elep nga marmesi artontonir parini mori arlilji Iesu, arwera parjipari.

¹¹ Ko neñin nga marsij nir, daron nga marlesi ni e ko arwajenir van ngatan reнге non, ko arkail van mare arwera "Nik kuvi Atua Natun!"

¹² Ko ni otortorir, ko ewer orer eterter nga sete parwowra tweni ni tevi jinibb nir parongwose, pijki.

Iesu otobbtobbue jinibb sen nir esngavōl drromon eru (12)

¹³ Mian ko Iesu otonga tevi jinibb sen pētpeti nir van reнге botwen nga muwu mare milep san. Ko reнге marongen se ni, ni everus nir esngavōl drromon eru (12) arini mori jin, ko otobbtobbue nir.

¹⁴ Ko ni everuse nir arwaji aposol, nga parok-pitevi ni, ko ngok pok-konir parok-an parok-werwer.

¹⁵ Ela derteren tevir nga parok-oji tweni neñin nga marsij nir nga marok-sisilvi jinibb nir parivare.

¹⁶ Jinibb nen nir niser le ngel: Saemon nga ni nīlngi kele nisen san miwajie Pita,

¹⁷ ko Jemes nga Sepeti natun, ko tasin wor Jon, nga ni nīlngi kele nise nuru morwajie Boanejes, nga muwra puwra natu belver (suri orivi jinibb nga morok-verver).

¹⁸ Ko Antru ko Pilip ko Bartolemu ko Matiu ko Tomas ko Jemes nga natu Alpus ko Tateas ko Saemon ne Selote (ngok evi pati se lartul nga marmerreri parwirre mīeri Rom nir),

¹⁹ ko Jutas ne Iskariot nga vitunen pia-te kai kerasi Iesu van reнге mijen.

Jinibb sopor arwera Iesu ok-loli majingen sen reнге derteren se Demij

²⁰ Iesu olwi kele vini reнге naim se Pita e. Ko delung elep kele arini korti kele jin, ko ngok ololi setete daron ser otoa, erpok kele re daron ne nanen kele.

²¹ Ko metka sen arunge, ko arivel tweni parlasi lweni ni; suri jinibb sopor arwera ni elengleng.

²² Ko jinibb ne nevisvisenien ne nale nesereien sopor arivel reнге Jerusalem e vini, ko arwera "Belsipa ko, numal se

demij nir, ok-pitpitevi ni nga mok-oji tweni neñin nga marsij marok-ivare ngok.”

²³ Ko ni everus nir arini jin mori, ko ni owra nale rrongrrongvi sopor tevir, owra “Demij puoji lweni ni pirpese?”

²⁴ Ko poro batun vanu san piteri wukari pïeru e, ko pulolarsi lweni, ko pïtre lweni, batun vanu nen setete mia-tur!

²⁵ Ko poro metka san piteri wukari pïeru e ko pulolarsi lweni, ko pïtre lweni, metka nen sete orongwos pïlik pïrres.

²⁶ Ko erpok kele, sete Demij orongwos putur imare pïtre lweni ni lweni ko piteri wukari pïeru e pirpe nga kami kamwerai ngok, suri poro puloli pïrpok, ko sete orongwos putur te, suri evan pa rengo bongsin ko osuw.

²⁷ Ko erpel ma le: sete jinibb san orongwose pian rengo naim se jinibb nga derteren sen mutoe san, ko pulokloksi joron, ejki. Womujnen ni pïla dil ko pïstre totoni mïer nga derteren sen mutoe ngok ko wor, ko ngok orongwos pia-lokloksi joro mïernen ko vajin. Niko inu nuloli tevi Demij rengo derteren se Neñin On ko.

²⁸ Ko kaprunge nanu kele san: Nuwretun nga nuwretun nuwrai tevi kami, jinibb nir Atua pïtlasi tweni nololien ser nir ko nale nga marsij ser kele nir nga marok-rij melmelas renger.

²⁹ Ko poro san pïrij melmelas ko pusop-sope Neñin On, ngok netlasien nen ejki rres nawone. Ni on rengo nololien nga puto tuwi ngok vini.”

³⁰ Owrai erpok suri nga nir arwera neñin nga mïisij eptevi ni.

³¹ Mian ko Iesu tasin nir ko tasu sen arivel ko arini ie; ko artur vare, ko arkoni jinibb san evan piveruse loloim.

³² Ko delung elep arlik rrale ni. Ko arwerai tevi ni, arwera “Kuplesi tasu som ko tasim nir artur ngel vare, arpej nik, arwera parlesim.”

³³ Ko ni owra lweni tevi nir, owra “Isi evi tasu suk

ko isi arivi tasik nir?”

³⁴ Ko ni oklu emteni nir nga marlik rrale ni, ko owrai tevir, owra “Kaplesi tasu suk ko tasik nir, nir le ngel!

³⁵ Isi nga puloli marongen se Atua, mïernen ko evi tasik ko jojik ko tasu suk.”

4

Nale rrongrrongvi ne mïer nga mok-jijireni jelangin

¹ Ko Iesu evisviseni kele jinibb nir rengo jeli nuwito ngalu, ko delung elep nga elep arini korti jin. Ko ni esa asi van rengo drrav san e ko esakel rengen. Ko jinibb sen nir arsoni tweni drrav, esal van ngalngalu

sopon, ko delung jile nir arlik jer ngaut rengo jeli nuwito.

² Ko ni evisviseni e nanu elep rengo nale rrongrrongvi. Ko owrai tevir rengo nale rrongrrongvi sen, owra

³ “Kaprunge ta. Jinibb san nga mok-jijireni jelangin evel van nga pïijijireni jelangin.

⁴ Ko daron nga mok-jijireni jelangin e mirpok, ko sopor arwij asi van rengo dan ne sel e, ko numön arow vini ko artasi twenir.

⁵ Ko sopor kele arwij asi van rengo dan ne jerev e, lat nga dan sete mimtul rengen. Ko aretiv pelari ngavilvilsen, suri dan sete emtul.

⁶ Mian ko daron nga nial mivini muwospot mare e, ko armeli, suri laþer ejkie, ko armaob.

⁷ Ko sopor kele arwij asi van rengo lolo moku e; ko moku armaur imare ko arejal tevtvnr, ko sete arongwos parwen.

⁸ Ko sopor ma sete arwij lingi dan nga mïrres nen, armatur jer rengen, ko aretiv, armaur, ko arwen. Sopor wener ejpari ngavöl itul (30), ko sopor wener ejpari ngavöl ouwon (60), ko sopor wener ejpari ongut vesan (100).”

⁹ Ko ni owrai tevir, owra “Isi nga boron otoa, purnge re nolo boron!”

Iesu owra tweni suri sev nga ni mok-visviseni jinibb nir rengo nale rrongrrongvi

¹⁰ Ko rengo daron nga Iesu mïisan vajin e, ko lartul nga marlik tevi ni ko jinibb sen wor nir esngavöl dromon eru arsusni nale rrongrrongvi nen nir tevi ni.

¹¹ Ko ni owrai tevir, owra “Kami ko ma, Atua elai momsawos nanu nga marto silveni rengo batun vanu sen tevi kami. Ko nir nga marlik rengo vare nir, nanu jile arlai tevir rengo nale rrongrrongvi.

¹² Niko Naul On owrai owra ‘parlesi ko parlesi lululweni, ko sete parlesi wose. Parunge ko parunge lululweni, ko sete parongwose. Suri nolor eterter ko armus nolor pulululwi, ko arwera ‘Rr-trongwose ko rratmetutu, ko rratrieni lweni nolorr tululwi, ko Atua titlasi tweni nololien se kerr suri!’ ”

¹³ Ko ni owrai tevir, owra “Kami kam-rrerlrengo nale rrongrrongvi nga mowrai ngok ko? Ko poro pïrpok ko poro nga bowra nale rrongrrongvi mïnij kele sopor, ko kami kaprongwose pïrpese?”

¹⁴ Mer nga mok-jijireni jelangin ngok, erpe mïer nga mok-werwer rengo nale se Atua ko.

¹⁵ Dan ne sel osorsan tevi nir nga ngel le, nga marunge nale se Atua ko marloli nolor mïiterter nga marmus parunge ko

parlingi renge nolor. Niko muloli ngavilvilsen Demij mivini miteseni luwe nale se Atua renge nolor.

¹⁶ Ko dan ne jerev erpe nir nga ngel le, nga marunge nale se Atua nga mivitan, ko arir lengleng e ko arlai ngavilvilsen.

¹⁷ Ko laþer sete artoe renge nolor; arlik beblen bbong, mian ko daron nga nat mīkarkar renger e suri nale ne batun vanu se Atua, ko marojir suri, marloli mīsij tevir suri, ko nolor arvitan arvesane.

¹⁸ Ko nir mīnij nen nir arirpe jelangin nga miwij van renge lolo moku. Nir ngel ko arivi lartul nga marmurronge nale,

¹⁹ ko arorrmi þelak nanu ne iel ngatan nir, rrek nijor ervei nororrmiē ser, rrek nolor arvenae nanu elep kele. Ko nanu ngok ko nir arejal tevteveni vajin nale ne batun vanu se Atua nga morrongrongvi re jelangin nga mivitan re nolor, ololi sete wener otoa rragrag.

²⁰ Ko jelangin sopor nga marvitan van renge dan nga mīrres nen e arorsan tevi nir nga marunge nale ko martori renge nolor, ko arwen. Sopor wener ngavōl itul (30), ko sopor wener ngavōl ouwon (60) ko sopor wener ongut vesan (100)."

Moron nga martepilis ore biles e

²¹ Ko Iesu owrai kele tevi nir, owra "Daron nga kumla laet vini e, sete orongwos kupla twenie nga kuptawi ore besin e, ko sete orongwos kuplingi renge melve maling, ejki. Ko kuplingi ko wor renge mīngen mawos.

²² Ko erpok ko, sete nanu san orongwos piteptepi; pian ko pia-to limjer kobbong. Rreknga nanu tama san nga parsilveni puto teptepi, ejki rres nawon! Nanu jile parpelari þetþeti ko wor renge moron.

²³ Isi nga boron otoa, purnge re nolo boron!"

²⁴ Ko ni owrai kele tevi nir, owra "Nale ngok nga kamok-murrong nir ngok, kaprorrmir ko wor, ko kamrongwos kaplair pusorsan tevi nga kamok-þelak mīterter suri. Ko Atua þila norongwosien mare nen kele tevi kami.

²⁵ Mer nga murnge ko murrul totoni, mīnēn para-lai kele ko wor tevi ni. Ko mīer nga murnge ko sete murrul totoni, mīnēn para-lai tweni jin norongwosien sen beblen nga ni murongwos wowomue pa."

Nale rrongrongvi ne jelangin mimra

²⁶ Ko Iesu owrai tevir, owra "Batun vanu se Atua erpel le. Jinibb san ok-jijreni jelangin renge orsel san.

²⁷ Musuw ko ean vajin elelea nawon, setemun orrorrmi suri renge nutrin ko nutpong, ejki mun. Jelangin etiv pelari esan. Ko emra elep vajin, ko mīnēn sete orongwose rragrage suri erpese.

²⁸ Dan esan kobbong ololi ewen. Womujnen elngi nowsen mian ko nevgun, mian ko elngi wenen jile vajin.

²⁹ Ko daron nga wenen mītra mīrres mimirr vajin, ko mīer nga ela nesip ko ean eta tutweni vajin, suri evi daron ne numōs vajin."

Nale rrongrongvi ne jelangi nubek

³⁰ Ko Iesu owrai tevi jinibb nir, owra "Kerr purrongrongvi batun vanu se Atua þirpese? Rreknga renge nale rrongrongvi sev rraploli piplari limjer þirres rengen?"

³¹ Rraprongrongvi þirpel le: Jinibb san ela jelangi nubek san ko orwi. Jelangin nen ewelili nga ewelili jer lingi jelangi nai jille nir.

³² Ko daron nga murwi jile ko mietiv pelari vajin, ko emra elep van mare e, ko easi þetþeti nai nga ngok nen nir. Ko emeseksek, rengsin nir arlelep arsalsal van ngasu jer. Ko numōn esaut arinini ren, arok-loli menur renge rengsin nir, ko arok-molmol re melven."B

Iesu ok-visviseni jinibb nir ko ok-la wor nale rrongrongvi ko

³³ Iesu ela nale rrongrongvi lele elep kele nga marirpok nir tevi jinibb nir, osorsan tevi nir marongwos parongwose.

³⁴ Ni ok-visviseni nir renge bbong nale rrongrongvi ko. Ko daron nga Iesu nir jinibb sen kis vajin marsan, ko owra suri nale rrongrongvi nga nir lat nga maro suri vajin.

Iesu ewer ore ling serser nga mīteiwut vini

³⁵ Renge nabong nen malum, renge daron nga nat mirivriv vini, ko Iesu owrai tevi jinibb sen nir owra "Kerr puwlu van renge devje nuwi e."

³⁶ Ko arivel arlinglingi delung nir artur jer, ko arengeni ni renge drrav eptevir, drrav nga pa ni mīsakel ko rengen. Ko drrav mīnij kele sopor arpitevi drrav nen.

³⁷ Ko mian ko sete epriv ko ling serser nga milep san etwut vini. Ko daptap arwowosi elep, arututi drrav ko arjivjivi van renge nolon. Ko natung owun elep renge drrav, ko otomori purron.

³⁸ Ko Iesu ematur pareng pa renge batu drrav vitunen, ematur oulele pilo san. Ko jinibb sen arini ko arwuni tweni, arwerai tevi arwera "E, jinibb nevisvisenien, sete kurrorrmi nga kerr rrapmij?"

B 4:32 Erpe iel, Mak orrongrongvi batun vanu se Atua erpe jelangi mastat; ko suri mastat ejki iel, namlingi nubek, nga puloli mining ne nale se Mak piplari limjer.

³⁹ Ko ni emra otur ko ewer ore ling. Ko owrai tevi nuwi owra “Kupmol kupjire p̄irres!” Ko ling omol omosi evesane, evilvil.

⁴⁰ Ko ni owrai tevi nir owra “Suri sev nolo kami eririr? Niben nosurien se kami?”

⁴¹ Ko nir armetutu lengleng, arij vijvij por arwerwera tevir arwera “Aro, isi le ngel, nga ling ko nuwi kele morosuri ni?”

5

Iesu oji tweni nem̄in nga m̄isij san renge m̄eri Gerasa san

¹ Nir arwolu toku renge devje nuwito momsawos renge sise m̄eri Gerasa nir.

² Ko daron nga moka-jubbul renge drrav e, ko jinibb san nga nem̄in nga m̄isij m̄isisilvi evel pelari renge dubb e nir vini, evel tersele, esewute.

³ Mernen ok-lik pa renge lat nga marok-tivtavin e ko, renge dubb nir. Ko setemun jinibb san orongwose p̄isre totoni tevi dil nga marterter e nir, ko dil delrrurr kele nir sete arvitere, ejki mun.

⁴ Suri arok-sere totoni tetajer pa nevren ko nuru ko βelan nuru tevi dil nga marterter e nir ko tevi dil delrrurr nir, ko ok-rrerrrsir armotot. Ko niko setemun san derteren sen evttere nga purrul totoni puloli pumu luwi.

⁵ Ko tetajer, renge nutrin ko nutpong kele nir, ni ok-ivel karkar renge dubb nir ko botwen nir ko ok-kikail ko ok-tevteve nevõt e ni luwi niben nir.

⁶ Ko daron nga m̄ilesi Iesu mivel malum ngasu wore vini, ko owlu van jin ejipa ngatan jin.

⁷ Ko ekail van mare temijpal owra “Sev som oto ni le iel, Iesu Atua ne Dromsen Mare Natun? Inu nungonie nik eterter renge Atua, warru sete kuplokloksik!”

⁸ Suri Iesu muwra pa “Nik nem̄in nga m̄isij, kupivare lingi morok!”

⁹ Ko Iesu osusi tevi, owra “Nik nise si?” Ko ni owrai tevi ni, owra “Inu nisek ko Delung, suri kem elep.”

¹⁰ Ko ni ongoni tevi Iesu eterter, nga ni sete puoji tweni nem̄in nga marsij nen nir parivel lingi vanu nen.

¹¹ Ko renge ie, nior βerβer nga milep san arok-susung bbong mori jeli botwen nen.

¹² Ko nem̄in nga marsij nir argoni tevi Iesu arwera “Kupkoni kem van renge βerβer ngok nir, nga kem nabsilvir.”

¹³ Ni elinglingir, ko nem̄in nga marsij arsil ivivare lingi m̄er nga, ko arwolu van arsilvi βerβer nir; ko arloli batur arlengleng. Ko βerβer nen nir elep, evi nuvasngavöl varu (2000); ko nir p̄etp̄eti arwolu jubbjubbul mawos nuwito ngatan,

ko arow jubbjubbul van renge nuwi, ko arron.

¹⁴ Ko lartul nga marok-uwngani βerβer nen nir arwolu van renge ngaim nga milep ko ngaim nga wewarrang nen mir; arwerai tevi jinibb nen nir. Ko jinibb nen nir arivel tweni parlesi sev nga miplari ngok pa.

¹⁵ Ko nir arini ji Iesu. Ko arlesi m̄er nga nem̄in nga marsij milep marsisilvi nga, norrrrmien sen erres luwi, ko ori sunsun, ko elik malum vajin. Ko armetutu vajin.

¹⁶ Ko nir nga marlesi mawose nanu ngel miplari arsupe suri erres tevir lat nga muto suri, erpese renge ni nga nem̄in nga marsij marsisilvi, ko suri kele βerβer nir.

¹⁷ Ko nir aron tertere Iesu arwerai tevi nga ni pivel lingi vanu ser.

¹⁸ Ko daron nga ni m̄isa luwi renge drrav, ko m̄er nga nem̄in nga marsij marsisilvi bonevis nga ongoni tevi Iesu nga ni p̄iptevi ni.

¹⁹ Ko Iesu ewer ore owra pijki, ko owrai tevi ni, “Kupluwi van renge naim som e ji metka som nir, ko kupsupe tevir erpese nga Numal mirrreni nik, ko nanu nga milep nga muloli tevin.”

²⁰ Ko m̄ernen osri sel sen olwi, ko ospupe vajin limjer renge lat nga marwera Ngaim Esngavöl e, nanu nga milep nen nga Iesu muloli tevi ni. Ngok jinibb j̄ijle daron nga marunge, ko artaole.

Iesu ololi nesevin san nga drran muto m̄isij erres luwi, ko nesenwarreng san emaur luwi kele

²¹ Iesu esa kele renge drrav ko arwolu pelaot van renge devje nuwito kele e. Ko daron nga marwolu toku e vajin, ko delung nga milep arini korti jin ngalu.

²² Ko renge iok jinibb san nisen Jaeras nga mok-metmete naim ne loten elesi ni ko evini jin, ejipa ngatan renge βelan.

²³ Ko on tertere owra “Natuk nesenwarreng otomori pimij. Wurru nungonim kupini kuplingi nevrem rengen, ko vin wel nen p̄irres luwi!”

²⁴ Ko Iesu eptevi ni nuru oran. Ko delung elep arvijuri suri ni ko arlijji ni.

²⁵ Ko nesevin san nga mesien se nesevin nir muloli tetajer e renge sia esngavöl dromon eru,

²⁶ ko ornge lengleng e esij elep, ewretun elesi dokta elep. Ko olokloksi p̄etp̄eti nevõt sen, ko setete nanu san erres renge ni, earunge lengleng ma esij ko.

²⁷ Ko daron nga murnge vajin nanu nga Iesu mulolir, ko esilvi delung nir vitu ko evini morie, ko ejpari sunsun sen.

²⁸ Suri orrorrmi renge nolon, owra “Porobong bejpari bongsi sunsun sen ko ngok inu βerres luwi ko pa.”

²⁹ Ko daron mawos nga pa mijpari e ko mete drra emes, ko ornge renge niben nga ni erres pa osuw renge mesien sen.

³⁰ Renge daron mawos nen Iesu ornge renge niben nga derteren owlun lingi ni, ko erieni ni ko osusi owra "Isi ko mijpari sunsun suk?"

³¹ Ko jinibb sen nir arwerai tevi, arwera "Po! ko kulesi delung elep arlililjim, ko erpepe nik kuwra isi ejparim?"

³² Ko ni okluklu wor emteni rrale nir, owra p̄ilesi isi ko ololi nanu ngel.

³³ Ko nesevin nen emtutu ko eririr, orngwose sev nga ni muloli. Ko evini ejipa vitan renge ñela Iesu ko owra were-tunen nir tevi.

³⁴ Ko ni owrai tevi vinnen, owra "Natuk, nosurien som ololim kumrres. Kupluwi renge demat, kurres ko pa renge mesien som."

³⁵ Daron nga m̄irij malum e ko jinibb sopor arivel renge naim se Jaeras vini, ko arwerai tevi Jaeras arwera "Natum nesenwarreng emij pa osuw. Kuplinglingi Numal, setemun kupvijajeng rengen."

³⁶ Ko Iesu sete ewer suri nale nga marw-erai nir, owrai tevi owra "Sete kupmetutu. Sansan kobbong, kuposuri."

³⁷ Ko ni ewer ore jinibb nir sete san pivijuri, sansan kobbong Pita ko Jemes ko Jon, Jemes wor tasin.

³⁸ Ko nir aran vajin renge naim se Jaeras. Ko Iesu elesi nga nir muwun saut, ko arting vijajeng lengleng, arul temijpal van mare.

³⁹ Ko ni evan loloim, ko owrai tevi nir, owra "Erpepe kami kamting vijajeng? Nesenwarreng sete emij, ko ematurrwele kobbong."

⁴⁰ Ko nir arunge erij se lenglengen, ko armen keraji e. Ko ejelir aran vare e, ko elai kis bbong tata ko tasu se nesenwarreng ko nir nga marpitevi ni. Ko ni evan renge lat nga nesenwarreng mimatur ren.

⁴¹ Ko orrull totkoni nevre nesenwarreng ko owrai tevi owra "Talita kum," nga muwra mirpel: "Nesenwarreng, nuwrai tevi nik kupmera."

⁴² Ko renge daron mawos nen ko pa nesenwarreng emra, ko evivel. Suri sian esngavöl ko pa drromon eru. Ko bbösa nga milep elair e.

⁴³ Ko Iesu ewer ore nga sete parwowrai nanu ngel tevi jinibb pisan purongwose, pijki. Ko owrai tevir nga paralai nanen sapon tevi vin wel nen purroi.

6

Meri Nasret aroji tweni Iesu

¹ Ko Iesu evel lingi lat nen ko olwi van renge ngaim sen e, ko jinibb sen nir arvijuri suri ni.

² Ko moro nabong ne Sapat mivini, ko ni evan renge naim ne loten ko evisviseni jinibb nir rengen. Ko

nir elep armurrarronge ni, ko bbösa elair e ko arwera "Merel ela norongwosien ngabe le? Ko ok-loli nanu nga marinijnij nawone nir arirpepe le?"

³ Kerr rramrongwose kobbong, evi metusu, Merri natun, ko tasin Jemes ko Joses, ko Juta, ko Saemon. Ko sete jojin le nir ngel marpitevi kerr?" Ko arong karkare.

⁴ Ko ni owrai tevi nir, owra "Weretunen, propet san arongwos parosuri lat jille nga mian e. Ko jinibb nga ma renge sisen woswos, ko metka sen nir ko niaken sen nir sete mara-osuri p̄elake. Nanu ngok sete erres."

⁵ Ko ni sete orngwos puloli nanu san ie. Elngi bbong nevren renge nir nga marmesi evis ko, ololi arres luwi.

⁶ Ko ni etaole nga sete marosuri. Ko evel evisviseni jinibb nir rrale vanu nen ngaim nen nir.

Iesu okoni jinibb sen nir esngavöl drromon eru aran arwerwer

⁷ Ko Iesu everus jinibb sen esngavöl drromon eru arini jin, ko elai derteren tevir nga paroiji tweni nem̄in nga marsij nir. Ko ni okoni tweni nir ererwi arivel.

⁸ Ko ni ewer orer, owra "Sete kaptori nanu pisan renge nivelen se kami renge sel, pijki, niv pijki, narr pijki, ko nevöt pijki renge baos kele. Sansan kobbong, kaptori nejjijip pisansan.

⁹ Ko kaprae but se kami, ko sete kapuri sunsun p̄ieru."

¹⁰ Ko ni owrai kele tevir owra "Naim ngabe nga kami kapan rengen womu ko parevei kami, kaplik ko pa rengen pijpari daron nga kapa-ivel lingi naim nen.

¹¹ Ko poro renge ngaim san jinibb nen nolor p̄iterter, sete parunge kami nga parevei kami van jir, ko ngok, daron nga kapa-ivel lingi ie, erres kapwirrwirreni tweni maw nga muto re but se kami renge meter nga parlesi, piviseni tevir nga marloli m̄isij."

¹² Ko nir arivel lingi, aran arwerwer tevi jinibb nir nga nolor pulululwi.

¹³ Ko aroji tweni nem̄in nga marsij elep arivare renge jinibb nir, ko arjivi oel van renge nir elep nga marmesi, ko arlolir arres luwi.

Numal Erot Antipas os̄pe suri Iesu

¹⁴ Ko Numal Erot Antipas ornge marsupe Iesu, suri nisen jinibb jile arunge. Ko nir sopor arwera "Jon Baptaes ko otur imare luwi renge mijen, ko ngok niko majingen nga marlelep ngok arimare renge ni, ko ololi nanu nga marinijnij nawon ngok e nir."

15 Ko jinibb sopor kele arwera “Ni evi Elaaja,” ko nir sopor kele arwera “Ni evi propet ko, erpe propet ne tuwi san.”

16 Ko Erot daron nga murnge ko owra “Rrek Jon ko nga inu mēta otvi batun, otur imare luwi kele rengo mijen kele!”

Mijen se Jon Baptaes

17 Ko Erot Antipas bonevis pa okoni jinibb san evan orrul totoni Jon ko esre totoni elngi rengo naim ne nekaien, suri marongen se Erotias nesevin se tuwan Pilip. Suri ni etkai luwe vinnen,

18 ko Jon owrai tevi Erot, owra “Sete erres nga nik kuptekai luwe nesen se tuwam.”

19 Niko Erotias esij lengleng tevi Jon, emrreni parevji pini. Ko Erot ewer ore,

20 suri emtutue Jon; orongwose nga ni evi jinibb san nga mīrres, evi jinibb on. Ko emetmete ni erres rengo naim ne nekaien. Ko daron nga murnge nale sen, ko eir kobong rengo purnge, ko ornge esij lengleng kele, suri ololi nanu elep.

21 Ko mian ko nabong mawos se Erot evini nga ni puloli dabbuen rengo nga ni mīiak e. Puloli tevi numal sen nir, ko batu jinibb nuval nir, ko batu jinibb ne Galili nir. Ko rengo daron nen, Erotias elesi evi daron san nga mīrres se ni.

22 Ko okoni natun nesen mēlakel evini loloim ko esew. Ko Erot ko lartul nga marlik tevi rengo nanen marlesi, ko arlesi erres pēlak. Ko numal Erot owrai limjer tevi vinnen owra “Kupngoni tevik isev nga nik kumrreni ko inu βelai tevim!”

23 Ko ni ojuji lengleng mare ko owrai tevi vinnen owra “Isev tama san nga poro kupngoni tevik, βelai tevim; poro pivi devje vanu suk, ko βelai ko wor tevim.”

24 Ko ni ean vare ko osusi tevi tasu sen, owra “Bongoni sev le?” Ko tasu sen owra lweni tevi owra “Kupngoni batu Jon Baptaes.”

25 Vinnen ewit olwi evel mawose numal ko ongoni tevi owra “Numrreni nik kupla Jon Baptaes batun tevik rengo narov.”

26 Ko numal orrorrmi elep suri sev nga ni mimarong pa rengen. Ko suri muloli pa rijrijen sen rengen, ko suri kele nir nga marlik tevi rengo nanen nga maraan, nir jile arunge, ngok setemun orongwos pumusus.

27 Ko ni owrai tevi jinibb sen san pian rengo naim ne nekaien ko pīta otvi batu Jon, ko pīla lweni vini. Ko mīernen evan, eta otvi jile,

28 ko esale lweni rengo narov vini. Ko elai tevi nesenwarreng, ko nesenwarreng esale elai tevi tasu sen.

29 Ko daron nga Jon jinibb sen nir marunge, ko aran arwosi niben, aran artevni rengo dubb.

Iesu owngani jinibb evi nuvasngavöl nuvalim (5000)

30 Jinibb se Iesu nir arlulwi vini arlik korti ji Iesu, ko arsupe suri nanu jijle tevi ni sev nga marlolir, ko sev nga marvisviseni tevi jinibb nir.

31 Ko ni owrai tevir, owra “Kami kis kobong kapini, kappitevik kerr pian rengo lolo merwer e, ko kapmosi sapon.” Suri iok jinibb arinini jir ko arlululwi, ko ololi setete daron ser otoo, erpok kele re daron ne nanen kele.

32 Ko nir aran rengo drrav e arsa rengen, ko arwolu silveni tweni bbong lat san nga mivi lolo merwer.

33 Ko jinibb ne ngaim nen nir arlesi daron nga marwolu e. Ko nir elep arlesi woser, ko arwolu orer kali ngaut e, ko arwowomu rengo nir rengo lat nen.

34 Ko Iesu nir jinibb sen arwolu toku; ko ni ojubbul, ko elesi delung nga milep nga milep marlik pa. Ko orrorrmi lengleng nir, suri arirpe sipsip nga jinibb nga muwowomue nir mijkie. Ko ni etipatun evisvisenir e nanu elep.

35 Ko mian ko nat nga mirivriv evini vajin. Ko jinibb sen nir arini jin ko arwerai tevi ni, arwera “Tel evi lolo merwer le, ko nial otomori pa piwaj pini.

36 Kupkoni tweni nir parivel paran rengo ngaim nga marlelep nir ko nga wewarreng nir nga ngok nir, ko nir lweni wor parwuli niv, suri nanen nga parurroi ejki.”

37 Ko ni owrai lweni tevir, owra “Kami ko kapla nanen tevir parurroi.” Ko nir arwera lweni tevi, arwera “Ai, merre nevöt ko! Poro pipok kem naban nabwuli niv e nevöt selva pungut pivaru (200) ko nablai tevir parurroi?”

38 Ko ni owrai tevir, owra “Ko kami kamtori niv evis? Kapan ta kaplesi.” Ko nir aran arlesi, ko arluwi ko arwera “Namtori elim, ko nai eru.”

39 Ko ni owrai tevir nga parloli jinibb nir parlik ngatan rengo mösmös nga miejejen, pivi meling pievis e.

40 Ko nir arloli arlik vivöngsur rengo meling nir. Meling sopor ongut vesan (100) rengo ko sopor ngavöl elelmi (50) renger.

41 Ko ni ela niv nga elim nga ko ela nai nga eru nga ko esarrerr imare emteni melrin, ko olot erij erres surir. Ko obbri otvi niv nir, ko elai tevi jinibb sen nir, ko nir arlai tevi jinibb nir. Ko ololi kele erpok rengo nai.

42 Ko nir jijle arurroi ko nir jijle arup.

43 Ko jinibb sen nir arsere lweni be-be niv nga marurro linglingir ko nai

nga marurro linglingir van renge narr esngavöl drromon eru arwun saut er.

⁴⁴ Ko jinibb nga marurroi niv nen nir, nir evi nuvasngavöl nuvalim (5000) totoklai.

Iesu evel renge nuwito nga milep

⁴⁵ Ko Iesu ololi jinibb sen nir arsa van renge drrav parwowomu van renge devje nuwi e renge ngaim ne Betsaeta, daron nga ni pukoni tweni jinibb nir parivel e.

⁴⁶ Vitunen renge mukoni tweni jile nir marivel e, ko ni esan vajin evel otongsa van renge botwen nga pulot.

⁴⁷ Mian ko nat nga mirivriv e vini vajin, ko drrav esal ko pa rengen liven mesa renge nuwito. Ko ni esan elik jer ngaut.

⁴⁸ Ko elesi nga nir marsu marunge m̄isij, suri arsu tere ling. Ko mian ko nat otomori p̄isal p̄irin, ko evan jir, evel renge nuwi. Mian ko evini mori jir, ko ololi erpe owra p̄iasie nir.

⁴⁹ Ko daron nga nir marlesi nga mivel renge drru nuwi mare, ko arrorrmi rreknga evi nen̄in san, ko arkail lengleng van mare.

⁵⁰ Nir jijle arlesi ko nolor opotpote elep. Ko ni esaro ngavilvilsen erij tevir, owra “Inu lebbong, nolo kami p̄irres! Sete kapmetutu.”

⁵¹ Ko ni esa van mare renge drrav jir, ko ling omol evesane. Ngok ololi bbōsa ela nir e elep.

⁵² Suri sete arongwose suri nanu nga m̄inijnij nawone nga Iesu muloli re devjen ne niv, norrorrmien ser sete otoo.

Iesu ololi jinibb nga renge Genesaret sopor arres luwi

⁵³ Ko nir arwolu pelaot kele arini renge vanu ne Genesaret e renge devje nuwito e, ko arile totoni drrav renge lat nen.

⁵⁴ Ko daron nga maroka-jubbubbul renge drrav, ko jinibb nga ie nir ngavilvil arlesi wose Iesu, ko arini jin. Ko ni ololi nir elep arres luwi.

⁵⁵ Ko jinibb nir arwolu p̄etp̄eti renge vanu nen, ko arwosi nir nga marmesi renge maling ser vini jin renge ngabe nga ni milik e.

⁵⁶ Ko ngabe nga ni mian rengen, renge ngaim nga welili rreknga ngaim nga milep, arwosi nir nga marmesi van renge maket nir, ko arngoni tevi nga poro bbong parjipari bongsi sunsun sen. Ko nir jijle nga marjipari arres luwi.

Jinibb nga marlelep renge m̄eri Isrel nir arlolarsi Iesu suri sete mutori murru vanu ser

7

¹ Parasi nir ko jinibb nevisvisenien ne nale neseseien arivel renge Jerusalem e vini, arini arlik korti ji Iesu.

² Ko nir arlesi nga jinibb sen nir nevrer arrokkitki nga marurro niv, sete arjevavöl.

³ Parasi ko m̄eri Isrel nir artori murrun ne jejavölen se b̄irterwarreng ser nir eterter. Poro sete parjevavöl, ko ngok sete paraan.

⁴ Ko poro parlulwi renge maket vini, ko poro sete parjevavöl ko ngok sete arongwos paraan. Ko nanu elep kele nga martori mirpok, renge marrawe biles minminen ko sospen ko besin ko maling.

⁵ Ko Parasi nen nir ko jinibb ne nevisvisenien ne nale neseseien nen nir arsusi tevi ni, arwera “Erpese nga nik jinibb

som nir sete marvijuri murru b̄irterawarreng se kerr nir nga tuwi, ko marurroi niv tevi nevrer nga marrokkitki?”

⁶ Ko ni owrai tevir, owra “Aesea owrai erres kemkam̄e suri kami sel se kami eru, nga muwrai mirpel, muwra ‘Lartul ngel nir arosuri inu tevi nevlu jingor kobbong, ko nolor oto ngasue inu.

⁷ Arloto nawone inu. Arvisviseni nevisvisenien nga mivi se jinibb bbong.’

⁸ Erpok ko, kami kamlinglingi kurtweni neseseien se Atua, ko kamtori murrun ne rijen se jinibb kobbong nir eterter.”

⁹ Ko ni owrai kele tevir, “Kami kamlinglingi kurtweni jerjere nale neseseien se Atua, ko kamwera kaptori murrun ne rijen se kami.

¹⁰ Suri Moses owra ‘Kuprorrmi lilane tata som ko tasu som. Mer nga m̄irij m̄isij tevi tata sen rreknga tasu sen sete orongwos pimaur, kaprevji pini ko wor.’

¹¹ Ko kami vajin kamwera ‘Poro nanu san nga moro jinibb san p̄ilai tevi tata sen rreknga tasu sen, ko puwra “Ejki, nanu ngel on, ko evi se Atua,”

¹² ko kami kamwera “Ejki, erres kobbong, setemun mia-lai nanu nen tevi tata sen rreknga tasu sen.”

¹³ Kamlinglingi kurtweni nale se Atua evi nanu nawon, suri kamtori murrun ne rijen se kami. Ko nanu elep kele nga marirpok nir kamok-p̄elak kamok-lolir.”

Nanu nga marloli jinibb murro renge no Atua

¹⁴ Ko ni everus kele delung nir arini jin, ko owrai tevir owra “Kapmurrarronge inu p̄irres ko kaprunge nanu nga bowrai ngel:

¹⁵ Sete nanu san nga mivel vare e van renge nolo jinibb ololi orro, ejki. Ko nanu

nga marpelari ko ma renge nolo jinibb arivi nanu nga marloli jinibb murro.

¹⁶ [Poro kami san boron otoo ko purnge re nolo boron!]"^C

¹⁷ Ko ni evel lingi delung nir ko evini renge loloim e; ko jinibb sen nir arini jin ko arsuji rongonge nale nen tevi ni.

¹⁸ Ko ni owrai tevi nir owra "Kami kele kamlengle kamirpe nir? Sete kamrong- wose nga nanu nga mível vare van renge nolo jinibb e sete orongwos puloli purro.

¹⁹ Suri sete evan renge nolon, ko evan renge depain kobbong, ko easi tweni." Owrai erpok nga nanen jikle arres kobbong, sete arongwos parwer ore nanen san puon nga jinibb sete purroi.

²⁰ Ko ni owra kele, "Nanu nga ma mivare ko renge nolo jinibb vini, ngok ko ma ololi jinibb orro rengen.

²¹⁻²² Suri renge nolo jinibb ko nanu ngel nir marpelari, ko norrorrmien nga marsij marivare: Arvevna, arevji pini jinibb, arkerkeris, arwer lokloksi jinibb, arij melmelas ko arsope Atua, nolor emrremrreni nanu nir, nolor eleplep, ar- loli murru lenglengen ser, arloli nolor nga mian mare pelak. Ko nesevin arloli murrur nga martori joror nir nga sete mar- momsawos re mete jinibb nir; ko norman ean ji nesevin nga sete evi nesen sen, ko nesevin ean ji norman nga sete evi diwen sen. Ko arloli murrun karkar lele nir nga marsij nir.

²³ Nanu nga marsij ngel nir arpelpelari renge nolo jinibb vini vare e, ko nir ko arloli jinibb orro."

Nesenwarreng san, Iesu oji tweni demij rengen eivare

²⁴ Mian ko Iesu evel lingi ie, ko evan renge ngaim nga muto mori Taea san. Ko evan renge loloim nen san, ko sete emrreni san purongwose; owra pisan pilik. Ko ejki rres nawon, sete orongwos piteptepi.

²⁵ Ko nesenwarreng san, nesevin san natun, nemin nga misij san esisilvi. Ko nesevin nga natun nen ornge nga Iesu milik ie; ko esaro ngavilil van jin, ko evan ejpa van ngatan renge belan.

²⁶ Vinnen evi nesevin ne vare san, ko eak renge Ponisia, ngaim nga welili ne Siria san. Ko ongoni tevi Iesu nga puoji tweni nemin nga misij nen nga misisilvi natun nen, pivare lingi.

²⁷ Ko ni owrai tevi vinnen owra "Nan- warreng paraan parup puwomu, suri sete erres nga parla nanen se bipiwarreng ko parsor tweni tevi guli." Ni ewir nale ngok mirpok ngok suri tetajer meri Isrel nir arok-wera "guli" e jinibb ne vare nir.

²⁸ Ko vin nga otuw lweni nale tevi, owra "Erpok ko Numal, ko guli ngok nir

nga marmatur renge melve tep ngok nir arok-urrurroi bebje nanen se bipiwarreng sapon!"

²⁹ Ko ni owrai tevi vinnen owra "Suri kumwera mirpok, ko kupluwi suri sel som, kupiel. Nemnin nga misij nen eivare pa lingi natum."

³⁰ Ko daron nga vin nga mulwi vini renge naim sen e, ko elesi nga nemin nga misij eivare lingi pa natun osuw, ko natun erres vajin ematur renge maling.

Iesu ololi jinibb san nga boron muwon- won ko nemen mikel erres luwi

³¹ Iesu evel lingi kele Taea ko olwi, ekalie otvi renge Saeton e, evel rrrungi renge livö ne Ngaim Esngavöl, olwi vini renge nuwito ne Galili.

³² Ko jinibb sopor arpitevi jinibb san nga mivi borwon ko nemen mikel vini jin. Ko nir arngoni tevi ni nga ni pilngi nevren renge mernen ko puloli ni pirres luwi.

³³ Ko Iesu eptevi tweni mernen lingi delung nir, ko nuru kis orsan ortur talev. Ko ni ojongroni bbös nevren renge nolo boro mernen, musuw ko evrae kele ni luwi wor nevren ko ejpari mernen nemen e.

³⁴ Musuw, ko eleng raji meten oklu emteni melrin, ko engavsi ko owra "Epata", nga muwra mirpel, "Borom piap, ko nemem pimtarup!"

³⁵ Ko mernen boron eap ko ornguruge nanu vajin, ko nanu nga misre totoni nemen emtarup lingi; ko ni erij vajin erres.

³⁶ Ko Iesu ewer orer nga nir sete par- werwai nanu ngel tevi jinibb pisan pijki, ewer ore lenglengen e nir wor rengen. Ko nir armerreni lenglene wor parwowrai, ko arwowrai tweni; arsupupe vajin elep lengle.

³⁷ Bbösa nga milep elair ko arwera "Aro, ni ololi nanu elep arres, ololi kele borwon ngel kele nga nemen mikel ngel erres luwi."

8

Iesu ela nanen tevi jinibb evi nuvas- ngavöl vavij (4000)

¹ Renge nabong nen nir, delung elep nga elep armot rrare Iesu; ko nanu san ejki nga parurroi. Ko Iesu everus jinibb sen nir arini jin ko owrai tevir owra

² "Nurrorrmi lenglengen e delung ngel nir elep, suri arlik tevik nabong itul le pa, ko sete artori jere mun nanu san nga parurroi.

³ Ko poro bokoni twenir re nga numer miajir mirpok, ko tara-maob renge sel, suri nir sapon arivel wor ngasu ko vini."

⁴ Ko jinibb sen nir arwerai lweni tevi ni arwera "Po! Nabla niv ngabe le nga

pitvere lartul ngel nir parurroi parup e? Suri iel evi lolo merwer le!"

⁵ Ko ni osusi tevi nir owra "Ko kami kamtori niv evis?" Ko nir arwera lweni tevi ni arwera "Mmmm...ebut bbölbölbö lebbong!"

⁶ Ko ni owrai tevi delung nir owra parlik ngatan renge dan, ko ni ela niv nga ebut nga nir, ko olot owra erres tevi Atua surir. Ko otpoir ko elair tevi jinibb sen nir, ko jinibb sen nir arselsaler van ji jinibb nir.

⁷ Ko nir artori nai nga wowarrencng sopor, ko ni erij erres kele suri nai nga nir, ko owrai tevi nir parselsaler kele van ji jinibb nir.

⁸ Ko nir jile arurroi, ko arup. Ko arsersere lululweni bebjen nga marjipon van renge narr ebut arwun saut.

⁹ Nir totoklai nga marurroi ejpari nuvasngavöl vavij (4000) sapon. Ko ni okoni twenir arivel.

¹⁰ Ko esaro ngavilvil esa renge drrav tevi jinibb sen nir, aran devjen e renge Dalmanuta e.

Parasi sopor armerreni parlesi nelesien pisan

¹¹ Ko Parasi sopor arini ji ni, arwera parrowrrowe ni; arsusi kerkerasi tevi ni, armerreni parlesi nelesien ne melrin san nga ni pulöli.

¹² Ko Iesu engavsi lenglengen e ko owra "Erpese dul ngel nir arpej nelesien? Nuwretun nga nuwretun lengleng nuwrai tevi kami, sete mara-lai nelesien san tevi dul ngel nir."

¹³ Ko ni evel lingir ean kele esa renge drrav aran renge devje nuwito e.

Iesu osur terter tevi jinibb sen nir suri norrorrmien ser sete otoe

¹⁴ Nir armalie parla nanen sapon nga partor mas e, artotori suri bbong niv sansan bbölbölbö renge drrav.

¹⁵ Ko Iesu osur terter tevir owra "Kap-kulkulu metmet p̄irres renge is ne Parasi ko is ne Erot, tulokloksi kami."

¹⁶ Ko nir arwerwera lululweni tevir arwera "Suri kerr sete rramtori niv te, niko muwrai mirpok ngok."

¹⁷ Iesu orongwose norrorrmien ser ko owrai tevir, "Kamok-werwera lululweni kami e sev ko? Suri sev norrorrmien se kami oto re niv bbong, ko sete kamlesi wose, ko sete kamrongwose? Norrorrmien se kami sete otoe?"

¹⁸ Mete kami otoe pa, ko sete kamlesi? Boro kami otoe pa, ko sete kamrunge e?

¹⁹ Renge wosenen nga inu motpoi otvi niv elim tevi nir nuvasngavöl nuvalim, ko kami kamsersere lululweni bebjen nga

marjipon van renge narr evis nga marwun saute?" Ko nir arwera "Esngavöl drromon eru."

²⁰ "Ko renge niv nga ebut nga m̄elai tevi nir nuvasngavöl vavij, kami kamsersere lululweni bebjen van renge narr evis arwun saute?" Ko nir arwera "Ebut."

²¹ Ko ni owra lweni tevir owra "Ko ngok kami setewor kamrongwose derteren suk?"

Iesu ololi jinibb nga meten murrorr san erres luwi renge Betsaeta

²² Iesu ko jinibb sen nir arini renge Betsaeta, ko jinibb sopor arpitevi jinibb san nga meten murrorr vini ji Iesu, ko argoni ni nga ni p̄ilngi nevren renge m̄ernen.

²³ Ko ni orull totkoni metrroren nevren ko eptevi tweni renge ngaim van vare e, ko evrae meten e nolton ko elngi nevren nuru rengen. Ko osusi tevi ni owra "Kuleslesi nanu san?"

²⁴ Ko ni okluklu emteni rrale ni, ko owra "Nulesi jinibb nir, nulesir arirpe duru nai arivel."

²⁵ Ko Iesu elngi kele nevren nuru renge mete metrroren nen nuru, ko metrroren emet teretre oklu luwi erres vajin, emteni nanu jijle arres.

²⁶ Ko Iesu owrai tevi ni owra "Kupluwi ko pa van renge naim som e, setemun kupiel limjer re ngaim," ko okoni tweni.

Pita owra tweni nga Iesu evi Kristo

²⁷ Iesu nir jinibb sen nir arivel aran renge ngaim jile ne Sisaria Pilipae nir. Ko renge sel ni osusi tevi jinibb sen nir, owrai tevir, "Jinibb nir arwera inu nuvi isi?"

²⁸ Ko nir arwerai tevi ni, "Sopor arwera Jon Baptaes, ko sopor arwera Elaeja, ko sopor arwera propet san."

²⁹ Ko ni osusi tevi nir kele, "Ko kami, kamwera inu nuvi isi?" Pita owra lweni tevi ni, "Nik kivi Mesaea nen ko, nga namok-tirive."

³⁰ Ko Iesu ewer orer owra "Sete kapwerwera tevi jinibb pisan, pijki."

Iesu owowrai wowomue tevi jinibb sen nir nga ni pimij ko pia-maur luwi kele renge mijen.

³¹ Iesu etipatun evisviseni jinibb sen nir, owrai tevir nga ni Jinibb Mawos purnge wor p̄isij ko renge nanu pilep lengleng. Ko firterawarrencng ko batu jinibb ne sulsulen nir ko jinibb nevisvisenien ne nale nesereien nir parungasi ni, ko parevji pini. Ko nabong p̄itul ko pimaaur luwi.

³² Ni owrai tweni nale ngel limjer, ko niko Pita eptevi taleve ni ko erij terter tevi ko ewer ore ni.

³³ Ko ni erieni emteni jinibb sen nir, ko otortori Pita ewer ore owra “Kupini renge durek e, nik Demij! Suri nik sete kurrormi nanu nga marivi se Atua, kurrormi nanu nga marivi se jinibb bbong.”

Jinibb se Iesu pimali wor ni lweni

³⁴ Ko Iesu everus jinibb sen nir ko delung nir vini jin, ko owrai tevir owra “Poro jinibb san puwra pivijurik, ni putor ore nanu nga ni bbong mimrreni, ko puwosi nai pelaot sen ko pivijurik.

³⁵ Poro san puwra putor totoni mauren sen, mian ko pia-tor jabble; ko poro nga san pimaronge mauren sen suri mivijuri inu ko suri nospen nga mürres, ko mian ko pia-lai vajin mauren nga mürres.

³⁶ Poro jinibb pisan pilai petpeti nanu ne iel ngatan ngel nir, ko putor jabble mauren sen pijijki, ko plesisi sev ko pirres rengen?

³⁷ Jinibb pila isev pikle lweni mauren sen e?

³⁸ Ko isi san poro pimanune inu ko nale suk renge dul nga muloli karkar nanu nga misij ngel, inu kele Jinibb Mawos bemanune ni renge daron nga bea-vini e renge nosrovien se Tata suk tevi anglo on nir.”

9

Iesu niben erieni enij kele e

¹ Ko ni owrai tevi nir owra “Nuwretun nuwrai tevi kami, kami sapon renge kami nga kamtur ngel setewor kapmij, ko kaplesi batun vanu se Atua pivini tevi derteren nen.”

² Nabong owwon asi osuw, vitunen ko Iesu etka Pita ko Jemes ko Jon arpitevi ni, nir kis arsan artongsa van renge botwen nga muwu van mare jer san. Maran mare vajin, ko ni niben erieni enij kele e renge nir nor.

³ Ko sunsun sen erinrin ow raprap titis lengleng; sete san renge iel ngatan orang-wos puloli kalek pisan puow raprap jipari.

⁴ Ko renge ie Elaeja ko Moses orpelari limjer jir ko orjiljilwer tevi ni.

⁵ Ko Pita owrai tevi Iesu owra “Numal, erres kem namlik pa iel! Kem nabloli gorkoraim pitul, san pivi se nik, ko san pivi se Moses, ko san pivi se Elaeja.”

⁶ Ni errerlreng nanu nga puwrai, suri metutuen nga milep elair, armetutu elep.

⁷ Ko mian ko nabor san esal vini ko esalsal ore iok; ko renge nabor nen drrelan san eplari rengen, owra “Ngel evi natuk nga memrreni, ko ngok kami kaprunge ni.”

⁸ Ngavilvilsen arienir arkulkulu pej; ko setemun arlesi san, ejki mun, Iesu kis vajin esan eptevi nir.

⁹ Ko mian ko renge daron nga marok-jubbul vajin renge botwen vini ngatan e, ko ni ewer orer nga sete parwowra nanu ngel nir nga marlesir ngel tevi jinibb pisan, pian pijpari daron nga Jinibb Mawos pimaaur luwi kele renge mijen.

¹⁰ Nir artori totoni nale nga muwrai tevi nir kis ngok, ko nir arsususi lululweni tevi nir, “Owra puwra sev ko nga muwra ‘pimaaur luwi kele renge mijen?’”

Nir arsupe suri Elaeja

¹¹ Ko nir arsususi tevi Iesu arwera “Jinibb nevisvisenien ne nale neseseien arsupe suri arwera Elaeja pivini ko wor puwomu.”

¹² Ko Iesu owra “Ewretun Elaeja pivini ko wor puwomu ko puloli nanu jikle parto pirres puwomu. Ko erpese le maruli suri Jinibb Mawos nga nolor pijebreni ni ko ni purnge pisij renge nanu pilep?”

¹³ Ko inu nuwretun nuwrai tevi kami, Elaeja evini pa osuw, ko nir arloli nanu nga marmerrreni tevi ni osorsan tevi nga maruli suri ni e.”

Iesu oji tweni demij san renge bipiwar-reng san

¹⁴ Ko daron nga marluwi vajin vini ji jinibb se Iesu e sopor nen nir, ko arlesi nga delung nga milep martur rraler, ko jinibb nevisvisenien ne nale neseseien marok-susi rongorngene nanu sapon tevir.

¹⁵ Ko ngavilvilsen daron nga delung markulu sweri ni ko bbösa nga milep elair e, ko arwolou ore aran jin.

¹⁶ Ko ni osusi tevi nir owra “Ko kami kamok-susi rongorngene sev ko tevi nir iok?”

¹⁷ Ko nir san nga renge delung ngok owrai tevi ni, “Numal, nuptevi natuk le ngel pivinuk jim. Nemiin nga misij esisilvi ko evi nabbut, sete erij.

¹⁸ Ko ngabe nga poro pipitevi van e ko evivivrrole ko osurrngoni temijpale, ko melabbsen eplari renge jingon, ko orrliw ko erivtet ko aji nisen. Ko nuwrai tevi jinibb som nir nga nir paroji tweni, ko sete arongwos parloli.”

¹⁹ Ko Iesu owrai tevir owra “Kami dul ngel sete kamosuri ko! Beptevi kami pijpari seveling? Bornege pisij suri kami pijpari seveling? Kaptekai ni pivini jik!”

²⁰ Ko nir arpitevi ni vini jin. Ko moka-lesi Iesu ko nemiin nga misij evivrrole mēr wel nen, ko ewajeni ngatan renge dan elilawij, melabbsen eplari renge jingon.

²¹ Ko Iesu osusi tevi tata se mēr wel nen owra “Seveling le pa nanu ngel mivini rengen?” Ko ni owra “Renge daron nga mivi malum bipi e ko.

²² Ko momori ok-wajeni van renge nabb ko renge nuwi, owra pok-tor pini. Ko poro

nga nik kuprorrmi kem, ko kurongwos kuploli nanu pisan, kupla se kem!”

²³ Iesu owrai tevi m̄nernen, “E, kuwrai kuwra ‘Poro nik kurongwos kuploli,’ ko sete oto iok ko. Oto wor re nik nosurien som ko. Suri poro kuposuri, ko nanu jijle armalum kobbong renge m̄er nga muosuri.”

²⁴ Ko tata se bipiwarreng esaro ngavilvilsen ekail owra “Nuosuri, kupla se inu nga sete mosuri!”

²⁵ Ko daron nga Iesu m̄ilesi delung marwolwolu vini korti, ko ewer ore nem̄in nga m̄isij, osur terter tevi ni owra “Nik nem̄in ne nabbut ko borwon, kupivare lingi ni, ko sete kupsilvi ni kele!”

²⁶ Ko nem̄in nga m̄isij ekail lengleng, ko evirvireni m̄er wel nen elep, ko esil ivare rengen. Ko m̄er wel nen erpe mimij pa, ololi jinibb elep arwera “O, emij pa!”

²⁷ Ko Iesu ervei nevren, ko esa raji imare, ko m̄er wel nen otur imare.

²⁸ Mian ko daron nga mivini vajin renge naim e, ko jinibb sen nir arsusi silveni tevi ni arwera “Erpe se nga kem sete namrongose naboji tweni?”

²⁹ Ko ni owra lweni tevir owra “Nem̄in nga mirpel ngel, eterter lenglengen nga pivate. Sansan kobbong, renge verusen.”

Iesu owra lweni kele tevir nga ni pimij ko wor

³⁰ Ko nir arivel lingi lat nen, ko arivel otvi renge vanu ne Galili. Ko Iesu sete emrreni nga san purongwose.

³¹ Ko ni evisviseni jinibb sen nir, owrai tevir owra “Jinibb Mawos partekai van renge nevre jinibb nir ko parevji pimij. Ko vitunen renge daron nga marevji mimij e ko nabong pitolin vajin, ko ni pia-maur luwi kele.”

³² Ko nir arrelenge nale nga muwrai ngok, ko armetutue nga parsusi lweni tevi ni.

Isi pivi jinibb nga milep jer nen renge nir

³³ Ko nir arini renge Kapaneam, ko aran arlik renge naim se Pita. Ko ni osusi tevi nir owra “Kami kamok-rij latlat lululweni kami renge sel ngok. Suri sev ko?”

³⁴ Ko nir armurrarrong, suri nir arok-rij latlat lululweni tevi nir renge sel suri isi pivi jinibb nga milep jer renge nir.

³⁵ Ko ni esakel ngatan ko everus jinibb sen nen nir esngavöl dromon eru arini jin. Ko owrai tevir, “Poro jinibb pisan puwra pivi jinibb nga milep jer nen, ko

ngok ni pia-ivi jinibb nga welili jer nen, pia-ivi jinibb ne majingen ser.”

³⁶ Ko ni etkai bipiwarreng nga welili san ko elngi elik renge liven renge nir, ko owosi esale renge nevren nuru ko owrai tevir owra

³⁷ “Isi nga pitkai bipiwarreng nga welili san nga mirpel ngel vini jin renge inu nisek, ko ngok erpe ni etkai inu ko pa. Ko isi nga m̄itkai inu, erpe sete etkai inu ko, ko etkai ni nga mukoni inu ko.”

M̄er nga sete m̄itre kerr; ni evi kerrkerr ko

³⁸ Ko Jon owrai tevi owra “Numal, namlesi jinibb san oji tweni demij renge nik nisek, ko namwer ore, suri nga ni sete evijuri kerr.”

³⁹ Ko Iesu owrai tevi nir owra “Sete kapwer ore ni. Suri sete jinibb san orongwos puloli majingen nga milep renge inu nisek ko putur imare vajin ko p̄irij p̄isij tevi inu.

⁴⁰ Mer nga sete m̄itre kerr, ni evi kerrkerr ko san.

⁴¹ Nuwretun nuwrai tevi kami, Isi nga p̄ilai b̄bong biles nuwi wel san tevi kami kapmini suri kami kamivi se inu Mesaea, m̄nernen setete mia-tor jabble nowlin.

Nanu nga marongwos parloli jinibb parjilaklak

⁴² “Ko isi san poro puloli bipiwarreng nga ngel nga muosurik ngel san pijilaklak, erres p̄elak poro m̄nernen parruloni nevöt nga milep temijjal san renge nowen ko parjuröni renge dis mot.

⁴³ Ko poro nevrem pulolim kupjilaklak, kuptai otvi; puloli p̄irres p̄elak nga kupasi van re mauren, p̄iasie nga nevrem korti nuru nga pulolim kupan renge lat ne ne-jijkien, renge nabb nga sete san orongwos pivsi pini.

⁴⁴ [Naulwij ne lat nen sete arongwos parmij ko nabb nen sete arongwos parvisi pini.]^D

⁴⁵ Ko poro belam pulolim kupjilaklak, kuptai otvi; puloli p̄irres p̄elak nga kupasi van re mauren, p̄iasie nga belam korti nuru nga pulolim kupan renge lat ne ne-jijkien, renge nabb nga sete san orongwos pivsi pini.

⁴⁶ [Naulwij ne lat nen sete arongwos parmij ko nabb nen sete arongwos parvisi pini.]^E

⁴⁷ Ko poro metem pulolim kupjilaklak, kupwirr tweni; puloli p̄irres rengen nga kupsilvi batun vanu se Atua tevi metem pisansan, p̄iasie nga metem korti nuru nga

^D 9:44 Nale nga muto re nolo [], rrek sete Mak oli, ko jinibb san ea-ului vitue daron nga muli tweni kopi san ne naul ngel. ^E 9:46 Nale nga muto re nolo [], rrek sete Mak oli, ko jinibb san ea-ului vitue daron nga muli tweni kopi san ne naul ngel.

pulolim kupan renge lat ne nejjikien renge nabb nga sete san orongwos pivsi pini.

⁴⁸ Naulwij ne lat nen sete arongwos parmij ko nabb nen sete arongwos parvisi pini.

⁴⁹ Jinibb jijle Atua purrowrrow nir renge nabb, pusorsan tevi marsuli lesi nevõt mot.^F Poro nga m̄isij, ko nabb p̄iani pivi niavin. Ko poro nga m̄irres, sete nabb orongwos p̄iani lokloksi. Erpok kele marlingi sol renge nanen nga parunge lesi dilten, dilten erres, rreknaga esij.

⁵⁰ Sol erres, ko poro nga sol dilten nga mimelmel pusuw rengen, ko parloli pigimelmel luwi pirpese? Kaptori sol renge nolo kami, ko kaploli demat tevi kami sisamis luwi."

10

Iesu erij tevir owra sete erres jinibb p̄ilinglingi kurtweni nesevin sen

¹ Ko Iesu otur imare evel lingi lat nen, ko evini renge vanu ne Jutia renge devjen nga muto roroni van renge Jortan e. Ko delung elep kele arini korti jin, ko ni evisvisenir kele erpe nga momori mok-loli pa.

² Ko renge ie Parasi sopor arini jin arwera parrowrowe ni. Ko arsusi tevi ni arwera "Erpese, renge nale nesereien evi nanu nga m̄irres nga jinibb p̄ilinglingi kurtweni nesevin sen?"

³ Ko ni owrai lweni tevir owra "Ko Moses owra sev ko tevi kami?"

⁴ Ko nir arwera lweni tevi ni arwera "Moses owra jinibb puli naul nga pukur tweni nesevin sen ko p̄ilai tevi, ko p̄ilingi kurtweni vajin."

⁵ Ko Iesu owrai lweni tevir, "Suri nolo kami nga m̄iterter ko, niko muloli Moses muli nale nesereien ngel nga puwomue kami.

⁶ Ko renge womu jer m̄itipatun, Atua ololi iel ngatan ko nanu jile, ko 'ololi jinibb eru, norman san ko nesevin san.

⁷ Ko ngok niko suri mirpel ngel ko, norman pivel lingi tata sen ko tasu sen, pian vajin pipitevi nesevin sen.

⁸ Nuru nga eru ngok porivi vajin niben sansan ko metka sansan.' Ko ngok niko nuru setemun orivi eru, ko orivi vajin niben sansan ko metka sansan.

⁹ Sev nga Atua mijipteni kortoni nuru, sete erres jinibb san p̄ila tweni kele."

¹⁰ Daron nga marlik vajin loloim ko jinibb sen nir arsusi lweni kele nanu nga tevi ni.

¹¹ Ko ni owrai tevir, "Poro isi san p̄ilingi kurtweni nesen sen ko p̄ilesi kele nesevin m̄inij kele san, ngok olokloksi lenglengen e

nesevin sen nga womu, ololi butterter sen tevi.

¹² Ko poro nesevin p̄ilingi kurtweni diwen sen p̄ilik kele ji jinibb m̄inij san, ni kele ololi kobbong erpok, olokloksi diwen sen."

Iesu erij erres suri bipiwarreng nir

¹³ Ko jinibb sopor arpitevi bipiwarreng sopor vini ji Iesu nga ni p̄ilingi nevren renger. Ko jinibb sen nir artortori nir nga marpitevi nir vini.

¹⁴ Ko daron nga Iesu m̄ilesi e ko ololar lengleng, ko owrai tevir, "Kaplinglingi bipiwarreng parini jik, sete kapwer orer te. Suri batun vanu se Atua evi se nir nga nolor marirpe bipiwarreng ngok nir.

¹⁵ Nuwretun nuwrai tevi kami, m̄ier nga sete puloli nolon pivini pirpe bipiwarreng, ni sete orongwos pia-van renge batun vanu se Atua."

¹⁶ Ko ni erake totoni bipiwarreng nen nir, ko elngi nevren renger, ko erij erres surir.

Jinibb nga joron milep san emrreni p̄ila mauren nga sete pusuw

¹⁷ Ko daron nga mivel suri sel, ko jinibb san owlu van

jin, ko ejipa jin ngatan, ko osusi tevi ni owra "Numal nga m̄irres, inu bololi sev, ko belai mauren nga muto tuwi ngok vini?"

¹⁸ Ko Iesu owrai tevi m̄iernen owra "Erpese nga nik kumwera inu nurres? Sete san erres, Atua kobbong esan.

¹⁹ Nik kurongwos pa nale nesereien se Atua, 'Sete kuprevji pini jinibb, sete kupvevna, ko sete kupkerasi san kupvena, ko sete kupvena nesevin, sete kupkerkeris, kuposuri tata som ko tasu som nuru p̄irres."

²⁰ Ko m̄iernen owra lweni tevi Iesu, "O numal, nanu ngel nir nulolir pa renge daron nga mevi nanwarreng malum e ko, mivini mijpari lelingen ngel."

²¹ Ko Iesu oklu emteni, ko emrreni elep ko owrai tevi ni, "Nanu sansan kobbong setewor kuloli. Kupan kupwulwule jorom nir ko kuplai nowlir tevi beres nir. Ko nik nowlim puto renge melrin. Ko nik kupini vajin kupvijurik."

²² Ko ni non eta dan e Iesu muwrai mirpok, ko evel, ornge lengleng esij. Suri ni evi jinibb nga joron milep.

Evi nanu nga m̄iterter renge jinibb nga joron milep pian renge batun vanu se Atua

²³ Iesu erieni oklu emteni jinibb sen nir, ko owrai tevir, "Evi nanu nga m̄iterter milep san renge nir nga joror milep paran renge batun vanu se Atua."

^F 9:49 Erpe iel, Mak ospe sol, ko namlingi nevõt mot nga puloli mining ne nale sen piplari pinirer.

²⁴ Ko nale sen ngok nir bbösa ela jinibb sen e nir, ko arperper nawon. Ko Iesu owrai suri lweni kele tevir owra "Nanwar-reng nir, evi nanu nga miterter milep nga san pian renga batun vanu se Atua.

²⁵ Erpe nato, arperper temijpal renga liwen pietiv. Ko nga jinibb nga joron milep pisil asi van renga batun vanu se Atua eterter temijpal wor asie ngok."G

²⁶ Jinibb sen nir arong wonwon nawone nale ngok, bbösa nga milep elair e. Ko arwerwera lululweni tevi nir lweni, "Po! Ko ngok isi le ma orongwos pian renga mauren?"

²⁷ Iesu emtenir ko owrai tevir, "Renge jinibb evi nanu nga miterter. Ko renga Atua ejki, suri nanu jikle armalum kobbong renga Atua."

²⁸ Ko Pita etipatun owrai tevi ni, "E, kuplesi kem namlinglingi nanu ngok jile pa nir ko namvijurim vajin."

²⁹ Iesu erij weli lweni owra "Nuwretun nuwrai tevi kami, sete jinibb san nga mivel lingi naim sen rreknga tuwan nir ko tasin nir, rreknga jokin nir rreknga tata sen rreknga tasu sen, rreknga natun nir rreknga vanu sen suri inu marongen suk ko nospen nga mirres, puwra sete orongwos pila weli nanu nga mivel lingir ngok nir, ejki,

³⁰ miernen pila weli pungut ko wor renga daron nga lelingen ngel pivses nir sisamis luwi, metka sen nir ko tuwan tevi tasin nir, ko jokin nir ko tasu sen nir ko natun nir ko vanu sen nir. Ko jinibb parloli pisij tevi suri nga muosuri Atua. Ko vitunen vajin pia-lai mauren nga muto tuwi ngok vini.

³¹ Ko jinibb elep nga lelingenok marwowomu, mian ko parvivitu vajin. Ko elep nga lelingenok marvivitu mian ko parwowomu vajin."

Iesu owra lweni kele nga mian ko ni pimij

³² Nir arusri sel artongsa van renga Jerusalem e. Ko Iesu ewit ko owowomue nir ie, ko jinibb sen nir bbösa elair e nga mimawose Jerusalem mirpok, ko jinibb nga marvijurir armetutu. Ko ni eptevi tweni jinibb sen esngavöl dromon eru, ko ospe suri nanu nga para-pelari renga ni tevi nir.

³³ Owra "Kaplesi, rrapotongsa le pa van renga Jerusalem. Ko partekai inu Jinibb Mawos van ji batun numal ne sulsulen nir ko jinibb nevisisenien ne nale neseseien nir. Ko nir parwera erres renga bemij, ko partekai inu van ji jinibb ne vare nir.

³⁴ Ko nir parsopsope inu, ko parverae noltor e inu, ko parvirrvirrali inu, ko

parevji pini inu. Ko vitunen renga nabong pitolin ko inu bemaure luwi kele."

Jemes ko Jon orngoni nanu san tevi Iesu

³⁵ Jemes ko Jon, Sepeti natun nuru, orini ji Iesu ko orwerai tevi ni, "Numal, komru nomor-marong nga nik kuploli tevi komru sev nga nobor-ngoni tevi nik."

³⁶ Ko ni owra lweni tevi nuru, "Kamru komor-rongwose nga inu bololi sev le tevi kamru?"

³⁷ Ko nuru orwera lweni tevi ni, "Komru nomor-marong nga nik kuploli komru tuwen pisakel renga nevremer rres, ko komru tuwen pisakel renga nevremer mair, renga daron ne nosrovien som."

³⁸ Ko Iesu owrai tevi nuru, "Kamru sete komor-rongwose sev nga komor-ngoni. Kamru komor-viter kopor-minmin renga biles ne norongen nga misij nga inu be-minmin rengen? Rreknga komor-rongwos kopor-paptaes renga baptaesen ne norongen nga misij nga inu bepaptaes rengen?"

³⁹ Ko nuru orwerai lweni tevi ni, "O-o, nomor-viter." Ko Iesu owrai tevi nuru, "Biles nga inu beminmin rengen, kamru kele kopor-minmin rengen. Ko baptaesen nga inu bepaptaes rengen, kamru kele kopor-paptaes rengen.

⁴⁰ Ko nga kopor-sakel renga inu nevremer rres ko renga nevremer mair sete evi nga inu belai, evi se nir bbong nga Atua muloli terai nir e ko."

Nanu nga muloli jinibb mian mare weretunen

⁴¹ Ko daron nga jinibb sen esngavöl marunge, ko arlolarsi lenglengen e Jemes ko Jon.

⁴² Iesu everus nir vini jin, ko owrai tevir, "Kami kamrongwos pae murru jinibb nga marwera marivi numal nga marwowomu renga jinibb ne vare. Nir arwerorer eterter ko arrowrowe derteren ser renger.

⁴³ Ko kami sete kapirpok. Mer nga mimarong pivi jinibb nga milep renga kami, ni pivi jinibb ne majingen se kami ko wor.

⁴⁴ Mer nga pimarong pivi jinibb nga puwomu renga kami, ni pivi demij maur se kami jile ko wor.

⁴⁵ Ngok nuwretun, inu Jinibb Mawos kele sete nuvini nga jinibb parmajing suk, ejki. Ko nuvini ma nga bemajing se jinibb nir, ko belai mauren suk pivi nowli jinibb pilep, ko bojri lwenir e."

Iesu ololi Batimeas meten oklu elesi vajin nanu nir

⁴⁶ Ko nir aran Jeriko. Ko daron nga nir jinibb se Iesu marivel lingi Jeriko e, ko delung nga milep arvijurir. Ko Batimeas nga meten murrorr nga mok-ngun-ngun res, natu Timeas, elik reнге roro sel.

⁴⁷ Ko daron nga ni murnge Iesu ne doNasret miasia, ko ekail van owra "Iesu nik metka se Devet, kuprrorrmi inu!"

⁴⁸ Ko jinibb elep arkail ore ni, arwera ni pipërper; ko ni ekail temijpal kele ko owra 'Nik metka se Devet, kuprrorrmi inu!"

⁴⁹ Ko Iesu otur murrong, ko owra "Kapverus ni vini." Ko nir arveruse metrrorr arwera tevi "Nolom pian ngatan, kupmera! Everus nik."

⁵⁰ Ko ni ewirr tweni sunsun ne melas sen, ko otur imare kasi ko evan ji Iesu.

⁵¹ Ko Iesu osusi lweni tevi metrrorr owra "Nik kumarong inu bololi sev tevi nik?" Ko metrrorr owrai tevi ni, "Numal, numarong boklu."

⁵² Ko Iesu owrai tevi ni, "Kupiel suri sel som ko wor. Nosurien som ololim kumrres." Ko ngavilvil meten oklu luwi evesane, ko evijuri suri ni reнге sel.

11

Iesu evan reнге Jerusalem, ko jinibb artori ni mare

¹ Daron nga nir marini mori reнге Jerusalem e reнге Betpas ko Betani reнге botwen ne lolnai ne olip, ko ni okoni tweni jinibb sen eru.

² Owrai tevi nuru, "Kopor-mawos reнге ngaim nga muto roroni no kamru ngok, ko kopor-lesi natu dongki san niko eati nga jinibb san setewor esakel rrongvi reнге. Kopor-telasi no kopor-ile vini.

³ Ko poro jinibb pisan puwrai tevi kamru, 'Erpese komor-loli mirpel?' Ko kopor-wera, 'Numal emrreni wor, ko sete mia-periv ko pia-lingi lweni.' "

⁴ Ka nuru orivel lingi, oran ko orlesi natu dongki nga miati mori reнге roro metali vare reнге sel, ko ortelasi.

⁵ Ko jinibb sopor nga martur ie arwera tevi nuru, "Komor-telasi dali natu dongki ngok suri sev?"

⁶ Ko nuru orwera lweni tevir erpe nga Iesu muwrai, ko nir arlinglingi nuru orivel.

⁷ Ko nuru orile natu dongki van ji Iesu; ko orpelseni sunsun se nuru reнге, ko ni esakel reнге.

⁸ Ko nir elep arpelseni sunsun ser reнге sel, ko nir sopor arta nablasi nini ko rengsi nai tei raor ko arpelsenir reнге sel.

⁹ Ko jinibb nga marwowomu ko jinibb nga marvivotu suri arkail arwera "Osana! Numal Atua, nik kurij pa erres tevi ni nga mivini reнге nik nisem.

¹⁰ Neiren reнге Batun Vanu nga mivini, batun vanu se tata se kerr Devet. Osana van ji Atua ne drromsen mare!"

¹¹ Musuw ko Iesu evan reнге Jerusalem ko evan reнге Naim On se Atua, ko onunri nanu jille nga maro rrale. Ko nat erivriv vajin, ko ni eptevi jinibb sen esngavöl drromon eru ko arluwi van reнге Betani e.

Nai san nga wenen mijki reнге

¹² Ko reнге mevinen vajin daron nga marivel lingi Betani e, ko numer aji Iesu.

¹³ Ko ni elesi nai pik san otur iokwan, etavös luwi pa, raon otoa. Ko evan mori reнге, owra poro ðilesi wenen putoe. Ko moro mivini reнге ko sete elesi nanu san reнге, raon kiskis bbong, suri setewor evi daron nga piwen e.

¹⁴ Ko Iesu erij, owrai tevi, "Setemun jinibb san purro kele wenen, reнге lelingen ngel ko pa ko tuwi ngok vini."

Iesu oji tweni jinibb nga marwulwule joror reнге Naim On se Atua

¹⁵ Nir arini reнге Jerusalem. Ko Iesu evan lolaim reнге Naim On se Atua ko oji tweni lartul nga marwulwule nijor reнге Naim On ko lartul nga marwulwulir, ko evatpuse tep se nir nga markelkele nevöt ko nai seksakel se nir nga marwulwule wumner nir.

¹⁶ Ko ewer ore jinibb nir, sete san puwosi nanu pisan pikali otvi reнге live laut ne Naim On e.

¹⁷ Ko ni evisviseni nir owrai tevir, "San oli owra 'Naim suk pivi naim ne verusen se jinibb ne vanu nga musuw ngok.' Ko kami kamtur imare vajin ko kamlioli evi 'naim ne venao res'!"

¹⁸ Daron nga batu jinibb ne sulsulen nir ko jinibb nevisvisenien ne nale neseseien nir marunge e, ko arkulkulu pej sel san nga parevji pini ni reнге. Ko armetutu parrul re ni, suri reнге nevisvisenien sen delung jile bbösa elair e.

¹⁹ Ko reнге nat nga mirivriv mivini e ko ni evel lingi ngaim nga milep nen.

Nai pik ngok eviseni derteren ne nosurien

²⁰ Ko moro mevinen reнге rorpong marvijuri sel marasi reнге lat nen, ko arlesi nai pik nga mukur reнге drromon ko mijpari reнге laþen ngatan.

²¹ Ko Pita orrorrmi jipari nga Iesu mïrij tevi nai nen, ko owrai tevi ni, "Jinibb nevisvisenien, kuplesi nai pik nga nik kumsur terter tevi nga, okur jile."

²² Ko Iesu erij owra lweni tevi nir, "Kaplingi nosurien se kami reнге Atua.

²³ Nuwretun nuwrai tevi kami, Isi san poro puwrai tevi botwen ngel, 'Kupruj

ngasu iok, kupwirr van ngalu e renge dis e, ko sete norrrmien sen pieru e, ko puosuri sev nga muwrai ngok, ko niko nanu nen piplari ko pusorsan tevi nga muwrai.

²⁴ Niko nuwrai tevi kami, Nanu jile nga kami kamngoni renge kamlot, kaposuri ko wor nga kami kaplair, ko kaplair ko vajin.

²⁵ Ko poro nolo kami p̄isij tevi jinibb pisan, ko renge daron nga kami kamtur e nga kaplot, kaptelasi tweni ni. Ko ngok Tata se kami nga m̄ilik renge melrin p̄itlasi tweni nololien se kami.

²⁶ [Ko poro nga kami sete kamtelasi nololien se kami, ko Tata se kami nga m̄ilik re melrin ni kele sete p̄itlasi nololien se kami.]^H

Jinibb nga marwowomu renge m̄eri Isrel nir arsusi nanu san tevi Iesu

²⁷ Ko nir arluwi kele vini renge Jerusalem e. Ko daron nga Iesu mok-tutur suri loloim ne Naim On e, ko batu jinibb ne sulsulen nir ko jinibb nevisvisenien ne nale neseseien nir ko b̄irterawarrens nir arini jin.

²⁸ Ko arwerai tevi ni, “Renge derteren sev nga nik kumloli nanu ngel nir, rreknga isi elai derteren ngel tevim nga kuploli nanu ngel e nir rengen?”

²⁹ Ko Iesu owrai tevi nir, “Inu bosusi kami mun e nale san nile, ko poro kapwera lweni tevik, ko inu bea-wera lweni tevi kami nga renge derteren sev nga inu mololi nanu ngel nir rengen.

³⁰ Baptaesen se Jon evel renge melrin vini, rreknga evel renge jinibb vini? Kapwerai ta tevik.”

³¹ Nir arwerwera lululweni tevir arwera “Poro rrapwera ‘Evel renge melrin vini,’ ko ni puwra ‘Ko erpese sete kami kamosuri ni?’

³² Ko poro rrapwera ‘Renge jinibb,’ ko iok p̄isij re kerr.” Suri armetutue delung nir, suri nir jile artori Jon evi propet weretunen.

³³ Mian ko arwera lweni tevi Iesu, “Ia, sete namrongwose.” Ko Iesu owrai tevi nir, “Ko inu kele sete numa-werai tevi kami renge derteren sev le nga inu mololi nanu ngel nir rengen.”

12

Jinibb nga marsij nga marmetmete naut se numal

¹ Iesu owra nale rrongrongvi san tevi jinibb nir, owra “Jinibb san orwi naut ne grep san, ko osi rrale nalut rengen. Ko eli b̄bulwil san renge lat nen nga jinibb

parivel renge grep nir ko suwer p̄iseser van rengen. Ko eli naim san nga muwu mare nga parsa ren ko parkulkulu metmet p̄irres. Ko elai naut nen tevi jinibb sopor nga parmajing rengen, ko ni evel van renge ngaim m̄inij e san.

² Mian ko mijpari renge daron mawos nen vajin nga partawe wenen e, ko ni okoni jinibb ne majingen sen san van ji jinibb nga marmetmete naut nga, p̄ilai wenen sopor jir.

³ Ko nir arrul re totoni ni, ko arvirrvirrali, ko arkoni tweni evel kiskis olwi.

⁴ Ko ni okoni kele jinibb sen m̄inij nen san evan jir; ko nir arla nevöt ko artuwe rrrurugi batun e, ko arloli esij elep tevi, ko arkoni tweni olwi.

⁵ Ko ni okoni kele jinibb sen m̄inij nen san, ko m̄ernen arevji pini emij. Ko nir elep

kele wor nga mukonir van jir, nir sopon arvirrvirralir, ko nir sopor arevji pinir armij.

⁶ Ko sansan bbölbööl vajin ojon jer, natun nga mimrreni temijpal nen e. Ni okoni vivitu jere evan jir, owra ‘Nir rreknga parosuri natuk le.’

⁷ “Ko jinibb nga marmetmete naut nen daron nga marlesi, ko arwerwera lululweni tevi nir, ‘Ngok, natun mawos nga pia-la joro tata sen ko ngok. Kerr p̄irevji pini, ko naut sen pivi vajin se kerr e.’

⁸ Ko arrul totoni ni, ko arevji pini emij, ko arsor tweni van vare e renge naut ne grep nen e.

⁹ “Ngok mirpok ngok, numal ne naut ne grep nen pulwi vini ko puloli sev ko tevir? Ni pivini ko p̄irevji pinir, ko p̄ilai tevi jinibb m̄inij kele sopor.”

¹⁰ Ko Iesu osusi tevir owra “Ia, ko nale nga maruli renge Naul On ngel owra sev le, nga muwra ‘Nabur nga jinibb nga marok-majinge naim marungasi marwirre, niko vajin evi nabur nga murrul totoni naim m̄iterter.

¹¹ Nanu ngel evi nanu nga mivel ji Numal e vini. Ko evi nanu nga mete kerr m̄ilesi taole m̄irres p̄elak.’ ”

¹² Ko nir nga marwowomu re m̄eri Isrel nir arongwose nga ni owra nale rrongrongvi nga m̄itre nir rengen, ko arwera parrul totoni; ko armetutue delung nir. Ko arlinglingi arivel lingi.

Erres renge rrapwuli takis tevi Sisa, batu numal se m̄eri Rom nir?

¹³ Jinibb nga marlelep sopor arkoni Parasi sopor ko jinibb se Erot sopor arini ji Iesu nga parjiljilwer kerkerasi, nga puloli nir partor wos ni renge nale sen.

^H 11:26 Nale nga muto re nolo [], rrek sete Mak oli, ko jinibb san ea-uli vitue daron nga muli tweni kopi san ne naut ngel.

¹⁴ Nir arini jin ko arwerai tevi ni, "Jinibb nevisvisenien, kem namrongwose nga nik komok-weretun; ko sete kuwer suri jinibb san, ko sete kumanun rragrrag renge no san, ko komok-visviseni sel se Atua weretunen. Ngok kupwerai ta tevi kem, evi nanu nga m̄irres renge nale nesesreien se kerr nga rrapwuli takis tevi Sisa, rreknga ejki? Nablai tevi rreknga sete nablai tevi?"

¹⁵ Iesu orongwose nga nir marivel re sel eru, ko owrai tevir, "Suri sev nga kami kamrrowrowe inu mirpok? Kaplai ta nevõt nen pisan vini jik, nga inu belesi ta."

¹⁶ Ko nir arla nevõt nen san tevi ni, elesi jile musuw, ko owrai tevi nir, "Ko isi le non ngel, ko nisen ngel?" Ko nir arwera lweni tevi arwera "Rrekma Sisa ko."

¹⁷ Ko Iesu owrai lweni tevir, "Nanu nga marivi se Sisa, kaplai lweni tevi Sisa. Ko nanu nga marivi se Atua ko kaplai lweni tevi Atua." Ko bbõsa elair e.

Erpese renge daron nga jinibb mimaur luwi kele renge mijen

¹⁸ Satusi nir, nga marwera jinibb sete orongwose pimaaur luwi kele renge mijen, arini ji Iesu, ko arsusi kerkerasi tevi ni arwera

¹⁹ "Jinibb nevisvisenien, Moses oli pa renge naul ne nale nesesreien se kerr erpel: 'Poro jinibb san tuwan pimij lingi nesen sen, ko natu nuru pijkie, ko ngok m̄nernen tasin p̄itkai kele tuwan nesen sen ko pivesi wani metka se tuwan nga mimij ngok.'

²⁰ Ngok niko jinibb niaken ebut; ko m̄erwomu nen elesi nesevin san, mian ko emij lingi nesevin nen, ko natu nuru ejkie.

²¹ Erwen kele etkai vinnen, ko emij lingi kele, sete natu nuru otoa te ejki. Ko nir itolin kele, ko erpe kele bbong nga womunen nuru.

²² Nir jile nga ebut ngok natur arjikie. Ngok vitunen vajin ko nesevin nen emij kele.

²³ Ko ngok mirpok ngok, renge daron nga para-maur luwi kele re mijen, vinnen pivi nir si nen ko nesevin sen? Suri nir niaken nga ebut ngok jile nir artekai. Kupwera suri ta we!"

²⁴ Iesu owrai tevi nir, "Suri nanu nga eru ngel le, kami kamsarr nga kamsarr lengleng, suri nga sete kamrongwose Naul On rreknga derteren se Atua.

²⁵ Suri daron nga jinibb nga marmij parmaur luwi renge mijen, setemun norman ko nesevin mora-totko kele, rreknga porleslesi nuru kele, ejki mun. Porlik vajin porirpe anglo ne melrin nir.

²⁶ Ko re devjen ne nga nir nga marmij, nga para-maur luwi kele, ngok kami sete kameve renge naul se Moses renge lat nga

marsuŕe suri nai wel san nga muroror, ko nabb sete eani? Renge nai ngok, Atua erij tevi Moses, owra 'Inu nuvi Atua se Epram, ko Atua se Aesak, ko Atua se Jekop.'

²⁷ Ni sete evi Atua se jinibb nga marmij te ejki, evi Atua se nir nga marmaur. Suri derteren sen elep nga elep lingi mijen. Lok kami kamsarr nga kamsarr lenglengen ko nga kamok-wera jinibb sete orongwose pimaaur luwi kele re mijen."

Nale nesesreien se Atua ngabes nen evi drromon jer?

²⁸ Ko san renge jinibb nevisvisenien ne nale nesesreien evini, ko omurrarronge nir jile marok-bburbbur e nale, ko ornge nga Iesu okrij welir erres pelak. Ko osusi tevi ni owra "Nale nesesreien se Atua ngabes nen evi drromon jer renge nale nesesreien m̄inij nga ngok nen nir nga m̄irres asi nen nga rrapvijuri?"

²⁹ Ko Iesu owrai lweni tevi ni owra "Renge nale nesesreien se Atua nga mivi drromsen jer renger erpel, 'O Isrel, kaprunge Iova Atua se kerr. Ni kobbong esan evi Iova.

³⁰ Ko nik kupmerreni Iova Atua som tevi nolom jile, ko tevi mauren som jile, ko tevi norrorrmien som jile, ko tevi derteren som jile.' Ngel ko evi nale nesesreien se Atua nga mivi drromon jer, nga m̄iasi nga ngok nen jile nir.

³¹ Nga surie kele erpel, 'Nik kupmerreni jinibb nga marlik morie nik pirpe kumrreni lweni nik.' Setemun nale nesesreien kele san osorsan tevi nga ngel nuru, ejki."

³² Mernen owrai lweni tevi, "Omomsawos ko, Jinibb nevisvisenien, nik kuwra weretunen. Atua sansan kobbong, setemun san kele, ni kobbong esan rres.

³³ Ko nga rrapmerreni ni renge nolo kerr jile ko norrorrmien se kerr jile, ko derteren se kerr jile, ko nga rrapmerreni jinibb nga marlik morie kerr pirpe kerr, ngok erres womu re marsuli nanu tevi Atua."

³⁴ Ko daron nga Iesu m̄ilesi muwra lweni tevi ni mumomsawos, ko owrai tevi ni, "Nik sete kuruj ngasu rragrrag renge batun vanu se Atua." Vitunen renge ngel ko setemun jinibb san osusi kele nanu san tevi ni, suri armetutu.

Kristo sete evi bbong metka se Devet kis ko, ko evi kele wor Numal sen ko

³⁵ Daron nga Iesu mok-visviseni jinibb nir renge loloim ne Naim On e, ko owrai tevir, "Erpese jinibb nevisvisenien ne nale nesesreien marwera 'Mesaea evi Devet natun'?"

³⁶ Suri Devet Nem̄in On esilvi ko owra erpel: 'Numal Atua owrai tevi Numal suk, "Kuplik renge nevrek rres, kuptiriv pijpari nga bololi devje nuval som nir parirpe

lat nga kupbböt ren reнге nolon belam ngatan.”

³⁷ Devet lweni wor owra ni evi Numal sen, ko ngok ni evi natun erpese ko? Jinibb elep nga marini arunge ni muwrai mirpok ko arir lengleng ren.

Iesu erij tere jinibb nevisvisenien ne nale neseseien nir

³⁸ Iesu evisviseni jinibb nir ko owrai tevir, “Kapmetmet reнге jinibb nevisvisenien ne nale neseseien nir, suri nir armerreni paruri sunsun nga marres nga marpepriv partutur tevir, ko delung jile partorir ko parsareni nevrer tevir reнге sel.

³⁹ Armerreni parsakel reнге nai seksakel nga muto limjer womu mürres reнге Naim On, ko erpok kele armerreni parsakel reнге nai seksakel nga muto limjer womu mürres reнге lat ne nanen.

⁴⁰ Arivi demij venao, arvenae p̄t̄peti nijor se nesevin nga diwen ser marmij lingir, ko reнге daron ngok ko pa arkerkerasi jinibb nir, arloli verusen nga marpepriv tevi Atua. Ngok Atua putor vitranḡi nir pilep suri.”

Nesevin san nga mutuw nevöt sen

⁴¹ Iesu esakel reнге loloim on se Atua, morie lat nga bokis ne nevöt mutoe. Ko okmeteni suri erpese nga jinibb marok-tuwe nevöt van reнге bokis nen. Jinibb elep nga joror milep artuwe nevöt nga marlelep nir.

⁴² Ko reнге ie, nesevin san nga mivi ßeres, diwen sen mimij lingi, evini ko otuwe nevöt nga wowarreng eru. Nevöt nga wowarreng nen nuru korti ko evi wan selen ko.

⁴³ Ko Iesu everuse jinibb sen nir arini jin, ko owrai tevir, “Nuwretun nuwrai tevi kami, nesevin nga ngel nga diwen sen mimij lingi ngel, ni otuw nevöt asie nir jijle nga martuwe nevöt van reнге bokis nen.

⁴⁴ Suri lartul nga ngok nir joror elep, ko arlai bbong beblen ko artuwe, ko artori jere elelep; ko vinel ma emarong putuw p̄t̄peti sev nga ni m̄l̄ngi, nga mivi liken sen p̄t̄peti.”

13

Iesu owra tweni nga jinibb sopor partingtinge Naim On se Atua

¹ Daron nga Iesu mivare reнге Naim On se Atua e, ko jinibb sen san owrai tevi owra “Jinibb nevisvisenien, kupmeteni ta nevöt lepel nir, ko naim lepel nir, arinijnij nawone.”

² Ko Iesu owrai tevi, “Kulesi naim nga marlelep marinijnij nawone ngel e? Mian ko jinibb partingtinge p̄t̄petir. Sete-mun nevöt pisan pijnḡet jer kele reнге

pisan, nga sete orongwos piwirr pimatur ngatan.”

Nanu nga m̄sij nga pia-vini

³ Iesu oksakel reнге Botwen ne lolnai ne olip, ko oklu mawose Naim On se Atua. Ko Pita ko Jemes ko Jon ko Antru arsusi silveni bbong tevi ni,

⁴ “Kupwovrai ta tevi kem, nanu ngel nir para-vini seveling ko? Ko sev ko parivi nelesien nga piviseni nga nanu ngel nir otomori parini?”

⁵ Ko Iesu owra lweni tevir, etipatun owra “Kapmetmet ko wor, jinibb tarkerkerasi kami.

⁶ Suri reнге inu nisek nir pilep parini rengen, ko parwera ‘Inu nuvi Kristo le,’ ko parkerkerasi kele nir pilep pipok.

⁷ Daron nga kami kaprunge marval, ko jinibb nir maror e nuval, kami sete kapmetutu. Nanu ngok nir parini ko wor parasi womu, ko bongsi iel ngatan ejki ko wor.

⁸ Ngaim san putur imare ko pival tevi ngaim san, ko batun vanu san putur imare ko pival tevi batun vanu san. Ko nan̄i p̄in̄i reнге vanu lele, ko numer puto reнге vanu lele ne iel ngatan, jinibb parmer pilep. Nanu ngel nir arivi bbong batun nga jinibb nolor parrume.

⁹ “Kami kapmetmet wor kami ko p̄irres. Suri partekai kami ko van reнге kot ser nir,

parwer lokloksi kami. Ko parvirrvirrali kami reнге naim ne loten ser, ko kaptur reнге no numal nga marwewarreng nir, ko numal nga marlelep nir. Suri kami kapsupe inu reнге no nir.

¹⁰ Womunen parwerwer mun reнге nospen nga mürres tevi jinibb jijle nir reнге vanu ne ngatan ngel jijle nir.

¹¹ Ko daron nga parevei kami ko partekai kami van reнге kot ser, ko sete kapmetutu womu suri sev nga kami kapa-werai. Suri sev nga Nem̄in On pia-lai tevi kami reнге mete nial nen, ngok ko kami kapwerai. Suri sete kami kaprij, ko Nem̄in On nga m̄lik reнге kami p̄irij re norrorrmien se kami, ko kami kapwera tweni.

¹² Ko niaken p̄itkai niaken sen ko p̄ilngi reнге mijen, ko tata p̄itkai natun norman p̄ilngi reнге mijen, ko bipiwarreng partur imare ko partere tata ko tasu ser, ko parevji pinir parmij.

¹³ Ko jinibb jijle nir parungasi kami suri inu nisek; ko m̄er nga putur p̄iterter pijpari bongsin, m̄ernen ko pia-la mauren.

Nanu nga m̄sij milep reнге Jerusalem

¹⁴ “Mian ko daron nga kami kaplesi atua se jinibb ne vare nir nga m̄sij nga m̄sij p̄erper parini parsireni putur reнге lat nga

muon (rrek kami nga kameve kaprongwose kobbong), ko ngok kami nga kamlik renge Jutia kapwolou van renge botwen e nir.

¹⁵ Ko nik nga kumlilik vare renge naim som, sete kupluwi keke van renge lolaim som nga kupla nanu pisan, pijki, kupwolou ko pa.

¹⁶ Ko poro jinibb san pian renge orsel, ko setemun pulwi keke vini renge naim sen nga pila keke sunsun sen; puwlu ko pa.

¹⁷ Wurru pia-sij wor niko renge nesevin nga mītetaur, ko nesevin nga muloli natun nusur renge nabong nen nir.

¹⁸ Ko kami kapverus ko wor van ji Atua nga puloli woluen se kami sete puto renge daron ne naus.

¹⁹ Nanu nga marsij pilep parini. Nanu nga jinibb nir setewor marlesi meter e nabong san, mītipatun renge daron nga Atua muloli iel ngatan e, mivini mijpari lelingen ngel. Ko setemun nanu nga mīsij piprel pivini keke renge nabong san, ejki mun.

²⁰ Numal Atua orrorrmi pa nga pia-ta tweni nabong nga marsij ngel nir; poro pijki, ko sete jinibb san mia-maur. Ko suri orrorrmi nir nga ni mutobbtobbu pae nir, ko niko muloli nabong nen nir sete pilep pēlak.

²¹ Renge nabong nen, poro jinibb pisan pia-werai tevi kami, 'Kaplesi Mesaea ngel!', rreknga 'Kaplesi ngokwan!', ko sete kaposuri.

²² Pian ko pia-irpok ko wor renge iel ngatan, Mesaea ne gerisen pilep paratur imare, ko propet ne gerisen nir pilep para-tur imare ko para-viseni nevisenien ko nelesien nga marlelep nir, nga parakerkerasi jinibb nir ko jinibb se Atua keke nir. Ko sete arvitere para-kerkerasi jinibb se Atua nga mutobbtobbu nir.

²³ Kaplesi, nuwra wowomue nanu jile le pa ngel nir tevi kami. Ko kami kapkulkulu metmet ko wor pīrres.

Mian ko Jinibb Mawos pia-vini

²⁴ "Renge nabong nen nir, nanu nga marsij ngok nir parini parasi pētpēti pusuw, ko daron nen vajin 'Ko nial pimat ko navöl sete pīser.

²⁵ Ko moju ne melrin nir parvititan ngatan, ko nanu nga marterter ne melrin nir paririr.'

²⁶ Mian ko parlesi 'Jinibb Mawos pujubbul renge nabor vini' tevi derteren sen nga milep temijpal ko tevi nosrövien sen.

²⁷ Mian ko ni pia-koni tweni anglo sen nir paran re iel ngatan bongsin ne ivij jijle, tevi lat pētpēti nir nga melrin mīsalsal orer. Ko parser kortoni lartul nga ni mutobbtobbue nir vini lat pīsansan.

Nanu ngel sete jinibb san orongwose daron nen

²⁸ "Kami kamrongwos pae ko renge daron ne nai nir marok-jur. Daron nga rensir martengriv luwi nga raor marpelari, ngok kami kamrongwose pae ko nga numös evini mori vajin.

²⁹ Ko pipok ko, daron nga kami kaplesi nanu ngel nir parini parpelpelari parasi, ko kami kaprongwose nga inu Jinibb Mawos otomori beplari, erpe renge pa roro metali.

³⁰ Nuwretun nuwrai tevi kami, Dul nga ngel nir setewor parmij pētpēti ko, nir sopor parmaur malum kobbong pijpari nga parlesi nanu ngel nir parpelpelari.

³¹ Melrin ko iel ngatan porjijki, ko nale suk ma nir sete mara-jijki.

³² Nabong nen sete jinibb san orongwose, ejki, ko anglo ne melrin nir keke arrelenge. Ko inu keke Jinibb Mawos sete nurongwose te. Tata suk kobbong esan orongwose.

Kami kapkulkulu metmet ko wor pīrres

³³ "Kami kapkulkulu metmet ko wor pīrres, suri sete kamrongwose nabong nen.

³⁴ Suri inu Jinibb Mawos nurpe jinibb san nga mivel lingi naim sen ngok ko, nga mian renge vanu mīnij san mīlik rengen. Ko mīlai derteren tevi jinibb sen nir ko mīla majingen sisamis tevi nir sisamis. Ko owrai tevi mīer nga mutur metmet renge metali ni pukulkulu ko wor pīrres.

³⁵ Pipok ko, kami kapkulkulu, suri kami kamrerrlenge daron mawos nga numal ne naim pulwi rengen vini. Pivini renge rivriv rreknga renge nat pīrrang, rreknga nato pukokrou, rreknga renge rorpong.

³⁶ "Kapmetutu tia-luwi tingavil vini, ko tialesi kami taka-matur.

³⁷ Ko sev nga mowrai tevi kami, nuwrai keke tevi jinibb jijle, nga parkulkulu ko wor pīrres."

14

Jinibb nga marwowomu renge mīeri Isrel nir arwera parevji pini Iesu

¹ Nabong eru ma ojpon nga partori nannen ne asien ko nannen ne niv nga is mijki rengen. Ko batu jinibb ne sulsulen nir ko jinibb nevisenien ne nale neseraien nir arpejpej sel san nga parrul venae Iesu rengen ko parevji pini.

² Ko arwera "Sete rrama-loli renge daron ne nannen, suri jinibb tarkomrönir vini ko tarevji Kerr."

Nesevin san ejvi senta renge batu Iesu

³ Iesu evan renge Betani ko elik renge naim se Saemon nga bonevis mimsi e mesien nga niber mīmēmaul. Ko ni esakel mare ko eaan. Ko nesevin san evini jin, otori botel san nga marloli nevöt e san, nisen arwera alapasta. Renge botel nen senta nga marloli renge nart oto rengen, mapun erres elep ko nowlin elep kele. Ko vinnen obbri botel nen ko ejvi senta nen renge batu Iesu.

⁴ Ko jinibb sopor arlik ie, ko arlolarsi vinnen suri, ko arwerwerai lulweni tevir, "Owra erpese le, mulokloksi nawone senta ngel.

⁵ Poro parwulwule senta ngel ko rrek nowlin pivi nevöt pungut pivatul (300) ko, ko parlai tevi ßeres nir." Nir artortori erpok.

⁶ Ko Iesu owrai tevir, "Kapinglingi vinok! Erpese kami kamloli ni murnge mīsij? Ni ololi nanu san nga mīrres ðelak renge inu.

⁷ Kami kamluk tevi ßeres ngok nir tetajer ko pa, ko poro kapmerreni kaploli nanu san tevir, tetajer kobbong orongwos kaploli ðirres tevir. Ko inu ma sete mea-lik tetajer tevi kami.

⁸ Ko vinel evini iel, ololi pa nanu nga ni murongwos puloli ko, ni ejvi senta re nibek owomu etravi daron ne netivtaviyen suk.

⁹ Nuwretun nuwrai tevi kami, renge iel ngatan ngabes nen nga paran parwerwer renge nosþen nga mīrres rengen, ie kele nanu nga nesevin ngel muloli tevik parsuþe suri ren, pivi ni now sen."

Jutas eir nga pimaronge Iesu pian renge nevre devje nuval sen

¹⁰ Ko Jutas ne Iskariot evan ji batu jinibb ne sulsulen nir nga ðitkai kerasi Iesu tevir.

¹¹ Daron nga marunge nale sen nga muwrair tevir, ko arir elep. Ko arloli rijrijen san tevi nga parlai nevöt sopen tevi. Ko ni epejpej daron ngabe ko ðirres renge ni ðitkai kerasi tevir.

Jinibb se Iesu eru orloli nanu jile arto lilane terai nanen ne asien

¹² Renge nabong womu ne niv nga is mijki rengen, nabong nga marevji nanu rrum nga parsulir renge nanen ne asien, ko jinibb sen arsusi tevi ni arwera "Numal, kumarong nga kem naban ngabe le nabloli lilane terai nga nik kuprroi nanen ne asien rengen?"

¹³ Ko ni owrai tevi jinibb sen eru, "Kamru koporan renge Jerusalem, ko koporsewute jinibb san ie nga muwosi botel nuwi san nga muwun; ko koporvijuri ni.

¹⁴ Ko renge naim nga ni pian loloim rengen, kamru koporwerai tevi jinibb ne naim nen koporwera 'Jinibb nevisisienien owra "Niben le loloim ne naim som nga

borroi nanen ne asien ren tevi jinibb suk nir?"

¹⁵ Ko mīnren piviseni tevi kamru naim nen loloim nen nga milep san nga muto mare, nga nanu jile marto pa, marloli lilaner marres ren." Ko ni okoni tweni nuru orivel oran.

¹⁶ Jinibb sen nuru orivel oran renge Jerusalem, ko orlesi erpe nga ni muwrai tevi nuru pa. Ko nuru orloli lilane nanen ne asien oto terai.

Iesu owra tweni nga Jutas ðitkai kerasi ni

¹⁷ Renge nata mirivriv nen ko Iesu evini tevi jinibb sen esngavöl drromon eru.

¹⁸ Ko daron nga marsakel marok-aan vajin e, ko Iesu owrai tevir owra "Nuwretun nuwrai tevi kami, kami san ko ðitkai kerasi inu van renge nevre devje nuval suk nir. Kami san nga kamaan tevik ngel."

¹⁹ Jinibb sen nir arunge lenglene esij e, ko nir sisamis arsususi sisamise tevi ni, "Isi le? Inu ma ejki!"

²⁰ Ko ni owrai lweni tevir, "Kami ko san renge jinibb suk esngavöl drromon eru nga rramok-rrirri korti renge bol ngel.

²¹ Inu Jinibb Mawos bean ko wor renge mijen erpe nga Naul On muwrai suri inu, bemij ko wor rengen. Ko wi þisij ko renge mīer nga ðitkai kerasi Jinibb Mawos. Erres ðelak re mīnren poro bbong sete þiak te pijki."

Iesu orro tuloni nanen ne asien tevi nir

²² Ko daron nga nir marok-urrurro ngavilvil nanen sopen, ko Iesu ela niv ko otori. Ko olot owra erres tevi Atua suri, obbri otvi ko esareni tevir, ko owra "Kaplai kapurroi, ngel evi nibek."

²³ Ko ni ela kele biles san, ko daron nga muwra erres jile tevi Atua suri musuw ko esareni tevir, ko nir jijle armini.

²⁴ Ko ni owrai tevir, "Nanu ngel evi inu drrak. Pisער suri jinibb pilep, ko puloli rijrijen se Atua putur.

²⁵ Nuwretun nuwrai tevi kami, inu setemun numa-mini kele grep suwen ejki mun, pian pijjari nabong nga ngok nga inu beamini vajin nga mimerr renge batun vanu se Atua."

²⁶ Ko daron nga marla jile nubo san ko arivare arivel van renge botwen ne lolnai ne olip e.

Iesu owowrai nga Pita pivilvil ore puwra sete orongwose ni

²⁷ Iesu owrai tevir, "Kami jile nolo kami pivitan suri inu. Suri Naul On owrai owra 'Mian ko inu berevji pini mīer nga mok-metmete sipsip, ko sipsip nir parivel sarsarr.'

²⁸ Ko vitunen renge inu bemaaur luwi ke le renge mijen, ko bowowomu renge Galili terai kami."

²⁹ Pita owrai tevi ni, "Rreknga lartul ngok ma nir nolor pivitan, ko inu ma sete nolor mia-vitan te, ejki."

³⁰ Ko Iesu owra tevi ni, "Nuwretun nuwrai tevi nik, lelingen renge nata mupong ngel puwomu mian ko nato pia-kokrouit pivaru, nik kupvilvil orek pivatul, kupwera sete kurongwose inu."

³¹ Pita osur terter luwi tevi ke le owra "Poro bemij tevi nik, ko sete numa-vilvil ore nik!" Ko nir jijle arwera erpok.

Iesu evan renge Getsemani olot

³² Ko nir aran renge lat san nga nisen Getsemani. Ko Iesu owrai tevi jinibb sen nir, "Kami kaplik iel daron nga inu bean bolot."

³³ Ko ni el a Pita ko Jemes ko Jon arpitevi ni. Ko ni nolon etipatun ngarr orrum, ornge lengleng esij elep.

³⁴ Ko owrai tevir, "Nolok ornge lengleng esij elep, erpe ðeap nawone bemij. Kami kaplik iel, ko kapkulkulu metmet."

³⁵ Ko ni evel rujruj lingir sopon ko esrapo van ngatan, emator renge dan. Ko olot nga poro Atua orongwos puloli nanu nga renge mete nial nen nir parasi renge ni.

³⁶ Ko ni owra "Apa" (erpe owra "Tata"), "nik kuloli wose nanu nga musuw ngok. Wurru kupla tweni biles ne norongen nga n̄isij ngel renge inu. Ko ejki, sete kumaloli inu marongen suk, ko kuploli ko wor pirpe nik marongen som."

³⁷ Ko mian ko ni olwi ke le vini jir, ko elesi nir armaturrwel. Ko owrai tevi Pita, "E Saemon, nik kumaturrwel ke le? Sete kurongwos kupkulkulu renge mete nial pisanan?"

³⁸ Kami kapkulkulu ko wor ko kaplot, nga puloli sete nanu parini parrowrrow þelake kami. Nolor armerreni, ko niber armijmij."

³⁹ Ko ni evel lingir, olwi ke le van olot owra malum nale nga muwrair womu.

⁴⁰ Ko mian ko daron nga mulwi ke le vini ko elesir armaturrwel ke le, suri meter arruwel. Ko nale nga parwerai tevi ni ejki mun.

⁴¹ Mian ko ni evel ke le evan olot jile musuw, ko olwi ke le vini jir evi vatolin le vajin, ko owrai tevir vajin owra "Erres, kapmaturrwel vajin, kapmosi þirres! Evter ko pa! Mete nial nen evini. Kaplesi inu Jinibb Mawos partekai kerasik van renge nevre jinibb nga marsij nir.

⁴² Kaptur imare, rrapiel van rraplesi m̄er nga þitkai kerasi inu evini pa ngel mori."

Devje nuval se Iesu arini arrul renge ni

⁴³ Momsawos daron nga m̄irij malum e ko pa ko Jutas, san renge esngavöl drromon eru, evel ngavilvil vini, eptevi meling jinibb nga milep. Artori nesip nuval ko ðetiluk nir. Arivel ji batu jinibb ne sulsulen nir, ko jinibb nevisvisenien ne nale neseseorien nir ko þirterawarreng ne Isrel nir vini.

⁴⁴ Jutas, m̄er nga m̄itka kerasi ni, elngi pa nale jir osuw, owra "Mer nga ban jin borromji, ni evi m̄ernen ko. Kaprrul totoni þiterter, kapiel tevi."

⁴⁵ Mian ko renge daron nga mivini e, ko evel momsawos pa Iesu ko evesane, ko owra "Jinibb nevisvisenien," ko orromji.

⁴⁶ Ko nir arrul renge Iesu, arwusi totoni etingtingin.

⁴⁷ Ko nir nga mutur morie bbong san ela nesip nuval sen ko etai jinibb ne majingen se batu jinibb ne sulsulen san, ko eta vasi boron devjen.

⁴⁸ Ko Iesu owrai lweni tevir, "Kami kamini tevi nesip nuval ko ðetiluk nir, ko kamrrul totonik erpe nibb nga mivevna ko mokrevrevji pipini jinibb nir.

⁴⁹ Tetajer nomok-lik tevi kami renge Naim On nomok-visviseni, ko kami sete kamrrul totonik te ejki. Ko ngel kamloli mirpel tevi inu nga puloli Naul On pipari."

⁵⁰ Ko jinibb sen nir arwolu lingi ni arivel, ko ni otur jer.

⁵¹ Ko jinibb m̄elakel san evijuri Iesu, sete ori sunsun te ejki, ela bbong kalek san ko elavlave. Ko sopor arrul ren. Ko arrul rursi,

⁵² ko arrul rrawe lavlav sen. Ko ni owl malmal, owl lingir.

Iesu otur womu renge no gortien ser

⁵³ Ko nir arpitevi Iesu van ji jinibb nga mivi drromo batu jinibb ne sulsulen nir. Ko renge ie batu jinibb ne sulsulen nir ko þirterawarreng nir ko jinibb nevisvisenien ne nale neseseorien nir arlik korti jin.

⁵⁴ Ko Pita evivitu suri ngasu jer, ko evan renge lolo naworr nga muwlu ore naim se batu jinibb ne sulsulen nir, ko ni ean elik tevi lartul nga marmajing se drromo batu jinibb ne sulsulen nir. Ko etetli renge nabb nga m̄in.

⁵⁵ Ko batu jinibb ne sulsulen nir ko nir nga renge gortien ser nga marlik loloim arpepej jinibb sopor nga parongwos parkerkeris e nga parwera Iesu ololi nanu nga n̄isij san nga parlingi ni renge mijen suri. Ko sete arongwos parlesi san,

⁵⁶ suri ewretun nir elep arsuþe nale gerisen nir nga martere ni renger, ko nale ser sete arsorsan rragrrag te.

⁵⁷ Ko mian ko jinibb sopor artur imare ko arwera nale gerisen san van rengen, arkerkeris artere ni rengen, arwera

⁵⁸ “Kem namrunge nga ni owra ‘Inu bea-lokloksi Naim On se Atua nga ngel nga naver muloli, ko nabong pitul ko ßeli lweni minij kele san nga naver san sete pijpari sapon.’”

⁵⁹ Ko gerisen ser ngok nir kele nga marwerair sete arsorsan, arsisamis p̄t̄p̄eti.

⁶⁰ Ko drromo batu jinibb ne sulsulen nir mutur imare livō rer, ko osusi tevi Iesu owra “Erpese nga nik sete kumwera nanu san? Sev le ngel nir lartul ngel nir martere nik surir ngel?”

⁶¹ Ko ni eperper nawon, sete owra lweni nanu san. Mian ko drromo batu jinibb ne sulsulen erij kele tevi owra “Erpese? Nik kuvi Mesaea, Atua nga rramok-surōvi Natun mawos?”

⁶² Ko Iesu owra “Inu le. Ko kaplesi inu Jinibb Mawos bea-sakel renge Atua nga derteren sen mutoe nevren rres. Ko bealuwi re nabor ne melrin vini.”

⁶³ Ko drromo batu jinibb ne sulsulen nir ololar lengleng ko errerrsi sunsun sen, ko owra “Erpese rrappej kele wor sopor nga parwera nale sopor?”

⁶⁴ Kami kamrunge pa nga ni m̄irij melmelas ko musopsope pa Atua! Ko kamrrommi erpese?” Ko nir jikle arwera “Ni erres renge pimij ko wor!”

⁶⁵ Ko nir sopor arverae noltor e ni. Ko nir sopor arsere ore meten ko arlumati ko arwera “Nik kuvi propet! Kupwowrai ta m̄er nga mulmati nik ngok. Isi ko?” Ko batu jinibb ne sulsulen kele jinibb sen nir arvirriralali lengleng ni kele.

Pita evilvil ore Iesu owra sete orongwose ni

⁶⁶ Renge naworr nga muwlu ore laut on nen, Pita oklik renge live laut nen. Ko nesevin san nga mok-majing se batu jinibb ne sulsulen nir evini ie.

⁶⁷ Ko elesi Pita mok-tetli renge nabb ko owrai tevi, “E, sete nik kele kuptevi Iesu ne doNasret ngel?”

⁶⁸ Ko ni evilvil ore owra “Inu nurrerlengge, sete nurongwose nanu nga kumwera ngok!” Ko ni esil ivare renge devji evini vare ko ewit van otur renge metali. Ko nato okokrount vesan.

⁶⁹ Mian ko nesevin ne majingen nga emteni kele Pita, ko owrai tevi nir nga martur morie ni “Merel evi nir le san!”

⁷⁰ Ko Pita evilvil ore kele eterter.

Mian ko vitunen beblen weli ma ko lartul nga martur tevi arwerai tevi Pita, “Ewretun nik kuvi nir san. Nik kuvi m̄eri Galili!”

⁷¹ Ko Pita erij otot ojuji lenglengen mare ko owra “Nurrerlengge m̄erel nga kami kamsupe ngel!”

⁷² Renge daron mawos ngok ko pa, ko nato okokrount varwen kele. Ko Pita orrorrmi wos nale se Iesu nga muwrai tevi ni, “Daron nga nato setewor pukokrount pivaru e ko, ko nik kupvilvil ore inu pivaru.” Ko ngok daron nga murrormmi wose, ko ornge esij, ko eting.

15

Iesu otur renge no Paelat

¹ Renge rorpong susu, nat murrorrorr malum, ko batu jinibb ne sulsulen nir arevei gortien san. Arkorti tevi Birterawarrang nir ko jinibb nevisvisenien ne nale nesesreien nir, ko nir nga renge gortien ser jikle nir. Ko arloli nale san, arwera jinibb sopor paran parsere totoni Iesu, ko parevei van ji Paelat.

² Ko lartul nen nir aran arevei Iesu vini ji Paelat. Ko Paelat osusi tevi ni owra “Nik kuvi Numal se m̄eri Isrel nir?” Ko ni owrai lweni tevi, “Erpe nga kumwera.”

³ Ko batu jinibb ne sulsulen nir arwera gerisen elep van renge ni.

⁴ Ko Paelat osusi kele tevi ni owra “Erpese nik sete kumwera nanu san tevir? Kuplesi nir arwera nanu elep artere nik renger.”

⁵ Ko Iesu setemun owra kele nanu san, ejki mun, ko ngok ololi Paelat etaole.

Paelat owra Iesu pimij ko wor

⁶ Renge sia jile renge nanen ne asien ngok, Paelat okmaronge jinibb san nga m̄ilik renge naim ne nekaien pivel sisarow, ngok poro parngoni isi tama san tevi ni.

⁷ Ko jinibb sopor arlik renge naim ne nekaien, suri arevji pini jinibb sopor renge daron nga martur imare ko marval tevi Gavman. Ko san renge nir nisen Barapas.

⁸ Ko delung nga milep arini ji Paelat ko arngoni tevi ni nga ni puloli tevir pirpe nga tetajer mok-loli.

⁹ Ko Paelat owrai lweni tevir, “Kami kammarong nga inu borpaji tweni numal se m̄eri Isrel nir tevi kami nga ni pivel sisarow?”

¹⁰ Suri ni ornge renge niben nen, ko orongwose nga batu jinibb ne sulsulen nir arlingi Iesu van renge nevren suri nalol leplep ne lolaren ser kobbong.

¹¹ Ko batu jinibb ne sulsulen nir aron tertere delung nir nga nir parngoni ma Barapas tevi ni nga ni pimaronge tevir.

¹² Ko Paelat erij welir kele, owrai tevir, “Ko kami kamwera inu bololi sev tevi m̄er nga kami kamveruse numal se m̄eri Isrel nir?”

¹³ Ko nir arkail, arwerai eterter kele van mare arwera “Kuprruloni ni renge nai pelaoti!”

14 Ko Paelat owra lweni tevir, "Erpese? Ni ololi nanu nga n̄isij sev?" Ko nir arkail kele wor eterter van mare wor, arwera "Kuprruloni rengo nai pelaot!"

15 Paelat emrreni puloli nolo jinibb nir parres. Ko orpaji Barapas evel sisarow, ko owrai tevi jinibb nuval sen nir parvirrali Iesu. Ko ni etkai elngi rengo nevrer nga parruloni rengo nai pelaot.

Jinibb nuval nir arpitevi Iesu ko arsoṗsoṗe

16 Ko jinibb ne nuval arpitevi tweni Iesu van rengo naworr nga muwlu rrale naim se Paelat e nga nisen Praetorium. Ko arverus kortoni jinibb nuval jile nir arini jir.

17 Ko nir arloli ori sunsun san nga nulsen musongsong mirpe sunsun se numal, ko arjali nuvan moku san erpe nuvan se numal ko arlingi rengo batun ori.

18 Ko arij kerkerasi ni arwera "Erres wor, Numal se n̄eri Isrel nir!"

19 Ko arla mavor ko arvirrali batun e, ko arverae noltor e, ko arjipa ngatan jin arlotoe, arsoṗsoṗe.

20 Ko daron nga marsopsop jile ni musuw, ko arla tweni sunsun sen nga muri nga musongsong ko arla lweni sunsun sen nga mok-uri wor ko arloli ori lweni. Ko arpitevi tweni van parruloni re nai pelaot.

Arwuse Iesu rengo nai pelaot

21 Ko rengo sel arlesi n̄eri Saerin san nga mivi tata se Aleksanta ko Rupas, ni nisen Saemon. Evini owra pisip asi nir pian ngaim e, ko nir aron tertere ni arwera puwosi nai pelaot se Iesu.

22 Ko nir arpitevi Iesu van rengo lat san nga nisen Golkota, nga muwra puwra mirpel, Lat ne bongur.

23 Ko nir arla norro san nga markisi tevi mir nga puloli niben parpurus ko sete purnger parerer. Ko ni sete emni te, ejki.

24 Ko nir arruloni Iesu rengo nai pelaot. Ko artutweni sunsun sen evses nir, ko artuw daes suri, arwera parlesi rengo nir sisamis ta nir si nen pia-lai.

25 Evi mete nial esiw rengo rorpong nga marruloni Iesu rengo nai pelaot.

26 Ko rengo niriv nga muto pelaot mare aruli tweni nale san ngel suri nga marevji pini ni: NUMAL SE MERI ISREL NIR.

27 Ko nir arruloni kele jinibb eru nga morok-vevna ko morok-revrevji jinibb or-pitevi ni, arruloni tuwen rengo nevrer rres ko arruloni tuwen nen rengo nevrer mair e.

28 [Ko ngok Naul On evini eplari nga muwrai mirpel, "Ko ni arloli tevi ni erpe jinibb nga n̄isij san."]¹

29 Ko jinibb nga marasasi rengo sel arijrij meten ko arbbölböleni batur, arwera "Ai! Nik nga le kumwera kuplokloksi Naim On ko nabong p̄itolin ko kup̄ili lweni kele!

30 Kuploli lweni ta nik ta we kupmaur, ko kupjubbul rengo nai pelaot ta we, kupini ngatan e!"

31 Batu jinibb ne sulsulen nir ko jinibb nevisvisenien ne nale neseseiren nir, nir kele arsoṗsoṗe ni arwerwera lululweni tevir, "Ni okloli jinibb n̄inij nir armaur, ko ni sete bbong ololi lweni ni emaur niko!

32 Rraplesi ta Kristo Numal se n̄eri Isrel nir pujubbul rengo nai pelaot vini ngatan e, ko kerr p̄ilesi ko puosuri ni vajin." Ko laru nga marruloni nuru tevi ni rengo nai pelaot, nuru kele orij esij tevi ni.

Mijen se Iesu

33 Renge leval mawos daron nga nial muwosput e, ko nat emalik rengo vanu jijle nir ejpari mete nial itul sapon.

34 Ko rengo mete nial itolin nat mirivriv vajin ko Iesu ekail drrelan elep van mare owra "Eloi! Eloi! Lama sapaktani?" nga muwra puwra mirpel "Atua suk Atua suk, erpese kumiel lingik?"

35 Ko jinibb sopor nga martur rengo lat nen arunge nale ngok nga ni muwrai ko arwera "Kaprunge, ni everuse Elaeja ko."

36 Ko jinibb san owlu van ela nalum, ko elngi re venika nga pujn̄i puwun ren ko elai elngi re mavor, ko esareni van mare rengo jingo Iesu. Ko owra "Kaplinglingi, rraplesi ta poro Elaeja pivini ko pujri tweni vini ngatan e."

37 Ko Iesu ekail drrelan elep lengleng ko osrow pini, emij.

38 Ko kalek nga murrul ore lat nga muon rengo Naim On eteri rengo ngatan ejpari mare devjen erue.

39 Batun ne jinibb nuval nir otur mawose Iesu non, ko daron nga n̄ilesi ni mimij mirpok, ko owra "Ewretun n̄erel evi Atua Natun."

40 Nesevin sopor nir Merri korti nuru, Merri ne Maktala ko Merri nga Jemes nga welili, ko Joses tasu se nuru, ko Salome, arok-tur ie ngasu wor sapon. Ko arok-kulu van arok-meteni.

41 Nir arok-vijuri Iesu rengo Galili, arok-pitevi ni rengo nanu nir. Ko nesevin n̄inij kele wor elep nga marvijuri suri ni vini rengo Jerusalem e.

Josep etevni Iesu

¹ 15:28 Nale nga muto re nolo [], rrek sete Mak oli, ko jinibb san ea-uli vitue daron nga muli tweni kopi san ne naul ngel.

⁴² Nat erivriv pa vini, nial evan ngatan. Ko suri nabong nen evi nabong nga marok-eseser ren, ko poro nial piwaj pini vajin ko osuw, nabong on ko, setemun san orongwos puloli mun nanu san, niko

⁴³ Josep ne Aramatia evan loloim ji Paelat. Sete emtutu te, ongoni tevi nga p̄ilai nibe Iesu. Josep nen evi jinibb san nga nir martori renge gortien ser m̄irres, ko ni kele oktirive nga p̄ilesi batun vanu se Atua pivini.

⁴⁴ Paelat etaole nga murnge nga Iesu emij pa osuw, ko everuse batun ne jinibb nuval nir vini jin, ko osusi tevi ni owra “Emij pa pareng ko sopen, rrenga?”

⁴⁵ Ko batu jinibb ne nuval owra “O-o, emij pa parpareng ko sopen.” Daron nga Paelat murnge lilane jile e m̄irres jin musuw ko emarong vajine nibe Iesu tevi Josep pian puwosi.

⁴⁶ Ko Josep evan owli kalek nga miraprap nga mimalum n̄irres san, ko olwi vini ojri tweni nibe Iesu vini ngatan, ko on̄be ore kalek nen e. Ko owosi van elngi renge nevõt san nga martai jile pa nolon mutoe, ko eitini nevõt nga milep san oto ore metali nen.

⁴⁷ Ko Merri ne Maktala ko Merri nga tasu se Joses orlesi lat nga marlingi nibe Iesu rengen e.

16

Nolo nevõt oto kiskis ko Iesu emaur luwi renge mijen

¹ Mian ko mijpari renge mevinen vajin nat mirivriv, nial ean ewaj pini, ngok Sapat osuw ko vajin, ko Merri ne Maktala ko Merri nga tasu se Jemes ko Salome aran vajin arwuli rao nai sopor nga mapu suwer m̄irres, ngok nga paran parsesei renge ni niben.

² Mevinen vajin renge rorpong susu malum daron nga nial mia-meraej e renge nabong womu nen ne wik, ko nir armer-mera tweni paran renge dubb.

³ Marivel renge sel ko arok-werwera lululweni tevir, “Wurru, si le p̄itini tweni nevõt tevi kerr warreng?”

⁴ Ko moro markulu tawij imare ko arkulu pej nevõt nga, setemun arlesi, san eitini tweni pa nevõt nga milep temijpal nga.

⁵ Ko arsil van renge lolo dubb e, ko arlesi m̄elakel san nga muri sunsun nga muow raprap m̄isakel renge devjen nga van re nevrer rres e. Ko armetutu lenglengen e.

⁶ Ko owrai tevir, “Sete kapmetutu tel Nurongwose kami kampej Iesu ne doNasret nga marruloni renge nai pelaot. Ni ejki iel. Ni emaur luwi pa renge mijen.

Kapmeteni ta lat nga marlingi mimatur rengen.

⁷ Kami kapiel ma kapan, kapwerai tevi jinibb sen nir ko Pita, nga ni puwowomu terai kami renge Galili, ko renge ie kami kapa-lesi ni rengen.”

⁸ Ko arsil ivare renge dubb ko arwolu lengleng, arwolu lingi, suri aririr ko bbōsa evan renger. Ko sete arwera nale san tevi jinibb san.

Iesu eplari ji Merri ne Maktala

⁹ [Ko renge rorpong susu renge nabong womu ne wik, daron nga Iesu mimaur luwi renge mijen e, ni eplari womu ji Merri ne Maktala, vin nga nem̄in nga marsiej ebud marsisilvi ni ko Iesu muoji twenir ren.

¹⁰ Ko vinnen evan ko owrai tevi nir sopen nga marok-pitevi Iesu nga martaur ko marok-tengsi ni marrorrm̄i.

¹¹ Ko daron nga marunge nga ni mimaur luwi ko Merri m̄ilesi, ko sete arosuri te, ejki.

Jinibb se Iesu eru orlesi ni

¹² Vitunen renge ngok, ko Iesu eplari kele ji jinibb eru orlesi ni renge daron nga morivel lingi ngaim.

¹³ Ko nuru orivel van orwerai tevi nir jijle, ko nir sete arosuri kele nale se nuru.

Iesu eplari vajin ji jinibb sen esngavöl drromon san (11) arlesi ni

¹⁴ Ko vitunen Iesu eplari kele ji jinibb sen esngavöl drromon san, renge daron nga marsakel maraan e. Ko ni otortorir suri norrorrm̄ien ser sete otoo ko sete marosuri lartul nga marwerai nga marlesi ni mimaur luwi renge mijen.

¹⁵ Ko ni owrai tevi jinibb sen nir owra “Kami kapiel kapan renge vanu nga musuw ngok, kapwerwer renge nos̄pen nga m̄irres suk tevi jinibb jijle nga musuw ngok nir.

¹⁶ Mer nga muosuri ko mipaptaes, Atua pia-la mauren tevi; ko m̄ier nga sete muosuri, Atua pia-tor vitrangi.

¹⁷ Nelesien ngel nir parvijuri suri lartul nga marosuri. Renge inu nisek nir paroji tweni demij rengen, ko parongwos pari j nale nga marmerr nir.

¹⁸ Nir parwosi num̄et ko parmini nuwi nga m̄isij, ko sete purongwos pulolir parmij e. Ko parongwos parlingi nevrer re jinibb nga marmesi, ko jinibb nga marmesi nen nir parres luwi.”

Iesu olwi van renge melrin e

¹⁹ Ko daron nga Numal Iesu m̄irij jijle tevir musuw, ko vitunen vajin ko Atua elai Iesu van renge melrin e, ko ni esakel renge Atua nevrer rres.

²⁰ Ko jinibb sen nir arivel aran arwerwer renge vanu nga musuw ngok. Ko Numal

emajing tevir, ololi nelesien elep nga mar-
viseni nga nale ser evi weretunen.]]

]] **16:20** Nale nga muto re nolo [], ngok meten 9 ejpari 20, rrek sete Mak oli, ko jinibb san ea-uli vitue daron nga muli tweni kopi san ne naul ngel.

**Nospen nga Mirres se
Iesu Kristo nga
LUK
Muli
Batu nale nga mivsvseni
lut nga parmeteni naul
ngel puto suri**

Naul ngel, ne nospen nga mirres se Iesu Kristo nga Luk muli, ospe suri Iesu, nga ni evi jinibb nga Atua muloli rijrijen sen tevi meri Isrel nir tuwi, nga ni muwra pia-koni vini nga pila mauren tevi nir ko tevi jinibb ne iel ngatan jijle nir. Luk oli tweni re naul sen ngel nga Iesu ngok, Nem'in se Atua everuse nga "puwrai tweni nospen nga mirres sen tevi Beres (puaman) nir." Ko iok ko ololi rramlesi nospen nga mirres nga Luk muli, owun saute jilweren nga marviseni nga Atua okrorrormi lenglengen jinibb nir nga marlesi norongen nga misij.

Luk nga muli naul ngel oli naul minij kele san nga nisen "Majingen se Aposol nir." Naul ngok ospe suri jilweren nga marpelari vitu re daron nga Iesu mian mare re melrin e.

Jilweren sopor arpelari re naul ngel kis kobbong, ko sete arto re naul itul ngok ne nospen nga mirres se Iesu Kristo (Matiu, Mak ko Jon). Ngok jilweren nga muspe suri anglo nir marlai nubo (2:13,14), ko nga muspe suri nir nga marmetmet sipsip nga maran parlesi Iesu daron nga miak e (2:8-20), ko nga muspe suri daron nga Iesu mivi melakel malume ko mian re Naim On (2:41-50), ko nale rrongrongvi ne meri Sameria nga mirres ngok (10:25-37), ko nale rrongrongvi ne melakel nga mutor jabble sel (15:11-32).

Nanu nga marlelep nga Luk muspe surir milep re naul ngel erpe loten, Nem'in On, majingen se nesevin nir nga marwilwil se Iesu, ko ospe suri kele nga Atua orongwose pitlasi tweni nololien se jinibb.

Etipatun

¹ Selek Teopilas, jinibb elep pa arpelak arwera paruli tweni jilweren ne nanu ngel nir nga marpelari ji kerr ngel nir.

² Erpe renge womu jer nen, nir arlesi renge meter ko aruli tututweni nale nen nir renge naul, ko arwerair tevi kerr.

³ Ko inu nulesi evi nanu nga mirres nga inu kele boli tututweni nale nen nir renge naul tevi nik. Suri inu nomokmeteni suri nanu ngel nir bonevis le wor, ko nurongwos boli surir tevi nik pimawos;

⁴ ko puloli nga nik kuprongwose nanu nga marvisisenir tevi nik arivi weretunen temijpal.

Anglo owra tweni nga Jon Baptaes piak

⁵ Nanu ngel nir arpelari renge daron se Erot, renge daron nga mivi numal renge jutia e. Ko renge daron nen jinibb ne sulsulen san elik rengen, nisen Sekaraea. Ni evi san renge meling jinibb ne sulsulen se Apaaja. Ko nesen sen Elisapet, ni kele evi metka se Eron san.

⁶ Nuru korti orivi jinibb nga mormawos mirres renge no Atua. Orivel lilane renge nale nesesreien se Atua nir ko nale nesesreien nir.

⁷ Ko nuru korti ortera pa osuw, sia se nuru elep pa. Ko Elisapet kele evi nesevin nga minier, sete evasus, ko ololi natu nuru ejkie.

⁸ Mian ko ejpari daron se Sekaraea gortien sen nir nga parloli majingen nga jinibb ne sulsulen nir marok-loli renge nabong jile renge Naim On se Atua. Ko ni kele evan.

⁹ Ko nir arwirr daes erpe murrun se jinibb ne sulsulen nir, nga parlesi nir si nen ko nga pian pusli nanu nga mapun mirres renge naworr; ko daes orrum mawos re Sekaraea. Ko ni evan renge loloim on se Atua nga pusulsul.

¹⁰ Delung artur jer vare, parlot renge daron nga nanu nga mapun mirres pin e.

¹¹ Ko Sekaraea etaole anglo se Iova san ermali jin, ko otur renge nawot van renge devjen rres e.

¹² Ko daron nga Sekaraea milesi, ko nolon opotpot lenglengen e ko emtutu elep.

¹³ Ko anglo owrai tevi, "Sete kupmetutu, Sekaraea; Atua ornge loten som, ko nesen som pivesi nik natum norman san. Ko nik kuplingi nisen piwaji Jon.

¹⁴ Nik kuprunge pirres ko kupir pilep daron nga ni piak.

¹⁵ Ko ni poro pilep vajin ko pivi jinibb nga milep renge no Numal. Ko sete pimni norro rreknga nuwi nga miterter, pijki. Ni puwun saute Nem'in On tetajer, pitipatun renge daron nga tasu sen pivesi e.

¹⁶ Ni puloli meri Isrel nir pilep parieni lweni van ji Iova Atua ser.

¹⁷ Ko ni puwowomue Mesaea non renge nerin ko derteren se Elaeja, ko pirieni lweni tata ser nolor pirieni lweni van ji natur, ko parresres luwi tevir. Ko nir nga sete marosuri parivel vajin renge norongwosien se nir nga marmomsawos, ko puloli lilane jinibb nga martiriv tera Numal nolor pirres."

¹⁸ Ko Sekaraea owrai tevi anglo owra "Inu borongwos nanu ngel nir pipse?"

Suri inu nuvi Bırterpa, ko nesen suk kele sian elep pa osuw.”

¹⁹ Ko anglo erij luwi tevi owra “Inu nuvi Gapriel nga motur renga no Atua, ko ni okoni inu nga bowrai tevim nospen nga mırres ngel.

²⁰ Ko kuplesi, nik kupivi nabbut, sete kuprongwos kuprij kupwera nale pisan, pıtipatun lelingen ngel ko pijpari daron nga nanu ngel nir para-pelari e. Suri nga nik sete kuosuri nale suk nir, nga para-pelari renga nabong nen mawos.”

²¹ Ko renga daron nen artirive Sekaraea, ko arwera “E, erpese nga ni mılilik mipriv mirpok renga Naim On se Atua?”, ko ngok ololi bbösa elair e.

²² Marok-tiriv mian ko ni eivare renga Naim On vini vare e. Ko evi nabbut, sete orongwos pırij. Ko ewırrieni nevreng tevir; ko nir arongwose nga ni elesi nemın san renga Naim On.

²³ Mian ko nabong ne majingen sen nir osuw, ko ni olwi van renga naim sen e.

²⁴ Mian ko nabong sete elep mun ko nesen sen Elisapet ejien. Ko ok-lik tepi malume ejpari navöl elim, ko owra

²⁵ “Nurongwose vajin nga Numal ko orrorrmi inu, ko niko ela tweni vajin nanu nga jinıbb nir marok-meteni inu suri.”

Anglo owra tweni nga Iesu pıiak

²⁶ Ko Elisapet navöl sen ouwon easi osuw, ko Atua okoni kele anglo Gapriel evan renga ngaim nga milep san renga Galili, nisen Nasret.

²⁷ Ni otori nale nga pian puwrai tevi nesen mılakel san nga nisen Merri. Merri nen setewor norman san evan jin, ko arwera pıilik ji mır san nga nisen Josep, nga mivi metka se Devet san.

²⁸ Ko anglo evan ji Merri renga loloim sen ko owrai tevi ni, “Erres, nik kupır. Numal ololi erres tevim ko eptevi nik.”

²⁹ Ko Merri nolon opotpot e ko orrorrmi karkare renga nale nga anglo muwrai ngok, owra “O, sev le ngel?”

³⁰ Ko anglo owrai tevi ni, “Merri, sete kupmetutu, suri Atua erres tevim.

³¹ Ko kuplesi, nik kuptetaur, ko kupa-wosi natum norman san. Ko kuplingi nisen piwaji Iesu.

³² Ni pivi Jinıbb nga milep ko parveruse Atua ne Drromsen Mare Natun. Ko Iova Atua puloli ni pivi Numal pirpe apu sen Devet tuwi.

³³ Ni pivi Numal renga metka se Jekop nir tuwi ngok vini. Ko batun vanu sen sete purongwos pusuw.”

³⁴ Ko Merri owrai tevi anglo owra “O, ko inu sete nuvijuri wor norman san, ejki. Ko nanu ngel putoe pirpese le?”

³⁵ Ko anglo owrai lweni tevi Merri owra “Nemın On ko pivini jim, ko derteren se Atua ne Drromsen Mare pivini pisalsal orem. Ko suri nanu ngel, jinıbb parwerai bipi nga mıiak On, ko evi Atua Natun.

³⁶ Ko kuplesi niaken som Elisapet. Ni evi nesevin nga mırmer, ko etra pa evi lektor osuw; ko etetaur vajin lelingenok, navöl sen ouwon le ngel vajin.

³⁷ Suri sete nanu san rragrag nga Atua sete orongwos puloli.”

³⁸ Ko Merri owrai tevi “Inu nuvi nesevin ne majingen se Numal lebbong, ko erres kobbong, puto pirpe nga nik kumwerai ngok.” Ko anglo evel lingi ni.

Merri evan oklue Elisapet

³⁹ Ko renga vitunen vajin, Merri ewit ngavilvil van renga botwen nga ngaim nga milep san ne Jutia muto rengen.

⁴⁰ Ko esil van renga loloim se Sekaraea e, ko owra “Erres” tevi Elisapet.

⁴¹ Ko daron nga Elisapet moka-runge nale se Merri, ko bipi nga mimatur renga depain eir ko ewırır renga depain, ko Elisapet owun saute Nemın On.

⁴² Ko ekail drrelan elep van mare, ko owra “Atua erij erres surim renga nesevin mırinj nen jile nir, ko erij erres suri bipi nga kumsoloi renga depain!

⁴³ Ko erpese tasu se Numal suk mivini mılesik?”

⁴⁴ Ko kuplesi, daron nga inu mornge nale som, ko bipi nga mosloi renga depaik eir e ko ewırır e.

⁴⁵ Neiren renga nik, suri nga kumosuri nale nga Numal mukoni anglo sen muwrai tevi nik piplari.”

Merri osrövi Atua

⁴⁶ Merri owra

⁴⁷ “Renge mauren suk totoklai nusrövi Atua ne Drromsen Mare. Ko nemık eir suri Atua nga moklai mauren tevik, ko nga murrorrmi inu milep.

⁴⁸ Suri ni orrorrmi terai inu nga mevi nesevin ne majingen sen ko nga mevi nesevin nga welili jer. Ko renga lelingen ngel ko tuwi ngok vini jinıbb parveruse inu nesevin nga Atua mılai neiren tevi,

⁴⁹ suri nanu nga milep nga Atua nga derteren sen milep muloli tevi inu. Ni nisen On.

⁵⁰ Eviseni merrenien sen tevi nir nga marmetutue ni renga dul nga tuwi pa ko nga lelingen ngel ko nga para-vini kele.

⁵¹ Eviseni derteren sen tevi delung arlesi. Ololi nir nga nolor mian mare arsarr suri norrorrmien ser.

⁵² Ni ela tweni nir nga marivi numal nga marlelep renga nai seksakel ser nga marsakel rer aran ngatan, ko ok-susi lartul nga maran ngatan van mare.

⁵³ Jinibb nga numer mīajir, ni lolir arup erres. Ko jinibb nga joror milep, ni okoni twenir artotori nevrer kiskis arivel.

⁵⁴ Otori rijrijen sen nga muloli tevi apu se kerr nir nga tuwi pa, ko orrorrmi kerr mēri Isrel, ni jinibb sen nir;

⁵⁵ erpe nga muwrai pa tevi apu se kerr nir, ko Epram, ko metka sen nir nga para-vini vitunen suri ni, pian pijpari tuwi ngok vini.”

⁵⁶ Ko Merri elik tevi Elisapet erpe navöl itul sapon, ko evel olwi kele van reнге ngaim sen e.

Jon Baptaes eak

⁵⁷ Mian ko ejpari nabong nga Elisapet puwosi natun e, ko ni evasus; ko natun evi norman.

⁵⁸ Ko selen nir ko niaken sen nir arunge nga Numal muloli mīrres tevi ni ko nga murrormi ni, ko nir arir elep tevi.

⁵⁹ Mian ko ejpari bongin owil, ko nir arini nga parloli ni pian reнге movil parevji parloli ni pīlalos. Ko arwera par-lingi ni nisen piwaji kele tata sen Sekaraea.

⁶⁰ Ko tasu sen owra “Ejki! Ni nisen piwaji Jon.”

⁶¹ Ko nir arwerai tevi ni, “Ko nik. Sete metka som san ewaji nais ngel.”

⁶² Ko nir arij e nevrer tevi tata sen nga ni puwra nisen piwaji isi.

⁶³ Ko Sekaraea owra parla nanu nga marok-ulul ren san tevi ni. Arlai tevi, ko ni oli nisen owra “Ni nisen piwaji Jon.” Ko nir jile artaole.

⁶⁴ Ko reнге daron mawos nen ko pa erij luwi, ko osróvi Atua.

⁶⁵ Ko nir nga marlik mori ni armetutu, ko bbōsa elair e. Ko nospen nen arsupe rrale ngaim nga marto rrale botwen ne Jutia e nir.

⁶⁶ Ko jinibb jile nga marunge nospen ne bipi ngel arrorrmi reнге nolor ko arwera “Bipi ngel pia-ivi bipi nga pia-irpese le?” Suri oto limjer ngel nga Atua ne Drromsen Mare derteren sen eptevi.

Sekaraea Nemīn On esilvi ko evi propet

⁶⁷ Ko tata sen Sekaraea Nemīn On evini esilvi, ko owun saute. Ko erij erpe propet owra

⁶⁸ “Kerr rrapsturōvi Atua se kerr mēri Isrel nir. Suri ni evini oklue kerr jinibb sen nir, ko orpaji tweni kerr rramiel sisarow vajin.

⁶⁹ Elai jinibb nga derteren sen milep san tevi kerr nga pīla mauren tevi kerr; ni evi metka se Devet san.

⁷⁰ Erpe Atua owrai pa tuwi reнге jingo propet on sen nir,

⁷¹ ni erijrij pa nga pījnge devje nuval se kerr nir reнге kerr, ko pirvei tweni kerr reнге nevre nir nga marungasi kerr nir.

⁷² Ko ni eviseni merrenien sen mawos apu se kerr nir nga tuwi, ko orrorrmi suri rijrijen on sen.

⁷³ Ololi rijrijen nga mīterter reнге ni nisen tevi apu se kerr nga tuwi Epram.

⁷⁴ Ewer telasi tevi ni nga ni pirvei tweni kerr reнге nevre devje nuval se kerr nir, ko kerr rraploli majingen sen nga sete rrapmetutu rragrag vajin pijpari nga rrapa-mij.

⁷⁵ Rrapivi jinibb on sen ko rrapivi jinibb nga mumomsawos mīrres reнге ni non reнге nabong jile reнге mauren se kerr.

⁷⁶ Ko nik bipi suk, parveruse nik nisen kupwaji Atua ne Drromsen Mare propet sen; suri nik kupwowomu reнге no Numal nga kuploli lilane sel sen.

⁷⁷ Kupwer telasi sel sen limjer tevi jinibb sen nir, nga Atua pītiasi tweni nololien ser ko parmaur,

⁷⁸ suri merrenien nga milep se Atua se kerr. Ni pukoni moron ne melrin pivini puklue kerr,

⁷⁹ ko pimor vaseni nir nga marlik tongma-lik reнге namol ne mijen; ko puloli bēla kerr parivel reнге sel ne demat.”

⁸⁰ Ko mian ko nanwarreng nga elep rujruj ma reнге niben ko norrorrmien sen, reнге nga pīmajing se Atua. Ko tetajer ok-an ok-lik reнге lolo merwer ok-tirive nabong nga ni pia-vini limjer reнге no mēri Isrel nir.

2

Iesu eak

¹ Renge daron nen batu numal se mēri Rom nir nga nisen miwaji Sisa Okastas elngi nale neseseiren san, emrreni pareve jinibb jijle nga ni mimetmete nir, purong- wose nir evis totoklai.

² Ngel evi sensas nga womu nen, reнге daron nga Kwaerinas mivi numal nga milep reнге Siria.

³ Ko niko reнге wosenen jinibb jijle arlulwi wor van reнге vanu ser e, nga norman nir paruli niser reнге naul reнге ngaim ser mawos.

⁴ Ko ngok niko Josep evel lingi ngaim ne Galili san nga nisen Nasret, lat nga mīlik e, ko evan reнге ngaim ne Jutia san nga nisen Betliem. Ie evi lat nga numal Devet mīiak e rengen tuwi. Ko niko Josep mulwi wor van ie, suri ni evi metka nga miplari reнге metka se Devet san.

⁵ Josep eptevi nesen sen Merri, nuru oran nga parlai nise nuru. Orlik korti ma, ko Josep setewor ean jin. Ko Merri otomori pa pivesi natun.

⁶ Ko reнге daron nga morlik reнге Betliem e ko evi daron mawos nga Merri puwosi bipi sen e.

⁷ Ko ni evesi womue natun norman eak rrongvi. Ko ni ela kalek nga mimalum n̄irres ko onbe ore e, ko evetri ematur ngatan renge narov san nga marok-wungani nanu rrum nir rengen. Suri naim nga jinibb marlik renger loloim nen nga markel ototvi sete evter nir, ko lat nga nuru porlik rengen ejki.

⁸ Ko renge lat nen jinibb ne ngaim nen sopor arlik orsel arok-metmete sipsip ser renge nat nga mupong nen.

⁹ Ko anglo se Iova san evini eplari jir, ko nosrövien se Iova omor rrerraler; ko nir armetutu elep.

¹⁰ Ko anglo owrai tevir, "Sete kapmetutu te pijki! Kaplesi, inu nuvini tevi nospen nga n̄irres nga bowrai tevi kami, nga pilai n̄iren nga milep temijpal tevi jinibb jijle nir.

¹¹ Renge lelingen ngel, renge nata mupong nga ngel, renge ngaim ngel se Devet, bipi san eak rengen nga pilai mauren tevi kami. Ni evi n̄er nga Atua n̄irijrij nga pukoni, ni evi Mesaea ko Numal.

¹² Nanu ngel le pivi nelesien nga piviseni tevi kami: kami kapan ko kaplesi bipi san nga marnuŋe ore kalek nga mimalum n̄irres e, ko marlingi mimatur ngatan renge narov nga marok-wungani nanu rrum nir rengen."

¹³ Daron mawos nen ko pa anglo ne melrin nir arini arpitevi anglo nen, ko arla nubo, arsurövi Atua ne Drromsen Mare, arwera

¹⁴ "Nosrövien pian ji Atua ne Drromsem Mare! Ko renge iel ngatan ngel demat puto renge jinibb se Atua nga ni mimrrenir."

Jinibb nga marok-metmete sipsip nir aran Betliem

¹⁵ Mian ko daron nga anglo marivel lingir e marluwi vajin van renge melrin e, ko jinibb nga marok-metmete sipsip arwerwera tevir, "Kerr pian ta Betliem rraplesi ta nanu nga miplari ngel nga Atua muwrai tevi kerr."

¹⁶ Ko nir arwit lengleng van; ko arlesi Merri ko Josep ko bipi nen nga mimatur renge narov nga nanu rrum nir marok-wunganir rengen.

¹⁷ Ko daron nga marlesi jile bipi e, ko arsuŋupe tevi jinibb nir sev nga anglo nir marwera tevir suri bipi.

¹⁸ Nir jijle nga marunge nale ngel nir nga jinibb nga marok-metmete sipsip marsupe suri tevir artaol lengleng.

¹⁹ Ko Merri otori totkoni jile rijen nen nir ko elngir renge nolon, orrorrmi surir eterter.

²⁰ Ko jinibb nga marok-metmete sipsip arluwi, ko arsurövi Atua, arwera erres

tevi ni renge nanu jile nga marunge ko marlesir mirpe nga anglo muwrai tevir.

²¹ Mian ko bipi nen bongin owil, omom-sawos bongin nga parloli pian renge bae e, ko arloli evan renge bae. Ko arlingi nisen ewaji Iesu, nisen nga anglo n̄ilngi womue mian ko vitunen vajin ko Merri mia-soloi.

²² Mian ko ejpari daron momsawos nen nga Josep ko Merri parloli murrun nga nale neseseien se Moses muwrai nga puloli nuru porwokwok re no Atua ko jinibb, ko orwosi Iesu van renge Jerusalem nga porla lweni tevi Iova.

²³ Erpe aruli renge nale neseseien se Iova, "Bipi norman jile nga n̄iak rrongvi womu nen e aron, arivi se Iova."

²⁴ Ko parloli sulsulen pirpe nga nale neseseien se Iova muwrai parlai: "Wun̄er p̄ieru, rreknga daro p̄ieru."

Simeon elesi Iesu renge Naim On se Atua

²⁵ Ko Birtera san elik renge Jerusalem renge daron nen, nisen Simeon. Ni evi Birtera nga mumomsawos n̄irres, ko evi jinibb se Atua nga mimtutu ko etriv terai p̄ilesi n̄er nga pilai mauren tevi n̄eri Isrel nir. Ko Nem̄in On se Atua eptevi ni,

²⁶ eviseni tevi ni nga ni sete pimij mun, p̄ilesi mun Mesaea se Iova nga n̄irijrije puwomu.

²⁷ Ngok Nem̄in On eptevi ni van renge Naim On se Atua. Ko re wosenen mawos ko pa tasu se bipi ko tata sen orsale Iesu vini renge Naim On nga parloli sulsulen tevi ni pirpe nga nale neseseien se Atua muwrai.

²⁸ Ko Simeon elesi bipi, ko owosi esale renge nevren ko osrövi Atua owra

²⁹ "Lelingenok kuplinglingi jinibb ne magingen som vajin p̄ivel renge demat, pirpe nale som muwrai.

³⁰ Lelingen ngel metek elesi jinibb som nga pia-la mauren tevi jinibb nir

³¹ erpe nga nik kumloli lilane renge no jinibb jijle ne iel ngatan nir.

³² Moron nga pimor vaseni jinibb jijle ne vare nir, ko pivi nosrövien se kem n̄eri Isrel nir nga namivi jinibb som."

³³ Ngok tata sen ko tasu sen ortaole nale nga muwrair ngok nir suri ni.

³⁴ Ko Simeon erij erres suri nir; ko owrai tevi tasu sen Merri owra "Kupmeteni! Atua otobbtobbue bipi ngel nga pulokloksi n̄eri Isrel pilep parvitan, ko p̄isa raji lweni nir pilep. Ko pivi nelesien nga n̄eri Isrel pilep parij tere.

³⁵ Ko ngok niko pimor vaseni norrorrmien se jinibb pilep nga marok-silvenir marto teptepi parto limjer vajin. Ko nik nolom purnge p̄isij pirpe nesip nuval nga

muso renge devjen korti m̄isari rrurngi nolom.”

Ana elesi Iesu renge Naim On

³⁶ Ko renge daron nen lekter san evi propet, nisen Ana. Ni evi natu Panuel ko evi metka se Aser san. Bonevis, daron nga mivi nesen m̄elakel kobbong, ko elik ji diwen sen; ko orlik sia ebut, ko diwen sen emij lingi. Ko otur nawon sia elep lengleng.

³⁷ Sian evi ngavöl owil drromon ivij (84) vajin. Ko sete elinglingi Naim On nabong san. Renge rorpong jile ko rivriv jile okorti tevi nir nga marok-lot ko marok-linglingi nanen suri.

³⁸ Ko Ana evini renge loloim ne Naim On renge daron mawos nga Simeon m̄irij m̄irres suri bipi e. Ko omurrarrong suri nale nga muwrai suri bipi ngel, ko owra erres elep tevi Atua suri. Ko ospe suri tevi jinibb jijle nga martiriv tera Atua p̄itlasi tweni m̄eri Isrel nir.

Merri ko Josep orwosi bipi arluwi van Nasret e

³⁹ Merri ko Josep orloli nanu nga nale nesreien se Atua muwrai jile, ko orwosi bipi arluwi van renge Galili e renge ngaim ser Nasret.

⁴⁰ Ko bipiwarreng nen elep rujruj ma, ko jin eteter, ko owun saute norongwosien. Ko Atua erij erres suri ni.

Iesu evan renge Naim On se Atua daron nga mivi nanwarreng malum e

⁴¹ Renge sia jijle tata se Iesu ko tasu sen orok-pitevi nir nga marok-an renge Jerusalem nga marok-tori nanen ne asien.

⁴² Daron nga Iesu sian mijpari esngavöl drromon eru malum e ko tata sen ko tasu sen orpitevi ni nir kes aran renge nanen ne asien, erpe tetajer marok-loli.

⁴³ Mian ko ejpari nabong nga marlingi nanen ne asien puto renger arsuw, ko jinibb artipatun arluwi van renge ngaim ser e. Ko Iesu elik jer renge Jerusalem; tata sen ko tasu sen sete orongwose nga ni m̄ilik jer.

⁴⁴ Orrormi rreknga ni eptevi pa meling ne jinibb nga ngok nen sopor nga marlulwi van renge ngaim ser e. Mian ko otomori pivi vajin nabong totoklai san, ko ortipatun orkulkulu pej renge metka ser nir ko seler nir,

⁴⁵ ko sete orlesi te ejki. Mian ko orluwi kele van renge Jerusalem e, orpej kele.

⁴⁶ Mian ko renge nabong itolin vajin ko orsekai renge Naim On se Atua, m̄ilik tevi jinibb ne nevisvisenien se m̄eri Isrel nir, ko ok-murrarrong nir ko ok-susi lweni nale tevir.

⁴⁷ Ko nir jile nga marunge nale sen bbösa elair e, suri marunge renge rijen sen nga mok-rij weli lweni nale se jinibb nevisvisenien se m̄eri Isrel nir, nga norongwosien sen elep.

⁴⁸ Daron nga tata sen nuru tasu sen morsekai ni e ko ormabbös bbösa elai nuru e, ko tasu sen owrai tevi, “Wurru natuk erpese kumloli mirpok tevi komru? Kuplesi tata som ko inu nomor-runge esij, nolo komru opotpot elep nga nomor-pej nik.”

⁴⁹ Ko Iesu owrai lweni tevi nuru, “Komor-pej inu suri sev? Sete komor-rongwose nga inu ßelik renge naim se Tata suk ko wor?”

⁵⁰ Ko nuru sete orongwose isev ko nga muwrai tevi nuru.

⁵¹ Ko Iesu evini ji nuru ko arluwi van renge Nasret e, ko ni tetajer ok-runge drrela nuru. Ko tasu sen orrormi suri nanu ngel nir tetajer, sete emalie nir.

⁵² Ko Iesu elep oruj renge niben ko norongwosien sen, ko Atua eir rengen, ko jinibb kele arir rengen.

3

Werweren se Jon Baptaes

¹ Renge sia esngavöl drromon elim (15) nga Taepirias Sisa mivi batu numal renge Rom, ko Ponjes Paelet evi numal ne Jutia, ko Erot Antipas evi numal ne Galili, ko tuwan Pilip evi numal ne Ituria ko Trakon-aetas, ko Lisianas evi numal ne Apilin,

² ko Anas ko Kaeapas orivi batu jinibb ne sulsulen nir; ko renge daron nen ko nale se Atua evini ji Jon Sekaraea natun renge daron nga m̄ilik renge lolo merwer e.

³ Ko Jon evel p̄etpeti renge vanu nga marto mori Jortan nir, ewerwer renger, owra “Kaprieni lweni nolo kami renge nololien se kami nir, ko kappaptaes; ko Atua p̄itlasi tweni nololien se kami.”

⁴ Erpe nga propet Aesea muli renge naul sen muwra “Jinibb san ekail renge lolo merwer, owra ‘Kaploli

lilane sel se Numal puto metmet terai, ko kaploli meseke sel sen nir parmetet p̄irres.

⁵ Bbulwil nga marp̄errparrorr van ngatan nir kaptevnir parsorsan, ko botwowout jile nir kapjuröni nir paran ngatan parsorsan,

⁶ nga jinibb jijle parlesi sel nga Atua p̄ila mauren tevi jinibb nir.”

⁷ Delung elep arivel sele Jon, nga ni pipaptaese nir. Ko ni owrai tevir, “Kamivi jinibb nga kamsij O! Kamirpe metka ne nuniet! Isi osusur metu tevi kami nga kapwolu lingi lolaren se Atua nga pia-vini?

⁸ Poro nolo kami pulululwi, rrek erres kapviseni wenen nen. Sete kapwerwerai tevi kami lululweni, ‘O, kem namivi metka se Epram, ko p̄irres bhong re kem.’ Inu

nuwrai tevi kami, Atua orongwos ðila nevöt nawon nga ngel nir ko þirienir parivi metka se Epram.

⁹ Leligen ngel artori batu deli oto metmet nga parta ototvi laþe nai nir; ko nai jile nga marsij, sete wener marres mun, parta twenir parwirr nir van reнге nabb nga m̄in."

¹⁰ Ko delung, daron nga marunge nale sen, ko arsusi lweni tevi ni, "Ko kem nabloli sev ma?"

¹¹ Ko ni owra lweni tevir owra "Mer nga sunsun sen m̄ieru ðila tuwen tevi m̄er nga sunsun sen mijkie; ko m̄er nga nanen sen mutoe, ni kele puloli pipok puwngani sapon tevi m̄er nga nanen sen mijkie."

¹² Ko jinibb nga marok-la nevöt ne takis nir arini jin nga ni pipaptaese nir, ko arsusu tevi ni arwera "Ko kem nabloli piprese?"

¹³ Ko ni owra lweni tevir, "Kami sete kaplai nevöt þiasi reнге lar nga marlingi tevi kami nga kaplai rengen."

¹⁴ Ko jinibb nuval nir arsusi tevi ni arwera "Ko kem nabloli piprese?" Ko ni owra lweni tevir, "Kami sete kapon tertere jinibb nga kapla nevöt jin, ko sete kapsusur metu tevir kapwera kaploli nanu san tevir nga puloli kami kapla nevöt jir. Ko kapir kobbong suri nowli kami."

Mian ko Kristo pivini

¹⁵ Jinibb norrormien ser artipatun arunge erres suri Jon, ko arrormi rrekma ni evi Mesaea.

¹⁶ Ko Jon orongwose norrormien ser ko owra lweni tevir, "Inu nupaptaese kami e nuwi rres kobbong. Ko san ko ma niko piavitu suri inu vini, ni ean wor mare reнге inu, ko inu sete nurres rragrag nuvter re ðetlasi tweni dil ne but sen. Ni ko ma piaptaese kami e Nerñin On ko nabb.

¹⁷ Ni otori nai juljule san reнге nevren nga puljulje wene wit e nir, ko dokolvir parwirr lingi jelangir; ko þiser kortoni jelangir þilngir reнге ðeþeim sen, ko pusli dokolvir reнге nabb nga sete san orongwos pivsi pini."

¹⁸ Ko ela nale lele kele wor elep tevir reнге nga m̄iwerwer tevir reнге nosþen nga m̄irres.

Jon Baptaes evan reнге naim ne nekaien

¹⁹ Ko Jon otortori Numal Erot suri m̄itkai luwe nesen se tuwan Pilip, Erotias, ko suri kele wor nanu elep nga mulolri marsarr.

²⁰ Ko nanu nga m̄isij þerþer nen nga muloli evi vajin nga m̄ilngi Jon reнге naim ne nekaien.

Jon epaptaese Iesu

²¹ Ko daron nga setewor Erot m̄ilngi Jon re naim ne nekaien, ko Jon epaptaese

jile jinibb nir osuw, ko vitunen vajin ko epaptaese Iesu. Ko reнге daron mawos nga pa mipaptaese ngok ko, ko Iesu olot ko melrin eteri wukari etþir.

²² Ko Nerñin On ojubbul vini; ko ololi niben otee erpe wuñer, ko orow vini esakel reнге Iesu. Ko Atua drrelan evel reнге melrin vini erij tevi, owra "Nik kivi Natuk nga numrrenim elep. Nurunge erres elep surim."

Iesu metka sen nir

²³ Iesu etipatun majingen sen reнге daron nga sian pirpe pingavöl þitul (30) sapon. Ko jinibb arwera ni evi natu Josep, ko tata sen ko Josep. Ko Josep evi natu Eli

²⁴ ko Eli evi natu Matat, ko Matat evi natu Livae ko Livae evi natu Melki ko Melki evi natu Janai ko Janai evi natu Josep.

²⁵ Ko Josep evi natu Matataias ko Matataias evi natu Amos ko Amos evi natu Naum ko Naum evi natu Esli ko Esli evi natu Nakai.

²⁶ Ko Nakai evi natu Maat ko Maat evi natu Matataias ko Matataias evi natu Semin ko Semin evi natu Josek ko Josek evi natu Jota.

²⁷ Ko Jota evi natu Jonan ko Jonan evi natu Resa ko Resa evi natu Serupapel ko Serupapel evi natu Salatail ko Salatail evi natu Neri.

²⁸ Ko Neri evi natu Melki ko Melki evi natu Ati ko Ati evi natu Kosam ko Kosam evi natu Elatam ko Elatam evi natu Er.

²⁹ Ko Er evi natu Josua ko Josua evi natu Eliesia ko Eliesia evi natu Jorim ko Jorim evi natu Matat ko Matat evi natu Lipae.

³⁰ Ko Lipae evi natu Simeon ko Simeon evi natu Jutas ko Jutas evi natu Josep ko Josep evi natu Jonam ko Jonam evi natu Eliakim.

³¹ Ko Eliakim evi natu Melea ko Melea evi natu Mena ko Mena evi natu Matata ko Matata evi natu Natan ko Natan evi natu Devet.

³² Ko Devet evi natu Jese ko Jese evi natu Opet ko Opet evi natu Boas ko Boas evi natu Salmon ko Salmon evi natu Nason.

³³ Ko Nason evi natu Aminatap ko Aminatap evi natu Atmin ko Atmin evi natu Ani ko Ani evi natu Esron ko Esron evi natu Perej ko Perej evi natu Juta.

³⁴ Ko Juta evi natu Jekop ko Jekop evi natu Aesak ko Aesak evi natu Epram ko Epram evi natu Tera ko Tera evi natu Nakor.

³⁵ Ko Nakor evi natu Seruk ko Seruk evi natu Reu ko Reu evi natu Pelek ko Pelek evi natu Eper ko Eper evi natu Sela.

³⁶ Ko Sela evi natu Kenan ko Kenan evi natu Apaksat ko Apaksat evi natu Sem ko Sem evi natu Noa ko Noa evi natu Lamek.

³⁷ Ko Lamek evi natu Metusela ko Metusela evi natu Inok ko Inok evi natu Jaret ko Jaret evi natu Malalel ko Malalel evi natu Kenan.

³⁸ Ko Kenan evi natu Inos ko Inos evi natu Set ko Set evi natu Atam, ko Atam evi natu Atua.

4

Demij orowrowe Iesu

¹ Ko Iesu owun saute Neñin On, ko evel lingi Jortan, olwi. Ko Neñin On owomue ni evan rengen lolo merwer e.

² Ko ni elik iok nabong ngavöl ivij (40) nga Demij purrowrowe ni. Ko rengen nabong ngok nir, ni sete orro nanen san renger ejpari marsuw. Ko rengen vitunen vajin ko ornge numer aji lenglengen.

³ Ko Demij owrai tevi ni owra "E, nik kuvi pa Atua Natun! Kupwera! tevi nevöt nawon ngel piri ni pivi niv."

⁴ Ko Iesu owra lweni tevi owra "Ejki, Naul On owra 'Jinibb sete orongwos pima-ur e niv kis pisan.' "

⁵ Ko Demij eptevi ni ortongsa van mare sopen. Ko eviseni batun vanu ne iel ngatan totoklai tevi ni evesane erpe navil nga mivil.

⁶ Ko owrai tevi, "Bela derteren ne nanu ngel jile nir tevim ko nosrövien ner jile, suri arlair pa tevi inu, ko inu vajin belai tevi isi nga inu memrreni.

⁷ Ko niko poro nga nik kupjipa ngatan ko kuplotoe inu, ko ngok nanu ngel jile parivi som."

⁸ Ko Iesu owrai lweni tevi owra "Ejki, Naul On owra 'Nik kuplotoe Iova Atua kobbong, ko nik kuploli majingen se ni kobbong.' "

⁹ Ko Demij eptevi ni kele van rengen Jerusalem e ko elngi ni rengen drromo Naim On mare jer, ko owrai tevi, "E, nik kuvi pa Atua Natun! Kuprow jubbul iel van ngatan e.

¹⁰ Suri Naul On owra 'Atua pukoni anglo sen parmetmete nik.'

¹¹ Ko Naul On owrai kele, 'Nir parwosim rengen nevrer mare suri nik tukjilaklak wos belam rengen nevöt.' "

¹² Ko Iesu owra lweni tevi, "Ejki, Naul On owra, 'Sete kuprowrowe Iova Atua som te, pijki.' "

¹³ Daron nga Demij murrowrow jile Iesu rengen sel nga muwra purrowrowe ni rengen ko evel lingi mun, pian pijpari nabong sopen kele ko pia-luwi kele.

Iesu etipatune majingen sen rengen Galili

¹⁴ Ko derteren se Neñin On esilvi Iesu, ko ni olwi van rengen Galili e. Ko nospen nen evel jile rengen ie nir.

¹⁵ Ko evisviseni jinibb nir rengen naim ne loten ser nir, ko jinibb jile nir arsurövi ni.

Iesu aroji tweni rengen Nasret

¹⁶ Ko Iesu olwi van rengen Nasret e rengen lat nga ni milep e bonevis. Ko rengen nabong ne Sapat ni evan rengen Naim On erpe tetajer mok-loli. Ko otur imare nga pieve Naul On.

¹⁷ Ko nir arla naul se Propet Aesea arsareni tevi ni. Ko ni elai eveve; ko elesi lat san, ko eve tevir. Lat nen owra erpel:

¹⁸ "Neñin se Iova elik rengen inu, suri ni otobtobbue inu nga bewerwer rengen Nospen nga Mirres tevi beres nir. Ni okoni inu nga bowra tweni tevi nir nga marlik rengen naim ne nekaien parivel sisarow, ko bololi nir nga meter marrorr parkulu luwi, ko bololi nir nga marlik re nekaien parivel sisarow.

¹⁹ Ko bowra tweni sia nga Iova pia-la mauren tevi jinibb sen nir.'

²⁰ Ko daron nga mieve jile, ko ni olulngi lweni naul ko esareni lweni tevir ko esakel re lat ne werweren. Ko nir jile nga marlik rengen naim ne loten arwang suri etingtingin.

²¹ Ko ni etipatun owra suri tevir, "Nale nga naul ngel muspe surir ngel nir nga kammurrarrong nir ngel, lelingen ngel Atua ololir arpelari."

²² Jinibb jile arunge nale sen nir arres pelak, ko bbösa elair e. Ko arwera "Ni evi natu Josep, rreknaga?"

²³ Ko ni owra lweni tevir, owra "Nurgen erpe kami kapwera nale san nga marok-werai ngel tevi inu, 'Dokta, kuploli nik lweni kuppres puwomu. Nanu nga kumloli rengen Kapaneam nir, kuploli iel kele rengen sisom'.

²⁴ Ko nuwretun nuwrai tevi kami, propet san, orongwos parosuri lat jile nga mian e. Ko jinibb nga ma rengen sisen woswos sete mara-osuri pelake. Nanu ngok sete erres.

²⁵ Ko rengen weretunen nuwrai tevi kami, nesevin elep rengen Isrel nga diwen ser marmij lingir rengen daron se Elaaja, rengen daron nga naus sete mus rengen sia itul totoklai ko rengen

devje sia kele san, ko numer nga milep rengen vanu ngel petpeti.

²⁶ Ko Atua sete okoni Elaaja van ji nir san, ejki. Ko okoni ni ma van rengen Saripat rengen vanu ne Saeton san, evan ji nesevin san nga diwen sen mimij lingi ie.

²⁷ Ko jinibb elep nga marmesi e mesien nga niber mimemaual rengen daron nga Elaesa mivi propet e rengen Isrel, ko nir san sete Elaesa ololi erres luwi, ejki, ko sansan kobbong Neman, nga mivi mieri Siria."

²⁸ Ko nir nga marlik renge naim ne loten loloin marunge nanu ngel e ko arlolal lengleng.

²⁹ Ko artur imare ko arrul totoni Iesu, ko arevi van vare e. Ko arpitevi van renge dromo botwen e nga marloli ngaim ser renge jeljelin, arwera parsir jubble batun puwomu van ngatan e.

³⁰ Ko ni evel rurrngi bbong livö renge delung nir ko evel asi, evel, setemun arrul totoni.

Iesu oji tweni nemün nga marsij renge jinibb san

³¹ Ko Iesu evan renge Kapaneam e, ngaim ne Galili san. Ko renge nabong ne Sapat evan renge naim ne loten, ko evisviseni jinibb nir.

³² Ko jinibb artaole nevisvisenien sen, suri nale sen nir arrow erres.

³³ Ko jinibb san nga nemün nga marsij marsilivi elik ie renge loloin ne naim ne loten. Ko ekail drrelan evan mare lengleng,

³⁴ owra "E! Sev som oto nile iel, nik Iesu ne do Nasret? Nik kuvini nga kuplokloksi kem? Inu nurongwose nik, nik kuvi jinibb on se Atua."

³⁵ Ko Iesu otortori owra "Kupmurrarong, kupsil ivare renge ni!" Ko nemün nga misij evireni mñernen ewajeni torrlai ngatan renge livö ne nir, ko evel lingi. Ko sete ololi niben sopen esij.

³⁶ Ko bbösa nga milep elair e, ko arsuþsuþe lulweni nir e arwera "Aro, nale sev le ngel? Ni nale sen otutun, muwrai tevi nemün nga marsij ko arivare arsesane."

³⁷ Ko nosþen ne nanu nga Iesu mulolir, jinibb arsuþsuþer owlu jile renge vanu ne ie nir.

Iesu ololi jinibb elep arres luwi renge mesien ser

³⁸ Ko Iesu eivare renge naim ne loten ko evan renge naim se Saemon e. Ko Saemon þilen lekter emsi e mesien dowalul nga mitterter milep, ko arwera tevi Iesu.

³⁹ Ko ni evan otur mori ji Saemon þilen lekter ko ewer ore mesien dowalul, ko mesien dowalul elinglingi. Ko lekter emra kasi ko ela nanen tevir.

⁴⁰ Mian ko nial ewaj pini vajin, ko nabong on ser osuw. Ko jinibb nga seler marmesi artektekair vini ji Iesu. Ko elngi nevren nuru renger ko ololi nir jile arres luwi.

⁴¹ Ko nemün nga marsij arivare lingi nir elep, ko arkail van mare arwera "Nik kuvi Atua Natun!" Ko Iesu otortorir ewer orer owra sete parij, suri arongwose ni evi Mesaea.

Iesu ewerwer renge naim ne loten nir

⁴² Ko renge nat nga murorpong ko Iesu evel lingi ie ko evan renge lolo merwer e, lat nga nat mubbubbil e. Ko delung arvivitu suri, arpej. Ko daron nga marlesi ko arloli lesi parwer ore ni sete pivel lingir.

⁴³ Ko ni owrai tevir, "Inu þewerwer ko wor renge nosþen nga mñirres ne batun vanu se Atua renge ngaim mñinj kele nir, suri nga nanu ngok ko Atua mukoni inu tweni nga bololi."

⁴⁴ Ko ni evel suri ngaim ne Jutia nir, ko evan renge naim ne loten nir ko ewerwer renger.

5

Iesu everuse jinibb nga marwomu marivi jinibb sen nir

¹ Renge nabong san ko Iesu ok-tur renge jeli nuwito ne Genesaret (nga nisen tuwen marveruse nuwito ne Galili) ko ok-werwer. Ko delung elep arini mori jin arunge nale se Atua, ko arlilji ni.

² Ko Iesu elesi drav eru orrerri renge jeli depinan; ko jinibb nga marok-tutumun renge nuru arivel lingi nuru aran arrawe niva ser.

³ Ko Iesu esa van renge drav nen tuwen, nga mivi se Saemon Pita nen, ko owrai tevi ni nga pusoni tweni þisal van ngalu beblen, þisal lingi depinan. Ko ni esakel renge drav ko evisviseni delung nir nga martur suri jeli nuwito.

⁴ Ko daron nga Iesu mñirij jile, ko owrai tevi Saemon "Kupsu rujoni drav beblen van renge lat nga nuwi murrön e, ko kapjuröni niva se kami van ngatan. Ko kaplesi ko, kaprevei nai vajin."

⁵ Ko Saemon owra lweni tevi, "Numal, namþelak elep nata mupong, namþelak rrarren ko sete namla nai sansan rragrag. Ko suri nik kumwera, ko inu bololi ta pirpe nga kumwera."

⁶ Ko nir arjuröni niva ser van ngatan renge nuwi; ko arevi lengleng nai, ololi niva ser otomori pimarrerr.

⁷ Ko aroluve seler nir renge drav tuwen nen e nga parini parpitevir. Ko nir arini ko arlila tututweni nai re niva van renge nolo drav e nuru, ko orwun saute vajin, otomori parron e.

⁸ Ko Saemon Pita etaol lenglengen e ko ejipa ngatan renge þela Iesu ko owra "Numal wurru kupruj ngasue inu, suri nuvi jinibb nga mñesij."

⁹ Suri ni ko nuru nga morpitevi ni bbösa nga milep elair e renge nga marlesi marevei lengleng nai mirpel.

¹⁰ Ko Jemes ko tasin Jon, Sepeti natun nuru nga morpitevi Saemon, nir jile bbösa elair e. Ko Iesu owrai tevi Saemon, "Sete

kupmetutu te. Etipatun le pa ngel, lelingen ngel ko pítajer tevi, nga nik kuprevei vajin jinibb pirpe nga lelingenok komok-revei nai.”

¹¹ Ko nir arsu e drrav ser van ngaut e, arrrrseni renge deñinan. Ko arivel lingi, tevi joror jile nir nga marto rengen. Ko arvijuri Iesu, arivi jinibb sen vajin.

Iesu ololi jinibb san nga mimsi mesien nga niber mímemaual erres luwi

¹² Mian ko renge nabong mīnij kele san Iesu elik renge ngaim san, ko jinibb san nga mimsi mesien nga niber mímemaual evini. Mesien ngok ololi pētēpeti niben jile nir osuwuw. Ko mīnen elesi Iesu ko evini ejipa ngatan jin, ko owra “Wurru poro nga nik kupmarong, ko kuploli inu bowokwok.”

¹³ Ko Iesu owra “Ejki, numarong le pa. Kupwokwok!” Ko sete eringe mesien sen, esaro elngi nevren rengen. Ko ngavilvilsen mesien nga niber mímemaual evel lingi ni.

¹⁴ Ko Iesu ewer ore ni, owra “Kuplesi sete kupwera nanu pisan tevi jinibb pisan, ko kupvijuri sel som, kupasi ji batu jinibb ne sulsulen pīlesim. Ko kupla nanu nga Moses muwrai renge nale neseseien sen tevi ni. Ngok piviseni tevi jinibb nir nga kumwokwok pa.”

¹⁵ Ko nospēn ne sev nga Iesu muloli ok-ruj ma elep renge vanu. Ko delung elep arok-ivel tweni nga parunge ni nale sen, ko pulolir parres luwi renge mesien lele ser nga marmesi e.

¹⁶ Ko evi murrūn sen nga renge nabong jile ok-ivel lingir, ko ok-san ok-an renge lolo merwer e, ok-lot mun ie.

Iesu ololi jinibb san nga devje niben mimij emaur luwi kele

¹⁷ Mian ko renge nabong mīnij kele san Iesu ok-visviseni jinibb nir. Ko Parasi nir ko jinibb nevisvisenien ne nale neseseien nir nga marivel renge ngaim jijle nir ne Galili e vini, ko renge Jutia ko renge Jerusalem kele, arsakel ie. Ko derteren se Iova elep renge Iesu nga puloli lartul nga marmesi parres luwi.

¹⁸ Ko jinibb sopor arwosi jinibb san nga devje niben mimij renge maling sen vini, ko arpepej lat nga parasi van loloim e tevi, parlingi ji Iesu.

¹⁹ Ko sete lat san oto nga parasi rengen, ejki, suri jinibb elep pēlak. Ko arwosi arsa tevi van mare e renge drru naim. Ko arrarre drru naim mare, ko arjurōni ni van loloim e renge livō ne jinibb nir ko renge Iesu non.

²⁰ Ko Iesu etaole nga mīlesi nosurien ser ko owrai tevi, “E, mērel, nololien som nutlasi tweni pa osuw.”

²¹ Ko jinibb nevisvisenien ne nale neseseien ko Parasi nir arrorrmi sarrsarre renge nolor, arwera “Erpese mērel mīrij mirpok? Erij melmelas ko osopsope Atua! Isi orongwos pītasi tweni nololien nir? Atua kobbong esan bbōlbbōl!”

²² Ko Iesu orongwose norrrormien ser, ko owrai tevir, “Suri sev kami kamrrormi nanu ngel nir renge nolo kami nir mirpok?”

²³ Evi nanu nga mīsarow bbong nga bowrai tevi mērel, ‘Nololien som nutlasi tweni pa,’ suri si pīlesi poro nuwretun rrek nukrekris kobbong? Ko evi nanu nga mīterter kele wor asi ngok nga poro bowra ‘Kuptur imare kupla milngom ko kupiel van renge naim som e,’ suri jinibb jijle parlesi lelingen poro piplari pirpe nga mowrai ngok.

²⁴ Ko bololi vajin nanu nga mīterter nen, puloli kaprongwose kele nga inu Jinibb Mawos derteren suk otoo renge iel ngatan nga βetlasi tweni nololien.” Ko ni owrai tevi mērel nga niben devjen mimij owra “Nuwrai tevi nik, Kuptur imare kuplai maling som kupwosi, ko kupiel van renge naim som e.”

²⁵ Ko ni otur imare kasi ngavilvil, ko osrōvi Atua, ko owosi maling sen ko evel limjer renge nor, evan vare e.

²⁶ Ko jinibb jijle bbōsa nga milep elair e ko armetutu elep, ko arsurōvi Atua arwera “Aro, lelingen rramlesi nanu nga mīnijnje san.”

Iesu everus Livae pivijuri ni, pivi jinibb sen

²⁷ Vitunen renge nanu ngel nir, ko Iesu evel kele, ko elesi jinibb san nga mok-la nevōt ne takis nga nisen miwajie Livae, oklik renge naim nga mok-majing rengen. Ko Iesu owrai tevi “Merel, kup-vijuri inu ko kupivi jinibb suk.”

²⁸ Ko ni otur imare, evel lingi joron jile nir arjipon ko evijuri Iesu.

²⁹ Ko mian ko Livae ololi nanen nga milep san renge naim sen nga mīaan ore ni e tevi Iesu. Ko nir elep nga marok-la nevōt ne takis arini renge nanen, ko jinibb elep kele wor nga marsakel tevi Iesu araan korti tevi ni renge tep.

³⁰ Ko Parasi sopor ko jinibb nevisvisenien ne nale neseseien sopor nga marok-pitevir arwor suri Iesu tevi jinibb sen nir, arwera “Erpese kami kamaan ko kammin-min tevi jinibb nga marok-la nevōt ne takis nir ko jinibb nga marsij nir?”

³¹ Ko Iesu owrai lweni tevi nir, “Nir nga marres sete armerreni dokta, ko nir nga bbong marmesi ko.

³² Ko erpok ko, inu nuvini sete nga beverage nir nga tetajer marwera marres,

ejki, ko nuvini tweni bbong beveruse nir nga sete markerkeris, ko marwer limjere nga marsij, nga nolor pulululwi.”

Nosusien suri murrun nga parlinglingi nanen parvil

³³ Ko mian ko jinibb sopor arwerai tevi Iesu “Jon jinibb sen nir arok-vil tetajer ko arok-lot, ko jinibb se Parasi keke nir arok-loli erpok; ko nik jinibb som, erpese maraan ko marminmin ko setemun marvil?”

³⁴ Ko Iesu owrai tevir owra “Daron nga jinibb nga mutotko elik vane renge nanen tevi selen nir, ko kami kamrrormi nga nir parlinglingi nanen nga parvil? Ejki rres nawon!”

³⁵ Mian ko nabong nen pia-vini vajin, ko para-tekai tweni mier nga mutotko jir. Ko ngok ko nir para-vil ko renge nabong nen nir.”

³⁶ Ko ni owra nale rrongrrongvi minij nen keke san tevir, owra “Sete jinibb san orongwos pirrerssi tweni bebje sunsun nga mimerr sopon ko puwol ore lat nga mimarrerr e renge sunsun nga mitra e, ejki. Poro pipok ko ni olokloksi pa sunsun nga mimerr nen; ko sunsun nga mitra nen keke pisij, suri bebje sunsun nga mimerr nen sete pusorsan pirres tevi.

³⁷ Ko erpel keke, sete jinibb san orongwos pujongjongi norro nga mimerr van renge botel nga mitra nga marloli nevlu nanikot e. Poro pipok ko norro nga mimerr tut, tuloli nevlu nanikot nga mitra tirrerren ko tiap rrrrsi, suri etra pelak. Ko norro timejivjiv teplingi tisij, ko nevlu nanikot keke tisij.

³⁸ Niko norro nga mimerr parlingi ko wor renge nevlu nani nga mimerr malum mirres.

³⁹ Ko sete jinibb san nga mok-mini norro nga mitra emrenni norro nga mimerr, suri owra ‘Norro nga mitra erres’.”

6

Jinibb se Iesu nir arsesri wene wit renge nabong ne Sapat

¹ Mian ko Iesu evel otvi naut ne wit san renge nabong ne Sapat. Eptevi jinibb sen nir; ko jinibb sen nir numer ajir, ko artipatun arsesri sursele wene wit nir ko arseser nga dokolvir parjiekie lingir, ko arlar arurrurroir.

² Ko Parasi sopor arlesi, ko arwerai tevi ni, “Kuplesi ta, nir arloli nanu nga sete mumomsawos renge nabong ne Sapat!”

³ Ko ni owrai lweni tevir, “Aro, ejki ma, ko rreknga ma kami sete kameve renge Naul On, nanu nga Numal Devet muloli daron nga nanen ser mijkie, numer miaji ni ko nir nga marlik tevi ni?”

⁴ Ni ean renge Naim On se Atua, daron nga Apiata mivi batu jinibb ne sulsulen e, ko ni orro tama niv nga setete erres renge jinibb nga marivi jinibb nawon parurroi, evi kis bbong se batu jinibb ne sulsulen ko. Ko ni elai keke tevi nir nga marlik tevi arurroi.”

⁵ Ko Iesu owrai keke tevir, “Inu Jinibb Mawos nuvi Numal ne Sapat.”

Iesu ete nevre jinibb san nga mikati emetet luwi

⁶ Mian ko renge nabong ne Sapat minij keke san ko Iesu evan keke renge naim ne loten pivisviseni jinibb nir. Ko jinibb san nga nevren rres mikati elik ie renge lolomi.

⁷ Ko renge ie jinibb nevisvisenien ne nale nesereien sopor ko Parasi sopor armeteni suri Iesu eterter nga poro nga ni puloli mier nga nevren mikati nen pirres renge nabong ne Sapat, ko ngok nir partor sweri nanu san nga parevei Iesu pian re kot suri.

⁸ Ko Iesu orongwose norrrormien ser, ko owrai tevi mier nga nevren mikati, “Kupmera ta, kupini iel kuptur iel liven womu.” Ko ni otur imare evan otur liven womu.

⁹ Ko Iesu owrai tevi nir, “Inu numrenni bosusi tevi kami: Renge devjen ne nale nesereien, erres nga parloli nanu nga mirres re nabong ne Sapat? Poro pijki rreknga parloli pisij? Erres nga parloli jinibb san pirres luwi renge nabong ne Sapat? Poro pijki ko parllokloksi jinibb rrek!”

¹⁰ Ko Iesu oklu emteni rrale nir jijle nga martur rrale ni, ko owrai tevi mier nga nevren mikati, “Kupete ta nevren pimetet.” Ko ni ete nevren emetet, ko nevren erres luwi.

¹¹ Ko nir arlolar lengleng ko arsupsupe lululweni tevi nir nga parloli sev tevi Iesu.

Iesu otobbobbue jinibb sen esngavöl drromon eru

¹² Renge daron nen Iesu otongsa van mare renge botwen nga pulot, ko ni elik rrrarren renge ie nutpong san nga mulot van ji Atua.

¹³ Ko daron nga nat mirin vajin, ko ni everus jinibb sen nir vini jin; ko ni otobbobbue tweni nir esngavöl drromon eru nga ni milngi niser marwajie aposol.

¹⁴ Nir le niser ngel: Saemon (nga ni milngi keke nisen miwajie Pita), ko Antru ni wor tasin, ko Jemes, Jon, Pilip, Batolomiu,

¹⁵ ko Matiu, Tomas, Jemes nga natu Alpeas, Saemon nga mivi pati nga marwera paroji tweni mier Rom nir, ko Jutas nga natu Jemes,

¹⁶ ko Jutas ne Iskariot nga vitunen ko pia-tekai kerasi Iesu.

Iesu evisviseni jinibb nir ko ololir arres luwi

¹⁷ Ko Iesu ojubbul tevi jinibb sen nir vini ngatan e renge numiv san ko otur rengen. Ko jinibb sen elep, ko delung elep ne Jutia ko Jerusalem, ko nga renge jeljeli dis ngalu renge Taea ko Saeton.

¹⁸ Nir ngel arini mori jin nga parunge nale sen, ko ni pulolir parres luwi renge mesien ser. Ko lartul nga nenin nga marsij marsilvir, Iesu oji twenir renger ko ololir arres luwi.

¹⁹ Renge meling jinibb nga milep ngel, nir jijle arok-wera parjipari Iesu nga puloli derteren sen pian renger, ko pipok ko puloli nir jijle parres luwi.

Jinibb nga marongwos parunge pirres ko jinibb nga marongwos parunge pisij

²⁰ Iesu emteni jinibb sen nir ko owra “Neiren renge kami nga kamivi beres; batun vanu se Atua evi se kami.

²¹ Neiren renge kami nga numer miaji kami lelingen ngel; mian ko kami kapa-up. Neiren renge kami nga kamting lelingen ngel; mian ko kapa-ir ko, kapa-men.

²² Neiren renge kami renge daron nga poro jinibb nir arlesi nga kamivi jinibb se inu jinibb Mawos, ko arungasi kami vajin, ko arla nale otot tevi kami, ko arsoni tweni kami renge gortien ser, suri bbong inu.

²³ Kapir renge nabong nen daron nga nanu ngok nir parpelari, ko kaprowrow e neiren, suri nowli kami elep renge melrin. Suri renge sel mawos ngok ko pa birterawareng ser arloli tevi propet nga tuwi nir.

²⁴ “Ko esij wor elep niko renge kami nga joro kami milep lelingen ngel, suri kamlik pa renge mauren nga mimalum, ko sete kamrongwos kaplik kele mun pipok re melrin.

²⁵ Ko esij wor elep niko renge kami nga kamup mirres lelingen ngel; suri mian ko numer piaji kami. Esij wor elep niko renge kami nga kammen lelingen ngel; suri mian ko kapting ko kaptaur.

²⁶ Esij wor elep niko renge kami nga jinibb nir marsupsufe kami kamrres lelingen ngel, suri apu ser kele tuwi arok-loli sel mawos ngok ko pa tevi propet ne gerisen nir; arsuper arwera nawon arres.

Kapmerreni devje nuval se kami

²⁷ “Ko inu nuwrai tevi kami nga kamurrarronge inu: Kapmerreni devje nuval se kami, kaploli pirres tevi nir nga marungasi kami.

²⁸ Kaprij pirres tevi nir nga marij misij tevi kami, ko kapverus van ji Atua suri nir nga marungasi kami.

²⁹ Poro jinibb pisan puwje vasum devjen, ko nik sete kupwuje lweni kele, ko kuplinglingi kele ma vasum devjen tevi puwje kele. Ko poro jinibb pisan pilai tweni kot som, ko kuplinglingi ni pila kele sunsun som.

³⁰ “Kuplai tevi mer nga mungonim, ko mer nga mlai jorom, sete kupwera pila lweni kele tevim.

³¹ Erpe nga kami kammarong nga jinibb parloli nanu tevi kami, ko kami vajin kaploli pipok tevir.

³² “Poro kami kapmerreni jinibb nga bbong marok-merreni kis kami, ko erpese? Iok sete evi nanu san, suri jinibb nga marsij kele arok-merreni nir nga marok-merreni.

³³ Poro kapok-loli pirres tevi kis bbong nir nga marok-loli mirres tevi kami, ko erpese? Iok sete evi nanu san, suri nir nga marsij kele arok-loli kobbong erpok.

³⁴ Ko poro kaplai tevi nir kis bbong nga parkele lweni ko, ko erpese? Iok sete evi nanu san, suri nir nga marsij kele arok-loli bbong erpok tevi nir lululwi nga parok-kele lweni pusorsan.

³⁵ Ko kami ma kapmerreni ko wor devje nuval se kami ko kaploli pirres tevir, ko kaplai tevi nir nga sete kaprrormi parlai lweni kele. Ko niko kami nowli kami pilep, ko kami kapivi Atua ne Drromsen Mare natun; suri ni erres tevi nir nga sete marok-wera erres tevi, ko nir nga marsij.

³⁶ Kaprrormi jinibb nir, pipre Tata se kami orrrormir.

Sete kapwer lokloksi jinibb pisan

³⁷ “Sete kapwer lokloksi jinibb pisan kapwera esij, pijki, ko Atua vajin sete pia-wera kami kamsij. Kami kaptelasi tweni nololien se jinibb minij nir, ko Atua vajin pitlasi tweni nololien se kami.

³⁸ Kaplai joro kami tevi jinibb minij nir, ko Atua pia-kele lweni tevi kami; pijvi puwun saut pirres, puni van ngatan, pusursurrngoni pij pirres, pijvi kele puwun saut, ko pimejivjiv nawon vajin.”

Muru kami pumomsawos pirres

³⁹ Ko Iesu owra nale rrongrrongvi minij kele san tevir owra “Metrrorr sete orongwos puwowomue metrrorr pipete renge sel, ejki. Poro pipok ko nuru korti poravitan van ngatan renge nolo bbulwil!

⁴⁰ Ko erpok kele, mer nga marvisviseni ni sete orongwos piase jinibb nevisvisenien sen van mare e; pian pijpari wor pusuw ko renge marvisviseni, ko ngok ko ea-sorsan ko vajin tevi jinibb nevisvisenien sen.

⁴¹ Ko erpese kumlesi nate nato nga tuwam rikrae re nolo belan, ko sete

kulesi suri nate buluk nga milep nga nik kumkerae re nik nolo belam?^A

⁴² Ko poro pirpok, ko nik kupwera i pirpese tevi tuwam, 'Tuwak, kuplinglingi besre tweni nate nato nga kumkerae re nolo belam,' daron nga nik sete kumleslesi nate buluk nga milep nga nik kumkerae re nik nolo belam? O, nik nga kumiel rengo sel eru, tukbböt re aseni ni belan tuloli ni belan turro tiasi! Womujnen kupsere tweni nate buluk nga milep nga nik kumkerae re nolo belam jile pusuw, ko kuplesi nolo belam owokwok erres, ko kurongwos kupa-sere tweni wajin nate nato nga tuwam mikrae mibbölji belan.

Nai ko wenen nir

⁴³ "Nai nga mürres san sete orongwos piwen wenen nga müsij, ko nga müsij sete orongwos piwen wenen nga mürres.

⁴⁴ Nai jijle arongwose rengo wener. Jinibb sete orongwos pian pitawe wene nitapol rengo ga moku, ko sete orongwos pitawe wene drra rengo duru molulu.

⁴⁵ Ko erpok ko, jinibb nga mürres okwera tweni nanu nga marres nga mokrrormir marto rengo nolon; ko jinibb nga müsij okwera tweni nanu nga marsij nga mokrrormir rengo nolon. Suri sev nga muwun saut rengo nolo jinibb, niko marpelpelari rengo jingo jinibb mokwera tutwenir.

Jinibb eru nga morili naim

⁴⁶ "Erpese kami kamveruse inu mürres, 'Numal, Numal,' ko setete kamok-loli suri nanu nga mowrai tevi kami?"

⁴⁷ Nir jijle nga marini jik, ko marunge nale suk nir ko marlolir surie, inu beviseni tevi kami nir arirpe isi.

⁴⁸ Nir arirpe jinibb san nga nūli naim sen rengo dan nga mürterter mürres. Mili jile musuw wajin, ko mian ko daron nga naus mus ko nuwi muwlu ko miveji naim nen, ko sete ototo, suri eli pa eterter jile erres.

⁴⁹ Ko mürer nga ma murnge nale suk ko sete mulolir, ni erpe mürer nga nūli naim sen rengo dan malum; ko sete eli nabur nen nir aran ngatan, arun jipoj nawon. Ko daron nga nuwi muwlu muti naim nen, ko evitan van ngatan, ko omosoksok p̄et̄pet̄i."

7

Iesu ololi jinibb ne majingen san erres luwi

¹ Daron nga Iesu musuw rengo nale sen, ko evel van rengo Kapaneam e.

² Ko rengo ie, batu jinibb ne nuval san se m̄eri Rom nir, jinibb ne majingen sen

san nga mimrreni milep emsi lengleng, otomori pimij.

³ Ko ni ornge nga Iesu m̄ilik ie, ko ni okoni B̄irterawarrene ne Isrel sopor paran parwera i tevi ni nga ni pivini puloli jinibb sen p̄irres luwi.

⁴ Ko nir aran ji Iesu ko arngoni tertere nga ni pian, ko arwera i tevi, "Ni evi m̄er nga m̄irres p̄elak. Kupini ko wor kuploli nanu nga muwrai ngel.

⁵ Ni emrreni jinibb ne vanu se kerr nir, ko ni eli naim ne loten se kerr."

⁶ Ko Iesu eptevir aran.

Ko daron nga martomori parjipari naim nen, ko batun ne jinibb nuval okoni selen sopor arivel tersele aran jin, nga parwera i tevi, "Numal, sete kuplokloksim. Inu sete nurres nga kupini rengo loloim suk.

⁷ Ko inu kele nurrorrmi sete erres nga inu bevinuk jim. Ko kupwera i bbong nale, ko jinibb ne majingen suk p̄irres luwi.

⁸ Suri jinibb nga marlelep rengo inu arlingik rengo derteren, ko arlingi kele jinibb nuval arlik tevik. Ko poro bowrai tevi nga ngel 'Kupan,' ko ni pian ko wor, ko poro bowra tevi nir san kele, 'Kupini,' ko ni pivini ko wor; ko poro bowrai tevi jinibb ne majingen suk san, 'Kuploli nanu ngel', ko ni puloli ko wor."

⁹ Ko Iesu etaol lengleng nale ngel nir daron nga murnger e. Ko erieni oklu emteni delung nga marvijuri, ko owra "Nuwrai tevi kami, sete nulesi nosurien nga milep mirpel wor san, ejki. Renge Isrel kele ejki rres nawon."

¹⁰ Ko jinibb nga batu jinibb ne nuval nen mukonir arluwi van rengo ngaim; ko arlesi nga jinibb ne majingen nen erres pa osuw.

Iesu ololi bipiwarrene san nga mimij emaur luwi

¹¹ Musuw wajin ko sete epriv ko Iesu evan kele rengo ngaim nga welili san nga nisen Naen. Ko jinibb sen nir arpitevi ni, ko delung elep kele wor arpitevi ni.

¹² Ko daron nga maran mori rengo ngaim nen metali ne naworr nen, ko arlesi jinibb sopor marwosi tweni bipiwarrene san nga mimij, paran partevni. Bipiwarrene wel nen, tasu sen diwen sen emij lingi pa osuw, ko vinnen natun sansan wel nen ko pa. Ko delung elep nga rengo ngaim nen arpitevi vinnen.

¹³ Ko daron nga Numal m̄ilesi vinnen, ko orrorrmi lengleng, ko owrai tevi owra "Sete kupting te pijki."

¹⁴ Ko oruj van mori ko ejpari drrav nga mimatur rengen, ko jinibb nga marwosi artur murrong tevi. Ko owra "Nanwarrene, nuwrai tevim, kupmera!"

^A 6:41 Erpe iel, Luk ospe suri nanu nga muto re mete jinibb, ko kem namrieni nga namvijuri murrun ne rijen ne nale nga iel.

¹⁵ Ko m̄er wela nga mimij emra ko elik, ko erij luwi. Ko Iesu ela lweni m̄er wela tevi tasu sen.

¹⁶ Ko jinibb jikle nolor arwun saute metutuen. Ko arsurövi Atua arwera "Propet nga milep san otur imare reнге livö reнге kerr!", ko arwera kele "Atua evini nga p̄ila mauren tevi jinibb sen nir."

¹⁷ Ko nosp̄en ne sev nga Iesu muloli ngok, jinibb nir arsupuḡe owlu p̄etp̄eti reнге Jutia ko reнге vanu jikle nga marto rrerrale ie.

Jon Baptaes osusi rongorngе tevi Iesu

¹⁸ Jon jinibb sen nir arsup̄e suri nanu ngel nir tevi, ko ni everuse jinibb sen eru orini jin.

¹⁹ Ni owrai tevi nuru poran ji Numal porwerai tevi, "Jon owra 'Nik kuvi pa m̄er nga pivini le, rreknga kem nabtiriv malume san kele wor?' " Ko ni okoni tweni nuru.

²⁰ Daron nga morini ji Iesu ko orwera-i tevi, "Jon Baptaes okoni komru owra nobor-susi tevim, 'Nik kuvi pa m̄er nga pivini le, rreknga kem nabtiriv malume san kele wor?' "

²¹ Ko reнге daron nen ni ololi nir elep nga marmesi mesien lele nir arres luwi, ko ololi neḡin nga marsij arivare arwolu lingi jinibb nga marsisilvir, ko ololi nir elep nga meter marrorr arkulkulu luwi erres.

²² Ko ni owra lweni tevi laru nga Jon mukoni nuru, owra "Kopor-vijuri lweni sel se kamru, kopor-luwi ko kopor-wera-i tevi Jon iseḡ nga komor-lesir ko komor-runger: Metrorr nir arkulkulu luwi erres, naroj nir arivel luwi erres, niber m̄irḡemaul nir arwokwok luwi, borwon nir arongrong luwi erres, jinibb nga marmij armaur luwi kele, ko ḡeres nir arwerwer reнге nosp̄en nga m̄irres tevir.

²³ Ko inu nuwrai erpel, neiren reнге m̄er nga sete m̄ilesi nanu san reнге inu nga puloli ni purnge p̄isij rengen."

Iesu osḡe suri Jon Baptaes mauren sen

²⁴ Daron nga jinibb nga Jon mukoni nuru morivel lingir, ko Iesu etipatun osḡe suri Jon tevi delung nir, owra "Bonevis daron nga kamil tweni Jon reнге lolo merwer e, kamwera kaplesi sev ko? Mavir san nga ling muwi petpate m̄ia?

²⁵ Ia, kaman kamwera kaplesi sev ko? Jinibb san nga muri sunsun nga m̄imau m̄irres? Ejki rres nawon. Lartul nga maruri sunsun nga mirpok araan erres ko arlik reнге laut se numal nir.

²⁶ Ia, ko kami kamwera kaplesi sev? Propet san? O-o, ko inu nuwrai tevi kami, ni elep asi wore propet.

²⁷ Merel ko Naul On muli suri nga Atua muwra 'Kapmurrong, bokoni jinibb suk

san nga puwowomu re Mesaea ko puloli sel se ni pimetet.'

²⁸ Ko inu nuwrai tevi kami, Jinibb jikle nga mariak reнге iel ngatan, sete san elep asi Jon. Ko m̄er nga ma muwelili reнге batun vanu se Atua ko, ni elep asi wore Jon."

²⁹ Ko delung nir ko jinibb nga marok-la nevöt ne takis nir, daron nga marunge ko arir ko arsurövi Atua. Suri nir arpaptaes pa reнге baptaesen se Jon.

³⁰ Ko Parasi nir ko jinibb nevisvisenien ne nale nesesreien nir armusus parvijuri sel se Atua nga muloli pa tevir, suri armusus parpaptaes bonevis reнге baptaesen se Jon.

Iesu erij tere jinibb nir nga reнге daron sen

³¹ "Sev ko niko bowra viringsi dul nga lelingen ngel e nir? Ko nir arirpese le?

³² Nir arirpe bipiwarreng sopor nga marlik reнге mesa nga m̄irres sapon, ko markikail marververuse seler nir parini jir partetnij; arwera 'Namuwi nabbu tevi kami, ko kammusus kapsew; ko namla nubo ne mijen, ko kammusus kaptiņg. Kammusus kaptetnij detnijen ne neiren, ko detnijen ne dauren.'

³³ Ko erpok, kami dul nga lelingenok kami kele kammususe murru komru kes, Jon Baptaes ko inu. Jon Baptaes evini ko ean wowarreng bbong, ko sete ok-mini norro; ko kami kamwera 'Neḡin nga m̄isij elik rengen.'

³⁴ Ko inu Jinibb Mawos nuvini ko nomok-aan ko nomok-minmini norro, ko kami kamwera 'Kaplesi leorr lep ko lemni kis norro. Ni evi sele jinibb nga marok-la nevöt ne takis nir ko jinibb nga marsij nir.' "

³⁵ Ko Iesu owrai tevir, "Ko norongwosien sete eplari re sel sansan, eplari wor re sel elep ko. Ko komru Jon, komru kes nomor-vijuri."

Nesevin nga m̄isij san

³⁶ Ko mian ko Parasi san everuse Iesu nga pian p̄iaan tevi. Ko Iesu evan reнге loloim se Parasi nen, ko esakel ngatan ko ean tevi.

³⁷ Ko nesevin san nga reнге ngaim nen nga mauren sen m̄isij ornge nga Iesu m̄ilik reнге naim se Parasi nen m̄iaan tevi. Ko vinnen ela botel senta san nga nowlin elep. Ko botel nen arloli nevöt e san nga nisen alapasta.

³⁸ Ko vinnen evini otur reнге ḡela Iesu reнге duren ko eting, ko suwen meten arjumjum van reнге ḡela Iesu. Ko ela rao batun ko etwasi ḡela Iesu e, ko orromji ḡela Iesu, ko ejvi senta reнге ḡelan.

³⁹ Parasi nga miveruse Iesu nga pivini pïaan tevi mälesi, ko orrorrmi renga nolon owra “Merel poro weretunen pivi propet, ko purongwose ko nesevin nga mirpese le ngel nga mijpari. Nesevin ngel evi vin nga mäsi!”

⁴⁰ Ko Iesu owra lweni tevi, “Saemon, inu nuwra bowra nanu le san ngel tevim.” Ko Saemon owra “Numal, kupwera! ko wor.”

⁴¹ Ko Iesu owra “Numal san, jinibb eru orloli nivnon jin. Ngok nuru tuwen ela nevöt evi ongut valim (500) jin nga muloli nivnon e. Ko nuru tuwen nen ela nevöt ngavöl elim (50) jin nga muloli nivnon e.

⁴² Mian ko nuru korti sete orviter nga porkele lweni tevi. Ko ni erres tevi nuru, elinglingi nivnon nen nuru korti orjipon, setemun porkele. Ko renga nuru ngok, nuru ngabes nen ko pimrreni wore ni pïasi jer renga nuru?”

⁴³ Saemon owra lweni tevi, “Inu nurrorrmi nganga muloli nivnon millelep nen ko jin, ni ko pimrreni pïasie wor.” Ko Iesu owra lweni tevi, “Kuwra momsawose erres.”

⁴⁴ Ko ni erieni emteni nesevin ko owrai tevi Saemon, “Kulesi vinel? Inu nuvini renga naim som, ko nik sete kutkaik erres, sete kurrawe ßelak. Ko vinel ma errawe ßelak e suwen meten, ko etwasi jomro batun e ßelak nuru ormes.

⁴⁵ Nik sete kurromji inu, ko vinel ma daron nga mevini loloiim e ko orromji ßelak, sete omosie.

⁴⁶ Nik sete kujvi oel renga inu batuk, ko vinel ma ejvi senta nga märrresresi asi oel renga inu ßelak.

⁴⁷ Ko suri mirpel ngel ko niko nuwrai tevi nik, nololien se vinel nga muwun saut nutlasi twenir pa, niko mimrreni inu milep suri. Ko isi ko nga murrorrmi nololien sen muwelili bbong, poro mätlasi tweni ni, pimrreni inu bbong puwelili rrek.”

⁴⁸ Ko Iesu owrai tevi nesevin nen, “Nololien som nir nutlasi twenir pa osuw.”

⁴⁹ Ko nir nga marsakel tevi nga maraan tevi arrorrmi lweni e lolor arwera “Merel evi jinibb sev le nga orongwos pïtlasi tweni nololien nir?”

⁵⁰ Ko Iesu owrai tevi nesevin “Nosurien som ololi nik kumrres luwi. Kupiel, kupluwi renga demat.”

8

Nesevin nga marok-pitevi Iesu

¹ Nanu ngel nir arasi osuw, ko renga vitunen sopen vajin ko Iesu otuter sopen evan renga ngaim nga marlelep nir ko renga ngaim nga wewarreg nir. Ko ni ewerwer renga nospen nga märrres tevi jinibb nir, ko jinibb sen nir esngavöl drromon eru arpitevi ni.

² Ko nesevin sopor nga nemün nga marsij marivare lingir, ko sopor nga marres luwi pa renga mesien ser nir, ngok Merri ne Maktala, nga nemün nga marsij ebut marwolu lingi pa musuw,

³ Ko Joana nesen se Kusa nga mivi jinibb san ne majingen se Numal Erot, ko Susana, ko nesevin elep kele wor nga marok-la joror tevi Iesu ko jinibb sen nir.

Nale rrongrrongvi ne mäer nga mäijjireni jelangin

⁴ Mian ko delung elep ne ngaim lele nir arini arkorti ji Iesu. Ko ni owra nale rrongrrongvi san tevi nir, owra

⁵ “Jinibb nga mok-jijireni jelangin evan nga pïijjireni. Ko daron nga mäijjireni e, ko jelangin sopor arwij asi van renga dan ne sel e, ko jinibb arivel rer ko arverasi lokloksir, ko numön arow vini ko artasi twenir.

⁶ Ko sopor kele arwij asi van renga dan ne jerev e; ko daron nga maretiv imare ko armeli ngavilvil, suri laþer sete ejpari nuwi te ejki.

⁷ Ko sopor kele arwij van renga liven ne lolo moku, ko daron nga moku mäiejal mimaur orer, ko emelngir, sete armaur.

⁸ Ko sopor ma arwij van renga dan malum nga märrres, ko aretiv armaur erres ko arwen, wener ongut (100).” Ko Iesu ekail owra “Mer nga boron mutoe purnge re nolo boron!”

Iesu owra tweni omomsawos erpese nga ni mutuw nale rrongrrongvi

⁹ Ko jinibb se Iesu nir arsusi tevi ni, arwera “Nale rrongrrongvi ngel owra puwra isev ko?”

¹⁰ Ko ni owrai tevir owra “Kami ma arlai tevi kami nga kaprongwose nanu nga marto teptepi renga batun vanu se Atua. Ko nale rrongrrongvi ma arlai tevi nir jille ngok nga parlesi, ko sete parlesi wose, ko parunge ko sete parongwose; suri batur eterter ko armusus nolor pulululwi.”

Iesu owra tweni vajin nale rrongrrongvi lat nga muto suri

¹¹ “Nale rrongrrongvi nen, nile erpel ngel. Jelangin nen evi nale se Atua.

¹² Ngok, jelangin nga marwij van renga dan ne sel arirpe jinibb nga marunge nale, ko demij mivini mäla tweni renga nolor, nga puloli nir sete parosuri ko sete parmaur.

¹³ Ko jelangin nga marwij van renga dan ne jerev arirpe jinibb nga marunge nale, ko arir nga parlai. Ko norrorrmien nen nga pirpe laþe nai nga purrul totkoni renga nolor ejkie. Arosuri beblen, mian ko sete epriv daron nga nanu nga purrowrowe mivini, ko arvitani.

¹⁴ Ko jelangin nga marwij van renge lolo moku arirpe jinibb nga marunge nale, ko marvijuri suri wor sel ser; ko norrormien ser, ko joror nir, ko nanu lele nga marmerrenir renge mauren ser nir armelngir, ko sete arwen e wenen nga marres sopor.

¹⁵ Ko jelangin nga marwij van renge dan malum nga mürres, arirpe jinibb nga nolon muwretun ko mürres, ornge nale ko otori eterter ejpari nga mlai wenen.

Laet nga martepilis ore biles e

¹⁶ "Sete jinibb san orrunksi laet ko pila biles piteplis ore e, rreknga pilai pilngi renge melve maling, ejki rres nawon. Pilngi ko wor mare renge lat nga mokjinget rengen. Ko ngok jinibb nga parini renge loloim parlesi moron.

¹⁷ Nanu san sete orongwos piteptepi rragrag nga sete pia-pelari limjer, rreknga nanu tama san nga muto silsilveni nga sete orongwos piplari renge moron, ejki rres nawon. Nanu jile nga marirpok parpelari ko wor renge moron.

¹⁸ "Kapmetmet renge nale suk nga kami kamok-runger. Poro nga jinibb pisan putor totonir, ko ngok mñernen Atua pilai kele ko wor tevi. Ko poro jinibb san setete putori totonir, ko ngok mñernen Atua pilai tweni ko ji ni sev nga murrormi mutori totoni."

Iesu tasu sen ko tasin nir arini parlesi ni

¹⁹ Iesu tasu sen ko tasin nir arini nga parlesi ni; ko sete arongwose paran jin mori te ejki, suri nga delung elep pelak.

²⁰ Ko arwerai tevi Iesu, "Tasu som le ko tasim, nir le ngel vare armerreni parlesi nik."

²¹ Ko Iesu owra lweni tevi nir, "Tasu suk ko tasik nir arivi nir nga marunge nale se Atua ko marosuri."

Iesu ewer ore ling serser nga mitewut milep san renge nuwito

²² Mian ko renge nabong san, Iesu owrai tevi jinibb sen nir, "Kerr puwlu asi van renge devje nuwito e." Ko nir arsa re drav ko arwolu van.

²³ Ko daron nga marwolu e, ko Iesu ematurrwel. Ko ling serser nga milep san etewut eterter vini re nuwito, ko ejpari drav ser. Ko nuwi ejvijvi van renge nolo drav, ko dungun elep nga elep; otomori parron, ko nolor opotpot e elep.

²⁴ Ko aran ji Iesu ko arwuni arwera "Numal! Numal! Rrapnij le pa!" Ko ni emra ko ewer ore ling ko daptan ne nuwi nga marbburbbur milep marjivjivi vini re drav, ko nuru korti ormosi orsuw. Ie omol nawon vajin.

²⁵ Ko Iesu owrai tevir, "Nibeni le nosurien se kami?" Ko nir armetutu ko artaal

lengle, ko arwerwera tevi nir lululweni arwera "Isi le ngel, ni ewer ore ling ko nuwi ko nuru orunge ni?"

Iesu oji tweni demij nir renge jinibb ne Gerasa san

²⁶ Ko nir arwolu toku renge bongsin san renge vanu se mñeri Gerasa nir renge nuwito. Ko Galili oto luwi van devjen e renge bongsin nen.

²⁷ Ko daron nga Iesu mujubbul mian ngaut e, ko jinibb ne ngaim nen san evel vini ko esewute. Mernen demij arsisilvi, ko eprv pa nga sete mun ok-uri sunsun; ko setemun elik renge ngaim, ko ok-lik pa renge dubb ko, lat nga martivtavin e.

²⁸ Ko daron nga mñilesi Iesu ko ekail van mare ko ejpa van ngatan renge non, ko erij drrelan ean mare jer owra "Sev som oto ni le iel, nik Natu Atua ne Drromsen Mare? Nungoni tevi nik sete kuploklok-sik!"

²⁹ Owrai erpok suri Iesu owrai pa tevi nemñin nga mñisij pivare lingi mñernen. Nabong elep bonevis mivini mijpari lelingenok nga nemñin nga mñisij mokwowomue. Ko ewretun jinibb nir arsere nevren nuru ko ßelan nuru tevi dil delrurr nir, ko ni ok-rerrersir armotot. Ko nemñin nga mñisij okjeli van lolo merwer e.

³⁰ Ko Iesu osusi tevi, "Nik nisem si?" Ko owra "Delung," suri demij elep arsisilvi ni.

³¹ Ko demij nir arngoni tevi Iesu arwera "Warru sete kupkoni kem naban renge bbulwil nga nabbñon mijkie, pijki!"

³² Ko renge ie meling ßerþer nga milep san arok-susung bbong renge jeljeli botwen. Ko nemñin nga marsij arngoni tevi Iesu nga ni pilinglingi nir parsilvi ßerþer nir. Ko ni elinglingir.

³³ Ko nemñin nga marsij arivare lingi mñer nga ko aran arsilvi ßerþer nir. Ko ßerþer nir arwolu jubjubbul van renge jeljeli nuwito ko arowrow jubjubbul van ngatan e renge nuwito, ko arron.

³⁴ Ko daron nga lartul nga maruwngani ßerþer maroka-lesiv nga miplari, ko arwolu van arwerai renge ngaim nga milep ko ngaim nga wewarrens nen nir.

³⁵ Ko jinibb ne ngaim nen nir arivel tweni van, parlesi ivese nga miplari nen. Ko arini ji Iesu ko arlesi mñer nga nemñin nga marsij marivare rengen elik ngatan renge ßela Iesu. Norrormien sen erres vajin, ko ori vajin sunsun. Ko daron nga marlesi, ko nir jilje armetutu lengle.

³⁶ Ko nir nga marlesi nanu ngel nga Iesu muloli arsupe suri tevir erpese nga Iesu muloli pa mñer nga nemñin nga marsij marsilvi mürres luwi.

³⁷ Ko nir jille nga marlik renge Gerasa ko nga marlik rrrerale ie arsurtoni tertere Iesu pivel lingi vanu ser, suri armetutu elep. Ko Iesu evan esa van renge drrav, ko drrav etipatun nga puwlu.

³⁸ Ko m̄er nga n̄m̄in nga marsij mari-vare lingi ongoni tevi Iesu nga poro nga ni piptevi ni. Ko Iesu okoni lweni owra

³⁹ “Kupluwi van renge ngaim som e, ko kupwera sev nga Atua muloli pa tevim.” Ko m̄ernen evan renge ngaim jile nir ko os̄pe suri sev nga Iesu muloli tevi ni.

Iesu ololi nesevin san nga drran muto m̄isij erres luwi, ko nesenwarreng san emaur luwi kele

⁴⁰ Daron nga Iesu mian mijpari renge devje nuwi e, ko delung nir artur terai ko pa parwera erres tevi ni renge nga mivini, suri nir artiriv ko pa terai.

⁴¹ Ko jinibb san nisen Jaeras, evi jinibb nga mok-metmete naim ne loten, ni evini ji Iesu ko ejipa van ngatan renge ßela Iesu ko ongoni tertere nga Iesu pivini renge naim sen.

⁴² Ni natun sansan bbong, ko evi nesevin, sian esngavöl drromon eru. Ko vin wel nen ematur renge maling, otomori pimij pa. Ko daron nga Iesu mian e ko delung elep arvijuri suri ni ko arlilji ni.

⁴³ Ko nesevin san nga mesien se nesevin nir ololi tetajer renge sia esngavöl drromon eru. Vinnen olokoksi p̄t̄peti joron nir nga n̄ilngir tevi dokta nir, ko sete san orongwos puloli ni p̄irres.

⁴⁴ Ko vinnen esilvi delung nir renge Iesu duren vitu nen e, ko evini morie, ko ejpari bongsi sunsun sen. Ko ngavilvil mesien nga muloli vinnen drra nen emes evesane.

⁴⁵ Ko Iesu owra “Isi mijparik?” Ko nir jille arwera ejki, arvilvil ore. Ko Pita owra, “Numal, delung elep arututir mori nik ko arliljim.”

⁴⁶ Ko Iesu owra “Ejki, san wor ejparik, suri nurnge renge nibek nga derteren evel lingik.”

⁴⁷ Ko vinnen elesi nga nanu nga muloli oto pa limjer, ko eririr lengleng ko evan ko ejipa ngatan renge no Iesu, ko ewer telasi renge no delung nir sev ko ololi nga ni mijpari Iesu bongsi sunsun sen, ko erpese nga ni n̄irres ngavilvilsen.

⁴⁸ Ko Iesu owra tevi, “Natuk, nosurien som ololim kumrres jile. Kupiel renge demat.”

⁴⁹ Ko daron nga mok-rij malum e, ko jinibb san evel ko ewit lengleng renge naim se Jaeras vini, ko owrai tevi Jaeras, “Natum nesenwarreng emij pa osuw. Kuplinglingi Numal, sete kupkarkar rengen.”

⁵⁰ Ko Iesu ornge, ko owrai tevi m̄ernen “Sete kupmetutu, sansan kobbong kupo-suri, ko nesenwarreng pimaaur luwi ko.”

⁵¹ Ko daron nga marini renge naim e ko Iesu ewer ore jinibb nir san sete pivijuri van loloim, sansan kobbong Pita ko Jon ko Jemes ko tata se nesenwarreng ko tasu sen wor.

⁵² Ko jinibb nir artengsi vin wel nen, drrelar elep. Ko Iesu owra “Sete kaptiing, nesenwarreng sete emij te ejki, ematur kobbong.”

⁵³ Ko lartul nen nir armen keraji e, suri arongwose nga nesenwarreng wel nen emij pa osuw.

⁵⁴ Ko ni esaro ko orrul re nevre nesenwarreng ko everuse owra “Nesenwarreng, kuptur imare!”

⁵⁵ Ngavilvilsen mauren sen olwi van rengen ko otur imare. Ko Iesu owrai tevir nga parla nanen sopen tevi purroi.

⁵⁶ Ko tata sen ko tasu sen bbösa nga milep elai nuru e. Ko Iesu ewer ore nuru nga sete porwerai nanu ngel tevi jinibb pisan, pijki.

9

Iesu okoni jinibb sen esngavöl drromon eru aran parwerwer

¹ Ko Iesu everus kortoni jinibb sen esngavöl drromon eru arini korti jin, ko ela derteren tevir nga paroji tweni n̄m̄in nga marsij nir, ko parloli jinibb nga marmesi nir parres luwi renge mesien ser nir.

²⁻⁵ Ko ni ewer orer owra “Sete kaptori nanu pisan renge nivelen se kami renge sel, pijki; nejipij pijki, narr pijki, nanen pijki, nevöt pijki; ko sete kaptori sunsun pieru. Ngabe nga kami kapan rengen, kapan renge naim, ko kaplik renge naim nen ko pa pijpari daron nga kapiel e. Ko poro renge ngaim san jinibb nen nolor p̄iterter, sete parlai kami pijki, ko ngok daron nga kami kapiel lingi ie, erres kapwirwirreni tweni maw nga muto re but se kami, nga piviseni tevi nir nga marloli m̄isij.” Ko ni okonir van parwerwer tevi jinibb nir suri batun vanu se Atua, ko parloli jinibb nir nga marmesi parres luwi renge mesien ser nir.

⁶ Ko nir arivel lingi, aran renge ngaim nir ko arwerwer renge nos̄pen nga n̄irres tevi jinibb nir, ko renge iok jile arloli jinibb arres luwi.

Numal Erot Antipas os̄pe suri Iesu

⁷ Ko Erot Antipas evi numal ne Galili, ko ornge nanu nga marpelari ngok nir nga Iesu mulolir. Ko nolon ekarkare elep, suri ornge jinibb sopor arwera “Ngok Jon Baptaes ko otur imare luwi renge mijen.”

⁸ Ko nir sopor arwera “Elaeja ko miplari ngok,” ko nir sopor kele arwera “Propet ko san nga tuwi emaur luwi kele.”

⁹ Ko Erot owra “Jon Baptaes, inu nuta otvi pa batun, ko si kele le ngel, nga inu morgne kele nanu ngel kele nir suri mirpel?” Ko ni emrreni lenglenge p̄ilesi Iesu, p̄ijiljilwer sapon tevi.

Aposol se Iesu nga mukonir maran marwerwer arlululwi vini jin

¹⁰ Ko aposol nir, daron nga marlulwi vini ji Iesu, ko arsupe suri sev nga marlolir tevi ni. Ko ni eptevir arsan aran renge ngaim e san nga nisen Betsaeta.

¹¹ Ko delung arongwose, ko arvijuri suri ni; ko ni owra erres tevi nir, ko ospe suri batun vanu se Atua tevir, ko ni ololi nir sopor nga marmerrreni parres luwi arres.

Jinibb evi nuvasngavöl valim (5000) Iesu ela nanen tevir

¹² Ko nat erivriv pa otomori nial piwaj pini, ko jinibb sen nir esngavöl drromon eru arini jin ko arwerai tevi ni, “Kupkoni tweni jinibb nir parivel, ko paran renge ngaim nga wewarrens nir ko ngaim nga marlelep nga marto karkar ngok nir, ko parmatur ko parla nanen ser. Suri iel lat nga rramlik e ngel evi lolo merwer le.”

¹³ Ko ni owrai tevir, “Kami ko kapla nanen tevir parurroi.” Ko nir arwerai tevi, “Kem namtori bbong niv elim ko nai eru. Ko poro pipok ko kem naban nabwuli nanen ser kele wor, suri delung.”

¹⁴ Suri jinibb elep, evi nuvasngavöl valim (5000) totoklai nga marlik ie marunge nale se Iesu. Ko Iesu owrai tevi jinibb sen nir, “Kaploli jinibb parlik ngatan pivi meling. Ko kaplingi nir pingavöl pilelmi (50) parlik renge meling sisamis.”

¹⁵ Ko nir arloli surie erpe nga muwrai ngok, arloli arlik ngatan.

¹⁶ Ko Iesu ela niv nga elim nga nir ko nai nga eru nga ko esarrerr imare emteni melrin, ko olot erij erres surir; ko obbri otvi niv nga nir ko nai nga nuru, ko elai tevi jinibb sen nir. Ko nir arililai tevi jinibb nir.

¹⁷ Ko nir jile arurroi, ko nir jile arup. Ko jinibb se Iesu nir arsere lweni bebje niv nga marurroi linglingir ko nai nga marurroi linglingir van renge narr esngavöl drromon eru arwun saut er.

Pita owra tweni nga Iesu evi Mesaea

¹⁸ Mian ko nabong san Iesu kis bbong oklot, ko jinibb sen nir arini jin. Ko ni osusi tevir owra “Jinibb nir arwera inu nuvi isi?”

¹⁹ Ko nir arwera lweni tevi ni, “Sopor arwera Jon Baptaes, ko sopor arwera Elaeja, ko sopor arwera propet nga tuwi san emaur luwi kele.”

²⁰ “Ko kami kamwera inu nuvi isi?” Ko Pita owra lweni tevi ni, “Nik kuvi Mesaea se Atua.”

²¹ Ko Iesu osur terter tevi nir nga sete parwowrai nale nen tevi jinibb pisan.

²² Ko owra “Jinibb Mawos purnge wor p̄isij ko renge nanu pilep, ko b̄irterawarrens nir, ko batu jinibb ne sulsulen nir, ko jinibb ne nevisvisenien ne nale neseseien nir parungasi ni, parevji pini. Ko nabong p̄itul ko pimaur luwi kele.”

Jinibb se Iesu putor ore wor nanu nga ni mimrreni ko

²³ Ko Iesu owrai tevi jinibb sen nir, “Poro jinibb san puwra pivijurik, ni putor ore nanu nga ni bbong mimrreni, ko nabong jile puwosi nai pelaot sen ko pivijurik.

²⁴ Ko poro san puwra putor totoni mauren sen, mian ko pia-tor jabble; ko poro nga san pimaronge mauren sen suri mivi-juri inu, ko mian ko pia-lai vajin mauren nga m̄irres.

²⁵ Poro jinibb pisan pia-lai p̄etp̄eti nanu ne iel ngatan ngel nir, ko putor jabble mauren sen pijijki, ko p̄ilesi sev ko p̄irres rengen?

²⁶ Ko isi san poro pimanune inu ko nale suk nir, ni kele Jinibb Mawos pia-manune ni renge daron nga ni pia-vini e renge nosrövien se Tata sen tevi anglo no nir.

²⁷ Nuwretun nuwrai tevi kami, sopor renge kami nga kamtur ngel setewor kaplesi mijen ko kaplesi batun vanu se Atua pivini.”

Iesu niben erieni enij kele e

²⁸ Nabong owil asi osuw, vitunen ko Iesu ela Pita ko Jon ko Jemes arpitevi ni. Ko nir kis arsan artongsa van renge botwen nga ni pulot.

²⁹ Ko renge daron nga mulot e ko non erieni enij kele e, ko sunsun sen owraprap titis.

³⁰ Ko jinibb eru orpelari ie, Moses ko Elaeja, nuru orok-jiljilwer tevi ni.

³¹ Nuru orremali renge nosrövien ne melrin, ko orsupe suri mijen sen nga otomori piplari Jerusalem.

³² Ko Pita ko laru nga morpitevi armatur pa, suri meter arruwel temijpal. Mian ko artaol ko arkulu vajin van ji Iesu e, ko arlesi nosrövien sen ko laru nga mortur pa tevi ni.

³³ Mian ko laru nga ortipatun porivel lingi Iesu, ko Pita owrai tevi Iesu, “O, Numal, erres ma kem namlik pa iel; kem nabloli gorkoraim p̄itul, san pivi se nik, ko san pivi se Moses, ko san pivi se Elaeja.” Ni owrai ma, ko errerlengne nale nga muwrai.

³⁴ Ko daron nga mok-rij malum e mok-werai nanu ngel nir, ko nabor san esal vini

esalsal orer, ko nir artur vajin rengo namol nen. Ko armetutu elep.

³⁵ Ko rengo nabor nen drrelan san eplari rengo owra "Ni evi natuk nga memrreni, ko ni ko motobbobbue. Kami kaprunge ni."

³⁶ Ko rengo daron nga drrelan musuw, ko arlesi Iesu esan vajin. Ko sete arwowra nanu ngel tevi jinibb san rengo nabong nen nir, armurrarong ore ko pa.

Iesu oji tweni demij rengo nanwarreng san

³⁷ Ko rengo mevinen vajin nir arjubbul rengo botwen, arluwi vini ngatan e. Ko delung elep arivel ore arini jin arlesi.

³⁸ Ko jinibb ne delung nen san everus owra "Jinibb nevsivsenien, natuk sansan wele le pa, ko nungoni nik, warru kupini kuplesi ni ta.

³⁹ Ko kuplesi, nabong sapon nemin san esilvi ni, ko enger nga enger lengleng, ko eririr nga eririr ko melabbsen eia. Ko nemin nen eterter elep rengo nga pivare lingi ni, ko ololi niben arerer elep.

⁴⁰ Ko nungoni jinibb som nir paroji tweni, ko sete arongwos parloli."

⁴¹ Ko Iesu owra lweni tevir, owra "O, aro, kami dul ngel nosurien se kami ejkie! Belik tevi kami pijpari wor seveling, ko bololi nanu tevi kami?" Ko owrai tevi mernen, "Kuptekai natum vini iel ta."

⁴² Ko mer wel nga daron nga mivel malum e vini, ko nemin nga evivivrrule elep ko ololi ewajeni lenglene ngatan, ko ololi niben aririr elep. Ko Iesu otortori nemin nga misij nen ko ololi mer wel nga erres luwi, ko ela lweni tevi tata sen.

⁴³ Ko nir jile bbösa nga milep elair e suri nanu nga mulolir rengo derteren nga milep se Atua.

Iesu owra lweni kele tevir mian ko ni pimij

Ko daron nga bbösa milair malum e suri nanu nga mulolir ngel nir, ko Iesu owrai tevi jinibb sen nir, owra

⁴⁴ "Nale nga bowrai ngel nir, kaplingi pian rengo nolo boro kami nir ko kaprrormir. Inu Jinibb Mawos partekai inu van rengo nevre jinibb nir."

⁴⁵ Ko jinibb sen nir arrelenge nale nga Iesu muwrai ngel lat nga muto suri. Atua esilveni renger nga sete parongwose, ko nir armetutue parsusi lweni tevi ni.

Isi pivi jinibb nga milep jer nen rengo nir

⁴⁶ Ko jinibb se Iesu nir arok-rij latlat lulweni tevir suri isi pivi jinibb nga milep jer rengo nir.

⁴⁷ Ko Iesu orongwose sev nga muto rengo nolor, ko etkai bipiwarreng nga welili san ko elngi otur rengo nelin devjen.

⁴⁸ Ko ni owrai tevir, "Isi nga pitkai bipiwarreng nga welili san nga mirpel ngel rengo inu nisek, ko erpe etkai inu ko pa. Ko isi nga mitkai inu, erpe sete etkai inu ko, ko etkai ni nga mukoni inu ko. Mer nga mivi jinibb nga welili jer nen rengo kami, ko ngok ni ko evi jinibb nga milep jer nen."

Mer nga sete mitre kami ko ngok ni evi kerrkerr ko

⁴⁹ Ko Jon owrai tevi owra "Numal, namlesi jinibb san oji tweni demij san rengo jinibb san rengo nik nisem. Ko namwer ore, suri nga ni sete evijuri kerr."

⁵⁰ Ko Iesu owrai tevi ni, owra "Sete kapwer ore ni. Mer nga sete mitre kami, ko ngok ni evi kamikami ko."

Iesu etipatun pivijuri sel nga pian Jerusalem e

⁵¹ Mian ko otomori nabong nga Atua pitka lweni Iesu van mare e rengo melrin, ko ni elngi non eterter evijuri sel van rengo Jerusalem e.

Meri Sameria armusus Iesu pian rengo vanu ser

⁵² Ko Iesu okoni wowomu ngarre jinibb sopor nga marivi ni non, ko nir arivel aran rengo ngaim san se meri Sameria nir nga parloli lilane ngarre tevi ni.

⁵³ Ko nir armusus nga ni pivini rengo vanu ser, suri ni elngi non emawos van Jerusalem e.

⁵⁴ Ko daron nga jinibb sen ngel nuru Jemes ko Jon morunge, ko orwerai tevi, "Numal, kumarong komru nobor-werai nabb pivel rengo melrin vini pianir?"

⁵⁵ Ko ni erieni ko otortori nuru.

⁵⁶ Ko nir setemun aran re ngaim nen, arivel asie van rengo ngaim minij kele e san.

Jinibb sopor armerreni parvijuri Iesu

⁵⁷ Ko daron nga marivel suri sel malum, ko jinibb san evini ko owrai tevi Iesu, "Ngabe tama nga poro kupa-van e, ko inu bevijuri nik ko wor."

⁵⁸ Ko Iesu owrai tevi, "Guli rrum nga wowarreng nir belaur otoa, ko numon nir menuner otoa, ko inu jinibb Mawos milngek ejkie. Ngok, kuprrormi mun pirres poro nga kumrreni kupvijuri inu."

⁵⁹ Ko mian ko Iesu owrai tevi jinibb minij nen san, "Kupvijuri inu!" Ko mernen owrai lweni tevi owra "Numal, kuplingingik mun bean betevni tata suk puwomu."

⁶⁰ Ko Iesu owrai tevi mernen owra "Kuplingingi lartul nga sete marla mauren ko pa partevni nir nga marmij ser, ko nik

kupan kupwerai batun vanu se Atua tevi jinibb jile nir.”

⁶¹ Ko nir m̄inij nen san owrai tevi, “Bea-vijuri nik ko, Numal; ko kuplinglingik mun puwomu bean beremse nir nga marlik renge naim suk.”

⁶² Ko Iesu owrai tevi, “Jinibb nga m̄iale drrav puklu van womue tetajer, sete puklu vitu kele. Mer nga mirpok sete erres renge batun vanu se Atua.”^B

10

Iesu okoni tweni jinibb sen ngavöl ebut drromon eru (72) aran parwerwer

¹ Vitunen renge nanu ngel nir marsuw vajin, ko Numal otobbtobbue nir m̄inij kele sopor arivi jinibb sen. Nir ngavöl ebut drromon eru, ko ni okoni tweni nir ererwi arivel arwowomu renge ni van renge ngaim ko vanu jile nga ni pia-vivitu van renger.

² Ko owrai tevir, “Lelingen ngel evi daron ne numös nga milep, ko jinibb nga marmajing rengen nir ewelili jer. Ko ngok kami kaplot, kapngoni p̄iterter tevi Numal ne numös nga ni pukoni kele jinibb ne majingen sen sopor nga parmajing renge orsel ne numös sen.

³ Kapiel, ko kaprongwose nga inu nukoni tweni kami kamsan kis kamirpe natu sip-sip nir renge sel, paran renge livö ne guli rrum nir.

⁴ Sete kaptori baos rreknga narr rreknga but se kami, pijki; ko sete kaprij tevi jinibb pisan renge sel, pijki.

⁵ Ko renge naim ngabe nga kami kapan renge loloim nen, nanu womujnen nga kapwerai kapwera ‘Demat puto renge naim ngel.’

⁶ Ko poro jinibb ne demat san p̄ilik renge naim nen, ko ngok demat se kami pijpon jer jin. Ko poro pijki, ko ngok pulwi kele vini ji kami e.

⁷ Ko renge naim mawos nen ko pa kami kaplik malum pa rengen ko. Sete kapan kele renge naim lele e nir, pijki. Ko kapro nanen sev ko kapmini nuwi sev nga marlair tevi kami. Suri erres nga jinibb ne majingen p̄ila nowlin. Sete kapan renge naim ko naim.

⁸ Ko renge ngaim ngabes nen nga kami kapa-pelari rengen, ko poro jinibb nen nir parir nga partekai kami kapan jir, ngok kami kapurroi sev nanen ko nga nir parlair parlingi renge no kami.

⁹ Ko kami kaploli jinibb nga marmesi renge ngaim nen parres luwi renge mesien ser. Ko kapwerai tevi nir jile, ‘Lelingen

ngel batun vanu se Atua evini mori pa vajin ji kami.’

¹⁰ Ko renge ngaim ngabes nen nga kami kappelari rengen, ko poro jinibb nen nir sete parmarong nga partekai kami van jir nga kaplik tevir, ko ngok kapivare kapini renge sel ne ie ko kapwera

¹¹ ‘Erpe maw kele ne ngaim se kami nga mibbölji bela kem, namtwasi twenir etre kami. Ko kaprongwose mae nanu ngel: Batun vanu se Atua evini mori pa ji kami.’

¹² Nuwrai tevi kami, renge daron nga Atua pia-wera suri lat nga puto suri re jinibb jile, ko pia-sij wor pilep renge nir ne ngaim ngok pia-asie Sotom.

Iesu otortori jinibb nga sete marosuri ni

¹³ “Wi kami m̄eri Korasin! Wi kami m̄eri Betsaeta! Kami nga kamok-ungasi jinibb ne vare nir, erpe m̄eri Taea ko m̄eri Saeton nir. Ko poro nga nelesien ngel nir nga mololir ngel nir nga kami kamlesir, poro parlolir pa renge Taea ko Saeton, ko jinibb ne iok nuru, nolor pululwi pa tuwi nen renge nololien ser, ko paruri sunsun tera nga marmerrmerris nir, ko parlik renge niavi nabb parp̄elpalos e, parviseni nga arorrmi nanu nga marsij nga marloli sarrsarre nir.

¹⁴ Niko renge daron nga jinibb jile nir ne iel ngatan, Atua pia-wera suri lat nga puto suri rer, ko pia-tor vitrangı kami p̄iasie nga putor vitrangı m̄eri Taea ko Saeton.

¹⁵ Ko kami m̄eri Kapaneam nir, kami kamok-wera kami ma kamrres kapan renge melrin, ko ejki rres nawon. Kami parwirr tweni kami van renge bbulwil nga nabbön m̄ikie.”

¹⁶ Ko ngok Iesu owrai tevi jinibb sen nir owra “Mer nga murunge kami ko ngok erpe ornge inu ko, ko m̄er nga mungasi kami ko ngok erpe ongasi inu ko. Ko m̄er nga mungasi inu ko ongasi m̄er nga mukoni inu ko.”

Jinibb se Iesu nir ngavöl ebut drromon eru arulwi vini jin

¹⁷ Ngok nir ngavöl ebut drromon eru (72) arulwi vini tevi neiren nga milep, ko arwerai tevi Iesu, “Numal, demij kele nir arunge drrela kem ko arloli nanu nga namwerair renge nik nisem.”

¹⁸ Iesu owrai tevir “Ok-irpok, ko inu numteni renge metek daron nga demij muwlu lingi melrin erpe navil evil.”

¹⁹ Ko Iesu owrai kele tevir, “Kaplesi, inu nulai pa derteren tevi kami osuw. Asi p̄etp̄eti derteren se demij nir. Ko ngok niko, kami kamrongwose kapverasi nuñet ko netu nuñet, ko

^B 9:62 Erpe iel, Luk ospe nanu san nga mok-kiri dan nga buluk mirvei, ko kem namrieni nale nga puloli mining ne nale sen piplari limjer.

nanu san ejki rres nawon nga orongwos pulokloksi kami.

²⁰ Ko niko sete kaḡir suri nga neñin nga marsij marloli nanu nga kamwerair; ko kaḡir ma suri nise kami Atua olir reнге naul ne melrin.”

Iesu eir elep ko owra erres tevi Tata sen

²¹ Renge wosenen, Neñin On ololi Iesu nolon owun saute neiren, ko owra “Tata, nuwra erres tevi nik, O Tata Numal ne melrin ko iel ngatan, nga nik kumloli nanu ngel nir marto teptepi reнге jinibb nga norongwosien ser milep ko nir nga marongrongwos milep, ko kuviseni tevi nir nga marivi bipi kobbong. Niko Tata, erpe erres ko wor reнге nom.”

²² Ko owra “Tata suk ela nanu ꞑetꞑeti nir tevik, ko sete san orongwose rragrage norrorrmien se inu, natun mawos. Tata suk kobbong esan bbölbööl orongwose. Ko sete san orongwose Tata suk, inu kobbong nga mevi natun mawos, ko nir nga inu motobbobbue nir, nir kele arongwose.”

²³ Ko Iesu erieni mawose jinibb sen nir ko owra malum bbonge tevi nir kis bbong arunge, owra “Neiren reнге nir nga marlesi meter e nanu nga kami kamlesir ngel nir.

²⁴ Nuwretun nuwrai tevi kami, propet elep, ko numal nga marlelep owun saut armerreni parlesi nanu ngel nir nga kami kamlesir ngel, ko setete arlesir te, ko arwera parunge nanu nga kami kamrunger ngel, ko setete arunger te.”

Nale rrongrrongvi ne ĩeri Sameria nga ĩirres

²⁵ Ko jinibb ne nevsivsenien ne nale nesereien san otur mera ko owra purrowrowe Iesu, owra “Numal, inu bololi isev ko, ko ßela mauren nga muto tuwi ngok vini?”

²⁶ Ko Iesu owra lweni tevi, “Naul On owra sev re iok? Kueve kulesi owra erpese?”

²⁷ Ko ĩernen owra lweni tevi Iesu, “Ko Naul On owra ‘Nik kupmerreni Numal Atua som tevi nolom totoklai, ko mauren som totoklai, ko derteren som totoklai, ko tevi norrorrmien som totoklai; ko kupmerreni selem pirpe nik mawos.’”

²⁸ Ko Iesu owra lweni tevi ĩernen, “Nik kuwrai erres ꞑelak ko; ko nik kuploli pipok ko, ko kuplai mauren nga muto tuwi ngok vini.”

²⁹ Ko jinibb nevisvisenien ne nale nesereien emrenni wor piviseni nga ni mumsawos, ko osusi kele tevi Iesu owra “Ko isi ko evi selek nen?”

³⁰ Ko Iesu owra lweni tevi reнге nale rrongrrongvi ngel: “Jinibb san ojubbul Jerusalem van ngatan e Jeriko. Ko daron nga nivijuri sel mivini ko etaole jinibb

venao nir marpelari jin. Ko arrul totoni ko arla joron nir, ko arevji emijmij, ko arivel lingi ematur jer reнге jeli sel otomori pimij.

³¹ Mian ko sete epriv ko jinibb ne sululen san ojubbul kele reнге sel nen vini. Mivini ko elesi ĩernen; ko etahev van reнге devje sel e, ko easie evel lingi.

³² Ko erpok kele reнге Livaet san. Ni kele evini, evini kele reнге lat nen ko elesi ĩernen kele. Ko etahev kele van reнге devje sel e, ko asie evel lingi.

³³ Vitunen vajin ko ĩeri Sameria san evel vini evijuri sel nen kele. Mivini reнге lat nen, ko elesi ĩernen mimatur mutomori pimij, ko orrorrmi lenglenge.

³⁴ Ko evan jin, ko ela oel ko norro, etwasi vaseni niben nga marmetmetvir e nir ko ekai orer. Ko owosi elngi esakel mare reнге dongki sen, ko elai van reнге naim san nga marok-mosi rengen, elngi elik rengen ko emetmete.

³⁵ Ko reнге mevinen reнге rorong susu nen vajin, ko oroni tweni nevöt sopor ko elair tevi ĩer nga naim sen nen, ko owrai tevi, ‘Kupmetmete ĩerel ko pa iel. Ko poro nga kupa-lokloksi kele nevöt sen sopor rengen, ko ngok daron nga bea-luwi vini ko bea-kele lweni tevim.’”

³⁶ Ko Iesu owrai tevi ĩer nga mususi tevi nga, owra “Nik reнге norrorrmien som, kurrorrmie erpese reнге nir nga itul ngok? Kurrorrmie nir si nen ko erpe pivi selen e ĩer nga jinibb venao marevji ngok?”

³⁷ Ko ĩernen owra “Rrek ĩer nga murrorrmie ni nen ko.” Ko Iesu owrai tevi ĩernen, “Kupiel, ko kupan kuploli pipok.”

Iesu evan reнге ngaim se nesevin eru

³⁸ Ko nir artutur suri sel ko arini reнге ngaim san. Ko nesevin ne ie san, nisen ewajie Marta, vinnen etkair aran reнге naim sen.

³⁹ Ko vinnen tasin san nisen ewaji Merri. Ko Merri nen evini ko elik ngatan ji Iesu morie ßelan, ko omurrarrong nale se Iesu nir.

⁴⁰ Ko Marta ornge esij e nga majingen milep, ko ni bbong ĩisan ĩiplaker. Ko evini ji Iesu ko owrai tevi, “Numal, sete kurrorrmie nga tasik mivel lingi inu, ko inu bbong ĩesan ĩeplak? Kupwerai tevi ni pivini pipitevi inu.”

⁴¹ Ko Numal owra lweni tevi, “Marta, Marta, nik kurnge esij suri nanu elep ꞑelak ko pa ngok.

⁴² Ko nanu sansan kobbong erres temipal. Ko ngok niko Merri otobbobbue ngel, nga sete san orongwos ꞑilai tweni kele jin.”

11

Verusen se Numal nga ni mivisviseni tevi Kerr

¹ Nabong san Iesu esan evan alot renge lat san. Ko daron nga musuw vajin ko olwi vini ji jinibb sen e nir. Ko jinibb sen san owrai tevi, "Numal, kupvisviseni kem e loten, pirpe Jon mivisviseni jinibb sen e nir marok-lot."

² Ko Iesu owrai tevir, "Daron nga kami kaplot e ko kapwera pirpel: 'Tata se kem, nise on. Nammerreni jinibb jijle nir partorim pirres. Nammerreni nik batun vanu som pivini iel ngatan."

³ Ko kuplai nanen pivtere kem lelingen, nabaani.

⁴ Ko kuptelasi tweni nololien se kem nir, pirpe kem namtelasi tweni nololien se nir nga marloli misij tevi kem. Ko sete kuploli nanu parini parrowrow pelake kem.'"

⁵ Ko Iesu owra tevir, "Kami si poro selen otoo ko pia-van ji selen nen nat nga mirrang vajin, ko puwrai tevi, 'Ai sile, kupla pa niv pitul tevik."

⁶ Suri selek san otutur vini jik eatur vitan ni le, ko nanen nga namrro lingi sete sapon ojon jer nga belai tevi purroi.'

⁷ Ko selen nga milik loloim nen puwrai lweni tevi, 'Sete kupvijajeng rengok, nuplaji ore pa metali osuw, ko kem natuk nir nammatur pa renge milnge kem osuw. Setemun nurongwos bemra bela nanu san tevim.'

⁸ Nuwrai tevi kami, ewretun evi selen nga mirres, ko pumusuk ko nga pimra pilai tevi. Ko suri bbong mungoni malume mitertter, mian ko ni pimra ko pilai tevi pusorsan tevi nga mernen mimrreni.

⁹ Ngok niko inu nuwrai tevi kami, Kapngoni, ko Atua pia-lai ko tevi kami. Kappej, ko Atua pia-loli kaplesi ko. Kapututi, ko Atua pia-tasi metali nen tevi kami.

¹⁰ Suri nir jijle nga marok-ngoni para-lai, ko nir jijle nga marok-pej para-lesi, ko nir jijle nga marok-ututi metali, para-tasi metali nen pitpir tevir.

¹¹ Kami si nga mivi tata, poro natun pungi ni tevi, ko ni pila nevot tevi purroi? Rreknaga poro pungi ni mesal tevi, ko ni setemun pila mesal nen tevi, ko pila numet tevi purroi?

¹² Rreknaga poro pungi ni narllu nato tevi, ko ni pila netu numet tevi? Ejki rres nawon!

¹³ Ia ko kami kamivi jinibb nga marsij nir, ko kami kamrongwose kobbong nanu nga marres nir nga kapa-lair tevi natu kami nir. Ko ngok Tata se kami nga milik renge melrin, ni asi wore tata se kami nir. Ko ni pia-lai Nemnin On tevi nir nga margoni tevi ni."

Jinibb sopor arwera Iesu okloli nanu nir renge derteren se Demij

¹⁴ Nemnin nga misij san evi nabbut, ko esilvi jinibb san ko ololi mernen sete okrongwos pok-rij. Ko daron nga Iesu muoji tweni nemnin nga misij nen renge mernen, ko mernen erij luwi vajin. Ko delung artaol lenglengle.

¹⁵ Ko jinibb sopor arwera "Bielsepul ko, numal se demij nir, ela derteren ngok tevi, niko mok-oji tweni demij nir ngok e."

¹⁶ Ko nir sopor arrowrowe ni arpej nelesien ne melrin renge ni nga puloli parlesi.

¹⁷ Ko Iesu orongwose norrorrmien ser ko owrai tevir, "Poro batun vanu san piterti wukari pieru e, ko pipalpal luwi tevi ni, ko sete orongwos putur te. Ko poro metka san piterti wukari pieru e ko pitre lweni ni, sete liken sen orongwos pirres te renge nabong pisan.

¹⁸ Ko ngok poro Demij piterti wukari pieru e ko pitre lweni ni, ko batun vanu sen putur pirpese? Suri kami kamwera inu nuoji tweni demij nir renge derteren se Belsipa.

¹⁹ Ko poro nga weretunen inu nomok-oji tweni demij nir renge derteren se Belsipa, ko kami natu kami nir arok-oji tweni demij nir renge derteren se isi?

²⁰ Ko weretunen inu nomok-oji tweni demij nir renge Atua nevren ne derteren, ko ngok niko batun vanu se Atua evini pa ji kami ko osuw.

²¹ "Daron nga jinibb nga mitertter mutori joro nuval sen nir mutur metmete naim sen, ko ngok joron nir arto erres malum renge naim sen.

²² Ko daron nga jinibb nga mitertter asie mernen mivini ko epalpal tevi mernen mianan ko oji tweni, ko ngok ela joro nuval sen nir nga ni milngi nolon renger, ko ela joro mernen, ko owlulu tevi selen nir.

²³ "Mer nga sete miptevi inu, mernen etre inu ko, ko mter nga sete miptevik nomorser kortoni jinibb nir, oji tututwenir ko.

Nemnin nga misij nen orongwos pulwi kele

²⁴ "Nemnin nga misij san daron nga mi-vare lingi jinibb san ko evel petpeti renge lat nga nuwi mijkie nir, epejpej lat san nga pumosi rengen. Ko poro sete elesi lat san, ko owra 'Bolwi kele wor van renge naim suk nga meivare ren nga mevel lingi.'

²⁵ Ko renge daron nga pulwi vini e, ko pileisi nga aruraki vaseni pa loloim nen erres, ko arlingi nanu jile nir arto jile pa erres rengen.

²⁶ Ko nemnin nga misij nen pian vajin ko pileisi kele nemnin nga marsij ebut nga

marsij asi wore ni, ko pipteviri parluwi van parsilvi lweni m̄nren. Ko m̄nren mauren sen nga vitunen p̄isij p̄erp̄er vajin p̄iasi nga womunen.”

Neiren weretunen

²⁷ Daron nga Iesu muwra jile nanu ngel e nir musuw, ko nesevin san nga nir delung marlik erij drrelan elep van mare owra “Neiren renge nesevin nga mivesi niik, ko m̄ila nasus tevim kumsus rengen.”

²⁸ Ko Iesu owra “Rrek erpok ko, ko mare renge iok, neiren renge nir nga marunge nale se Atua ko martor totonir keke renge nolo.”

Jinibb armerreni parlesi nelesien san

²⁹ Delung elep nga elep arini korti ji Iesu, ko Iesu owra “Dul ngel arivi dul nga marsij, ko armerreni parlesi nelesien. Ko ejki rres nawon, sete mea-la mun san tevir. Sansan kobbong, nelesien nga miplari ji propet Jona tuwi.

³⁰ Erpe Jona evi nelesien se m̄eri Nineve nir tuwi, ko ngok p̄irpok ko Jinibb Mawos pivi nelesien se dul nga lelingen ngel nir.

³¹ Ko nesevin nen nga m̄ivi numal nga milep renge Saot pia-tur imare tevi jinibb ne dul ngel nir renge nabong nga Atua pia-wera suri lat nga puto suri tevi jinibb nir, ko pia-wer lokloksi bbong nir, puwra ‘O, kaplesi, inu nuvel renge bongsi vanu vini nga borngororongwosien se Solomon, ko erpese kami sete kamrunge nale se san nga milep asi wor Solomon, ko m̄ilik tevi kami bbong?’

³² Ko renge nabong nga Atua pia-wera suri lat nga puto suri tevi jinibb nir, m̄eri Nineve nir para-tur imare ko tevi dul ngel nir ko parongwos parwer lokloksi bbong sel se kami nir, parwera ‘O, kaplesi, daron nga namrunge Jona m̄iwerwer e tuwi, ko nolo kem olululwi renge nololien se kem nir. Ko erpese kami nolo kami sete olululwi daron nga kamrunge san nga milep asi wor Jona m̄iwerwer tevi kami?’

Nale rrongrrongvi ne nasul

³³ “Sete jinibb san osli jile nasul osuw mian ko otori ngatan, ejki; putori mare sapon, ko puloli jinibb jile parlesi moron.

³⁴⁻³⁵ Mete jinibb erpe moron ne niben. Poro nga metem p̄in̄irer, ko moron puwun saut re nibem totoklai. Ngok owra puwra, poro nga nalom p̄irres, ko mauren som totoklai keke p̄irres. Ko poro nga metem p̄isij, ko nemalik puwun saute nibem totoklai, suri metem erpe moron ne nibem. Ngok owra puwra, poro nga nalom pukul, ko mauren som totoklai keke p̄isij jile.

³⁶ Ko poro mauren totoklai se kami parwun saute moron, ngok pimor vaseni

p̄etp̄eti mauren se kami ko, sete lat sapon mara-jipon jer.”

Iesu otortori Parasi sopor ko jinibb ne nevisvisenien ne nale nesereien sopor

³⁷ Daron nga Iesu m̄irij jile musuw vajin, ko Parasi san ongoni ni, owra ni pian p̄iaan tevi ni. Ko Iesu evan loloim esakel eaan.

³⁸ Ko daron nga Parasi nen m̄ilesi mirpok, ko bbösa nga milep elai ni e suri. Suri nga Iesu sete ejejavöl owomu mian ko vitunen ko ni pia-aan.

³⁹ Ko Numal owrai tevi m̄nren, “Kami Parasi kamok-rrawe vare ne biles nir ko plet nir, ko renge nolo kami nir arwun saute nanu nga marsij nir.

⁴⁰ O kami nga kamlengleng temijpal, sete kamrrormi nga Atua nga muloli vare nen e, ni keke kobbong lololi nolon e?

⁴¹ Kami kapla nanu nga marto renge nolo biles se kami ko nolo plet se kami tevi ñeres nir, ko nanu jile nir parwokwok vajin ji kami.

⁴² “Wi kami Parasi nir, pia-sij wor pilep niko renge kami, suri kami kamok-p̄elak milep suri nanu nga marp̄er jer, ko nanu nga marlelep nir nga moro kaplolir, kamlingi kurtwenir. Suri kamok-p̄elak suri nanu nga marp̄er jer, erpe roi warreng nir erpe min ko ru, nga kapeveve p̄etp̄eti; ko kamla tweni songovlör nga kaplair tevi Atua. Ko erpok erres kobbong kaploli; ko nanu nga m̄isij nen evi nga kamlingi kurtweni nanu nga marlelep nir, erpe murrun mawos ko merrenien nga kapmerreni lengleng Atua.

⁴³ “Wi kami Parasi nir, pia-sij wor pilep niko renge kami. Kami kammerreni kapok-sakel renge nai seksekal nga mare nir renge loloim ne naim ne loten nir, ko kammerreni jinibb partori kami daron nga marsekai kami re lat ne nanen.

⁴⁴ Wi pia-sij wor pilep niko renge kami. Kamirpe dubb nga sete marusi ore nivev rer, marto kiskis nawon, ko jinibb sete marongrongwos rragrrag nir; ko marivel rer marbbötböt rer, ko lololi arrokkitkit p̄etp̄etie.”

⁴⁵ Ko san renge jinibb ne nevisvisenien ne nale nesereien owra lweni tevi Iesu owra “Jinibb nevisvisenien, daron nga kumwera nale ngok e nir, ko ngok kulokloksi kem keke.”

⁴⁶ Ko Iesu owra “Wi pia-sij wor pilep niko renge kami keke jinibb ne nevisvisenien ne nale nesereien nir, suri kami kamok-jingteni nanu nga marrow milep renge birpari jinibb nir nga sete marongwos parwosi luwer, ko kami ma kammusus lengleng kapipari majingen ser sapon.

⁴⁷ Wi pia-sij wor pilep niko renge kami, suri kamok-juroi dobbi propet nga tuwi nir, nga tata se kami nir marevji pinir marmij.

⁴⁸ Iok kamviseni emawos nga kami kele kamkorti renge majingen nga marsij se tata se kami nir. Suri nir arevji pinir, ko kami vajin kamok-juroi dobbir.

⁴⁹ Ko erpok Atua ospe suri pa renge norongwosien sen owra 'Bea-koni propet nir ko aposol nir vini jir, ko nir sopor parevji pinir, ko nir sopor parloli pisij tevir parojir.

⁵⁰ Ko niko drra propet jile nir nga apu se kami nir marevji pinir tuwi, kami ko dul ngel kapa-la norongen nga misij nen.

⁵¹ Nuwretun nuwrai tevi kami, mitipatun renge drra Apel, mivini mijpari drra Sekaraea nga marevji renge Naim On se Atua renge livö ne nawot ko lat nga muon. Nuwretun nuwrai tevi kami, kami ko dul nga lelingen ngel, kapa-la norongen nga misij ne nanu ngok jile nir vajin.

⁵² "Esij wor elep niko renge kami jinibb ne nevisvisenien ne nale neseseien nir, suri kami kamkikiore metali ne norongwosien ko kamsilveni ki nen. Ko kami kele sete kaman renge loloim nen, ko kamokwer ore jinibb nir nga marwera paran renge loloim nen."

⁵³ Mian ko Iesu evel lingi naim nen, ko jinibb nevisvisenien ne nale neseseien nir ko Parasi nir arij esij tevi ko arsusi nanu elep.

⁵⁴ Nir arok-teravi Iesu nga poro puwra jabble nale pisan nga nir parlai ni rengen.

12

Iesu erij tere murrin nga jinibb sel sen miteru e

¹ Renge daron nen meling jinibb nga milep arini arser korti ji Iesu renge lat san. Nir evi nuvasngavöl vavis kis wor, ko artur lililjir pelak nir, ko arbbötbböt renge drrun belar. Ko Iesu owra womue tevi jinibb sen nir owra "Kami kapmetmet ko wor renge is se Parasi ngel nir, renge murrin nga sel ser eru ngok e.

² Ko nanu jile nga jinibb martawi ore nir, mian ko Atua piraji vasenir parto limjer. Ko nanu jile nga jinibb marsilvenir, mian ko Atua pulolir parto limjer, jinibb parongwoser.

³ Ko nanu jile nga kami kamok-super renge nat nga mupong, mian ko Atua puloli nga jinibb parsuper renge nat nga mirin.

Ko nanu jile nga kami kamok-sur vijvije renge boro jinibb nir renge loloim, mian ko parkaile parwerai van mare jer."

Jinibb se Iesu sete erres re parmetutue jinibb nir

⁴ Iesu owra "Selek nir, inu nuwrai tevi kami, sete kapmetutue jinibb nir nga marongwose parevji pini bbong nibe kami nir, mian ko vitunen setemun arongwose parloli kele nanu pisan.

⁵ Inu bosusur metu le ngel tevi kami, bowrai tevi kami isi nga parmetutue. Parmetutue Atua kobbong. Ni kobbong orongwose pirezji pini jinibb, mian ko vitunen ni orongwos piwirre van renge lat ne nejikien. Suri derteren sen otoo. Ngok ni ko ma kami kapmetutue.

⁶ "Kami kamrongwos pae nga jinibb nir arok-wulwule numön nga wowarrang elim nowlir evi nevöt eru kobbong. Ko renge no Atua, sete ok-kulu jabble san emalie, ejki.

⁷ Ko kaplesi jomro batu kami ngok nir; Atua orongwos petpeti nir, sete san ejki. Atua tetajer emetmete kami erres pelak. Ko ngok niko kami sete kapmetutu, ni emrreni kami elep nga elep, asi jer wore numön ngok nir.

Mer nga muwovrai "Inu nuvi jinibb se Iesu."

⁸ "Inu nuwrai tevi kami, Mer nga sete mimtutu nga puwovrai inu nisek renge no jinibb nir, inu kele Jinibb Mawos beawovrai ni nisen renge no anglo se Atua nir.

⁹ Ko mer nga mimtutu ko mivilvil ore inu nisek renge no jinibb nir, ngok inu kele bea-vilvil ore ni nisen renge no anglo se Atua nir.

¹⁰ Ko mer nga mirij melmelas ko osopsope inu jinibb Mawos, mian ko Atua orongwos pitlasi tweni ni. Ko mer nga mirij melmelas ko osopsope Nemnin On, mernen Atua sete orongwos pitlasi tweni rragrage ni.

¹¹ "Ko inu nuwrai tevi kami: Mian ko jinibb para-revei kami van renge naim gortien ji numal nga marlelep nir nga nir parwera suri nanu nga kamloli, lat nga puto suri re kami. Ko kami sete kapmetutu kapprorrmi pelake sev nale ko nga kami kapwera lweni.

¹² Suri renge daron nen mawos malum ko pa, Nemnin On pia-wera nale mawos nen tevi kami nga kami kapa-werai."

Jinibb nga marsier kortoni joror milep

¹³ Ko nir san renge meling jinibb ngel nir ovrai tevi Iesu owra "Jinibb nevisvisenien, kupwerai tevi tuwak nga ni puwngani joro tata se komru nir nga ni mimetmete nir, pivsese komru korti. Suri ni omusus puwnganir."

14 Ko Iesu owrai tevi m̄nernen owra “E m̄erel, inu sete nuvini tweni nga bospe suri nanu nga marirpok.”

15 Ko mian ko ni owrai tevi jinibb nir owra “Kami kapmetmet wor kami ko p̄irres, ko kaptor ore nolo kami nga kamok-merrmerreni nijor e nir. Suri jinibb mauren sen weretunen sete arloli nanu ngok e ko nir, nga marivi joron ngok.”

16 Ko Iesu owra nale rrongrrongvi san tevir, owra “Jinibb san nga joron milep, orsel sen nanen elep nga elep ren.

17 Ko ni orrorrmi ko owra ‘Inu bololi pirpe le vajin, suri bepe ne nanen suk ewelili pa. Bololi pirpese le vajin?’

18 Ko ni orrorrmi rengen nolon owra ‘A, nurongwose lat nga bololi surie; bololi pirpel le, berrarre tweni bepe suk ko beli pilep lengleng vajin, ko belngi nanen suk nir ko jorok nga marres nir rengen.

19 Ko bowrai vajin tevi nem̄ik, ‘Jorom nga marres elep nga elep lengleng, evert nga nik kuplik vajin sia pilep nga pilep lengleng. Kupaan ko kupminmin p̄irres, ko kupir vajin.’

20 Ko Atua owrai tevi m̄nernen owra ‘O, nik nga kumlengleng temijpal! Suri nata mupong nga lelingen belai tweni nem̄im. Ko nanu nga kumajing nir ngok, ko nanu nga kumlingir ngok nir parivi se si ko vajin?’ ”

21 Ko Iesu owra “Pia-irpok ko rengen jinibb nga marser kortoni joror milep nga mivi se nir kis bbong, ko iok rengen no Atua sete joror oto rragrrage, ejki rres nawone.”

Atua orongwose pimetmete kami p̄irres

22 Ko Iesu owrai tevi jinibb sen nir, “Suri nanu ngel ko inu nuwrai tevi kami, Sete erres nga kami kaprorrmi pelake mauren se kami, ko kapwera ‘Mian ko rrapro sev le lelingen?’ Ko sete erres kele nga kami kaprorrmi pelake nibe kami, kapwera ‘Mian ko rrapla sunsun nga rrapuri ngabe le?’

23 Mauren evi nanu nga milep wor, nanen evi bbong nanu nga welili. Erpok kele, nibe kerr evi nanu nga milep wor, sunsun evi bbong nanu nga welili. Ko Atua elai pa nanu nga morlelep nen nuru; ko suri sev kami kamrorrmi sete orongwos p̄ila kele nanu nga wowarrens ngok nir tevi kami?

24 “Kaplesi num̄on nir; sete nevrer artoe, sete aruw te, ko sete arok-tawe wenen nurrer te, ejki, ko bepe ser ejkie. Ko Atua ok-la wor nanen tevir. Ko ngok rengen no Atua kami kamres asi wore num̄on ngok nir.

25 “Kami kamrorrmi jinibb nga mok-p̄elak mok-rorrrmi mauren sen nga numrrol jer bbong, orongwos puloli mauren sen pipriv asi kele wor? Ejki!

26 Ko suri nga kami sete kamrongwos kaploli nanu nga marowarrens ngel nir pirpe nga ngok nen nir, ko suri sev kami kamok-rorrrmi pelake nanu minij nga ngak nen nir suri mauren se kami?

27 “Kami kaprorrmi ta nevngu sekavöl. Sekavöl sete emajing erpe jinibb, ko sete evitvit te. Ko inu nuwrai tevi kami, numal Solomon kele tuwi ori sunsun nga marres pelak nir; ko sete arres arirpe nevngu sekavöl ngok san.

28 Atua emetmete mösmös ne orsel nga parmaur lelingen ko mevinen mun parsulir ko pa; ko ngok ni pimetmete wor kami pilep p̄iasi wor womu rengen mösmös, O kami nga nosurien se kami ewelili.

29 “Ko sete kaprorrmi pelake nanen nga kami kaproi, ko nuwi nga kami kapminir, rreknga kaprorrmi nanu pilep pelak.

30 Nanu ngel nir jinibb jile nga marlik iel ngatan nir nga sete marosuri Atua arokrorrmi ko arok-pej. Ko Tata se kami ma orongwos pae sev nga nevre kami marmumrrol ren.

31 Ko nanu nga milep nen nga kami kaploli, kapp̄elak nga kapsil van rengen batun vanu se Atua. Ko ni pia-lai kobbong nanu ngok nir tevi kami.

32 Sete kapmetutu te, kami meling welili. Suri Tata se kami orongwose erres nga ni pia-la batun vanu sen tevi kami.

Jinibb nga joron milep rengen no Atua

33 “Kapwulwule joro kami, ko kaplai nevöt nen tevi beres nir. Ko re sel ngok ko, erpe kami kamvati narr se kami nga sete marongwos parmutmut, ko kamlingi joro kami parto rengen melrin. Iok sete arongwos parsij, ko jinibb ne venao sete orongwos pian, ko momom sete orongwos pulokloksir.

34 Suri nga ngabe nga narr se kami puto rengen, ko ngok lat nen ko nolo kami puto rengen tetajer.”

Jinibb se Iesu nir parmetmet ko wor tetajer terai Iesu pulwi vini

35 Ko Iesu owrai kele tevi jinibb sen nir “Kami kapmetmet ko wor tetajer terai inu bolwi vini. Ko kapserteni netatuw se kami p̄itertter, ko kapsuli laet se kami pimor metmet.

36 Kami kapirpe jinibb ne majingen nga m̄ilik terai numal sen daron nga ni pulwi rengen nanen ne totkoien sen e vini. Ko daron nga pulwi vini ko pututi metali, ko nir partasi metali pivesane tevi ni.

³⁷ Neiren reнге jinibb ne majingen nen nir, suri nir sete armatur te reнге daron nga numal ser mivini, ko m̄ilesi nir markulu metmet terai ni mulwi vini. Nuwretun nuwrai tevi kami, ni puloli p̄irres p̄elak tevir; p̄ila netatuw sen p̄itatuwe, ko puloli nir parlik ngatan, ko p̄ila nanen tevir paraani.

³⁸ Ko poro pulolola sopen, pia-vini reнге nat p̄irrang sopen rreknga nat p̄isal p̄irin, ko p̄ilesi lartul nen nir parok-teravi malume pirpok, ko ngok neiren reнге lartul nen nir.

³⁹ Ko kami kaprongwose nanu ngel: Poro nga jinibb san purongwose daron mawos nga jinibb venaо p̄ivini e, ko ni sete orongwos p̄ivel lingi naim sen; p̄imetmet ko wor, puloli m̄ernen sete orongwos p̄iasi van.

⁴⁰ Ko pirpok kele ko, kami kele kapmetmet ko wor, suri Inu Jinibb Mawos dea-vini reнге daron san nga kami sete kaprormi rragrrage nga inu bolwi vini reнге.

Nale rrongrrongvi ne jinibb ne majingeru

⁴¹ Ko Pita owrai tevi Iesu owra “Numal, kuwra nale rrongrrongvi tevi kem kis belabong, rreknga tevi jinibb jille nir?”

⁴² Ko Numal owra lweni tevi “Ia, ko kuprunge ta nale ngel: Jinibb si nga m̄ilngi nolon re majingen nga numal sen m̄ila tevi, ko evi jinibb ne majingen nga norongwosien sen mutoe. Ni evi jinibb san nga numal sen p̄ilngi p̄imetmete naim sen jile, ko p̄ila nanen tevi jinibb sen nir reнге daron mawos nen.

⁴³ Neiren reнге m̄ernen daron nga Numal sen pulwi vini e ko p̄ilesi nga ni puloli pirpok.

⁴⁴ Nuwretun nuwrai tevi kami, m̄ernen ko numal sen p̄ilngi ni p̄ivi batu jinibb nga p̄imetmete joron nir.

⁴⁵ “Ko poro jinibb ne majingen nen purrormi reнге nolon puwra ‘Numal suk ololola lengleng reнге nga pulwi vini,’ ko p̄itipatun pivirrvirrali jinibb ne majingen nir, ko pian ko p̄iminmin ko p̄ivi jinibb ne botminmin.

⁴⁶ Mian ko numal se jinibb ne majingen nen pulwi vini reнге nabong san nga m̄ernen sete murongwos rragrrage. Ko numal nen piwirr tweni m̄ernen, ko puloli ni pian p̄ilik p̄isij p̄erper tevi jinibb nga marsij ko nga nosurien ser mijkie.

⁴⁷ “Jinibb ne majingen nga murongwose pa sev nga numal sen mimrreni nga ni puloli tevi ni, ko sete muloli te nanu nen, m̄ernen numal sen pia-virrvirrali temij-pale.

⁴⁸ Ko m̄er nga ma sete murongwose nanu nga numal sen mimrreni, ko muloli

nanu nga musorsan tevi pa nga parvirrvirrali reнге pilep suri, ko ejki, parvirrvirrali puwelili kobbong suri. Erpok ko, jinibb si nga marla nanu milep tevi, m̄ernen parngoni nanu pilep jin; ko jinibb si nga Atua m̄ilngi pa nanu milep reнге nevren, m̄ernen Atua emrreni p̄imajing majingen nga marlelep.

Iesu ololi jinibb nir arwij ngasngasu

⁴⁹ “Inu nuvini nga bosor tweni nabb reнге iel ngatan. Ko nabb nen ein pa, ko poro puror ko inu bololi sev? Inu beir lengleng.

⁵⁰ Ko nanu erwen le ngel, baptaesen san nga muto malum, nga inu bepaptaes reнге; ko inu nomok-runge esij e, pian pian pijpari nanu ngel p̄ivini p̄iasi; ko osuw vajin.

⁵¹ Kami kamrormi nga inu nuvini tweni nga bela demat tevi iel ngatan? Ejki rres nawon! Inu nuwrai tevi kami, sete bela demat, ko bowjuwje ma jinibb ko parwijwij ngasu nir.

⁵² Ko etipatun le pa ngel ko p̄itajer tevi le pa, metka san nir pielim parlik korti reнге naim pisansan. Ko nir p̄itul partere nuru p̄ieru, ko nuru p̄ieru portere nir p̄itul.

⁵³ Tata ko p̄itre natun norman, ko natun norman p̄itre tata sen. Ko tasu p̄itre natun nesenwarreng, ko natun nesenwarreng p̄itre tasu sen, ko lektek p̄itre nesevinli sen, ko nesevinli sen p̄itre p̄ilen lektek.”

Jinibb nir parlasi wose wor nelesien ne daron se Iesu ko

⁵⁴ Ko Iesu owrai kele tevi delung nir owra “Daron nga kami kamlesi nabor marimare marmot korti milep lat san, ko kamrongwos pae ko evesane, ko kamwera ‘Naus pus ko’, ko mian ko erpe nga kami kamwera.

⁵⁵ Ko daron nga kami kamlesi ling mur-rurweli tolu, ko kamwera ‘Nat pututun ko pilep’, ko mian ko erpe nga kamwera.

⁵⁶ Kami nga kamiel reнге sel eru! Kamrongwos kapwera suri nelesien nga kamlesir reнге iel ngatan ko reнге melrin. Nanu nawon ngok nir kami kamlesi woser. Ko erpese reнге daron se inu nga lelingen ngel? Erpese kami sete kamrongwose kaplesi wose nelesien nen te mijki?

Jinibb se Iesu pian ko wor p̄irij tevi m̄er nga m̄itre ni

⁵⁷ “Ko erpese nga kami lweni sete kamrongwose kapwera suri nanu nga marres nir marsorsan nga moro kaplolir?

⁵⁸ Poro nik ko m̄er nga kamru komorlat koporivel korti koporan ji numal nga puspe lilane, ko daron nga komorivel reнге sel e, ko kupwera lilane tevi ni. Poro pijki, ko ni tilngim van reнге nevre

numal, ko numal tilngi nik van renge nevre polis, ko polis tilngi nik van renge naim ne nekaien.

⁵⁹ Nuwrai tevi nik, sete kurongwos kupi-vare renge ie pijpari wor kupla jile ko nevöt nga marlingi ko marwera kuplai.”

13

Jinibb nolor pululwi renge nololien ser

¹ Ko jinibb sopor arlik ie renge daron nen ko arini ji Iesu. Ko arsupe suri mēri Galili sopor nga marloli sulsulen van ji Atua, ko Paelet otur imare ko erevji pinir re daron mawos nga marloli sulsulen.

² Ko Iesu owra lweni tevir “Ko ngok suri mirpok ngok, kami kamrrorrmī mēri Galili ngel nir arsiy womu ne wor mēri Galili jijle nir, suri nga marpal mirpok?”

³ Inu nuwrai tevi kami, Ejki. Poro kami sete nolo kami pulululwi renge nololien se kami nir nga kamok-lolir, kami kele kapmij kapjijki pirpe nir.

⁴ Ko nir esngavöl drromon owil (18) nga naim nga muwu mare renge Saeloam mimav ko mirevji pinir; kami kamrrorrmī nir arsiy wor easie nir mīnīj nen nir nga marlik renge Jerusalem?

⁵ Ejki rres nawon! Inu nuwrai tevi kami, poro kami nolo kami sete pulululwi renge nololien se kami nga kamok-lolir, kami kele kapmij pirpe nir marjijki ngok.”

Nale rrongrrongvi ne nai nga sete mīuwen

⁶ Ko Iesu owra nale rrongrrongvi ngel tevir, owra “Jinibb san orwi nai pik san renge orsel sen. Mian ko evini epej wenen rengen, ko sete elesi san rragrag.”

⁷ Ko owrai tevi mēer nga mimetmete dan sen, owra ‘Kuplesi, sia itul le pa mevini mepej nai pik ngel wenen rengen, ko sete nulesi te san. Kupta bburi piravij ngatan, erpese mimni nawone suwe dan?’

⁸ Ko mēer nga mok-metmete dan sen owra lweni tevi owra ‘Numal, kuplinglingi pa putur kele mun renge sia ngel, ko inu beli rrale bbulwil renge batun, ko bololi lilane dan pirres rengen.’

⁹ Ko poro nga pia-wen vajin renge sia nga vitu, ko ngok erres ko. Ko poro nga pia-jiki, ko kupa-ta bburi ko pivitan ngatan.”

Iesu ololi dure nesevin san nga murru otur rramos luwi renge nabong ne Sapat

¹⁰ Ko Iesu ok-visviseni renge loloim ne naim ne loten san renge nabong ne Sapat.

¹¹ Ko nesevin san nga nerūin nga mīsij mīsisiwi muloli mimi sia esngavöl drromon owil (18), nga duren murru jer, sete

murongwos putur rramos renge nabong san, elik ie.

¹² Ko daron nga Iesu mīlesi vinnen ko owra “Vinē! Kuprres ko pa renge mesien som nga muloli duren murru ngok.”

¹³ Ko Iesu elngi nevre renge vin nga, ko erres evesane renge duren nga murru nga, ko osrōvi Atua.

¹⁴ Ko numal ne naim ne loten olarsī lenglengē Iesu suri nga muloli vinnen mīrres renge nabong ne Sapat, ko ni erij otortori delung nir, owra “Nabong ouwon kis nga jinibb puloli majingen rengen, ko kapini renge nabong nen nir ko kami kaprres renge mesien se kami nir, ko sete nabong ne Sapat, pijki!”

¹⁵ Ko Numal owra lweni tevi owra “Kami nga kamiēl renge sel eru! Sete kami sisamis kamok-telasi buluk se kami rreknga dongki se kami renge nabong ne Sapat, ko kamok-iler van renge nuwi parminmin?”

¹⁶ Ko vinēl evi metka se Epram san nga Demij mīsrē totoni ni renge sia esngavöl drromon owil, ko erpese sete erres renge ni pivēl sisarow renge nabong ne Sapat?”

¹⁷ Nale sen nga muwrair ngel nir arloli devje nuval sen nir nor eta dan. Ko delung arir elep suri nanu nga marres nga ni mulolir.

Nale rrongrrongvi ne jelangi nubek

¹⁸ Iesu owra “Batun vanu se Atua erpe sev, ko sev osorsan tevi nga inu bowra rrongrrongvi rengen?”

¹⁹ Erpe jelangi nubek san nga muwelili jer, nga jinibb mīlai ko murwi renge dan sen. Ko etiv pelari, ko emaur, evi nai nga milep san; ko numōn ne mesa nir arow vini, arsakel renge rengsin, ko arjali menuner rengen.”C

Nale rrongrrongvi ne is

²⁰ Ko Iesu owra kele “Batun vanu se Atua erpe sev? Ko sev osorsan tevi nga inu bowra rrongrrongvi ren?”

²¹ Osorsan tevi is nga nesevin mīlai ko mīlgi renge besin ne plaoa itul kis, mian ko mipau jijle vajin.”

Metali nga welili

²² Mian ko Iesu evel suri sel sen evel rrrungi ngaim nga marlelep nir ko ngaim nga marwowereng nir; ko ok-visviseni jinibb nir, ko ok-tajer tevi van renge Jerusalem e.

²³ Ko jinibb san osusi tevi ni owra “Numal, nir puwelili kobbong para-maur?” Ko ni owra lweni tevi owra

²⁴ “Kami kapjelak temijjal ko wor tweni nga kapan kapsil renge metali nga welili

C **13:19** Erpe iel, Luk orrongrrongvi batun vanu se Atua erpe jelangi mastat, ko suri mastat ejki iel, namlingi nubek, nga puloli mining ne nale se Luk pipilari limjer.

ko. Inu nuwrai tevi kami, nir pilep paramerreni nga paran parsil rengen, ko sete parongwos paran te, ejki.

²⁵ Ko Numal ne naim tutur imare ko tian tikikiorore metali, ko kami tamoka-tur jer vini vare e. Ko kaptipatun kapututi metali, ko kapverus 'Numal, kuptasi metali tevi kem!' Ko ni tia-wera lweni tevi kami, 'Inu nurrerleng sisini kami. Kami kamivi mēri ngabe ko?'

²⁶ Ko kami kaptipatun kapwera lweni tevi inu, kapwera 'Ejki ma, namok-aan tevim ko namok-minmin tevim, ko nik komok-visviseni kem lat nga kem!'

²⁷ Ko ni puwra lweni kele tevi kami, 'Inu nurrerleng sisini kami. Kami kamivi mēri ngabe ko, kami nga kamok-loli nanu nga marsij nir.'

²⁸ Ko kami kapting ko kaporrliw daron nga kaplesi Epram ko Aesak ko Jepok ko propet nir renge batun vanu se Atua, ko kami lweni parwirr tweni kami kapjkie.

²⁹ Ko delung parivel renge vanu pētḗḗti ngok vini, ko parsakel tevi Atua renge batun vanu sen, paraan tevi.

³⁰ Ko kaplesi renge ie nir nga marivi jinibb nga marwellili, mian ko para-ivi jinibb nga marlelep; ko nir nga marivi jinibb nga marlelep, mian ko para-ivi jinibb nga marwellili."

Erot Antipas owra pīrevji pini Iesu

³¹ Ko renge daron nen mawos ko pa Parasi sopor arini ji Iesu ko arwerai tevi "Kupiel lingi iel, kupan iok e sopon. Suri Erot emrreni pīrevjim kupmij."

³² Ko Iesu owra lweni tevir owra "O, morok evi jinibb ne gerisen. Kapan kapwera tevi, ni pīlesi inu nuoji tweni neñin nga marsij nir, ko bololi nir nga marmesi parres luwi lelingen ko mevi. Ko renge nabong itolin vajin ko bololi jile majingen suk.

³³ Ko ngok niko inu bevijuri suri wor sel suk ko renge lelingen ko mevi ko teru, ko bejpari Jerusalem. Suri ewretun lenglengen, Jerusalem evi lat nga moro partori pīrres propet nir rengen; ko ejki mun, arok-revji pinir ma ren.

Iesu etengsi mēri Jerusalem

³⁴ "O Jerusalem, Jerusalem, nik nga kumrevji pini propet nir ko kumtuwe pini nir nga Atua mukonir vini jim! Momori inu numrreni bololi jinibb som nir parlik korti pirpe nato nga misrew ore natun nir, ko nik kumus."

³⁵ Ko kuplesi, Atua evel lingi pa ngaim som oto kiskis. Ko kami sete kama-lesi inu te ejki, pian pijpari daron nga kami kapa-wera 'Atua, kuprij pīrres suri mēer nga mivini renge nise Iova.' "

14

Iesu ololi jinibb nga mimsi san erres luwi

¹ Renge nabong ne Sapat san ko Iesu evan nga pīaan tevi mērwomu ne Parasi nir san. Ko delung arujruj van mori jin, ko armeteni suri ni eterter.

² Ko jinibb san nga drru nevren nuru ko drru belan nuru morsosol pa nga pimij elik renge ie.

³ Ko Iesu elesi, ko osusi tevi jinibb ne nevisisenien ne nale neseseien nir ko Parasi nir, owra "Renge nale ne neseseien se kerr emarong nga rraploli jinibb pīrres luwi renge nabong ne Sapat, rreknga ejki?"

⁴ Ko nir armurrarrong nawon, sete arwera nanu san. Ko Iesu eptevi tweni mēnen ko ololi erres luwi, ko elngilngi ni evel.

⁵ Ko Iesu owrai tevi jinibb nir, owra "Isi renge kami poro nga natun rreknga buluk sen otoo, ko osobbul van ngatan renge bbulwi ne nuwi renge nabong ne Sapat, ko mēnen sete orongwos pian mawos pīrvei tweni renge wosenen?"

⁶ Ko nir armurrarrong nawon kele, sete arongwos parwera lweni kele nale san tevi ni.

Norrormien se jinibb pian ngatan

⁷ Iesu owra nale rrongrongvi san tevi nir nga marsakel maraan, suri elesi nir arpepej lat seksakel nga marto womu. Ko owrai tevir owra

⁸ "Poro jinibb pisan pungoni nik nga kupan renge nanen ne totkoien sen, ko kupan, ko sete kupsakel womu renge lat seksakel nga mīrres. Suri mēer nga mungoni nik tungoni jinibb nga milep asie wor nik san tia-vivitu vini.

⁹ Ko poro pīrpek ko mēer nga mungoni nik nen tia-vini jim ko tia-werai tevim, 'Kuptur iok, mērel pīvinuk pīsakel iok re mīlmgom,' ko ngok nik kupan kuplik ngatan, ko kupmanun pilep.

¹⁰ Ko poro daron nga parngonim e, ko nik kupan ko kuplik bbong ngatan. Ko ngok poro mēer nga mungonim pīvini ko pīlesim,

ko puwrai tevim 'Selek, kupini kupsakel mare.' Ko ngok ni puloli nolom pīr renge no jinibb nir nga kupan kupsakel mare tevi nir nga kapaan.

¹¹ Suri mēer nga mīlngi lweni ni van mare, mian ko Atua puloli ni pivi jinibb nga pian ngatan jer. Ko mēer nga muloli ni mian ngatan, mian ko Atua puloli ni pian mare."

Murrun nga parveruse jinibb nir parini paraan

¹² Ko Iesu owrai tevi mēer nga miveruse ni nga pīaan tevi, owra "Poro nga nik

kuploli nanen ne levia rreknga rivriv, sete erres kupveruse selem nir, rreknga tuwan nir rreknga metka som nir rreknga selem nga joron milep nga mülük tevim bbong. Poro pirpok, ko nir parverus kele bbong nik, ko parkele lweni nanu nga kumloli tevir.

¹³ Ko poro daron nga nik kuploli nanen pisan, ko kupveruse ðeres nir ko jinibb nga marus karkar nir ko nir nga ðelar marsij nir ko metrorr nir.

¹⁴ Ko nik kuprunge þirres, suri lartul nen nir sete arongwos parkele lweni tevi nik. Ko Atua vajin pia-kele lweni tevi nik renga daron nga puloli jinibb nga marres nir parmaur luwi kele re mijen."

Nale rrongrrongvi ne nanen nga milep

¹⁵ Ko san renga nir nga marsakel tevi nga maraan murnge nanu ngel nir e, ko owrai tevi Iesu owra "Mer nga pian pia-aan renga batun vanu se Atua, ni purnge þirres pilep."

¹⁶ Ko ni owrai tevi mñernen owra "Jinibb san ololi nanen nga milep san, ko everuse jinibb elep parini renga nanen.

¹⁷ Ko renga daron ne nanen vajin, ko ni okoni jinibb ne majingen sen pian puwrai tevi lartul nga ni muwrai pa tevir nga paravini, 'Kapini vajin, arloli nanu jile arsuw pa, arto metmet.'

¹⁸ Ko nir jile norrorrmien ser evi sansan e, ko artipatun arwera orore nanu sopor. Nir san nga womunen owra 'Inu nua-wuli bbong orsel san, ko inu numrreni bean mun ðelesi ta; sete numa-vinuk ko, ejki.'

¹⁹ Ko nir erwen nen kele owrai tevi, 'Inu nua-wuli bbong buluk nga marok-revei kat esngavöl, ko inu numrreni bean borrowrowe ta nir parmajing lesi ta. Sete numa-vinuk ko, ejki.'

²⁰ Ko nir itolin kele owra 'Inu nua-lesi bbong nesevin suk, ko niko inu sete numa-vinuk ko, ejki.'

²¹ Ko jinibb ne majingen nen olwi van, ko owrai suri nale nga lartul nga marwerai tevi ni, tevi numal sen. Ko numal nen ololar lengleng, ko owrai tevi jinibb ne majingen nen, owra 'Kupsaro pingavil, kupan renga sel nga marwolu ototvi live laut ne ngaim ko sel lele kele nir. Ko kuptekai ðeres nir, ko nir nga niber marsij, ko metrorr nir, ko naroj nir; ko nir vajin parini renga nanen.'

²² Ko ni evan, ololi jile, mian ko olwi ko owra 'Numal, inu nuloli pa erpe nga kumwerai osuw, ko loloim elep malum wor oto.'

²³ Ko numal owrai tevi jinibb ne majingen sen owra 'Kupiel, kupan kele kupvijuri sel jile nga iok e nir, ko kupvijuri sel nga maran orsel e nir. Ko kupan kupsupe

þirres tevi jinibb nir parini ko parsongni naim suk puwun saut.

²⁴ Inu nuwrai tevi kami, jinibb nga mongoni womu nir ngok, nir san sete mia-vini mia-rroi nanen suk sopon.'

Jinibb se Iesu puloli wor Iesu ko puwomu renga ni

²⁵ Delung jinibb nga milep arvijuri suri Iesu. Ko Iesu erieni lweni emtenir, ko owrai tevi nir owra

²⁶ "Poro jinibb san emrreni pivini ji inu, ko mñernen pimrreni inu þiasi jer wore mimrreni tata sen, ko tasu sen, ko ni wor nesen sen, ko natun nir, ko tuwan nir, ko jokin nir, ko ni kele wor mauren sen. Ko ngok mñernen orongwos pivi jinibb suk san vajin.

²⁷ Ko isi nga sete muwosi nai pelaot sen ko mivijurik, ni sete orongwos pivi jinibb suk san.

²⁸ "Ko poro kami san pimrreni þili naim nga muwu mare temijpal san, ko setemun þilik ngatan te purrorrmi suri lat nga nowlin puto surie pirlpese, ni evtete puwli jile rreknga ejki?

²⁹ Poro pirpe nga ngok, ko ni titipatun bbong, ko tia-runge turrow renga ni, tuloli bbong ngatan nen ko. Ko ngok sete tivter mun tia-loli jijle; ko jinibb nir tarlesi ko tarmen keraji ni rengen,

³⁰ tarwera 'Merel emajinge naim ngel, ko setemun evtete nga þimajing jijle mun, omrrol ren.'

³¹ "Ko poro nga numal san piptevi jinibb nuval pivi nuvasngavöl vasngavöl vesan (10,000), paran parval tevi numal mñinj san nga miptevi jinibb nuval mivi nuvasngavöl vasngavöl varu (20,000) mivini tevir nga parval tevi nir. Numal nen þilik ko wor ngatan purrorrmi suri lat nga puto surie puwomu, poro nga ni eteter evtete nga pival tevi numal mñinj nen, rreknga ejki.

³² Ko poro pijki, ko ni pukoni jinibb sopon parivel ore numal nen tuwen nen, parsewute renga sel renga daron nga ni mivél malum ngasue, ko parngoni demat tevi."

³³ Iesu ewer otvi nale sen, owra erpel le: "Ko erpok ko, poro kami san sete pivél lingi jile nanu nga marivi sen nir, mñernen sete orongwos pivi jinibb suk te, ejki.

Sol nga dilten musuw renga

³⁴ "Sol erres; ko poro dilten nga mimelmel pusuw jer renga, ko parloli lweni pimelmel luwi pirlpese ko?

³⁵ Sete erres rragrag mun renga parloli nanu kele e san, nanu nga mñirres rreknga nanu nga müsij. Parwirre kobong þirresres. Mer nga boron mutoe, purnge re nolo boron."

15

Nale rrongrrongvi ne sipsip nga mijki

¹ Renge nabong san, ko jinibb nga marok-la nevöt ne takis nir ko jinibb nga marsij nga marwirr tweni nir arini armurrarronge Iesu.

² Ko Parasi nir ko jinibb ne nevisvisenien ne nale neseseien nir arlesi, ko artipatun arok-sur vijvij malum bbong arok-wor suri Iesu, arwera "Merel okorti tevi jinibb nga marsij nir ko ean tevir."

³ Ko Iesu ornge marwera, ko owra nale rrongrrongvi san tevir, owra

⁴ "Poro nga san renga kami sipsip sen ongut vesan (100), ko san pijijki lingir, ko erpese, ni sete orongwos pilngilngi ngavöl esiw drromon esiw (99) ngok renga lolo merwer parurro mösmös, ko ni pipej nga mijijki nen, pian pijpari nga piska lweni?"

⁵ Pian ko wor, ko daron nga miska lweni, ko owosi elngi ejingteni renga birparin, ko eir nga eir lengleng.

⁶ Ko daron nga muwosi lweni vini ngaim e, ko everus kortoni selen nir nga marlik ngasue ni ko nga marlik mori bbong ni, ko owrai tevir, 'Kerr rrapir, suri nuska lweni pa sipsip suk nga mijijki nga.'

⁷ Ko inu nuwrai tevi kami, pipok ko renga melrin. Nir parir lengleng suri jinibb sansan nga misij nga nolon mulululwi, piasa ngavöl esiw drromon esiw nga marok-wera lweni kis pae nga marivi jinibb nga marres, ko armusus nolor pulululwi.

Nale rrongrrongvi ne nevöt nga welili san nga mijijki

⁸ "Ko nesevin si renga kami poro pilngi silva pisngavöl ko pisansan pijijki, ko erpe? Ni pusli laet ko puraki vaseni loloim, pipej pian pijpari nga piska lweni.

⁹ Ko daron nga vinnen miskai lweni, ko everus kortoni selen nir nga marlik ngasue ni ko nir nga marlik mori bbong ni ko owrai tevir, owra 'Kerr rrapir, suri nuska lweni pa silva suk nga mijijki nga.'

¹⁰ Ko inu nuwrai tevi kami, pipok ko renga no anglo se Atua. Nir parir lengleng suri jinibb sansan bbong nga misij nga mijijki nen, nga nolon mululwi mirpel."

Nale rrongrrongvi ne melakel nga mutor jabble sel

¹¹ Ko Iesu owra "Jinibb san nga natun eru morivi norman.

¹² Ko ngok mervitu nen evan ji tata sen ko ongoni tevi, owra "Tata, kuptutweni jorom nga parivi se komru nen nir, pivsivsesse komru korti." Ko ni otutweni joron tevi nuru korti.

¹³ Mian ko nabong sete elep mun, ko mervitu nen eser kortoni joron jille nir

ko evel evan renga ngaim nga milep san nga muto ngasu. Ko elik ie, ko etipatun olokloksi pëtpëti joron renga norrorrmien sen nga sete murrormi mürres e.

¹⁴ "Ko daron nga mulokloksi pëtpëti joron e nir, ko numer nga milep eimare renga ngaim nen; ko ejki mun, ni joron arsuwsw pëtpëti pa.

¹⁵ Ko ni lweni evan emajing se jinibb ne ngaim nen san. Ko mernen okoni ni evan renga orsel nga marok-wungani berper sen nir rengen, nga pok-wungani berper sen nir. Ko renga marwungani berper, mieri Isrel nir arlesi evi majingen san nga misij berper.

¹⁶ Ko ni numer aji lenglengen e, ko sete san ela nanen rragrrag san tevi nga purroi; ko ngok ololi emrreni lenglengen e purro nanen se berper nir sopon, nga puloli pup e.

¹⁷ Mian ko nolon olwi, orrorrmi lweni tata sen vajin, ko owra 'Aro, jinibb ne majingen se tata nir elep wor, ko nanen evtere nir pëtpëti, ko majbhöl nen ojpon; ko suri sev inu bemij e numer iel!

¹⁸ Erres ma inu bemra iel, ko holwi van ji tata. Ko bowrai tevi ni, "Tata, inu nuloli esij renga no Atua ko renga no nik kele.

¹⁹ Ko ngok inu setemun nurres renga jinibb parwera inu nuvi natum san, ejki mun. Ko kuploli inu ma bevi jinibb ne majingen som san."

²⁰ Ko ni otur imare ko evel, pivini ji tata sen e.

"Ko daron nga mivel ngasu malum mivini, ko tata sen ese. Ko orrorrmi temijpale. Ko owlu telese ko pa, evan ko erake totoni, ko orromji.

²¹ Ko natun owrai tevi ni "Tata, inu nuloli esij renga no

Atua ko renga no nik kele. Inu setemun nurres renga jinibb parwera inu nuvi natum san.'

²² Ko tata sen everuse jinibb ne majingen sen nir, owra 'Kapsaro pingavil, kapla sunsun nga mürresresi asi nen, kaploli ni puri. Ko kapla ring suk ko kaploli piraie re bbösö nevren, ko kaploli piraie but.

²³ Ko kapan kaprevji natu buluk san nga milep mürres; ko rrapurroi, ko kerr rrapir vajin.

²⁴ Suri natuk ngel erpe emij le pa osuw, ko emaur luwi kele. Ni erpe ejijki le pa, ko nulesi lweni kele.' Ko nir artipatun arir vajin.

²⁵ "Ko ni natun norman nga wowomu nen ejkie nir, evel womu evan pa orsel e. Mian ko olwi vini ngaim e. Ko daron nga mivini morie naim, ko ornge drrelar marla nubo ko marsaw.

²⁶ Ko ni everuse jinibb ne majingen se tata sen san vini jin, ko osusi tevi owra 'Sev ko ngok?'

²⁷ Ko m̄ernen owra lweni tevi ni, owra 'O, tasim olwi vini ngaim, ko niko tata som erevji natu buluk nga milep m̄irres san rengen, suri ni m̄ilesi natun mulwi vini mimaur malum bbong.'

²⁸ Ko ni ololar e, omusus pian loloim. Ko tata sen eivare vini vare e ko evini jin, ko eiari ni nga pian loloim.

²⁹ Ko ni owra lweni tevi tata sen, owra 'Kuplesi, inu numajing som sia sia, nurpe jinibb ne majingen som san. Ko sete nutor otvi nale neseseien som san, ejki rres nawon. Ko nik sete kula nanu san rragrag tevik. Sete kula nanani san tevik nga inu bololi nanen e san tevi selek nir ko nafir.

³⁰ Ko daron nga ma natun ngel nga mulokloksi p̄et̄p̄eti jorom nir tevi nesevin ne sel nir mivini e, ko nik kutur imare, kurevji natu buluk nga milep m̄irres rengen ni!

³¹ Ko tata sen owra lweni tevi ni owra 'Natuk, nik kulik tevik tetajer ko pa, ko ngok nanu jile nga marivi suk arivi som ko pa.

³² Niko erres kerr rraṗaan vajin ko rraṗir, suri tasim ngel erpe emij ko pa ko emaur luwi; ko ejijki ko pa, ko rramlesi lweni kele.' "

16

Nale rrongrrongvi ne burtur nga majingen sen sete muloli momsawos

¹ Ko Iesu owrai tevi jinibb sen nir, owra "Numal san joron elep. Ko ni elngi jinibb ne majingen sen san nga pimete nija sen nir. Ko mian ko jinibb sapor arini ji numal nen, ko arwera 'O, jinibb som ngok olokloksi jorom nir.'

² Ko numal nen everuse m̄er nga mivi burtur rengen joron nen vini jin, ko owrai tevi 'Sev le ngel nga inu mornge rengen nik? Kupsuw ko pa, setemun kuma-ivi burtur rengen inu jorok nir. Kupan kupuli tweni lat nga komok-majing muto suri, ko san kele p̄ila wanim.'

³ Ko burtur nen orrorrmi rengen nolon, owra 'Inu bololi sev le, suri numal suk p̄ila tweni inu rengen majingen suk? Ko inu derteren suk sete evter rengen nga beli dan orsel, ko numanun kele rengen nga bongun-gun.'

⁴ Mian ko owra 'E! Inu nurongwos pae lat nga bololi surie rengen daron nga numal suk p̄ila tweni majingen suk jik, puloli jinibb nir parmarong kobbong nga inu bean loloim se nir.'

⁵ Ko ni everuse jinibb nga marloli nivnon ji numal sen arini jin. Ko osusi womue tevi

nir san, owra 'Nik kuloli nivnon e sev ji numal suk?'

⁶ Ko m̄er nga mususi womu nen e tevi owra lweni tevi, owra 'Inu nuloli nivnon e dram oel ongut (100).' Ko burtur nen owra lweni tevi, 'Naul nen le ngel, kuplai ko kupuli pingavöl pielim (50) kobbong rengen.'

⁷ Ko osusi kele tevi nir san, owra 'Ko nik kuloli nivnon e sev?' Ko m̄ernen owrai tevi, owra 'Inu nuloli nivnon e bak wit evi nuvasngavöl vesan (1000).' Ko burtur nen owra lweni tevi 'Naul nen le ngel, kuplai ko kupuli ongut valim (500) kobbong rengen.'

⁸ Ko numal se m̄er nga mivi burtur nga sete muloli mumomsawos nga owra 'O, morok norrorrmien sen engavilvil nawon, orongwos kemkam̄e lat nga puloli surie!' Suri jinibb ne iel ngatan nir arongwose asie nir nga marlik rengen moron.

Sel nga marwulwule nevöt

⁹ "Kami kele kaploli pirpe morok, kapla nijor ne iel ngatan nir, ko kaplair tevi jinibb nir. Ngok puloli nir parir suri kami, ko partekai kami van rengen naim nga rengen melrin nir rrek!

¹⁰ Ejki! Mer nga m̄irres rengen puloli nanu nga welili bbong, ngok ni p̄irres rengen puloli kele nanu nga milep. Ko m̄er nga sete erres rengen puloli nanu nga welili bbong, ngok ni sete mia-rres rengen puloli nanu nga milep kele.

¹¹ Erpok ko, poro sete kamloli erres rengen nijor ne iel ngatan nir, ko si p̄ila nijor nga marres weretunen ne melrin tevi kami kapmetmeter?

¹² Ko poro sete kamrres rengen kapmetmete nijor se jinibb m̄inij, si p̄ilai tevi kami nijor nga parivi se kami?

Jinibb san sete orongwose p̄imajing se numal pieru pivesane

¹³ "Sete jinibb san orongwose p̄imajing se numal pieru pivesane. Poro pipok, ko tungasi nuru tuwen, ko timrreni nuru tuwen nen. Erpok ko, sete Atua orongwos pukonim re majingen sen poro nevöt mukonim pa rengen majingen sen. Suri sete kurongwos kupmajing se nuru korti evesane."

Parasi nir arok-merreni temijpale nevöt

¹⁴ Ko Parasi nir arok-merreni temijpale nevöt, ko daron nga marunge nanu nga Iesu muwrair ngok e nir, ko armen kerajie.

¹⁵ Ko Iesu owrai tevi nir owra "Kami ngok ko kamivi lartul nga tetajer kamwera kamrres rengen mete jinibb. Ko Atua orongwose nolo kami. Ko sev nga marloli mian mare rengen jinibb bbong, ngok sete evi nanu san rragrag rengen no Atua.

Jinibb arĕlak tweni nga paran reŋge batun vanu se Atua

¹⁶ "Nale neseseŕeien oto ko pa, ko nale se propet nir arto ko pa, mian ko mivini mijpari daron se Jon Baptaes vajin. Ko reŋge daron nen mawos ko vajin, marwerwer reŋge noŝpen nga mĩrres; ko jinibb arĕlak temijpal arwera paran reŋge batun vanu se Atua.

¹⁷ Ko evi nanu nga mĩterter reŋge melrin ko iel ngatan porjijki; ko evi nanu nga mĩterter kele wor mĩasi san reŋge bebje nale ne nale neseseŕeien ngel san pijijki.

¹⁸ "Erpok ko, jinibb si nga ĩlŋgi kurtweni nesen sen ko ĩtkai kele nesevin mĩnij san, erpe evitan re nesevin ngok ko vajin. Ko mĩer nga mĩtkai kele nesevin nga diwen sen mĩlŋgi kurtweni, ni kele evitan re nesevin ngok."

Nale rrongrrongvi ne mĩer nga joron milep ko Lasros

¹⁹ Ko Iesu ela jilweren kele san erpel: "Jinibb san nga joron milep elik lat san. Ko ni tetazer ok-uri sunsun nga nulser marres ĩlak marsongsong, ko marow raprap titis, ko marmalum marres. Ko nabong jijle ean erres ko eir, elelea.

²⁰ Ko jinibb san nga mivi ĩeres nga mokngun-ngun res nga miwajie Lasros elik ie reŋge metali se mĩer nga joron milep nen. Ko mĩernen niben nir arkar ĩetĕĕti.

²¹ Ko ni emrreni lengleng pok-rroi bebje nanen nga marvitvitan reŋge tep se mĩer nga joron milep nen. Ko ejki; ko guli aroklini arok-lomlomi niben nga markar nir.

²² Mian ko vitunen vajin ko ĩeres nga mokngun-ngun res nga emij. Ko anglo nir arwosi ni van reŋge melrin ji Epram, ko elik liji nelin. Mian ko vitunen vajin, ko mĩer nga joron milep nga ea-mij vajin, ko artevni.

²³ Ko ni elik reŋge lat ne mijen, ko ornge esij elep lengleng. Ko daron nga moro muklu, ko elesi Epram iokwan ngasu jer, ko Lasros emajil reŋge morkon.

²⁴ Ko ni ekail everus owra 'Tata Epram, warru kuprormi inu! Kupkoni Lasros pian purrurrngoni bbõs nevren pisansan reŋge nuwi, ko puloli pujum reŋge nemek, ko pimemrrali. Suri inu nurŋge esij nga esij lengleng reŋge lomi nabb ngel.'

²⁵ Ko Epram owra lweni tevi, owra 'Natuk, kuprormi reŋge daron nga nik kummaur e. Nik kulesi nanu jile arres vinuk jim; ko Lasros ornge esij elep, elesi nanu jile arsj vini jin. Ko reŋge lelingen ngel vajin ni ela lol molmol, ornge erres; ko nik kulik reŋge lat ne norongen nga mĩsij, kurnge esij.

²⁶ Ko nanu san muto ngok liven ne kem ko kami, evi mesa nga milep. Ko ngok

nir nga parwera parasi vinuk ji kami sete arloli wos parasi vinuk ji kami, ko kami sete kamrongwose kapasi vini ji kem iel.'

²⁷ Ko mian ko mĩer nga joron milep nga owra lweni tevi owra 'Tata, nungoni tevi nik, warru kupkoni Lasros pulwi kele van reŋge naim se tata suk.

²⁸ Suri inu tasik elim, ko erres ma reŋge ni pian ko pususus metu tevi nir, ko puloli nga nir sete parini kele iel reŋge lat nga inu morŋge mĩsij ngel e.'

²⁹ Ko Epram owra lweni tevi mĩer nga joron milep nga owra 'O, ejki, tasim nir, naul se Moses ko naul se propet nir arto pa jir. Naul ser nen ko pa nir parsusus metu tevir.'

³⁰ Mer nga joron milep owra lweni tevi owra 'O, ejki, tata Epram, poro ma san pimaaur luwi ko wor reŋge mijen ko pian jir, ko ngok ko ma nir nolol pululwi ko reŋge nololien ser nir!'

³¹ Ko Epram owra lweni tevi, 'Poro nir sete parunge nale ne naul se Moses ko nale ne naul se propet nir, ko ngok nir parirpok kele kobbong reŋge nga poro san pimaaur luwi reŋge mijen; sete mara-osuri te, ejki.' "

17

Jinibb nga muloli jinibb mĩnij mĩjilaklak mivitan van reŋge nololien

¹ Iesu owrai tevi jinibb sen nir owra "Nanu nga parloli jinibb parjilaklak parvitan van reŋge nololien parini ko wor, sete orongwos pijki. Iok ewretun, ko wi pia-sij wor niko reŋge mĩer nga pia-la nanu ngok nir parpelari!

² Erres ĩelak poro nga parsaro puwomu pingavil parla nevõt nga milep ko san, ko parile dil reŋge mĩernen nowen ko parjurõni ngalu reŋge dis mot, ĩiasie nga poro puloli nir nga welili ngel san ĩjilaklak pivitan van reŋge nololien.

Jinibb ĩtlasi tweni nololien se jinibb ko wor

³ "Kami kapmetmet lululweni kami lweni ko wor. Poro tuwam rreknga tasim puloli ĩsij tevim, ko nik kupwera lilane ko wor tevi ni. Ko poro nolol pulululwi, ko kuptelasi tweni nololien sen.

⁴ Ko poro puloli ĩsij tevi nik pivavis kis reŋge nabong sansan bbong, ko ngok poro pulwi vini jim puwra nolol olululwi, ko ngok, nik kuptelasi tweni ko wor."

Nosurien se jinibb nga muosuri Atua

⁵ Ko aposol nir arwerai tevi Iesu arwera "Numal, kuploli nosurien se kem puruj kele wor van mare."

⁶ Ko Numal owra lweni tevir owra "Po, ko poro nosurien se kami puwelili bbong

pirpe jelangi nubek,^D ko kamrongwos kapwera¹ tevi nai sikmon nga milep ngel, 'Nik lweni kuprrangi twenim ko kupan kuptur renge dis,' ko ni puloli kobbong pirpe nga kami kamwera¹ ngok ko tevi.

Murrun se jinibb nga mīmajing

⁷ "Ko isi niko renge kami poro jinibb ne majingen sen pīmajing renge orsel pīlawlaw rreknga pimetmete sipsip, ko poro pulwi vini ngaim e, ko nik kupwera¹ tevi, 'Erres, kupsaro pingavil, kuptajer ko pa kupa-an.'

⁸ Ejki rres nawon, nik kupwera¹ ma tevi 'Nik kuploli nanen suk puto teraik, ko nik kupla netatuw som ko kuptatuwe ko kupselsale nanen suk daron nga inu beaan e, ko beminmin jile mun pusuw. Ko vitunen vajin ko nik ko kupa-aan ko kupa-minmin.'

⁹ Ko kami kamrormi numal nen owra erres tevi jinibb ne majingen sen suri nga muloli nanu ngel nir nga ni muwrai? Ejki! Evi wor nanu nga puloli ko.

¹⁰ Ko kami kele kapirpok, kaploli nanu jile nga inu nuwrai tevi kami nga kaploli¹, ko ngok ololi kami kapwera¹ vajin 'Niko erres ko wor, kem ngel namivi bbong jinibb ne majingen som le, osorsan ko wor renge nabloli pirpok.' "

Iesu ololi jinibb esngavöl nga marmesi e mesien nga niber mīmēmaul arwokwok luwi

¹¹ Ko daron nga marivel suri sel nga paran Jerusalem e, ko Iesu eptevir arivel rrurngi renge liven ne Sameria ko Galili.

¹² Ko aran laut renge ngaim nen san. Ko jinibb nga marmesi e mesien nga niber mīmēmaul esngavöl arini ji Iesu. Ko sete arini morie, artur bbong ngasu.

¹³ Ko arverus van jin, arwera "Iesu, Numal, warru kuprormi kem!"

¹⁴ Ko Iesu oklu van emtenir, ko owrai tevir "Kami kapan ji batun jinibb ne sulsulen ko kaploli ni pununri kami." Ko daron nga marok-ivel suri bbong sel malum e vini, ko nir jile arwokwok pa osuw.

¹⁵ Ko san renge nir nga esngavöl ngok nīlesi muwokwok ko olwi vini ko osrövi Atua drrelan ean mare jer.

¹⁶ Ko daron nga mivini ji Iesu, ko ejipa van ngatan renge dan re Bēla Iesu, ko owra erres tevi ni. Ko mīernen evi mēri Sameria ko.

¹⁷ Ko Iesu osusi lweni owra "Nuwrate nga nuloli nir esngavöl ko arres arwokwok luwi, ko nibeni nir esiw?"

¹⁸ Sete nir san orongwos pulwi vini pusrövi Atua, mērel bbong esan nga mivi jinibb neturvitan!"

¹⁹ Ko ni owrai tevi mīernen, "Kuptur imare ko kupvijuri sel som, ko kupluwi. Nosurien som ololim kumwokwok ko kumrres."

Batun vanu se Atua pivini seveling

²⁰ Ko Parasi sopor arsusi tevi Iesu arwera "Batun vanu se Atua pivini seveling?" Ko Iesu owra lweni tevir owra "Batun vanu se Atua sete orongwos pivini renge sel nga parlesi rengen.

²¹ Sete jinibb san puwrai tevi nik, 'Kuplesi ngel', rreknga 'Kuplesi ngokwan,' ejki. Batun vanu se Atua oto pa renge nolo jinibb."

Nabong se Jinibb Mawos pivini

²² Ko Iesu owrai tevi jinibb sen nir owra "Mian ko daron nen pia-vini nga kami kapmerreni kaplesi nabong se Jinibb Mawos, ko kami sete kamrongwos kaplesi.

²³ Ko jinibb nir arongwos parwera¹ tevi kami, parwera 'Kaplesi ngokwan!', rreknga 'Kaplesi ngel!'; ko ngok kami sete kapan kapkulkulu pej te, pijki.

²⁴ Erpe navil nga mivil, daron nga mivil renge devje melrin ko mimor vaseni melrin pētṗeti mivesane mijpari devjen, nga jinibb jijle nir marlesi. Ko ngok pia-irpok renge inu Jinibb Mawos renge daron nga bea-luwi vini.

²⁵ Ko womunen inu bornge pīsij renge nanu pilep renge dul nga marmaur lelingen ngel parloli tevik.

²⁶ "Erpe renge daron se Noa tuwi jinibb nir arlelea nawon, ko ngok pipok ko renge nabong se inu Jinibb Mawos.

²⁷ Renge daron nen ko jinibb araan ko arminmin ko arlesi nesevin, ko armusus parunge nale se Noa, mianan mijpari daron nga Noa mian renge lolo drrav nga muwse; ko nuwi owl ko ervei jinibb nir, ko armij pētṗeti.

²⁸ Pirpe kele nabong se Lot. Jinibb araan ko arminmin ko arwulwul ko aruw ko arilili naim nir.

²⁹ Ko mian ko mijpari daron nga Lot mivel lingi Sotom e, ko nabb ko nevöt nga marin arvitvitan renge melrin erpe naus nga mus, ko osli nir, arin pētṗeti arivi niavin.

³⁰ Ngok nabong se inu Jinibb Mawos nga bevini rengen pusorsan tevi ko pipok.

³¹ "Ko renge nabong nen, mēn nga mīllilik vare renge naim sen ko joron marto renge loloim, ni sete pian kele mun pīla twenir. Ko mēn nga mutur renge orsel, ni sete

^D 17:6 Erpe iel, Luk orrongrongvi nosurien ser erpe jelangi mastat; ko suri mastat ejki iel, namlingi nubek, nga puloli mining ne nale se Luk pipari limjer.

puwlu luwi keke mun van reнге naim sen nga ðila joron.

³² Kaprrormi sev nga miplari ji nesen se Lot.

³³ Si nga mimrreni ðila se mauren sen, mñnen putor jabble mauren sen. Ko si nga ma mutor jabble mauren sen, ni pia-la lweni mauren sen.

³⁴ Ko inu nuwrai tevi kami, reнге nat nga mupong nen, jinibb ðieru pormatur reнге maling pisansan; ko parteka tweni tuwen, ko nuru tuwen nen ðilik jer.

³⁵ Ko nesevin ðieru porlik lat pisansan parvarrvarr; ko nuru tuwen parteka tweni, ko nuru tuwen ðilik jer.

³⁶ [Jinibb ðieru pormajing reнге orsel; tuwen parteka tweni, ko nuru tuwen ðilik jer.]^E

³⁷ Ko jinibb sen nir arwera lweni tevi “Ngabe ko, Numal?” Ko Iesu owra lweni tevir owra “Lat nen kapa-lesi wos bbonge ko. Pirpe daron nga nanu san emij, ko numön nir nga marok-tasi parmot rrале; orongwos kaplesi wose kobbong ngasu.”

18

Nale rrongrrongvi ne nesevin san nga mok-julñi suri numal san

¹ Ko Iesu owra nale rrongrrongvi san tevi jinibb sen nir nga pivisvisenri e nga parlot tetajer, sete partibbtibbot e.

² Owra “Numal san elik reнге ngaim san. Ko ni sete emtutu rragrrag Atua, ko sete ornge jinibb san.

³ Ko reнге ngaim nen nesevin san nga diwen sen mimij lingi elik reнге. Ko vinnen evini tetajer ko pa jin, ok-luni suri numal nen nga puloli lilane nanu nga muto jin ko ji devje nuval sen.

⁴ Ko numal nen omusus puloli. Epriv wor mian, ko vitunen vajin ni lweni orrorrmi lweni ko owra ‘Inu sete numtutu Atua ko sete nurnge jinibb san.

⁵ Ko suri vinel mutor momorie pa mivini ko mivijajeng jik, ko bololi ma nanu nga muwrai. Poro ðijki, ko ngok puloli inu sete numa-lik mñrres rragrrag, pivijajeng inu ko tetajer.’

⁶ “Ko kami kamrunge sev nga numal nga mñsij nen muwrai.

⁷ Ko erpese reнге Atua ko jinibb sen nir nga mutobbobbue nir, nga marngir suri ni reнге nata mñrin ko nata mupong? Kami kamrrormi ni orongwos pulolola reнге puloli nanu nga marngir suri ngok e?

⁸ Inu nuwrai tevi kami, Atua pisaro pingavil, puloli lilane nanu nen tevir.

^E 17:36 Nale nga muto re nolo [], rrek sete Luk oli, ko jinibb san ea-uli virtue daron nga muli tweni kopi san ne naul ngel.

Ko inu Jinibb Mawos reнге daron nga bea-luwi vini e, ko bea-lesi nosurien puto malum reнге jinibb ne iel ngatan nir, rrenga ejki mun?”

Nale rrongrrongvi ne Parasi ko jinibb nga mok-la nevöt ne takis

⁹ Ko Iesu owra nale rrongrrongvi san tevi jinibb nir nga marok-linglingi lweni nir lweni marok-wera marres, ko marok-kulu wutan re jinibb mñinj nen nir.

¹⁰ “Jinibb eru oran lolaim reнге naim ne loten nga porlot. Nuru tuwen evi Parasi, ko nuru tuwen nen evi jinibb nga mok-la nevöt ne takis.

¹¹ Ko Parasi esan otur ko olot owra ‘Atua, nuwra erres wor tevi nik, suri nga inu sete nurpe jinibb nga ngok nir nga marok-vevna ko marok-loli nanu nga sete marres, ko marok-loli mñsij tevi nesevin nir. Ko inu sete nurpe keke mñer nga mok-la nevöt ne takis ngel.

¹² Renge wik jile inu nomok-linglingi nanen reнге nabong nen eru, ko jorok nir, nomok-la songovlön tevi nik tetajer.’

¹³ “Ko mñer nga mok-la nevöt ne takis nen otur tuwi ngasu, ko sete oklu imare emteni melrin, ejki. Ko owjuwje morkon nga miviseni nga murnge mñsij, ko owra ‘Atua, kuprrormi inu! Nuvi jinibb nga mñsij.’”

¹⁴ Ko Iesu owrai tevi nir, owra “Nuwrai tevi kami, mñerel ko, daron nga morivare, ko ni ko evi mñer nga mumomsawos reнге no Atua nen, ko sete nuru tuwen nen. Suri mñer nga mñlengi ni van mare, ko Atua puloli ni pian ngatan; ko mñer nga mñlengi ni van ngatan, ko Atua ðilengi ni van mare.”

Iesu erij erres suri bipiwarreng

¹⁵ Ko jinibb sopor arpitevi bipiwarreng ser nir arini ji Iesu nga ni ðilengi nevren rer ko ðirij ðirres surir. Ko daron nga jinibb sen nir marlesi, ko arwer orer sete paran jin, ðijki.

¹⁶ Ko Iesu everus nir paran jin. Ko owra “Kaplilingi bipiwarreng nir parini jik, sete kapwer orer te, ðijki. Suri batun vanu se Atua evi se nir ko nga nolor marirpe bipiwarreng ngok nir.

¹⁷ Nuwretun nuwrai tevi kami, Mer nga sete puloli nolon pivini pirpe bipiwarreng, ni sete orongwos pian reнге batun vanu se Atua.”

Jinibb san nga joron milep emrreni ðila mauren nga muto tuwi ngok vini

¹⁸ Ko mñerwomu san re mñeri Isrel nir osusi tevi Iesu, owra “Wurru, jinibb nevisvisenien nga mñrres, bololi pirpese ko bela mauren nga muto tuwi ngok vini?”

¹⁹ Ko Iesu owra lweni tevi m̄nernen, owra “Erpese nik kumverus inu m̄erres? Sete san erres, Atua kobbong esan erres.

²⁰ Ko nik kurongwose pae nale nesereien se Atua nga muwra ‘Nik sete kupve-nae nesevin, ko sete kuprevji pini jinibb, ko sete kupvevna, ko sete kupkerkeris, ko kuptori tata som ko tasu som.’ ”

²¹ Ko ni owra “Nanu ngok nir, inu nulolir jile pa renge daron nga bbong mevi nanwarreng e ko mijpari lelingen ngel.”

²² Ko daron nga Iesu murnge muwrai mirpok, ko owra lweni tevi owra “Nanu sansan kobbong oipon evi nga kummerreni malume. Jorom nir kupwulwul p̄etp̄eti nir, ko kuptutweni nev̄ot ner tevi b̄eres nir. Ko nik jorom pia-to renge melrin. Ko kupini kupvijurik.”

²³ Ko daron nga m̄nernen murnge nale ngel e, ornge lengleng esij e. Suri ni evi jinibb nga joron milep san.

²⁴ Ko Iesu elesi nga m̄nernen ornge lengleng esij e. Ko owra “Evi nanu nga m̄iterter milep nga jinibb nga joron milep pian renge batun vanu se Atua.

²⁵ Erpe nato, eterter temijpal renge liwen pietiv.^F Ko nga jinibb nga joron milep pian renge batun vanu se Atua, eterter temijpal wor asiē ngok.”

²⁶ Lartul nga marunge muwrai mirpok arwera lweni tevi, “Aro, poro p̄irpok ko isi ko ma p̄iasi pimaaur?”

²⁷ Ko Iesu owra lweni tevir “Sev nga m̄iterter re jinibb puloli, sete eterter rragrag renga nga Atua puloli.”

²⁸ Ko ngok ololi Pita owra lweni tevi, “Ko kuplesi, kem namiel lingi nanu jijle nga marivi se kem nir arjipon, ko namvijuri nik.”

²⁹ Ko Iesu owra lweni tevir “Inu nuwretun nuwrai tevi kami, m̄ner nga miv̄el lingi naim sen, rreknga nesen sen, rreknga tuwan tevi tasin nir, rreknga tata sen tevi tasu sen, rreknga natun nir, suri batun vanu se Atua,

³⁰ m̄nernen pia-lai pilep kele wor renge daron nga lelingen ngel; ko renge daron nga para-vini, ko ni pia-la mauren nga muto tuwi ngok vini.”

Iesu os̄pe sur mijen sen vatolin

³¹ Ko Iesu eptevi jinibb sen nir arsan kis, ko owrai tevir owra “Kaplesi, rramtongsa le van mare e renge Jerusalem. Ko nanu jile nga propet nir maruli tuwi suri inu Jinibb Mawos parpelari ko wor.

³² Partekai inu van ji jinibb ne vare, ko partetnije inu ko parlutōvi inu.

³³ Ko nir parvirralik ko parevji pinik. Ko nabong p̄itul, ko inu bemaaur luwi kele.”

³⁴ Ko jinibb sen nir arrleng sisini nale nga muwrai ngel, ko sete arongwose rragrrage sapon.

Iesu ololi jinibb san nga meten murrorr oklu luwi

³⁵ Ko Iesu otutur suri sel evan morie Jeriko. Ko jinibb san nga mok-ngun-ngun nga meten murrorr, elik renge jeli sel.

³⁶ Ko daron nga m̄ner nga meten murrorr nen murnge delung jinibb nga milep marivel asi renge sel, ko osusi owra “A, sev ko ngok?”

³⁷ Ko nir arwera lweni tevi arwera “Iesu ne doNasret ko m̄iasi ngok.”

³⁸ Ko daron nga murnge, ko ekail everus van mare owra “Iesu, nik Devet metka sen, kuprorrmi inu!”

³⁹ Ko jinibb nga martur van womue renge lat nga non mimawos e arwera ore ni, arwera “Kupmurrarrong!” Ko ni ea-verus temijpal kele ko ma van mare lengleng, owra “Nik Devet metka sen, waru kuprorrmi inu!”

⁴⁰ Ko Iesu otur murrong, ko owra partekai ni van jin. Ko daron nga miv̄el vini mori ji Iesu, ko osusi tevi,

⁴¹ owra “Nik kumarong nga inu bololi sev tevi nik?” Ko metrorr nen owra lweni tevi owra “Numal, numrreni kuploli metek p̄uklu!”

⁴² Ko Iesu owra lweni tevi owra “Kup-kulu! Nosurien som ololi nik kumrres.”

⁴³ Ko meten oklu evesane. Ko evijuri Iesu, ko osrōvi Atua. Ko daron nga delung nir marlesi e, ko arsurōvi Atua.

19

Iesu ko Sakias

¹ Ko Iesu evijuri sel van renge Jeriko e, nga p̄iasi lingi ie vajin;

² ko jinibb san nga nisen Sakias elik renge iok. Ko ngok renge nir nga marok-la nev̄ot ne takis, ni evi jinibb nga milep rer, ko evi jinibb nga joron milep kele.

³ Ni okluku pej Iesu, owra p̄ilesi wose evi jinibb nga mirpese ko. Ko sete orngwos p̄ileslesi, suri ni evi jinibb nga mumrol jer, ko delung elep p̄elak.

⁴ Ko owlu wowomu asiē delung nir, ko ean esa renge drru nai san nga mirpe nai sikmon, emrreni p̄ilesi wose Iesu renge daron nga pia-asi renge sel nen.

⁵ Ko daron nga Iesu miv̄el vini mumom-sawose lat nen, ko esarrerr imare emteni, ko owrai tevi owra “Sakias, kupsaro pingavil, kupjubbul vini ngatan e. Suri nga lelingen inu belik renge loloim som.”

⁶ Ko Sakias esaro ngavil, ojubbul vini ngatan e, ko eptevi Iesu. Ko eir lengleng.

^F 18:25 Erpe iel, Luk os̄pe kamel p̄isil rrrurrgi batu nitel san nolon. Ko suri kamel ejki iel, namsūpe nato ela wani.

7 Ko daron nga delung marlesi e ko arwor surie, arwera "Ni evan rengo naim se jinibb nga m̄isij!"

8 Ko daron nga marsakel vajin re naim se Sakias, ko Sakias otur mare ko owrai tevi Numal owra "Bela wukari jorok nir; devjen bea-lai tevi beres nir, ko devjen pivi suk. Ko poro nuvnae pa joro jinibb san, ko bea-la lweni nanu pivij bea-kele e."

9 Ko Iesu owra lweni tevi owra "Lelingen mauren easi vini rengo naim ngel, suri nik kele kuvi Epram metka sen san."

10 Suri inu jinibb Mawos nuvini nga nomok-pej nir nga marsarr marjijki nga bela ser."

Nale rrongrrongvi ne jinibb nga martori ne vöt se numal ser

11 Ko daron nga marmurrarrong suri nanu ngel nir e, ko Iesu erij malum ko pa etajer tevi, owra nale rrongrrongvi san. Suri ni evini mori pa rengo Jerusalem e, ko suri nga nir arok-rorromi nga batun vanu se Atua pivini p̄irmali pingavilvil.

12 Ko ni owra "Jinibb nga mivi jinibb nga milep san owra pian ngasu rengo vanu nga milep san, nga parloli ni pivi batu numal ne vanu sen, ko pia-luwi vini."

13 Ko ni everuse jinibb ne majingen sen esngavöl arini ji ni, ko ela ne vöt san nga marwera mina esngavöl tevi nir sisamis. Ko owrai tevir, owra 'Kapla ne vöt ngel nir ko kapmajing rer, ko kaprevei kele ne vöt sopor parto tevir, pian pijpari rengo daron nga inu bolwi vini e.'

14 Ko ni evel lingi vanu sen. Ko jinibb sen nir nga rengo vanu sen arungasi ni, ko arkoni jinibb sopor arvijuri ni nga parwera 'Kem sete nammerreni m̄erel pivi numal se kem, ejki.'

15 "Ko daron nga mulwi vini e, nga m̄ila jile derteren sen erpe batu numal, ko everus jinibb ne majingen sen nen nir nga ni m̄ila ne vöt tevir parini ji ni, nga ni purnge jir nga nir armajing rer ne vöt nen nir, ko evis nga marlai kele muto tevi."

16 Ko m̄erwomu nen evini ko otur womu rengo non, ko owra 'Numal kuplesi, ne vöt som le ngel. Ko inu numajing ren, ko nula kele esngavöl oto tevi nga kumlai tevik.'

17 Ko ni owrai tevi owra 'Nik kuloli erres, kuvi jinibb ne majingen nga m̄irres. Nik kuloli erres rengo nanu nga welili jer bbong. Inu belngi nik kupmetmete ngaim nga marlelep pisngavöl.'

18 Ko nir erwen evini kele, ko otur womu rengo non, ko owra 'Numal, kuplesi ne vöt som le ngel, ko inu numajing ren, ko nula kele elim oto tevi nga kumlai tevik.'

19 Ko ni owrai kele tevi m̄ernen, owra 'Nik kele kupivi numal rengo ngaim nga marlelep pielim.'

20 Ko nir itolin kele evini, ko owra 'Numal, kuplesi ne vöt som le ngel. Inu mulai ko nunbunbe ore e kalek e, ko nulngi oto.'

21 Suri numtutue nik; kuvi m̄er murrum m̄iterter. Komok-la kele nanu nga nik sete kumlingi, ko komok-la kele nanu nga sete kumruwir.'

22 Ko ni owra lweni tevi m̄ernen owra 'Nik kuvi jinibb ne majingen nga m̄isij, inu bewer lokloksim suri nale som ngok ko nir. Suri nik kurongwose nga inu nuvi jinibb nga murruk m̄iterter, nomok-la nanu nga sete m̄elngir, ko nomok-la nanu nga sete morwir.'

23 Ko erpese sete kumla ne vöt suk ko kumlingi rengo naim ne ne vöt lat nga marok-to rengo e? Ko daron nga inu bea-luwi vini e, ko bea-la lweni ne vöt suk tevi majbböl nen.'

24 Ko ni owrai tevi lartul nga martur ie, owra 'Kapla tweni ne vöt nga mutorir jin, ko kaplai tevi m̄er nga mutori misngavöl.'

25 Ko nir arwera lweni tevi arwera 'Numal, ko ni otori pa esngavöl osuw!'

26 Ko ni owra lweni tevir, owra 'Inu nuwrai tevi kami, nir jile nga martori, parlai kele wor tevir. Ko nir jile nga sete martori, ko beblen nga martori, para-la tweni jir.'

27 Ko jinibb suk ngel nir nga marungasi inu ngel, nga sete marmerrreni inu bevi numal ser ngok, kapreveir vini jik, ko kaprevji pinir rengo inu nok.' "

Iesu evan rengo Jerusalem ko jinibb nir arsusi nisen van mare

28 Ko daron nga Iesu muwra jile nale ngel e, ko otongsa wowomu van rengo Jerusalem e.

29 Ko daron nga marini mori Betpaj e ko Betani rengo botwen nga marveruse Botwen ne lolnai ne olip, ko ni okoni jinibb sen eru,

30 owra "Koporivel, koporwowomu van rengo ngaim nga mutö mawos kamru ngok. Ko koporlesi natu dongki san ni ko arile totoni otur nga jinibb san setewor esakel rrongvi rengo. Ko koportelasi tweni dalin ko koporile vini."

31 Ko poro jinibb san pususi tevi kamru, 'Erpese komortelasi?', ko kamru koporwera lweni tevi koporwera 'Numal emreni.' "

32 Ko laru nga Numal mukoni nuru nen orivel suri sel van, ko orlesi erpe nga Numal muwrai tevi nuru.

33 Ko daron nga mortelasi tweni dil ne natu dongki e, ko lartul nga ser arlesi ko arwera tevi nuru, arwera "Erpese kamru komortelasi tweni dil ne natu dongki?"

³⁴ Ko nuru orwera lweni tevir orwera "Numal le emrenni."

³⁵ Ko nuru orile vini ji Iesu. Ko nir arpelteni sunsun ser reнге drrun, ko arloli Iesu esa esakel rengen.

³⁶ Ko daron nga mivel suri sel e ko nir sopor kele arla sunsun ser ko arpelteni reнге sel.

³⁷ Ko daron nga ni mivini mori Jerusalem e reнге lat nga sel mujubbul van ngatan e reнге Botwen ne lolnai ne olip e, ko delung jile nga marivi jinibb sen nir artipatun arir ko arsurövi Atua, drrelar elep van mare, suri nanu nga marinijnij nawone nir nga marlesir.

³⁸ Ko arwera "Numal Atua, nik kurij pa erres tevi ni nga mivini reнге nik nisem. Demat puto reнге melrin ko nosrövien pian ji ni, Atua ne Drronsen Mare."

³⁹ Ko Parasi sopor reнге meling jinibb nga milep ngel arij van ji Iesu, arwera "Jinibb nevisvisenien, kupwer ore jinibb som nir!"

⁴⁰ Ko Iesu owra lweni tevir owra "Nuwrai tevi kami, poro nir parmurrar-rong, ko nevöt nawon ngel nir vajin parkail van mare."

Iesu etengsi Jerusalem

⁴¹ Ko daron nga Iesu mivini morie Jerusalem ko emteni, ko etengsi,

⁴² owra "Poro bbong kuprongwose nabong nga lelingen, ko nik kuprongwose nanu nga mivi demat ko! Ko ejki mun, lelingen ngel memem sete orongwos pïlesi mun.

⁴³ Mian ko nabong nen nir para-vini, ko nir nga marivi devje nuval som partuwe nawot nga puwlu rralem, ko parlik rralem ko parmetmet ore nik reнге iok jijle.

⁴⁴ Ko nir parjijkarre petpeti nik ko jinibb nga marlik tevim reнге live laut ne nawot som, ko sete parlinglingi nevöt ne nawot nen san pijngat jer reнге pisan. Suri nik sete kurongwose daron nga lelingenok nga Atua muwra pïla som."

Iesu evan reнге loloim ne Naim On

⁴⁵ Ko Iesu evan reнге loloim ne Naim On. Ko ejeli tweni nir nga marwulwul, paran vare e.

⁴⁶ Ko owrai tevir owra "Aruli erpel reнге Naul On: Atua owra 'Naim suk parveruse naim ne verusen'. Ko kami kamtur imare vajin ko kamloli evi 'naim ne venao res.' "

Atua kuprij pïrres suri Numal nga mivini

⁴⁷ Ko reнге nabong jijle Iesu ok-an ok-visviseni reнге Naim On. Ko batu jinibb ne sulsulen ko jinibb ne nevisvisenien ne nale neseseien nir armerreni parevji pini.

⁴⁸ Ko arrelenge suri lat nga parloli suri e, sete artor sweri sel san nga parloli rengen. Suri delung jile arkomrönir suri, armurrarong kemkarne nale sen nir.

20

Jinibb womu se mēri Isrel nir arsusi si ela derteren tevi Iesu

¹ Mian ko ermmali erpel: reнге nabong san, daron nga Iesu mok-visviseni jinibb nir e reнге Naim On ko mok-werwer reнге nospen nga mïrres, ko batu jinibb ne sulsulen sopor ko jinibb nevisvisenien ne nale neseseien sopor ko bïrterawarreng sopor arkorti ko arini.

² Ko arsusi tevi, arwera "Kupwerai ta tevi kem, isi ko ela derteren ngel tevi nik, nga kumrres reнге kuploli nanu ngel nir?"

³ Ko Iesu owra lweni tevir owra "Ko inu kele bosusi ta nale san ni le tevi kami, ko kami kapwerai tevik.

⁴ Baptaesen se Jon evel ji Atua vini, rrenga evel ji jinibb kobbong vini?"

⁵ Ko nir arsupsupe suri lululweni tevi nir kis bbong ko arwera "Rrapwera pirpese? Poro rrapwera 'Evel ji Atua vini,' ko ni puwra 'Ko suri sev kami sete kamosuri Jon?"

⁶ Ko poro rrapwera 'Evel ji jinibb vini,' ko delung ngel nir parla nevöt nir ko partuwe pini kerr e. Suri nir artori Jon evi propet."

⁷ Ko nir arwera lweni tevi arwera "Iawo, kem namrelenge lat nga mivel e vini."

⁸ Ko Iesu owra lweni tevir owra "Ko inu kele sete numa-werai tevi kami inu nula derteren ngel ngabe le nga mololi nanu ngel e nir."

Nale rrongrongvi ne jinibb sopor nga sete marmetmet lilane orsel se numal san

⁹ Ko Iesu etipatun owra nale rrongrongvi ngel tevi delung nir, owra "Jinibb san orwi naut ne grep san. Ko elngi tevi jinibb sopor parmajing rengen, ko ni evel van reнге ngaim mïnij san, ko elik ie epriv val wor.

¹⁰ Ko reнге daron mawos nga grep wenen marok-mirr e, ko numal nen okoni jinibb ne majingen sen san van ji lartul nga marmajing rengen, nga parla merrenien ne wenen nen sopon tevi. Ko lartul nen nir arvirrvirrali mïnern ko arkoni tweni ototori nevren, olwi kiskis tevi.

¹¹ Ko numal nen okoni kele jinibb ne majingen sen mïnij nen kele san evan. Ko mïnern kele lartul nga arvirrvirrali, ko arloli esij tevi jile osuw, ko arkoni tweni ototori nevren, olwi kiskis kele tevi.

¹² Mian ko numal nga okoni kele nir itolin van; ko mïnern kele lartul nga arevji lengleng ko arwirre van vare e.

13 Ko numal ne naut ne grep nga owra 'Aro! Bololi pîrrese? Inu bokoni vajin natuk nga memrreni, ko ni ko ma nir partori pîrres ko.'

14 Ko daron nga lartul nen nir marlesi ni, ko arwerwera lululweni tevir, arwera 'Ngok natu numal nen ko ngok! Kerr pîrevji pini, ko orsel sen pivi vajin se kerr!'

15 Ko arrul totoni, ko arevei tweni re orsel van vare e, ko arevji pini emij."

Ko Iesu owra "Ko numal ngel pia-loli pîrrese tevir?"

16 Ni pia-revji pini lartul ngel nir parmij, ko pîlîngi orsel ngel tevi jinibb mînij nir."

Ko daron nga marunge nale ngel nir e, ko delung arwera "Ejki rres nawon!"

17 Ko Iesu oklu mawos nir, ko osusi tevir owra "Ia, ko nale nga maruli renga Naul On ngel owra sev le, nga muwra 'Nabur nga jinibb nga marok-majinge naim marungasi marwirre, ni ko vajin evi nabur nga murrul totoni naim mîterter.'G

18 Si nga pusnge nabur ngel, niben pimabur, ko si nga nabur ngel piravij ren, niben pumoloplop pîtpîti."

19 Ko renga daron momsawos nen ko pa ko jinibb nevisvisenien ne nale nesesreien nir ko batu jinibb ne sulsulen nir arloli lesi parevei Iesu. Suri arongwose nga ni owra nale rrongrongvi ngok ewer lokloksi nir rengen. Ko armetutue jinibb nir, ololi setemun arrul totoni.

Erres renga kerr rrapwuli takis tevi Sisa?

20 Ko nir arpepej sel san nga poro pîrres renga nir nga puloli partor wos Iesu renga, ko niko puloli nir parongwose vajin parlingi ni van renga nevre numal, ko numal vajin pia-tor pini. Ko niko arwuli jinibb sopor nga paran parloli sel kerkeris tevi ni, nga puloli nir parla Iesu renga nale sen nir.

21 Ko lartul ngel nir arsusi kerkerasi tevi Iesu, arwera "Jinibb nevisvisenien, kem namrongwos iok, sev nga kumwerai ko kumvisviseni jinibb e nir arweretun temijpal. Ko sete komok-rrorrmi san, poro evi jinibb nga milep rreknga muwelili, ko kurij telair ko wor, komok-visviseni marongen se Atua weretunen tevi jinibb nir.

22 Ko nammerreni nabrongwose ta, Ia, erres kobbong renga nale nesesreien se kerr nga poro rrapwuli takis tevi Sisa, batu numal se mîri Rom nir, rreknga sete erres?"

23 Ko Iesu elesi wose nale gerisen ser nga marwerai nga markerkerasi e, ko owrai tevir owra

24 "Kapsareni ta nevôt nen tevik ßelesi." Ko nir arlai san tevi. Ko ni owra "Isi le non ngel, ko nisen maruli renga ngel?" Ko nir arwera "Rrekma Sisa ko."

25 Ko Iesu owra lweni tevir, owra "Ko niko nanu nga mivi se Sisa kapla lweni tevi Sisa. Ko nanu nga mivi se Atua, kapla lweni tevi Atua."

26 Ko lartul ngel nir sete arongwos parlai ni renga nale sen ngel nir renga no jinibb nir. Artaole muwrai mirpok, ko armurrarrong jer.

Errese renga jinibb pimaaur luwi renga mijen?

27 Ko Satusi sopor, nga marok-wera jinibb sete arongwos pimaaur luwi kele renga mijen, arini ji Iesu ko arsusi kerkerasi tevi

28 arwera "Ia, ko jinibb nevisvisenien, Moses oli pa renga nale nesesreien se kerr nga muwra 'Poro jinibb san pimij, ko poro mîernen elesi nesevin san, ko natu nuru ejkie, ko ngok tasin pîlesi kele nesevin nga tuwan mimij lingi nga, ko pivesi wani metka se tuwan nga mimij ngok.'

29 Ko ngok, jinibb niaken ebut; mîrwomu nen elesi nesevin, ko mian ko emij, ko natu nuru ejkie.

30 Ko mîrvitu nen kele elesi.

31 Mian ko nir itolin kele elesi vinnen. Mian mian ejpari nir jile nga ebut nen arlesi vinnen. Ko nir jijle natur ejkie, ko armij lingi vinnen.

32 Vitunen vajin ko vinnen vajin emij.

33 Ko mirpok ngok, renga nabong nga Atua puloli jinibb nir parmaur luwi kele re mijen, nir si nen ko pia-ivi nesen sen e? Suri nir ebut jile ngok martekai vinnen. Kupwerai ta we!"

34 Ko Iesu owra lweni tevir, owra "Renga iel ngatan ngel, norman nir ko nesevin nir arongwos partotko.

35 Ko nir nga Atua mîlesir arres re parmaur luwi re mijen renga liken ne tuwi ngok vini, nir ko ma sete arongwos paroktotko.

36 Nir arsorsan tevi anglo nir, parmaur tuwi ngok vini, sete arongwos parmij kele mun. Nir arivi pa Atua natun, suri ni ololi nir armaur luwi kele renga mijen.

37 Ko renga devjen ne nir nga marmij, nga mivi weretunen nga marongwose parmaur luwi renga mijen, Moses kele nga kami kamtori, ni ko eviseni tweni nga evi weretunen. Suri renga jilweren ne nai welili nen nga nabb muroror ren ko sete

G 20:17 Erpe iel, Luk ospe nevôt, ko murrun nga nir marili naim muto suri; ko kem namrieni erpe kerr rramili naim iel, nga puloli mining ne nale se Luk piplari limjer.

ani, Moses oli nale se Atua nga muwra 'Inu nuvi Iova Atua se Epram, ko Atua se Aesak, ko Atua se Jekop.'

³⁸ Ngok niko, ni sete evi Atua se nir nga marmij te ejki. Ni evi Atua se nir nga marmaur. Suri Atua derteren sen elep nga elep lingi mijen, ko jinibb jijle armaur kobbong renge ni."

³⁹ Ko jinibb nevisvisenien ne nale nesereien sopor arwera "Ejki, aro, jinibb nevisvisenien, nik kuwra lweni omom-sawos erres pelak."

⁴⁰ Ko ngok ololi nir armetutue pae ko, armusus parsusi nanu kele mun san tevi.

Nosusien suri Mesaea

⁴¹ Ko Iesu owra lweni tevir, owra "Erpese nir marwera Mesaea evi metka se Devet san?"

⁴² Suri Devet lweni owrai renge naul ne Sam, owra 'Numal Atua owrai tevi Numal suk "Kupsakel iel renge nevrekk rres ko kuptiriv

⁴³ pijpari nga inu belngi devje nuval som parirpe lat nga kupbböt ren renge nolon belam ngatan."

⁴⁴ Niko Devet owra mïernen evi Numal sen. Ko poro pipok ngok, ko Mesaea evi metka sen erpese ko?"

Iesu osur metutu tevi jinibb nir nga parmetutue jinibb nevisvisenien ne nale nesereien nir

⁴⁵ Daron nga jinibb nir marmurrarong e, ko Iesu owrai tevi jinibb sen nir

⁴⁶ owra "Kapmetmet renge jinibb nevisvisenien ne nale nesereien nir. Suri nir armerreni paruri sunsun nga marres marpepriv partur tevir, ko delung jile partorir pirres ko parsareni nevrer tevir renge sel. Armerreni parsakel renge nai seksakel nga muto limjer womu mïrres renge Naim On, ko armerreni parsakel renge nai seksakel nga muto limjer womu mïrres renge lat ne nanen.

⁴⁷ Nir arivi demij venao, arvenae petpeti nijor se nesevin nga diwen ser marmij lingir; ko renge daron ngok ko pa arkerkerasi jinibb nir, arloli verusen nga marpepriv nga partori nir pirres rengen. Ngok Atua putor vitrangir pitertter asi wor suri."

21

Nesevin san nga mutuw nevöt sen

¹ Iesu ok-meteni jinibb nga joror milep marok-tuwe nevöt ser renge bokis nen renge Naim On se Atua.

² Ko ni elesi nesevin san nga diwen sen mimij lingi, ko evi beres. Vinnen evini ko otuw nevöt nga wowarrend eru.

³ Ko Iesu owra "Nuwrai tevi kami, vin nga diwen sen mimij lingi ngel, ni otuw

nevöt asi wore nir jijle nga martuw nevöt ser ngok e.

⁴ Suri lartul nga ngok nir joror elep temijpal ko arlai bbong beblen ko artuwe, ko artori jere wor eleplep. Ko vinel ma emarong putuw petpeti sev nga ni mïlengi nga mivi liken sen petpeti."

Iesu owra tweni nga jinibb sopor paratingtinge Naim On se Atua

⁵ Ko jinibb se Iesu sopor arok-supsupe suri nevöt nga marlelep lengleng nga renge Naim On se Atua, ko nevöt nga marres kele nir nga marjuroi e, ko merrenien nir nga jinibb marlair.

⁶ Ko Iesu owra "Kami kamok-meteni nanu ngok nir? Mian ko daron nen piavini nga jinibb nir partingtinge nevöt ngok nir petpeti nga marlelep ngok nir nga renge naim ngok. Setemun san pijngget jer renge san, partingtinge petpetir."

Nanu nga mïisij nga pia-vini

⁷ Ko nir arsusi tevi ni arwera "Jinibb nevisvisenien, nanu ngok nir para-pelari seveling

ko? Ko sev nelesien ko piviseni nga nanu ngok nir otomori pa nga parremali?"

⁸ Ko Iesu owrai kele owra "Kami kapmetmet ko wor nga sete san pikerkerasi kami. Suri jinibb pilep parini renge inu nisek ko parwera 'Inu nuvi Mesaea le', ko 'Daron nen evini!' Ko kami sete kapvijuri nir te, pijki.

⁹ Ko daron nga kami kaprunge marval, ko jinibb nir parlatlat nir, ko sete kapmetutu te; suri nanu ngok nir parini ko wor, parasi puwomu, ko nabong nga vitunen ejki malum ko wor."

¹⁰ Ko ni owrai tevir owra "Ngaim san putur imare ko pival tevi ngaim san; ko batun vanu san putur imare ko pival tevi batun vanu san.

¹¹ Ko namï nga marlelep nir parnï renge vanu lele ne iel ngatan nir. Ko numer nga marlelep nir parpelari renge vanu lele ne iel ngatan nir; jinibb parmer pilep. Ko mesien lele nir parini parllokloksi jinibb nir. Ko renge melrin nanu lele nir parpelari, parloli jinibb nir parmetutu, ko nelesien lele nga marlelep nir.

¹² Nanu ngok nir setewor parpelari ko, ko jinibb parull totoni womu pae kami ko. Ko parloli pisij pilep tevi kami, ko partekai kami van ji jinibb nga marmetmete naim ne loten nir. Ko parlingi kami van renge naim ne nekaien, ko parloli kami kaptur renge no numal nga marlelep nir ko no numal nga wowarrend nir, suri inu nisek muto renge kami.

¹³ Ngel pia-ivi daron se kami nga mïrres nga kapa-wera tweni nospen nga mïrres.

14 Ngok niko suri nanu ngok nir, kami kaptor ore womu re norrormien se kami ko p̄iterter, nga puloli sete kaprrormi nga kapa-wera 'O, rrapwera lweni nale sev le tevir?'

15 Suri inu ko bea-la nale ko norongwosien nen tevi kami nga kapwera. Ngok puloli sete nir san renge devje nuval se kami purongwos p̄irij tere nale se kami rreknga puwra kamkerkeris.

16 Ko tata se kami nir ko tasu se kami nir ko tuwa kami nir ko niaken se kami nir ko sele kami nir parlingi kami van renge nevre devje nuval se kami nir. Ko lartul nen nir parongwose parevji pini kami sopor.

17 Mian ko jinibb jikle nir parungasi kami suri kami kamtori inu nisek.

18 Ko jomro batu kami nir, sete pisanan pia-jijki.

19 Kami kaptur ko wor p̄iterter, ko kapla se neñi kami.

Nanu nga n̄isij milep renge Jerusalem

20 "Mian ko daron nga kami kapa-lesi jinibb nuval pilep parini parlik rrale iel Jerusalem, ko ngok kami kaprongwose nga sete pipriv ko parllokloksi p̄etp̄eti.

21 Ko daron nga kami kaplesi nanu ngel, ko kami nga kamlik renge Jutia, kapwolu ko wor kapan kapteptepi renge botwen. Ko kami nga kamlik Jerusalem, kami kele, kapwolu lingi wor ko. Ko kami nga kamlik renge vanu nga marto rrale ngaim, setemun kamrongwos kapluwi kele van rengen.

22 Nabong ngel nir arivi nabong nga Atua pia-tor vitrangi jinibb nir nga puloli nanu jile nga Naul On muwrai parini parpelari.

23 Wurru pia-sij wor niko re nesevin nga m̄itetaur ko nesevin nga muloli natun musus renge nabong nen nir. Atua lolaren sen pia-vini renge jinibb nga iel nir. Ko nanu nga parsij nga parsij p̄erp̄er pilep parini parpelari renge vanu ngel.

24 Jinibb sopor parmij e nesip, ko sopor parlair van parlik renge naim ne nekaien nga marto renge vanu sarsarr ngok nir. Mian ko jinibb ne vare nir parllokloksi p̄etp̄eti Jerusalem parjijkarre p̄irres pelak, sete sapon pijpon jer. Pian pian pijpari jinibb ne vare nir parini renge bongsi daron ser e nga marwomu.

Mian ko Jinibb Mawos pia-vini

25 "Mian ko nelesien nir parto renge nial, ko navöl, ko moju nir. Ko renge iel ngatan jinibb ne vanu pilep parunge p̄isij pilep ko parmetutu dis bburbbur ko daptap nen nir.

26 Jinibb parunge p̄isij pilep nga partiriv terai sev nga piplari renge iel ngatan

totoklai. Suri derteren ne nanu nga marto renge melrin mare, Atua pulolir paririr.

27 Mian ko jinibb nir parongwose parlesi inu Jinibb Mawos bevini beplari renge nabor tevi derteren nga milep ne nosrövien suk jikle.

28 Ko daron nga nanu ngel nir partipatun, ko kami kaptur rramos ko apkulu kapmeteni mare. Suri inu sel ne netlasien se kami otomori bevini."

Sete jinibb san orongwos daron nen

29 Ko Iesu owra nale rrongrrongvi san tevir owra "Erres renge kami kaprrormi nai pik ko nai m̄inij nen kele nga ngok nen nir.

30 Renge daron nga kami kamlesir martipatun martengriv luwi, ko kami kamrongwose nga daron ne numös evini mori pa.

31 Ko pia-irpe sel ngel ko, daron nga kami kamlesi nanu ngok nir marpelari, ko kaparongwose nga batun vanu se Atua otomori pa pivini.

32 Nuwretun nga nuwretun nuwrai tevi kami, dul ngel nir nga marmaur ngel nir setewor parmij ko, ko parlesi nanu ngel nir parpelpelari.

33 Melrin ko iel ngatan pian ko porjijki, ko nale suk ma sete orongwos pijijki nabong san.

Kami kapkulkulu metmet ko wor p̄irres

34 "Kami kapkulkulu metmet ko wor p̄irres, suri norrormien se kami tilelea; kami tamok-oji nanen ko tamok-minmin tamok-lengle, ko tamok-rrormi p̄elake mauren ne iel ngatan; ko ngok nabong suk tia-irpe nover, tia-tawi ore kami tivesane.

35 Suri nga nabong nen pivini ji jinibb jikle nga marlik renge iel ngatan totoklai.

36 Ko niko renge nabong jikle kami kapok-metmet ko wor p̄irres. Ko kami kapok-lot ko wor, nga puloli kami derteren se kami putoe nga puloli kami kapwolu lingi nanu nga marsij p̄erp̄er ngok nir, nga puloli kami kaptur p̄irres renge no inu Jinibb Mawos."

37 Renge nabong ngel nir Iesu okvisviseni jinibb nir renge Naim On se Atua. Ko renge nat nga mupong jile ni ok-ivel lingi ie ok-tongsa van renge Botwen ne lolnai ne olip e. Ko ok-matur rrarren pa ie ko.

38 Ko renge rorong susu jikle jinibb arok-mermera vini jin renge Naim On nga parmurrorong suri nale sen nir.

22

Jinibb nga marwowomu renge m̄eri Israel nir arwera parevji pini Iesu

¹ Daron ne nanen nga marok-rro niv nga is mijki rengen, nga marveruse nanen ne asien, oruj mori.

² Ko batun ne jinibb ne sulsulen nir ko jinibb nevisisenien ne nale neseseien nir arpepej sel san nga parevei silveni Iesu rengen, nga parevji pini pimij. Armusur parloli limjer, suri armetutu temijpale jinibb nir.

Jutas eir renge pimaronge Iesu pian renge nevre devje nuval sen nir

³ Ko Demij evini esilvi Jutas nga miwajie Iskariot, nga mivi san renge nir esngavöl drromon eru.

⁴ Ko Jutas evel lingir ko evan owrai tevi batu jinibb ne sulsulen nir ko m̄erwomu ne jinibb nuval nir ne Naim On se Atua, nga puloli sel nga ni purongwos p̄ilngi Iesu renge nevrer.

⁵ Ko lartul nen nir arunge erres e, arir lengleng, ko arloli rijrijen nga parla nevöt sapon tevi ni rengen.

⁶ Ko Jutas emarong. Ko orrorrmi pepeje sel san nga poro p̄irres renge ni nga p̄ila Iesu p̄ilngi renge nevrer, ko sel nen jinibb jijle parrrelenge.

Jinibb se Iesu eru orloli nanu jile arto lilane terai nanen ne Asien

⁷ Mian ko ejpari nabong ne nanen nen nga marok-rroi niv nga is mijki rengen. Ko renge nabong nen jinibb arok-revji natu sipsip nir nga parloli nanen ne Asien.

⁸ Ko Iesu owrai tevi Pita ko Jon “Koporan koporloli lilane nanen ne Asien puto metmet ngarr terai kerr ko rrapa-uroi.”

⁹ Ko nuru orsusi lweni tevi orwera “Ko kumarong nga komru noboran noborloli lilane ngarre puto terai kerr ngabe le?”

¹⁰ Ko ni owrai lweni tevi nuru owra “Kopormurrarrong ta. Daron nga kamru koporan renge laut ne ngaim nen, ko koporsewute jinibb san ie nga muwosi botel nuwi san nga muwun, mian tevi re naim sen e. Ko koporvijuri suri ni, ko koporan renge naim nga ni pian renge loloim nen.

¹¹ Ko koporwerai lweni tevi m̄er nga naim sen nen, koporwera ‘Numal, jinibb nevisisenien le okoni komru, owra nobor-susi tevim nibeni le loloim nga ni putori nanen ne Asien rengen?’.

¹² Ko ngok m̄ernen pipitevi kamru van renge loloim ne naim nen san nga milep temijpal nga muto mare, nga nanu jile marto pa rengen. Renge ie ko koporloli nanu jile parto metmet ngarr p̄irres.” Ko okoni nuru orivel.

¹³ Ko nuru orivel oran, ko orlesi nanu jijle osorsan erpe nga Iesu muwrai tevi nuru. Ko nuru orloli lilane nanu jijle ne nanen ne Asien arto erres ngarr.

Iesu orro tuloni nanen ne Asien tevi nir

¹⁴ Mian ko evini ejpari renge mete nial nga marok-aani nanen ne Asien ren, ko Iesu evan esakel renge milngen renge tep, ko aposol nir arsakel arpitevi ni.

¹⁵ Ko ni owrai tevir owra “Numrreni lenglengen e borro nanen ne Asien ngel tevi kami puwomu ko vitunen vajin ko bea-runge pia-sij renge nibek.

¹⁶ Inu nuwrai tevi kami, setemun numarroi kele nanen ne Asien ngel pian pijpari pia-pelari pumomsawos petpeti renge batun vanu se Atua.”

¹⁷ Ko Iesu ela biles norro ko olot owra erres tevi Atua, ko owra “Biles ngel ko kaplilai tevi kami.

¹⁸ Suri inu nuwrai tevi kami, setemun numa-mini kele mun norro ngel renge lelingen ngel le pa ko pian pijpari batun vanu se Atua pivini.”

¹⁹ Ko mian ko ni ela niv ko olot owra erres tevi Atua, ko obbur ototvi, ko elai tevi jinibb sen nir. Ko owrai tevir, “Ngel evi inu nibek nga m̄elai m̄isre kami. Kami kapok-loli nanu ngel p̄irpok ko, ko kapok-rrorrm̄i inu.”

²⁰ Ko daron nga nanen musuw ko ni ololi erpok kele renge biles; ela biles ko owra “Ngel evi inu drrak nga p̄iseser suri kami ko puloli rijrijen nga mimerr se Atua pia-pelari.

²¹ “Ko kaplesi jinibb san nga pia-te kai kerasi inu van renge nevre devje nuval suk nir, ni esakel tevik ni le renge tep.

²² Inu nuvi jinibb mawos, ko mian ko inu bemij ko wor pirpe nga Atua muwrai pa. Ko wi pia-sij wor pilep niko renge m̄er nga m̄ilngi inu van renge nevre nir.”

²³ Mian ko nir arsusi lululweni tevi nir lweni, arwera “Isi nen ko renge kerr nga ni puloli p̄irpok?”

Jinibb nga milep renge nir

²⁴ Ko mian ko jinibb sen nir arijrij latlat lululweni tevi nir lululweni bbong suri nir si nen ko pia-ivi jinibb nga milep asasi nen renge nir.

²⁵ Ko Iesu erij tevir owra “Numal nir ko jinibb nga marwowomu nir renge jinibb ne iel ngatan nir, derteren ser otoe. Ko armerreni nga jinibb nir parveruse nir parwera ‘Mer nga mok-la se jinibb.’ Ko tetajer arok-tor vitranḡi jinibb ser nir.

²⁶ Ko kami ma norrorrm̄ien ngok pijki renge kami, sete kaploli p̄irpok. Ko m̄er nga mivi jinibb nga milep renge kami, m̄ernen puloli lweni wor ni pirpe m̄er nga vitunen jerjer renge kami. Ko m̄er nga mivi m̄erwomu renge kami, ni puloli lweni wor ni pirpe jinibb ne majingen se kami vajin.

²⁷ Kaprunge ta renge jinibb nga eru ngel nuru, nuru ngabes nen le eleplep renge nuru: Mer nga m̄isakel renge tep m̄iaan, rreknga m̄er nga mok-selsale nanen vini jin? Kami kamwera m̄er nga m̄isakel ko mare renge tep m̄iaan. Ko inu nutur livò renge kami nurpe m̄er nga mok-selsale nanen nen ko ma.”

Iesu ololi rijrijen tevi jinibb sen nir

²⁸ Iesu ololi rijrijen tevi jinibb sen nir, owra “Kami kamlik tevik renge daron nga nanu nir marini marpelari ji inu, nga marrowrrowe inu.

²⁹ Ko erpe inu Tata suk m̄ilngi pa inu mevi Numal, ko ngok inu vajin nulngi kami

³⁰ nga kami kapsakel tevik renge batun vanu suk, kapaan ko kapminmin tevik renge inu tep suk, ko kaplik renge nai seksakel suk. Ko kapsuḗe lilane suri metil naim se m̄eri Isrel nir nga esngavöl drromon eru.

Iesu owowrai nga Pita orongwose piavilvil ore ni

³¹ “Saemon, Saemon! kupmurrarrong ta, demij ongoni pa kami nga purrowrrowe kami pirpe jinibb nga mok-majing mokjule tutweni dokolvin renge wit.

³² Ko inu nomok-lot suri nik Saemon nga nik nosurien som sete pivitan te. Ko daron nga kupa-rieni lweni nolom, ko kupvijuri lwenik kele vajin, ko kupwer jilijle tasim nir nga puloli norrorrmien ser p̄iterter kele.”

³³ Ko Pita owra lweni tevi ni owra “Ejki ma, Numal, inu nomok-tiriv le vajin nga bean renge naim ne nekaien tevi nik ko bemij tevi nik!”

³⁴ Ko Iesu owra lweni tevi owra “Nuwrai tevim Pita, lelingen nato sete pukokorout rragrag ko wor, ko nik kupvilvil ore womu pae inu ko pivatul nga kupwera sete kurongwose inu.”

Baos ko narr ko nesip ne nuval

³⁵ Ko Iesu owrai tevir owra “Bonevis nga daron nga mokoni kami van nga kapwerwer, ko nuwrai tevi kami nga kami sete kaptori baos ko narr ko but se kami. Ko erpese, kami nevre kami armumrrole nanu san?” Ko nir arwera “Ejki.”

³⁶ Ko Iesu owrai tevir owra “Ko lelingenok vajin m̄er nga m̄ilngi baos ko narr, pilai putori nuru. Ko m̄er nga sete m̄ilngi nesip nuval, ko p̄ila sunsun sen puwulwule, ko puwli san e.

³⁷ Inu nuwrai tevi kami nale ne Naul On ngel nga muwra ‘Nir arlesi ni oto tevi m̄er nga mutur otvi nale ne nale neseseien,’ ngok mian ko piplari ko renge inu. Suri nale nga maruli renge Naul

On nga marsuḗe suri inu, parini ko wor parpelari.”

³⁸ Ko jinibb sen nir arwerai tevi, arwera “Numal, nesip nuval eru le pa ngel!” Ko ni owra “Ngok evter ko pa!”

Iesu otongsa evan renge Botwen ne lohnei ne Olip, olot

³⁹ Ko Iesu evel lingi ngaim ko otongsa van renge Botwen ne lohnei ne Olip e, erpe tetajer mok-loli. Ko jinibb sen nir aratongsa vitu suri.

⁴⁰ Ko daron nga mivini renge lat nen, ko owrai tevi jinibb sen nir, owra “Kami kaplot ko wor nga puloli kami sete kapvitan daron nga marrowrrowe kami.”

⁴¹ Ko ni evel rujruj sapon ko ejipa van ngatan ko olot.

⁴² Owra “Tata, poro pivi marongen som, ko kuplai tweni biles ne norongen nga m̄isij ngel renge inu. Ko sete pivijuri inu marongen suk te ejki, ko pivijuri wor nik marongen som.”

⁴³ Ko anglo ne melrin san evini jin ko osusi lweni jile ni eterter.

⁴⁴ Ko nolon ornge esij elep lengleng; ko eplak malum olot eterter, ko erat, ko raten sen ojumjum van ngatan renge dan erpe drra.

⁴⁵ Ko daron nga mulot jile ko emra otur, ko olwi van ji jinibb sen e nir. Ko elesi nga nir marmatur pa, suri arunge esij lengleng, ko norrorrmien ser arrow arto murrarrong.

⁴⁶ Ko ni owrai tevir, “Suri sev kamatur? Kapmera ko kaplot, nga puloli kami sete kapvitan daron nga marrowrrowe kami.”

Devje nuval se Iesu arini arrul renge ni

⁴⁷ Daron nga Iesu mok-rij malum e, ko meling delung jinibb nga milep arini arpelari. Ko m̄er nga miwajie Jutas, nga mivi nir san renge nir esngavöl drromon eru, owowomue nir evini. Ko evel vini mori ji Iesu nga purromji.

⁴⁸ Ko Iesu owrai tevi Jutas owra “Nik kuptekai kerasi inu Jinibb Mawos renge nga kuprromjik?”

⁴⁹ Ko daron nga ni jinibb sen nga martur tevi marlesi wose nga sev piplari, ko arwerai tevi arwera “Pirpe? Nabla nesip nuval se kem nappalpal e?”

⁵⁰ Ko nir san ela nesip nuval sen, ko eta jinibb ne majingen se batu jinibb ne sulsulen, ko esipri otvi boron rres.

⁵¹ Ko Iesu owra “E, pijki, evter ko pa!” Ko ela nevren ko eptongi renge m̄er nga boron ko ololi emaw erres luwi.

⁵² Ko Iesu owrai tevi batun ne jinibb ne sulsulen nir, ko batun ne jinibb nuval nga marmetmete Naim On nir ko firterawarreg nga marini ie jin nga

pareveji ni, owra “Kami kamini tevi nesip nuval ko ßetiluk. Kami kamrrormi inu nurpe jinibb venao rreknga jinibb nga mok-revrevji pinpini jinibb?”

⁵³ Ko reнге nabong jile daron nga inu m̄elik tevi kami, ko inu nomok-visviseni jinibb nir reнге Naim On se Atua, ko kami sete kamloli lesi nga kapreveik te ejki. Ko lelingen ngel evi daron se kami, ko evi daron nga derteren ne nemalik piplari rengen.”

Pita evilvil ore Iesu owra sete orongwose ni

⁵⁴ Ko nir arrul totoni Iesu ko arpatevi van reнге loloim se batu jinibb ne sulsulen nir. Ko Pita ok-vivitu surir ngasu wor sophon nga mok-vijurir.

⁵⁵ Ko mian ko nir arsuri nabb san reнге liven reнге naworr nga muwlu ore naim nen, ko arlik rrале; ko Pita evan ko elik reнге liven jir.

⁵⁶ Ko nesenwarreng ne majingen san elesi nga nabb muror vaseni ni m̄ilik. Ko ok-meteni suri eterter mian ko owrai owra “Merel kele eptevi ni le!”

⁵⁷ Ko Pita evilvil ore owra “Ejki! Vinel, inu sete nurongwose ni te.”

⁵⁸ Mian ko sete epriv kele mun ko jinibb kele san emteni ni ko owrai tevi “Nik kele kuvi nir ko san”. Ko Pita owra “Ejki ma m̄erel!”

⁵⁹ Ko vitunen vajin, erpe mete nial san asi pa osuw, ko jinibb m̄inij nen kele san osur terter tevi, owra “Ewretun le m̄erel eptevi le, suri evi m̄eri Galili le san.”

⁶⁰ Ko Pita owra “E, m̄erel, inu sete nurongwose rragrrag nanu nga kumwerai ngok!” Daron nga mok-rij malum mirpel ko nato kele okokrout evesane tevi mom-sawos daron nga mok-rij malum ngok e.

⁶¹ Ko Numal erieni ko oklu emteni Pita. Ko Pita orrrormi sweri nale se Numal nga muwrai womu pae tevi, nga muwrai mirpel, “Lelingen kobbong, reнге nata mupong nga lelingen, nato setewor pukokrout ko, ko nik kupvilvil ore inu pivatul ko pa pusuw.”

⁶² Ko Pita evel van vare, ko eting nga eting lengleng, ememasorr e.

Jinibb nuval nir artetnije Iesu

⁶³ Ko reнге daron nen jinibb nga marmetmet ore Iesu artetnije ni, ko arwuje.

⁶⁴ Ko nir arka ore mete Iesu, ko arwerai tevi, “Kuvi propet san, ko kupwerai ta, Isi ko mivrralim ngok?”

⁶⁵ Ko nale elep kele wor nga marsij nir, marwerai tevi.

Iesu otur womu reнге nor reнге gortien ser

⁶⁶ Ko reнге nata m̄irin nen vajin, ko Birterawarreng ne Isrel nir, ko batu jinibb ne sulsulen nir, ko jinibb nevisvisenien ne nale nesereien nir arini korti lat sansan, ko artori gortien ser. Ko arwera Iesu pivini putur re no.

⁶⁷ Ko arsuri tevi arwera “Ia, kupwerai ta tevi kem. Nik kuvi Mesaea ko?” Ko Iesu owra lweni tevi nir owra “Poro bowrai tevi kami, ko kami sete kama-osuri inu, ejki.

⁶⁸ Ko poro nga inu bosusi nanu san tevi kami, ko ngok kami sete kamrongwos kapwera lweni.

⁶⁹ Ko etipatun le pa ngel, mian ko inu Jinibb Mawos bean ßesakel ngatan reнге Atua nevren rres, nga derteren sen mutoe.”

⁷⁰ Ko nir jikle arsuri tevi arwera “Ia ko erpese! Nik kuvi Atua natun?” Ko ni owra lweni owra “Kami kamwerai pa ngok. Inu ko.”

⁷¹ Ko nir arwera “Ngok! Niko vajin. Ko suri sev ko nga muloli kerr rramok-pejpej malume nale sopor nga parwilwil tere ni ren?”

23

Iesu otur reнге no Paelet

¹ Ko nir nga marlik reнге gortien nen nir jikle artur imare ko artekai Iesu van reнге no Paelet nga ni puwra suri lat nga puto suri reнге Iesu.

² Ko arini ji Paelet vajin ko artipatun arwera nanu ngel nir: “Kem namlesi m̄erel ololi jinibb se kem nir arlengleng. Ololi artere numal se kem, ko okwer ore kem, owra sete nabwuli takis tevi Sisa, batu numal se kami m̄eri Rom. Ko ok-wera ni evi Mesaea Numal.”

³ Ko Paelet osusi tevi Iesu owra “Nik kuvi numal se m̄eri Isrel nir?” Ko ni owra lweni tevi, owra “Nik ko kumwerai ngok.”

⁴ Ko Paelet owra lweni tevi batu jinibb ne sulsulen nir ko jinibb jikle nir, “Nulesi m̄erel sete otor otvi nale ne nesereien san, ejki.”

⁵ Ko nir arij eterter arwera “Ejki, ni ololi jinibb arlik esij, evel p̄etp̄eti reнге Jutia. Ko etipatun reнге Galili ko evini epari iel nga mok-visviseni jinibb nir.”

Iesu otur reнге no Erot Antipas

⁶ Ko daron nga Paelet murnge nale ngel, ko osusi owra “Ia, ko m̄erel evi m̄eri Galili le?”

⁷ Ko daron nga Paelet murnge marwera lilane nga Iesu m̄ivel reнге Galili e vini, ko okoni tweni van ji Erot e. Suri Galili evi vanu nga Erot mok-metmete, ko re daron nen Erot elik pa reнге Jerusalem.

⁸ Ko daron nga Erot m̄ilesi Iesu ko eir nga eir lengleng. Suri nga ni ok-tiriv pa

bonevis ko, emrreni ñilesi. Suri nga ni ok-runge nosþen nen, ko orrorrmi nga reнге nabong san ko ñilesi Iesu puloli nanu nga minijnij nawone san.

⁹ Ko Erot osusi rongornge nale elep tevi Iesu. Ko Iesu sete owra lweni rragrag nale san tevi ni.

¹⁰ Ko batu jinibb ne sulsulen nir ko jinibb nevisisenien ne nale neseseien nir artur ko arwer memsi Iesu.

¹¹ Ko mian ko Erot ko jinibb nuval sen nir arongrong melas bbonge ni ko arsj tevi. Ko Erot owra parloli puri sunsun san nga nulsen mïrres ko parpitevi lweni van ji Paelet.

¹² Ko Erot bonevis evi devje nuval sen e Paelet, ko Paelet bonevis evi devje nuval sen e Erot. Ko lelingen ngel vajin orloli sel.

Paelet owra Iesu orongwos pimij ko wor

¹³ Ko Paelet everus kortoni batun ne jinibb ne sulsulen nir ko numal se mïri Isrel nir, ko jinibb jile nir arini arkorti lat sansan.

¹⁴ Ko owrai tevir owra “Mer nga kami kamtekai vini jik ngel nga kami kamwera ni ololi jinibb nir arlengeng temijpal. Ko inu nurunge lilane pa nanu nen nir jin reнге no kami, ko sete nulesi nanu nga kami kamwerai ngok san, nga mïrel esij ren.

¹⁵ Ko Erot kele sete elesi nanu san esij reнге, suri mukoni lweni vini ji inu. Ko ngok oto vajin limjer nga mïrel sete ololi nanu san nga ni pimij suri.

¹⁶ Ko inu bololi jinibb suk parvirrvirrali, ko bea-linglingi ni ko vajin pivel sisarow.”

¹⁷ [Suri reнге daron ne nanen ne Asien reнге murrun ser Paelet ñilinglingi wor jinibb ser ko san nga mïlik reнге naim ne nekaien pivel sisarow].^H

¹⁸ Ko nir jile arkail arvesane van mare jer arwera “Kuppitevi tweni mïrel van, kuprevji pini pimij! Ko kuplinglingi ma Barapas pivel sisarow pirpe kem nammerreni.”

¹⁹ Merel Barapas, mïri Rom nir arlingi reнге naim ne nekaien suri nga muloli lartul nga marlik ie marpalpal tevi numal nga mïlik reнге ngaim nen. Ko ni erevji pini kele wor jinibb emij.

²⁰ Ko Paelet emrreni ñilinglingi Iesu pivel sisarow, ko erij tevi nir kele.

²¹ Ko nir arkikail lengleng van mare arwera “Kuprruloni reнге nai pelaot!”

²² Ko ni erij luwi kele vatolin tevir, owra “Merel ololi sev esij? Inu sete nulesi ololi nanu san esij reнге ni pimij suri. Ko inu

bololi para-virrvirrali ni, ko ñelinglingi ni pivel sisarow.”

²³ Ko nir sete armosi re markail. Arkail kele eterter lengleng, drrelar evan mare jer arvesane, arwera “Kuprruloni! Kuprruloni reнге nai pelaot!” Ko Paelet ornge drrelar, ololi surie erpe drrelar muwrai.

²⁴ Ko emarong Iesu tevir nga nir parloli surie nga nir marmmerreni tevi ni pirpe nga nir marwera.

²⁵ Ko ni elinglingi Barapas, mïr nga mïri Rom nir marlingi reнге naim ne nekaien suri nga muloli nir marpalpal tevi numal nga mïlik reнге vanu nen, ko erevji pini kele wor jinibb. Ko elinglingi ni evel sisarow erpe nga mïrwomu se mïri Isrel nir marmmerreni.

Arpitevi Iesu evel

²⁶ Ko jinibb nuval sopor arpitevi Iesu evel van nga parruloni re nai pelaot. Ko arlesi jinibb ne Saerin san reнге sel, nga nisen Saemon, otutur vini nga pian reнге ngaim nga milep. Ko arrul totoni ni ko ar-jingteni nai pelaot se Iesu reнге birparin, ko aron tertere nga ni puwosi pivitu.

²⁷ Ko delung nga milep arvijuri suri Iesu. Ko nesevin sopor arpitevir, ko arting elep armesmasor e nga martengsi erpe ni mimij pa.

²⁸ Ko Iesu erieni lweni ko owrai tevir owra “Kami nesevin ne Jerusalem nir, sete kaptengsi inu te, pijki. Ko kaptengsi lweni ma kami, ko natu kami nir.

²⁹ Nabong nen nir para-vini nga jinibb nir para-wera ‘Neiren reнге kami nesevin nga kamñer ko kami nesevin nga setewor kamvasus ko kami nesevin nga setewor kamloli bipi musus wor nabong san. Kami ngok ko kaprunge ñirres.’

³⁰ Ko reнге nabong nen nir para-rongwos parwerai tevi botwen nga mar-lelep nir, ‘Kapmatop ko kapvitan reнге kem!’ ko arongwos parwerai tevi botwen nga marwovarreng nir, ‘Kapini kaptevni ore kem!’

³¹ Kaplesi! Ara-tipatun lebbong ngel, ko arloli erpok. Pian ko para-loli ñisij ñerþer wor ñiasi ngel.”^I

Arwuse Iesu reнге nai pelaot

³² Ko nir arpitevi kele nuru eru. Laru nen nuru korti orivi jinibb nga morsij, ko niko marlingi nuru pormij tevi Iesu.

³³ Ko nir arini reнге lat san nga marwera Golkota e, nga muwra mirpel, Lat ne bongur. Ko reнге ie nir arwuse Iesu nevren nuru ko ñelan nuru reнге nai

^H 23:17 Nale nga muto re nolo [], rrek sete Luk oli, ko jinibb san ea-uli vitue daron nga muli tweni kopi san ne naul ngel. ^I 23:31 Erpe iel, Iesu osþe nai nga mimalum ko nai nga mukur, ko kem namrieni nga puloli mining ne nale sen piplari limjer.

pelaot. Ko arwuse kele jinibb nga morsij nga nevre nuru ko ßela nuru renga nai pelaot eru, nuru tuwen renga Iesu nevren rres, ko nuru tuwen renga nevren mair.

³⁴ Ko Iesu owra "Tata, kuptelasi tweni nololien ser, suri sete arongwose rragrage nanu nga marloli." Ko nir artututweni sunsun sen tevir nga partuwe daes suri.

Jinibb armen kerkerasi Iesu

³⁵ Ko jinibb nir artur mori bbong. Ko arok-kulu arok-meteni daron nga mïerwomu se mïeri Isrel nir marok-men kerkerasi Iesu, arwera "Ni ela pa se jinibb elep osuw; ko rraplesi vajin ni ðila se ni luwi vajin ta we, poro pivi Mesaea nga Atua mutobbobbue."

³⁶ Ko jinibb nuval kele nir armen kerkerasi. Ko arini mori jin ko arla lesi norro nga mimilali pa tevi ni.

³⁷ Ko arwera "Poro nik kupivi numal se mïeri Isrel nir, ko kupla se nik luwi!"

³⁸ Nale ngel le nir nga marulir mare renga nai pelaot: MEREL EVI NUMAL SE MERI ISREL NIR.

Laru nga mormij tevi Iesu

³⁹ Ko laru nga mormij tevi Iesu, nuru tuwen erij esij tevi, owra "E, poro nik kupivi Mesaea, ko kupla se nik ko komru!"

⁴⁰ Ko nuru tuwen erij tevi suri, owra "Nik sete kumtutue Atua rrek! Kuplesi nik ko inu, kerru rromorsere lweni wor nanu nga rromorloli ko,

⁴¹ ko niko renga kerru, erres ko wor. Suri kerru ma, rromorla mawos wore ko nanu nga moro rroporlai renga sev nga rromorlolir. Ko mïerel ma sete ololi nanu san esij rragrag te."

⁴² Mian ko ni owrai tevi Iesu owra "Iesu, poro nabong nga kupa-ivi Numal, ko waru kuprormi inu."

⁴³ Ko Iesu owra lweni tevi owra "Nuwretun nuwrai nik, lelingen kobbong kuplik tevik renga lat nga mïrres asi jer, nga mivi drromdrromon jer."

Iesu emij

⁴⁴ Ko omomsawos renga mete nial es-ngavöl drromon eru ko nial setemun esin. Lat emalik ðetðeti renga lat jille evini ejpari mete nial itul nat mirivriv vajin.

⁴⁵ Ko kalek nga murrul ore lat nga muon nga muon temijpal renga Naim On se Atua loloiem eteri wukari devjen eru e.

⁴⁶ Ko Iesu everus temijpal van mare owra "Tata, nulngi nenïik renga nevrem!" Daron nga muwrai jile nale ngel e ko osrow pini.

⁴⁷ Ko daron nga batu jinibb nuval se mïeri Rom nir nïlesi nanu nga miplari, ko osrövi Atua suri. Ko owra "Ewretun le mïerel evi jinibb nga mimawos mïrres!"

⁴⁸ Ko jinibb jille nga marini ie nga parmeteni, daron nga marlesi nanu ngel nir ko arieni lweni van renga ngaim ser e, arunge esij lengleng, arwujwuje morkor suri.

⁴⁹ Ko Iesu selen wor nir ko nesevin nga marvijuri Iesu renga Galili vini, nir ngok artur wor van ngasngasu sapon, ko armeteni nanu nga marpelari nir.

Josep etevni Iesu

⁵⁰⁻⁵¹ Ko mïeri Armetia san elik ie, nisen Josep. Armetia evi ngaim ne Isrel san. Ko mïerel Josep evi nir san renga gortien se nir nga marwowomu re Isrel nir. Ni evi jinibb nga mimawos mïrres, ko evi jinibb nga mok-teravi batun vanu se Atua pivini. Ko sete emarong renga nanu nga gortien ser ngok muloli tevi Iesu.

⁵² Ko mïerel ko emawose no Paelet evan jin, sete emtutu te, ko ongoni nibe Iesu tevi. Ko Paelet emarong.

⁵³ Ko Josep evan ojri tweni nibe Iesu renga nai pelaot, ko ela kalek nga mimalum mïrres san, ko onße ore e. Ko owosi van elngi renga nevöt san nga marsavi nolon mutoe nga setewor arlingi jinibb san rengen nabong san.

⁵⁴ Ko evi Praete, nabong nga marok-eseser e marok-la kortoni ngarre nanu nir. Ko otomori pa nial piwaj pini ko Sapat pivini.

⁵⁵ Ko nesevin nga marvijuri Iesu renga Galili vini, nir arpitevi Josep, aran ko arlesi dubb nen, ko armeteni suri lat nga marlingi nibe Iesu muto suri.

⁵⁶ Mian ko nesevin ngel nir arluwi van renga naim e, ko arla roi nga mapur mïrres ko pomat, arloli kortoni ngarre nir, mian ko para-lair van parsesei renga nibe Iesu. Ko nir armosi erpe nesesreien ne Sapat muwrai.

24

Dubb oto kiskis, Iesu emra luwi renga mijen

¹ Renga Sante rorpong susu malum, ko nesevin nen nir artori ro nai nga mapur mïrres, ko armermera tevi van renga dubb nga parsesei renga nibe Iesu.

² Ko daron nga marini renga dubb, ko arlesi nevöt nga muto ore dubb martini tweni pa rengen mijie.

³ Ko arjiol van ngatan ko arsil van renga lolo dubb, ko sete arlesi nibe Numal Iesu.

⁴ Ko nir artur lengleng vajin, arrelenge lat nga nanu ngel muto suri. Ko ngavil-vilsen jinibb eru orpelari jir ortur tevir. Sunsun se nuru orow raprap titis.

⁵ Ko nir armetutu temijpal, ko arjiol vitan nor emawose dan. Ko laru nen nuru

orwerai tevir orwera "Erpese kami kampej m̄er nga mimaur renge nir nga marmij pa?

⁶ Ni ejki iel, ni emaur luwi pa. Kami kamrongwose renge daron nga m̄ilik renge Galili wosenen ni owra sev nale tevi kami?

⁷ Ko ni owra 'Partekai inu Jinibb Mawos van renge nevre jinibb nga marsij nir, ko nir parwuse inu renge nai pelaot ko parrulonik; ko nabong p̄itolin ko bemaur luwi kele.' "

Jinibb se Iesu sete arosuri nale se nesevin nir

⁸ Ko nesevin nen nir arorrmi sweri lweni nale nga muwrair nen nir.

⁹ Ko nir arivel lingi dubb ko arluwi van ji jinibb se Iesu nir esngav̄ol drromon san e (11); ko arsupe nanu p̄etpeti tevir.

¹⁰ Nesevin nen le ngel nir: Merri ne Maktla ko Joana ko Merri nga tasu se Jemes, ko nesevin m̄inij nen kele wor sopor nga marpитеvir.

¹¹ Ko aposol nir arunge nale ser erpe nale gerisen bbong, ko sete arosuri.

Pita esil van renge lolo nev̄ot

¹² Ko Pita emra ko owlu van renge dubb e. Ko ejjol van ngatan, ko emteni ko elesi sunsun nga bbong marnupe e m̄isan muto, ko setemun elesi kele nanu san. Ko evel olwi van renge naim sen e. Bb̄osa nga milep elaipe suri nanu nga miplari ngok.

Jinibb se Iesu eru orivel suri sel van Emeas e

¹³ Renge nabong nen mawos ko pa, jinibb se Iesu eru orivel suri sel nga poran renge ngaim e san nga nisen Emeas. Ko oto wor ngasngasue Jerusalem sopon erpe evi kilomita esngav̄ol drromon san wor.

¹⁴ Ko daron nga morok-ivel suri sele morok-supsupe suri nanu nga marpelari nir tevi nuru lululweni wore,

¹⁵ ko Iesu evel vini mori ji nuru. Ko nuru orok-supe malume, ko Iesu evini pa ji nuru, arivel kokorti vajin.

¹⁶ Ko daron nga nuru morlesi ni ko orrelenge ni, sete orongwose, suri Atua opongi ore mete nuru.

¹⁷ Ko Iesu osusi tevi nuru owra "Sev ko komorok-supsupe renge sel nga komorivel ngok?" Ko nuru ortur murrarrong, no nuru evirrvirting.

¹⁸ Ko nuru tuwen nen nga nisen Kleopas osusi tevi, "Rreknga nik kusan kuvi jinibb nga kumlik renge Jerusalem ko sete kurongwose nanu nga miplari renge nabong evis lebbong nga marasi!"

¹⁹ Ko Iesu osusi tevi nuru owra "Isev ko nir?" Ko nuru orwera lweni tevi orwera "Nanu nga marpelari renge Iesu ne Donasret. Ni evi propet san, ko renge no Atua ko renge no jinibb nir, ni evi

jinibb nga milep san renge majingen sen ko renge nale sen nir.

²⁰ Ko batun ne jinibb ne sulsulen nir ko m̄erwomu se kerr nir arpitevi ni van ji m̄eri Rom nir, nga nir parwera ni pimij ko wor. Ko nir arruloni ni renge nai pelaot.

²¹ Ko kem namlingi nolo kem renge ni eterter nga ni orongwos puloli kerr m̄eri Isrel nir rrapiel sisarow vajin. Ko mare nen renge nanu ngel nir, lelingen evi nabong itolin le pa osuw nga nanu ngel nir marpelari.

²² Ko nesevin sopor renge gortien se kem arloli bb̄osa nga milep elai kem, renge daron nga marmemera rorpong susu van renge dubb nga jinibb marlingi ni niben rengen.

²³ Ko sete marlesi nibe Iesu, ko arulwi vini orwerai nga nir arlesi anglo eru orwera tevi nir nga ni emaur luwi pa.

²⁴ Ko sopor renge gortien se kem aran renge dubb ko arlesi nanu jile arirpe nga nesevin nir marwerai.

Ko sete arlesi ni."

²⁵ Ko Iesu owrai tevi nuru owra "O, kami nga kamlengleng, ko kamlolola lengleng renge kaposuri nale se propet nir nga marwerai!

²⁶ Sete evi nanu nga Atua m̄ilngi pa nga piplari ko wor nga Mesaea purnge p̄isij renge nanu ngel nir, musuw ni pian renge nosr̄övien sen?"

²⁷ Ko Iesu owra lweni tevi nuru sev nga marwerai suri ni renge Naul On, etipatun renge naul se Moses ko etajer tevi vini ejpari nga propet nir marulir.

²⁸ Mian ko nir aran mori renge ngaim nga nuru morwera poran rengen, ko Iesu ololi erpe ni p̄itajer kele wor.

²⁹ Ko nuru orevei totoni ni ko orwera "Kuplik tevi komru. Suri nat erivriv pa, otomori nial piwaj pini." Ko ni emarong, ko ean loloiem nga p̄ilik tevi nuru.

³⁰ Ko ni esakel renge tep tevi nuru nga paraan. Ko ni ela niv ko olot owra erres tevi Atua suri, ko obbri otvi niv, ko elai tevi nuru.

³¹ Ko mete nuru em̄erer vajin, ko orlesi wose ni. Ko ni ejjki renge mete nuru, orrrerleng lat nga mian e, setemun orlesi.

³² Ko nuru kis vajin orwerwera lululweni tevi nuru, orwera "Po! Nile ma wor daron nga rramiel renge sel e ko muwra visviseni Naul On nir tevi kerru, ko nolo kerru eir."

³³ Ko renge daron nen mawos ko pa, ortur imare ko orluwi van renge Jerusalem e, orlesi aposol nir esngav̄ol drromon san ko nir m̄inij nen kele wor sopor.

³⁴ Ko aposol nen nir ko nir nga marpитеvir ngok arij womu tevi nuru, arwera

“Numal emaur luwi weretunen! Ni eplari ji Saemon.”

³⁵ Ko nuru vajin orsuþe suri nanu nga marpelari reнге sel tevi nir, ko erpese reнге daron nga ni mubbri otvi niv, ko nuru morlesi wose.

Jinibb se Iesu arlesi ni

³⁶ Ko daron nga morok-suþe suri nanu ngel e tevir, ko artaol lengenge Iesu otur pelari reнге liven jir, ko owra “Demat piptevi kami.”

³⁷ Ko nir armetutu lengleng, arrormmi rrenga ma arlesi neñin san.

³⁸ Ko Iesu owrai tevir owra “Kami kammetutu sev ko? Suri sev norrorrmien nga marirpel ngel nir marini reнге nolo kami?”

³⁹ Kapmeteni nevrek nuru ko ßelak, ko kapsareni nevre kami, ko kaprunge evi inu mawos le wor. Ko kaplesi, neñin sete niben otoe te ejki, ko jin sete otoe te ejki, erpe nga kami kamlesi inu ngel!”

⁴⁰ Ni owra nanu ngel, ko eviseni nevrengel nuru ko ßelan nuru tevi nir armeteni.

⁴¹ Ko bbösa elair e ko arir lengleng; ko setewor arosuri erres te, ejki malum wor. Ko ni owrai tevir, “Kamtori nanen sopen ni ko?”

⁴² Ko nir arla viso nai nga mimasos jile pa san ko arsareni tevi ni.

⁴³ Ko ni esaro ko elai jir ko orroi reнге nir jile nor.

Bongsi nale se Iesu tevi jinibb sen nir

⁴⁴ Ko Iesu owrai tevir owra “Nanu ngel nir arivi nanu mawos nga mowrai pa tevi kami reнге daron nga mëlík malum tevi kami e. Reнге bonevis nen nomok-werai pa nga nanu jile nga maruli reнге naul se Moses ko reнге nale se propet nir ko reнге Sam nir nga marsuþe suri inu parini ko wor parpelari.”

⁴⁵ Ko ni owra norrorrmien ser arkulu nga parongwose nale ne Naul On nir þirres.

⁴⁶ Ko owrai tevi nir owra “Ngel evi sev nga maruli, nga Mesaea purnge ko wor þisij, mian ko pia-maur luwi kele reнге nabong itolin.

⁴⁷ Ko parwerwer reнге vanu jijle nir nga jinibb nir nolor parlululwi ko wor, ko Atua þitlasi tweni nololien ser vajin reнге nise Mesaea. Ko womujnen þitipatun womu reнге Jerusalem.

⁴⁸ Kami ko kamivi jinibb nga kapwera tweni nanu ngel nir.

⁴⁹ Ko inu bokoni mïer nga Tata suk mïirijrij pae tevi kami nga pia-lai tevi kami. Ko kami kaptiriv wore ko reнге ngaim pian pijpari daron nga derteren se Atua pivel reнге melrin vini iel ngatan nga puloli kami kapterter.”

Atua etkai lweni Iesu van reнге melrin e

⁵⁰ Ko Iesu eptei twenir arivel lingi ngaim nen. Ko arivel van arjipari Betani. Ko reнге ie ni esareni nevrengel nuru van mare mawos nir, ko erij erres suri nir.

⁵¹ Ko daron nga mok-rij nïrres surir ko Atua etkai tweni ni van mare e reнге melrin.

⁵² Ko nir arlotoe ni, ko mian ko arlulwi van reнге Jerusalem e tevi neiren nga milep reнге nir nolor.

⁵³ Ko nir aran reнге Naim On ko arlotoe Atua, arwera erres tevi.

**Nosþen nga Mirres se
Iesu Kristo nga
JON
Muli
Batu nale nga mivsivseni
lut nga parmeteni naul
ngel puto suri**

Naul ngel osþe suri Iesu nga ni evi Nale se Atua nga mivi jinibb, ko mlik tevi kerr. Jon oli naul ngel nga puloli jinibb parongwose parosuri nga Iesu evi jinibb nga Atua muloli rijrijen (promes) nga pukoni nga pla mauren tevi jinibb, ko ni evi kele natu Atua. Ko oli erpok nga nir arongwose parla mauren re nise Iesu, suri arosuri ni (20:31).

Nanu nga womujnen nga Jon muwrai tweni, owra Iesu evi nale nga tuwi nga tuwi jer elik ko pa osuw, ko eptevi Atua (1:1). Ko vitunen ea-suþe suri nelesien (saen) nir nga Iesu mulolir nga arongwose puloli rraplesi wose nga Iesu evi weretunen natu Atua. Ko jinibb sopor arosuri Iesu ko arvivitu suri, ko sopor armusus parosuri ni.

Renge batun esngavl drromon itul (13) ejpari esngavl drromon ebut (17), Jon osþe suri nanu nga marremali nir re natpong nga devje nuval nir marini nga parrul totkoni Iesu. Re natpong ngok, Iesu ejiljilwer tevi jinibb sen nir nga puloli nir partur metmet re nanu nga parini parma-wos nir, ko owrai rrurrngir e, nga pususi norrrormien puto piterter puwomu, ko vitunen devje nuval sen para-vini pararrul totkoni.

Re batun 18 ejpari 21, Jon osþe suri devje nuval nga marrul totkoni Iesu. Ko arlai van re kot, ko vitunen arlai van arwuse re nai pelaot, ko emij. Ko vitunen emaur luwi kele, ko jinibb sen nir arlesi ni.

Re naul ngel, Jon osþe suri mauren nga sete mia-suw nabong sopen, nga jinibb orongwose pilai ji Iesu Kristo kobbong. Mauren ngok etipatun lelingenok ko etajer van ji nir nga marosuri Iesu nga ni kobbong evi sel, ko evi batu nale weretunen, ko evi mauren.

Nale norongwosien se Atua

¹ Tuwi nga tuwi jer Nale elik ko pa osuw. Nale ngok eptevi Atua. Nale ngok kele evi Atua.

² Womu jer mian ko ngatan ngel pia-piatun, ni elik ko pa osuw tevi Atua.

³ Nanu jijle nga Atua mulolir Nale eptevi ni ren, nuru korti orlolir, sete Nale ejkie nanu san nga Atua muloli.

⁴ Mauren oto renge ni, ko mauren ngok elai moron tevi jinibb nir.

⁵ Moron ngok omor re nemalik, ko nemalik sete evter rragrage nga pimalik tevtveni.

⁶ Atua okoni jinibb san vini, mnernen nisen Jon.

⁷ Ni evini nga pirij se Moron ngok ko, owra lilane tevi jinibb nir, nga puloli jinibb nir parosuri.

⁸ Ni sete evi Moron nen te, ni evini nga bbong pirij se Moron nen ko.

⁹ Nale ngok evi Moron weretunen, evini iel ngatan, omor vaseni jinibb jijle nir.

¹⁰ Ni elik iel ngatan, ko ni ololi ngatan ngel, ko jinibb ne ngatan ngel nir sete arlesi wose ni te.

¹¹ Ni evini ji metka sen mawos nir, ko metka sen mawos nir sete artekai ni.

¹² Ko nir elep ma nga marosuri ni, ko martekai ni vini jir. Nir ngel ko ma, ni elai derteren tevir arini arivi Atua natun.

¹³ Nir arivi Atua natun, sete erpe nga jinibb miak renge drra, rreknga marongen se niben, rreknga marongen se jinibb, ejki. Nir arivi Atua natun suri Atua ko wor marongen sen.

¹⁴ Nale ololi lweni ni evi jinibb, eplari limjer ko elik tevi kerr. Ko kem namlesi wose renge nosrvien sen nga ni esan evi Atua natun mawos, owun saute nalol nga mirres nga sete orongwos pirieni.

¹⁵ Jon erij sen, ekail owrai tevi jinibb nir, "Merel le nomok-suþe suri nga nomok-wera, Inu nuwowomu nga bololi lilane sel sen, nga ni pia-vitu surik. Ko ni elep wor asi inu, suri ni elik wowomu ko pa mian ko inu mea-iaak, ko niko ni elep asi wore inu."

¹⁶ Niko suri nolon owun saute nga mmrreni kerr, ko ololi ni mok-la nanu nir tevi kerr. Ko erpok malum, ok-lila malum wore nanu ko nir tevi kerr.

¹⁷ Nale neseseiren eplari re Moses, ko nalol nga ma mirres nga sete orongwos pirieni eplari renge Iesu Kristo.

¹⁸ Sete jinibb san elesi Atua renge daron san, ejki. Natun mawos kobbong, nga nuru Atua morsorsan mawos, nga morkorti mirres morirpe melew, ni kobbong evel renge melrin vini, ko owra visviseni Tata sen tevi kerr.

Jon owra tweni Iesu limjer

¹⁹ Nir nga marwowomue meri Isrel nir nga marlik Jerusalem arkoni jinibb ne sulsulen sopor ko Livaet sopor vini ji Jon nga parsusi tevi, "Nik kuvi isi le?"

20 Ko Jon sete evilvil orore ni, ejki, ewer limjere ni tevir, owra "Inu sete nuvi Mesaea te."

21 Ko ngok arsusi kele tevi ni, "Ia, ko nik kuvi isi, Elaeja?" Ko Jon owra "Ejki, inu ejki."

Ko arwera "Ia, ko nik kuvi ma Propet nen?" Ko Jon owra "Ejki."

22 Ko nir arsusi lweni tevi, "Po! Ko nik ngok kuvi isi le? Kupwera lweni nik tevi kem, puloli kem naban nabwera lweni tevi nir nga markoni kem vini. Nik kupwewrai lweni niki!"

23 Ko Jon owra "Inu nuvi bbong jinibb san nga propet Aesaa muspe suri, muwra 'Drrela jinibb san ekail renga lolo merwer, 'Kaploli lilane sel se Numal pimetet.' "

24 Lartul ngok nir, Parasi ko nir arkonir van ji Jon.

25 Ko nir arsusi tevi Jon "Poron nga nik ngok sete kuvi Mesaea rreknga Elaeja rreknga propet nen, ko suri sev komok-loli baptaes?"

26 Jon owra lweni tevir, "Inu nomok-loli baptaes tevi nuwi lebbong, ko san ma ni ko pa otur livö renga kami, kami sete kamrongwose."

27 Ngok ni ko ma evi mernen mawos nga propet nga tuwi nir arwera pivitu suri inu. Ko ni elep asi jer wore inu, ko inu sete numomsawos nurres rragragg keke re bbong bejiol vitan betlasi tweni dil renga but sen."

28 Nanu ngel nir arpelari renga Betani, ie oto roroni Jortan, lat nga Jon mok-loli baptaes ren.

Iesu Natu Sipsip se Atua

29 Renge nabong minij nen san kele, Jon emteni Iesu mivel mawose vini. Ko owra "Kaplesi, natu sipsip se Atua nga pila tweni nololien ne iel ngatan!"

30 Ngok! Niko mer nga nomok-supe suri nga ko, mowra 'Inu nuwowomu le, nuloli lilane sel sen nga pivivitu surik.' Ko ni elep wor asi inu, suri ni elik ko pa, mian ko inu ngel mea-iaik.

31 Inu kele sete nurongwose merel bonevis, ko erpok nuvini tweni nupaptaes tevi nuwi nga inu beviseni ni tevi meri Isrel nir."

32 Ko Jon erij se ni owra "Nulesi Nerin ojubbul renga melrin vini erpe wuner ko esakal jer re ni."

33 Inu kele sete nurongwose merel, ko ni nga mukoni inu mepaptaes tevi nuwi owrai tevik, 'Mer nga kuplesi Nerin pujubbul pian pisilvi pilik jer ren, mernen ko evi ni nga pipaptaes jinibb nir tevi Nerin On.'

34 Ngok niko inu melesi ko nurij sen nga ni ngel ko evi Atua natun mawos."

Iesu everus lartul nga marivi womu jinibb sen

35 Renge nabong minij nen san, Jon otur tevi jinibb sen eru.

36 Ko Jon emteni Iesu mivel, ko owrai tevi jinibb sen nuru, "Koporlesi, Natu sipsip se Atua ngel."

37 Daron nga jinibb sen nuru morunge nga muwrai mirpok tevi nuru, ko orlingi tweni Jon otur jer ko orvijuri suri Iesu.

38 Iesu erieni emteni nga morvijuri, ko owrai tevi nuru, "Komorpej isev?"

Ko nuru orwera tevi ni "Rabae (nais ngok renga nale se meri Isrel nir owra jinibb nevisvisenien ko), nibeni lat nga kumlik e?"

39 Iesu owrai lweni tevi nuru, "Koporini koporlesi." Ko nuru orvijuri, oran orlesi lat nga mlilik e. Ko orlik tevi ni ie, suri nat erivriv pa, erpe pirpe mete nial ivij.

40 Renge nuru nga eru ngok nga morunge Jon muwra visviseni Iesu tevi nuru ko morvijuri ngok, nuru tuwen nisen ko Antru, Saemon Pita tasin.

41 Antru evel evan ko eska wowomue Saemon, ni tuwan, ko owrai tevi ni owra "Komru ma nomorlesi Mesaea" (nais ngok renga nale se meri Gris nir, arwera Kristo, ko owra puwra 'Jinibb nga Atua mirrijri pa nga pukoni nga pila mauren tevi jinibb nir').

42 Ko ngok Antru eptevi Saemon van ji Iesu.

Ko daron nga Iesu mlesi, ko owrai tevi, "Nik Saemon, kuvi natu Jon. Nik parverus kele nistem Kepas." Nais ngok renga nale se meri Isrel nir owra bereng ko. Ko nais ngok Pita renga nale se meri Gris nir, owra bereng kele kobbong.

Iesu everus Pilip ko Nataniel porvijuri

43 Renge nabong minij kele san, Iesu owra pian kele Galili e. Ko elesi Pilip ko owrai tevi, "Kupini kupvijurik, kupivi jinibb suk."

44 Antru ko Pita, ngaim se nuru ko Betsaeta, ko Pilip kele evi meri iok.

45 Pilip evel ko elesi Nataniel, ko owrai tevi, "Kem ma namlesi mer nga Moses muli suri renga Naul ne nale neseseien tuwi, ko propet nir kele maruli suri. Nisen ko Iesu ne donasret, Josep natun."

46 Nataniel owrai tevi "O, aro, ejki ma, nik kurrorrmi renga iok Nasret nanu nga mirres san orongwos piplari ren e?"

Pilip owra lweni tevi, 'Iow, ko kupini kuplesi ta we.'

47 Daron nga Iesu mlesi Nataniel mivel mawose vini, ko owra "Kaplesi morok, evi meri Isrel tera san nga sete orongwos pikrekris."

⁴⁸ Nataniel owra lweni tevi, “Nik kurongwose inu erpese le?” Iesu owra lweni tevi, “Nurongwos wowomu nik ko pa osuw daron nga komok-tur re melve nai pik e, vitunen ko vajin Pilip mia-verus nik.”

⁴⁹ Ngok Nataniel owrai lweni tevi, “O, jinibb nevisisenien, nik kuvi Atua natun mawos, kuvi Numal se mēri Isrel nir!”

⁵⁰ Iesu owra lweni tevi, “Niko suri nga inu mowrai tevim nga nulesim rengo melve nai pik, nik kuosuri suri iok wolok kobbong? Ko kurongwos kupa-lesi nanu nga parlelep kele wor parasie ngok.”

⁵¹ Ko Iesu owrai kele tevi ni, “Nuwretun nga nuwretun nuwrai tevi kami, vitunen suri ngel kapa-lesi melrin pītīr ko anglo se Atua nir partongsa van mare rengo melrin ko parjubbul vini ngatan ji Jinibb Mawos.”

2

Totkoiēn san rengo Kena

¹ Renge nabong itolin vajin, totkoiēn san oto rengo Galili, rengo ngaim nen san nga nisen Kena. Ko rengo iok Iesu tasu sen owomu pa, elik tevir iok.

² Arla nale kele van ji Iesu ko jinibb sen nir parini kele rengo totkoiēn nen.

³ Mian ko daron nga norro ser musuw-suw rengo nanen, ko Iesu tasu sen owrai tevi ni, “Norro ser osuwsuw.”

⁴ Ko Iesu owra tevi vinnen, “Kuwra bololi sev? Mete nial suk mawos nga inu bēmajing ren setewor evini.”

⁵ Mian ko tasu sen owrai tevi jinibb ne majingen ne nanen ne totkoiēn nir, owra “Kaploli sev tama nga puwrai tevi kami.”

⁶ Ko botel nga marlelep ouwon nga marlolir e nevōt arto ie nga jinibb parjejavōl e, nga mivijuri murrūn tera se mēri Isrel nir. Botel nen nir sisamis murrūmurr nga marlelep nga martori nuwi rer ejpari eru rrenga itul.

⁷ Iesu owrai tevi jinibb ne majingen ne nanen ne totkoiēn, “Kaptevevangi nuwi van rengo botel ngok nir parwun.” Ko nir artevevangi nuwi van rengo botel nen nir arwun saut van mare rengo jingor.

⁸ Ko owra lweni kele tevir, “Kaptevangi tweni sopen, kaplai tevi mēri nga mimetmete nanen ne totkoiēn.” Ko nir arloli erpok.

⁹ Daron nga mēri nga mimetmete nanen ne totkoiēn mimni rrongvi nuwi nga nūrieni pa mivi norro ngok, ko etaole. Ko errerlengē lat nga mivēl e vini (ko jinibb ne majingen ne totkoiēn ma, nir nga martevangi tweni nuwi, arongwose). Ko everus jinibb nga mutotko,

¹⁰ ko owrai tevi, “Aro, jinibb jijle arok-la wowomue norro nga mūrres tevi jinibb

nir, arok-mini wowomue, mian ko moro marmini jile musuw, ko arrleng suri dilten vajin lat nga muto suri, ko aroka-la nga sete mūrres armīni vivitue. Ko nik ma lelingen kumtipatun kula nga mūrres, mijpari lelingen ngel ko kua-la nga mūrres jerjeren oto ore.”

¹¹ Ngel evi nelesien womujnen nga Iesu muloli rengo Kena rengo ngaim ne Galili san, nga miviseni nosrōvien sen. Ko jinibb sen marosuri ni rengen.

¹² Vitunen rengo ngel, ko ni evan ngatan e rengo Kapaneam, eptevi tasu sen ko tasin nir ko jinibb sen nir, ko arlik nabong evis ie.

Iesu oji tweni jinibb nga markelkel rengo Naim On se Atua

¹³ Nanen ne asien, daron nga mēri Isrel nir marok-rrorrmī lweni daron nga marivel lingi norongen nga nūsiy nga marok-runge Ijip, oruj mori. Ko Iesu otongsa luwi van mare e Jerusalem.

¹⁴ Ko elesi nir nga marwulwule buluk ko sipsip ko wuñer, ko nir nga markelkel nevōt, marsakel rengo Naim On loloi.

¹⁵ Ko ni ela dil wowarrensop, ko evirvirenir arto korti lat sansan, ko oji twenir e rengo Naim On, tevi sipsip ser ko buluk ser. Ko evatpus tep ser osutapoe van ngatan, ko nevōt ser nir arwera jrar! arwirr sarsarr.

¹⁶ Ko owrai tevi nir nga marwulwule wuñer, owra “Kapla tweni nanu ngok nir! Kapiel tevir, sete kaploli naim se Tata suk pivi lat ne wulwulen se kami!”

¹⁷ Ngok jinibb sen nir arrorrmī wos nga aruli pa rengo Naul On, nga muwrai mirpel, muwra ‘Inu numrreni Naim On som puwokwok tetajer. Norrorrmien suk eterter tetajer iok, erpe nabb nga nūn re nolok.’

¹⁸ Ko mēri Isrel nir nga marlelep rengo nir arlesi esij ko arwerai tevi ni, “Nelesien sev nga nik kupviseni tevi kem nga nik kurres rengo kuploli pipel?”

¹⁹ Iesu owra lweni tevir, owra “Kaplokloksi Naim On ngel, ko nabong pītul kobbong, ko bosusi raji lweni kele.”

²⁰ Meri Isrel nen nir arwera lweni tevi ni, “O, laro, Naim On ngel ela sia ngavōl ivij dromon ouwon (46) nga kem nammajinge rer. Ko nik ma kurongwos kupusi raji lweni nabong pītul bbōlbbōl?”

²¹ Ko Naim On nga Iesu muspē suri ngok evi ni kobbong niben, nga Atua pia-loli pimaur luwi kele re mijen.

²² Vitunen vajin, daron nga ni mimaur luwi rengo mijen, jinibb sen nir arrorrmī sweri nga ni owrai pa nanu ngel tevir bonevis, ko arosuri Naul On ko nale nga Iesu muwrai tevir.

Iesu orongwose jinibb jikle nir nolor

²³ Daron nga Iesu mīlik renge Jerusalem renge daron ne nanen ne asien, jinibb elep arosuri ni, suri marlesi nelesien nir nga ni mulolir.

²⁴ Ko Iesu sete osurir, suri orongwose jinibb jikle nir nolor.

²⁵ Ko sete emrreni jinibb san puwra tweni suri jinibb kele san, suri ni orongwos pae sev nga marto renge nolo jinibb jikle nir.

3*Iesu ko Nikotemas*

¹ Parasi san elik iok, nisen Nikotemas. Evi jinibb san nga milep nga muwowomue mēri Isrel nir.

² Mernen mawos evini silveni ji Iesu renge natamupong san. Ko owrai tevi, “Jinibb nevisvisenien, kem namrongwose nik kuvi jinibb nevisvisenien nga kumiel ji Atua vini, suri sete san orongwose puloli nelesien ngel nir nga nik kumlolir ngel, poro nga Atua sete pipitevi ni.”

³ Iesu owra lweni tevi, “Nuwretun nga nuwretun nuwrai tevi nik, poro nga san sete piak luwi kele, ko sete orongwos rragrage pian renge batun vanu se Atua nga pia-vini.”

⁴ Nikotemas owra lweni tevi Iesu, “Ai, jinibb piak luwi kele pīpese, nga mītra pa? Sete orongwos pulwi kele van renge depai tasu sen, ko piak luwi kele!”

⁵ Iesu owra lweni tevi, “Nuwretun nga nuwretun nuwrai tevi nik, poro nga jinibb sete piak luwi renge nuwi ko Nemīn On, ko ni sete orongwose pian rragrag renge batun vanu se Atua.

⁶ Niko, nanu nga miak renge niben evi niben kobbong, ko nanu nga miak renge Nemīn On evi nemīn.

⁷ Sete kuptaole nga inu mowrai tevim mirpok ngok nga nik kuḗiak kele.

⁸ Nik kurongwos kuprunge ling puwuw renge iok jikle nir vini, ko sete kurongwos lat nga mītipatun ren vini ko lat nga pian pusuw ren. Erpok kele renge nir nga mariak renge Nemīn On.”

⁹ Nikotemas owra lweni tevi Iesu, owra “Ai, nanu ngel putoe pīpok pīpese ko?”

¹⁰ Ko Iesu owra lweni kele tevi Nikotemas, “Nik kuvi jinibb ne nevisvisenien se mēri Isrel nir, ko suri sev sete kumrongwose nanu ngel?”

¹¹ Nuwretun nga nuwretun nuwrai tevi nik, inu nomok-suḗe suri nanu nga morongwose, ko nomok-rij suri nanu nga nulesi metek e. Ko kami sete kamosuri sev nga nuwrai.

¹² Nuwra tweni nanu ne iel ngatan nir tevi kami, ko kami sete kamosuri te. Ko

poro bowra vajin nanu ne melrin nir tevi kami, ko kami kaposurir pīpese?

¹³ Sete jinibb san otongsa van renge melrin nabong san. Inu kobbong sansan, Jinibb Mawos nga mojubbul renge melrin vini.

¹⁴ Erpe Moses tuwi murriloni nurīet nga marmajing rrongrrongvi e bras re nai san ko musi mutur imare renge lolo merwer, ngok pīpok ko renge inu Jinibb Mawos, jinibb nir para-rrulonik.

¹⁵ Renge iok, poro isi tama san pia-osuri inu, mēnren pia-lai mauren nga muto tuwi ngok ko wor vini.

¹⁶ Atua emrreni temijpale jinibb ne iel ngatan nir. Ko niko muloli ni mukoni inu, nga mēsansan mevi ni natun mawos, vini iel ngatan. Ngok poro isi san pia-osuri inu, mēnren sete mia-mij, ko pia-la mauren nga muto tuwi ngok vini.

¹⁷ Atua okoni inu Natun mawos vini iel ngatan, sete suri ḗwer lokloksi jinibb ne iel ngatan nir, ejki, ko ḗela ma mauren tevir.

¹⁸ Ni nga muosuri inu, setemun Atua mia-wer lokloksi. Ko si nga sete muosuri inu, Atua ewer lokloksi ko pa osuw ngok, suri sete muosuri nise inu nga mevi Atua natun mawos.

¹⁹ Atua ololi erpok suri nanu ngel le: moron evini pa iel ngatan osuw, ko jinibb sete armerreni te. Armerreni wor nemalik asie moron, suri nanu nga marok-lolir arsi.

²⁰ Jinibb jikle nga marok-loli nanu nga marsij nir arok-ungasi moron, ko ololi sete armerreni parini renge moron. Armetutue moron, arunge moron tumor vaseni nanu nga marsij nga marok-lolir tarto limjer.

²¹ Ko si nga ma muloli sev nga mivi weretunen, okini ko wor renge moron, suri nga emrreni puloli parlesi wos nanu nga mok-lolir nga marres, nga muosuri Atua rer.”

Jon Baptaes owra lilane Iesu

²² Vitunen vajin renge nanu ngel nir, Iesu eptevi jinibb sen nir aran renge Jutia. Ko arlik nabong evis wor iok, ko Iesu ok-paptaese jinibb nir ie.

²³ Jon kele renge daron nen ok-paptaese jinibb nir renge Aeon mori Salim, suri nuwi elep renge iok. Ko jinibb nir aranan ji Jon ie, ko ok-paptaes nir iok.

²⁴ Suri renge daron nen setewor arlingi Jon renge naim ne nekaien.

²⁵ Renge iok Jon jinibb sen sopor ko mēri Isrel san arsupuḗe suri murrun ne lalosen, erpese nga jinibb san orongwos puwokwok renge no Atua.

²⁶ Mian ko arini ji Jon arwerai tevi, “Jinibb nevisvisenien, kuplesi mēer nga

bonevis nga mipevum nga iokwan renge devje nuwi seser van luwi Jortan nga e, nga nik kumrij sen. Ni le ngel mok-paptaes jinibb nir renge nuwi seser. Jinibb p̄t̄p̄eti arinini jin.”

²⁷ Jon owra “Erres kobbong. Sete jinibb san orongwos puloli majingen san poro Atua sete mukoni twenie.

²⁸ Kami bonevis nga, kamrongwose nga inu mowra inu sete nuwi Mesaea. Atua okoni wowomu inu ko ma renge ni, vitunen ko ni pia-vini.”

²⁹ Ko Jon otuw kele nale ngel, owra “Jinibb san nga puwra p̄ilesi nesevin san, ko poro puwra pian mun lat san, ko p̄ilngi selen san nga pimemetete nesen sen sopen pijpari nga pia-luwi. Ko vinnen evi pa sen ko. Ko selen ngok, daron nga murnge drrela m̄nren mivini, ko eir elep, sete orongwos purnge p̄isij e. Ko erpok ko, inu neiren suk elep temijpal vajin.

³⁰ Ni pian mare jerjer, ko inu bean ngatan jerjer renge ni.”

Ni nga m̄ivel renge melrin vini

³¹ Ni nga mujubbul mare renge melrin vini, ean mare jerjer renge jinibb nir. Ko m̄er nga miplari bbong renge iel ngatan evi pa jinibb ne iel ngatan, ko ok-supe suri bbong nanu ne iel ngatan nir. Ni nga ma mujubbul mare renge melrin vini, ni an mare jerjer ko wor renge jinibb nir.

³² Ni ok-supe sev nga ni murnge ko m̄ilesir re meten. Ko sete ma jinibb san ea-osuri rragrage nanu nga muwrai ngok nir!

³³ Ni nga ma muosuri sev nga inu mowrai eviseni vajin nga Atua nale sen arivi weretunen.

³⁴ Mer nga Atua mukoni, ni ok-supe suri nale se Atua, suri Atua elai Neṁin On sen tevi ni owun saut rrese.

³⁵ Tata emrreni Natun, ko ela nanu jijle tevi, elngir renge nevren.

³⁶ Mer nga muosuri Natun elai pa mauren nga muto tuwi ngok vini. Ko m̄er nga sete muosuri Natun sete mia-la mauren nga muto tuwi ngok vini. Mernen lolaren se Atua oto malum ren.

4

Iesu erij tevi nesevin Sameria

¹⁻² Ko mian ko Parasi nir arunge nga Iesu jinibb sen nir milep m̄iasie Jon vajin, ko nga Iesu mipaptaese jinibb milep m̄iasie Jon. (Ko ewretun, Iesu sete epaptaese jinibb nir, ejki, ko jinibb sen kobbong nir arok-paptaese jinibb nir.)

³ Ko daron nga Iesu murongwose nga Parasi nir arunge pa nga ni jinibb sen milep m̄iasie Jon, ko niko muloli ni m̄ivel lingi Jutia, ko mulwi kele van re Galili e.

⁴ Ko renge nivelen sen, evel otvi sise m̄eri Sameria nir.

⁵ Ngok, evini renge Sameria ngaim nga welwelili nen san nga nisen Saeka, morie orsel nga Jekop m̄ilai tuwi tevi natun Josep.

⁶ Renge ie evi lat nga Jekop m̄ili nuwi sen ren. Ko Iesu ornge lengleng esij renge nivelen sen, ko evini esakel mori jeli nuwi nen. Erpe evi levial mawos, mete nial esngavöl drromon eru.

⁷ Mian ko nesen Sameria san evini nga pitvangi nuwi ie. Ko Iesu owrai tevi vinnen, “Kupla nuwi ngok sopen tevik bemni.”

⁸ (Renge daron nen jinibb sen nir arivel pa aran ngaim e parwuli nanen ser sopen.)

⁹ Nesen Sameria nen etaol ko owrai lweni tevi, “Erpese nga nik kumivi m̄eri Isrel, ko kumngoni nuwi nga kupmini tevi inu, nga mevi nesen Sameria?” (Meri Isrel sete arok-korti tevi m̄eri Sameria nir.)

¹⁰ Iesu owra lweni tevi vinnen, “Poro nga nik kuprongwose nelaien se Atua nga m̄ilai, ko isi le nga muwrai tevim nga kupla nuwi tevi pimni, ngok nik kurongwos kupngoni ni p̄ilai nuwi nga nik vajin kupmini. Ko kupmaur tuwi ngok vini rengen.”

¹¹ Vinnen owra lweni tevi Iesu, “O, ko nanu san ejki iel nga nik kuptevangi nuwi e, ko nuwi ngel evan ngatan lengleng. Ko renge nuwi ne mauren nga tuwi ngok vini nga nik kumwera kuplai ngok, kuplai ngabe ko?”

¹² Birtera se kerr Jekop, ni le eli nuwi ngel; ni ko natun nir ko buluk sen nir armini nuwi ngel. Ko ni ko elai tevi kem. Ko erpese, nik kulep asi wore ni?”

¹³ Iesu owra lweni tevi, “Isi nga pimni nuwi ngel, pian ko purnge kele kobbong nolon pimesmes.

¹⁴ Ko isi nga ma pimni nuwi nga inu bea-lai tevi, ni sete nolon mia-mesmes kele mun. Nuwi nen nga belai tevi nen pia-irpe mete nuwi nga muwowski renge ni, ko pia-lai mauren nga muto tuwi ngok vini.”

¹⁵ Vinnen owrai tevi ni, “Numal, kuplai nuwi nen tevik bemni, ko puloli nolok sete pimesmes kele, ko sete bevini kele mun betvangi nuwi iel.”

¹⁶ Iesu owra lweni tevi vinnen, “Kupan kupveruse diwen som pivini, ko nik kele kupluwi vini.”

¹⁷ Vinnen owra lweni tevi Iesu, “Ejki ma, diwen suk ejkie.”

Ko Iesu owra lweni tevi, “Kuwretun renge kumwerai mirpok, diwen som ejkie.

¹⁸ Suri nik diwen som nga renge sel elim kis, ko m̄er nga nik kumlik jin lelingenok sete evi diwen som. Kuwretun ko wor renge kumwerai mirpok.”

¹⁹ Vinnen owra lweni tevi, “Numal, nurnge nibek nen nga nik kuvi propet san.

²⁰ Birtera se kem nga tuwi nir arok-lotoe Atua reнге botwen nga ngel, ko kami m̄eri Isrel nir kamok-wera reнге Jerusalem ko wor evi lat nga jinibb parlotoe Atua reнге.”

²¹ Iesu owrai tevi vinnen, “Vinel, kuposuri inu, mete nial nen evini nga kami setemun kaplotoe Tata reнге botwen nga ngel, rreknga reнге Jerusalem.”

²² Kami m̄eri Sameria nir sete kamrongwose Atua nga kamlotoe, ko kem m̄eri Isrel namlotoe Atua nga namrongwose. Suri sel nga jinibb p̄ila mauren eplari ji m̄eri Isrel nir kobbong.

²³ Mete nial nen evini ko eplari lelingen ngel, nga jinibb nga marweretun marlot, parlotoe Tata tevi neñin ko weretunen. Tata epej loten nga mirpok ko, nga parlotoe ni reнге.

²⁴ Atua evi Neñin, ko jinibb nga parlotoe ni parlotoe ni ko wor tevi Neñin ko weretunen.”

²⁵ Nesevin owra tevi ni, “Nurongwose nga Mesaea, nga pia-la mauren tevi jinibb nir, pia-vini ko wor ko pia-wera visviseni nanu jijle tevi kerr.”

²⁶ Iesu owra lweni tevi vinnen, “Inu nen le pa ngel nga m̄erij tevim ngel, inu nuvi m̄ernen.”

²⁷ Renge daron nen mawos Iesu jinibb sen arluwi vini. Ko artaole nga marlesi Iesu mok-rij tevi nesevin san. Ko sete nir san osusi tevi vinnen, “Kupej sev le?”, rreknga puwrai tevi Iesu, “Erpeše kumrij tevi nesevin ngok?”

²⁸ Ko nesevin nga elngi tweni botel sen esiri jer, ko owlu suri sel olwi van ngaim nga milep ser e, ko owrai tevi delung ne ie nir,

²⁹ “Lartul, kapini kaplesi ta jinibb san ni le, m̄ernen owra jijle nanu nga nomok-lolir nir. Rreknga m̄ernen evi Kristo le?”

³⁰ Ngok jinibb nga reнге ngaim nen nir arivel tweni aran jin arlesi.

Iesu ela nale rrongrongvi ne numös

³¹ Renge daron nen jinibb sen nir arveruse ni, arwera “Numal, kupini mun kuṗaan sopen.”

³² Ko ni owrai tevir, “Nanen suk nga borroi oto wore nga kami sete kamrongwose.”

³³ Suri muwrai mirpok ngok, ko jinibb sen nir arwerwera lululweni nir e, “Rrekma jinibb san ela nanen tevi ni nga purroi?”

³⁴ Ko Iesu owra lweni tevir, “Kami sete kamrongwose nanen suk. Nanen suk evi nga Bemajing jile marongen se Atua nga mukoni inu vini, bololi jijler.

³⁵ Kami kamok-wera, ‘Navöl ivij ojpon malum mian ko daron ne numös pia-vini.’ Ko kaplesi, inu nuwrai tevi kami, kapkulu

ta imare kapmeteni naut ne orsel nir. Arkur arow jile, arviter partawer.

³⁶ Mer nga mok-tawe wenen ne numös ok-la nowlin. Ko ok-ser kortoni wenen nir, ngok erpe jinibb nir nga paran reнге mauren ne tuwi ngok vini. Puloli nuru korti, m̄er nga mok-jijreni ko m̄er nga mok-tawe, porir kokorti.

³⁷ Naul On owra, ‘San purwi naut ne orsel, ko jinibb m̄inij pia-tawe wenen ren vajin.’

³⁸ Inu nukoni kami kaman reнге naut ne orsel nga kami sete kamruwir, ko kamok-tawe wenen rer vajin. Jinibb m̄inij nir arṗelak nga maruwi naut nen nir, ko kami vajin kama-van kamtawe nawone wenen rer.”

Meri Sameria elep arosuri Iesu

³⁹ Jinibb ne ngaim nen elep arosuri Iesu vajin, suri reнге nale se nesevin nga muwrai tevir ngel, ‘Owra nanu jijle nga nomok-lolir’.

⁴⁰ Daron nen nga m̄eri Sameria marini jin nen, arngoni tertere ni nga ni p̄ilik mun tevir. Ko ni elik mun tevir ie nabong eru kele.

⁴¹ Ko reнге m̄ilik tevir ie, nir elep kele wor arosuri ni reнге marunge nale sen nir.

⁴² Ko lartul nen nir arwerai tevi nesevin nen, arwera “Lelingen ngel kem namosuri, sete suri nga nik kumwerai tevi kem, ko suri kem wor namrunge nale sen nir nga muwrai. Ko namrongwose ni evi m̄er weretunen nga pia-lai mauren tevi jinibb ne iel ngatan nir.”

Iesu ololi natu numal san erres luwi

⁴³ Iesu elik ie Sameria ejpari nabong eru asi osuw, ko evel kele van sisen e Galili.

⁴⁴ Ko ni owra tweni wowomue pa reнге nale sen, “Mer nga mivi propet, ko jinibb ne sisen nir sete arok-osuri ni.”

⁴⁵ Ko daron nga mivini mijpari lweni Galili e, jinibb ne ie nir artur terai, suri marlesi nanu nga mulolir reнге Jerusalem reнге daron ne nanen ne asien; suri nir kele arini reнге nanen nen.

⁴⁶ Mian ko Iesu olwi kele vini Kena e, nga mivi ngaim nga welili ne Galili san, lat nga bonevis m̄irieni nuwi rres mivi norro e. Ko jinibb nga milep san elik iok. Mernen natun emsi, ko ematur jer wor Kapaneam.

⁴⁷ Mernen daron nga murnge Iesu mivel lingi pa Jutia mivini reнге Galili e, ko ean jin ko ongoni ni, owra piptevi poran ngatan Kapaneam, puloli natun p̄irres luwi. Suri otomori pa pimij.

⁴⁸ Iesu owrai tevi m̄ernen, “Aro! Poro nga sete kaplesi nelesien nir, sete kamaosuri rragrage te.”

⁴⁹ Jinibb nga milep nen owra “Numal, wurru, kupini wor pingavil puwomu, vitunen ko poro natuk pia-mij vajin!”

⁵⁰ Ko Iesu owra lweni tevi, owra “Kupiel. Natum emaur pa.” Ko miernen osuri nale nga Iesu muwrai, ko evel osri lweni sel olwi.

⁵¹ Ko daron nga musri lweni sel mulwi van ngatan e Kapaneam, ko jinibb ne majingen sen sopor arivel tersele ko arsewute renge sel, ko arwerai tevi, “Ai, natum erres luwi pa!”

⁵² Ko ni osusi tevir, owra “Momsawos mete nial sev nga ni mitipatun mirres luwi ren?” Ko nir arwera lweni tevi, “Momsawos mete nial sansan renge miniv levial, mesien dowalul elinglingi ni.”

⁵³ Tata sen orongwose evi mete nial mawos nga Iesu muwrai ko tevi ni rengen, ‘Natum emaur pa.’ Ko ni osuri, ko nir jijle nga marlik renge naim sen nir kele arosuri.

⁵⁴ Ngel evi nelesien erwen nga Iesu muloli daron nga mivel lingi Jutia ko mivini Galili e.

5

Iesu ololi jinibb san erres luwi renge nuwi ne Betsaeta

¹ Vitunen renge nabong ngel, ko nanan san se mēri Isrel nir vajin, ko Iesu otongsa evan Jerusalem e.

² Ko renge iok Jerusalem, nuwito san oto ren nga mubbun rrerrale. Renge nale se mēri Isrel nir, nisen ko Betsaeta. Evi lat ne lalosen, ko oto mori metali san renge naworr nga mīrrale Jerusalem nga marveruse metali ne sipsip. Lat nen, naim salsal elim artur ren.

³ Ko renge iok renge naim salsal ngok nir, jinibb elep nga elep temijpal armatur rer, nir ngok armesi e mesien lele nir. Nir sopor meter arorr, nir sopor arivi naroj, nir sopor devje niber armij. Ko arok-tiriv tera nuwi nen pūterringring.

⁴ Suri nabong sopon anglo ok-jubbul vini ngatan ok-siksikeni nuwi nen, ko isi nga puwowomu van renge nuwi ngatan, miernen ko erres renge mesien sev nga ni mimsi ren.

⁵ Renge ie jinibb san nga mimsi sia ngavōl itul drromon owil (38).

⁶ Daron nga Iesu mūlesi mimatur, ko orongwose nga mesien ngok ololi wor tuwi ko. Ko owrai tevi, “Nik kumarong kupres?”

⁷ Mer nga owra lweni tevi, “Numal, inu sete jinibb nga pūwosik van renge nuwi otoa. Moro daron nga nuwi nūterringringe, ko mowun tweni nga ban,

ko jinibb mīnij san ojubbul womu van ngatan renge nuwi.”

⁸ Ko Iesu owrai tevi, “Kupmera kupuni milngom ko kupiel!”

⁹ Daron nen mawos ko pa, mēnen erres luwi. Ko oni milngen ko evel.

Renge nabong nen evel nabong on mawos.

¹⁰ Meri Isrel nga marlelep nir arwerai tevi mēn nga mīrres luwi nga, “E, lelingen evi nabong on, sete omomsawos renge devjen ne nale neseseien nga nik kupuni milngom ko kupiel!”

¹¹ Ko ni owra lweni tevi nir, owra “Mer nga wor muloli inu ko mēres luwi owrai tevik, ‘Kupuni milngom ko kupiel.’”

¹² Ko nir arsusi lweni kele tevi, arwera “Ia, ko isi ko nenen nga muwrai tevim nen, ‘Kupuni milngom ko kupiel?’”

¹³ Ko mēn nga mīrres luwi sete orongwose isi ko miernen, suri delung elep pēlak ie. Ko Iesu kele evel tilper ko evel pa van lat mīnij e.

¹⁴ Mian ko vitunen vajin sapon, Iesu otor sweri miernen renge Naim On se Atua. Ko owrai tevi, “Kuplesi, kurres pa ngok. Ko sete kuploli kele mun nololien, suri nanu nga tia-sij temijpal san tia-asi mesien som ngok tia-loli kele nik.”

¹⁵ Ko mēn nga eivare ko evan ji mēri Isrel nen nir, ko owrai tevir, “Iesu le nga muloli inu mēres luwi nga.”

¹⁶ Ngel ko ololi nga mēri Isrel nen nir marmerrēni para-rrurr otōt tevi Iesu, suri ololi nanu ngok re nabong on.

¹⁷ Ko Iesu owra lweni tevir, “Tata suk emajing tetajer erpok sete omosi, ko niko inu mēmajing, sete bomosi.”

¹⁸ Renge muwrai mirpok ngok ko, ololi mēri Isrel nen nir arpej kele wor renge ni sel nga parevji pini ni rengen, sete suri kis nga mutor oti nabong on, ko suri kele nga muwra Atua evi ni Tata sen mawos, erpe ololi ni osorsan tevi Atua.

Derteren se Atua Natun

¹⁹ Iesu owrai kele tevir, “Nuwretun nga nuwretun nuwrai tevi kami, sev nga mēlesir Tata suk mok-lolir, ko niko inu nomok-lolir. Inu sete nurongwos bololi nawone nanu pisan, ejki. Sev nga Tata mok-lolir kobbong, ko inu kele nomok-lolir.

²⁰ Suri Tata emrenni inu, ni natun, ko eviseni nanu jijle nga ni mok-lolir tevi inu. Ko pia-viseni kele wor renge inu majingen nga wor parlelep parasie nga ngel, nga parloli kami kapa-taoler.

²¹ Erpe Tata suk muloli jinibb nga marmij nir armaur luwi kele renge mijen, inu kele berpok, ko βela lweni mauren tevi si nga memrreni.

²² Tata suk sete owra suri lat nga puto suri tevi jinibb san, ko elngi majingen ngok oto renge inu nevrek.

²³ Niko puloli jinibb nir parosuri inu, nga mevi ni natun mawos, pirpe nga nir marosuri inu Tata suk. Mer nga sete muosuri inu te mijki, ni sete osuri Tata suk nga mukoni inu, ejki.

²⁴ "Nuwretun nga nuwretun nuwrai tevi kami, m̄er nga murnge nale suk, ko muosuri Tata suk nga mukoni inu, elai pa mauren nga muto tuwi ngok ko vini. Atua setemun orongwos putor vitrangi, ko asi ko pa renge mijen ean renge mauren.

²⁵ Nuwretun nga nuwretun nuwrai tevi kami, lelingen ngel mete nial nen evini nga jinibb nga marmij nir parunge drrela inu nga mevi Atua natun mawos; ko jinibb nga marmurronge inu, nir kele parla mauren.

²⁶ Erpe Tata suk esansan bbölböl kobong evi batu mauren, ko erpok elai tevi inu nga inu kele besansan bbölböl bevi batu mauren.

²⁷ Tata suk ela derteren tevik nga inu bowra lilane lat nga puto suri renge jinibb nir, suri inu nuvi Jinibb Mawos.

²⁸ Kami sete kaptaole nanu nga mowrai ngel, suri mete nial nen evini nga jinibb nga marmij nir para-runge drrelak

²⁹ ko para-ivare renge dobbir. Ko nir nga marok-loli nanu nga marres nir bonevis parmaur luwi ko paran renge lat ne mauren. Ko nir nga ma marok-loli nanu nga marsij nir bonevis paran renge lat ne norongen nga m̄isij.

³⁰ "Inu sete nurongwos bowra nawone lat nga puto suri tevi jinibb san renge inu derteren suk, ejki rres nawon. Nanu jijle nga nomok-werai, nurnger ko wor ji Tata suk. Ko nanu nga mowrair arivi weretunen, suri sete nomok-loli marongen suk, ko nomok-loli ma marongen se ni nga mukonik.

³¹ "Poro inu berij se inu lweni bbong, nale suk ngok sete evi weretunen.

³² Inu ngel, jinibb m̄inij san erij se inu. Ko inu nurongwose nale sen nga m̄irij se inu ren evi weretunen.

³³ Bonevis nga kami kaman ji Jon Baptaes, kami kamsusi rongorange tevi ni, ko ni owra tweni weretunen tevi kami.

³⁴ Inu nomok-rij erpok ngok, sete suri nubibto re nale se jinibb san, ejki. Inu nomok-wera nanu ngel nir arirpel nga puloli kami kapasi van re mauren.

³⁵ Jon evi nasul san nga mimor, moron m̄irrinrin wowomu bonevis; ko kami kan̄ir, kammarrong kaplesi nasul sen. Ko ngok oto bbong omrrol.

³⁶ Ko inu nanu kele san nga m̄irij suk otoa. Nenen elep asie wor nga Jon ngok, nenen evi majingen nga Tata suk mlair

tevik nga inu bemajing rer; bololi jijler. Majingen jijle nga mololir ngok nir arij se inu nga Tata suk okoni inu.

³⁷ Ko Tata suk nga mukoni inu, ni kele erij se inu. Ko sete kami kamrunge drrelan renge nabong san, rreknga kamlesi niben renge nabong san.

³⁸ Nale se ni sete kami kamlair kamtorir renge nolo kami nir, suri sete kamosuri inu, nga ni mukonik.

³⁹ Kami kamok-pejpej sel renge Naul On, ko kamok-wera kami kamok-la mauren nga muto tuwi ngok vini ren. Ko Naul On nen kele erij se inu kobbong,

⁴⁰ ko kammusus kapini jik ko puloli kapla mauren.

⁴¹ "Sete numrreni jinibb nir parsurövi inu, ejki.

⁴² Ko inu nurongwose renge kami ngok, sete kamok-la merrenien se Atua kamoktori renge nolo kami nir.

⁴³ Inu nuvini renge nise Tata suk, ko kami sete kamtekai inu. Ko poro ma jinibb m̄inij san pivini renge ni kobbong nisen, ni ko ma kaptekai.

⁴⁴ Ngok kami kaposuri pirpese, suri kami kamok-lila lululweni nosrosövien renge kami kobbong, ko sete kamok-pej nosrovien nga mivel ji Atua nga m̄isan kis mivini.

⁴⁵ Sete kami kaprrormi nga kapwera inu bowowra tweni kami tevi Tata suk, pijki. Moses nga mivi m̄er nga kami kamosuri, ko ni ko pia-wowrai tweni kami.

⁴⁶ Poro pivi weretunen nga kami kamosuri Moses, ko ngok kami kaposuri inu ko, suri ni oli suri inu kobbong.

⁴⁷ Ko suri kami sete kamosuri nale se Moses, ngok kaposuri nale suk nir pirpese?"

6

Iesu owngani jinibb evi nuvasngavöl valim (5000)

¹ Vitunen renge ngel, Iesu evel rujruj kele evan renge devjen ne nuwito ne Galili, nga nisen m̄inij nen marwera nuwito ne Taepirias e.

² Ko meling jinibb nga milep arvijuri arini jin, suri marlesi nelesien sen nir nga mulolir renge nir nga marmesi.

³ Ko Iesu otonga van mare renge botwen san, ko elik tevi jinibb sen nir ie.

⁴ Renge daron nen, nanen ne asien se m̄eri Isrel nir dabbuen nen oruj mori.

⁵ Daron nga Iesu muklu tawij, ko m̄ilesi meling jinibb nga milep marinini jin renge ie. Ko owrai tevi Pilip, "Kerr rrapwuli niv ngabe nga delung jinibb nga marinini ngel parurroir?"

⁶ Owrai erpel, owra bbong purrowrrowe Pilip ko ren. Suri ni orongwos pae sev nga ni pia-loli.

⁷ Pilip owrai lweni tevi, "Nevöt pivi pungut pivaru (200) kis ngok puwelili kele kobbong, sete pivter malum pivi nowli niv nga parurroi e; nir sisamis parurrurro bbong beblen ko."

⁸ Ko san kele renge jinibb sen, nga nisen Antru, Saemon Pita tasin, owrai tevi ni owra

⁹ "Nanwarreng san ni le ielan otori niv wowarreng nga marloli bale e elim, ko nai wowarreng eru. Ko erpese, jinibb ngok nir elep ko wor."

¹⁰ Ko Iesu owra "Kaploli jinibb nir parlik ngatan." Ko renge ie mösmös elep ren; ko jinibb nen nir arlik ngatan. Ko norman nga marlelep kis kobbong nir totoklai ejpari nuvasngavöl valim (5000).

¹¹ Iesu ela niv nen nir, ko owra erres tevi Atua surir. Ko owjuwje tevi jinibb nir nga marlik iok; ko ololi erpok kele renge nai nga wowarreng nga nuru. Ko nir jijle arla nanen evter nir erpe marmarereni.

¹² Ko daron nga maraan jile vajin musuw, ko Iesu owrai tevi jinibb sen nir owra "Kapsere lweni bebje nanen nir nga marurro linglingir marjipon, sete sapon parsij nawon."

¹³ Ko nir aran arsere kortoni bebjen nga marurro linglingir renge niv nga elim wowarreng nga, ko arsongnir renge narr esngavöl drromon eru arwun saute.

¹⁴ Ko daron nga delung nen nir marlesi nelesien nga muloli, ko arwera "Merel evi propet nen weretunen le pa nga marwera pia-vini iel ngatan!"

¹⁵ Iesu ornge renge niben nen, orongwose nga parini paron tertere ni nga pivi numal ser. Ko ni evel esan evan renge botwen e.

Iesu evel renge mare ne nuwi

¹⁶ Renge daron nga nat mirivriv e vini, ko jinibb sen nir arjubbul van ngatan e renge nuwito.

¹⁷ Ko aran arsa renge drrav, ko arwolu otvi nuwito, arluwi kele van Kapaneam e. Ko natopong pa vini, ko Iesu setewor evini jir.

¹⁸ Ko ling serser nga milep san etewut vini, ko ololi nuwito obburbur.

¹⁹ Ko jinibb sen arsu erpe ningaw evi nuvasngavöl valim (5000) rreknga vawon (6000) pa osuw, ko arlesi Iesu mivel renge mare ne nuwito vini, evini mori renge drrav. Ko nir aririr lengleng.

²⁰ Ko Iesu owrai tevir, "Inu lebbong, sete kapmetutul!"

²¹ Ko nir armarong vajin pisa parengeni renge drrav. Ko drrav evesan rrese ejpari ngaut lat nga marwera paran ren.

Delung arpej Iesu

²² Mevinen jinibb delung nga martur jer renge devje nuwito arlesi nga drrav sansan bbong nga mutur renge devje nuwito, ko arongwose nga Iesu sete mīsa tevi jinibb sen nir mijkie, ko arsan kis bbong arsa ko arwolu. Ko arrorrmi Iesu ni ko malum iok sapon.

²³ Drrav mīnij sopor ne Taepirias arwolu veut morie lat nga meling jinibb nga milep marurroi niv e nga Numal muwra erres rer womu tevi Atua, ko vitunen ko mararuroir.

²⁴ Ko mian ko meling jinibb ngok nir marlesi nga Iesu mijki iok, ko jinibb sen kele nir, ko ngok arla kele drrav sopor arwolu kele arini Kapaneam e, arpej Iesu.

Iesu niv ne mauren

²⁵ Daron nga delung martor sweri ni renge devje nuwito e, ko arwerai tevi, "Jinibb nevisvisenien, kuvini iel e seveling le?"

²⁶ Ko Iesu owra lweni tevir "Nuwretun nga nuwretun nuwrai tevi kami, kampej inu sete suri kamrongwose suri nelesien suk nir, ko suri kamro niv, ko kamup e mirpe nga kammerreni.

²⁷ Sete kapmajing tweni nanen nga mian ko pīsij, ko kapmajing tweni nanen nga pia-la mauren nga puto tuwi ngok vini tevi kami, nga inu jinibb Mawos bea-lai tevi kami. Atua elngi nabil ne derteren nen pa renge inu."

²⁸ Ko nir arsusi tevi ni, "Kem nabloli sev ko, evi nga nammajing majingen se Atua?"

²⁹ Iesu owra lweni tevir, "Ngel le evi majingen se Atua, nga kami kaposuri inu, nga ni mukonik."

³⁰ Ko nir arwerai tevi ni, "Nelesien sev nga nik kupviseni nga kem nablesi, ko nabosuri nik? Kuploli majingen sev?"

³¹ Tata se kerr nir arurroi mana renge lolo merwer, erpe nga maruli renge Naul On, 'ni ela niv ne melrin tevir arurroi.' "

³² Iesu owrai tevir, "Nuwretun nga nuwretun nuwrai tevi kami, Moses sete ela niv ne melrin weretunen tevi kami. Tata suk ko ma ok-la niv ne melrin weretunen tevi kami.

³³ Ni nga mivel renge melrin vini iel ngatan evi niv se Atua, ko ok-lai mauren tevi iel ngatan."

³⁴ Ko nir arwerai tevi ni, "Numal, kopok-la niv nen ko pa tetajer tevi kem."

³⁵ Ko Iesu owrai tevir, "Inu nuvi niv ne mauren. Mer nga pivini jik, numer sete orongwos pīaji kele; ko mīer nga muosuri

inu, ni sete purnge nolon pimesmes kele mun.

³⁶ Ko nuwrai tevi kami, kami kamlesi mete kami e inu, ko sete kamosuri inu te.

³⁷ Jinibb nga Tata mlair tevik parini jik ko wor; ko m̄er nga mivini jik, setemun numa-oji tweni, ejki.

³⁸ Suri inu nuvel renge melrin vini iel ngatan, ko sete nuvini tweni nga bololi marongen suk, ko nuvini tweni nga bololi marongen se ni nga mukoni inu.

³⁹ Ngel ko evi marongen se Tata nga mukoni inu, nga jinibb jikle nga mlair tevik, sete botor jabble san pijijki, bea-loli parmaur luwi kele renge nabong nga vitunen.

⁴⁰ Ko ngel le evi marongen se Tata suk, nga jinibb jikle nga marlesi Natun ko marosuri ni, parla mauren nga muto tuwi ngok vini. Ko inu bea-loli parmaur luwi kele renge nabong nga vitunen."

⁴¹ Ko m̄eri Isrel nga marlelep nir arlolare renge Iesu muwrai mirpok, nga ni evi niv nga mivel renge melrin vini, ko arok-rij latlat malum bbonge suri.

⁴² Ko arwera "Po, m̄erel evi bbong Iesu le ngel, nga tata sen ko tasu sen rramrong-wose nuru. Ni mivi bbong natu Josep! Ko erpese le ni muwra mivel renge melrin vini?"

⁴³ Iesu owra lweni tevir owra "Sete kaplolar kapok-supupe lululweni malume pipropok renge kami lweni.

⁴⁴ Sete jinibb san orongwose pivini jik, poro bbong Tata suk nga mukonik ko pirvei ni vini jik. Ko inu bea-loli pimaur luwi kele renge nabong nga vitunen.

⁴⁵ Propet nir aruli renge Naul On erpel, 'Atua pia-visvisenir', ko jinibb jikle nga murunge Tata ko murongwose nanu vajin, pivini jik ko.

⁴⁶ Sete jinibb san elesi Tata renge nabong san. Ni nga bbong mivel ji Atua ko, ni kobbong elesi Tata.

⁴⁷ Nuwretun nga nuwretun nuwrai tevi kami, m̄er nga muosuri inu ela mauren ne tuwi ngok ko pa vini.

⁴⁸ Inu nuvi niv ne mauren.

⁴⁹ Tata se kerr nga tuwi nir arurroi mana renge lolo merwer, mian ko armij.

⁵⁰ Ko ngel evi niv nga mivel renge melrin vini iel ngatan, nga poro jinibb san purroi, ko sete pimij.

⁵¹ Inu ngel nuvi niv ne mauren nga mevel renge melrin vini. Poro jinibb san purro niv ngel, ni pimaur tuwi ngok vini. Niv nga inu belai pivi mauren ne iel ngatan, evi inu nibek."

⁵² Meri Isrel nen nir arlolare vajin, ko arsususi lululweni tevir, arwera "Merel p̄ila niben tevi kerr piprese nga kerr rraproi?"

⁵³ Iesu owrai lweni tevir, "Nuwretun nga nuwretun nuwrai tevi kami, poro nga kami sete kaproi nibe Jinibb Mawos, ko kami sete kapmini drran, ko ngok mauren sete oto renge kami.

⁵⁴ Ko isi nga murro nibek, ko mimni drrak, ela pa mauren nga muto tuwi ngok ko vini. Ko niko inu bea-loli pimaur luwi kele renge nabong nga vitunen.

⁵⁵ Suri nibek evi nanen weretunen, ko drrak evi minminen weretunen.

⁵⁶ Mer nga murro nibek ko mimni drrak, ni elik renge inu, ko inu nulik renge ni.

⁵⁷ Erpe Tata nga mimaur tuwi ngok vini mukoni inu, ko inu numaur renge Tata, erpok kele m̄er nga murroi inu nibek, ni pipropok ko, pimaur renge inu.

⁵⁸ Ngel evi niv nga mivel renge melrin vini iel ngatan. Sete erpe mana nen nga tata se kerr marurroi tuwi, ko mian ko marmij bbong. Mer nga murroi niv ngel pimaur tuwi ngok vini."

⁵⁹ Owra nanu ngel nir renge naim kortien ser daron nga mivisviseni renge Kapaneam e.

Nale ne mauren ne tuwi ngok vini

⁶⁰ Nir elep renge jinibb sen nir daron nga marunge nale sen ngel e, ko arwera "Nevisvisenien sen ngel eterter temijpal, isi ko orngwos pumurrarronge?"

⁶¹ Iesu ni lweni orongwose nga jinibb sen nir arunge esij renge nanu nga muwrai ngok, arwerwera malum bbonge renge nir lululwi bbong. Ko owrai tevir, "Nale welele lebbong olokloksi kami?"

⁶² Ko piprese ko vajin poro kami kaplesi Jinibb Mawos p̄isa tongsa luwi van mare renge lat nga mlilik e tuwi?"

⁶³ Nem̄in ko evi nga mlilai mauren, niben sete orngwos puloli nanu pisan. Nale nga mowrai tevi kami arivi nem̄in ko armaur.

⁶⁴ Niko renge iok, kami sopor sete arosuri." Suri Iesu orngwos wowomue pa siko nir nga sete marosuri, ko siko nga pia-tekai kerasi ni.

⁶⁵ Ko Iesu owrai kele: "Renge murrun ngok ko muloli nga inu mowrai tevi kami, Sete jinibb san orongwose pivini jik, poro nga bbong Tata suk ko pimarong."

⁶⁶ Ngok suri iok ngok ko, ololi jinibb sen elep arlulwi, setemun arpitevi ni.

⁶⁷ Ko Iesu owrai tevi jinibb sen nir esngavöl drromon eru, "Erpese, kami kele kapluwi kapiel?"

⁶⁸ Ko Saemon Pita owra lweni tevi, "Numal, naban ji si kele e ko mun? Nik ko pa kutori nale ne mauren nga muto tuwi ngok vini!"

⁶⁹ Kem namosuri ko namrongwose nga nik kuvi Jinibb On se Atua."

⁷⁰ Iesu owrai lweni tevir, "Sete inu nutobbbue kami nga esngavöl drromon eru ngok? Ko san renge kami evi demij!"

⁷¹ Owra suri Jutas, natu Saemon Iskariot, san renge nir esngavöl drromon eru nga pia-te kai kerasi ni.

7

Iesu tasin nir sete arosuri ni

¹ Vitunen renge nanu ngel, Iesu otutur suri renge Galili. Sete emrenni pian pututur renge jutia, suri mēri Isrel nga marlelep nir armerreni parevji pini.

² Ko nabong ne nanen ne devji se mēri Isrel nir uruj mori.

³ Ko Iesu tasin nir arwerai tevi ni, arwera "Kupiel lingi iel, kupan jutia e, puloli nga jinibb som nir kele parlesi majingen som nga komok-lolir.

⁴ Poro jinibb san pimrenni putur limjer, sete orongwos p̄majing silsilveni te. Poro kuploli nanu ngel nir, kupviseni wor nik lweni ko tevi jinibb jilje nir!"

⁵ Arij erpok suri nir, nga marivi tasin mawos wor nir, nir kele sete arosuri ni.

⁶ Ko Iesu owrai tevir, "Daron suk setewor evini. Kami ma daron jilje evi pa se kami ko nir.

⁷ Jinibb nir sete arongwos parungasi kami. Ko inu ma arungasik, suri mowra tasin majingen ser nga marsij.

⁸ Kami ma kapan renge nanen. Inu sete numa-van rengen, suri daron suk mawos setewor evini."

⁹ Owra nale ngok tevir jile, ko nir arivel. Ko ni elik jer renge Galili.

Iesu evan renge nanen ne devji

¹⁰ Tasin nir aran renge nanen ne devji. Vitunen vajin ko Iesu evivitu surir. Sete evel limjer te, ko evel silsilveni.

¹¹ Meri Isrel nga marlelep nir arpej ni renge nanen, ko arsusi "Nibeni ni?"

¹² Ko renge livö renge nir arsur vijvije arsupsupe suri ni elep. Sopor arwera ni evi jinibb nga m̄irres, ko sopor arwera "Ejki, ok-kerkerasi bbong jinibb ko nir."

¹³ Ko sete san ejilwer suri ni re limjer, suri armetutue mēri Isrel nga marwomou re nir.

¹⁴ Ko mian vajin mijpari liven sopon ne nabong nir ne nanen nen, ko Iesu evini limjer vajin, ko evan renge Naim On se Atua ko evisviseni jinibb nir rengen.

¹⁵ Meri Isrel nga marlelep nen nir artaole, ko arwera "Merel sete bbong arvisviseni sopon, ko orongwose nanu ngel nir erpese?"

¹⁶ Iesu owra lweni tevir, "Nevisvisenien suk sete evi nga inu, ko evi se ni nga mukoni inu.

¹⁷ Poro jinibb san pimarong puloli marongen se Atua, m̄ernen pia-rongwose nevisvisenien ngel nga inu nomokvisviseni evel ji Atua vini, rreknga evi inu bbong nevisvisenien suk.

¹⁸ Mer nga muspe suri lweni bbong ni lweni, epej sel nga bbong pusrürövi lweni bbong ni ko ren. Ko ni nga ma muwra pusrürövi kis ni nga mukoni, m̄ernen ko ewretun, ko sete nanu nga m̄isij san oto ren.

¹⁹ Moses elai pa nale neseseiren tevi kami. Ko kami san sete otori rragrage. Ko suri sev kamwera kaprevji pinik?"

²⁰ Delung arwera lweni tevi, "Demij oto rem! Isi owra pirevji pinim?"

²¹ Ko Iesu owrai tevir "Nuloli majingen nga milep san, ko kami kamtaole.

²² Moses ela bae tevi kami (erpe sete Moses, ko apu se kami nir, metka ser nga wowomu nen nir.) Ko kami kamok-loli bipiwarreng se kami nir arok-an renge bae, ko kamrongwos kaprevjir kele renge nabong on.

²³ Kamok-loli arok-an renge bae renge nabong on erpok, nga nale neseseiren se Moses sete pimaot otvi. Ko erpese kami kamlolarsi inu nga mololi jinibb niben totoklai m̄irres renge nabong on?

²⁴ Sete kaptor ngavilvil nga kapwer lokloksi nanu, ko kaprorrmi lilane mun, musuw ko kapa-wera suri vajin lat nga pia-to surie."

Ni evi Mesaea

²⁵ Nir sopon renge delung ne mēri Jerusalem nir arwera "Kules, m̄er nga, nga marwera parevji pini nga le ngel!

²⁶ Kules, ni le ngel: mutur limjer m̄irij ngel, ko sete san erij tere! Rreknga jinibb nga marlelep se kerr nir arongwose nga ni ewretun evi Mesaea.

²⁷ Ko nanu ma san: m̄erel kerr rramrongwose lat nga mivel e vini. Ko daron nga Mesaea pia-vini e, sete san purongwose lat nga pia-pelari e."

²⁸ Ko suri nga marok-werai mirpok, daron nga Iesu mivisviseni e renge Naim On se Atua, ko ekail van mare, owra "Ia, ko kami kamrongwose inu, ko kamrongwose ngabe nga mevel e vini? Ko inu sete nuvini suri bbong inu norrorrmien suk. Ni okoni inu, ni evi weretunen. Ko kami sete kamrongwose ni.

²⁹ Inu ma nurongwose ni, suri nuvel ji ni le mevini. Ni ko okoni inu."

³⁰ Ngok ololi arwera parevei ni. Ko sete nir san orrul ren, suri mete nial sen setewor evini.

³¹ Ko delung elep arosuri ni. Ko arwera "Poro nga Mesaea ni ko malum setewor evini, ko ni pia-loli kele wor majingen

nga para-lelep wor nir, piasie nga m̄erel mulolir ngel nir? Ejki, ni le pa!"

Arkoni jinibb sopor parevei Iesu

³² Parasi nir arunge delung nir marok-sur vijvij malum marok-supe suri nanu nga Iesu mulolir ngok nir. Ko ngok nir ko batu jinibb ne sulsulen nir arkoni jinibb ne no nuval sopor paran parevei Iesu.

³³ Ko Iesu owrai tevir, "Bepatevi kami ma behlen sete pipriv, ko bevel lingi kami, bean ji ni nga mukoni inu.

³⁴ Kami kappej inu ko sete kapa-lesik, suri lat nga bean e, kami sete kamrong-wose kapini ren."

³⁵ Ko m̄eri Isrel nen nir arwerwera lulwenir e, arwera "Owra pian ngabe nen e le, nga kerr sete rraplesi ngel? Pian lat san nga m̄eri Isrel nga marivel lingi kerr marlik e, ko pivisviseni m̄eri Gris nir?"

³⁶ Owra erpese le muwrai mirpel ngel, 'Kappej inu, ko sete kama-lesik, ko lat nga belik ren, sete kamrongwos kapini ren?' Owra sev ko?"

Mete nuwi wowosi ne mauren nga tuwi ngok vini

³⁷ Renge nabong nga muto ore jere rengen nanen ne devji se m̄eri Isrel nir, ngok evi nabong nga milep ko nga m̄irres nen jer, Iesu otur imare ko ekail, owra "Poro jinibb san nolon emesmes, pivini jik pimni nuwi!"

³⁸ Mer nga muosuri inu, m̄ernen 'mete nuwi seser ne mauren nga tuwi ngok vini puwowski peleplarie rengen nolon', erpe Naul On muwrai."

³⁹ Ngok Iesu osp̄e suri Nem̄in nga nir nga para-osuri para-lai. Ko Nem̄in On nen setewor evini, suri Iesu setewor emra rengen mijen, ko setewor evan rengen nosrovien.

Jinibb nir nolor eru e suri Iesu

⁴⁰ Delung elep daron nga marunge nale sen ngel e, ko arwera "Weretunen, m̄erel evi propet nen."

⁴¹ Ko nir sapon arwera "Merel evi Mesaea." Ko nir sopor arwera "Mesaea piplari ko Galili? Ejki rres!"

⁴² Renge Naul On owra Mesaea piplari rengen metka se Numal Devet, ko pia-ak rengen Betliem, lat nga Numal Devet."

⁴³ Ngok suri marij latlat mirpok ngok ko, ololi meling jinibb ngok nir nolor eru e.

⁴⁴ Nir sopor armerreni parevei ni, ko sete san orru totoni ni, ejki.

Merwomu ne m̄eri Isrel nir

⁴⁵ Jinibb ne no nuval nen nir arlulwi vini ji batu jinibb ne sulsulen nir ko Parasi nir. Ko nir arsusi tevir, arwera "Suri sev sete kamrevei ni vini?"

⁴⁶ Jinibb ne no nuval nen nir arwera lweni tevir, "Sete nabong san jinibb san erij erpe m̄erel m̄irij."

⁴⁷ Parasi arwera lweni tevir, "Kami kele, ololi kami kamlelengle kele?"

⁴⁸ Ko erpese rengen jinibb womu ne jinibb nir ko kem Parasi nir, sete san osuri ni!

⁴⁹ Ko delung ngok nir nga marosuri ngok, sete arongwose nale nesereien se Moses, ko lolaren se Atua oto rer."

⁵⁰ Ko Nikotemas, nir san nga mivini ji Iesu bonevis, owrai tevir, owra

⁵¹ "Renge devjen ne nale nesereien se kerr, sete orongwose rrapupe suri lat nga puto suri rengen jinibb san puwowomu, vitunen vajin ko rrapa-runge nale sen ko rrapa-meteni suri nanu nga mulolir."

⁵² Ko nir arwera lweni tevi, arwera "Ko rrek nik kele kuvi m̄eri Galili rrek? Poro kuppej rengen Naul On ko kuplesi ko, sete propet san orongwose piak rengen Galili!"

8

Nesevin nga muloli batun

¹ Ko nir p̄etp̄eti arlulwi vini rengen naim ser e, ko Iesu otonga van rengen Botwen ne lolnai ne olip e.

² Ko mevinen rengen rorpong susu, ko olwi kele van rengen Naim On e. Ko delung elep arini kele jin, ko ni esakel ko evisvisenir.

³ Ko jinibb nevisvisenien ne nale nesereien nir ko Parasi nir arpitevi nesevin san vini, nga muloli batun. Ko arlingi otur rengen liv̄o rengen nir.

⁴ Ko arwera tevi, "Jinibb nevisvisenien, nesevin le san ngel ololi nanu nga m̄isij kele tevi norman m̄inij san nga sete mivi ni diwen sen. Lelingenok ko namrevei ko ren.

⁵ Ko rengen nale nesereien nga Moses m̄ilai tevi kerr, evi nga vinel pimij le, partuwe pini. Ko nik kuwra erpese?"

⁶ Arwera erpel ngel nga bbong parrowrowe ni ko rengen, puloli nga nir parla norrorrmien rengen, ko parwer lokloksi ni ren. Ko Iesu ejjol vitan ko olul e bb̄os neveren rengen dan, ololi erpe sete murgen nanu nga marwera.

⁷ Ko nir arpelak arsusi rongorng malume tevi; mian ko ni otur rramos ko owrai tevir, "Isi rengen kami ngok poro nga sete ololi nanu nga m̄isij nabong san, ni ko pīla womue nev̄ot ko putwe wowomue nesevin ngok."

⁸ Ko ejjol luwi kele van ngatan, ko olul kele rengen dan.

⁹ Daron nga marunge, ko nir sisamis arrorrorrmi lululweni rer. Mian ko arrīetaw sisamis arivel, m̄itipatun rengen birtera ko evini ejpari nga vitu jer nen. Ko Iesu esan esapo jer vajin, ko nesevin otur malum rengen liven nga mutur ren.

¹⁰ Ko ni otur rramos kele, ko setemun elesi san, nesevin bbong esan. Ko owrai tevi, "Vinel, nibeni lartul nga marpitevim nga nir? Sete jinibb san piwer lokloksi nik?"

¹¹ Ko vinnen owra "Numal, san ejki." Ko Iesu owrai tevi, "Inu kele sete numa-wer lokloksi nik. Kupiel, ko sete kuploli lweni kele mun nololien."

Iesu evi moron ne iel ngatan

¹² Iesu owrai kele tevir, "Inu nuvi moron ne iel ngatan. Mer nga pivijuri inu, ni pila moron ne mauren. Sete orongwos pivel renge nemalik."

¹³ Ko Parasi nir arwerai tevi, "Nik komok-rij se nik lweni kobbong, ko niko nale som sete evi weretunen."

¹⁴ Iesu owra lweni tevir, "Erpok, poro nurij se inu lweni kobbong, ko nale suk evi weretunen, suri nurongwose lat nga mevel e vini ko lat nga bean e. Kami ma sete kamrongwose lat nga mevel e vini ko lat nga bean e."

¹⁵ Kami kamok-supsupe nanu erpe nga jinibb nir marok-supsupe. Ko inu ma sete nuspe suri lat nga puto suri re jinibb san.

¹⁶ Ko poro inu bospe suri lat nga puto suri re jinibb san, ko nospen suk evi weretunen, suri sete inu kis nusan, ko inu komru wor Tata suk ko nga mukoni inu, komru korti.

¹⁷ Aruli kele renge nale nesesreien se kerr nga nale se jinibb eru evi weretunen.

¹⁸ Inu nuvi san nga merij se inu lweni, ko Tata suk kele nga mukoni inu, ni ko erij se inu kele."

¹⁹ Ko nir arsusi lweni tevi ni, "Nibeni Tata som?" Ko ni owra lweni tevir, "Kami sete kamrongwose komru korti te; sete kamrongwose inu, ko sete kamrongwose Tata suk."

²⁰ Nale ngel nir Iesu owrair renge daron nga mivisviseni jinibb nir renge Naim On, renge lat nga marok-tuwe nevot rengen. Ko sete san ervei, suri mete nial sen setewor evini.

Sete kamrongwose kapini re lat nga bean e

²¹ Iesu owra lweni kele tevir, "Inu bea-ivel, ko kami kapa-pej inu, ko sete kaprongwos kaplesik; ko kapa-mij renge nololien se kami. Ko lat nga bean e, kami sete kamrongwose kapini rengen."

²² Meri Isrel nen nga marlelep nir arwera "Owra sev ko, muwra 'Sete kamrongwose kapini renge lat nga bean ngok e'? Rrek owra putor pini lweni ko, rrek!"

²³ Iesu owra lweni tevir, "Kami kamivi ne iel ngatan, ko inu nuvi ne mare. Kami kamivi ne iel ngatan, ko inu sete nuvi ne iel ngatan."

²⁴ Nuwrai tevi kami, kami kapmij renge nololien se kami nir, poro nga kami sete kaposuri nga inu nuvi mernen."

²⁵ Ko nir arwera tevi ni, arwera "Aro, nik kuvi isi?" Iesu owra lweni tevir, "Ko erpe nga nomok-werai tetajer tevi kami."

²⁶ Nanu elep nga kamsarr rer nga inu nurongwose bowrair ko bospe surir re kami, ko ejki wor. Ko San nga mukoni inu, ni evi weretunen, ko inu nomok-wera suri bbong nanu nga mornge jin nir iel ngatan."

²⁷ Ko nir sete arongwose nga ni ospe suri Tata sen tevir.

²⁸ Mian ko Iesu owrai tevir, "Daron nga kami kapa-susi Jinibb Mawos pia-an mare, ko ngok kaprongwose nga inu nuvi mernen. Ko niko inu sete nusan nomok-loli nanu san, ejki. Inu nomok-supe bbong nanu nga Tata suk ko mivisviseni inu."

²⁹ Ko Mer nga mukoni inu eptevi inu, sete elinglingi inu nusan, suri tetajer nomok-loli kobbong nanu nga mimrrenir."

³⁰ Jinibb elep nga marunge Iesu muwrai mirpel ko arosuri ni rengen.

Jinibb nga mivel sisarow ko demij maur

³¹ Iesu owrai tevi meri Isrel nir nga marosuri ni, owra "Poro kaplik tetajer malum ko pa renge nale suk, ko ngok kamivi jinibb suk weretunen ko."

³² Kaprongwose weretunen, ko weretunen pia-loli kami kapiel sisarow."

³³ Ko nir arwera lweni tevi ni, "Aro, kem ma namivi metka se Epram kobbong, ko setewor namivi demij maur se jinibb san nabong san. Ko suri sev nik kumwerai ngok, Kem nabel sisarow?"

³⁴ Ko Iesu owrai tevir "Nuwretun nga nuwretun nuwrai tevi kami, isi nga mok-loli nololien evi pa demij maur ne majingen se nololien ko."

³⁵ Demij maur sete orongwose pilik tuwi ngok vini renge naim, ko natu mer nga naim sen ko ma pilik tuwi ngok vini."

³⁶ Ko poro inu Atua Natun bololi kami kapiel sisarow, ngok kapa-ivel sisarow petpeti ko vajin."

³⁷ Nurongwose kami kamivi metka se Epram. Ko kamwera kaprevji pinik, suri nale suk milngen ejki renge nolo kami."

³⁸ Inu nomok-supe suri nanu nga mialesir ji Tata suk, ko kami ma kamok-loli sev nga kamlesir ji tata se kami."

³⁹ Ko nir arwerai tevi ni, "Po! Ko niko, Epram evi tata se kem!" Ko ni owrai tevir, "Poro kapweretun nga kamivi metka se Epram, ko ngok kaploli majingen nga marres nga Epram mok-lolir ko."

⁴⁰ Inu nga mowra weretunen tevi kami nga mornge ji Atua, ko lelingen ngel

kamwera kaprevji pinik suri. Ko Epram sete ololi erpok.

⁴¹ Kamok-loli nanu mawos nga tata se kami mok-lolir." Ko nir arwerai tevi, "Aro, kem ma sete namivi bipi ne sel te ejki! Atua ko evi tata se kem, kem namivi natun weretunen!"

⁴² Ko Iesu owrai tevir, "Poro nga Atua pivi Tata se kami weretunen, ko kapmerreni inu se, suri nuplari ji Atua ko nga mevini ngel. Inu sete nuvini suri inu bbong norrorrmien suk, ko ni ko wor okoni inu.

⁴³ Suri sev sete kamrongwose nanu nga mowrair? Erpok ko wor, suri sete kami kamrongwos rragrrage nale suk.

⁴⁴ Kami kamivi se tata se kami, Demij! Ko murrn nir nga narivi se tata se kami ko kamok-lolir. Ni erevji pini wowomu jinibb, ko eplak etajer tevi malume. Ko sete elik rengen weretunen, suri weretunen ejki rengen ni. Daron nga mīkrekris, ngok evijuri wor murrn nga ni ko, suri ni evi botgerisen, ko evi tata se botgerisen nir.

⁴⁵ Suri nuwra weretunen tevi kami, ko niko kami sete kamosuri inu.

⁴⁶ Isi rengen kami orongwos ma puwra tweni nga inu nuloli nololien san? Ejki! Inu ma nomok-wera weretunen tetajer, suri sev sete kamosuri inu?

⁴⁷ Mer nga mivi se Atua ornge nale se Atua. Ko niko kami sete kamrunge nale se Atua, evi suri kami sete kamivi se Atua."

Iesu ko Epram

⁴⁸ Meri Isrel nir arwera lweni tevi, arwera "Namweretun, namwera nik kuvi mēri Sameria, ko demij esisilvi niki!"

⁴⁹ Ko Iesu owra lweni tevir, "Inu sete demij esisilvik te. Inu nuosuri Tata suk, ko kami sete kamosuri inu.

⁵⁰ Inu sete nupej nosrōvien se inu lweni, ejki. Ko San ko ma niko ni ko pīa-lai nosrōvien tevi inu, ko pia-wer suri lat nga puto suri rengen kami.

⁵¹ Nuwretun nga nuwretun nuwrai tevi kami, poro jinibb pisan putori totoni nale suk, sete mia-lesi mijen nabong san."

⁵² Meri Isrel nen nir arwera lweni tevi ni, "A! Re iok vajin, nama-rongwose erres nga nik demij esisilvim. Epram emij pa, ko propet nir armij pa, ko nik kuwra poro san putori totoni nale som, ko mīnernen sete mia-lesi mijen!"

⁵³ Erpee? Nik kulep lingi wor tata se kem Epram nga mimij pa, ko propet nga marmij pa nir? Ko kuwra kupwera nik kuvi isi kele?"

⁵⁴ Ko Iesu owra lweni tevir, "Poro inu bosrosrōvi lweni inu, ko evi nanu nawon. Ko ejki, Tata suk ko osrosrōvi inu. Ni ko kamok-wera evi Atua se kami.

⁵⁵ Ko kami sete kamrongwose ni, inu ma nurongwose. Poro nga bowra sete nurongwose ni, ko bevi jinibb ne gerisen pirpe kami. Ko ejki, nurongwose ni, ko nutori totoni nale sen.

⁵⁶ Tata se kami Epram eir rengen nga mīlesi nabong suk, ko rengen daron nga mīlesi e, eir lengleng."

⁵⁷ Meri Isrel nen nir arwera lweni tevi ni, "Nik ngok setewor siam evi ngavōl elim (50) wor, ko kulesi Epram erpese?"

⁵⁸ Iesu owra lweni tevir, "Nuwretun nga nuwretun nuwrai tevi kami, inu ngel nulik womu ko pa osuw, mian ko Epram miaiak."

⁵⁹ Ko nir arevei nevōt arwera partuwe e. Ko Iesu otur tevi jinibb nir, ko evel rurrngi liven rer, ko esil ivare rengen Naim On, evini vare e evel.

9

Iesu ololi mēr nga meten murrorr oklu luwi

¹ Iesu otutur sapon ko elesi jinibb san nga mīiak ko meten murrorr ko pa.

² Ko jinibb sen nir arsusi tevi ni, arwera "Jinibb nevisvisenien, isi ko ololi nololien, ololi mīiak ko meten murrorr? ni, rreknga tata sen rreknga tasu sen?"

³ Iesu owra lweni tevir, "Ngok sete evi nololien se ni, rreknga tata sen ko tasu sen, ejki. Ngok evi nga puloli majingen se Atua piplari ko rengen.

⁴ Nata mīrin evi daron nga rraploli ko wor majingen se ni nga mukonik rengen. Daron nga nata pupong pivini, setemun san orongwos mun puloli majingen san rengen.

⁵ Erpe lelingen ngel, inu nulik iel ngatan, ko nuvi moron ne iel ngatan."

⁶ Daron nga muwrai mirpok, ko oltuv van rengen dan, ko ekiskisi nolton tevi dan, ko elai nolton nga mikiskisi tevi dan ngok ko ebbōlji rengen mete metrorr.

⁷ Ko owrai tevi, "Kupan kupwirap rengen nuwito ne Saeloam (nga marieni mirpel, Okoni). Ko mīnernen osri sel evan ewirap vaseni meten, ko oklu luwi erres; ko olwi van sisen e.

⁸ Ko selen nir ko jinibb nga marok-lesi pa ni nga meten murrorr arwera "Sete mēr nga mok-lik ngun-ngun nga le ngel?"

⁹ Nir sopor arwera "Ewretun, mēr nga le ngel". Ko nir sopor nen arwera, "Ejki, ko morok erpe pini pa ni ko." Ko ni owrai tevir, "Pe, inu nen le pa ngel!"

¹⁰ Ko nir arsusi tevi ni, "Ia, ko meten oklu luwi erpese ko?"

¹¹ Ko ni owrai tevir, "Jinibb san nga marveruse nisen Iesu ekiskisi dan, ko elai dan ngok, ebbōlji rengen metek nuru ko

owrai tevik, 'Kupan renge nuwito ne Silam ko kupwirap.' Ko mean mewirap ko nuklu luwi."

¹² Ko nir arsusi tevi ni, "Ko nibeni m̄nernen?" Ko ni owrai lweni tevir, "Iawo, sete nurongwose."

Parasi nir armeteni suri renge nanu nga Iesu muloli nen

¹³ Arpitevi m̄ner nga bonevis meten murrorr nen van ji Parasi nir.

¹⁴ Renge nabong nga Iesu mikiskisi dan ngok ko muloli metrrorr meten m̄nres luwi ngok e, evi nabong on.

¹⁵ Ko Parasi nir arsusi tevi ni, arwera "Ko nuklu luwi erpese?" Ko ni owrai tevir, "Ela dan, ebbōlji renge metek nuru, ko nuwirap, ko nuklu luwi erres."

¹⁶ Ko nir sopor renge Parasi arwera "Mernen sete evi jinibb se Atua ko, suri sete otori nabong on." Ko nir sopor nen kele arwera "Ko jinibb ne nololien san sete orongwos puloli nelesien nga mirpel san!" Ngok ololi nir nolor eru e.

¹⁷ Ko Parasi nir arsusi kele tevi metrrorr, arwera "Erpe nik, kumwerai ololi metem nuru orres. Ko nik kurrorrmi m̄nernen evi isi ko?"

Ko metrrorr owrai tevir, "Evi propet ko san."

¹⁸ Parasi nen nir sete arosuri nga m̄nerel evi metrrorr, ko oklu luwi kele. Artiriv wore parverus tata sen ko tasu sen porini.

¹⁹ Ko arsusi tevi nuru, "Merel evi natu kamru nga m̄niak ko meten murrorr? Ko oklu luwi erpese le?"

²⁰ Mernen tata sen nuru tasu sen orwera "Ewretun nga ni evi natu komru, ko ewretun nga m̄niak ko meten orrorr ko pa.

²¹ Ko erpese nga muklu luwi, komru sete nomor-rongwose te ejki. Ko sete nomor-rongwos kele m̄ner nga muloli meten morkulu luwi. Kapsusi tevi ni, puwrai ko tevi kami. Etra ko pa, evter puwra suri nanu nga miplari jin."

²² Tata sen nuru tasu sen orwera erpok suri ormetutue m̄neri Isrel nga marlelep nen nir. Suri arwera jile pa nga poro jinibb pisan puwra nga Iesu evi Mesaea, ko ngok puloli nir parla tweni m̄nernen renge naim gortien ser, pijkie rengen.

²³ Niko muloli nga tata sen ko tasu sen morwera "ni etra ko pa, sian evter kapsusi ni e."

²⁴ Ko arverus lweni kele m̄ner nga meten murrorr nga vini jir, ko arwera tevi, "Nik kupsurōvi Atua ko wor suri. Kem ma namrongwose m̄nerel evi jinibb ne nololien."

²⁵ Ko ni owrai lweni tevir, "Sete nurongwose te, m̄nernen pivi jinibb ne nololien, rreknga ejki. Nanu sansan kobbong

nurongwose, nga metek murrorr ko lelingen ngel nuklu luwi."

²⁶ Nir arsusi tevi ni, "Ololi erpese nik, ololi erpee ko ko metem morkulu?"

²⁷ Ko ni owrai tevir, "E, nuwrai jile pa tevi kami, ko kami sete kammurrarronge. Erpee? Kami kammerreni kaprunge kele? Kami kele kammerreni kapivi jinibb sen, rrek?"

²⁸ Ko nir arsowri ni, ko arwera tevi ni, "Nik kuvi jinibb sen, kem namivi jinibb se Moses!

²⁹ Kem namrongwose Atua erij tevi Moses. Ko morok, sete namrongwose evel ngabe ko vini!"

³⁰ Ko m̄ner nga owrai lweni tevir, "O, nanu nga rramtaole le, kami sete kamrongwose lat nga mivel e vini! Ko ni ololi metek orkulu luwi!"

³¹ Kerr rramrongwose, Atua sete orongwose pumurrarronge m̄ner nga muloli nololien, orongwos bbong m̄ner nga mutori ni ko, ko m̄ner nga muloli nanu nga ni mimrrenir, ni ko ma pumurrarronge.

³² Mitipatun renge daron nga Atua muloli iel ngatan e mijpari lelingen ngel, setewor arunge jinibb san ololi m̄ner nga m̄niak ko meten murrorr oklu luwi, ejki rres nawon.

³³ Poro m̄nerel sete pivi se Atua, ko sete orongwose rragrage puloli nanu pisan!"

³⁴ Nir arwera lweni tevi, "Aro, nik kuak renge nololien, ko kuloli nololien tetajer malum, ko kuwra kupvisviseni kem?" Ko arwirr tweni ni renge naim gortien ser.

Metrrorr renge norrorrmien

³⁵ Iesu ornge nga marwirr tweni m̄nernen renge naim gortien ser pa. Mian ko eskai ko owrai tevi, "Nik kuosuri Jinibb Mawos?"

³⁶ Ko ni owrai lweni tevi, "Numal, isi ko, nga poro inu bosuri renge ni?"

³⁷ Ko Iesu owrai lweni tevi, owra "Nik kulesi jile pa m̄nernen, m̄nernen evi m̄ner nga m̄nirij tevim lelingen ngel."

³⁸ Ko m̄ner nga owra "Numal, nuosuri!" Ko ejipa vitan ko olotoe.

³⁹ Iesu owra "Inu nuvini iel ngatan tweni nga bowra suri lat nga puto suri renge jinibb nga meten sete mukluklu, puklu luwi vajin, ko jinibb nga markulkulu parivi vajin metrrorr nir."

⁴⁰ Ko Parasi sopor artur tevi ie arunge nga ni muwra nale ngok nir mirpok, ko arwera tevi, "Aro, kem kele namirpok, mete kem orrorr?"

⁴¹ Iesu owrai tevir, "Poro piwretun mete kami purrorr, ko nololien se kami sete putoe. Ko suri kami kamwera kamkulkulu, ngok nololien se kami otoa ko."

10

Nale rrongrrongvien ne m̄er nga mimetmete sipsip

¹ Iesu owra “Nuwretun nga nuwretun nuwrai tevi kami, m̄er nga sete m̄ikali renge metali ne sipsip e ko m̄isa tela naworr, m̄ernen evi jinibb venao ko.

² Ko m̄er nga m̄ikali renge metali e, ni evi m̄er nga mok-metmete sipsip nir.

³ Ko m̄er nga mok-metmete metali ne sipsip etasi tevi, ko sipsip arongwose ni drrelan; ko ni orongwose piverus sisamis niser, ko owomue nir parivare.

⁴ Daron nga miptevi twenir ivare, owowomue nir; ko sipsip arvijuri ni, suri arongwose drrelan.

⁵ Sete arongwose parvijuri jinibb m̄inij; parwolue ko, suri sete arongwose drrelan.”

⁶ Iesu owra nale rrongrrongvien ngel tevi nir, ko sete arongwose isev ko muwrai tevir.

Iesu evi jinibb metmeten nga m̄irres p̄elak

⁷ Iesu owrai kele tevir owra “Nuwretun nga nuwretun nuwrai tevi kami, inu ngel nuvi metali ne sipsip.

⁸ Jinibb nga marwowomue inu arivi jinibb venao kobbong nir. Ko sipsip sete arunge drrelar.

⁹ Inu nuvi metali. Mer nga m̄ikali ji inu e, ni pia-asi van re mauren; ko pia-lik p̄irres, pirpe sipsip san nga sete nanu rrum san pulokloksi, ko nanen sen owun saut temijal.

¹⁰ Jinibb venao evini bbong nga pivevna ko, ko p̄irevji pini, ko pulokloksi p̄etp̄eti. Inu ma nuvini nga b̄elai mauren tevir nga parla p̄etp̄eti vajin.

¹¹ “Inu nuvi jinibb metmeten nga m̄irres. Jinibb metmeten nga m̄irres ela mauren sen tevi jinibb nir, emij surir.

¹² Mer nga marlingi bbong pimetmete sipsip nga parwuli rengen, daron nga m̄ilesi guli rrum mivini, ko elngi kurtweni sipsip nir ko owlu lingir. Ko guli rrum ean aji terteri sopor, ko ojir arwolu sarrsarr.

¹³ Mer nga mok-metmete sipsip nga marwuli bbong ren, ko muwlu lingir ngok; suri ni mivi bbong m̄er nga marwuli bbong ren, ko niko sete muwor surir.

¹⁴ Inu nuvi jinibb metmeten nga m̄irres renge sipsip nir. Ko nurongwose sipsip suk nir, ko nir arongwose inu.

¹⁵ Erpe Tata orongwose inu, ko inu kele nurongwose Tata. Ko numarong nga bemij suri sipsip suk nir.

¹⁶ “Sipsip m̄inij kele wor sopor nga marivi suk, nga sete marivi ne laut ngel, b̄elair vini rengen kele. Nir parunge

drrelak; parivi meling pisansan, ko jinibb metmeten ser pisansan.

¹⁷ Tata suk emrrenik suri numarong b̄elngilngi mauren suk, bemij sere jinibb nir. Ko mian ko bea-la lweni kele, bemaaur luwi.

¹⁸ Sete jinibb san orongwos p̄ila tweni mauren suk jik, putor pinik. Inu kobbong numarong bemij. Derteren suk otoe nga b̄elngilngi mauren

suk bemij, ko derteren suk otoe nga b̄ela lweni kele mauren suk, bemaaur luwi. Niko Tata suk owrai tevik nga bololi pirpok.”

¹⁹ Renge muwrai mirpok ngok, m̄eri Isrel nga marlelep nir norrorrmien ser eru e kele rengen.

²⁰ Nir elep arwera “Demij esisilvi ko epapa nawone! Erpese kami kammurrar-ronge?”

²¹ Ko nir m̄inij nen nir arwera “Sete m̄er nga demij m̄isisilvi ok-rij erpok, ejki. Demij orongwose puloli metrrorr san puklu luwi kele?”

Meri Isrel nga marlelep nir arungasi Iesu

²² Evi daron ne nanen san se m̄eri Isrel nir, nga marok-rorrm̄i lweni Naim On se Atua nga marloli muon luwi bonevis. Nanen ngel artori renge Jerusalem. Ko renge daron nen evi daron ne melas.

²³ Iesu otutur sopon renge naim san nga mutur re jeli Naim On, nga marveruse Naim Salsal se Solomon.

²⁴ Ko m̄eri Isrel nga marlelep nir arini jin, artur rrake ko arwera tevi, “Pijpari seveling nga nik kopok-loli kem nabok-tiriv pirpel? Namtrivtiriv ko ejki rres nawon. Poro nga nik kuvi Mesaea, kupwera momsa wose tevi kem vajin!”

²⁵ Ko Iesu owra lweni tevir, “Nuwrai pa tevi kami, ko sete kamosuri te. Ko majingen nga mololir renge nise Tata suk arij se inu.

²⁶ Ko kami sete kamosuri, suri nga sete kamivi sipsip suk, erpe nga mowrai pa tevi kami.

²⁷ Sipsip suk nir arunge drrelak; ko inu nurongwose nir, ko nir arvijurik.

²⁸ Inu nula mauren nga muto tuwi ngok vini tevir, nga nir setemun parmij kele nabong pisan. Ko sete san orongwose p̄iteseni twenir renge inu nevrek.

²⁹ Tata suk nga mlair tevik, ni eterter asie jinibb p̄etp̄eti nir, ko sete san orongwos p̄iteseni twenir renge ni nevren.

³⁰ Ko Tata suk ko inu nomorivi sansan kobbong.”

³¹ Meri Isrel nen nir arla kele nevot arwera partuwe pini ni kele.

³² Ko Iesu owrai tevir, “Nuloli majingen elep nga marres tevi kami nga Tata suk

m̄ilair tevik nga bololir. Ko renge majingen ngabe nen ko nga kami kamwera kaptuwek rengen?"

³³ Ko m̄eri Isrel nir arwera lweni tevi, "Renge majingen nga m̄irres sete namrongwos nabtuwem suri, ko suri kuwer lokloksi Atua ko. Suri nik kuvi bbong jinibb, ko kumtur imare ko kumloli lweni nik lweni kumsorsan tevi Atua!"

³⁴ Ko Iesu owra lweni tevir, "Sete aruli renge Naul On owra 'Kami kamirpe Atua'?"

³⁵ Kerr rramrongwos nanu nga Naul On muli surir, ewretun tetajer ko pa tuwi ngok vini. Ngok niko nir ngel nga Atua m̄ila nale sen van jir, Atua everuse nir 'Atua'.

³⁶ Ko inu ma nulep asi nir ngok ko. Ko Tata osusture inu, ko okonik vini iel ngatan. Ko erpese kami kamwera inu nuwer lokloksi Atua suri nga mowra inu nuvi Atua Natun?

³⁷ Poro sete nomok-loli majingen se Tata suk nir, ko erres kobbong, sete kaposuri inu.

³⁸ Ko poro bololir wor, ko pesveni poro sete kaposuri inu suri nale suk, ko kaposuri ma inu suri majingen suk nir, nga puloli kami kaprongwose. Ko kaplesi wose nga Tata suk elik renge inu, ko inu nulik renge Tata suk."

³⁹ Vesan kele arloli lesi kele nga parrul totoni; ko evel easi renge nevrer, evel lingir.

⁴⁰ Evel luwi kele van renge devje nuwi seser ne Jortan e, renge lat nga Jon Baptaes mipaptaes womue ni rengen, ko elik ie.

⁴¹ Jinibb elep arini jin, ko arwera "Ewretun, Jon Baptaes sete ololi nelesien te ejki, ko nanu jile nga ma Jon Baptaes muspe surir renge m̄erel arweretun."

⁴² Ko jinibb elep lengleng arosuri ni renge ie.

11

Mijen se Lasros

¹ Meri Betani san, nisen Lasros, emsi. Betani evi ngaim se Merri ko tuwan Marta.

² Merri ngel evi vin nga vitunen ko mia-jivi senta nga mapun m̄irres renge ßela Iesu ko mia-tewasi jomro batun e. Vinel ko tuwan Lasros mimsi nen.

³ Ngok nesen niaken ngel ko nuru orla nale ngel van ji Iesu, "Numal, selem nga kumrreni milep emsi."

⁴ Daron nga Iesu murnge e ko owra "Mesien se Lasros ngok sete evi ne mijen, ko evi ma nosrövien se Atua, nga puloli parsurövi inu Atua natun mawos rengen."

⁵ Iesu emrreni lengleng Marta ko tasin Merri ko Lasros.

⁶ Ko daron nga murnge nga Lasros mimsi, ko elik malum lat nen nga m̄ilik nen e nabong eru kele wor orasi.

⁷ Vitunen renge ngel ko owrai tevi jinibb sen nir "Kerr pulwi kele van renge Jutia e."

⁸ Ko jinibb sen arwerai tevi, "Ai, jinibb nevisvisenien, seveling nga kobbong m̄eri Isrel nir nga marlik Jutia arwera partuwem, ko erpese kuwra kupan kele ie ko?"

⁹ Iesu owra "Erpese, sete mete nial esngavöl drromon eru renge nabong san? Ko poro jinibb pisan pivel renge nata m̄irin, sete orongwos p̄ijilaklak, suri elesi moron ne iel ngatan.

¹⁰ Ko poro pivel renge nemalik, ko ngok p̄ijilaklak ko, suri moron ejki ji ni."

¹¹ Iesu owra nanu ngel nir, mian ko vitunen owra "Sele kerr Lasros ematur, ko inu bean bowni

tweni pimra renge meturen sen."

¹² Ngok jinibb sen nir arwerai tevi, "Numal, poro pimatur ko p̄irres luwi kobbong."

¹³ Nga m̄irij mirpok, ko Iesu ospe mijen se Lasros; ko nir arrorrm̄i rrenga owra emitmatur rres kobbong, omosi.

¹⁴ Ko Iesu owra momsawos vajine limjer tevir, "Lasros emij pa.

¹⁵ Ko inu nuir nga sete m̄elik tevi ni ie, suri kaplesi vajin nanu nga p̄irres san renge kami, nga puloli kami kaposuri. Kerr pian lat nga marlingi e."

¹⁶ Ko Tomas nga marveruse n̄elew owrai tevi jinibb se Iesu nga ngok nen e nir, "Pesveni, kerr kele rrapvijuri ma, rrapan rrapmij rrapvesane ko pa tevi."

Iesu evi batu meraien ko batu mauren

¹⁷ Daron nga Iesu mian vajin, ko elesi nga artevni Lasros nabong ivij pa arasi osuw.

¹⁸ Betani oto mori bbong Jerusalem sopen, erpe pirpe kilometa itul bbong sopen,

¹⁹ ko niko m̄eri Isrel elep arini ji Marta ko Merri nga parla nale molmol tevi nuru suri renge mijen se tuwa nuru.

²⁰ Daron nga Marta murnge nga marwera nga Iesu mivini, ko evel ore renge sel. Ko Merri elik jer renge naim.

²¹ Marta owrai tevi Iesu, "Numal, poro ma kuplik bbong iel, ko tuwa komru sete mia-mij welili, pijki ko.

²² Ko nurongwos mae lelingen ngel, poro kupngoni isev tama san tevi Atua, ko Atua p̄ilai ko wor tevi nik."

²³ Ko Iesu owrai tevi, "Tuwam pimaaur luwi kele kobbong."

²⁴ Ko Marta owrai tevi, "Nurongwose nga pia-maur luwi kele renge nabong nga vitunen nga Atua puloli jinibb nir parmaur luwi."

²⁵ Ko Iesu owrai tevi nesevin, “Inu nuvi batun ne mauren. Mer nga muosuri inu, poro pimij, ko pia-maur luwi kele ko wor.

²⁶ Ko isi nga mimaar ko muosuri inu, sete orongwos pimij rragrrag pijpari tuwi ngok vini. Kuosuri renge iok?”

²⁷ Nesevin owra lweni tevi, “O-o, Numal, nuosuri nga nik kuvi Mesaea, Atua natun mawos, ni nga propet nga tuwi nir arok-wera pia-vini renge iel ngatan.”

Iesu eting

²⁸ Daron nga vinnen muwrai jile mirpel ngel, ko evel evan everus silveni bbong tasin Merri, ko owrai tevi, “Jinibb nevisvisenien le ngel osusi nik.”

²⁹ Daron nga Merri murunge, ko emra ngavilvil evan ji Iesu.

³⁰ Iesu setewor evini renge ngaim, ejki wor. Elik malum renge lat nga Marta mian jin ren.

³¹ Meri Isrel nir nga marla nale molmol tevi Merri renge naim marlesi nga Merri mimra kasi mivel, ko arvijuri suri. Ar-rorrmri rreknga nesevin pian renge dubb, piting ie.

³² Merri evini renge lat nen nga Iesu mīlik e. Ko elesi ko ejipa van ngatan osusweni non renge βela Iesu, ko owrai tevi, “Wurru, Numal, poro kuplik iel, ko tuwak sete mia-mij ko te ejki.”

³³ Daron nga Iesu mīlesi nesevin mīting, ko mēri Isrel nir nga marpivevi nesevin marting, ko engavsi, ornge lengenge esij renge nolon, erpe piap nawone.

³⁴ Ko osusi tevir, “Nibeni lat nga kamteveni e?” Ko arwerai tevi, “Kupini ta numal, kuplesi.”

³⁵ Iesu eting.

³⁶ Meri Isrel arwera “Ai, emrreni lengenge ma morok.”

³⁷ Ko nir sopor nen arwera “Ai, mērel ololi metrroor meter markulu bonevis. Erpese sete orongwos puloli morok kele sete pimij?”

Lasros emaur luwi

³⁸ Vesan kele Iesu engavsi, ornge lengeng esij. Ko evan renge dubb. Evi βereng, ko aritini nevōt nga milep oto ore metali nen.

³⁹ Iesu owra “Kaḡitini tweni nevōt.” Ko Marta, joi mēn nga mimij nen, owra lweni tevi “O, ejki, Numal, lelingen ngel opo le pa, suri bongin ivij le pa osuw!”

⁴⁰ Ko Iesu owrai tevi nesevin, “Sete nuwrai tevim nga poro kuposuri ko kupa-lesi nosrōvien se Atua?”

⁴¹ Ko nir aritini tweni nevōt nen. Ko Iesu eleng raji meten oklu imare, ko owra “Tata, nuwra erres tevi nik nga komok-runge inu.

⁴² Nurongwose nga nik kurnge inu tetajer, ko nuwra nanu ngel suri lartul nga martur ngel nir, nga puloli parosuri inu nga nik kumkoni inu.”

⁴³ Muwrai jile mirpel, ko everus temijpal van mare, owra “Lasros, kupivare!”

⁴⁴ Ko mēnen nga mimij pa eivare vini. Ko nevren nuru ko βelan nuru, kalek ne mijen nga marnuβe e arto malum rer; ko sunsun nga markai renge non arto malum rengen. Ko Iesu owra “Kaptelasi twenir ren.”

Jinibb nga marlelep renge mēri Isrel arloli nale ne nga parevji Iesu

⁴⁵ Meri Isrel elep nga marini marlesi Merri arlesi sev nga Iesu muloli, ko arosuri ni.

⁴⁶ Ko nir sapon nen nir arluwi ko aran ji Parasi nir ko arsuḡe suri nanu nga Iesu mulolir tevir.

⁴⁷ Ko Parasi nir ko batu jinibb ne sulsulen nir arkorti tevi gortien nga milep se mēri Isrel nir ko arwera “Kerr puloli pirpese? Merel ololi nelesien nga marlelep nir.

⁴⁸ Poro rraplinglingi puloli sel ngok, ko jinibb jikle nir tarosuri ni; ko mēri Rom nir nga marrul totoni kerr tarlesi tisij ko tartingtinge Naim On se kerr, ko tarlokloksi jinibb se kerr jikle nir.”

⁴⁹ San renge nir nisen Kaeapas; ni evi batu jinibb ne sulsulen nir renge sia nen. Owra “Kami sete kamrongwos rragrrage nanu san.

⁵⁰ Sete kamrongwose nga evi nanu nga mīrres nga jinibb pisansan pimij suri delung, pia-la wani jinibb jikle nir nga moro parmij?”

⁵¹ Errlengge sev nga muwrai ngok, ko erij wor nale se Atua, suri evi batu jinibb ne sulsulen ko renge sia nen: ni owra tweni nga Iesu pimij suri mēri Isrel nir.

⁵² Ko sete nir kis kobbong, ko pia-la lweni kele wor jinibb jikle se Atua nga marivel sarsarr nir.

⁵³ Renge nabong nen mēri Isrel nga martori derteren renge nir arloli nale nga parevji pini Iesu rengen.

⁵⁴ Ololi Iesu setemun evel limjer renge Jutia, evel lingi ie ko evan renge ngaim nga welili e san nga nisen Epem, morie lolo merwer. Ko elik tevi jinibb sen nir ie.

Otomori daron ne nanen ne asien

⁵⁵ Nanen ne asien se mēri Isrel nir oto mori. Ko jinibb elep arivel aran renge Jerusalem, arwera partaur parwokwok jile tera daron ne nanen ne asien.

⁵⁶ Ko daron nga marini renge Jerusalem, ko arkulkulu pej Iesu ko arwerwera lululwenir e, “Kamrroorrmri erpese? Pivini

ko reнге nanen ne asien, rreknga sete orongwos pivini?"

⁵⁷ Batu jinibb ne sulsulen nir ko Parasi nir arwerai pa tevi jinibb nir arwera poro san ñilesi Iesu lat nga mñilik e, ko puwrai tevir parongwose, ko paran parevei.

12

Iesu everus reнге Betani

¹ Nanen ne asien nabong ouwon ojpon malum, ko Iesu olwi kele vini reнге Betani e reнге lat nga Lasros, nga ni muloli mimaur luwi kele reнге mijen, lat nga mñilik e.

² Renge ie artabbu nurre Iesu. Marta etabbu, ko Lasros evi san reнге nir nga maraan tevi Iesu.

³ Mian ko Merri ela botel nga milep san ne senta nga mapun mñirres ðelak nga nowlin milep temijpal nga marloli e nart, ko ejvi ðetþeti reнге ðela Iesu nuru, ko etwasi e jomro batun. Ko loloim owun saute mapu senta nen.

⁴ Jutas ne Iskariot, nga mian ko vitunen pia-tekai kerasi Iesu, owra

⁵ "Erpese kumlokloksi senta nga mapun mñirres ngok? Poro kupwulwule ko nevöt nen pivi pungut pivatul (300) kis ko, ko orongwos rraplai tevi ðeres nir."

⁶ Owrai erpel sete suri orrorrmi ðeres ko nir, ko suri evi jinibb ne venao. Ko ni oksolo narr ser, ko ok-sesaroe nevöt nga muto reнге nolon.

⁷ Ko Iesu owrai tevi "Kuplinglingi ne-sevin pisan, kuplinglingi puloli metmete tera nga partevnik.

⁸ Beres ngok nir parlík tetajer ko pa tevi kami, ko inu ma sete numa-lik tetajer tevi kami."

Jinibb nga marlelep reнге mñeri Isrel nir arloli nale nga parevji pini Lasros

⁹ Delung jinibb nga milep ne mñeri Isrel nir arunge nga Iesu elik reнге Betani, ko artutur van, sete suri kis Iesu, ko suri kele wor Lasros nga Iesu muloli mimaur luwi reнге mijen.

¹⁰ Ko niko batu jinibb ne sulsulen nir arloli nale ne Lasros nga parevji pini kele.

¹¹ Suri nga mñeri Isrel elep arlesi nga Iesu muloli Lasros mimaur luwi, ko arlingi kurtweni mñerwomu ser nir, ko arosuri Iesu vajin.

Iesu evan reнге Jerusalem ko jinibb arsurövi ni

¹² Renge nabong mñinj nen vajin meling jinibb nga milep nga marini reнге nanen ne asien arunge nga Iesu mivel vini pivini reнге Jerusalem.

¹³ Ko arvasi rengine nini nir ko arivel aran artur ore, ko arkail arwera "Rrapsturövi Atua! Atua ðirij ðirres suri ni nga mivini reнге nise Iova, Numal se mñeri Isrel nir!"

¹⁴ Ko Iesu elesi natu dongki san ko esakel ren, erpe nga maruli reнге Naul On:

¹⁵ "Kami jinibb ne Saeon nir, sete kapmetutu. Kaplesi Numal se kami evini, esakel reнге natu dongki."

¹⁶ Jinibb sen nir sete arongwos wowomue nanu ngel nir; mian ko vitunen vajin daron nga Iesu mutur imare luwi reнге mijen mian reнге melre mñila nosrövien sen, ko ngok ararorrmi sveri vajine nga aruli nanu ngel nir suri ni reнге Naul On, nga jinibb nir parloli nanu ngel nir tevi ni.

¹⁷ Lartul nga marpitevi ni reнге daron nga miverus ko muloli Lasros mutur imare luwi reнге mijen reнге dubb arij suri nanu nga Iesu muloli miplari nen.

¹⁸ Nanu ngok ko muloli delung elep kele wor aran jin rengen, suri nga marunge nelesien nen nga muloli.

¹⁹ Ko Parasi nir arwerwera lululweni tevir, "Kaplesi, setemun rramrongwos rraploli mun nanu pisan, suri jinibb jijle arvijuri pa ni."

Meri Gris sopor arpej Iesu

²⁰ Jinibb nga maran reнге nanen ne asien reнге Jerusalem, reнге livö rer, mñeri Gris sopor aran kele nga parlot.

²¹ Lartul nen arini ji Pilip, mñeri Betsaeta ne Galili, ko arwerai tevi "E mñerel, nammerreni nablesi Iesu."

²² Pilip ean owrai tevi Antru, ko Antru nuru vajin Pilip oran orwerai tevi Iesu.

²³ Ko Iesu owra lweni tevir, "Lelingen ngel mete nial nen mawos evini nga parsurövi inu Jinibb Mawos.

²⁴ Nuwretun nga nuwretun nuwrai tevi kami, Poro wene nai sete pukur pivitan ngatan reнге dan, ko ngok esansan bbölbööl malum. Ko poro pukur ko wor, pivitan ngatan reнге dan, pietiv ko pimaur kele, ko ngok ko pia-la wenen pilep ko vajin.

²⁵ Mer nga mimrreni mauren sen iel ngatan putor jabble; ko mñer nga ma sete mimrreni mauren sen iel ngatan, pia-tori tajere van reнге mauren nga muto tuwi ngok vini.

²⁶ Poro jinibb san pimrreni ðimajing suk, ko pivijuri surik ko wor. Ngabe nga ðelik e, jinibb suk kele ðilik tevik ie. Ko poro nga jinibb san ðimajing suk, Tata suk pia-susi van mare."

Iesu owra suri mijen sen

²⁷ Iesu owra "Lelingen ngel nolok ornge esij temijpal, ko bowra pirpese? Bowra, "Tata, kupa twenik reнге mijen ngel?"

Ejki, sete nurongwos bowra pipok, suri nanu mawos ngel ko mevini tweni renge iel ngatan.

²⁸ Ko bowra ma 'Tata, kuploli isev tama san nga pususi nik nistem van mare.' " Ko drrelan san evel renge melrin vini owra "Nususi pa evan mare osuw, ko bosusi kele wor pian mare pivesan."

²⁹ Delung nga martur ie marunge ko arwera "Belver ko san", ko nir sopor nen arwera "Ejki, anglo ko san erij tevi."

³⁰ Ko Iesu owra lweni tevi delung nga martur ie, "Drrelan ngel sete evini suri inu, ko evini suri kami kaprunge.

³¹ Lelengen ngel evi daron nga Atua puwra suri lat nga puto suri tevi jinibb nir, ko pusor tweni demij, numal ne iel ngatan.

³² Ko inu daron nga parsusik imare ko bervei jinibb jikle parini jik."

³³ Owra nale ngel, eviseni sev mijen nga ni pimij rengen.

³⁴ Delung arwera lweni tevi, "Kem namrunge renge nale nesereien, owra Mesaea pilik tuwi ngok vini. Ko nik kuwra erpese ko nga kumwerai mirpok ngok, 'Parsusi wor jinibb mawos ko mare'? Ko isi ko jinibb mawos ngok?"

³⁵ Ko Iesu owrai tevir, "Moron ngel pipatevi kami beblen kele ma, ko sete mia-periv te. Daron nga moron ngel mimor e, ko kapiel ko wor rengen, nemalik tia-malik tevtveni kami. Suri ni nga mivrel renge nemalik erlleng lat nga pian e.

³⁶ Daron nga moron mipatevi kami, ko ngok kaposuri moron, nga puloli kami kapivi jinibb ne moron." Iesu owra jile nanu ngel nir ko evel teptepe nir, sete parlesi.

³⁷ Ewretun ni ololi nelesien elep temijpal renge nor arlesi, ko sete arosuri ni te, ejki.

³⁸ Osorsan tevi nale nga propet Aesea muwrai tuwi, owra 'Numal, isi osuri nanu nga namwerair, isi elesi wose derteren som nga kumviseni?'

³⁹ Erpe nga ngok ko, sete arongwos parosuri. Suri Aesea owrai kele vesan, owra

⁴⁰ 'Lartul ngok nir batur eterter erpe nevöt. Ko niko Atua ololi meter arorr, ko ololi nolor arterter. Suri arwera "Ai, rratlesi renge mete kerr! Rratrongwose renge norormien se kerr! Rratrieni lweni kerr vini jin vajin ko ni tuloli kerr rrata-maur luwi!"

⁴¹ Aesea owrai nanu ngel nir, suri elesi nosrövien se Iesu, ko niko muspe suri ni.

⁴² Ko ewretun, meri Isrel elep arosuri Iesu, ko nir elep nga marlelep rer arosuri kele. Ko suri armetutu Parasi nir, ko sete arwerai tweni ni te ejki. Suri armetutu tarwirr twenir renge naim gortien ser.

⁴³ Suri armerreni nga jinibb parsuröviri easi renge nga Atua pusröviri.

Iesu evi mauren ne iel ngatan

⁴⁴ Iesu ekail ko owra tweni "Mer nga muosuri inu, sete osuri inu kis ko, ko osuri mer nga mukonik bele.

⁴⁵ Jinibb si nga mülesi inu, ngok elesi pa mer nga mukoni inu ko osuw.

⁴⁶ Inu nuvi moron ne iel ngatan. Mer nga muosuri inu sete orongwos pilik renge nemalik.

⁴⁷ Poro jinibb pisan purnge nale suk, ko sete puosuri te, inu sete numa-wera suri lat nga puto suri re meren. Suri sete nuvini tweni bololi pipok iel ngatan, nuvini tweni nga bela mauren tevi jinibb nir.

⁴⁸ Isi nga mungasi inu, ko sete muosuri nale suk nga mowrai, san nga pia-wera suri lat nga puto suri re meren otee.

"Nale suk nga mowrai niko pia-wera suri lat nga puto suri re meren renge nabong nga vitunen.

⁴⁹ Inu sete nuwra nawon nanu san. Tata suk nga mukonik ko wor owrai tevik nale nesereien sev nga inu bea-werair ko bospe surir.

⁵⁰ Ko nurongwose nale nesereien sen evi mauren nga muto tuwi ngok vini. Ko niko nale suk nga mowrai, nuwrai osorsan tevi nga Tata suk muwrai tevi inu."

13

Iesu errawe bela jinibb sen nir

¹ Evi nabong nga muwomu nen, mian ko mevinen vajin pivi nabong ne nanen ne asien. Ko Iesu orongwose nga mete nial sen evini nga pivel lingi iel ngatan, pulwi van ji Tata sen e. Ni tetajer emrreni jinibb nga marivi sen renge iel ngatan, ko emrrenir ejpari bongsin jer.

² Iesu eptevi jinibb sen nir renge nanen. Ko Demij elngi womu pae renge nolo Jutas, Saemon ne Iskariot natun, nga ni pitkai kerasi Iesu.

³ Iesu orongwose nga Tata ela nanu petpeti nir elngir renge nevren, ko ni orongwose nga ni evel ji Atua vini, ko pulwi kele ko wor van ji Atua e.

⁴ Ko ni emra renge nanen, ko ori tweni sunsun sen ejingteni oto, ko ela tawol, etatuwe renge bin.

⁵ Ko ela nuwi ejvi van renge narov, ko etipatun errawe bela jinibb sen nir, ko ela tawol nga mitatuwe ko etwasir e.

⁶ Mian ko evini vajin ji Saemon Pita. Ko Pita owrai tevi "Numal, sete omomsawos nga nik kuprawe inu belak!"

⁷ Iesu owra lweni tevi, “Sev nga mololi sete kuma-rongwose lelingen ngel, vitunen ko wor ko kupa-rongwose.”

⁸ Pita owra lweni tevi “Ejki rres nawon! Sete kuma-rrawe ßelak nabong san.” Iesu owrai tevi “Poro sete ßerrawe ßelam, ko nik sete kuma-ivi jinibb suk.”

⁹ Ko Saemon Pita otur imare owrai tevi, “O, Numal, poro pipok ko sete ßelak kis nuru, ko nevrek nuru ko batuk kele!”

¹⁰ Iesu owrai tevi “Ejki, m̄er nga m̄ilalos jile lelingen ngel sete orongwos pulwi p̄ilalos luwi kele, ßelan kis kobbong nuru; ko ni owokwok p̄et̄peti ko pa. Kami kamwokwok; ko sete kami jile kamwokwok.”

¹¹ Suri orongwos womue pa nga isi pia-tekai kerasi ni, ko niko muloli nga mutuw nale ngok, “sete kami jille kamwokwok”.

¹² Vitunen jile m̄irrawe jile ßelar, ko ela lweni sunsun sen ko ori lweni, musuw ko esakel luwi reнге milngen. Ko owrai tevir, “Kamrongwose sev nga mololi tevi kami?”

¹³ Kami kamveruse inu Jinibb Nevisvisenien ko Numal. Kami kamwerai mom-sawose inu ko,

¹⁴ inu nuvi Numal ko jinibb nevisvisenien se kami. Ko ngok, kami kele kaploli nolo kami pian ngatan, ko kaploli pipok, kaprrarawe ßela kami lululweni nir.

¹⁵ Inu nuwoli rrongrongvi tevi kami ko lat nga kaploli suri e. Niko, kami kaploli pirpe nga mololi tevi kami ngok ko.

¹⁶ Nuwretun nga nuwretun nuwrai tevi kami, jinibb ne majingen sete ean mare lingi numal sen, ko erpok kele jinibb nga markoni sete ean mare lingi ni nga mukoni.

¹⁷ Poro kaprongwose nanu ngel, ko neiren reнге kami poro kaploli.

¹⁸ “Sete nuwra kami jille ngok ko. Nurongwose nir nga motobbobbuer. Ko Naul On pivini piplari weretunen ko wor, nga muwra ‘Mer nga murro nanen nurruk p̄irieni ko p̄itre kele inu.’

¹⁹ Nuwra wowomue le ngel tevi kami, vitunen ko pia-pelari; ko poro pia-pelari, ko kami kapa-osuri vajin nga inu nuvi m̄ernen.

²⁰ Nuwretun nga nuwretun nuwrai tevi kami, isi nga m̄itkai nir san reнге nir nga mokoni ngel van re naim sen, ngok etka kele pa inu ko. Ko isi nga m̄itkai inu, ngok etkai kele pa ni nga mukoni inu ko.”

Iesu os̄pe suri m̄ijen sen

²¹ Daron nga Iesu muwra nanu ngel e ko ornge lengenge esij ko owrai tevir, “Nuwretun nga nuwretun nuwrai tevi kami, san reнге kami pia-tekai kerasi inu.”

²² Jinibb sen nir armetmetenir e, arrelenge owra nir si nen ko.

²³ San reнге jinibb sen, ni nga Iesu mimrreni, elik mori bbong Iesu, elik lilji.

²⁴ Ko Saemon Pita olongwis bbong tevi, owra “Kupsusi ta tevi ni, isi ko muwrai ngok.”

²⁵ Ngok m̄ernen oruj mori van jin ko osusi tevi, owra “Numal, isi ko m̄ernen?”

²⁶ Ko Iesu owrai tevi, “Mer nga bearrurrgoni niv ko bea-lai tevi. Ni ko evi m̄ernen.” Ko ela bebjie ko orrurrgoni reнге sup ko elai vajin tevi Jutas, Saemon ne Iskariot natun.

²⁷ Daron nga Jutas moka-la niv e, ko Demij kele esilvi vajin. Ko Iesu owrai tevi “Sev nga kumwera kuploli ngok, kuploli pingavil.”

²⁸ Nir nga marlik reнге nanen, nir san sete orongwose rragrag suri sev nga Iesu muwrai mirpel tevi.

²⁹ Arrorrm̄i rreknga suri nga Jutas moka narri ne nev̄ot, ko niko Iesu muwrai tevi pian puwli sev nga marmerreni reнге nanen, rreknga pian p̄ila nev̄ot tevi ßeres nir.

³⁰ Ko Jutas ela jile niv ko esil ivare evel. Natopong ko pa osuw.

³¹ Jutas ean pa vare ko osuw, ko Iesu owra “Lelingen ngel evi daron nga par-sur̄ovi inu Jinibb Mawos, ko reнге inu bosr̄ovi Atua.

³² Poro nosr̄övien se Atua piplari reнге inu, ko Atua kele puloli nosr̄övien se inu kele piplari luwi kele ji inu, ko puloli pipok pivesane.

³³ Nanwarreng suk nir, sete numa-lik tevi kami mia-periv mun. Sete pipriv mun mian ko kapa-pej inu; ko erpe mowrai pa tevi m̄erwomu se kerr m̄eri Isrel nir, ko lelingen ngel nuwrai le vajin tevi kami: Lat nga bean e kami sete kamrongwos kapini reнге.

³⁴ Lelingen ngel ßela nale neseseiren nga mimerr̄ tevi kami, ngel: Kami kapmer-rmerreni kami. Pirpe nga inu memrreni kami, kami kele kaploli pipok, kapmer-rmerreni kami.

³⁵ Poro kami kapmermerreni kami, ko ngok jinibb jille parongwose ko nga kami kamivi jinibb suk nir.”

³⁶ Saemon Pita osusi tevi ni, “Kupan ngabe ko Numal?”

Iesu owra lweni tevi ni, “Lat nga bean e, lelingen ngel setete kurongwose kupvijurik reнге; ko kupa-vijurik vitunen vajin.”

³⁷ Pita owrai tevi, “Numal, suri sev setete nurongwos bevijurim lelingen ngel? Numarong lweni inu nga bemij surim.”

³⁸ Iesu owra lweni tevi, owra "Ia, nik kuwretun ko wor, nik kumarong nga kupmij surik? Inu bowra weretunen vajin tevim. Nato setewor pukokrout ko wor ko nik kupvilvil orek pivatul, kupwera sete kurongwose inu."

14

Iesu evi sel nga pian ji Tata

¹ Ko Iesu owrai tevir, "Sete kaploli nolo kami parkarkar; kaposuri Atua ko inu kele.

² Renge naim se Tata, loloim nen nga markel ototi rengen owun saut. Poro sete pipok, sete numa-werai le ngel tevi kami: Bean bololi lilane lat nga kami.

³ Bean bololi lilane jile pusuw, ko bolwi kele vini betkai kami, kaplik tevik renge lat nga melik e.

⁴ Ko kami kamrongwose sel nen nga bean e."

⁵ Tomas owrai tevi "Numal, sete namrongwose te lat nga kupan e, kem nabrongwose sel nen pipese?"

⁶ Ko Iesu owrai lweni tevi, "Inu nuvi batu sel, ko nuvi batu weretunen, ko nuvi batu mauren. Sete san orongwos piasa nawon van ji Tata ejki, pikali wor ji inu e ko.

⁷ Poro kaprongwose inu, ko kaprongwose kele Tata suk. Kamlesi pa ni osuw, ko lelingenok kamrongwose ni."

⁸ Pilip owrai tevi owra "Numal, kupviseni ta Tata som tevi kem, nga puloli kem nabrongwos alje vajin."

⁹ Iesu owrai tevi, "E, nuptevi kami bonevis le wor, ko ejki malum wor, kurrleng malume inu Pilip? Mer nga mulesi inu, ngok elesi pa Tata suk ko, ko suri sev nga kumwera "Kupviseni ta Tata som tevi kem?"

¹⁰ Sete kuosuri nga inu renge Tata suk ko Tata suk renge inu? Nale nga mowrair tevi kami, sete nuwrrair renge derteren suk. Tata suk ko wor nga melik renge inu ololi majingen sen nir.

¹¹ Kaposuri inu nga inu renge Tata suk ko Tata suk renge inu. Ko poro kaplesi pitertter nga kaposuri iok, ko kaprrormi majingen nga mololir, ko kapa-osuri ko vajin.

¹² Nuwretun nga nuwretun nuwrai tevi kami, mer nga muosuri inu pia-loli majingen nga mololir, ko pia-loli nga wor marlelep nen jerjer, suri inu bolwi van ji Tata suk e.

¹³ Poro kapngoni isev san renge inu nisek, ko bea-loli ko, nga puloli nosrovien se Tata suk pia-viseni rrrunggi renge Natun.

¹⁴ Nanu jikle ngok nir, poro kapngoni renge inu nisek, ko ngok bea-lolir ko."

Rijrijen ne Nem̄in On

¹⁵ "Poro kapmerreni inu, ko kaptori lilane nale neseseien suk nir.

¹⁶ Ko inu bea-ngoni tevi Tata nga ni pia-koni Nem̄in On vajin vini nga pok-wilwil se kami, ko pia-tekai kami tuwi ngok vini.

¹⁷ Ni evi Nem̄in ne weretunen, ko sete jinibb ne iel ngatan arongwos parlai ni, suri sete arlesi ko sete arlesi wos kele e. Ko kami ma kamrongwose ni, suri elik livō renge kami, ko pilik renge kami tetajer.

¹⁸ Setete belinglingi kami kapsan te ejki, bolwi kele vini ji kami.

¹⁹ Sete ngasu te, ko jinibb ne iel ngatan ngel nir setemun parlesik. Ko kami ma kaplesik; ko suri numaur, ko kami kele kapa-maur.

²⁰ Renge nabong nen, kami kaprongwose nga inu renge Tata, ko kami renge inu, ko inu kele renge kami.

²¹ "Mer nga mutori lilane nale neseseien suk nir ko muosurir; ni evi mer nga mimrreni inu. Ko mer nga mimrreni inu, Tata suk pimrreni ni; ko inu kele bemrreni ni, ko inu bea-viseni inu tevi ni."

²² Jutas (sete Jutas ne Iskariot) owrai tevi ni, "Numal, kuploli pipese nga kupviseni nik lweni tevi kem, ko sete tevi jinibb ne iel ngatan jikle nir?"

²³ Iesu owra lweni tevi, "Poro nga jinibb san pimrreni inu, ko ngok ni pia-tori lilane nale suk. Ko Tata suk pia-merreni ni, ko noborini jin, ko noborloli liken se komru tevi ni.

²⁴ Mer nga sete mimrreni inu sete otori totoni nale neseseien suk nir. Nale nga kamrunge ngok nir sete arivi suk, arivi se Tata suk nga mukoni inu.

²⁵ Daron ngel nga melik tevi kami malum e, ko nuwra nanu ngel nir tevi kami.

²⁶ Nem̄in nga pok-wilwil se kami, Nem̄in On nga Tata pia-koni renge inu nisek, piavisviseni kami e nanu jikle, puloli kami kaprrormi sweri lweni nanu nga mowrair pa tevi kami.

²⁷ "Demat nga milep le melai tevi kami, evi inu demat suk. Sete demat suk osorsan tevi demat ne iel ngatan. Sete kaprong karkare te, puloli nolo kami pisij, pijki, ko sete kapmetutu te.

²⁸ Kamrunge nuwrai tevi kami le ngel, 'Inu bolwi le pa, ko bevini kele bbong ji kami ko.' Poro kapmerrenik ko kapir kobbong, suri nga bean ji Tata. Suri ni elep asi wore inu.

²⁹ Inu nuwrai wowomue nanu ngel le nir tevi kami, mian ko vitunen para-pelari. Ko daron nga para-pelari e, ko kami kapa-osuri vajin.

³⁰ "Sete numa-rij periv tevi kami. Suri Demij, numal ne iel ngatan, otomori pivini. Derteren sen ejki rres nawone renge inu.

³¹ Ko inu nuloli surie erpe wor Tata ko muwrai tevik, puloli nga jinibb ne iel ngatan parongwose nga inu numrreni Tata. Kapmera, kerr pivel vajin."

15

Iesu evi batu grep weretunen

¹ "Inu nuvi batu grep weretunen, ko Tata suk evi m̄er nga mimetmete.

² Ko seken jijle nir nga renge inu nga sete marwen nen nir, oktevei tutwenir arjikie. Ko okvasi vaseni seken nga marwen nen nir, ko ngok puloli sete parmelmelngir, ko parejal sisamis ma p̄irres, ko parwen lengleng.

³ Ko ololi vaseni kami kamwokwok ko pa osuw renge nale nga mowrair tevi kami ngel nir.

⁴ Ko kami kaplik renge inu, ko inu belik renge kami. Erpe seken sete orongwose pisan piwen, orongwos bbonge piwen ko renge nga poro p̄ijijipti malum renge durun. Ko ngok erpok ko renge kami, sete kamrongwos kapwen poro sete kaplik renge inu.

⁵ "Inu nuvi batun, ko kami kamivi seken nir. Si nga m̄ilik renge inu, ko inu renge ni, pia-wen temijpal kele wor. Suri sete kamrongwos kaploli rragrrage nanu pisan poro nga inu bejkie kami.

⁶ Poro nga jinibb pisan sete p̄ilik renge inu, parwirr tweni ko wor erpe seken, ko pukurkur. Ko arser kortoni seken ngok nir ko arwirr tweni nir van renge nabb, ko arin.

⁷ Ko poro nga kaplik renge inu, ko nale suk puto renge kami, ko ngok ko poro nga kapngoni sev nga kammerrenir, ko kaplair ko.

⁸ Ko jinibb pilep parsurövi Atua Tata suk, suri kapla temijpale wenen. Ko renge sel ngel ko, kami kapivi jinibb suk nir.

⁹ Erpe Tata suk emrreni temijpale inu, ko inu numrreni kami; niko kami kaplik renge inu merrenien suk malum.

¹⁰ Poro nga kami kaptor lilane nale nesereien suk nir, ko niko kaplik renge merrenien suk, pirpe nga inu motori lilane nale nesereien se Tata suk nir, ko n̄elik rengen merrenien sen.

¹¹ "Inu nuwrai nanu ngel nir tevi kami nga puloli neiren suk puto renge kami. Ko ngok puloli kami neiren se kami puwun saut.

¹² Ngel evi nale nesereien suk: Kami kapmerrmerreni lululweni kami, pirpe nga inu memrreni kami.

¹³ Merrenien nga milep temijpal nga jinibb puloli tevi selen nir, evi nga p̄ilngilngi mauren sen, pimij p̄isrer.

¹⁴ Kami kamivi selek, poro nga kaploli sev nir nga mowrair tevi kami.

¹⁵ Inu setemun beveruse kami 'jinibb ne majingen'. Suri jinibb ne majingen sete orongwose sev ko nga numal sen muloli. Inu beveruse vajine kami 'selek nir'. Suri nuwra nanu jijle nir nga mornger ji Tata tevi kami.

¹⁶ Kami sete kamtobbobbue inu, inu ko ma nutobbobbue kami. Ko nulngi kami nga kapan kapla wenen pilep, wenen nen nga puto tuwi ngok vini. Ko ngok niko, isev nga poro kapngoni renge inu nisek van ji Tata suk, ni pia-lai ko tevi kami.

¹⁷ Ngel le evi nanu nga bowrai tevi kami: Kami kapmerrmerreni lululweni kami.

Jinibb ne iel ngatan arungasi jinibb se Iesu nir

¹⁸ "Poro nga jinibb ne iel ngatan nir parungasi kami, ko kami kaprongwose nga arungasi womue inu ko pa, vitunen ko mara-ungasi kami vajin.

¹⁹ Poro kami kapivi se iel ngatan, ko jinibb ne iel ngatan parmerreni kami ko, suri kamivi sen. Ko ejki, inu nutobbobbue kami renge iel ngatan. Kami sete kamivi sen. Suri iok ko niko mungasi kami suri.

²⁰ Kaprrormi nale nga inu mowrai pa tevi kami: Sete jinibb ne majingen elep asie numal sen. Poro parloli p̄isij tevi inu, ko parloli p̄isij kele kobbong tevi kami; ko poro partori nale suk nga mowrair, ko partori kele bbong nale se kami ko nir.

²¹ Ko parloli nanu ngel ko nir tevi kami suri kami kamivi jinibb suk nir, suri nir sete arongwose m̄er nga mukoni inu vini.

²² Poro nga inu sete bevini ko bowra nanu tevir, ko niko sete arongwose paron ko renge nololien ser. Ko lelingen ngel sete arongwose parkerkerise parwera nawone nanu san suri nololien ser, suri n̄ejiljilwer pa tevir, ko arongwos pae osuw.

²³ Mer nga mungasi inu, ngok ongasi Tata suk kele ko.

²⁴ Ko poro nga sete bololi majingen nga jinibb san setewor muloli ko renge livö renge nir, ko ngok ko sete arongwose paron ko renge nololien ser suri. Ko ejki, arlesi pa nanu nga mololir, ko arungasi wor komru korti, inu ko Tata suk.

²⁵ Ngel evi nga puloli nale nga maruli renge nesereien ser piplari, nga muwra 'Arungasi nawon bbonge inu, inu sete nuloli rragrrag nanu nga m̄isij san.'

²⁶ "Ner̄in nga mokla ser pivini, Ner̄in ne weretunen, nga pia-ivel ji Tata vini. Inu bea-koni ji Tata pia-vini ji kami, ko ni pia-rij se inu.

²⁷ Ko kami kele kapa-rij se inu, suri nga kami kamlik tevik renge nga n̄etipatune

m̄emajing wowomu jer, mijpari lelingen ngel.

16

¹ “Nuwra nanu ngel nir nga puloli kami sete kapvitan te, pijki.

² Jinibb nir parwirr tweni kami renga naim gortien ser. Ko daron nen pia-vini nga jinibb parevji pini kami, ko jinibb nga marevji pini kami nir, parrormi arloli majingen se Atua ko.

³ Parloli nanu ngel nir tevi kami suri nga sete arongwose komru korti, Tata ko inu.

⁴ Nuwra wowomu pae nanu ngel le nir tevi kami ngel. Poro nga daron nen pia-vini vajin nga para-loli nanu nga ngel nir tevi kami, ko ngok, kami kaprrormi sweri nga nuwrai pa tevi kami osuw.”

Majingen se Nem̄in On

“Sete nuwra wowomue nanu ngel nir tevi kami renga bonevis pa, suri inu m̄elik tevi kami.

⁵ Ko lelingen ngel, bevel le pa, bolwi van ji ni nga mukoni inu e. Ko kami san sete osusi tevik “Kupan ngabe ko?”

⁶ Ko mowrai tevi kami nga bevel lingi kami, ko nolo kami arrum suri.

⁷ Ko nuwra weretunen ko tevi kami, ngok pia-ivi nanu nga m̄irres renga kami; suri poro sete bevel, ko Nem̄in nga mok-la ser sete orongwos pivini ko. Ko poro bolwi ko van, ko bokoni Nem̄in On ko vini ji kami.

⁸ Ko daron nga pivini e, ko pia-wowrai jinibb ne iel ngatan nir nga marsarr renga nololien, ko pia-wowrai suri sev nga mumomsawos, ko sev nga sete mumomsawos nga Atua pia-wer lokloksi jinibb suri.

⁹ Nir arsarr renga nololien, suri nga sete marosuri inu.

¹⁰ Ko arsarr renga inu m̄er nga mololi mumomsawos m̄irres, suri inu bean ji Tata e, ko kami sete kaplesi kele mun inu.

¹¹ Ko arsarr renga erpese nga Atua pia-wer lokloksi jinibb suri, suri sete arongwose nga Atua ewer lokloksi jile pa Demij nga mivi m̄erwomu ne iel ngatan.

¹² “Nanu elep malum wor nga moro bowrai tevi kami, ko ejki mun, lelingen ngel setemun kamviter kaprongwos nir.

¹³ Ko daron nga Nem̄in ne weretunen vajin pia-vini, ko pia-wowomu kami van renga weretunen jile nir. Ni sete pia-wera nawone nale pisan, ejki rres. Ni puwra bbong nanu nga murnger kis ko, ko puwora nanu nga para-vini nir tevi kami.

¹⁴ Ni pusrövi inu, suri pia-la nanu nga marivi suk nir, ko ni pia-werwera twenir tevi kami.

¹⁵ Nanu jile nga marivi se Tata arivi suk; ngok ko ololi nga inu mowrai Nem̄in pia-la nanu nga marivi suk nir, ko pia-werwerair tevi kami vajin.”

“Beblen welili kele ma, ko kaplesi kele inu”

¹⁶ Ko Iesu owrai kele tevir, owra “Beblen welili kele ma, ko sete kaplesi mun inu; mian ko beblen welili kele ma vitunen renga ngok, ko kapa-lesi kele inu.”

¹⁷ Jinibb sen sopor arwerair tevi nir sopor nen, “Owra sev le san nga muwrai mirpok ngok tevi kerr, ‘Beblen welili kele ma, ko setemun kaplesi inu, mian ko beblen welili kele ma vitunen renga ngok, ko kapa-lesi kele inu’, ko, ‘Suri nga inu bean ji Tata?’”

¹⁸ Ko jinibb sen nir arsususi lululweni tevi nir: “Owra sev le san nga muwra ‘Beblen welili’? Sete rramrongwose owra sev ko.”

¹⁹ Iesu orongwose nga armerreni parsusi tevi ni, ko owrai tevir, “Inu mowra ‘Beblen welili kele ma ko setemun kaplesi inu, mian ko beblen welili kele ma vitunen renga iok, ko kapa-lesi kele inu’. Ngok ko, kamok-susi lululweni kami ngok e.

²⁰ Nuwretun nga nuwretun nuwrai tevi kami, kapkail kaptjing, suwen mete kami pujumjum; ko jinibb ne iel ngatan nir parir, ko kami nolo kami parrum. Ko mian ko nolo kami nga marrum ngok parienir van renga neiren.

²¹ Daron nga nesevin mutomori puwosi bipi sen, ko nolon orrum, suri daron sen evini nga puwosi bipi. Ko daron nga nesevin muwosi jile bipi, ko emalie norongen nga m̄isij sen vajin, suri bipi eak pa iel ngatan osuw.

²² Kami kamirpok ko lelingen ngel, nolo kami arrum. Ko bea-lesi kele kami, ko nolo kami puwun saute neiren. Neiren nen, setemun jinibb san orongwos pilai tweni mun ji kami.

²³ “Renga nabong nen, setemun kamasusi rongorngge nanu san tevik. Nuwretun nga nuwretun nuwrai tevi kami, poro nga kapngoni nanu san tevi Tata suk renga inu nisek, kapngoni, ko ni pia-lai ko tevi kami.

²⁴ Mijpari lelingen ngel, kami setewor kamngoni nanu san renga inu nisek; kapngoni vajin ko kaplai, nga puloli neiren se kami puwun saut.”

Iesu easi renga nanu jile nir ne iel ngatan ngel

²⁵ “Nuwra nanu ngel nir tevi kami renga nale rrongrrongvi nir. Ko daron nen pia-vini nga inu setemun ßela nale rrongrrongvi, pijki, ko bowra momsawos Tata vajin tevi kami renga nale momsawos nir.

²⁶ Nabong nen pia-vini ko kami kapngoni ni renga inu nisek. Sete nuwra inu bean se

kami bongoni nanu san jin se kami, ejki. Kami ko wor kapan mawos ji Tata,

²⁷ suri Tata ni lweni emrreni kami. Ni emrreni kami suri kami kammerreni inu, ko kamosuri nga inu nuvel ji Atua vini.

²⁸ Inu nuvel ji Tata vini iel ngatan. Ko lelingen ngel, bevel lingi iel ngatan ko bolwi van ji Tata e.”

²⁹ Jinibb sen nir arwerai tevi ni, “Ngok kulesi, kuwra momsawose vajin, setemun kuwrai renge nale rrongrrongvi.

³⁰ Kem namrongwose vajin nga nik kurongwose nanu jijle. Kurongwos kup-supupe nanu p̄et̄peti nir, tevi nanu nir nga setewor san mususi tevim. Ngel ololi nga kem namosuri nga nik kuel ji Atua vini.”

³¹ Ko Iesu owrai lweni tevir, “Kamosuri vajin lelingen ngel?”

³² Mete nial nen evini, ejpari pa ngel, nga kami jijle kapwolu sisamis van renge ngaim se kami e. Ko inu besansan bböllbböl botur jer. Ko weretunen sete nusan, suri Tata eptevik.

³³ Inu nuwra pa nanu ngel tevi kami, nga puloli kami kapkorti renge inu, ko kapla demat. Iel ngatan puloli kami kaprunge p̄isij; ko sete kapmetutu, inu nuasie pa nanu ne iel ngatan ngok nir jijle.”

17

Iesu olot suri jinibb sen nir

¹ Daron nga Iesu muwra jile nale ngel e nir, ko oklu imare emteni melrin, ko olot owra “Tata, mete nial nen evini. Kupsurövi natum, ko inu bosrövi nik.

² Kula derteren tevik nga inu nuterter evter nga bololi sev nga memrreni tevi jinibb p̄et̄peti nir. Ko ngok nurongwos belai mauren nga muto tuwi ngok vini tevi jinibb jijle nga kumlair tevik.

³ Nanu ngel le evi mauren nga muto tuwi ngok vini, nga jinibb parongwose nik kumsansan kumivi Atua weretunen, ko parongwose Iesu Kristo nga nik kumkoni vini iel ngatan.

⁴ Inu nusrövi nik renge iel ngatan, nuloli jijle majingen nga kumlair tevik nga bololir.

⁵ Lelingen ngel vajin Tata, kupsurövi inu renge nik nom renge nosrövien nga tuwi mivi suk, renge daron nga m̄elik tevi nik e womu mian ko vitunen vajin kuma-loli iel ngatan.

⁶ “Inu nuwra visviseni nik nisem tevi jinibb ne iel ngatan nir nga nik kumla twenir marivi som, ko kumlair tevik vajin, ko nir arosuri nale som.

⁷ Lelingen ngel nir arongwose vajin nga nanu jile nga kumlair tevik arivel jim vini.

⁸ Suri nale som nir nga kumlair tevik, inu nulair tevir. Ko nir arlair, ko nir arongwose vajin nga weretunen nga inu nuvel jim vini. Ko arosuri nga nik kukoni inu.

⁹ “Inu nomok-lot suri nir; inu sete nomok-lot suri jinibb ne iel ngatan nir te ejki; nomok-lot suri bbong nir nga kumlair ko tevik, suri arivi som.

¹⁰ Nir jile nga marivi suk arivi som kele, ko nir nga marivi som arivi suk. Nosrövien suk nir ko arviseni eplari.

¹¹ Lelingen ngel inu bevinuk pa jim e le, setemun numa-lik iel ngatan; ko nir ma parlik jer iel ngatan. Tata nga muon, kupmetmet nir nga kumlair tevik renge derteren ne nik nisem, nga nir parivi pisansan, pirpe nga kerru sansan.

¹² Daron nga m̄elik tevi nir nga kumlair tevik, numetmet nir renge derteren ne nik nisem. Numetmet lilane nir erres, sete nir san ejijki te; sansan kobbong, nga ni pirpok ko wor, ni kobbong ejijki, nga puloli nale nga muto renge Naul On piplari.

¹³ Lelingen ngel inu bolwi le pa bevinuk jim e, ko nuwra nanu ngel nir tevir renge daron nga inu m̄elik ngatan malum le. Ngok puloli nir parla neiren suk renge nolor parwun saute.

¹⁴ Inu nula nale som tevir; ko jinibb ne iel ngatan nir arungasir; suri nir sete arivi ne iel ngatan, arsorsan tevi inu sete mevi ne iel ngatan.

¹⁵ Inu sete nungoni nik nga kupla twenir renge iel ngatan, pijki. Nungoni nik ma nga kuptor orer, parasi renge Demij nga m̄isij.

¹⁶ Nir sete arivi ne iel ngatan, arirpe inu sete mevi ne iel ngatan.

¹⁷ Kuplingi taleve nir, kuplolir paron renge weretunen som. Nale som evi weretunen.

¹⁸ Erpe nga nik kumkoni inu vini iel ngatan, ko inu kele nukoni nir van renge iel ngatan.

¹⁹ Inu nulngi taleve inu lweni nuon, nga puloli nir kele parlik talev, ko paron renge weretunen.

²⁰ “Inu sete nulot suri nir kis kobbong, ko nulot suri kele wor nir nga para-osuri kele inu vitunen suri nale se jinibb suk ngel nir.

²¹ Inu nulot suri nir, nga parivi pisansan e, pirpe nik Tata renge inu, ko inu renge nik. Ngok pirpok ko, nir kele renge kerru, puloli nga jinibb ne iel ngatan nir parlesi wose inu nga nik kumkoni inu.

²² Nosrövien nga kumlai tevik, nulai pa tevir nga nir parivi pisansan pirpe kerru rromorivi sansan.

²³ Inu renge nir, ko nik renge inu, ngok puloli nir parivi pisansan mawos, nga puloli jinibb ne iel ngatan nir parongwose

nga nik kukoni inu, ko kumrreni nir osor-san tevi kumrreni inu.

²⁴ “Tata, numrreni nga nir nga kumlair tevik parlik tevik kele renge lat nga belik e, nga parlesi inu nosrovien suk nga kumlai tevik. Suri nik kumrreni womu inu, vitunen ko iel ngatan ngel mia-toe.

²⁵ O, Tata nga mumomsawos, jinibb ne iel ngatan nir sete arongwose nik, ko inu ma nurongwose nik; ko nir ngel kele arongwose nga nik kumkoni inu.

²⁶ Nomok-wera visviseni pa nik tevi nir, ko nir arongwos vajine. Ko bololi malume pirlpok, nga puloli merrenien nga kummerreni inu e puto renge nir, ko inu kele renge nir.”

18

Arevei totoni Iesu

¹ Vitunen renge Iesu mulot jile muwra nale ngel nir, ko eptevi jinibb sen nir arivare renge Jerusalem, arivel otvi belai nuwi ne Kitron. Ko aran renge lut san nga mivi lolnai olip.

² Jutas nga pitkai kerasi ni orongwose lat nen, suri Iesu tetajer ok-korti tevi jinibb sen nir ie.

³ Ko Jutas eptevi jinibb ne nuval sopor ne Rom ko jinibb ne nuval kele sopor nga marmetmete Naim On, nga Parasi nir ko batu jinibb ne sulsulen nir markonir. Artur korti evi meling jinibb nga milep ne nuval san. Artori laet ko nasul ko nijor ne nuval nir, ko arivel mawos ie.

⁴ Ko Iesu orongwose sev nga piplari renge ni; ko evel mawose nir van womue ko osusi tevir, owra “Kampej isi ko?”

⁵ Nir arwera lweni tevi ni, “Iesu ne donasret.”

Ko Iesu owra lweni tevir, “Ko inu le ngel.” Ko renge ie Jutas nga mitkai kerasi ni otur tevir, ko ornge nale nga marwerai.

⁶ Renge daron nga Iesu moka-werai tevir mirpok e, “Inu le ngel”, ko nir arivel durer ko arwajenir van ngatan renge dan.

⁷ Ko Iesu osusi lweni kele tevir, “Kampej isi le?” Ko nir arwera “Namepej Iesu ne donasret.”

⁸ Iesu owrai tevir, “Nuwra jile pa tevi kami osuw, ‘Inu le ngel’. Poro nga kampej inu ko, ko kaplinglingi jinibb ngel nir parivel.”

⁹ Owrai erpel nga puloli nale sen nga muwrai piplari, “Tata, sete nutor jabble nir san nga kumlair tevik ejiki.”

¹⁰ Ko Saemon Pita etatuwe nesip nuval san, ko ervei tweni ko owun owra pita pini demij maur se batu jinibb ne sulsulen. Ko eta jabble, ko esipri otvi boron rres evesane. Demij maur nen nisen ko Malkas.

¹¹ Ko Iesu owrai tevi Pita, owra “Pijiki! Kuplingi lweni nesip nuval som renge milngen. Tata suk ko owra pila norongen nga misij ngel tevik. Kurrormi sete erres nga botor totoni nolok pitertter ren nga ban ren?”

Iesu otur renge no Annas

¹² Meling jinibb nga milep ne nuval nen nir arrul totoni Iesu ko arsere totoni nevren ko arile.

¹³ Womujnen arptevi womue van ji Annas, suri ni evi pile Kaeapas, nga mivi batu jinibb ne sulsulen renge sia nen.

¹⁴ Kaeapas nen ko muwrai tevi mēri Isrel nir nga ‘Evi nanu nga mīrres nga jinibb pisansan pimij suri delung nir.’

Pita evilvil ore Iesu

¹⁵ Saemon Pita ko jinibb mīnij se Iesu kele san orvijuri suri Iesu tevi meling jinibb nga marile. Ko nuru tuwen nen eptevi Iesu oran renge lolo naworr ne naim se batu jinibb ne sulsulen e, suri mēnren batu jinibb ne sulsulen orongwose erres pelak.

¹⁶ Ko Pita otur jer renge metali vare e. Ko jinibb se Iesu tuwen nen olwi van ko ongoni tevi nesenwarreng nga mok-tur metmete metali nga ni piasa van vare e, piptevi Pita piasa vini live laut ne naworr e.

¹⁷ Ko daron nga nesenwarreng nen moka-lesi Pita, ko owrai tevi, “Rrek nik kele kuvi jinibb se mēra nga ngelan san.” Ko Pita owra “Inu? Ejki, sete nuvi san.”

¹⁸ Nata mupong nen melas elep, ko jinibb ne majingen nir ko jinibb ne nuval nir arser kortoni bevla nir. Ko arsurer ko artur rrake ko artetli rengen. Ko Pita evan lat nen jir, ko otur tevir etetli.

Batu jinibb ne sulsulen osusi rongorngge tevi Iesu

¹⁹ Ko renge loloim batu jinibb ne sulsulen osusi rongorngge tevi Iesu, owra purongwose suri jinibb sen nir ko nevisvisenien sen.

²⁰ Ko Iesu owra lweni tevi, “Tetajer inu nomok-wera nanu nir tevi jinibb jille nir renge limjer. Nevisvisenien suk nomok-lolir renge naim gortien nir ko renge Naim On, lat nga mēri Isrel jille marok-ini korti rengen. Inu sete nomok-wera silveni rragrrage nanu san, ejki.

²¹ Sete osorsan renge nale nesesreien se kerr nga nik kupsusi rongorngge tevi inu. Kupsusi tevi ta delung nir nga marok-runge inu. Nir arongwose nanu nga mowrair.”

²² Daron nga Iesu muwra nanu ngel e, ko san renge jinibb nuval nir owje, ko owrai tevi, “Erpe kumrij mirpel tevi batu jinibb

ne sulsulen nga mian mare! Sete arok-rij erpok.”

²³ Ko Iesu owra lweni tevi mñernen, “Poro inu nuwra nawone nanu san sete emawos, ko kupwera tweni lut nga mowrai sarsarre. Ko poro nga nanu nga mowrai omomsawos, ko suri sev kumwujek?”

²⁴ Mian ko Annas okoni tweni Iesu van ji Kaeapas, batu jinibb ne sulsulen. Ko dil nga marsere Iesu nevre n e oto malum ren.

Pita evilvil ore Iesu kele

²⁵ Saemon Pita otur malum reнге lat nga ko etetli. Ko nir sopor nga martur martetli tevi arwerai tevi, “Nik kuvi jinibb se morok san.” Ko Pita evilvil ore kele, owra “Ejki ma, inu sete nuvi jinibb sen san!”

²⁶ San reнге jinibb ne majingen se batu jinibb ne sulsulen, nga mivi metka se mñer nga Pita misipri otvi boron, owra “Sete nik ko, mñelesim kumpitevi ni reнге lolnai ne olip?”

²⁷ Ko Pita evilvil ore kele, owra “Ejki ma!” Ko reнге daron mawos ngok ko pa, nato okokrout.

Iesu otur womu reнге no Paelat

²⁸ Nir arpitevi tweni Iesu reнге naim se Kaeapas van reнге naim nga milep se Paelat, nga mivi mñeri Rom nen nga mivi batu gavman iok. Evi rorpong susu malum. Meri Isrel nir sete aran reнге naim se Paelat te ejki, suri ni evi mñeri Rom, ko poro paran ko ngok parrokkitkit ko, ko sete parongwos parurroi nanen ne asien.

²⁹ Ko niko Paelat eivare evini jir, ko osusi tevir owra “Sev ko kamlesi esij re mñerel nga muloli kamrevei vini iel e jik?”

³⁰ Ko nir arwera lweni tevi ni, arwera “Po, ko poro mñerel sete puloli majingen nga parsij, ko setete nama-pitevi ni vini!”

³¹ Paelat owra lweni tevir, “Kappitevi tweni, ko kami ko kapwera suri lat nga puto suri rengen reнге nale neseseien se kami.” Meri Isrel nga marwowomu nir arwera lweni, “Ko kami ko mñeri Rom nir kamwer ore nga sete namrongwos nabor pini jinibb san!”

³² Nanu ngel eplari nga puloli nale se Iesu nga muwrai piplari, nga muwra suri mijen sev nga ni pia-mij rengen.

³³ Ko Paelat olwi van loloim e, ko everuse Iesu pivini jin. Ko Iesu evini jin, ko Paelat osusi tevi ni, “Ia, ewretun nik kuvi numal se mñeri Isrel nir?”

³⁴ Ko Iesu owra lweni tevi, “Kususi rongorngorng erpok suri nik kobbong norrorrmien som, rreknga sopor arsupe suri inu tevi nik?”

³⁵ Paelat owra lweni tevi ni, “Po, kurrormi inu nuvi mñeri Isrel rrek? Nik luwi ko wor jinibb som nir ko batu jinibb ne

sulsulen nir artekai nik vini jik. Nik kuloli sev?”

³⁶ Iesu owra lweni tevi, “Inu batun vanu suk sete evi ne iel ngatan. Poro nga bevi numal ne batun vanu san ne iel ngatan, ko jinibb suk nir parpalpal ore inu ko, nga sete mara-tekaik vini reнге nevre mñerwomu se mñeri Isrel nir. Ko niko inu batun vanu suk sete evi ne iel ngatan.”

³⁷ Ko Paelat osusi kele tevi ni, “Ia, ko ewretun ko wor nik kuvi Numal san?”

Ko Iesu owra lweni tevi, “Kuwretun re kumwerai, ko rrek sete kurongwos suri nuvi numal nga mirpese san. Inu mevini iel ngatan mñeak suri bbong majingen sansan, nga bospe suri weretunen. Isi nga mivi jinibb ne weretunen pumurronge inu drelak.”

³⁸ Ko Paelat osusi tevi, “Isev ko were-tunen?”

Paelat owra suri lat nga puto suri re Iesu

Ko Paelat muwrai mirpok jile tevi Iesu, ko eivare olwi van ji mñeri Isrel e nir. Ko owrai tevir, “Inu sete nulesi nanu nga mñisij rragrag san reнге ni.

³⁹ Ko nanu san. Evi pa murrun se kami nga re sia jille re daron ne nanen ne asien, inu bemarkonge jinibb nga mñilik reнге naim ne nekaien san nga kammerreni pivel sisarow. Ko ngok kami kammarong nga inu bemarkonge Numal se mñeri Isrel nir pivel sisarow?”

⁴⁰ Ko nir arkail lengleng arwera “Ejki rres nawon, kem sete nammerreni mñerel! Kem nammerreni Barapas.” Ko Barapas nen evi mñer nga mivi jinibb vena, ko mok-revrevji pinpini jinibb.

19

¹ Ko Paelat ela Iesu tevi jinibb nuval nir, ko arvirrvirrali.

² Ko jinibb nuval nir arla dil moku ko arjali erpe nuvan se Numal san, ko arlingi reнге batun ori. Ko arla sunsun nga musongsong mupongpong mñirres ko arloli ori.

³ Ko armomori jin ko arkerkerasi, arwerai tevi “Nik kuplik pipriv, Numal se mñeri Isrel nir!” Ko arwuje non.

⁴ Ko Paelat eivare kele vini ji delung nir ko owrai tevir, “Kaplesi, beptei tweni le pa vini vare e ji kami, ko kaprongwos mae nga inu sete nutor sweri nanu nga mñisij san reнге ni nga puloli inu bospe suri ni rengen, ejki.”

⁵ Ko Iesu eivare vini vare e, ori nuvan nen nga marjali reнге dil moku mirpe nuvan se numal san, ko ori sunsun nga musongsong. Ko Paelat owrai tevir, “Niko mñernen le ngel.”

⁶ Ko daron nga batu jinibb ne sulsulen nir ko jinibb nuval nir marlesi ko arkail mare, arwera “Kuprruloni ni renge nai pelaot! Kuprruloni ni renge nai pelaot!” Ko Paelat owrai tevir, “Kapte kai ni kapiel tevi, ko kami vajin kaprruloni renge nai pelaot. Inu sete nulesi on renge nanu san nga bospe suri ni rengen.”

⁷ Meri Isrel nir arwera lweni tevi Paelat, arwera “Kem neseseien se kem otoo, ko neseseien nen owrai ni orongwos pimij ko wor! Suri ni lweni elngi ni evi Atua natun.”

⁸ Daron nga Paelat murnge mirpel, ko ni ea-metutu lengleng kele e ko.

⁹ Ko olwi van renge loloim sen kele e, ko osusi tevi Iesu, “Nik kuvi mēri ngabe le?” Ko Iesu sete owra lweni nanu san tevi ni.

¹⁰ Ko Paelat owrai kele tevi ni, “Sete kuma-wera nanu san tevik? Sete kurongwose nga inu derteren suk otoo nga bololi nik kupiel sisarow, ko borrruloni nik renge nai pelaot?”

¹¹ Ko Iesu owrai tevi, “Nik derteren som easi inu suri Atua kobbong elai tevi nik. Ko mēn nga mīlai inu vini jim, ni ko ma on renge nololien nga nūsij pērper milep.”

¹² Ko daron nga Paelat murnge nale ngel, ko epejpej sel kele san nga puloli Iesu pivel sisarow rengen. Ko mēri Isrel nir arkail van jin: “Poru kuploli ni pivel sisarow, ngok eviseni nga nik sete kuvi sele Sisa. Si nga nūlngi ni lweni mivi numal, ni evi devje nuval se Sisa ko vajin!”

¹³ Ko daron nga Paelat murnge nale ngel e nir, ko olwi van loloim e, ko etkai tweni Iesu eivare, ko ean re lat san nga martuwe mivi nawot (nga nale se mēri Isrel nir marwera nisen Gapata e), ko esakel renge nai seksakel nga mok-sakel ren daron nga mok-wera suri lat nga puto suri tevi jinibb nir.

¹⁴ Evi levial vajin renge nabong nga pareseser tera nanen ne asien e, mete nial esngavöl drromon eru; ko Paelat owrai tevi mēri Isrel nir owra “Ni le, Numal se kami!”

¹⁵ Ko nir arkail van mare arwera “Kup-pitei tweni, kuppitei tweni, kuprevji pini renge nai pelaot!”

Paelat owrai tevi nir, “Erpe, kami kammerreni inu berevji pini numal se kami renge nai pelaot?”

Ko batu jinibb ne sulsulen nir arwera “Numal se kem ejki ko ngok, Sisa ko ma!”

¹⁶ Ko Paelat elinglingi Iesu tevi nir vajin, parevji ko parruloni renge nai pelaot.

Iesu arwuse orrul renge nai pelaot

¹⁷ Ko arpitei tweni Iesu evel, owosi nai pelaot sen van renge botwen san nga

marveruse nisen miwaji bongur (rengale se mēri Isrel nir arveruse Kolkota).

¹⁸ Nir arruloni ni iok renge nai pelaot; ko nuru eru kele orpitevi, san renge devjen rres ko san renge devjen mair, ko Iesu renge liven.

¹⁹ Paelat oli nale sopor, ko elngi renge nai pelaot se Iesu. Areve erpel, ‘Iesu ne donasret Numal se mēri Isrel nir.’

²⁰ Ko mēri Isrel elep areve nale nen, suri lat nga marruloni Iesu ren oto mori Jerusalem bbong. Aruli nale ngok rengale se mēri Isrel nir, ko nale se mēri Rom nir, ko nale se mēri Gris nir.

²¹ Ko batu jinibb ne sulsulen se mēri Isrel nir arwerai tevi Paelat, “Sete kupuli ‘Numal se mēri Isrel nir’ pijki, ko kupuli pīrpel: ‘Merel owra Inu Numal se mēri Isrel nir.’”

²² Ko Paelat owra lweni tevir, “Sev nga moli pa puto ko pa pīrpe nga moli.”

Jinibb nuval artututweni sunsun se Iesu

²³ Vitunen renge jinibb nuval marruloni jile Iesu renge nai pelaot, ko arla joron nir ko artutweni sisamise nir. Arlingi meling ivij e, evsese jinibb nuval nen nir ivij. Ko arla kele sunsun nga mok-uri ore womu niben e, ko arlesi nga marloli mivi pa sansane ko.

²⁴ Ko jinibb nuval arwerwera lululweni tevi nir, “Sete rraprrrrrsi te, pijki. Kerr putuw daes suri.” Ngel puloli nale nga Naul On muwrai piplari, ‘Ko nir arlai tweni jorok ko artututwenir e, ko artuw daes nga parlesi si pīlai sunsun suk’. Ngok jinibb nuval nir arloli surie erpok.

Iesu ko tasu sen

²⁵ Ko mori bbonge nai pelaot sopon, Iesu tasu sen ko tasu sen tuwan, ko Merri nga nesen se Klopas, ko Merri nesen Maktala, artur.

²⁶ Ko Iesu emteni tasu sen ko jinibb sen nga ni mimrreni temijpale mortur, ko owrai tevi tasu sen, “Ngok evi natun.”

²⁷ Mian ko owrai kele tevi jinibb sen nga ni mimrreni temijpale, “Ngok evi tasu som.” Ko etipatun re daron nen, ko mēnren emetmete erres renge naim sen.

Mijen se Iesu

²⁸ Iesu orongwose nga lelingen ngel nanu jille arsuw jerjer pa, ko owra (nga puloli Naul On piplari) “Nolok emesmes.”

²⁹ Besin san oto iok, owun saute norro nga mimilali. Ko ngok arla nalum san ko arrurrngoni rengen, ko arlingi renge mavir san, ko arsareni van renge nevlu jingon nuru.

³⁰ Ko Iesu orromji lesi norro nen beblen, ko owra “Osuw jerjer vajin.”

Ko etmarru vitan ko emij.

Arjuji neli Iesu

³¹ Merwomu se mēri Isrel nir arngoni tevi Paelat nga pimarong parbburi bela jinibb nen nir, puloli parmij e, ko parjuri twenir renga nai pelaot nir. Arwera parloli pirpel suri evi Praete, ko sete armerreni niber parrul jipari nabong ne Sapat. Sapat nen evi Sapat nga muon milep, suri evi Sapat ne nanen ne asien.

³² Niko jinibb nuval nen nir arini ko arbburi luwe mēr nga murrul tevi Iesu tuwen belan, musuw ko aran kele arbburi kele nuru tuwen kele belan.

³³ Ko daron nga marini ji Iesu vajin, ko arlesi nga emij pa osuw, ko nir setemun arbburi ni belan.

³⁴ Ngok nir san renga jinibb nuval ela sir sen ko ouni renga neli Iesu. Ko drra ko nuwi orseser pelari orvesane.

³⁵ San le ngel elesi nga mirpok, ko owrai erpok ko. Orongwose nga ni okwera weretunen, ko owrai 'Sev nga nomokwerair ewretun. Kami kele kaposuri.'

³⁶ Nanu ngel nir arpelari nga nale san nga muto renga Naul On pivini piplari, nga muwra 'Sete jin san pia-mabbur.'

³⁷ Ko nale kele san renga Naul On owra 'Parmeteni ni nga jinibb maruni sir renga.'

Arlingi Iesu renga dubb

³⁸ Vitunen renga nanu ngel, Josep, nga mivi mēri Armetia, ongoni tevi Paelat nga poro orongwos puwosi tweni nibe Iesu. (Josep evi jinibb se Iesu ko pa san, ko okvilvil ore, suri emtute mērwomu se mēri Isrel nir nga martori derteren renga nir.) Ko Paelat elinglingi tevi ni. Ko evan owosi tweni nibe Iesu.

³⁹ Ko Nikotemas, nga bonevis mivini ji Iesu nat nga mupong, eptevi Josep, nuru oran. Ni ela senta nga nowlin mivi nevöt ongut vesan nga markisie mir ko alos, otori tevi ni.

⁴⁰ Nuru orwosi nibe Iesu ko ornuḅe sunsun nga mimalum e nūrres tevi mir ko alos nga. Meri Isrel nir lat nga marok-loli surie ko erpok.

⁴¹ Mori iok lat nga marruloni Iesu renga, orsel ne lolnai ne olip san oto mori bbonge. Ko renga lolnai ne olip ngok nevöt bereng san nga Josep mītai nolon mutoe oto renga, nga sete arlingi rrongvi wor jinibb nga mimij san renga.

⁴² Ko suri evi pa nabong se mēri Isrel nir nga marok-eseser renga ko mevinen pivi nabong nga milep ser, ko lolo bereng nen mori bbong ie, ko orwosi Iesu orlingi renga.

¹ Daron nga Sapat ser mīasi vajin, renga Sante rorpong susu nat murrorrorr malum, Merri ne Maktala emremra van renga dubb. Ko elesi nevöt nga muto ore nolo bereng mijkie, arla tweni pa.

² Ko nesevin owlu luwi van ji Saemon Pita e nuru jinibb se Iesu mīniji nen nga Iesu mimrreni nen. Ko owrai tevi nuru, "O laru, arwosi tweni Numal renga dubb, ko sete rramrongwose lat nga marlingi e!"

³ Ko ngok Pita ko jinibb se Iesu mīniji nen otur imare kasi nga poran porlesi dubb.

⁴ Nuru korti orwolu van; ko jinibb se Iesu mīniji nen owlu eterter easie Pita, ko ejpuri womue dubb.

⁵ Ko ejjol vitan ko okluklu; ko elesi sunsun nga marmalum marres marto, ko sete ma evan lolo bereng.

⁶ Vitunen vajin Saemon Pita muwlu vitu vini. Ko ni ma etajer evan lolo bereng, ko ni kele elesi sunsun nga marmalum marres marmatur marto.

⁷ Ko elesi kalek nga marmēlji batun e mīsan muto, sete oto tevi sunsun nga marmalum marres te, ejki. Arlulngi esan oto.

⁸ Mian ko jinibb se Iesu mīniji nen nga muwowomu renga dubb nen, ni kele evan lolo bereng, ko elesi ko osuri vajin.

⁹ Nuru setewor orongwose Naul On nga muwra ni pimaaur luwi renga mjen.

¹⁰ Mian ko jinibb se Iesu nen nuru orluwi van renga ngaim e.

Iesu eplari ji Merri ne Maktala

¹¹ Ko Merri ne Maktala ok-tur malum vare renga dubb, eting. Ok-ting mianan, ko ejjol vitan oklu van renga lolo dubb e.

¹² Ko elesi anglo eru oruri sunsun nga morow raprap, orlik renga lat nga Iesu marlingi niben muto renga, nuru tuwen renga renga batun ko nuru tuwen renga belan.

¹³ Ko orsusi tevi vinnen, orwera "Nesevin, kuting suri sev ko?"

"Suri nga marla tweni Numal suk, ko sete nurongwose arlingi nibeni."

¹⁴ Daron nga vinnen muwra mirpel e, ko moro mīrieni vajin, ko elesi Iesu mutur. Ko sete orongwose nga evi Iesu.

¹⁵ Iesu osusi tevi owra "Erpese nga nik kumting? Kupej isi ko?"

Vinnen orrorrmi rrenga evi jinibb nga mok-metmete nai olip nen nir, ko owrai tevi, "Merel, poro nga nik kuwosi tweni, ko kupwowrai tevik, ko inu bean bowosi lweni."

¹⁶ Ko Iesu owra Merri nisen renga nale se mēri Isrel nir; ko Merri etaole ko erieni mawose, ko owra "Raboni!" (nga renga nale se mēri Isrel nir owra 'jinibb nevisisenien').

¹⁷ Ko Iesu owrai tevi “Sete kuprrul to-tonik, suri setewor nuan ji Tata. Kupluwi ma van ji tasik nir, ko kupsuŕe suri inu tevir, nga inu botongsa van ji mun Tata suk, ko kami Tata se kami kele, van ji mun Atua suk ko Atua se kami kele.”

¹⁸ Ko Merri olwi van ko owrai tevi jinibb se Iesu nir, “O, lartul! Nulesi Numal!”, ko osŕe suri tevir nga ni owra nanu ngel nir tevi.

Iesu eplari ji jinibb sen nir

¹⁹ Renge nata mirivriv ko Iesu jinibb sen nir arkonti kele. Ko metali arkikior, suri armetutue jinibb nga marlelep renge mŕeri Isrel nir. Ko artaole Iesu otur pelari livö jir, ko owrai tevir, “Demat piptevi kami.”

²⁰ Vitunen renge muwrai jile mirpel, ko eviseni milnge nel nuru renge nevren nuru ko milnge sir renge nelin. Ko jinibb sen nir arir renge marlesi Numal.

²¹ Ko Iesu owra lweni kele tevir, “Demat piptevi kami. Erpe inu Tata okonik, ko inu kele bokoni kami vajin.”

²² Ko daron nga muwra nale ngel e, ko owi sowin van renge nir, ko owrai tevir owra “Ngok, Neñin On esilvi pa kami.

²³ Poro kami kaptelasi tweni nololien se jinibb pisan, ngok Atua etlasi tweni ko pa. Ko poro sete kaptelasi tweni, ko ngok Atua sete ŕitlasi tweni ko.”

Iesu ko Tomas

²⁴ Tomas, san nga renge jinibb se Iesu esngavöl drromon eru, nga marveruse miwajie mŕelew, sete eptevir renge daron nga Iesu mivini jir.

²⁵ Ko jinibb se Iesu mŕinij nen nir arwerai tevi ni, “Kem ma namlesi Numal!” Ko Tomas owrai tevi nir, “Ejki ma! Poro inu sete ŕelesi nel milngen renge nevren nuru, ko sete ŕelngi bbösö nevrek renge milnge nel nolon ko ŕelngi nevrek renge milnge sir renge nelin, ngok sete numa-osuri.”

²⁶ Mian ko renge nabong owil arasi osuw, ko jinibb sen nir arlik korti kele renge naim; ko Tomas eptevir vajin. Ko metali arkikior. Ko Iesu otur pelari kele livö jir, ko owra “Demat piptevi kami.”

²⁷ Ko owrai tevi Tomas “Kuplingi bbös nevrem iel ko kupmeteni nevrek nuru, ko kupsareni nevrem kuplingi renge milnge sir renge nelik. Sete nosurien som pijkie, ko kuposuri ma.”

²⁸ Ko Tomas owra lweni tevi Iesu, “Numal suk ko Atua suk!”

²⁹ Ko Iesu owrai tevi Tomas, “Nik kuosuri inu suri kumlesik? Neiren renge nir nga sete marlesik ko marosuri wor!”

Naul ngel nanu nga murongwos puloli

³⁰ Ko Iesu ololi nelesien mŕinij nir elep kele wor renge no jinibb sen nir, nga sete marulir renge naul ngel.

³¹ Ko ngel le ma nir nga molir, nulir nga kami kaposuri nga Iesu evi Mesaea, Atua natun mawos; ko renge nosurien ngok renge nisen, kami kapla mauren renge.

21

Iesu eplari ji jinibb sen ebut

¹ Vitunen renge ngel, Iesu lweni eviseni ni kele vesan tevi jinibb sen nir renge jeli nuwito ne Taepirias (Galili). Renge sel ngel ko ni miviseni ni lweni renge, erpel:

² Saemon Pita, Tomas (nga miwajie mŕelew), Nataniel (ne Kena renge Galili) ko natu Sepet nuru, ko nuru mŕinij nen kele eru arlik korti lat sansan.

³ Ko Saemon Pita owrai tevir, owra “Inu bean le pa botutumun.” Ko nir arwerai tevi “Nabinuk, kerr.” Ko nir arivel van, ko arsa renge drrav.

Ko mian ko renge nata mupong nen sete arla nanu san rragrrag.

⁴ Mian ko mijpari rorpong, nat mŕirinrin rranu malum, ko arlesi Iesu mutur renge jeli nuwito renge deŕinan. Arlesi ma, ko setewor arongwose nga mivi Iesu.

⁵ Ko Iesu vajin erij van jir, owra “Nanwarreng nir, kamla mesal?”

Ko nir arwerai tevi, “Ejki rres!”

⁶ Ko ni owrai tevir “Kapjuröni niva van renge drrav devjen rres e, ko kaprevei sopor ko.” Ko nir arloli erpok, arjuröni niva van ngatan renge nuwi; ko sete epriv ko nai aron temijpal ren, ololi setemun arongwos parevei lweni, orrow ŕelak.

⁷ Mian ko jinibb se Iesu nga mimrreni nen owrai tevi Pita, “O, Numal ko ngok!” Daron nga Saemon Pita moka-runge sweri nga muwra ni mivi Numal, ko esaro ngavilvil, ela lweni sunsun sen ko etatuwe, suri ori tweni re marevei niva; ko orow jubbul van renge nuwi.

⁸ Ko jinibb se Iesu mŕinij nen nir arsaro ngavilvil arevrevei niva renge drrav vini ngaut e, suri nai owun saut renge. Sete aruj ngasue vanu, erpe ningaw ongut vesan bbong sopon.

⁹ Daron nga maran ngaut e, ko arlesi nabb mŕin; ko nai marmasos renge bevla nen, ko niv sopor arto.

¹⁰ Ko Iesu owrai tevir, “Kapla nai ngok nga kama-lai ngok bbong sopor vini.”

¹¹ Ko Saemon Pita evan ervei rrerseni niva vini lat nga mimes e vajin, owun saute nai nga marlelep nir. Nir jijle evi ongut vesan bbulin ngavöl elim drromon itul (153). Ko ngok niva owun saute nai nir, ko sete emarrerr te ejki.

¹² Ko Iesu owrai tevir, “Kapini kaþaan.” Ko jinibb sen nir armetutu nga parsusi tevi, ‘Isi le nik?’ Suri arongwose evi Numal.

¹³ Ko Iesu evini ela niv ko obbur ototvir, elai tevir, ko ololi erpok kele rengenai.

¹⁴ Ngel evi vatolin le nga Iesu miviseni ni lweni tevi jinibb sen nir vitunen rengenaimaur luwi kele re mijen.

Iesu ko Pita

¹⁵ Daron nga maraan jile, ko Iesu osusi tevi Saemon Pita, “Saemon Jonas natun, kumrreni inu asie nanu ngel nir?”

“O-o Numal, nik kurongwose nga inu numrreni nik.” Iesu owrai tevi “Kupwungani sipsip suk.”

¹⁶ Mian ko sete epriv ko Iesu osusi varwen tevi ni, “Saemon Jonas natun, kumrreni inu?” Pita owrai lweni tevi “O-o Numal, nik kurongwose nga inu numrreni nik.” Ko Iesu owrai kele tevi, “Kupwungani sipsip suk.”

¹⁷ Ko Iesu osusi vatolin tevi ni, “Saemon Jonas natun, kumrreni inu?”

Pita ornge lengleng esij e suri Iesu owrai vatul kis tevi ni, ‘Nik kumrreni inu?’ Ko owra lweni tevi, “Numal, nik kurongwose nanu nga musuw ngok nir, kurongwose nga inu memrreni nik!”

Ko Iesu owrai lweni kele tevi, “Kupwungani sipsip suk.”

¹⁸ Ko nuwretun nga nuwretun nuwrai tevi nik, Daron nga kumivi mielakel e, ko kusre totoni netatuw som, ko kuan lat jile nga musuw ngok nga kummerreni kupan e. Ko daron nga kupa-ivi birtera, ko kupa-sale nevrem nuru, ko jinibb san pia-sere totkoni nuru, ko pia-pitevim van lat nga sete kummerreni kupan e.”

¹⁹ Ngel Iesu owrai suri mijen sev nga Pita pimij rengen, pia-la nosrovien tevi Atua. Muwrai jile nale ngel, ko owrai tevi Pita, “Kupvijuri inu.”

Iesu nuru jinibb sen nga ni mimrreni milep nen

²⁰ Mian ko Pita erieni ko elesi jinibb se Iesu nga Iesu mimrreni milep womunen, mier nga milik lilji Iesu rengen daron ne nanen nga maraan, ko mususi tevi, “Numal, isi ko pitkai kerasi nik?”

²¹ Daron nga Pita nilesi, ko owrai tevi Iesu “Numal, ko pirpese re mierel?”

²² Ko Iesu owrai tevi Pita owra “Poru inu bemarong ni sete mia-mij ko pilik pijpari nga inu bolwi vini, ko ngok erpese rengen nik? Nik kupvijurik ko wor.”

²³ Ko nale ngel owlu elep vajin rengen kalesia, nga jinibb se Iesu ngel sete pimij te. Ko Iesu sete owrai tevi Pita nga ni sete pimij, ejki, ko owrai bhong ‘Poru inu

bemarong ni sete mia-mij ko pilik pijpari inu bolwi vini, ko ngok erpese rengen nik?”

²⁴ Inu nuvi mñernen le, jinibb se Iesu nga mowra nanu ngel nir, ko moli tututweni nanu ngel nir. Ko kami kamrongwose nale suk evi werweretunen.

Bongsi nale

²⁵ Nanu elep nga elep kele wor nga Iesu mulolir. Poru paruli nir þetþeti, inu nurrorrmi rreknga naul nen nir parsongni iel ngatan parto þetþeti rengen puwun saute, ko sete pivter kele e, sopor parjijpon.

Majingen se Aposol nir Batu nale nga mivsviseni lut nga parmeteni naul ngel puto suri

Naul ngel, Majingen se Aposol nir, Luk oli van ji jinibb san nga nisen Teopilas. Naul ngel evi naul nga Luk muli viv-itue (nga muli wowomue evi Nospen nga mīrres suri Iesu Kristo nga Luk muli).

Renge naul ngel, Luk ospe suri majingen se aposol nir nga Neñin On mūtakai nir re majingen nen nga partewijreni nospen sen, pītpatun Jerusalem, ko re lat jille ne Jutia, ko re Sameria, ko pian pijpari iel ngatan petpeti (1:8).

Re naul ngel, Luk emrreni piviseni nga nir nga marosuri sete artere batu numal ne Rom nga mimetmete lat jille re daron ngok. Ko emrreni piviseni nga nanu jille nga mēri Isrel marosuri womue, nir jille arpelari re nospen nga mīrres.

Nanu nga milep san nga naul ngel muspe suri evi majingen se Neñin On. Daron nga aposol nir marlik malum Jerusalem, ko nabong ne Pentekos evini, ko Neñin On esilvir, ko elai derteren tevir. Ko vitunen Neñin On eptevi malum nir nga miwilwil ser re majingen ser. Re naul ngel kele, nale sopor arto nga aposol nir marwera tweni, ko eviseni nga nale nga marwerai tweni, derteren nen otoo nga orongwose pīrieni mauren se jinibb. Ko ewilwil se kalesia nir nga parkorti lat sansan.

¹ Selek Teopilas, renga naul suk nga womujnen, nulul tevim nga Bejiljilwer suri nanu jille nga Iesu mulolir ko nga mivsviseni kele jinibb nir renger tuwi,

² mian mian mijpari nabong nga Atua mūtakai van re melrin e. Ko vitunen ko mian van mare e, ko owrai nanu sopor renga derteren se Neñin On tevi aposol nir nga mutobbobbuer.

³ Ko renga nabong ngavöl ivij (40) ko ni eviseni ni tevir, nga puloli parongwose pīrres nga ni emaur luwi renga mijen. Nir arlesi, ko ni ejilwer tevir suri batun vanu se Atua.

⁴ Ko daron nga nir jille marini lat sansan, ko owrai tevir owra “Setewor kapiel lingi Jerusalem wor, ko kaptiriv mun Tata nga pīlai Neñin On tevi kami erpe merrenien nga milep san tevi kami. Niko mowra pa tevi kami nga ni ololi pa rijrijen nga puloli ke.

⁵ Jon ololi baptaes renga nuwi, ko re nabong pievis kele kobbong ko kami kapaptaes renga Neñin On.”

Iesu ean renga melrin e

⁶ Daron nga aposol nir marini markorti lat sansan tevi Iesu, ko arsusi tevi arwera “Ia, Numal, evi pa daron le vajin nga nik kupivi batu numal ne Isrel?”

⁷ Ko Iesu erij welir owra “Sete evi nga kami kaprongwose daron nga nanu ngok nir parremali ren; Tata kobbong esan elngir renga ni derteren sen.

⁸ Ko Neñin On ma pīlai derteren pivini puwun saut re kami, ko kami kapsupe suri vajin inu tevi jinibb nir renga Jerusalem, renga Jutia totoklai, Sameria, ko re lat jille ne iel ngatan.”

⁹ Daron nga mīrij jile mirpok, ko nir arlesi meter e nga Atua ela lweni van re melrin e. Ko nabor san etevni ore, ko setemun arlesi kele.

¹⁰ Ko daron nga mian mare e ko meter oto eterter malum re melrin, ko artaole marlesi jinibb eru ortur renga jelir tevi sunsun nga marow titis.

¹¹ Orwera “Suri sev kami mēri Galili ngel kamok-tur iel, kamok-kulu van mare e renga melrin? Iesu ean pa re melrin e mare. Ko ni pia-rremali luwi kele osorsan erpe nga kamlesi mian mare e.”

Gortien se aposol nir

¹² Ko aposol nir arlinglingi botwen ngok nga marveruse ‘Botwen ne lolnai ne olip’, arluwi van Jerusalem e. Botwen ngok oto mori bbong ngaim erpe kilomita bbong san.

¹³ Mian ko arluwi van Jerusalem e re naim nga marok-lik ren mare. Nir ngok ko niser ngel: Pita, ko Jon, ko Jemes, ko Antru ko Pilip, ko Tomas, ko Batolomiu, ko Matiu ko Jemes nga mivi natu Alpeas, ko Saemon nga bonevis mukorti tevi lartul nga marmerrreni puwirr tweni mēri Rom, ko Jutas nga tata sen Jemes.

¹⁴ Nir ngok arok-korti tetajer renga loten tevi nesevin nir, ko Merri, tasu se Iesu kele, tevi kele tasi Iesu nir.

San nga pīla wani mīnge Jutas

¹⁵ Nabong sopor arasi ko jinibb se Numal nir ejpari ongut vesan bbulin ngavöl eru (120) arser korti renga liken ser san. Mian ko Pita otur imera ko owrai tevir,

¹⁶ owra “Tasik ko jojik nir, tuwi jer Neñin On erij renga jingo Devet, owrai tweni Jutas ngok nga mūtakai jinibb nir marini marrul totkoni Iesu.

¹⁷ Bonevis ni okorti tevi kem, suri Iesu otobbobbue ni kele nga pīmajing tevi kem.

¹⁸ “Mian ko Jutas owli dan sopon renga nevöt nga marlai tevi renga sel nga mīisij

nga muloli ngok tevi Iesu. Mian ko ewajeni pa iok ko, ko depain eap ko jinen arivare.

¹⁹ Ko daron nga mēri Jerusalem jijle nir arongwose nanu ngok, ko niko arlingi vajin ie ewaji nais ngok Akeltama, nga renge nale ser owra puwra 'Lat ne Drra.' "

²⁰ Ko Pita etajer owra "Re Naul ne Sam nir, Devet owra nale san nga muwra 'Naim sen puto kiskis, ko sete jinibb san p̄ilik ren.' Ko nale m̄inij kele san oto nga muwra 'Erres jinibb m̄inij san p̄ilai wani milngen re majingen sen.'

²¹⁻²² Re iok, erres jinibb san pivini pukorti kele tevi kem nga puwrai tweni Iesu, Numal se kerr nga mimaur luwi kele renge mijen. Ko ni pivi wor san re nir nga mipitevi kem tetajer, etipatun re daron nga Jon musp̄e suri murrun ne baptaes, mivini mijpari daron nga Atua m̄ila lweni Iesu van renge melrin e."

²³ Ko nir arlingi jinibb eru. Tuwen evi Josep nga marverus kele e Basapas (ko ni nisen tuwen nen evi Jastas), ko nuru tuwen nen nisen Matias.

²⁴ Mian ko nir arlot arwera "Numal Atua, nik kurongwose norrorrmien se jinibb jijle nir. Kupviseni tevi kem nuru si nen re nuru ngel nik kutobbobbue

²⁵ nga putori majingen ngel ne aposol nga Jutas m̄ilngi kurtweni pa ko mian re lat nga mumomsawos wor re ni pian ren."

²⁶ Ko arloli nanu san erpe arwirre daes nga parlesi purrum ji nuru si nen, mian ko nise Matias ermali. Mian ko arsusture, okorti tevi aposol esngavōl drromon san (11).

2

Nem̄in On ermali jir

¹ Re nabong ne Pentekos (ngok nabong ne nanan nga milep se m̄eri Isrel nir), jinibb se Iesu nir arser korti kele lat sansan.

² Ko vesan rres, drrela nanu nga milep san ermali renge melrin vini, erpe ling nga m̄iterter; ko drrelan nen osongni p̄etp̄eti naim nga marlik ren loloim.

³ Ko arlesi nanu san arirpe lomi nabb nga maror pelpelari. Lomi nabb nen nir aror jipari nir jijle nga marlik re naim nen.

⁴ Ko Ner̄in On owun saute nir jijle, ko artipatun vajin nga marij renge nale lele nga Ner̄in mimarong nga parij ren.

⁵ Ko m̄eri Isrel elep nga marok-lot arivel renge vanu jijle nir ne iel ngatan, arini arlik renge Jerusalem re daron ngok.

⁶ Ko daron nga marunge drrelan nen, ko delung nga milep arser korti ie. Ko nir artaol ko aririr temijpal, suri arunge vajin jinibb se Iesu nir marjiljilwer renge nale ser mawos.

⁷ Mian ko artaol lengleng ko arwera "E weta, lartul nga marok-rij mirpok ngok arivi m̄eri Galili kobbong!

⁸ Suri sev rramrunge marok-rij renge nale se kerr nir mirpok?

⁹ Kerr rramiel lat lele le vini. Sopor Patia, Mitia, ko Elam. Sopor arivi nga Mesopotemia, Jutia, Kapatasia, Pontas, Asia,

¹⁰ Prijia, Pampilia, Ijip, ko re lat sopen ne Lipia mori Saerin, ko Rom,

¹¹ Krit, ko Arepia. Kerr sopor arivi m̄eri Isrel mawos, ko sopor arivi jinibb ne vare nga marlot tevi m̄eri Isrel nir. Ko rramrunge nir marok-rij renge nale ngok nir se kerr, ko marok-wera i tweni majingen ngok nir nga marlelep nga Atua mulolir!"

¹² Mian ko nir artaol lenglengen e ko norrorrmien ser esis nawone, ko setemun arongwose lat nga muto suri; ko arsususi lululweni tevir arwera, "E, lartul! Sev ko san?"

¹³ Ko nir sopor armen keraji jinibb se Iesu nir ko arwera "O, lartul ngok arminmin ko!"

Pita erij tevi delung nir

¹⁴ Mian ko Pita otur tevi aposol nir esngavōl drromon san ko erij renge drrelan nga mian mare tevi delung nir, owra "Selek nir, kami nga kamivi m̄eri Isrel ko kami nga kamlik iel Jerusalem, kapmurrong inu p̄irres renge sev nga bowrai visviseni tevi kami ngel.

¹⁵ Kami kamrongsarr ko nga kamwera namminmin. Suri ea-ivi bbong mete nial esiw ko nga rorpong.

¹⁶ Ko sev nga kamlesi ngel evi ma nanu nga propet Joel musp̄e wowomu pae tuwi muwra

¹⁷ "Atua owra Re daron ne nabong nga vitu ne iel ngatan pia-tomori, ko inu bejivreni Nem̄in suk tevi jinibb jijle, nga nir para-tor sweri derteren jijle rengen. Natu kami norman ko nesevin para-ivi propet, para-wera i tweni sev nga inu belai tevir. Melakel se kami nir parlesi bori nga inu bea-viseni tevir, ko b̄irterawarrang se kami nir parmatut lesi bori nir.

¹⁸ Ko renge nabong ngok nir, inu bejivreni Nem̄in suk renge jinibb suk nir totoklai, norman ko nesevin, ko nir para-wera i tweni nale suk nga inu bowrai tevir.

¹⁹ Inu bololi nanu nga marinijnij nawone nir renge melrin mare ko re kele iel ngatan. Ngok, drra ko nabb ko nousnin nga milep kele putu.

²⁰ Womujnen nial p̄irieni pumot nawon, ko navōl p̄irieni pusongsong pirpe drra. Ko vitunen nabong suk nga mevi Numal Atua nga mean mare pia-rremali vajin.

²¹ Ko renge daron ngok ko vajin, Numal pia-lai mauren tevi nir nga marverus van jin.'

²² "Ko erres kapmurrong vajin suri sev nga bowrai suri renge Iesu ngok ne Nasret. Atua eviseni nga mlilai pa derteren sen tevi Iesu suri nanu nga marinijnij nawone nir ko nelesien nir nga Iesu muloli renge derteren se Atua. Kami kamrongwose erres nanu ngok nir, suri arpelari iel bbong re liven ne kami.

²³ Ko oto pa re norrorrmien se Atua osuw nga ni mimrreni pilngi Iesu renge nevre kami. Ko kami vajin kamtor pini, suri kamloli jinibb nga marsij nir arwuse re nai pelaot.

²⁴ Ko Atua ololi emaur luwi keke renge mijen, ko ololi evel sisarow renge derteren nen. Ko mijen sete derteren nen evter rrag rrag nga purrul totkoni Iesu,

²⁵ suri Devet owrai nale san suri, owra 'Tetajer nulesi Numal elik mori tevik, ko oklik re nelik nga sete mea-metutu rragr-rag.

²⁶ Ko renge iok, nolok pir temijpal; ko nale suk keke, neiren oto renger, ko nolok sete pivitan.

²⁷ Suri Numal sete mia-marong nga neñik pimij pin. Nuvi wor se ni nga muon le, ko sete mia-marong nga nibek pumutmut renge dubb, suri nuvi jinibb nga mon re majingen sen.

²⁸ Kuviseni pa sel ne mauren nir osuw tevik, ko kuloli nuir nga komok-lik mori inu.'

²⁹ "Selek nir, evi norrorrmien nga musorsan nga bospe suri apu se kerr ngok Devet tevi kami. Emij ko pa ko artevni, ko dobbin oto malum iel.

³⁰ Ko evi propet san, ko orongwose nga Atua ololi pa rijrijen san tevi nga sete mia-tor otvi. Owrai pa tevi nga nir san re metka sen mawos ngok nabong sopen pia-ivi batu numal pirpe ni.

³¹ Devet elesi nanu nga Atua pia-loli, ko niko ospse suri Mesaea nga pia-maur luwi re mijen. Nale sen erpel: 'Atua sete elinglingi renge dubb nga niben pumutmut.'

³² "Kerr jikle rramlesi nga Atua ololi Iesu nen emaur luwi keke.

³³ Iesu ean pa mare e nga mlilik vajin tevi Atua Tata sen renge nevren rres, ko Atua elai Nemñin On tevi, erpe nga ni mirijrij pae musuw. Ko Iesu keke ejivreni Nemñin renge kem, ko ngok vajin lelingenok kamlesi ko kamrunge.

³⁴ Devet sete ean renge melrin. Ko ni bbong owra nale ngok nga muwra 'Atua owrai tevi Numal suk owra Kupsakel re devjek rres, kuptiriv

³⁵ nga inu belngi devje nuval som nir parirpe nanu san nga kupbböt ren.'

³⁶ Re iok, erres nga kerr mñeri Isrel totoklai nir rraprongwose pirres nga ewretun nga Atua mlilai Iesu ngok nga womu kamwuse re nai pelaot, ko ni ololi evi Numal ko Mesaea se kerr vajin."

Nir elep arosuri Iesu

³⁷ Daron nga jinibb nir marunge jile nale ngok, ko arunge erpe ojuji lenglengen nolor. Ko arsusi tevi Pita ko aposol mñinj keke nir arwera, "E, selek nir, kem nabloli pirpese nga nablesi mauren?"

³⁸ Pita owra lweni tevir owra "Kami kaprieni ko wor norrorrmien se kami suri nololien se kami, ko kami jikle kappaptaes renge nise Iesu Kristo, nga puloli Atua pitlasi tweni nololien se kami. Ko Atua pia-lai vajin Nemñin On ngok tevi kami.

³⁹ Suri rijrijen ngok evi se kami, ko tevi natu kami keke nir. Ko evi se keke jinibb jikle nir nga Atua piveruse nir, poro arlik ngabe ngabe."

⁴⁰ Ko Pita owra visviseni nanu elep nga pirvei norrorrmien ser. Mian ko owra "Nuwrai eterter tevi kami nga kapwolu lingi lolaren nga pivini renge dul nga marsij ngel nir."

⁴¹ Ko re daron ngok ejpari nuvasngavöl nuvatul (3000) nga marosuri nale ko marpaptaes.

Mauren se nir nga marosuri vajin Iesu

⁴² Ko nir arlai daron ser elep vajin nga martor sweri norrorrmien nga marmerr ji aposol nir; ko arirpe vajin niaken sorsan nir. Tetajer araan korti ko arlot korti.

⁴³ Ko Atua emajing vajin rrurrngi aposol sen nir re nanu elep nga marinijnij nawone nir ko nelesien nir, ko jinibb nir aririr temijpal suri.

⁴⁴ Jinibb jikle nga marosuri arok-korti kemkanñe, ko arok-vijngeni lululwenir keke re nanu jikle nga marto jir.

⁴⁵ Nir arwulwule joror nir ko arlai nevöt nen, artutweni tevi nir si nga mumrrole nanu san.

⁴⁶ Nabong jikle arok-korti lat sansan, loloim re Naim On. Arok-aan kokorti rege naim sisamis, renge nolor nga marir ko maran ngatan.

⁴⁷ Nir arok-surövi Atua, ko jinibb keke nir artorir. Ko nabong jikle Numal ololi jinibb keke sopor arlai mauren ko arini arkorti keke re gortien ser vajin.

3

Mer nga belan mñisij otur imera evel

¹ Nabong san rege daron ne loten, evi mete nial itul rivriv, ko Pita ko Jon oran rege Naim On.

² Ko jinibb san sete orongwos pivel, suri daron nga mñiak e evi naroj. Nabong jikle

selen nir arwosi vini ko arlingi re roro metali san ne Naim On nga nisen Metali nga mīrinrin mīrres. Ko okngoni nevöt ji nir nga marok-asi van loloiim ngok.

³ Mernen elesi Pita ko Jon orini nga poran loloiim, ko ongoni nga porlai nevöt sapon tevi.

⁴ Ko nuru orkulu mawos ni ormeteni, ko Pita owra "Kupmeteni komru!"

⁵ Mian ko oklu van ji nuru, orrorrmi nga pīlai nanu san ji nuru.

⁶ Ko Pita owrai tevi owra "Nevöt san ejki rragrag jik, ko nanu ma san oto jik nile belai tevim. Renge nise Iesu Kristo mēri Nasret ngok, nuwrai tevim, kuptur imera ko kupiel!"

⁷ Mian ko orrul totkoni nevren rres ko ervei nga putur. Ko vesan rres nau re belan ko bbujin belan arres luwi,

⁸ ko otur imera kasi ko evivel. Ko evivitu suri nuru aran loloiim re Naim On. Evel ko orowrow belan, osrövi vajin Atua.

⁹ Ko jinibb arlesi vajin nga ni mokrowrow belan nuru ko mok-surövi Atua.

¹⁰ Ko daron nga marlesi wose nga mivi naroj nga tetajer mok-ngoni nevöt vare rengo metali nga mīrinrin mīrres, ko nir artaol lenglengen suri nanu ngok nga mīrmali jin.

Pita ejiljilwer tevi jinibb nir re Naim On

¹¹ Mernen orrul totoni Pita ko Jon rengo naim san nga mutur re jeli Naim On nga marveruse Naim Salsal se Solomon. Ko jinibb nir artaol lenglengen ko arwolwolu vini jir.

¹² Ko daron nga Pita mīlesi delung milep marini marser rrale, ko owra "Selek nir, suri sev kamtaole nanu ngel? Suri sev kamok-meteni lengleng kem? Kamrorrmi komru nomor-majing re derteren se komru? Kamrorrmi nomor-rongwos nobor-loli mērel pivel suri bbong nomor-ivi jinibb nga nomor-rres?"

¹³ Ejki! Atua nga Epram, Aesak, Jekop ko Bīrterawareng se kerr nir elngi ni nosrövien sen tevi jinibb ne majingen sen ngok Iesu. Ni ko kami kamtekai kerasi van rengo nevre mēri Rom nir, ko kamtere ni daron nga mutur re no Paelet nir. Paelet kele owra puloli ni pivel sisarow, ko kami kammusus.

¹⁴ Kamungasi Iesu, nga muon ko mīrres. Kamngoni tevi Paelet suri jinibb nga mīrevji pini jinibb nga pivel sisarow,

¹⁵ ko kamrevji pini ni nga mītkai jinibb nir van re mauren. Ko Atua osustur lweni re mijen, kem namlesi!

¹⁶ Ko kaplesi naroj ngel. Derteren ne nise Iesu ko ololi derteren sen muto luwi. Nanu ngel nga kami kamlesi ko kamrongwose, nomor-loli suri nomor-osuri Iesu

nisen. Niko nosurien ngok ko rengo Iesu ko ololi mērel mīrres jile luwi, erpe nga kami jikle kamok-lesi vajin.

¹⁷ "Ko selek nir, nurongwose nga sev nga kami tevi mīrwomu se kami nir marloli tevi Iesu, kamloli suri sete kamrongwose sev nga kamloli.

¹⁸ Ko ngok evi sel se Atua nga puloli nale nga muwrai tweni tuwi pa parremali. Renge nale se propet sen nir, owrai tweni pa osuw nga Mesaea pia-runge pīsij, ko lelingenok otori totkoni rijrijen sen ngok.

¹⁹ Ko erres vajin nga kaprieni lululweni norrorrmien se kami suri nololien se kami, ko kapan ji Atua nga ni pītulasi tweni nololien se kami. Poro kaploli pīropok, ko

²⁰ daron nen pivini vajin nga Numal pia-lai derteren nga mimerr ko mīrres tevi kami. Ko ni pukoni Iesu vinuk nga mivi Mesaea se kami nga ni mutobbtobbue musuw.

²¹ Ko Iesu pīlik mun re melrin puwomu pianan pijpari nanu jikle parmerr luwi kele, pīrpe nga Atua muwrai tweni pa musuw re nale se propet sen nga maron ne tuwi.

²² Suri Moses owra 'Numal nga mivi Atua se kami pukoni san vini ji kami nga pia-ivi propet, osorsan erpe nga mukoni pa inu. Ni pivi san re kami kobbong. Kapvijuri ko wor pīrres nanu jikle nga pia-werai tevi kami.

²³ Jinibb nga sete mivijuri nale se propet ngok, ko Atua pia-lai tweni rengo gortien sen ko puloli pijjiki.'

²⁴ Ko Samuel kele tevi propet mīnij nen nir nga marvivitu suri arok-supsuḗ kele suri sev nga mīrmali pa lelingenok.

²⁵ Rijrijen nga Atua mīlai tevi Bīrtera se kerr nir tuwi arivi se kami, ko kami kamkorti pa rengo rijrijen nen nir. Nale nga Atua muwrai tevi Epram owra 'Rrur-rngi rengo nik metka som nir nga paravini, inu Bērij pīrres suri jinibb totoklai ne iel ngatan.'

²⁶ Niko Atua otobbtobbue jinibb ne majingen sen ko okoni womue vini ji kami. Suri Atua emrreni pīrij pīrres suri kami ko puloli kami jikle kaprieni lululweni kami rengo sel nga marsij se kami."

4

¹ Pita nuru Jon orok-rij malum tevi delung nir, ko jinibb ne sulsulen nir tevi mīrwomu se jinibb nir nga marok-metmete Naim On tevi Satusi nir arini ji nuru.

² Arlolarsi nuru suri mor-visviseni delung nir, arwera Iesu emaur luwi kele re mijen, ko ngok niko ololi nga jinibb nir nga marmij arongwose parmaur luwi re mijen.

³ Ko arrul totoni nuru ko arlingi nuru re naim ne nekaien pijpari mevinen, suri rivriv jer pa.

⁴ Ko nir elep nga marunge nale se nuru ko arosuri. Ko norman nga marlelep nir nga marosuri oruj mori nuvasngavöl nuvalim (5000) sophon.

Pita nuru Jon ortur re kot

⁵ Mevinen vajin ko jinibb nga marlelep nir se mēri Isrel nir ko Bīrterwarreng ser nir ko jinibb nevisisenien ne nale neseseien nir arkorti Jerusalem.

⁶ Arkorti nir batu jinibb ne sulsulen, nga nisen Annas, ko Kaeapas, ko Jon, ko Aleksanta, ko nir mīnij nen kele nir nga marivi metka se batu jinibb ne sulsulen.

⁷ Ko arlingi nuru ortur re liven ne nir, ko arsusi tevi nuru, arwera "Re derteren se siko rreknga re nise siko komor-loli nanu ngok ren?"

⁸ Ko Pita owun saut e Neñin On, ko owrai tevir owra "Kami jinibb nga marlelep nir se kerr mēri Isrel nir ko Bīrterwarreng nir,

⁹ kamok-susie komru erpese re majingen nga mīrres ngok nga nomor-loli rengo naroj ngel, erpese ñelan erres luwi.

¹⁰ Erres kami ko mēri Isrel jikle nir kaprongwose nanu ngel: nomor-loli re nise Iesu Kristo doNasret, nga kami kamtor pini re nai pelaot, ko Atua ololi emaur luwi re mijen. Niko re ni nisen ko, mērel mīrres luwi pa mutur re no kami ngel.

¹¹ Iesu ngel evi mēer nga Naul On muspe suri, ngel: 'Nabur nga kami jinibb nga marmajinge naim kamlesi esij ko kamwirre, evi vajin nabur nga murrul totoni naim mīterter.'

¹² Ko sete san kele orongwos pila mauren tevi kerr, ejki. Suri nais petpeti ne iel ngatan nir san ejki kele mun nga kerr rrapmaur ren."

¹³ Ko daron nga marlesi Pita nuru Jon sete ormetutu mirpok ko artaole, suri nuru orivi jinibb nawon, ko sete arsesre pelak nuru bonevis. Ko arlesi wose vajin nga morok-pitevi Iesu.

¹⁴ Ko sete arongwos parwera mun nanu san tevi nuru ren, suri marlesi bbong mēer nga mīrres luwi jile pa mutur tevi nuru.

¹⁵ Ko arkoni twenir ivare lingi gortien ser, ko nir kis arsan vajin armurri suri.

¹⁶ Ko arwerwera tevir, "Rraploli se tevi jinibb ngel nuru? Suri nir jikle nga marlik iel Jerusalem arongwos pae nanu nga milep nga morloli. Sete rramrongwos rrapvilvil ore mun.

¹⁷ Ko nga rrapror ore, setemun piasasi kele van ji mēri Isrel petpeti nir, rrapssur metu tevi nuru nga setemun porsupe kele nais ngok tevi jinibb san."

Arlinglingi tweni nuru orivel sisarow vajin

¹⁸ Ko arverus nuru vajin vini. Ko arwera eterter tevi nuru nga setemun porsupe ko setemun porvisiseni kele nise Iesu, pijki.

¹⁹ Ko Pita nuru Jon orwera lweni tevir: "Erpese? Erres re no Atua nga nobor-vijuri nale se kami, rreknga nobor-vijuri nale se Atua? Erres kami kaprunge suri kami tevi.

²⁰ Ko komru ma, sete nomor-rongwos nobor-lingi kurtweni sev nga nomor-lesir ko sev nga nomor-runger. Ejki, noborwera twenir ko wor."

²¹ Ko mian ko artortori nuru eterter kele sophon, ko arlinglingi tweni nuru vajin, orivel. Sete arongwos partor sweri sel san nga partor alje nuru ren, suri delung nir arlesi sev nga morloli erres pelak, ko arsurövi Atua rengen.

²² Suri mēer nga nanu nga milep ngok miplari ren nga morloli mīrres nen evi jinibb tera pa sophon, sian asi ngavöl ivij (40).

Loten se kalesia nir

²³ Orivel sisarow vajin, ko ormawos kele kalesia nir sophon, ko orwera tweni nanu nga batu jinibb ne sulsulen nir ko Bīrterwarreng nir marwera tevi nuru.

²⁴ Ko kalesia nir, daron nga marunge nale se nuru ngok, ko arlot korti van ji Atua, arwera "Numal nga mian mare, nik nga kummajing melrin ko iel ngatan ko dis ko nanu jikle nga maro rer.

²⁵ Renge derteren se Neñin On kurij rrrurngi rengo Devet apu se kem, nga mivi jinibb ne majingen som, re nale ngel: 'Suri sev jinibb ne vare nir arlolar pelak erpok? Suri sev armurri nanu nga marsij, nga sete marongwos parivi nanu san?'

²⁶ Numal ne iel ngatan nir artur korti tera nuval, ko jinibb nga marlelep nir kele arini lat sansan tera nuval, artere Numal Atua ko Mesaea sen nga mutobbobbue.'

²⁷ Ewretun, eplari pa erpok bonevis rengo ngaim ngel mawos, nga Erot nuru Ponjes Paelat nuru tevi jinibb ne vare nir ko mēri Isrel nir kele arini lat sansan, arkorti artere Iesu nga mivi Mesaea som, nga kumtobbobbue.

²⁸ Ko arloli bbong sev nga derteren som ko marongen som morlingi wowomu pae nga piplari.

²⁹ Ko lelingenok, Numal Atua, kupmeteni suri nale ne balpalen ser, ko kuploli kem jinibb ne majingen som, no kem pitertter ko nabwera tweni nale som.

³⁰ Ko kupsareni nevrem ko kupjipari jinibb nga puloli jinibb parres luwi, ko nga majingen nga marlelep marres nir parpelari rengo nise jinibb ne majingen som nga muon, Iesu."

³¹ Daron nga marlot jile musuw, ko narñi eterure naim nga marlik ren. Ko nir jijle arwun saut e Nerñin On, ko ololi nor eterter vajin nga parwera tweni nale se Atua.

Artututweni joror

³² Ko kalesia nir, nolor ko nemñir arivi sansane. Ko setemun nir san orrorrmi joron arivi se ni esan, ko arwera joror evi se nir jijle.

³³ Ko aposol nir arwera tweni nga Numal Iesu emaur luwi re mijen tevi derteren nga milep, ko Atua erij erres ðelak suri nir jijle.

³⁴ Ko sete nir san nevren omrrol rragrage nanu san. Suri nir jile nga joror milep, erpe dan ko naim, ko arwulwuler, ko arlai nowli nanu nga marwulwul ngok e nir,

³⁵ ko arlai tevi aposol nir. Ko nir artututweni tevi jinibb si nga nevren mumrrol.

Banapas

³⁶ Ko jinibb san nga nisen Josep, metka se Livae san, nga mñiak rengo Saepras. Ko aposol nir arlingi nisen mñinij kele san, arveruse Banapas, nga muwra puwra 'jinibb nga moksusi nolo jinibb nir mian mare.'

³⁷ Ko re murrun ngok, ni owulwule bebje dan sen, ko ela nowlin vini ko elai tevi aposol nir.

5

Ananaeas nuru Sapaera

¹ Ko jinibb san nisen Ananaeas nga nesen sen nisen Sapaera owulwule bebje dan se nuru san.

² Ko elngi jer nowlin sopor ojpon, ko elai sopor bbong vini tevi aposol nir. Ko nesen sen kele orongwose sev nga muloli ngok.

³ Ko Pita owrai tevi, "Ananaeas, erpese Demij musongni nolom nga kumkerkerasi Nerñin On, ko kumlingi jere nowli dan som sapon?"

⁴ Daron nga setewor kumwulwul wore dan, ko evi som ko. Ko daron nga kumwulwul pae, ko nowlin oto re nik nevrem malum nga kuploli sev nga kummerreni e, erres kobbong. Ko suri sev norrorrmien ne gerisen mivini muto re nolom? Sete kukrekrasi jinibb nir, ko kukrekrasi Atua kele."

⁵ Ko Ananaeas, daron nga murgene nale sen ngok, ko eil jubbul vitan, ko emij pin. Ko nir nga marunge nanu ngel, metuen nga milep evini rer suri.

⁶ Ko melakel nir arnuðe ore, ko arwosi tweni van ko artevni.

⁷ Vitunen vajin, erpe mete nial itul arasi, ko nesen sen evini lolaim. Mivini ko sete orongwose sev nga miplari ji diwen sen.

⁸ Ko Pita owrai tevi, "Kupwerai ta tevik. Ngel evi nowli dan totoklai le pa nga komor-wulwule?" Ko ni owra "O-o, ngok ko."

⁹ Ko Pita owrai tevi, "Erpese kamru korti komor-marong komor-wera kopor-rorrorrow silveni Nerñin se Numal? Kuprunge dan ðela nir nga martevni diwen som arini pa roro metali, ko parwosi tweni nik kele."

¹⁰ Ko vinnen eil jubbul evesane ngatan rengo Pita ðelan, ko emij pin. Ko melakel ngok nir arini lolaim, ko arlesi nga ni mimij pa; ko arwosi tweni ivare, ko aran artevni tevi diwen sen.

¹¹ Ko metuen nga milep evini rengo kalesia jijle nir suri, ko rengo nir jijle nga marunge.

Majingen nga marinijnij nawone nir

¹² Ko aposol nir arok-loli majingen nga marinijnij nawone nir elep tevi jinibb nir. Ko nir jijle arkorti rengo naim salsal se Solomon nga muto ore Naim On.

¹³ Jinibb jijle nir arsurövir, ko nir jijle nga sete marivi kalesia armetutu nga paran parkorti tevi.

¹⁴ Ko gortien ne kalesia nir nga marok-osuri Numal, ngok norman ko nesevin nir, okruj van mare tetajer.

¹⁵ Suri nanu ngok nir, ko jinibb nir arwoswosi jinibb nga marmesi nir vini re sel nir, ko arlingi nir sopor re maling, ko nir sopor rengo boriti nga marðelsenir. Armerreni nga poro Pita ðiasi, ko poro bbong nerñin ðisal van pijpari nir sopor.

¹⁶ Ko delung elep ne nir nga marlik rengo ngaim wowarrens nga marto rrale Jerusalem kele arwoswosi jinibb nga marmesi vini, tevi nir nga nerñin nga marsij marsisilvir; ko nir jijle arres luwi.

Arloli esij tevi aposol nir

¹⁷ Ko batu jinibb ne sulsulen, ko nir nga markorti re gortien sen, nir ngok ko Satusi nir, nolor elelep temijpal. Ko artur imare,

¹⁸ ko arrul totoni aposol nir, ko arwirrer van re naim ne nekaien.

¹⁹ Ko anglo se Numal san evini nat mupong, ko etasi metali ne naim ne nekaien ko eptevi twenir ivare. Ko owrai tevir:

²⁰ "Kapan kaptur rengo Naim On ko kapwera tweni ðetðeti nale ngel ne mauren tevi jinibb nir."

²¹ Ko daron nga marunge nale ngok musuw, mian ko nat ea-rinrin rranu vajin, ko arini re Naim On, ko artipatan arvisviseni jinibb nir.

Mian ko batu jinibb ne sulsulen tevi gortien sen nir arververus kortoni gortien nga milep se ðirterwarrens nir nga marwowomue ðeri Isrel nir arini lat sansan.

Ko arkoni jinibb ser sopor paran re naim ne nekaien ko parpitevi aposol nir parini.

²² Ko daron nga jinibb nen nir maran, ko sete arlesir re naim ne nekaien. Ko arluwi vini jir kele, ko arwera arwera

²³ “Daron nga namjipari naim ne nekaien, ko namlesi metali nen arkikiore erres pelak, ko lartul nga martur metmete artur metmete erres rengo roro metali. Ko daron nga namtasi metali vajin, ko sete namlesi jinibb san loloim.”

²⁴ Ko daron nga batu jinibb nga mok-metmete Naim On tevi batu jinibb nga marsulsul nir marunge nale ngok, ko norrorrmien ser ekarkar, ko arrelenge sev ko eplari jir.

²⁵ Mian ko jinibb san evini ko owrai tevir, “E lartul! Jinibb ngok nir nga kamlingir re naim ne nekaien artur lelingenok re Naim On ko arok-visviseni jinibb nir.”

²⁶ Ko batu jinibb nga mok-metmete Naim On eptevi jinibb sen sapor aran ko arpitevi twenir. Ko sete aron tertere nir, suri armetutue delung nir tartuwuwer e nevöt.

²⁷ Arpitevir van ko arloli artur re no gortien ser. Ko batu jinibb ne sulsulen erij tevir, owra

²⁸ “Namwera pa eterter tevi kami nga sete kami kapvisisenir rengo nais ngok. Ko erpese? Kamloli iel Jerusalem owun saute nevisvisenien ngok! Ko rrek kammerreni kaploli drra Iesu pibbölji kem!”

²⁹ Ko Pita tevi aposol nir arwera lweni tevir: “Nabosuri wor Atua ko womu ne jinibb.

³⁰ Numal se tata se kerr nir ololi Iesu emaur luwi re mijen, nga kami kamrevji re nai pelaot.

³¹ Atua elngi ni esakel mare re nevren rres, nga ni puwomu re kerr ko pila mauren tevi kerr, nga kerr meri Isrel nir nolo kerr purongwos pululuwi, ko nga pitlasi tweni nololien se kerr.

³² Ko kem namok-rij sen rengo nanu ngel nir, tevi Nemiin On nga Atua mila tevi nir nga marosuri ni.”

³³ Ko daron nga nir nga markorti ngok nir marunge nale ngok, ko arlolar lengleng ko arwera parevji pinir.

³⁴ Ko Parasi san nga mok-korti tevir rengo gortien ngok, nisen ko Gameliel, evi jinibb ne nevisvisenien ne nale ne nesereien san nga jinibb jikle nir arsurövi ni. Ko ni otur imare ko owra partekai tweni mun aposol nir van vare e beblen.

³⁵ Musuw, ko owrai vajin tevi selen nir, owra “Meri Isrel nir, rraprorrmi pirres pelak ko wor re sev nga rramwera rraploli tevi lartul ngok nir.

³⁶ Suri rramrongwose bonevis sapon, san otur imare, nisen ko Tutas. Ni elngi lweni ni evi jinibb san. Ko jinibb

elep sapon, ejpari ongut vavij (400) sapon arpitevi. Ko mian ko mernen arevji pini, ko jinibb sen nir arwolu sarrsarr; ko ngok evi vajin bongsi majingen sen.

³⁷ Ko vitunen Jutas, meri Galili ko san, otur imare re daron nga marok-eve jinibb e nir. Ko ni ervei tweni jinibb sopor arvijuri ni. Ko mian ko ni kele arevji, ko nir jikle nga marvijuri ni arivel sarrsarr.

³⁸ Ko ngok, re nanu nga miplari ngel vajin, nuwra bowrai tevi kami: sete rraploli nanu san tevi jinibb ngok nir. Rraplinglingir parivel. Suri poro nga norrorrmien ser ko majingen ser eplari re jinibb kobbong, ko pivitan kobbong.

³⁹ Ko poro ma eplari re Atua, ko sete rramrongwos rraploklaksir. Poro pipok ko kerr rrapalpal kobbong tevi Atua.” Ko nir armuronge erres.

⁴⁰ Ko arveruse aposol nir arini kele jir, ko artelmajir ko arwera eterter tevir nga setemun parsupe nise Iesu; ko arlinglingir arivel.

⁴¹ Ko nir arivare lingi gortien ser nen ko arir kobbong nga Atua elesi nir arviter nga jinibb artelmajir suri nise Iesu. Ko sete armanun rragrrage.

⁴² Ko re nabong ko nabong, sete amosi nga parvisviseni ko parwera tweni nospen nga mirres suri Iesu nga mivi Kristo nga Atua mutobbobue, rengo Naim On, ko rengo naim nir.

6

Arlingi jinibb ebud parmajng tevi kalesia nir

¹ Jinibb se Iesu elep malum arini. Ko mian ko laten san eplari jir. Renge devjen evi meri Isrel nga marok-rij nale se meri Gris nir, ko rengo devjen evi meri Isrel nga marok-rij nale ser wor. Ko nir re devjen nga marok-rij nale se meri Gris nir artere nir re devjen, arwera sete armeteni suri nesevin ser nir erres re daron nga martututweni nevöt ko nanen nabong jikle tevi nesevin nir nga diwen ser marmij lingir.

² Ko aposol esngavöl drromon eru arverus kortoni kalesia jikle nir, ko arwera tevir: “Sete erres re nga kem nablinglingi kurtweni majingen ne nale se Atua ko nabpelak nga nabmetmete nevöt.

³ Ko niko, niaken se kem nir, kaplingi jinibb piebut re kami nga jinibb nir martorir, ko nga marwun saute Nemiin On ko norongwosien, ko kem nablingi nir parla majingen ngel.

⁴ Ko kem ma, nabmajng tetajer rengo majingen ne verusen ko ne nale se Atua.”

⁵ Ko kalesia jikle nir arlesi nale ser ngok erres, ko arlingi Steven, jinibb san nga

muwun saute nosurien ko Nem̄in On, ko Pilip, ko Prokoras, ko Nikeno, ko Timon, ko Pamenas, ko Nikolas nga mivi m̄eri Antiok san, nga womu evi jinibb ne vare san ko vitunen ea-korti vajin tevi m̄eri Isrel nir ko oklot tevir.

⁶ Ko kalesia nir arpitevi nir ngok, arlingir artur re no aposol nir, ko nir arlot ko arlingi nevrer rer.

⁷ Ko nale se Atua ok-asasi, ko jinibb se Iesu nir nga renge Jerusalem elep temijpal malum arini, ko delung elep ne jinibb ne sulsulen nir arosuri keke.

Arrul totoni Steven

⁸ Steven ngok evi jinibb san nga Atua m̄irij m̄irres suri, ko elai derteren nga milep tevi. Ko ololi majingen nga marini-jnij nawone nir re no jinibb nir.

⁹ Ko sete epriv, jinibb sopor artur imare ko artere. Nir arivi jinibb ne naim gortien san se m̄eri Isrel nir nga bonevis marivi pa demij maur, ko lelingenok arivel sisarow vajin. Ko niko arverus naim gortien ser, arwera 'Naim gortien se nir nga marivel sisarow'. Nir ko arivi m̄eri Isrel nga marivel Saerin ko Aleksantria vini. Ko m̄eri Isrel sopor keke nga marivel Silisia ko Esia arkorti keke tevir, ko arlat tevi Steven.

¹⁰ Ko Nem̄in On ololi Steven norongwosien sen elep, ko daron nga m̄irij e, nir sete arongwos parasi ni re rijen sen.

¹¹ Mian ko arkonkoni silveni jinibb sopor nga paran parwerai, "Namrunge pa ni erij esij tere Moses ko tere Atua."

¹² Arok-rij erpok mian, ko arserranu re nolo jinibb nir ko b̄irterwarreng nir ko jinibb nevisvisenien ne nale neseseien nir; ko nir vajin artur imare ko aran arrul totoni Steven, ko arevei van re naim gortien se numal ser nir.

¹³ Ko arlingi jinibb sopor partur ko parij re nale gerisen ser. Ko lartul nen arwera "Merel okrij tetajer tere Naim On ko tere nale neseseien se Atua.

¹⁴ Ko namrunge ni owrai Iesu ne Nasret ngok pulokloksi Naim On ngel ko p̄irien liken nga Moses m̄ila tevi kerr pa."

¹⁵ Ko nir nga marlik re naim gortien ngok armet teretre Steven; ko arlesi ni non erpe no anglo san.

7

¹ Ko batu jinibb ne sulsulen osusi tevi Steven owra "Evi weretunen ko wor?"

² Ko Steven erij weli lweni owra "Tuwak ko tata nir, kapmurrong inu! Womunen ko apu se kerr ngok Epram mia-van nga p̄ilik Aran, daron nga m̄ilik malum re vanu ngok Koltia nga muto re vanu nga milep ngok Mesopotamia,

³ ko Atua ne nosrövien eplari jin; ko owrai tevi owra "Kupiel lingi vanu som ko metka som nir ko kupan re vanu san nga bea-viseni tevim."

⁴ Mian ko Epram evel lingi vanu sen ko ean etipatun liken sen Aran. Ko vitunen ko tata se Epram ea-mij, ko Atua ololi Epram evel oruj vini re vanu ngel nga rramlik ren lelingenok.

⁵ Ko renge daron ngok Atua sete elai rragrag bebje dan sopon tevi Epram, ejki, ko ololi ma rijrijen tevi nga pia-lai dan nir tevi. Ko owra dan nir parivi se ni tevi metka nga para-rremali renge ni. Ko daron nga muwrai ngok e, ko Epram natun ejki wore ko!

⁶ Ko ngel evi nale se Atua nga muwrai tevi, owra 'Metka som nir para-ivel lingi iok ko paran parlik renge vanu m̄inij nga parivi demij maur ie, ko parlik renge nekaien nga m̄iterter pijpari sia pungut pivavij (400).'

⁷ Iok os̄pe suri Ijip. Ko Atua owra 'Inu bea-virrvirrali nir nga marmajing ser; ko metka som nir para-ivel lingi vanu ngok ko parluwi parsurövik iel.'

⁸ Ko Atua elai murrun ne bae tevi Epram, nga miviseni nga Epram evijuri vajin sel se Atua. Natun Aesak ean re bae daron nga bongin muowil e. Ko Aesak keke ololi tevi Jepok nga m̄ilai van re bae, ko Jepok keke ololi erpok nga m̄ilai natun esngavöl dromon eru maran re bae, nir ngok nga marivi b̄irtera se kerr ne tuwi.

Steven os̄pe suri b̄irtera ser nir

⁹ "Jepok natun nir nolor eleplep tevi tasir Josep, ko arwulwule nga pian pivi demij maur renge vanu ngok Ijip. Ko Atua emetmete Josep,

¹⁰ ko etkai lilane erres; ko ololi easi renge daron nga marterter nir nga marok-pelari jin. Daron nga Josep mivini vajin mutur re no batu numal se m̄eri Ijip nir; ko Atua ololi norongwosien sen ean mare tevi murrun nga m̄irres p̄elak sen. Ko numal nen ololi Josep evi jinibb nga mian mare temijpal, nga pimmetete Ijip totoklai ko pimmetete majingen ne naim sen keke.

¹¹ "Sete epriv daron nga m̄iterter san ejpari Ijip ko Kenan, nga nanen ejki. Ko b̄irtera ngok se kerr nir arunge esij lengleng suri nanen ejki.

¹² Ko daron nga Jepok murunge nga nanen muto Ijip, ko okoni natun nir, b̄irtera ngok se kerr nir, aran. Ngok evi womujnen nga mara-van rrongi ie.

¹³ Ko renge daron m̄inij keke nga maran, ko Josep eviseni ni limjer vajin tevi tuwan nir; ko numal se m̄eri Ijip nir ornge jilweren suri metka se Josep nir.

¹⁴ Mian ko Josep elai nale van ji tata sen Jekop nga pipitevi metka sen nir parini parlik Ijip. Renge gortien ngok nir ejpari ngavöl ebut drromon elim (75) renge nir totoklai.

¹⁵ Ko Jekop tevi birtera ngok se kerr nir ne tuwi arivel lingi lat nga marlik e ko aran arlik Ijip; ko arlik ie ejpari daron nga mara-mij e.

¹⁶ Ko artevnir lat nga marok-tivtavin e san nga Epram muwli tweni pa tevi metka se Amoro nga renge vanu ngok Sekem.

Steven ospe suri Moses

¹⁷ "Ko daron evini mori vajin nga Atua puloli rijrijen sen ngok nga mlai pa tevi Epram pirimali. Renge daron ngok, metka se birtera se kerr ngok nir arvasus ko emaur elep kele.

¹⁸ "Ko eanan ejpari nga jinibb minij kele mivi batu numal kele ne Ijip, nga sete murrorrmi tutune Josep.

¹⁹ Osur terter ko ekrekrasi birtera ngok se kerr nir, ko osulngatir nga parwosi tweni bipi ser nir renge naim ser ko parling twenir vare nga parmij.

²⁰ Ngok evi daron mawos nga bipi nga mirres pelak ngok Moses miak ren. Tata sen ko tasu sen ormetmete erres renge naim ser ean ejpari navöl itul,

²¹ mian ko orlingi tweni vare erpe nga neseseien se batu numal muwrai. Mian ko natu numal nesevin eskai, ko otori tweni ko emetmete, ko elai erpe natun mawos vajin.

²² Arvisiseni renge norongwosien se meri Ijip nir, ko evini evi jinibb nga milep renge rijen ko re majingen kele.

Moses ololi lesi nga piwilwil se meri Isrel nir

²³ "Daron nga Moses sian mijpari ngavöl ivij (40) ko orrorrmi wor nga pian pilesi oti lat nga meri Isrel nir liken ser muto suri.

²⁴ Mian ko elesi meri Ijip san nga mirevji jinibb nga nir san; ko ean erevji pini meri Ijip nen.

²⁵ Ni orrorrmi metka sen nir parongwose nga Atua pimajing rurrngi ni nga puloli nir parivel sisarow. Ko nir sete arongwose.

²⁶ Ko mevinen kele, elesi meri Isrel eru orpalpal, ko evan nga pijnge nuru. Ko owra "E, erpese komor-ivi niaken bbong, ko komor-palpal lululweni kamru mirpok?"

²⁷ Ko wela nga mokloli misij tevi nuru tuwen osoni tweni Moses ko owrai tevi owra "Erpese, si elngi nik nga nik kuptur womue kem, ko nga kupwera suri lat nga puto suri tevi kem?"

²⁸ Rrek kumrreni kuprevjik pirpe kumrevji pini meri Ijip ngok miniv?"

²⁹ Daron nga Moses murunge nale ngok, ko owl lingi Ijip. Ko ean elik erpe jinibb neturvitan renge vanu ne Mitian. Ko natun nuru ora-iaak ko ie.

Moses ornge nale se Atua

³⁰ "Sia ngavöl ivij (40) easi, ko anglo san ermmali ji Moses renge duru nai nga welili san nga min, mori botwen nga Sinae.

³¹ Moses etaol lenglengen re sev nga milesi, ko oruj van mori nga pilesi lilane. Ko etaol nga Atua erij tevi,

³² owra "Inu nuvi Atua se birtera som nir. Inu nuvi Atua se Epram, Aesak ko Jekop." Mian ko Moses eririr temijpal ko emtutu nga pimteni.

³³ Ko Atua owrai tevi Moses owra "Kuplai tweni but nga kumrae renge nolo belam, suri lat nga kumtur ngok e evi lat nga muon ko.

³⁴ Nulesi ko pa nga jinibb suk nga marlik Ijip nir arunge lengleng esij, ko nurongwose norongen nga muto jir, ko nuvini nga belai twenir. Ko kupini, bokonim van Ijip.

Meri Isrel arungasi Moses

³⁵ "Ngok Moses nen kele kobbong nga meri Isrel marungasi ko marwirr nale nga muwra "Erpese, si elngi nik nga kuptur womue kem ko kupwera suri lat nga puto suri tevi kem?", Atua kobbong osusture ni. Okoni anglo nga miplari ji Moses renge nai ngok nga nabb muroror rengen mare nga pususture ni pivini pivi jinibb nga milep ser, ko nga piwilwil se nir.

³⁶ Moses ngok ololi nanu nga marinijnij nawone nir Ijip, ko etkai tweni meri Isrel nir Ijip van re dis nga musongsong e. Ko etkair kele sia ngavöl ivij (40) van renge lolo merwer, ko ololi nanu nga marinijnij nawone nir kele wor.

³⁷ Ko Moses ngok kobbong nga muwrai tevi meri Isrel nir nga muwra 'Atua pususture propet san re kami pirpe nga mususture inu. Ko ni pivi kele san re kami san.'

³⁸ Moses ngok ko etkai jinibb nir ko eser kortonir renge lolo merwer, mian ko anglo erij tevi renge botwen ngok nga Sinae. Lok ko, Atua elai nale ne mauren tevi nga pivini pivijngeni tevi kerr.

³⁹ "Ko birterawareng se kerr nir armusus parosuri Moses. Arong tweni nale sen ko arrorrmi lenglengen nga parluwi kele van Ijip e.

⁴⁰ Ko arwerai tevi Eron arwera "Wurru, kupmajing ta atua sopor nga parwowomu ko kerr rrapok-vijuri. Suri Moses ngok nga mitkai tweni kerr Ijip nga rrapini iel, ko rramreleng vajine, erpese rengen."

⁴¹ Renge daron ngok ko armajing nanu san nga marrongrongi re natu buluk nga

parsurövi erpe atua ser, ko arevji nanu rrum ko arloli nanen nga milep san. Arsurövi sev nga nevrer bbong m̄imajinge.

⁴² Ko Atua esir duren tevir ko elinglingir arsurövi moju nir. Ngok erpe nga Naul On muwrai re naul se propet nir muwra 'Meri Isrel nir, tetajer renge sia ngavöl ivij (40) renge lolo merwer kamok-revji nanu rrum nir nga kaploli sulsulen rengen, ko sete kamsurövi inu, ejki.

⁴³ Tetajer kamok-wosi devji ngok ne atua m̄inij ngok Molok tevi pija ne moju se atua ngok se kami Reban. Molok ko Reban ngok kamok-surövi nuru. Renge murrun ngok, inu boji tweni kami kapan ngasue re devjen van ngasu ngasue Bapilon.

Tuwi ko pa vini, Atua okwilwil se m̄eri Isrel nir

⁴⁴ "Devji nga B̄irterawarrang se kerr nir nga marok-surövi Atua rengen otur tevir kele renge lolo merwer. Devji ngok kob-bong Atua owrai tevi Moses nga p̄imajinge, ko armajinge suri norngov nga Moses m̄ilesi.

⁴⁵ Vitunen, daron nga B̄irterawarrang se kerr nir marvivotu suri Josua, arini nga parlai dan ngel. Ko nir arlai devji se Atua ngok tevir. Renge daron ngok, Atua oji tweni jinibb nir, ko arwolu lingi B̄irtera se kerr nir. Ko devji se Atua ngok oto osorsan ean ejpari daron nga Devet mivi batu numal.

⁴⁶ Atua eir suri Devet, ko Devet ongoni nga poro orongwose p̄imajing naim rres san nga m̄eri Isrel nir parok-surövi Atua rengen vajin.

⁴⁷ Ko mian ko Devet sete emajinge, ko Solomon ma emajing naim nen tevi Atua.

⁴⁸ "Ko ewretun, Atua ngok nga mian mare temijpal sete orongwose p̄ilik renge naim nga jinibb m̄imajinge, erpe nga propet muwrai daron nga m̄irij renge nise Numal muwra

⁴⁹ 'Melrin evi nai seksakel suk, ko iel ngatan evi lat nga B̄ejingteni Belak ren. Naim nga mirpese ko san kuwra kupmajinge tevik? Ngabe mawos ko inu bea-mosi ren?

⁵⁰ Inu numajing nanu totoklai nir.'

Meri Isrel sete arosuri Atua

⁵¹ "O, batu kami eterter p̄elak, norror-mien se kami erpe bbong jinibb ne vare nir! Sete kamrongwose kaprunge nale, ko kamsorsan tevi B̄irtera se kerr nga tetajer kamok-palpal tere Nem̄in On.

⁵² B̄irterawarrang se kerr nir arloli sel nga m̄isij milep tevi propet p̄etp̄eti ne tuwi nir. Arevji pini propet nga muwra visviseni m̄er nga muosuri Atua nga pia-vini vitu, ko lelingenok kamtere ni ko kamrevji pini.

⁵³ Anglo nir arlai nale nesesreien se Atua vini tevi kami, ko setewor kamosuri."

Artuwe pini Steven

⁵⁴ Ko daron nga jinibb ne gortien ngok marunge nale se Steven, nolor eirarsi ko arorrliw tevi.

⁵⁵ Ko Steven owun saut e Nem̄in On, ko oklu van mare renge melrin; ko elesi nosrövien se Atua, ko Iesu kele nga mutur renge devjen rres ji Atua.

⁵⁶ Mian ko owra "Inu nulesi metali ne melrin et̄pir, ko Jinibb Mawos otur renge devjen rres ji Atua."

⁵⁷ Mian ko jinibb ne gortien ngok arkikail van mare ko artop ore boror, ko arwolu mawose Steven.

⁵⁸ Ko arrul totkoni musuw, ko arevei tweni renge ngaim ngok, ko arok-tuwtuwe nevöt e vajin. Ko nir nga marij tere Steven aruri tweni sunsun ser sopor ko arlai tevi m̄elakel san, nisen Sol, nga ni pimetmete; mian ko artuwe vajin Steven.

⁵⁹ Ko daron nga jinibb nir marok-tuwtuwe suri kele, ko Steven everus owra "Wurru Numal Iesu, kuprunge drrelak ko kuplai inu nem̄ik pivinuk piptevim."

⁶⁰ Mian ko ejipa van ngatan ko ekail van mare owra "Numal, sete kupvirrvirrali nir renge sev nga marloli ngok." Daron nga muwrai jijle mirpok musuw, ko osrow pini.

8

Sol ok-ojoi jinibb se Atua nir

¹ Ko Sol elesi erres kobbong nga mar-tuwe pini Steven. Ko renge nabong mawos ngok, Sol tevi m̄eri Isrel nir artipatun nga parloli p̄isij pilep tevi kalesia nir nga marlik Jerusalem. Ko kalesia nir arwolu lingi ngaim ngok ko arwolu van renge vanu karkar nga Jutia ko Sameria, ko nir esngavöl drromon eru nga marivi aposol kobbong arlik jer Jerusalem.

² Ko m̄eri Isrel sopor nga marvijuri lilane Atua arunge esij suri Steven, ko arlai niben ko artengsi ko aran artevni.

³ Ko Sol olokloksi torrlai kalesia nir, ko etkai jinibb sen nir arivel karkar Jerusalem renge naim nir ko arrul totoni kalesia nir, norman ko nesevin kele, ko arlingir van renge naim ne nekaien.

Jinibb arwerai tweni nosp̄en nga m̄irres se Iesu Sameria

⁴ Ko daron nga Steven mimij, jinibb se Atua nir arwolu lingi Jerusalem, aran lat karkar ko arvisviseni suri nise Iesu.

⁵ Ko jinibb san, nisen Pilip, ean kele renge ngaim nga milep ne Sameria ko ewerwer suri nise Iesu, nga mivi Mesaea.

6 Ko jinibb p̄etp̄eti renge ngaim nen armerreni parunge lilane nale se Pilip, suri arunge nale sen nga m̄irres ko arlesi neleseni nir nga ni mulolir nga marviseni derteren se Atua tevir iok.

7 Nir elep neñin nga marsij marsilvir, ko neñin nga marsij nen arkail van mare ko arivare lingir arivel. Mian ko Pilip ololi nir elep nga devje niber marmij arres luwi, ko nir nga sete marongwose parivel arivel luwi kele.

8 Ko nir nga marlik iok daron nga marlesi ko arir lenglengen.

Jinibb ne botut san, nisen Saemon

9 Ko renge ngaim ngok kele, jinibb san nisen Saemon elik iok nga muloli botut sen, jinibb marok-taole bonevis pa. Ko okwera kele erpok "Inu nuvi jinibb n̄inij san tevi derteren lele nir."

10 Ko nir jikle renge ngaim ngok nga marivi jinibb ko nga marivi jinibb nawon kele, arosuri sev nga muwrai, mian ko arwera "O, ewretun morok derteren se Atua eptevi."

11 Ko arok-murronge ni daron elep pa nga ni mokloli marok-taole nanu nga mokloli nir.

12 Ko vitunen, daron nga Pilip mian m̄iwerwer tevir suri batun vanu se Atua nga pia-pelari ko suri Iesu Kristo, arunge nale sen. Ko ni epaptaese nir, ngok nesevin ko norman.

13 Ko Saemon kele osuri nale se Pilip, ko arpaptaese ni. Ko ngabe nga Pilip mian e, ko Saemon kele eptevi; ko daron nga n̄ilesi nanu nga marinijini nawone nir nga miviseni derteren se Atua nga Pilip muloli, ko etaol ko eririr.

14 Ko aposol nir esngav̄ol drromon eru nga marlik iok Jerusalem arunge nale suri m̄eri Sameria nga marosuri pa nale se Atua osuw, mian ko arkoni Pita ko Jon nga oran jir.

15 Mian ko oran jir, ko daron nga morpelari jir, ko orlot nga Atua p̄ilai Neñin On tevir.

16 Suri Pilip epaptaese nir renge nise Iesu Kristo kobbong, ko Neñin On setewor ean renger.

17 Ko Pita ko Jon orlingi nevre nuru renge batu nir, mian ko Neñin On ean esilvir vajin.

18 Ko Saemon daron nga n̄ilesi aposol ngel nuru morlingi nevre nuru renge batu nir ko Neñin On m̄isilvir, otur mera ko elai nev̄ot nga milep vini ko esareni tevi Pita ko Jon ko owra tevi nuru owra

19 "Ei, kopor-lai kele derteren ngok tevik bevel tevi, ko jinibb si nga ðelngi nevrek rengen, ko ni kele Neñin On p̄isilvi."

20 Mian ko Pita owrai lweni tevi owra "E, nik kurongwose kupwuli sev nga Atua m̄ilai nawone tevi jinibb? Nik tevi nev̄ot som koporan korti renge nejikkien!

21 Sete kuma-pitevi kem rragrrag renge majingen ngel, suri nolom sete osorsan renge no Atua.

22 Kuprieni nolom renge sev nga komok-loli ngok, ko kuplot van ji Atua nga ni p̄itlasi nik renge murrun nga komok-loli mirpok.

23 Suri inu nurongwose nga lol leplep nga marsij elep arto nga demij muloli markikair renge nolom."

24 Mian ko Saemon owrai tevi Pita ko Jon owra "Wurru laru, koporlot suri inu nga Atua p̄ilai se inu, nga nanu nga m̄isij nga komor-werai ngok sete p̄irrmali ji inu."

25 Mian ko aposol nga nuru orsupe nale se Atua tevi jinibb nir ko sev nga morlesi Numal muloli, ko vitunen morsuw, orivel lingi ie ko orluwi van Jerusalem e. Ko daron nga morivel suri sel, orok-werwer suri nospen nga m̄irres se Iesu Kristo renge ngaim elep nga Sameria.

Pilip erij tevi m̄eri Etiopia san

26 Ko anglo se Atua san eplari ji Pilip ko owra "Pilip, kupan iak ko kupiel van renge sel nga m̄itipatun Jerusalem ko mian Gasa e." Sel ngok easi renge lolo merwer.

27 Mian ko otur mera ko evel van. Daron nga miplari, ko elesi m̄eri Etiopia san esakel renge leñetiti sen, ko okwolu suri sel vini. Mernen artevei evi demaw, ko evi jinibb nga milep san nga mokmetmete nev̄ot se kwin nga Etiopia nga marveruse nisen kele san Kantes. Mernen ean Jerusalem nga pulot tevi Atua.

28 Ko daron nga musuw ko esakel renge leñetiti nga pulwi, ko okeve naul se propet Aesea.

29 Mian ko Neñin On erij tevi Pilip owra "Pilip, kupan mori leñetiti ngok ko kupiel jelin."

30 Ko Pilip ean ko okivel mori leñetiti nen. Ko ornge m̄ernen mokeve nale se propet Aesea. Mian ko Pilip owra tevi m̄er nga owra "E, nik kurongwose, nale nga komok-eve ngok owra puwra sev?"

31 Ko m̄er nga owra "Borongwose p̄ipese? Poro jinibb san pivisiveni tevik, ko borongwose ko. Kupsa vini mare, ko kupvisiveni murru nale ngel tevik".

32 Ko nale se propet Aesea nen le ngel: "Erpe sipsip san nga marlai nga parevji pini, erpe natu sipsip nga martevei tweni silvin ko sete murongwose p̄iting, ko m̄ernen sete orongwose puwrai nanu san, ko omurrong kobbong.

³³ Ko nir arwer rrerrarre renge sel nga m̄isij. Mernen sete orongwos natun putoe, suri artor otvi mauren sen.’

³⁴ Mian ko m̄eri Itiopa nen osusi tevi Pilip owra “Kupwerai ta tevik, isi ko ngok nga propet ngok moksufe suri ngok? Ok-sufe ni kobbong, rreknga oksufe jinibb m̄inij kele san?”

³⁵ Ko Pilip esa jingon ko ospe suri nale se Aesea ngok ko suri nospen petpeti nga m̄irres suri Iesu Kristo.

³⁶ Orjilwer ortajer orini, ko orremali renge nuwi seser nga welili san. Ko m̄er nga osusi tevi Pilip owra “E, kulesi, rromor-pelari renge nuwi le ngel. Ko nik kurrormi erpese? Sev ejki nga poro pappaptaese inu?”

³⁷ [Mian ko Pilip owrai tevi “Poro weretunen wor nga nosurien oto renge nolom, ko erres nga inu bepaptaese nik.” Ko m̄er nga owra “O-o, o-o, inu nuosuri nga weretunen jerjer, Iesu Kristo evi Atua natun.”]A

³⁸ Daron nga muwrai jikle musuw ko owrai tevi m̄er nga moklai lem̄etiti nga pumosie mun, mian ko nuru Pilip orjubbul ko oran ngatan re nuwi. Ko Pilip epaptaese ni.

³⁹ Ko daron nga morivel lingi nuwi vini lat nga mimes e, ko Nem̄in On eteseni tweni Pilip evel, ko m̄er nga setemun elesi. Mian ko ean esakel luwi renge lem̄etiti sen, ko nolon eir nga eir vajin daron nga lem̄etiti mokwolu tevi m̄itajer.

⁴⁰ Mian ko Pilip etaole nga mijpari ngaim nga Asot. Ko etajer kele nga mokwerwer e nospen nga m̄irres se Atua renge ngaim m̄inij nga marto surusrir iok, ko etajer malum van ko ejpari vajin ngaim nga Sisaria.

9

Atua erieni murru Sol nga pivi jinibb se Iesu

¹ Ko renge daron ngok, Sol oksur terter nga p̄irevji pini nir nga marok-osuri Numal. Ean elesi batbatu jinibb ne sulsulen,

² ko osusi tevi, mian ko batbatu jinibb ne sulsulen oli naul sapor se nir nga marok-metmete naim gortien nir renge ngaim nga Damaskas, ko elair tevi Sol. Ko nale nen erpel: ‘Nukoni m̄erel Sol nga pivinuk p̄ilesi norman rreknga nesevin si nga mivijuri sel nga mimerr ngok, ko p̄isre totkonir ko pip̄tei lwenir vini Jerusalem e.’

³ Ko Sol elinglingi Jerusalem nga pian Damaskas e. Ko daron nga mivini morie ngaim ngok, ko etaole moron nga milep

san miplari renge melrin vini, ko mumor vaseni lat nga mivel e.

⁴ Ko ewajeni ngatan, ko ornge drrelan san owrai tevi owra “Sol o, Sol! Suri sev komok-loli m̄isij tevik mirpok?”

⁵ Ko Sol osusi lweni, owra “Wurru, Numal, nik si ko?” Ko drrelan nga owra lweni, “Inu le Iesu nga komok-loli m̄isij tevik.

⁶ Ko kupmera, ko kupan ngaim Damaskas, ko iok jinibb san ni ko puwrai tevim sev nga kupa-loli.”

⁷ Ko nir nga marok-ivel tevi Sol artur murrong, sete arwerai nale san. Nir kele arunge drrelan ngok, ko sete arlesi jinibb san.

⁸ Ko Sol otur mera eleng raji meten, ko meten omot. Ko selen nir arevei ko arp̄itevi van renge ngaim nga Damaskas e.

⁹ Ko Sol meten orrorr erpok ejpari nabong itul, sete orongwos p̄ileslesi nanu san. Ko daron ngok kele, sete ean ko sete eminmin.

¹⁰ Ko renge ngaim ngok Damaskas, jinibb san nga mok-osuri Iesu, nisen Ananaeas. Ni elesi bori san nga Numal muwra tevi “Ananaeas!” Ko Ananaeas orrum, owra “Inu le ngel, Numal.”

¹¹ Ko Atua owrai tevi “Kupmera ko kupvijuri sel nga mivel otvi liven ne ngaim ngel nga nisen Sel nga mimetet, ko kupan re naim se Jutas. Ko kupsusi m̄eri ngaim ne Tasas san, nisen Sol. Mernen oklik ko oklot.

¹² Ko ni kele elesi bori san, ko elesi nga nik Ananaeas kuan kujpari meten, ko meten erres luwi kele.”

¹³ Ko Ananaeas owrai lweni, “Wurru, Numal, nir elep pa marok-sufe suri morok, nga ni oklokloksi jinibb se Atua nir nga marlik Jerusalem.

¹⁴ Ko renge iel Damaskas kele elai dert-eren sen ngok ji batbatu jinibb ne sulsulen nir nga pivini purrul totkoni jinibb si nga muosuri nik.”

¹⁵ Ko Numal owrai tevi owra “Kupiel, suri inu nulngi ni nga p̄imajing se inu, ko puloli nisek pian mare ji jinibb ne vare nir ko numal nir ko ji m̄eri Isrel kele.

¹⁶ Ko daron nga puloli majingen suk, inu bowrai visviseni sel nga m̄isij sev nga pia-sekai iok.”

¹⁷ Ko Ananaeas ornge nale ngok nir, ko otur imare ko ean ji Sol renge naim se Jutas. Ean loloim ko elngi nevren re batu Sol, ko owrai tevi, “Niaken Sol, Numal nga mivi Iesu, nga miplari jim renge sel le, okoni inu nga bevini bololi kupkulu luwi

A 8:37 Nale nga muto re nolo [], rrek sete Luk oli, ko jinibb san ea-ului vitue daron nga muli tweni kopi san ne naul ngel.

kele, ko nga Nemîn On kele puwun saut rengo nolom.”

¹⁸ Ko vesan rres nanu san erpe berte nai orvitan rengo mete Sol, ko meten orkulu luwi vajin. Otur mera, ko sete epriv Ananaeas epaptaese.

¹⁹ Ko eaan luwi ko jin eterter luwi vajin, ko elik nabong sopen kele tevi kalesia nir Damaskas.

Sol ewerwer e nale nga mîrres Damaskas

²⁰ Ko sete epriv nga Sol etajer kele van rengo naim gortien nir se mîri Isrel, ko etipatun nga piwerwer suri Iesu nga ni evi natu Atua.

²¹ Ko nir jijle nga marunge ni artaole ko arwera “E, mîr nga moktorrtorrlai kalesia nir Jerusalem ngok, ko evini tweni nga purru totkonir ko pitkair van ji batu jinibb ne sulsulen nir!”

²² Ko Sol derteren ne nale sen emaur elep, ko eviseni nir e erres nga Iesu evi Mesaea. Ko mîri Isrel nir nga ie arwera parij otvi nale sen, ko arunge nale se Sol eterter pelak ko norrorrmien ser omrrol, ko arbbut kobbong.

²³ Ko nabong elep arasi, ko mîri Isrel sopor nga marlik iok arlolarsi Sol elep, ko armurri suri nga parevji pini.

²⁴ Ko nutrin ko nutpong kele, nir artirive Sol rengo metali ne nawot nga milep nga mîrrale ngaim ser, nga parevji pini. Ko jinibb san ean owrowra tweni womue norrorrmien ser tevi Sol.

²⁵ Ko natpong san jinibb se Sol nir arpitevi ko arsongni rengo narr nga milep san, ko arjuroni rrrurungi rengo lat nga mitpir e san rengo nawot van ngatan e. Erpok ko Sol eivare ko owlu.

Sol iak Jerusalem

²⁶ Ko Sol evel lingi Damaskas ko olwi van Jerusalem e. Ko owra pukorti tevi jinibb se Iesu nir; ko nir sete arosuri nga ni evi kalesia, ko arwij ngasue.

²⁷ Ko Banapas ewilwil sen, ko eptei van liven ji aposol nir. Ni owra visviseni tevir erpese nga Sol mîlesi Numal rengo sel, ko nga Numal kele mîrij tevi. Ni owrai kele tevir erpese nga Sol sete mimtutu nga puspe suri nise Iesu iak Damaskas.

²⁸ Ko Sol elik tevir ko arongwose vajin, ko arkorti tevi vajin. Ko evel lat petpeti Jerusalem, ko sete emtutu nga poksupe suri nise Numal.

²⁹ Sol ewerwere nale kele sopor tevi mîri Isrel nir nga marlik ngasue vanu ser nga marongwose nale se mîri Gris nir, ko vitunen marini marlik Jerusalem. Ko nir sete armerreri nale se Sol ko arlatlat tevi suri. Ko sete epriv nir arlolar ko arwera parevji pini.

³⁰ Ko daron nga kalesia marunge nale nga mîri ie marwera parevji pini Sol, ko artekai van ko arlingi elik talev Sisaria. Ko vitunen arkoni tweni van sisen e Tasas.

³¹ Ko rengo daron nen, kalesia nir nga marlik sarrsarr rengo vanu ne Judia, Galili ko Sameria arlik rengo demat. Ko Nemîn On elai derteren tevir, ko nir arlik eterter nga marosuri Numal. Ko nir elep temijpal malum arini nga marosuri Numal vajin.

Pita iak Lita ko Jopa

³² Ko Pita otutur errale lat sopen, ko daron san evan ji jinibb se Atua nir ne ngaim ngok Lita.

³³ Re ngaim ngok, eskai jinibb san nga niben mimij mijpari sia owil ko pa osuw nga sete orongwose pivel, ko okmatur kobbong re maling sen. Mernen nisen Aeneas.

³⁴ Mian ko Pita owrai tevi owra “Aeneas, lelingen wolok ko pa Iesu Kristo puloli kuprres luwi. Kuptur mera kuplulngi maling som!” Ko vesan rres Aeneas otur imare.

³⁵ Ko nir jijle nga marlik re ngaim ne Lita ko re kele vanu ne Saron, daron nga marlesi, ko arieni norrorrmien ser ko arvijuri Numal se kerr.

Tapita

³⁶ Ko nesevin san elik re ngaim ngok Jopa, nisen Tapita (nais ngok owra puwra die, nanu rrum san. Re nale se mîri Gris nir, arveruse Dokas). Vinnen osuri Atua ko tetajer okloli majingen nga marres nir ko okwilwil se kele nir nga joror marjikie.

³⁷ Re daron ngok mesien san ololi, mian ko emij. Ko arrawe lilane niben, ko arlingi rengo loloim san kele mare rengo naim sen tera nga partevni.

³⁸ Ko Jopa oto mori bbong Lita ko sopen; ko daron nga jinibb se Iesu nga Jopa marunge nale nga Pita mîlik Lita, ko arkoni nuru eru oran jin tevi nale ngel nga muwra “Wurru kupsaro ta pingavilvil sopen, kupini kuplesi kem iel.”

³⁹ Mian ko Pita otur imare ko eptevi nuru aran. Daron nga marjipari ie, ko arpitevi van re loloim ne naim nen mare. Iok, nesevin nga diwen ser marmij lingir arser rrale, ko arok-ting ko arok-sareni sunsun ko nijor nga Dokas mîmajinge daron nga mimaaur malum e.

⁴⁰ Mian ko Pita okoni twenir, ko ejiol vitan ko olot. Olot jile ko erieni non mawos vin nga mimij nga ko everuse, owra “Tapita, kupmera!” Tapita eleng raji meten, ko daron nga mîlesi Pita, ko emra elik.

⁴¹ Ko Pita otori nevren, esa raji nga putur. Mian ko everuse jinibb se Iesu nir tevi nesevin nga diwen ser marmij lingir,

ko elngi lweni vin nga mimaaur luwi nga tevir.

⁴² Nosþen ne nanu ngok owlu þetþeti re ngaim ngok Jopa, ko jinibb elep kele arini arosuri Numal.

⁴³ Ko mian ko Pita elik eprepriv kele sapon Jopa tevi m̄er san nga mokmaginge nanu nir renge nevlul buluk, nga nisen Saemon.

10

Pita ko Konilias

¹ Ko renge ngaim ngok Sisaria, m̄eri Rom san elik nga nisen Konilias, nga mimetmete jinibb nuval nir ongut (100) se m̄eri Rom nir, nga marivi ne gortien nga marveruse gortien ne Itali.

² Ni evi jinibb san nga mukorti pa tevi m̄eri Isrel nir mok-surövi Atua, tevi jinibb nir ne naim sen kele; ko oklai kele merrenien elep tevi m̄eri Isrel nga joror ewelili. Ko tetajer oklot van ji Atua.

³ Ko nabong san, otomori pivi mete nial itul nga rivriv, omomsawose daron ne verusen, ko elesi nanu san erpe bori. Renge bori nen elesi oto limjer nga anglo se Atua san evini loloim sen ko everuse, owra “Konilias”.

⁴ Konilias emet teretre anglo ko emtutu lenglengen, ko owra “Wurru, Numal, kujej sev ko san?” Ko anglo erij weli owra “Atua eir temijpal renge loten som ko majingen ne merrenien som, ko etriv nga piwilwil som.

⁵ “Ko kupkoni jinibb sapor paran Jopa ko parveruse jinibb san nga pivini mun iel. Mernen nisen arveruse Saemon Pita.

⁶ Elik tevi jinibb san nga mokmaginge nanu nir renge nevlul buluk, nga nisen kele Saemon. Naim sen oto ngatan mori jeli dis.”

⁷ Mian ko anglo evel lingi. Ko Konilias everuse jinibb ne majingen sen eru vini, ko jinibb nuval nga mokmaginge sen ko nga moklot kele, nga nir þitul parini jin.

⁸ Ewer visvisenir suri sev nga m̄irmali, ko okoni tweni nir itul ngok van Jopa e.

⁹ Ko renge nabong m̄inij nen, arvijuri sel vini re ngaim ngok Jopa. Ko re daron mawos nen, Pita esa van mare renge drru naim nat milival nga pulot.

¹⁰ Mian ko numer eaji elep, ko emrreni lengleng purroi nanu san. Ko daron nga marok-loli nanen ser e, ko ni elesi bori san nga Atua miviseni tevi.

¹¹ Elesi melrin etþir; ko boriti nga milep san, artori renge bongsin nga ivij, ko arjuröni renge melrin vini iel ngatan e.

¹² Renge boriti nen, netun vanu jijle nir ko numön jijle nir arto ren.

¹³ Ko drrelan san ermali ko owrai tevi owra “Pita, kuptur imare, kuprevji nanu ngok nir ko kupurroi.”

¹⁴ Ko Pita erij weli owra “Numal, sete mea-loli mirpok, suri setewor nurroi lesi nanu san nga murrakitkit, ko sete musor-san mirpok nga borroi.”

¹⁵ Mian ko drrelan nen eplari kele jin owra “Sev nga inu Atua mowrai pa tevim nga owokwok, nik sete kurongwose kupwera orrokkitkit kele.”

¹⁶ Drrelan nen owra lweni nale nen vatul musuw, ko boriti nen emtaw lingi ko olwi van re melrin e.

¹⁷ Pita nolon orrum malum suri bori ngok, owra purongwose sev nga Atua miviseni tevi ngok. Ko jinibb itul nga arsusi rongorngor pa naim se Saemon lut nga mutur e, arongwose, ko re daron nen mawos nga Pita murrormi bori sen, artur rremali renge metali.

¹⁸ Ko arsusi arwera “Moi, Saemon Pita elik niko iok rreknga ejki?”

¹⁹ Mian ko Nem̄in On owrai tevi Pita owra “Jinibb itul arini pa nile, arpej nik.

²⁰ Kupsaro pingavilvil, kupjubbul van ngatan e. Sete kuprormi nanu san, suri inu ko nukonir.”

²¹ Pita ojubbul, ean ngatan e, ko owrai tevir owra “Inu nen le nga kamok-peje inu. Suri sev kampej inu?”

²² Ko nir arwerai lweni arwera “Numal Konilias ko okoni kem. Evi jinibb nga m̄irres nga moksurovi Atua. Meri Isrel kele armerreni ni. Anglo se Atua nga muon ko san owra Konilias pukoni kem vinuk jim nga puloli purnge sev nga kupwera.”

²³ Ko Pita etkair arlik tevi ko armatur tevi.

Ko rorpong nen, Pita tevi m̄eri Sisaria nen itul arlinglingi ngaim ne Jopa, arivel kele, ko nir sapor nga marosuri Iesu renge vanu ngok arpitevir kele.

²⁴ Renge nabong m̄inij nen arjipari Sisaria; ko Konilias etriv terair ko pa. Erijrij kele metka sen ko selen nga marres nir nga parkorti partiriv Pita.

²⁵ Daron nga Pita m̄irmali vajin, ko Konilias otur imera ko evini ejiol vitan jin.

²⁶ Ko Pita owrai tevi owra “O, sete kuploli pipok tevik, kupmera, inu nuvi kele bbong jinibb le!” Ko Pita ervei nevre Konilias otur rramos.

²⁷ Ko Pita okjiljilwer tevi Konilias, ko orivel korti oran loloim e. Ko Pita elesi erpe jinibb elep aran pa loloim e.

²⁸ Ko owrai tevir owra “Kamrongwose erres nga m̄eri Isrel renge gortien ser sete arongwose parkorti rreknga parpelari ji jinibb ne vare nir. Ko Atua eviseni tevik

nga sete nurongwose ßelesi jinibb sopor erpe arrokkitkirk rreknga arsj.

²⁹ Niko ololi daron nga kamverus nga bevinuk, ko sete nuloli kele nale san, ko nutur imera ko pa ko nuvini. Ko nuwra bosusi tevi kami, kamverus inu suri sev ko?"

³⁰ Ko Konilias erij weli owra "Nabong itul le pa easi, erpe pivi mete nial itul natmirivriv san, ko nomok-lot iel rengo naim suk. Ko vesan rres jinibb san sunsun sen arinrin nawon evini otur rengo nok. Ko owrai tevi inu owra

³¹ "Konilias, Atua ornge pa verusen som ko okrrormi elep suri merrenien som nga komok-lai tevi jinibb nir nga joror mijkie.

³² Kupkoni jinibb sopor paran Jopa, parlesi jinibb san nisen Saemon Pita. Elik rengo naim se jinibb san nga nisen kele Saemon, nga mivi jinibb nga mokmanginge nanu nir rengo nevu buluk. Naim sen oto mori jeli dis ngalu."

³³ Ko nusaro ngavilvil ko nukoni jinibb suk arinuk jim, ko erres wor nga kumrunge sev nga marwerai ko kuvini. Kem jijle namlik korti vajin rengo no Numal Atua ko nabunge vajin sev nga kupwerai."

Pita ewerwer tevi Konilias

³⁴ Ko Pita esa jingon owra "Lelengenok inu nua-lesi wose vajin nga weretunen Atua ololi osorsan kobbong tevi jinibb jijle.

³⁵ Atua eir temijpal tevi si nga musrövi ni ko muloli sev nga musorsan mürres, poro evel rengo vanu ngabe tama san.

³⁶ Nale ngok kele kobbong Atua elai tevi jinibb sen nir mēri Isrel, daron nga mukoni Iesu Kristo Numal se jinibb jijle nir nga pilai demat tevi nir.

³⁷ Ko rrek kamrongwose sev nga miplari ji Iesu Kristo lat jijle re vanu ne Jutia. Nanu ngok jijle artipatun Galili, daron nga Jon muwra jinibb jijle nir parpaptase.

³⁸ Atua elai Nēin On ko derteren tevi Iesu doNasret, ko Iesu daron nga mokivel rrale mokloli majingen nga marres nir, ko ololi nir nga marlik rengo derteren se Demij nir arres luwi kele.

³⁹ Kem jijle namlesi sev nga Iesu muloli Isrel ko re ngaim nga Jerusalem kele. Ko jinibb nga marlelep se nir arwuse re nai pelaot nga pimij.

⁴⁰ Ko nabong itul easi, ko Atua ololi emaur luwi kele re mijen. Ko eviseni ni tevi kem nga mīlŋgi kem nga nabsupsuþe ni tevi jinibb nir.

⁴¹ Atua sete eviseni ni tevi jinibb jijle nir, ko tevi kem kis kobbong daron nga mimaur luwi rengo mijen, ko kem namaan korti ko namminmin korti tevi ni.

⁴² Ko Atua owrai nga nabwerai tweni ko wor nosþen nga mürres tevi jinibb nir. Ko

kem nabwerai tweni ko wor nga Atua elngi pa ni nga pia-wera suri lat nga puto suri tevi jinibb jijle nir, ngok nir nga marmaur malum lelingenok, ko nir nga marmij pa musuw.

⁴³ Ko propet jijle arok-rrormi ni kobbong, ko arwera suri nga nise Iesu kobbong, derteren nen otoe; ko jinibb nga marosuri ni, Atua pia-telasi tweni nololien ser."

Nēin On ean ji jinibb ne vare nir

⁴⁴ Daron nga Pita mokrij malum e, ko Nēin On ojubbul vitan ko esilvi nir nga marok-murronge nale sen.

⁴⁵ Ko mēri Isrel nga marosuri Iesu nga marlinglingi Jopa tevi Pita artaol ko aririr lengleng rengo sev nga miplari, suri Atua elai Nēin On tevi jinibb ne vare nir erpe merrenien nga milep san tevi nir.

⁴⁶ Artiaol temijpal suri arok-runge nir ngok arok-rij rengo nale lele, nga marok-surövi nise Atua. Mian ko Pita owra

⁴⁷ "Nir ngok arlai Nēin On pa erpe kerr rramlai pa musuw. Ko siko orongwose piwer orer nga sete parpaptase nir?"

⁴⁸ Ko Pita owrai tevir nga parpaptase nir rengo nise Iesu Kristo. Mian ko nir arngoni nga poro Pita orongwose pilik mun beblen kele tevir.

11

Nale se Pita tevi kalesia nga rengo Jerusalem

¹ Ko aposol tevi tuwa kerr ko joi kerr nir re lat jijle re vanu nga Jutia arunge nosþen nga jinibb ne vare kele arlai pa nale se Atua kele osuw.

² Ko daron nga Pita mian Jerusalem e, ko mēri Isrel sopor artortori, arwera jinibb ne vare nir nga marivi kalesia paran ko wor re bae.

³ Arwera "E, suri sev komok-pitevi nir nga setewor maran re bae ko komok-aan kele tevir?"

⁴ Mian ko Pita owrai tweni vajin tevir nanu mawos nen nga mürmali,

⁵ owra "Daron nga nomok-lot rengo ngaim ngok Jopa, mian ko numatur, ko nulesi bori san. Nulesi nanu san nga mirpe boriti nga milep san, artori rengo bongsin nga ivij ko arjuröni rengo melrin vini iel ngatan e, ko evini mori inu.

⁶ Numteni lilane nolo boriti ngok, ko nulesi netun vanu jijle nir ko numön jijle nir.

⁷ Mian ko sete epriv nurunge drrelan san owrai tevik owra "Pita, kuptur imera, kuprevji ko kuproi."

⁸ Ko inu nuwra "Ejki Numal, ejki rres. Nanu ngok sopor sete arsorsan ko sete

arwokwok nga borroi, ko setewor nurroir nabong san."

⁹ Ko sete epriv, nurnge drrelan nen eplari kele vini owra "Nanu nga inu Atua mowrai pa musuw nga owokwok, nik sete kurongwose kupwera orrokkit kele."

¹⁰ Drrelan ngok ermmali erpok vatul osuw, ko boriti nen tevi nanu jille arevei lweni kele van re melrin e.

¹¹ Ko renge daron mawos nen, jinibb itul arini re naim nga nulik ren. Meri Sisaria san okonir nga parini partekaik nga bolwi tevi nir.

¹² Ko Nemiin On owrai tevik sete bongasi nir ko bemarong ma bolwi tevir. Ko tuwa kerr nga ouwon ngok kele arpitevi inu. Ko daron nga nampelari Sisaria, ko kem jille naman loloim re naim se mērak Konilias.

¹³ Mian ko ni owrai tevi kem nga ni elesi anglo san evan otur renge loloim sen, ko anglo owrai tevi owra "Kuplai nale van re ngaim ngok Jopa nga parveruse jinibb san nga nisen Saemon ko nisen kele Pita.

¹⁴ Ni pia-wera nale tevi nik nga p̄ila mauren tevi nik ko tevi nir nga renge naim som kele".

¹⁵ Ko mian ko daron nga mētipatun vajin nga mērij tevir, ko Nemiin On evini esilvir osorsan erpe nga mivini re kerr bonevis.

¹⁶ Mian ko nurrorrmi jipari nale nga Numal muwrai tuwi nga muwra, 'Jon ololi baptaes tevi nuwi; ko sete mia-periv, Atua pia-paptaese kami renge Nemiin On.'

¹⁷ Ko oto limjer nga Atua elai merrenien ngok kobbong tevi jinibb ne vare nir, erpe nga m̄ilai tevi kerr daron nga rramosuri Iesu Kristo e. Ko erpese, inu nurongwose bololi lesi nga bewer ore Atua, rrek?"

¹⁸ Daron nga Pita m̄irij jile musuw, ko nir arlingi kurtweni norrorrmien karkar ser, ko nolor emra e ko arsurōvi Atua arwera "Rrek Atua elai kele tevi jinibb ne vare nir norrorrmien ne parieni lululwenir ko parmaur vajin."

Kalesia nir ne Antiok

¹⁹ Daron nga Steven mimij, ko jinibb nir aroji kele nir nga marosuri, ko nir arwolu sarsarr. Sopor aran arjipari Ponisia ko Saepras ko Antiok ko arok-werai tweni nosp̄en nga m̄irres, sete tevi m̄eri m̄inij, ko tevi m̄eri Isrel kobbong.

²⁰ Ko nir sopor kele nga marivi m̄eri Saepras ko Saerin aran Antiok ko arwera tweni nosp̄en nga m̄irres se Iesu Kristo, Numal se kerr, tevi jinibb ne vare kele nir.

²¹ Derteren se Numal eptevir, ko jinibb elep arieni nolor arosuri Atua vajin.

²² Ko nosp̄en ne nanu ngok owlū kele evan ejpari kalesia nga Jerusalem, mian ko nir arkoni Banapas van Antiok e.

²³ Daron nga ni mian jir ko m̄ilesi erpese nga Atua m̄irij m̄irres suri jinibb ne ie nir, ko ni eir temijjal, ko owrai tevir nga partur p̄iterter renge nosurien ser ko weretunen renge Numal tevi nolor totoklai.

²⁴ Banapas evi jinibb nga m̄irres, nga muwun saute Nemiin On ko nosurien, ko ervei jinibb elep arini ji Numal se kerr.

²⁵ Mian ko Banapas ean kele Tasas e nga pipej Sol.

²⁶ Ko daron nga m̄iskai, ko etkai oran Antiok e. Ko renge sia totoklai san, nuru orok-jiljilwer tevi kalesia ne ie ko orvisiveni nir elep kele renge gortien ngok. Ko renge ngaim ngok ko Antiok, arlingi womue nais ngok 'Kristin' re kalesia nir.

²⁷ Ko renge daron ngok, propet sopor kele arivel lingi Jerusalem aran Antiok.

²⁸ Nir nen san nisen Akapas, otur imera renge derteren se Nemiin On ko ewer rurrngi tevir nga daron ne numer nga m̄iterter san sete ngasu p̄irmali renge ngatan ngel totoklai. Ko numer nen ermmali erpe nga muwrai renge daron nga Klotias mutori batu numal ne Rom.

²⁹ Mian ko jinibb se Iesu nir armurri poro erres jinibb sisamis p̄ilai wor merrenien pilep van nga piwilwil se seler nir nga marlik Jutia.

³⁰ Mian ko arloli erpok, ko arlai nevōt sopon. Ko arlai tevi Banapas ko Sol nga poran porlai tevi jinibb nga marlelep se kalesia nir nga Jerusalem.

12

Numal Erot Akripa 1 erevji kalesia sopor

¹ Ko renge daron ngok kele, Numal Erot Akripa etipatun nga puloli p̄iterter kele tevi kalesia sopor.

² Okoni jinibb sen nir nga paran parrul totkoni Jemes tasi Jon ko partai otvi batun.

³ Ko suri nanu ngok ololi m̄eri Isrel nir arir, ko etajer kele ololi nale tevi jinibb sen nir nga parrul totkoni Pita. Nanu ngok ermmali mawos re daron ne nanen ne niv nga is m̄iki ren.

⁴ Elngi Pita re naim ne nekaien, ko elngi gortien ivij ne jinibb ne nuval sen nir nga parlik metmete. Norrorrmien sen evi nga poro daron ne nanen gortien p̄iasi, ko ni pia-wera suri lat nga puto suri tevi ni re no delung nir.

⁵ Mirpok ko Pita m̄ilik re naim ne nekaien. Ko kalesia nir arlot eterter van ji Atua suri ni.

Anglo etkai tweni Pita re naim ne nekaien

⁶ Re natpong nen, ko vitunen nga Erot pia-wera suri lat nga puto suri tevi Pita

rengé no delung nir, Pita ematur liven re jinibb ne nuval nga mormetmete ni re naim ne nekaién tevi kele dil delrrurr eru nga markai nevreñ e, ko jinibb ne nuval eru kele ortur metmete metali. Ko Pita ematurrwel.

⁷ Ko vesan rres anglo se Atua san otur pelari ie, ko moron omor vaseni jijle naim ne nekaién ngok. Ko esesaro epari neli Pita ko owni, ko owra "Kupsaro pingavilvil, kupmera." Ko vesan rres, dil delrrurr ngok nuru orjiki re nevre Pita ko orvitan.

⁸ Ko anglo owrai kele tevi owra "Kup-tatuwe netatuw som ko kuprae but som, ko kupini rroporivel." Pita ololi sev nga anglo muwrai, mian ko anglo owrai kele owra "Erres, ko kupuri kot som ko kupvivotu surik."

⁹ Ko Pita evivotu suri. Etna van vare e rengé naim ne nekaién. Ko orrorrmi nga nanu ngok nir arirpe bbong ematur lesi bori ko.

¹⁰ Mian ko orini orasi gortien eru ne jinibb ne nuval, ko orini vajin rengé metali delrrurr nga mutó ore jer ngaim nga jinibb pian vare e vajin. Ko metali nen esan etpir, ko oran vare e. Orok-vijuri sel vini, ko vesan rres anglo emtaw lingi Pita, evel.

¹¹ Ko Pita elesi wose vajin sev nga mürmali, ko owra "O, nulesi wose ko vajin nga Numal suk okoni anglo sen vini nga pitkai tweni inu re derteren se Erot ko re nanu jijle nga jinibb nga marlelep se mieri Isrel nir marrorrmí nga parloli tevik."

¹² Ko ean re naim se Merri, nga mivi tasu se Jon nga nisen tuwen nen marveruse Mak. Ko nir elep nga marok-vijuri Numal arser korti ie nga parlot.

¹³ Pita evini otuti metali vare. Ko nesen-warreng nga mokmetmete naim, nga nisen Rota, evini owra pitasi.

¹⁴ Ko ni etaole drrela Pita, ko orongwose evesane, ko eir temijpal suri. Ko setemun etasi metali, ko owlu luwi kele van ji nir sopen e nga marlot. Ko owrai tevir owra "E, lartul, Pita le ngel moktur vare rengé metali!"

¹⁵ Ko nir arwerai lweni tevi arwera "Ai, kulengleng!" Ko ni otur eterter owra "Ejki, nuwretun ko wor!". Mian ko nir arwera "Ejki ma, rrekma nemin ko."

¹⁶ Ko Pita nga eplak malum, otuti metali, mianan ko artasi ko vajin. Ko daron nga marlesi ko artaol lenglengen.

¹⁷ Ko Pita obbölbböleni nevreñ tevir nga parmurrong, ko owra visviseni tevir erpese nga Numal se kerr mülai tweni ni re naim ne nekaién. Ko okonir vajin owra "Kapwerai kele tevi Jemes ko kerr sopen kele sev nga mürmali". Mian ko evel lingi ie van elik talev re lat rüinj kele san.

¹⁸ Mevinen vajin, ko jinibb ne nuval nir ara-taole arlesi Pita mijki; ko arrorrmi sarrsarre, arok-sususir e vajin arwera "E, Pita nga ean ngabe e?"

¹⁹ Ko Erot okoni kele jinibb ne nuval sen nir nga paran parpej tevi, ko sete arlesi rragrage te. Ko osusi kele norrorrmien elep tevi nir nga marmetmete, mijki mun, mian ko ololi arevji pinir. Mian ko sete epriv ko Erot evel lingi Jutia nga pian pilik sopen Sisaria.

Mijen se Erot Akripa

²⁰ Mian ko Erot ololari mieri Taea ko Saeton nir. Suri iok, nir ne ngaim nga eru ngok arkorti lat sansan nga paran parlesi. Ko womunen, arevei womue jinibb san nga mokmetmete majingen ne naim se Erot nga piptevir van, nisen Blastas. Ko nir arini ji Erot ko arngoni nga poro ni orongwose puloli demat, suri nir ne vanu ngok arok-wuli bbong nanen ser ko ji jinibb ne vanu se Numal Erot.

²¹ Mian ko Erot elngi nabong san nga pialesi nir ren. Ko re daron nen vajin, Erot ojokjok erres temijpal re nijor se numal ko ean esakel re nai seksakel se numal, ko elai vajin nale tevir.

²² Ko nir arkikail van mare arwera "O, sete jinibb ko mürrij ngok, ko atua ko wor san."

²³ Ko vesan rres, anglo se Atua san ololi Erot eil jubbul ngatan. Suri emrreni jinibb partori ko parsurövi ni pirpe kele atua san. Mian ko doto nir arpelari ko arurroi jinen, ko emij.

²⁴ Ko nale se Atua easasi elep kele, ko jinibb elep arini arosuri kele.

²⁵ Ko Banapas ko Sol oran orvinvini ore jijle majingen nga marlingi nuru tweni. Mian ko orivel lingi Jerusalem vajin orluwi. Orpitevi lweni Jon Mak tevi nuru.

13

Arsusture Banapas ko Sol nga poran porloli majingen

¹ Ko kalesia sopen ne Antiok arivi propet ko jinibb nevisvisenien. Banapas, ko Simeon nga marveruse nibmotmot, ko Lusias kele nga mivi mieri Saerin, ko Manaen nga bonevis marmetmet kortoni ni ko Erot Antipas rengé naim sansan, ko Sol kele.

² Ko daron san arlingi kurtweni nanen ko arsurövi Atua. Mian ko Nemün On erij tevir owra "Kapsusture Banapas ko Sol nga porloli majingen nga inu motobbobbue nuru tweni."

³ Mian ko nir artajer nga arlingi kurtweni nanen, ko arlot. Ko sete epriv nir jijle arlingi nevrer rengé nuru, ko arkoni tweni nuru nga poran porloli majingen.

Banapas ko Sol orwerwer Saepras

⁴ Ko niko Nem̄in On okoni nuru, ko orjubbul van ngatan e Selusia. Ko orsa re drrav san, ko drrav owlu tweni paran re sale san nisen Salamis nga muto re norour nga Saepras.

⁵ Ko daron nga nuru morjipari vajin Salamis, ko orok-werai tweni nale se Atua re naim loten se m̄eri Isrel. Ko Jon Mak eptevi nuru nga m̄imajing se nuru.

⁶ Ko nir nga itul ngok arivel otvi norour ngok van devjen e Papos. Ko renge ie, arlesi jinibb ne botut san, nisen Bajisas. Ni evi m̄eri Isrel san, ko evi propet ne gerisen san. Ko nisen kele san re nale Gris arwera Elimas.

⁷ Ko ni evi kele jinibb se Sejas Polas nga mimetmete norour ngok Saepras, nga batun muwlu milep. Ko Sejas Polas ngok everuse Banapas ko Sol nga poran jin, suri emrreni purnge nale se Atua.

⁸ Ko daron nga marini ko marij, ko m̄er ne botut ngok Bajisas, nga nisen tuwen nen Elimas, erij tere nuru ko ololi lesi nga p̄irieni norrrrmien se numal Sejas Polas, nga sete puosuri Atua.

⁹ Ko Sol nga nisen tuwen nen Pol, owun saute Nem̄in On, ko emet teretre jinibb ne botut ngok,

¹⁰ ko owra "A, nik natu demij, kuvi botgerisen ko sel som arkipkapil, ko kuvi devje nuval se nanu jijle nga m̄irres! Seveling vajin kupa-suw re komok-rij tere sel weretunen se Numal?"

¹¹ Lelingenok ko pa Atua putor aljem nga metem pumot, ko setemun kuma-lesi moron pipriv sopen."

Ko vesan rres nanu san nga mirpe nousnin nga mumotmot san evini osuni ore non, ololi meten omot; ko evel esesaro karkar epej jinibb san nga pok-tekai ni.

¹² Ko daron nga Sejas Polas m̄ilesi sev nga m̄irmali ngok, ko etaol; ko eir temipjal re nale se Numal se kerr nga nuru morvisviseni tevi, ko osuri vajin Atua.

Banapas ko Pol orwerwer e nosp̄en nga m̄irres re ngaim ngok Antiok iak Pisitia

¹³ Ko Pol tevi selen nir arlai drrav san Papos ko aran Pampilia, arwolu toku re ngaim ngok Peka. Ko renge ie, Jon Mak evel lingir ko olwi van Jerusalem e.

¹⁴ Arivel lingi vajin Peka, ko arjipari Antiok nga mori vanu ngok Pisitia. Ko renge nabong on, orsil van re naim loten se m̄eri Isrel nir ko orsakel ngatan.

¹⁵ Ko daron nga mareve jijle Naul On musuw, ko nabur ser arkoni nir san van ji Pol ko Banapas ko osusi tevi nuru owra "E selek, poro norrrrmien nga m̄irres san oto niko nga komor-merrreni kopor-werai

nga piwilwil se jinibb nir, ko erres kopor-werai".

¹⁶ Ko Pol esareni nevren tevir nga parmurrong, mian ko owra "Meri Isrel nir ko kami jile nga kamok-surövi Atua, kapmurrong.

¹⁷ Atua se m̄eri Isrel nir otobbobbue apu se kerr ne tuwi nir, ko osusi nir van mare daron nga marlik mirpe jinibb neturvitan re vanu ne Ijip. Ko tevi derteren nga milep jerjer sen, etkai twenir arivel lingi ie.

¹⁸ Ko erpe sia ngavöl ivij (40) sopen erpok, ko arlik re lolo merwer, ko arok-loli batur sopen. Ko Atua sete emet twenir,

¹⁹ ko ololi metil ngaim ebute re vanu ngok Kenan armij ko elai dan ser tevi jinibb sen nir; ko arlik ren,

²⁰ evini epari sia ongut vavij bbulin ngavöl elim (450).

Ko vitunen Atua osusture numal nir sopor nga parmetmete nir, eanan epari daron se propet Samuel.

²¹ Ko marngoni kele batu numal san, mian ko Atua elai Sol nga mivi natu Kis re metka ngok Benjamin nga pivi batu numal ko putori vanu ser. Ko ni otori epari sia ngavöl ivij (40).

²² Ko daron nga Atua m̄ilai tweni kele, ko osusture vajin Devet nga pivi batu numal. Ko Atua owrai norrrrmien sopen suri Devet owra "Nulesi Devet natu Jesi evi jinibb nga nolon oto suri inu nolok. Evi jinibb nga puloli nanu jijle nga inu memrreni puloli."

²³ "Ko osorsan erpe nga Atua m̄irijrij pae musuw, ni osusture metka se Devet san nga nisen Iesu nga ni pia-la mauren tevi m̄eri Isrel nir.

²⁴ Ko daron nga Iesu sete miplari wor, ko Jon okwerwer pae ko tevi m̄eri Isrel nir owra 'Kami kaprieni wor kami ko renge nololien se kami nir, ko kami jijle kappaptaes ko wor'.

²⁵ Daron nga Jon mivini mori vajin renge bongsi majingen sen, ko oksusi okwera 'Kami kamok-rrormi inu nuvi isi ie? Inu sete nuvi m̄er nga kamok-tirive. Ko kapmurrong ta. Jinibb san pivini ni ko nga inu sete nuvter rragrage nga betlasi tweni dil renge but sen.'

²⁶ "Tasik ko jokik nir, kami nga kampilari renge metka se Epram ko kami jinibb ne vare nir nga kamok-surövi Atua se kerr, kerr ngok ko, Atua elai pa nale nga p̄itasi sel nga p̄ila mauren tevi kerr jijle.

²⁷ Daron nga Iesu mivini, ko m̄eri Jerusalem nir ko nabur ser nir arrelenge. Ko sete arongwose nale se propet kele nir nga marok-eve renge nabong on jijle nir. Iok ko ololi nir arlingi Iesu pian re mijen, mian ko arwera ni pimij ko wor,

erpe nga propet nir marwerai wowomu pae musuw.

²⁸ Ko sete artor sweri sel san nga norrorrmien nen purrow puloli nga Iesu pian re mijen, ko artur imera ma ko arngoni tevi Numal Paelet nga pirevji pini.

²⁹ Ko daron nga marevji pini jijle re nai pelaot erpe nga Naul On muwrai, ko arjuröni vini ngatan e vajin, ko aran artevni rengo dubb.

³⁰ Mian ko sete epriv nga Atua ololi emaur luwi keke rengo mijen.

³¹ Ko re daron elep, Iesu ermmali ji jinibb sen nir nga moktutur tevir Galili van Jerusalem e, ko lelingenok vajin nir arok-wera tweni Iesu tevi mñeri Isrel nir.

³² Atua ololi pa rijrijen nen tevi apu se kerr nir osuw, ko kem namvijuri le vajin nga nabwerai tweni nospen nga mñirres nen tevi kami.

³³ Ko ololi pa tevi kerr nga rramivi metka nen daron nga muloli Iesu emaur luwi keke rengo mijen. Erpe Naul On muwrai pa rengo naul erwen ne Sam, muwra 'Etipatun lelingen nik kuvi natuk woswos, ko lelingen inu bevi tata som woswos.'

³⁴ Ko iok ko Atua muwrai pa re Naul On sen suri Iesu pimaaur luwi keke re mijen nga ni sete mia-mij keke nabong san nga niben pian pupo, ejki. Ko erpe nga muwrai keke muwra 'Bololi tevim rijrijen nga muon ko mimerr osorsan erpe nga mololi tevi Devet.'

³⁵ Ko rengo naul ne Sam keke san, Nale On owra 'Atua sete mia-marong rragrag nibe jinibb on sen pupo nawon.'

³⁶ Daron nga Devet mimaaur e, ko osuri Atua. Ko daron nga mimij e, ko artevni erpe birtera sen nir, ko niben ean opo.

³⁷ Ko Iesu ma nga Atua muloli mimaaur luwi keke rengo mijen, niben sete opo, ejki.

³⁸ "Tasik ko jojik nir, kaprongwos lilane ko wor nale ngok nga nomok-werai nir tevi kami. Suri re Iesu Kristo kobbong sansan, Atua orongwose pitlasi tweni nololien nir se kami.

³⁹ Kami kaprongwos wore ko nga Iesu Kristo kobbong orongwose puloli nir nga marosuri ni parivel sisarow rengo nololien ser. Ko sete evi nale neseresien se Moses nga murongwose puloli kapiel sisarow rengo nololien se kami, ejki.

⁴⁰ Ko suri iok, kami kapmetmet ko wor pirres. Poro pijki ko nale se propet nir türmali ji kami

⁴¹ nga muwra 'Kami nga kamok-sopsope Atua, lelingenok ko kaptaole ko kapa-van re mijen suri. Suri sev nga bololi lelingen evi nanu nga kami sete kama-osuri. Rrek poro san puwra lilane tevi kami, ko iok keke sete kama-osuri rrek.' "

⁴² Ko daron nga Pol nuru Banapas morivel lingi naim ne loten vajin, ko jinibb ne ie arngoni keke tevi nuru arwera "Wurru, poro orongwose kopora-luwi keke vini, kopor-wer visviseni kem e nale ngok rengo nabong on nga vitu."

⁴³ Ko daron nga jinibb martela vare re naim ne loten vajin, ko nir elep arvijuri keke Pol ko Banapas.

Nir sopor arivi mñeri Isrel, ko nir sopor womujnen arivi jinibb ne vare nir, mian ko vitunen mara-tori vajin nosurien se mñeri Isrel nir. Ko Pol ko Banapas orwerai eterter tevir, orwera "Kaprrul totkoni ko wor murrun ngok se Atua pitertter nga mokwilwil se kami rengo nolon nga mñirres pelak."

Pol ewerwer e nospen nga mñirres tevi mñeri Antiok nir

⁴⁴ Ko re nabong on nga suri nen keke, otomori nir jijle re ngaim ngok arini keke lat sansan nga parunge nale ngok se Numal se kerr.

⁴⁵ Ko daron nga mñeri Isrel nir markulu marmeteni delung ngok nir, ko nolor elelep temijpal. Mian ko arok-rij esij ko arok-rij tere vajin nale se Pol.

⁴⁶ Ko Pol nuru Banapas orloli norrorrmien se nuru eterter keke ko orwera "Nobor-wera womue ko wor nale se Atua tevi kami mñeri Isrel nir. Ko kami kamrong tweni nale nen. Ngok eviseni nga sete kammerreni kaptor sweri mauren nga sete mia-suw nabong sapon. Ko lelingenok rrek nablengi kurtweni kami, ko naban vajin ji jinibb ne vare nir.

⁴⁷ Ko ngel evi nale nga Numal mñilai tevi kem, nga Naul On muwra 'Inu nususture nik nga nik kupirpe moron san nga pumore jipari jinibb ne vare nir, tweni nga jinibb ne lat jijle ne iel ngatan parasi van re mauren.' "

⁴⁸ Nale ngok ololi jinibb ne vare nir arir temijpal ren, ko arsurövi lengleng Numal re sev nga marunge. Ko nir nga Atua mutobbtobbu pa nir musuw nga parlai mauren nga sete mia-suw nabong sapon, arosuri ni vajin.

⁴⁹ Ko murrun ngok ololi vajin nale se Numal easasi van lat jijle rengo ngaim ngok.

Meri Isrel sopor aroji tweni Pol ko Banapas

⁵⁰ Ko mñeri Isrel sopor arivel rrerrale ji nesevin ne loten nir ko nabur se nesevin ko jinibb nga marlelep ne ie, ko areveir nga paran partere Pol nuru Banapas. Mian ko aroji tweni vajin nuru re siser.

⁵¹ Ko Pol nuru Banapas orwajwajeni tweni maw re beta nuru nga piviseni tevi jinibb ne ie nga nuru orsir dure nuru

tevi nir. Mian ko orivel lingi ie, ko oran Ikoniam e.

⁵² Ko jinibb se Numal nir ne Antiok arir temijpal, ko arwun saute Nenin On.

14

Pol ko Banapas iak Ikoniam

¹ Pol ko Banapas orwerwer rengo nospen nga mürres tevi jinibb nir ne Ikoniam, osorsan erpe nga morloli Antiok; ko mieri Isrel ko mieri Gris elep arlingi nosurien ser rengo Numal.

² Ko mieri Isrel nga nosurien ser mijkie artere nir, ko arloli jinibb nir ne ngaim nen arlar ko artere jinibb se Atua.

³ Ko aposol nuru orlik daron sopen kele ie. Ko nosurien se nuru oto eterter re Numal, ko nolo nuru eterter nga morwerai tweni nale sen. Atua elai derteren tevi nuru nga pormajing nanu nga marinjinj nawone nir. Ko eviseni nga nospen nga mürres nga muspe suri Atua nolon nga mürres evi weretunen.

⁴ Mian ko mieri Ikoniam arteri wukari nir evi meling eru e; devjen arvijuri mieri Isrel, ko devjen arvijuri aposol nuru.

⁵ Mian ko jinibb ne vare sapor tevi mieri Isrel sapor ko nabur ser nir arloli norrorrmien nga parevji ko partuwe pini Banapas ko Pol.

⁶ Daron nga morunge norrorrmien ngok, ko orwolu oran rengo ngaim nga morlelep ngok nuru Listra ko Depe re vanu ngok Likaonia.

⁷ Ko rengo ngaim ngok ko nuru ko lat sapor nga marto rrale, orok-werwer tweni nospen nga mürres se Iesu Kristo.

Pol ko Banapas iak Listra

⁸ Ko jinibb san elik Listra, ko daron nga miak e ko pa ko sete orongwose pivel, Belan orkati.

⁹ Ko ni oklik ie ko okmurronge nale se Pol. Pol elesi nga nosurien sen eterter wor nga emrreni pirres luwi, mian ko oklu van jin

¹⁰ ko ekail van mare, owra “Kuptur rramos!” mian ko mier nga otur imera kasi ko etipatun nga pivivel vajin.

¹¹ Ko daron nga delung marlesi sev nga Pol muloli, ko artipatun arkail re nale ne ie Likaonia, arwera “O, atua nir arirpe jinibb kele, ko arjubbul vitan vini ji kerr kele!”

¹² Ko arlingi nise Banapas ewaji Sus (nga mivi batbatu numal atua ser nir), ko arlingi Pol ewaji Emis (nga mivi atua ser san nga mokwosi nale se atua ser nir).

¹³ Ko naim ne loten se Sus oto mori bbong ngaim ser ko, vare sapon. Ko jinibb nga moksulsul tevi Sus tevi delung ngok nir armerreni parloli sulsulen tevi Banapas ko Pol; mian ko aran arevei buluk

nga marjoro tevi nevgun vini re jeli metali.

¹⁴ Ko daron nga Pol ko Banapas morarongwose vajin sev nga nir marwera parloli, ko orrererrersi sunsun se nuru nga piviseni nga orunge esij pelak. Ko orwolu van liven re jinibb nir ko orkikail van mare jer,

¹⁵ orwera “E, lartul, suri sev kamok-loli sel ngok? Komru nomor-ivi jinibb erpe kami kobhong. Namini iel nga nabwera tweni nospen nga mürres nga pirieni kami rengo sel nga misij, ko kapluwi van ji Atua nga mimaur nga muloli melrin, iel ngatan, dis ko nanu jijle nga marto rengo.

¹⁶ Tuwi elinglingi jinibb jijle arvijuri lweni norrorrmien ser sisamis,

¹⁷ ko eviseni ma nga okpitemi kami re nanu jijle nga marres nga muloli. Atua elai naus rengo melrin vini nga muloli wini marres. Elai nanen tevi kami ko ololi nolo kami eir.”

¹⁸ Pol ko Banapas orwerai tweni nale nen erpok ko pa, orpelak epriv sapon, mian ko ora-ete vajin norrorrmien se delung nir nga setemun parloli sulsulen van ji nuru.

¹⁹ Ko mian ko nabur ne Isrel sapor nga marivel Antiok ko Ikoniam arevei norrorrmien se delung nir arasi vini devjen ser e. Artekai Pol ko artuwe ko arevei tweni van vare e re ngaim ngok ko arkurtweni, arorrmi nga ni emij ko pa.

²⁰ Ko daron nga jinibb se Iesu nir marini martur rrale Pol, ko Pol emra, ko olwi kele van rengo ngaim ngok. Ko mevinen ko nuru Banapas orivel kele van Depe e.

Pol ko Banapas orivel otvi kele iok nir nga poran ngaim e

²¹ Pol ko Banapas orwerwer e nospen nga mürres re ngaim ngok Depe, ko arevei jinibb elep arini arivi jinibb se Iesu. Mian ko orluwi van Listra e ko Ikoniam, mian ko ortajer van Antiok rengo Pisitita e.

²² Orsa raji nolo kalesia nir, ko orwerai eterter tevir nga parrul totoni nosurien ser puto piterter; mian ko orwerai tevir orwera “Kerr rrapunge ko wor pisij pilep puwomu, ko orongwose rrapa-sil van re batun vanu ne melrin.”

²³ Ko re Naim On sisamis orok-susture elta nga morok-lingi kurtweni nanen ko morlot milep van ji Atua surir nga Numal se kerr pimmetmete nir pirres.

²⁴ Mian ko Pol ko Banapas orivel otvi kele Pisitita e van Pampilia e.

²⁵ Ko rengo ie, orwerwer kele rengo ngaim wel san nga Peka, mian ko orjubbul van ngatan e Atalia.

²⁶ Daron nga morsuw vajin iok, ko orsa luwi van re drav e ko orwolu luwi van

Antiok reнге Siria e. Iok ko evi lat nga Atua mususture nuru bonevis ko muwrai nga pimetmete nuru řirres reнге nalol nga řirres sen mijpari nga morvinvini ore jijle vajin majingen sen.

²⁷ Daron nga morjipari Antiok, ko orveruse kalesia jijle arini arkorti lat sansan. Orwera tevi jinibb nir sev nga Atua miwilwil se nuru nga morloli, ko erpese ni murongwose puloli nga jinibb ne vare nir kele parosuri.

²⁸ Mian ko orlik eprepriv kele ie tevi jinibb se Iesu nir.

15

Nabur se kalesia nir arkorti Jerusalem

¹ Ko jinibb sopor arivel lingi jutia ko arini Antiok e. Ko arok-wer sesesre tasi kerr; arwera "Poro sete kapan re bae pirpe nale neseseien se Moses muwrai, ko Atua sete mia-la mauren tevi kami."

² Ko Pol ko Banapas orij latlat elep tevir suri neseseien ngok. Ko mian ko kalesia nir nga Antiok arkoni tweni Pol ko Banapas tevi nir sopon kele van Jerusalem e nga parsusi rongorngе iok tevi aposol ko elta nir.

³ Ko daron nga markonir jile ko arivel otvi Ponisia ko Sameria. Arsuře suri erpese nga Atua mirvei jinibb ne vare nir nga parini parivi jinibb se Atua. Nosřen ngok ololi jinibb se Numal nir arir temjpal.

⁴ Ko daron nga marremali Jerusalem e, ko kalesia nir tevi aposol ko elta nir arwera erres tevir. Ko arwerai tweni nanu jijle nga Atua miwilwil se nir nga marlolir.

⁵ Ko nir sopor nga marivi Parasi ko marosuri Iesu, artur imera ko arwera "O, nir ngok nga sete marivi řeri Isrel paran wor re bae ko. Ko kapvisisenir ko wor nga parvijuri nale neseseien se Moses."

⁶ Mian ko aposol tevi elta nir arlik korti nga parjililwer suri norrorrmien ngok suri jinibb ne vare nir, lat nga parloli puto suri.

⁷ Arjililwer suri epriv sopon, mian ko Pita otur imera ko owra "Selek nir, kamrongwose nga tuwi jer pa, Atua orrorrmi nga řilngi inu erpe san re gortien ngok se kerr nga piwerwer reнге nosřen nga řirres tevi jinibb ne vare nir. Atua ololi erpok nga nir parunge ko parosuri ni.

⁸ Ko Atua nga murongwose nolo jinibb jijle nir eviseni norrorrmien sen tevi jinibb ne vare nir daron nga řilai Nerřin On sen tevir, osorsan erpe nga řilai tevi kerr.

⁹ Norrorrmien nga Atua muloli tevi nir osorsan kobbong erpe norrorrmien nga muloli tevi kerr. Arlingi nosurien ser

reнге ni, ko ni ololi nolor owokwok jijle erres.

¹⁰ Ngok, ko suri sev kamwera kaploli Atua pulolar? Suri kamwera kaplingi kele soloslo nga murrow reнге nir ngok nga marosuri. Soloslo ngok orrow řelak reнге kerr řeri Isrel nir, ko re kele apu se kerr nir.

¹¹ Ko Numal se kerr Iesu okrres řelak tevi kerr, ko rramasi reнге nosurien reнге ni kobbong, osorsan erpe jinibb ne vare nir."

¹² Nir jijle arlik murrarrong ko armurrong, mian ko Banapas ko Pol vajin orsuře suri erpese nga Atua řilai derteren tevi nuru nga pormajinge nelesien nir ko nanu nga marinijnj nawone nir tevi jinibb ne vare nir.

Jemes evinvini ore nale

¹³ Daron nga morwerai jijle nale se nuru musuw, ko Jemes otur imera ko evinvini ore nale, owra "Tasik ko jojik nir, kapmurrongе nale suk řirres.

¹⁴ Saemon Pita ea-wer visviseni lebbong erpese nga womu Atua murrorrmii jinibb ne vare nir, ko nga řilai tweni nir sopor marini jin e.

¹⁵ Iok osorsan tevi sev nga propet maruli:

¹⁶ 'Inu Numal, bea-luwi kele ko řemajing lweni naim se Devet nga mumutmut jile pa řisij. Inu bosusture lweni kele.

¹⁷ Ko jinibb lele ne iel ngatan nga inu meveruse nir pa nga partori totkoni nisek, parlesi wose nga inu nuvi Atua.

¹⁸ Nale ngel evi se inu Atua nga mololi jinibb marongwose tuwi pa vini."

¹⁹ Ko Jemes etajer nga muwra "Evi nale suk nga bowrai suri: sete erres nga rraplingi soloslo nga murrow kele re jinibb ne vare nir nga marieni lwenir pa vini ji Atua e.

²⁰ Ko erres rrapuli naul san van jir, ko rrapwerair e nga nir parvijuri ko wor nale sopor nga marto reнге nale neseseien se Moses, nir le ngel: Setemun parurroi nanen nga marloli sulsulen e van ji atua řinij nir, ko sete parloli řisij tevi nesevin, ko sete parurro nanu san nga marwusi ore řirislan nga pimij ko drran sete řiseser asi te.

²¹ Suri tuwi jer pa vini, reнге naim ne loten se řeri Isrel nir re nabong on, jinibb sopor arok-tur imare ko arok-eve neseseien se Moses, ko jinibb arok-werai tweni nale sen re ngaim jijle."

Aposol ko elta nir arlai naul san pian ji jinibb ne vare nir

²² Aposol tevi elta ko kalesia nir armurri suri nga parkoni kele jinibb sopor van

Antiok e nga parpitevi Pol ko Banapas. Arlingi Saelas ko Jutas Barsapas nga morivi nabur eru re gortien se Numal.

²³ Aruli naul san nga muwra mirpel: 'Kem aposol ko elta nir, namwerai erres pelak tevi kami jijle jinibb ne vare nir nga kamivi jinibb se Numal nir re Antiok, Siria, ko Silisia.

²⁴ 'Namrunge nga jinibb sopor re gortien se kem arinuk ji kami ko arlokloksi kami re nale nga sete kem namkonir e.

²⁵ Ngok ololi kem namlik korti le, ko namini tevi norrorrmien nga nablingi jinibb ne majingen eru ko nabkoni nuru vinuk ji kami. Nuru porpitevi Banapas ko Pol nga nammerreni nuru milep.

²⁶ Nir nga namlingir ngok arlai pa nolor ko mauren ser ko tweni majingen ngok.

²⁷ Ko niko namkoni Jutas ko Saelas, nga pora-werai kele nanu ngok kobbong nga kem namuli.

²⁸ 'Nem̄in On eviseni tevi kem nga sete nabjngteni soloslo nga murrow rengo kami.

²⁹ Ko iok kobbong, evi nga sete kapurroi sev nga marloli sulsulen ren van ji atua m̄inij nir. Ko sete kaploli p̄isij tevi nesevin. Sete kapurroi nanu san nga marwusi ore birislan nga pimij ko drran sete m̄iseser asi te. Poro kapvijuri norrorrmien ngok nir, ko kaploli p̄irres ko. Erres wor ko remse kami ko pa.'

³⁰ Niko nir ivij ngok arivel lingi Jerusalem ko aran Antiok e. Mian ko arkortoni kalesia totoklai nir, ko arlai vajin naul ser tevir.

³¹ Nale ne naul nen osongni nolor e neiren, ko osustur kele norrorrmien ser.

³² Ko Jutas ko Saelas kele orivi propet, ko orjiljilwer epriv tevir, ko orsustur e norrorrmien ser ko orwilwil ser.

³³ Meri Jerusalem ngok orlik kele beblen Antiok, ko daron nga morivel lingi nga porluwi van ji nir nga markonir e, ko kalesia nir ne ie arwera "Demat pipitevi kamru re sel se kamru nga kopor-luwi e."

³⁴ [Ko Saelas elik jer ie.]^B

³⁵ Ko Pol ko Banapas orlik kele Antiok, ko nuru tevi kalesia elep kele wor arvisviseni ko arwerwer suri Numal rengo ie.

Pol ko Banapas orivel sisamis

³⁶ Ko sete epriv, Pol owrai tevi Banapas owra "Rrek rrapluwi kele van rraplesi jinibb se Numal nir rengo ngaim jijle nga rramwerwer rengo nale sen rer. Ngok puloli rraprongose lat nga marlik ren muto suri."

³⁷ Ko Banapas emarong, ko emrreni p̄itkai kele Jon nga nisen tuwen nen Mak.

³⁸ Ko Pol sete emrreni pipok, suri Mak evel lingir seveling nga Pampilia ko omusmus p̄imajing tevir.

³⁹ Sete epriv ko Pol ko Banapas orlat, mian ko orsisamis. Banapas etkai Mak ko orwolu rengo drrav van Saepreas e.

⁴⁰ Ko Pol etkai Saelas; ko jinibb se Numal nir arngoni nga Numal se kerr purongose pimmetete nuru rengo nalol nga m̄irres sen. Mian ko orivel.

⁴¹ Orivel van, orremali Siria ko Silisia, orok-wilwil se kalesia nir nga parterter.

16

Timoti evivitu kele suri Pol ko Saelas

¹ Pol etajer kele van Depe ko Listra e, lat nga jinibb san nga mivi kalesia nga nisen Timoti m̄ilik e. Tasu sen kele evi kalesia nga mivi nesen Isrel, ko tata sen ma evi m̄eri Gris.

² Tasi kerr ko joji kerr nir nga Listra ko Ikoniarm arwera evi jinibb nga m̄irres pelak san.

³ Pol emrreni p̄itkai pipitevi, mian ko ololi ean re bae. Ololi erpok suri m̄eri Isrel p̄etp̄eti nga marlik ie arongose nga tata se Timoti evi m̄eri Gris.

⁴ Ko daron nga Pol tevi selen ngok nir marok-tutur m̄itajer re ngaim ko ngaim nir, arwerai tweni tevi kalesia nir sev nga aposol tevi elta nga Jerusalem marwerai. Ko arwerai eterter nga nir parrul totkoni ko wor norrorrmien ngok nir.

⁵ Ko kalesia nir arini eterter kele rengo nosurien. Ko nabong jijle, jinibb evinvini, ololi nir esa van mare tetajer.

Pol elesi bori san iak Troas

⁶ Pol tevi selen nir arivel otvi Prijia ko Galesia. Ko Nem̄in On sete emarong nga nir parwerwer re vanu ne Esia.

⁷ Vitunen ko arremali kele rengo vanu ngok Misia; ko arloli lesi nga paran mare kele Bitinia e, ko Nem̄in se Iesu sete emarong.

⁸ Mian ko arivel otvi ma Misia, mian ko arjipari Troas.

⁹ Ko re natmupong nen bbong, ko Pol elesi bori san suri m̄eri Masetonia san nga mutur ko mungoni tertere muwra "Kupini wor iel Masetonia ko kupwilwil se kem."

¹⁰ Daron nga Pol m̄ilesi jijle bori ngok, ko kem nampejpej sel nga naban Masetonia e. Suri namrongose nga Atua everuse kem nga naban nabwerwer rengo nosp̄en nga m̄irres sen iok.

Litia evini evi jinibb se Numal

^B 15:34 Nale nga muto re nolo [], rrek sete Luk oli, ko jinibb san ea-uli virtue daron nga muli tweni kopi san ne naul ngel.

¹¹ Namwolu lingi kele Troas rengo drav, ko naman mawos Samotres e. Ko mevinen, namjipari Neapolis.

¹² Ko rengo iok namtajer kele van Pilipae e, lat nga mēri Rom milep marloli liken ser rengo, ko mivi kele ngaim nga muto womu re vanu ngok Masetonia. Namlik nabong sopor ie.

¹³ Ko re nabong on, namivare re ngaim ngok van re jeli nuvi seser san, nga namrorrmi evi lat nga mēri Isrel nir marok-ser korti e tweni loten. Namlik ngatan ko namtipatun namjiljilwer tevi nesevin nir nga markorti ie.

¹⁴ Nesevin nen san nga mokmurrong nen nisen Litia, nga mokwulwule nijor nga nowlin milep ko musongsong mupong-pong mīrres re ngaim ngok Taeatira. Ko ni evi vin nga moksurōvi Atua. Numal etasi nolon nga mīlgi norrorrmien sen vajin eterter re nale se Pol.

¹⁵ Ko daron nga vinnen tevi naim sen nir marpaptae jijle, ko everuse kem owra “E, kapini kaplik rengo naim suk, poro nga kaprorrmi nga inu nuvi weretunen jinibb se Numal”. Mian ko kem nammarong re sev nga muwrai, ko naman.

Arlingi Pol ko Saelas re naim ne nekaiēn

¹⁶ Nabong san rengo sel se kem van re lat ne loten e, namsekai nesenwarrong demij maur san. Ni neūin san oto rengo nga mīlai derteren tevi nga puwrai tweni sev nga pia-rremali vitu. Ervei nevōt elep daron nga mokloli majingen ngok e tevi nir nga marmetmete ni.

¹⁷ Vinok evijuri Pol tevi kem sopor kele, ko ok-kail van mare owra “Lartul ngel arivi jinibb se Atua nga mian mare temijal nga marvisiseni kami rengo sel ne mauren!”

¹⁸ Vinok olōni lweni norrorrmien ngok nabong sopen kele, mian ko Pol ornge esij e. Ko otur imera ko erij tere neūin nga, owra “Renge nise Iesu Kristo, kuplinglingi vajin vinel!” Ko vesan rres neūin nga mīsij nen elinglingi vin nga.

¹⁹ Ko daron nga nir nga marok-metmete vinel marongwose vajin nga martor jabble sel ser nga marok-loli nevōt milep ren, artur imare ko arrul totkoni Pol ko Saelas. Ko artekai nuru van ortur rengo ngaim ngok re maket, lat nga marok-wer sesesre lat nga puto suri tevi jinibb nir.

²⁰ Ko artekai nuru van ortur rengo no mēri Rom eru nga morivi gavman, mian ko arwera “Laru ngel orivi mēri Isrel, ko orok-loli sel nga marsij rengo sise kerr.

²¹ Orvisiseni murrūn nga sete musor-san. Ko murrūn nga morwerai kele sete evijuri nale neseseien se kerr, ko kerr

rrammajing rengo nise numal gavman ne Rom ko sete orongwose rrapvijuri nuru.”

²² Ko delung aran kele re norrorrmien ngok, ko artere Pol ko Saelas.

Ko jinibb ne nuval nir arrerrersri joro nuru ko arlai nale nga parevji nuru re nai.

²³ Daron nga marevji lenglengen nuru musuw, ko arlingi nuru van re naim ne nekaiēn. Ko arlingi nale tevi mēri nga mimetmete naim ne nekaiēn nga pimteni suri nuru pīrres nga sete porwolu.

²⁴ Daron nga morok murrong nale ngok, ko otur mera ko etkai nuru van lat san loloim jer kele, ko eplaji totkoni βela nuru e nai nga milep san.

²⁵ Ko mian ko daron nga nat mīrang, ko Pol ko Saelas orlot ko orlai nubo van ji Atua, daron nga nir kele sopor re naim ne nekaiēn marok-murrong.

²⁶ Sete epriv ko namī nga milep san eterure naim ne nekaiēn elep. Metali nir artetpīr, ko dil delrurr nga markai rengo nevrer arvititan rengo nevre nir jijle nga marlik re naim ne nekaiēn.

²⁷ Daron nga mēri nga mokmetmete nir mītaol ko mīlesi metali martetpīr, ko orrorrmi nir nga marlik loloim arwolu van vare e; otur mera ko elai nesip ne nuval sen nga pīsari lweni e.

²⁸ Mian ko Pol ekail owra “E, sete kupsari lwenim! Sete san owlu ivare, ejki.”

²⁹ Mian ko mēriēn ongoni laet san, ko owlu van loloim re naim ne nekaiēn. Eririr temijal, ko evini ejjol vitan re no Pol ko Saelas.

³⁰ Ko etkai tweni nuru re naim ne nekaiēn, ko osusi tevi nuru owra “Wurru, bololi pīrrese ko βela mauren?”

³¹ Oriji weli nale sen, orwera “Kuplingi nosurien som rengo Numal Iesu, ko ngok kurongwose kupla mauren, nik ko nir nga marlik rengo naim som.”

³² Mian ko Pol ko Saelas orjilwer vajin tevi ni ko nir jijle nga marlik rengo naim sen suri Numal Iesu.

³³ Re daron ngok kobbong natmupong nen, ko mēri nga mokmetmete nir re naim ne nekaiēn ngok etkai nuru van, errawe vaseni lat nga marevji nuru rengo nibe nuru, mian ko ni tevi jinibb jijle nir nga marlik rengo naim sen arpaptae.

³⁴ Mian ko etkai lweni Pol ko Saelas vini re naim sen e, ko ela nanen sopen tevi nuru. Ni ko jinibb ne naim sen nir, neiren nga milep oto rengo nolor suri arini nga marosuri vajin Atua.

³⁵ Daron nga nat mīrin vajin, ko numal neseseien okoni polis sopor van ji ni nga mokmetmete naim ne nekaiēn tevi nale san nga muwra “Kuplinglingi laru ngok nuru porivel sisarow.”

³⁶ Mer nga owrai tevi Pol owra “Jinibb neseseiren elai nale ngel nga nik ko Saelas kopor-ivel. Komor-rongwose kopor-ivel ko vajin reнге demat.”

³⁷ Ko Pol owrai tevi polis nen owra “E, erpese ko, komru nomorivi mēri Rom, ko laru ngok setemun orloli nomorkot, ko arevji komru re no jinibb nir, mian ko arwirr komru van re naim ne nekaien. Ko lelingenok ormerreni porlai tweni silveni komru. Sete mia-irpok, sete erres porlai nale re sel, ko porini ko wor porlai tweni komru iel.”

³⁸ Daron nga polis muwrai tweni tevi numal nen nuru nga Pol ko Saelas orivi mēri Rom, ko numal nen nuru ormetutu lenglengen.

³⁹ Mian ko orini ko orwerai warru tevi nuru, ko ortekai tweni nuru re naim ne nekaien, mian ko orngoni nga porivel lingi ngaim ngok.

⁴⁰ Ko daron nga morivel lingi ie ko oran mawos re naim se Litia, ko iok ko orlesi keke jinibb se Numal nir ren, ko orsusture keke nosurien ser. Mian ko orivel lingi vanu ngok.

17

Pol ko Saelas oran Tesalonaeka

¹ Ko Pol ko Saelas orivel van, ko orremali re ngaim ngok Ampipolis ko Apolonia; mian ko ortajer van orjipari Tesalonaeka. Ko naim ne loten se mēri Isrel nir san oto ie.

² Ko erpe nga mokloli pa tetajer, ko Pol ean loloi nen nga pusrōvi Atua. Ko okloli erpok ean ejpari nabong on itul ko pa nga ni mokwerwer tevi jinibb nir ie. Ko oklai nale

³ ne Naul On nga miviseni tevir nga Mesaea purnge pīsij ko wor pijpari pimij, ko Atua pia-loli pia-maur luwi keke reнге mijen. Pol owrai keke tevir nga Iesu evi Mesaea nga ni mokwerwer suri.

⁴ Nir sopor arosuri sev nga Pol muwrai, ko arini keke arvivotu suri Pol ko Saelas. Ko jinibb ne vare keke nir elep nga marok-surōvi Atua, ko nesevin nga marwowomu re nesevin nir arini keke arpitevir.

⁵ Ko mian ko jinibb nga marlelep se mēri Isrel nir nolor eleplep, ko aran arpej but-terter nga marok-ivel suri nawon sel, ko arwerai tevir nga parloli balpalen karkar. Arwera parevei Pol ko Saelas van jir; ko aran reнге naim se jinibb san nisen Jeson, ko arbburbburi metali sen nga marok-pej Pol ko Saelas.

⁶ Ko daron nga setemun marlesi nuru, ko arrul totoni Jeson tevi tasi kerr sapon, areveir vini artur reнге kot re no jinibb nga marlelep ie. Mian ko arkail van mare

temijpal arwera “Laru ngok nuru Pol ko Saelas orloli nanu nga marsij elep reнге lak elep. Ko lelingenok orini iel keke!

⁷ Mian ko Jeson ngel etkai nuru oran loloi sen e. Nir jikle artor otvi nale neseseiren se Sisa, batu numal se mēri Rom nir. Nuru orwerai nga batu numal mīnij keke san oto, nga nisen Iesu.”

⁸ Ko daron nga mēri Isrel tevi jinibb nga marlelep ne ie marunge nale ngok, ko arunge lengleng esij suri.

⁹ Mian ko arloli Jeson ko tasi kerr nen nir parlai nevōt sopor tevir puloli parivel sisarow e. Ko nir arloli erpok, ko arivel sisarow vajin.

Pol ko Saelas oran Berea

¹⁰ Renge natpong nen kobbong ko tasi kerr nir arkoni tweni Pol ko Saelas oran re ngaim ngok e Berea. Ko daron nga morremali ie, ko ortajer ko pa van re naim loten se mēri Isrel nir.

¹¹ Jinibb ne ngaim ngok Berea arresrres asi nir ne Tesalonaeka, ko nir arir nga parunge nale. Ko nabong jikle armeteni pejpej reнге Naul On poro nga nale nga Pol muwrai arsansan tevi nga marto re Naul On, rrenga ejki.

¹² Ko mian ko nir elep arlingi nosurien ser reнге Numal. Ko nesevin elep nga marwowomu re nesevin nir ne Gris ko norman nen keke elep arosuri.

¹³ Ko daron nga mēri Isrel nir nga marlik Tesalonaeka marunge nga Pol mokwera tweni nale se Atua tevi mēri Berea nir, iok ololi nir aran ie ko arevei kortoni delung sopor arser korti; ko arwera suri tevir, ko ololi nolor ololarsi Pol.

¹⁴ Ko ngavilvil, tasi kerr nir arkoni tweni Pol tevi selen keke sopor arjubbul van ngatan e reнге jeli dis (ko Saelas ko Timoti orlik jer Berea).

¹⁵ Ko arpitevi Pol aran arjipari Athens. Ko daron nga marivel lingi Pol nga parlui van Berea e, ko Pol elai nale tevir nga paran parwerai tevi Saelas ko Timoti nga nuru porsaro pingavilvil vini porpitevi keke.

Pol elik Athens

¹⁶ Daron nga Pol mokteravi nuru reнге Athens, ko ornge esij nga mīlesi atua ser nga marsavir reнге nai ko nevōt muwon saut.

¹⁷ Ko ean reнге naim gortien se mēri Isrel nir nga pījiljilwer tevi nir ko tevi jinibb ne vare keke nga marsurōvi Atua. Ko nabong jikle, okjiljilwer keke tevi jinibb jikle nga mīlesi reнге maket.

¹⁸ Ko mēri Gris nir sopor arvijuri neseseiren se nir san nga nisen Epikurus, ko sopor arvijuri neseseiren se nir san nga nisen Seno. Ko nir nen sopor arjilwer tevi Pol. Ko nir sopor arwera “O, morok erij

se lenglengen! Ni oksuŕe sev ko?" Ko nir m̄inij arwera "Namrunge erpe moksuŕe atua ne vanu m̄inij ko." Arok-rij erpok suri Pol oksuŕe suri Iesu ko owrai tweni nga Atua ololi emaur luwi renge mijen.

¹⁹ Mian ko arverus Pol nga pivini putur renge no gortien ser san nga marveruse Ereopakas, ko arwera "Nammerreni nabrongwose nevisvisenien nga mimerr som erpese ko?"

²⁰ Namrunge kuwrai nanu sopor nga namtaol lenglenge, ko nammerreni nabrongwose kuspe sev ko?"

²¹ Ko suri evi norrrormien tera se m̄eri Atens nir ko se neturvitan kele nir ne ie nga tetajer marmmerreni parlilik ko par-murronge nale nga mimerr ko parjiljilwer renge norrrormien nga marirpok.

²² Mian ko Pol otur imera re no delung nir ko owra "Meri Atens, inu nulesi pa erpe kamok-surövi atua se kami nir erres p̄elak.

²³ Daron nga nomok-ivel suri sise kami, ko nomok-meteni nanu nir nga kamok-surövi, ko nulesi pa nale san nga kamuli renge nawot san nga muwra 'Ngel oto tweni nga parsurövi Atua san nga setewor rramrongwose'. Kami sete kamrongwose ko kamsurövi ma, ni le vajin mowra tweni ngel tevi kami.

²⁴ Atua ngok emajinge iel ngatan ko nanu jijle nga marto rengen. Evi numal ne melrin ko iel ngatan kele. Sete elik renge naim loten nga jinibb m̄imajinge.

²⁵ Sete ongoni jinibb san p̄ila sen nga p̄irij. Elai mauren, sowin ko nanu jijle tevi jinibb nir.

²⁶ Etipatun re jinibb sansan kobbong, ni ololi jinibb totoklai nir nga marmaur iel ngatan. Ko owjuwje vajin lat ne liken ser sisamis, ko owra suri kele daron nga paramaur jipari.

²⁷ Atua ngok ololi erpok nga puloli kerr jijle rraploli lesi nga rrappej ni; ko rrek daron nga rramok-totong karkar, ko orongwose rrapsekai ni. Ko ewretun temi-pjal nga ni sete oruj ngasu rragrag ji kerr.

²⁸ Ko erpe jinibb san muwrai pa tuwi muwra 'Suri rramkorti renge Atua kobbong ololi rramla mauren, ko rramok-tutur ko rramloli nanu jijle'. Ko erpe kele kami san nga mok-koji nubo muwrai pa muwra 'Kerr kele rramivi natun.'

²⁹ Ko suri rramivi natu Atua, ko sete orongwose rrapwera ni erpe nanu nga marmajinge re gol rrek silva rrek nevöt. Sete evi nanu san nga jinibb murongwose p̄imajinge re nevren rreknga norongwosien sen, ejki.

³⁰ Ko re daron ne tuwi nga jinibb sete murongrongwos, ko Atua etlasi tweni bbong sev nga marloli, suri norongwosien ser ejkie. Ko lelingenok vajin okwera

tevi kerr jijle re lat jijle, owra 'Kami jijle kaprieni norrrormien se kami suri nololien se kami.'

³¹ Suri elngi pa nabong nga pia-wera suri lat nga puto suri tevi jinibb jijle ne iel ngatan renge sel nga musorsan kobbong. Atua otobbobbu pae isi nga ni puloli pia-wera suri lat nga puto suri tevi jinibb nir. Ko eviseni nga evi weretunen nga puloli pirpok re nga muloli pa m̄ernen emaur luwi kele renge mijen."

³² Ko daron nga Pol muwra jinibb san mimaaur luwi kele re mijen, ko nir sopor armen keraji. Ko nir sopor ma arwera "Nammerreni naba-runge kele nale som suri norrrormien ngok."

³³ Mian ko Pol evel lingir;

³⁴ ko nir sopor arini arkorti tevi ko arosuri Iesu. Renge nir ngok, jinibb san nisen Denis nga mivi san re gortien ngok Ereopakas, ko nesevin kele san nga nisen Damaris, ko norman m̄inij kele sopor.

18

Pol ean Korin

¹ Pol evel lingi Atens ko ean kele re ngaim ngok Korin.

² Ko iok, eskai m̄eri Isrel san nga mivel Pontas, nga nisen Akwila. Ko bonevis ean elik Itali re ngaim nga milep ngok Rom. Ko sete erpiv batu numal ne Rom nga nisen Klotias, owrai nga m̄eri Isrel parivel lingi Rom ko wor. Mian ko Akwila tevi nesen sen Prisila orivel lingi Rom ko orini orlik Korin. Sete orlik erpiv, mian ko Pol ermali nga mivini m̄ilesi nuru.

³ Ko elik tevi nuru. Okorti tevi nuru renge majingen se nuru, suri ni kele majingen sen orsoran tevi nuru; nir arivi jinibb nga marilile nevlul buluk.

⁴ Ko tetajer renge nabong on Pol tevi m̄eri Isrel nir ko m̄eri Gris nir arok-loli jiljilweren elep renge naim loten, suri Pol emrreni pirveir nga parosuri Iesu.

⁵ Ko vitunen Saelas ko Timoti orivel lingi Masetonia vini; ko daron nga morremali ie, ko Pol elngilngi majingen nga mok-ilile nevlul buluk, ko ean vajin re majingen nga renge nospen nga n̄irres, ko okwera lilane tevi m̄eri Isrel nir nga Iesu evi Mesaea.

⁶ Ko nir ne ie artere ni ko arij esij tevi ni. Mian ko ni ewirwirreni tweni maw re sunsun sen, nga piviseni tevir nga esir duren tevir; mian ko owra "Poro kapjijki, ko evi nga kami kobbong, sete numrreni inu horongwose. Ko etipatun lelingenok inu bean bowrai tweni nale suk tevi jinibb ne vare kobbong."

⁷ Mian ko evel lingi nir, ko ean elik re naim se jinibb san nga mivi jinibb ne

vare nga moksurovi Atua, nga nisen Titias Jastas. Naim sen oto bbong jeli naim ne loten se mēri Isrel nir.

⁸ Ko Krispas, mēer nga mokmetmete naim ne loten ngok, tevi nir nga marlik renga naim sen, arosuri Numal se kerr. Ko jinibb mīnij kele elep ne Korin, daron nga marunge nale se Pol ko arosuri vajin Iesu, ko arini vajin ko arpaptaes.

⁹ Ko natpong san Pol elesi nanu san erpe bori san nga Atua miviseni tevi ko owra “Sete kupmetutu, ko kuptajer ko wor nga kupwerwer. Sete kupmosi.

¹⁰ Inu beptevim, ko sete san mia-lokloksim, suri nir elep re ngaim ngel arivi suk ko.”

¹¹ Ko iok ololi Pol elik iok Korin ejpari sia san ko navöl ouwon, nga mivisviseni nale se Atua tevi jinibb nir.

Meri Isrel artekai Pol van renga kot

¹² Renge daron ngok, mēri Rom nir arsture kele jinibb san nga nisen Galio nga pivi batu gavman se mēri Akaea nir. Ko gortien ne mēri Isrel arini ko arrul totkoni Pol, ko artekai van re kot, ko arwera

¹³ “Merel okloli lesi nga puloli jinibb se kem nir parsurovi Atua renga sel nga mītre nale nesereien se kem!”

¹⁴ Vitunen ko Pol pia-tur imera nga pīrij, ko Galio owrai tevir owra “Meri Isrel, kapmurrong. Poro ewretun mērel ololi nanu san nga sete osorsan, rreknga otor oti nale nesereien, ko kamrongwos pae nga inu borngre ko wor kami.

¹⁵ Ko suri evi laten kobbong ne nale, ko nais ko nanu ne nale nesereien se kami, ko oto ji kami kobbong nga kaploli lilane. Inu sete nuir rragrrag nga bowra suri norrorrmien san nga mirpok.”

¹⁶ Mian ko ejeli twenir arivel lingi kot.

¹⁷ Ko delung nir arrul totkoni Sostinis, nga mivi nabur ne naim loten san, ko arevji temijpale re pa roro metali ne naim ne kot ko. Ko Galio sete ma owor suri rragrrag nir.

Pol owi vini Antiok e

¹⁸ Vitunen ko Pol elik beblen kele tevi jinibb se Numal nir Korin, mian ko eremse nir ko elai drrav van kele Siria e tevi Akwila ko Prisila. Ko vitunen ko mia-linglingi ie, etvei tweni rao batun omus iak Kenkrea, nga piviseni rijrijen san nga muloli tevi Atua.

¹⁹ Ko mian ko arjipari ngaim ngok Epesas, ko Pol evel lingi Akwila ko Prisila. Mian ko ean loloim renga naim ne loten se mēri Isrel nir nga pījiljilwer tevi jinibb nir ie.

²⁰ Elilik sapon mian ko arngoni nga pīlik piprepriv kele tevir, ko ni omusus.

²¹ Eremse nir ko owra “Poro Atua pimarong ko inu bea-luwi kele”.

²² Ko ejpari Sisaria renga drrav, ko etajer van Jerusalem e, ko owrai erres tevi kalesia nir. Mian ko etajer evan Antiok e.

²³ Elik eprepriv sapon ie, mian ko evel lingi kele, ko evel oti Galesia ko Priija nga pususture nosurien se jinibb se Iesu nir nga parini parterter kele.

Apolos iak Epesas ko Korin

²⁴ Ko mēri Isrel san evini Epesas nga nisen Apolos. Apolos eak renga ngaim ne Aleksantria, ko evi jinibb nga mīrres san ne rijen, ko orongwose erres nale ne Naul On.

²⁵ Arvisviseni pa osuw sel se Numal se kerr, ko tetajer okrunge erres nga pokwerwer ko nga pokvisviseni jinibb nir renga nale weretunen se Iesu. Ko orongwose bbong baptaes se Jon.

²⁶ Ko okwerwer loloim re naim loten se mēri Isrel nir nga norrorrmien sen sete eririr rragrrag. Ko daron nga Prisila ko Akwila morunge nevisvisenien sen, ko orpitevi van re naim se nuru ko orwera visviseni sel se Atua erres vajin tevi.

²⁷ Vitunen ko Apolos owra pian Akaea, mian ko tasi kerr ko joji kerr ne ie Epesas arwilwil sen nga maruli naul san van ji jinibb se Iesu nir ne ie. Arngoni nga poro arongwos partekai Apolos pian loloim re naim ser. Ko daron nga mīrmali Akaea ko ewilwil se nir nga re nalol nga mīrres se Atua arivi kalesia.

²⁸ Suri Apolos evi jinibb nga mīrij mīterter, ko renga nale ne Naul On eviseni erres nga Iesu evi Mesaea. Ko renga no jinibb nir, okwer ore nale se mēri Isrel nir.

19

Pol evini Epesas kele

¹ Daron nga Apolos mīlik malum Korin e, ko Pol evel oti vanu vini Epesas e; ko ie, eskai kele jinibb se Numal nir renga.

² Ko osusi tevir owra “Daron nga kam-lingi nosurien se kami renga Iesu, ko Nemin On esilvi kami rreknga ejki?” Ko nir arij weli arwera “Ejki, setewor namrunge rragrrage sapon suri Nemin On.”

³ Mian ko Pol owra “Ko kamla baptaes nga mirpese san?” Ko nir arij weli arwera “Ko namla baptaes se Jon.”

⁴ Mian ko Pol erij welir kele, owra “Jon epaptaese jinibb nir nga nolor pulululwi. Ko owra kele nga san pia-vitu kele wor re ni nga jinibb nir parosuri. Ko Iesu ko evi mīnren nga Jon moksufe suri ngok.”

⁵ Daron nga nir marunge jikle sev nga Pol muwrai ngok, ko nir jikle arpaptaes re nise Numal Iesu.

⁶ Mian ko Pol elngi nevren renger, ko Nemñin On esilvir; ko arij renge nale lele. Ko arok-werai tweni sev nga Atua muwrai teviri, erpe propet.

⁷ Ko re gortien ngok, nir erpe esngavöl dromon eru (12) totoklai.

⁸ Ko evi navöl itul totoklai nga Pol mokan re naim liliken se mñeri Isrel nir ko mokjiljilwer sopen teviri suri batun vanu se Atua. Ololi lesi nga pirveiri parini.

⁹ Ko nir sopor batur eterter ko armusus parosuri, ko arok-rij esij tere sel were-tunen se Atua re no jinibb nir. Pol evel lingir ko etkai jinibb se Iesu nir. Ko nir arvivitu suri van re naim nga marok-korti ren san se mñer san nga nisen Tiranasa. Ko nabong jijle Pol okjiljilwer teviri, ko nir armurri suri lat nga putu suri.

¹⁰ Ean ejpari sia eru, mian ko mñeri Isrel ko jinibb ne vare jijle ne vanu ngok Esia arunge vajin nale se Numal.

Natu Skeva nir

¹¹ Atua elai derteren tevi Pol nga puloli majingen nga marinijnij nawone nir.

¹² Jinibb arlai bpong sunsun ko nijor nga Pol niben mijpari; ko aran arlingi re jinibb nga mamesi nir, ko arres luwi e; ko nemñin nga marsij arwolu lingiri.

¹³ Ko mñeri Isrel kele sopor nga marok-ivel sarsarr nga paroji tweni demij arloli lesi vajin nga paroji demij nir renge nise Numal Iesu. Arwerai tevi demij nir arwera "E, namrij tevi kami renge nise Iesu ngok nga Pol mokwerwer rengen."

¹⁴ Ko mñeri Isrel ebut nga marivi natu jinibb ne sulsulen san nga nisen Skeva, arloli lesi nga parloli pipok.

¹⁵ Mian ko nemñin nga mñisij ngok owrai teviri owra "Iesu ngok, nurongwose pae, ko Pol kele nurongwose; ko kami ma, sete nurongwos rragrrage kami."

¹⁶ Ko mñer nga nemñin nga mñisij mñisilvi ngok otur mera ko oti siksener, mian ko nir arwolu ivare lingi naim sen tevi niber sopen nga marrerra ko sunsun ser kele armerrerrerr.

¹⁷ Daron nga mñeri Isrel ko mñeri Gris nga marlik Epesas marunge sev nga miplari ngok, ko armetutu ko aririri temijpal. Mian ko jinibb nir arok-susi nise Iesu Numal se kerr van mare kele wor.

¹⁸ Ko nir elep nga marok-osuri vajin Iesu artur mera ko arwerai tweni vajin re no jinibb nir nga tuwi nir arok-loli majingen ngok nir ne botut ko nanu nga pulokloksi mauren se jinibb nir.

¹⁹ Ko nir elep nga marok-loli mirpok arlai naul ser vini ko arsuliri renge no jinibb nir. Naul nen elep sopen, erpe nowliri pian pijpari bejje silva 50 000.

²⁰ Ko re sel nga marirpok nga derteren ner mutoe, nale se Numal ean ejpari lat jijle, ko ean eterter kele wor tetajeri.

Laten nga milep iak Epesas

²¹ Daron nga nanu jijle musuw vajin ie, ko Pol orrorrmi nga pñilesesi Masetonia ko Akaea re sel sen van Jerusalem e. Mian ko owra "Poro bosuw Jerusalem, ko ban kele ko wor Rom e."

²² Mian ko okoni jinibb nga morok-wilwil sen eru, Timoti ko Erastasa, van Masetonia e. Ko ni elik mun sopen Esia.

²³ Re daron mawos ngok ko, laten nga milep san eplari iak Epesas suri sel ngok se Numal se kerr.

²⁴ Laten ngok eplari erpel: Jinibb san elik nga mok-majinge nanu renge silva, nga nisen Dimitriasa. Ko renge ie jinibb nir arok-surövi atua ser san nga mivi nesevin, nga nisen Artemisa. Dimitriasa emajing natu naim wowarrene nir re silva nga marrongrrongi naim loten se Artemisa. Ko ni ko nir nga marok-majinge nanu ngok nir arok-la nevöt elep re daron nga marwulwuler.

²⁵ Dimitriasa ervei kortoni nir jijle nga marok-loli majingen ngok ko owra "Selek nir, kamrongwose nga rramok-loli lilane liken se kerr re sev nga rramloli ngel.

²⁶ Ko rrek kamlesi ko kamrunge pa suri morok Pol nga oksusur metutue jinibb ko ervei tweni nir elep, sete re Epesas kis ko otomori renge lat jijle iel Esia. Okwera tweni nga atua nir nga jinibb marloli nevrer e sete arivi atua weretunen ko, ejki.

²⁷ Ko niko ololi jinibb jijle arrorrmi esij suri kerr vajin, ko suri nanu nga rrammajing ngok e nir. Ko naim ne loten se atua se kerr ngok Artemisa tivini tivi naim nawon vajin, ko jinibb nir setemun tarsurövi erpe atua san. Iok sete erres, suri lelingenok jinibb elep arok-surövi, re Esia ko re lat elep kele ne iel ngatan."

²⁸ Daron nga jinibb nen nir marunge iok, ko arlolar ko arkaill van mare arwera "Artemisa nga mivi atua ne Epesas, ni elep!"

²⁹ Mian ko arvijajenge elep erpok, errale lat jijle re ngaim ngok. Ko nir sopor arul totkoni mñeri Masetonia ngok nuru, Gaeasa ko Aristakasa nga morpitevi Pol vini, ko arevei nuru van re lat nga marok-lilik e nga milep ser.

³⁰ Ko Pol emrreni pian pijiljilwer sopen tevi jinibb nir, ko kalesia nir sete armarong.

³¹ Ko nir sopor nga martori majingen se numal gavman ne vanu ngok Esia arivi seler e Pol, ko arlai nale van nga Pol sete pian.

³² Ko delung arkarkar temijpal. Nir sopor arvijajenge nanu san ko nir sopor

arvijajenge nanu san, ko nir eleplep arrelenge ko arvijajeng mae.

³³ Ko mēri Isrel nir arkoni nir san nga nisen Aleksanta nga pian putur re no nir. Ko jinibb arrorrmī nga ni evi mēnen ko, suri mēri Isrel nir marloli mian mutur re nor. Ko osusi nevren van mare nga puloli parmurrong. Owra puwra suri nelesien sen renge sev nga miplari.

³⁴ Ko daron nga delung nir marongwose nga Aleksanta evi mēri Isrel, ko nir arkail kele van mare, arwera "Atemis nga mivi Atua ne Epesas, ni elep!" Arok-pēlak nga markail mirpok ejpari mete nial eru totoklai.

³⁵ Mianan ko jinibb se numal gavman ne ngaim ngok san ea-loli delung nir armurrong, ko owrai tevir owra "Meri Epesas, jinibb jijle ne iel ngatan arongwose nga evi majingen se kerr ko nga rrammetmete naim ne loten ngok se Atemis nga nisen mian wor mare, ko nevōt on nen nga murrongrangi ni, nga mivitan re melrin vini iel.

³⁶ Sete san orongwos rragrag pikerkeris re iok. Ko niko erres ma nolo kami pumolmol, pian ngatan. Ko sete erres batu kami piterter pipok.

³⁷ Kamtekai laru ngok vini, ko sete orve-nae nanu san renge naim ne loten se kerr, ko sete orok-rij tere kele Atua ngok se kerr.

³⁸ Poro Dimitrias tevi selen nir arlesi nanu san tere jinibb san, ko kot oto pa niko, ko numal nen nir arlik kele. Erres parloli nir wor parsupsupe.

³⁹ Rreknga poro kamwera kapwera nanu kele san, ko erres rraploli re gortien san nga mivijuri sel mawos nen kobbong.

⁴⁰ Suri emlas bbong tarevei kerr van re kot suri laten nga kamlat e milep lelingen, ko kapa-wera pipese suri?"

⁴¹ Daron nga muwrai jijle mirpok, ko okoni tweni jinibb nir arivel.

20

Pol evel rurrngi Masetonia ko Gris

¹ Daron nga laten ngok musuw vajin, ko Pol everus kortoni jinibb se Iesu nir nga parini lat sansan. Elai rijen tevir nga puloli norrorrmien ser piterter, mian ko eremser, ko evel lingi ie van Masetonia e.

² Evel rurrngi ie, ko oklai nale elep nga puloli norrorrmien se jinibb piterter, mian ko etajer kele van Gris e.

³ Ko elik navōl itul ie, oktiriv nga pīlai lweni drrav san ko pulwi van Siria e. Ko ornge nga mēri Isrel sopor arlingi nale ne ni nga parevji pini; mian ko erieni kele norrorrmien sen ko evijuri suri bbong ngaut renge sel nga nīasi Masetonia.

⁴ Ko Sopata, mēri Berea ngok nga mivi natu Piras, evivitu suri, ko mēri Tesalon-aeka ngok Aristakas tevi Sekantas, nuru kele orvijuri. Meri Depe ngok Gaeas nuru Timoti ko mēri Esia ngok nuru, Tikikas nuru Tropimas, orvivitu kele suri.

⁵ Lartul ngok nir arpitevi kem, mian ko arwowomu kem vajin aran artiriv kem Troas.

⁶ Ko daron ne nanen nga is mijki ren ngok nīasi, ko namsa re drrav san, namlingingi Pilipae, ko namwolu namjipari Troas; ela nabong elim totoklai. Namkorti tevi nir ne ie ko namlik wik san totoklai.

Pol ejilwer tuloni tevi kalesia ne Troas nir

⁷ Re nabong nga womujnen re wik, namser korti kele nga nabsurōvi Atua ko nabaan korti. Pol ejiljilwer tevi kalesia nir ejpari nat mīrrang, suri re rorpong nen bbong ko ni pia-ivel.

⁸ Ko re loloim nga muto mare jer nen e nga namlik ren, laet esaut arto ren.

⁹ Ko mēlakel san nisen Iutikas oklik re winto nen. Ko daron nga Pol mokrij mirpok, ko Iutikas meten orrwel, mian ko ematurrwel; mian ko evitan ko ewaji ngatan re dan. Naim nen arloli evi naim itul e. San oto ngatan, san oto mare nen, ko san oto mare jer. Ko ni evitan re nga mare jer nen; ko daron nga maran nga parlesi, ko ni emij pin jer pa.

¹⁰ Pol kele ean ngatan ko esaro ngavil, ejjol vitan ji Iutikas ko erake ko owra "Sete kaprrorrmī, ni emaur luwi le pa!"

¹¹ Mian ko Pol olwi van kele mare e ko namaan korti jile, ko ejiljilwer tevir eanan ejpari nat emaut nga pīrin; ko namiel lingir vajin.

¹² Mian ko arpitevi mēer wel nga mimaur luwi nga van re naim sen e, ko arir temijpal suri.

Namlingingi Troas naman Maelitas e

¹³ Pol orrorrmī nga ni pivel kele van lat san nga nisen Asos. Ko kem namwowomu renge drrav nga naban nabtirive ni ie.

¹⁴ Ko okorti kele tevi kem ie, ko esa re drrav. Ko namwolu kele van Mitilen e.

¹⁵ Ko mevinen namini lat san mori Kios, ko nabong mīniji nen namjipari Samos. Ko mevinen vajin namjipari Maelitas, ko naman ngaut ie.

¹⁶ Pol orrorrmī nga nabwolu asi Epesas, suri sete emrreni nga putur periv Esia. Otor ngavilvil, suri emrreni pīlik Jerusalem renge daron ne Pentekos.

Pol ejilwer tuloni tevi mērwomu nir ne kalesia nir ne Epesas

¹⁷ Re Maelitas, Pol elai nale van Epesas e, ko everus m̄erwomu nir ne kalesia nir nga parini parlesi ni.

¹⁸ Daron nga marjipari ie ko owrai tevir owra "Kamrongwose nanu jikle nga mololi nga meptevi kami daron nga mea-vini taole Esia.

¹⁹ Meri Isrel nir sopor arok-loli norrorrmien nga parlodoksik, ko arloli nurnge esij elep. Ko inu nutajer bbong, numajing se Numal, ko nuloli nolok ean ngatan. Ko nabong elep suwen metek orurus.

²⁰ Daron nga mewerwer rengo no delung nir, rreknga re naim se kami sisamis, ko sete norrorrmien suk emtutu rengo sev nga bowrai nga piwilwil se kami.

²¹ Nuwrai tevi m̄eri Isrel ko jinibb ne vare nir nga parlinglingi nololien ser ko parieni lwenir van ji Atua e, ko parosuri Numal Iesu.

²² "Ko sete nurongwose sev pia-rremali jik re Jerusalem, ko bosuri ta Ner̄in se Atua ko bean ie.

²³ Ko re ngaim jikle nga botutur e, Ner̄in On owra tevik nga bean re norongen nga m̄isij milep, ko parlingi inu re naim ne nekaien.

²⁴ Ko sete nurrorrmi p̄elak sev nga p̄irmali jik, ko nuwra ta ma bevinvini ore jikle majingen nga Numal Iesu m̄ilai tevik nga bololi. Ko majingen ngok evi nga bowrai tweni nos̄pen nga m̄irres suri nolo Atua nga m̄irres p̄elak.

²⁵ "Nuvel ji kami jikle, mewerwer tevi kami suri batun vanu se Atua. Ko lelingenok nurongwose nga sete kami san orongwose p̄ilesi kele nok.

²⁶ Ko niko bowra nanu nga m̄iterter san tevi kami, ngel: Poro kami san pijijiki, ko sete kama-piri inu e, ejki;

²⁷ suri nuwrai nanu jikle ko pa nga Atua mimrreni kaprongwose.

²⁸ Kapmetmet kami p̄irres ko nir nga Ner̄in On m̄ilngi re nevre kami. Kaptor pipi kalesia se Atua nir, suri Atua owli tweni nir ko pa re drra Natun.

²⁹ Nurongwose nga poro bevel lingi kami, ko sopor para-vini ji kami pirpe guli rrum nga parlodoksi kami.

³⁰ Kami luwi kele kobbong sopor parvisviseni gerisen nga parlai tweni jinibb se Numal nir.

³¹ Kapmetmet, ko kaptur p̄iterter! Kaprorrmi, natpong ko natrin ejpari sia itul totoklai nga nomok-visviseni tetajer kami e nga suwen metek mokjumjum suri.

³² "Ko lelingenok vajin nulngi kami rengo nevre Atua, ko nulai nale se Atua tevi kami nga muwra nolon nga m̄irres orongwose piwilwil se kami. Nale ngok

orongwose puloli kapterter ko p̄ilai nanu nga marres parremali ji kami, erpe rijrijen sen muwrai pa.

³³ Ko inu sete nuvi jinibb nga nolok mimrreni nevöt rreknga nijor se jinibb m̄inij nir.

³⁴ Kamrongwose nga inu nomok-p̄elak tevi nevre mawos nga belai sev nga inu tevi selek kele nir, nevre kem mumrrol ren.

³⁵ Renge nanu jikle nga mololi, nuviseni erpese nga kami kapvijuri nga piwilwil se nir nga niber mimelisa. Kaprorrmi suri nale se Numal Iesu nga muwra 'Neiren elep rengo kerr re rramlai nanu tevi jinibb, easie nga poro rraplai nanu ji jinibb.' "

³⁶ Daron nga Pol mivinvini jikle nale sen, ko ejpa vitan tevi nir jikle ko olot.

³⁷ Nir jikle arunge esij nga p̄ilinglingir, ko arting ko arlopolope, ko arromji ko aremsen.

³⁸ Arunge esij elep suri owrai tevir owra "Sete kama-lesi kele inu nok." Mian ko arpitevi van rengo drrav.

21

Pol ean Jerusalem

¹ Vitunen nga namremser ko namsa re drrav, ko namwolu mawos van Kos e. Ko mevinen namjipari Roj, ko namtajer van, namjipari Patara.

² Ko rengo ie, namlesi drrav kele san owra pian Ponisia e; ko namsa ren ko namwolu kele.

³ Namini vajin nga namleslesi norour nga milep ngok Saepras m̄iraji, mian ko namasi re devjen rres e; mian ko namwolu nga nabini Siria. Drrav ejpari iok re Taea nga pujubli nijor ie, mian ko naman ngaut e.

⁴ Namsusi pejpej jinibb se Iesu nir ie, ko namlik tevir ejpari wik san. Ko Ner̄in On owrowrai tevir nga parwerai tevi Pol nga setemun pian Jerusalem.

⁵ Ko daron nga wik nen m̄iasi vajin ko namtipatun kele sel se kem. Jinibb totoklai tevi nesen ser ko natur nir arpitevi kem re ngaim ean ejpari jeli dis. Namjipa vitan rengo dep̄inan ko namlot.

⁶ Mian ko kem jikle namremremse kem sisamis; ko kem kobbong namluwi kele van re drrav e, ko nir ma arlulwi van siser e.

⁷ Ko drrav owlu lingi Taea, owlu kele vini rengo Toleme e. Ko naman ngaut, namlesi kele tasi kerr nir ne ie. Namlik nabong totoklai san tevi nir.

⁸ Ko mevinen naman Sisaria ko namlik tevi Pilip, nga mivi jinibb werweren. Evi

san re nir ebut nga marlingi bonevis Jerusalem nga parmetmete nevöt.^C

⁹ Ko natun nesevin nir ivij nga sete-wor marlik ji norman, ko nga marok-werai tweni nale nga Atua mülai tevir erpe propet.

¹⁰ Namlik Sisaria nabong sopor, mian ko jinibb san nga mivi propet, nisen Akapus, mível Jutia vini ji kem.

¹¹ Evini ji kem ko elai netatuw se Pol ko eka lweni ßelan tevi nevren, ko owra “Ngok nale se Nermin On nga muwra, Merwomu ne Isrel nga Jerusalem parkai jinibb nga netatuw sen ngel re murrun ngel kobbong, ko parlingi ni re nevre jinibb ne vare nir.”

¹² Daron nga namrunge nale ngok ko kem jijle namok-werai eterter tevi Pol nga sete pian Jerusalem.

¹³ Ko Pol erij weli kem owra “Suri sev kamting ko kamtor otvi nolok? Sete numarong kis nga parlingi inu re naim ne nekaien suri Numal Iesu, ko numarong kele wor nga bemij suri ni iak Jerusalem.”

¹⁴ Ko niko sete nama-revei norrorrmien sen, ko namlinglingi kobbong. Ko namlot kobbong nga puto ko pa pirpe nga Numal se kerr mimrreni.

¹⁵ Namlik eprepriv sopen ie, ko namser kortoni kele joro kem, mian ko namiel namini Jerusalem e.

¹⁶ Jinibb se Iesu kele nir sopor ne Sisaria arpitevi kem. Ko artekai kem van re naim se jinibb san, nisen Nason, ne Saepras, nga mivi jinibb se Iesu tuwi ko pa. Ko namlik renga naim sen.

Pol okluklue Jemes

¹⁷ Ko daron nga namjipari Jerusalem, ko jinibb se Numal nir arir temijpal nga parlai kem.

¹⁸ Mevinen vajin ko Pol emrreni pukluklue Jemes, ko kem nampitevi. Ko nir nga marivi merwomu se kalesia nir arlik jijle ie.

¹⁹ Pol owra erres tevir, ko ewer visviseni tevir erpese nga Atua mülai ni nga piwilwil se jinibb ne vare nir.

²⁰ Nir jijle nga marunge nale ngok arsurövi Atua. Ko arwerai tevi Pol arwera “Sele kem, nik kulesi pa nga jinibb nuvasngavöl vavis kis ne meri Isrel nir marini marosuri. Ko nir jijle artori malume nale nesesreien se Moses erres ðelak.

²¹ Ko nir arrorrmi nga nik kuvisviseni meri Isrel nir nga marlik karkar re vanu se jinibb ne vare nir nga sete parosuri nesesreien ngok. Arwera nik kuwer orer nga natur norman nir setemun parvijuri sel ne tuwi se meri Isrel nir, ko nga sete natur paran re bae.

²² Ko rraploli pirpese le vajin, suri jinibb se kerr nir arongwos pae nga nik kumlik iel?

²³ Ko kuploli ma sev nga nabwerai ngel: Jinibb se kem ivij arloli rijrijen sisamis ser tevi Atua.

²⁴ Kupkorti ma tevir mevi renga loten ser nga puloli nir parwokwok re no Atua. Ko kuplai nevöt nga nir parwuli nanu e nir renga nabong ser nen, ko nir vajin parongwos parkiri batur. Ko ngok piviseni tevi jinibb nir nga sev nga marsupsupe suri nik sete arivi weretunen, ko jinibb jijle parongwose vajin nga ewretun nik kuvijuri ko wor nesesreien se Moses.

²⁵ Ko daron sopen pa, namwerai rrrur-rngi jinibb ne vare e nir nga marivi kalesia, sev nga nir parloli. Namwerai rrrurrgir e nga sete parurroi sev nga marlot e tevi atua minij nir, sete parurroi vison nga drra muto malum ren, rreknga nanu rrum nga sete martevei otvi Birislan nga drra puwlu tweni, ko sete kele parloli þisij tevi nesevin.”

²⁶ Ko Pol emarong, ko mevinen eptevi nir ivij nen, arivel. Ko arloli verusen nga puloli parwokwok re no Atua. Ko Pol ean loloim re Naim se Atua nga puwrai tevi jinibb ne sulsulen suri nabong evis nga parvinvini ore majingen ne nir elim ngok nga parini parwokwok luwi re no Atua. Suri nir ngok parevji sisamis wor nanu rrum ko.

Arrul totkoni Pol

²⁷ Ko daron nga wik nen mutomori pusuw, ko meri Isrel nga marivel Esia vini markulu sweri Pol loloim re Naim On. Ko arser kortoni delung jinibb nir ko artur imera ko arrul totkoni Pol.

²⁸ Arkikail, arwera “E, sele kem nir, meri Isrel, kapini kapwilwil se kem! Merel okivel karkar lat jijle, okwerai nanu nga marsij nir tere kerr meri Isrel nir ko tere nale nesesreien se Moses ko tere kele Naim On ngel. Ko ololi Naim On orrokitkit vajin suri eptevi jinibb ne vare nir vini ren.”

²⁹ Arwerai erpok suri arrorrmi Pol eptevi Tropimas nga mivi jinibb ne vare, meri Epesas san, van re Naim On; suri arlesi nuru Pol re ngaim ie.

³⁰ Ko iok ololi kele laten nga milep san ermmali re ngaim ngok. Ko arrul re Pol ko arteseni tweni re Naim On vini vare e; ko jinibb ne sulsulen nir arkikior luwi re metali.

³¹ Nir ngok armerreni parevji pini Pol; mian ko nale ejpari burtur se jinibb nuval ne Rom nir, ornge nga laten nga mikarkar san ermmali renga Jerusalem totoklai.

³² Ko ngavilvilsen elai jinibb nuval tevi merwomu ser nir sopor, arwolu van lat

nga nat m̄ikarkar muto ren. Ko daron nga jinibb nir markulu marmeteni burtur tevi jinibb nuval sen nir, ko setemun arevji Pol.

³³ Ko burtur ean morie Pol ko ololi jinibb sen nir arrul totkoni, ko arkai totkoni nevren tevi dil delrurr eru. Mian ko osusi tevir owra “Merel evi si le san? Ololi erpese le?”

³⁴ Nir sopor arkail arwera nale san, ko nir m̄inij arwerai nale m̄inij. Arkarkar elep nawon, ko burtur elesi eterter nga purongwose sev evi batu laten. Mian ko okoni kele jinibb sen nir nga partekai Pol van re naim se jinibb ne nuval nir.

³⁵ Daron nga martipatun nga partongsa van re naim nen, ko jinibb nir arlolar p̄elak, ololi jinibb ne nuval nir arwosi Pol van mare ko arivel tevi,

³⁶ suri delung nir arvivitu ko arkikaile elep arwera “Kaprevji, kaprevji pini!”

Pol erij tevi delung

³⁷ Otomori jinibb ne nuval nir parwosi Pol van loloim re naim ser, mian ko Pol ongoni tevi burtur owra “Wurru, orongwose ðejiljilwer tevim beblen?” Burtur osusi tevi owra “Erpese? Kurongwose kuprij nale se m̄eri Gris?”

³⁸ Inu nurrorrmi nik kuvi m̄eri Ijip nen nga mutur imera ko m̄itre batu gavman ko m̄itkai jinibb nuval nir nuvasngavöl nuvavij (4000) ko nir maran marlik rengo lolo merwer.”

³⁹ Ko Pol erij weli owra “Ejki, inu nuvi m̄eri Isrel. Nuak Silisia, re Tasas, nga mivi ngaim nga milep. Wurru kupmarong inu nga ðerij tevi delung ngok nir.”

⁴⁰ Burtur emarong, ko Pol otur ko obblöni nevren van mare nga nir parmurong; mian ko ni erij tevir vajin re nale se m̄eri Isrel nir.

22

¹ Ko Pol owra “Selek nir, m̄eri Isrel tata suk nir ko tuwak nir, wurru kapmurong ko bowrai visviseni mauren suk tevi kami.”

² Ko daron nga m̄eri Isrel nen nir marunge nga ni mokrij tevir rengo nale mawos ser, ko nir armurong kemkan̄e kele. Mian ko ni erij etajer,

³ owra “Inu nuvi m̄eri Isrel. Nuak Silisia re ngaim ngok Tasas. Numaur ko nulep ie. Nulai norongwosien suk ji jinibb nevisvisenien ngok Gamaliel. Evisviseni inu erres p̄elak re neseseiren se ðirterawareng se kerr nga bevijuri. Ko re daron ngok nuterter elep re majingen se Atua, erpe kami ngok nir lelingen.

⁴ Ko nomok-oji jinibb nga marvijuri sel se Iesu, nga berevji pinir. Nurrul totkoni

norman ko nesevin nga m̄elngir re naim ne nekaien.

⁵ Ko ngok batu jinibb ne sulsulen tevi nir ne kaonsel se kerr arongwose parwerai nga evi weretunen. Re daron ngok nutori naul nga maruli paran ji tasi kerr ngok nir nga marivi m̄eri Isrel iak Damaskas. Nuan iok nga ðesre totkoni kalesia nir ko bepatevi lwenir vini Jerusalem e nga parvirralir.

Pol owrai tweni erpese mivini mivi jinibb se Iesu

⁶ “Otomori pivi levial re daron san, nomok-tutur suri sel vini mori Damaskas, ko moron nga milep san omor vini re melrin eparik.

⁷ Nuil jubbul ngatan re dan, ko nurunge drrelan san muwra tevik muwra “Sol, Sol, suri sev nik komok-loli esij tevi inu?”

⁸ Ko nususi tevi nuwra “Numal, nik kuvi isi le?” Ko ni owra lweni tevik owra “Inu le Iesu m̄eri Nasret ngok nga komok-loli esij tevik.”

⁹ Nir nga marivel korti tevik arlesi moron ngok ko sete ma arunge drrelan nga m̄irrmali.

¹⁰ Mian ko nususi nuwra “Numal, kumrreni inu bololi sev?” Mian ko owrai lweni tevik owra “Kuptur imera ko kupan Damaskas e. Ko daron nga kupjipari ie, ko jinibb san p̄iwer visviseni tevim nanu jikle nga Atua m̄ilngir nga kupa-loli.”

¹¹ Moron ngok omor temijpal ko ololi setemun nurongwose bokluklu, ko nir nga marvivitu suri inu artotkoe nevrek van Damaskas e.

¹² Renge ngaim ngok, jinibb san elik ie nga nisen Ananaeas nga muosuri ko mutori neseseiren se Moses nir m̄irres, ko nga m̄eri Isrel nir nga marlik ie martori ni muon m̄irres suri.

¹³ Evini jik ko owrai tevik owra “Sol, selek, lelingenok kurongwose kupkulu luwi vajin!” Ko vesan rres, nuklu luwi ko numteni.

¹⁴ Mian ko owrai tevik owra “Atua nga apu se kerr nir marok-surövi otobbtobbu nik nga kuprongwose nanu nir nga ni mimrreni, ko nga kuplesi jinibb ne majingen se Atua nga mumomsawos m̄irres, ko kuprunge ni mawos drrelan.

¹⁵ Ko kupwerai tweni ko wor tevi jinibb jikle sev nga kumlesi ko kumrunge.

¹⁶ Ko suri sev komok-tiriv? Kuptur mera, kuppaptaes, kupverus van ji Atua re loten nga ni p̄irrawe tweni nololien som.”

Atua okoni Pol nga puwrai tweni nospen nga m̄irres se Iesu tevi jinibb ne vare nir

¹⁷ “Nulwi vini Jerusalem e. Ko daron nga nomok-lot loloim re Naim On, ko nulesi

nanu san erpe bori nga Atua miviseni tevik,

¹⁸ nga m̄lesi Numal suk. Owrai tevik owra “Pingavilvilsen, kupiel lingi Jerusalem lelingen wolok ko pa, suri nir ne iel setemun mara-runge nale som suri inu.”

¹⁹ Ko nurij weli nuwra “Numal, nir arongwose nga renge lat ne liliken elep pa, nurrul re jinibb ko nurevji jinibb nga nosurien ser muto renge nik.

²⁰ Ko daron nga kele marevji Steven e nga muwrai tweni nik nisem, nuir bbong, ko nutur tevir ko nomok-metmete joro nir nga marevji.”

²¹ Mian ko Numal owrai tevik nga bevel, ko erijrij inu nga pukoni twenik van ngasu jer ji jinibb ne vare nir.”

²² Delung nen arok-murronge nale se Pol erres ean ejpari vajin mus̄pe suri jinibb ne vare nir. Ko daron nga moka-supe jinibb ne vare nir, ko artipatun nga markarkar orore vajin; arkail van mare arwera “Kaptekaiki tweni morok, kaprevji pini, sete erres nga pimaaur!”

²³ Ko arok-kikail lenglengen van mare, ko arwirrwir sunsun ser, ko arserake maw ko arwirr karkare nga piviseni nga nir arunge lengleng esij.

²⁴ Ko burtur se jinibb nuval ne Rom nir owrai tevi jinibb sen nir nga partekai Pol van loloim ko parvirrali nga puloli puwrai tweni suri sev m̄eri Isrel nir marok-kail tere mirpok.

²⁵ Ko daron nga markai totkoni vajin nga parvirrali, ko Pol owrai tevi m̄erwomu ser nga moktur ie owra “E, inu nuvi m̄eri Rom le san. Ko setewor nukot. Sete kamrongwos kapvirralik!”

²⁶ Daron nga m̄erwomu nen murnge nale ngok, ko ean owrai tweni tevi burtur owra “E, rrek kurrleuge, ko morok evi m̄eri nga kerr ko san!”

²⁷ Mian ko burtur nen evini osusi tevi Pol owra “E, kupwera i p̄irres, kuwretun le wor nga nik kuvi m̄eri Rom san?” Ko Pol eweli nale sen owra “O-o, nuwretun ko wor.”

²⁸ Mian ko burtur nen owra “O, inu nuwirr pa nevöt nga milep san nga mevini vajin mevi m̄eri Rom.” Ko Pol erij weli owra “Ko inu nulai suri nuvijuri bbong tata suk.”

²⁹ Ko nir nga marwera parevji Pol arjuj luwi, ko burtur kele emtutu, suri otor jabble pa nga m̄ika totoni m̄eri Rom san re dil delrurr.

Pol otur re no jinibb nga marlelep ne Isrel

³⁰ Ko nabong m̄inij nen m̄erwomu emrreni purongwos mawos nale nga numal se m̄eri Isrel nir martere Pol ren. Mian ko

orpaji dil delrurr ko ololi Pol evel sisarow, ko erijrij jinibb batu sulsulen nir totoklai nga parlik. Ko ololi artekai Pol van ko ololi otur liven re nor.

23

¹ Pol oklu mawos re nor ko owra “Tasik ko jojok nir, tetajer mijpari lelingenok, numajing se Atua renge sel nga muon, ko nuwokwok erres.”

² Ko batu jinibb ne sulsulen ngok Ananaeas owra tevi nir ngok nga maroktur mori Pol nga nir san puwje jingo Pol.

³ Mian ko Pol owra tevi Ananaeas owra “Nik nga kumwokwok m̄irres, Atua pia-wuje nik ko! Kulik iok nga kupwera sesre lat nga puto suri tevi inu renge neseseien se Moses, ko kutor otvi nale neseseien nga kumwera parwujek!”

⁴ Ko jinibb nga martur mori Pol arwera “E, erpese kumrij tere batu jinibb ne sulsulen se Atua mirpok?”

⁵ Mian ko Pol erij weli owra “O, sete nurongwose nga ni mivi batu jinibb sulsulen. Ko Naul On owra sete erres rraprij nale nga m̄isij tere m̄erwomu se kerr san.”

⁶ Ko mian ko daron nga Pol m̄ilesi nga nir ne gortien ngok sopor arivi Satusi nir ko sopor arivi Parasi nir, ko ekail van mare owra “Selek nir, inu nuvi Parasi san, ko nuvi kele natu m̄eri Parasi san. Ko armerreni parrowrowe inu iel lelingen suri inu nuosuri temijpale nale nga muwra jinibb nga marmij para-maur luwi kele.”

⁷ Daron nga Pol muwrai jille mirpok musuw ko Parasi ko Satusi nir arlatlat lululwenir re gortien ser, ko arteri wukarir vajin evi meling eru e.

⁸ Satusi nir setemun arosuri anglo nir ko nen̄in nir, rreknga mijen nir nga parmaur luwi kele, ko Parasi nir ma arosuri nir totoklai.

⁹ Mian ko nat ekarkar temijpal. Ko jinibb nevisvisenien ne neseseien se Moses sopor nga marivi Parasi nir artur imera ko arwera i eterter tevir arwera “Sete namlesi rragrrag nanu san esij ji morok. Rrek ewretun nen̄in san rreknga anglo san erij tevi!”

¹⁰ Ko laten ser ean elep. Ko burtur emtutu nga tarevei Pol ko tarrerrerssi niben sapon, mian ko erijrij jinibb sen nga partekai tweni. Ko nir aran artekai tweni van elik talev re naim ser.

¹¹ Re natpong nen, Numal otur re jeli Pol ko owra “Sete kuprorrmi nanu san! Erpe kumjiljilwer pa suri inu iel Jerusalem, ko kupjiljilwer kele pirkok suri inu iak Rom.”

Armurri suri nga parevji pini Pol

¹² Ko re mevinen rorpong, mēri Isrel nir easi ngavöl ivij (40) arser korti ko arlingi nale san, ko arijrij tevi Atua arwera

¹³ “Sete nabaan ko sete nabminmin pij-pari wor nabrevji pini Pol!”

¹⁴ Ko nir sopor aran ji batu sulsulen ko mērwomu ser ko arwera “Namloli pa rijrijen pa tevi Atua nga sete nama-urroi nanu san pijpari nabrevji pini wor Pol.

¹⁵ Ko kami nir ne kaonsel, kaplai nale van ji burtur se mēri Rom nir. Kapluñi nolon ko kapngoni poro orongwose pītakai lweni Pol pulwi vini ji kami nga kapsusi rongronge kele tevi. Ko kem nabtiriv terai live sel sopen nga nabrevji pini nga setemun pijpari iok.”

¹⁶ Ko metulu se Pol ornge nale ngok, ko ean owraie.

¹⁷ Mian ko Pol owrai tevi nir san owra “Kuptekai mēlakel ngel van ji burtur. Emrreni puwrai nanu san tevi.”

¹⁸ Ko mēri nga etkai mēlakel nga van ji burtur, ko owra “Pol nga mēlik re naim ne nekaien okonik nga beptevi mēlakel ngel vinuk jim, suri emrreni puwrai nanu san tevim.”

¹⁹ Burtur etkai mēlakel nga van devjen e sopen, ko osusi tevi owra “Kuwra kupwera se le tevik?”

²⁰ Melakel erij weli owra “Meri Isrel sopor arloli pa nale san, ko mevi parngoni tevim nga kupa-pitevi Pol van ngatan re gortien ser. Parkerasim nga gortien ser emrreni kele purongwose sopen suri nanu ngok.

²¹ Ko warru, pijki setemun kuploli nanu nga parwerai ngok. Suri nir easi ngavöl ivij (40) nga partepeti terai parevji Pol. Arloli pa rijrijen nga sete paraan ko sete parmini nanu san pijpari nga parevji pini. Ko lelingenok, artiriv pa nirka nga parloli ko nga parunge lweni sev nga kupwera lweni.”

²² Burtur owrai tevi owra “Sete kupwera tevi jinibb san purongwose sev nga kumwerwera tevik ngok.” Ko okoni tweni evel.

²³ Ko burtur nen everus jinibb sen eru, ko owrai tevi nuru owra “Koporan koporlesi jinibb ne nuval nir ongut varu (200) ko koporwera tevir nga nir partiriv parmetmet nga paran Sisaria. Koporlai nir ngavöl ebut (70) nga parsakel sisamis re os ser, ko nir ongut varu (200) kele nga parivi ne sir kis. Ko parlinglingi iel re mete nial piesiw nat pupong.

²⁴ Kaplingi os san puto metmet terai Pol. Ko kapmetmete pīrres pian pijpari ji batu gavman ngok Piliks, nga sete nanu san pulokloksi rege sel.”

²⁵ Ko burtur oli naul san nga muwra:

²⁶ “Neiren evel ji inu Klotias Lisias ko ean ji numal gavman Piliks.

²⁷ Morok mēri Isrel arrul totkoni pa osuw ko otomori parevji pini. Ko daron nga mornge nga ni evi mēri Rom san, ko nutkai jinibb nuval suk nir van nga βetkai tweni jir.

²⁸ Numrreni bemteni otvi wor sev nga marlolarsi ni suri, mian ko nutkai van re Kaonsel ser.

²⁹ Ko nulesi nga ni sete ololi rragrang nanu san nga ni pimij rreknga pian re naim ne nekaien suri. Nale nga marwerai ren evi bbong murrun ne nesereien ser kobbong.

³⁰ Ko daron nga san mivini muwrai tevik nga mēri Isrel armurri suri nga parevji pini, ko niko nurrorri erres nga bokoni tweni vinuk jim. Nuwrai mawose tevi nir nga marlolarsi, nga poro nir arongwose parwerai tweni sev nga ni muloli mīsij, rege nik nom.”

³¹ Jinibb nuval nir arosuri nale se burtur ser, ko re natpong mawos nen kobbong, artekai Pol van re ngaim nga Antipatris e.

³² Ko mevinen, jinibb nuval nga os ser mijkie arivel luwi Belar van lat nga nir e, ko jinibb nuval nga os ser kobbong mutoe artajer tevi Pol.

³³ Ko daron nga marini Sisaria ko arlai naul nen tevi numal Piliks, ko arlingi Pol rege nevren.

³⁴ Piliks eve naul nen, ko osusi tevi Pol owra “Nik kuvi mēri ngabe?” Ko daron nga murnge nuval Pol mivi mēri Silisia

³⁵ ko owrai tevi owra “Daron nga jinibb marini nga parwerai tweni sev nga marlesi rem, ko inu bea-murronge nik.” Ko owrai tevi jinibb nuval nga parrul totkoni pa Pol ko rege naim ne nekaien nga muto ji ni.

24

Meri Isrel arwera tweni sev nga marlesi esij rege Pol

¹ Nabong elim easi, ko batu jinibb sulsulen ngok Ananaeas ean Sisaria tevi mērwomu se mēri Isrel nir ko tevi kele jinibb ne nesereien san nga nisen Tetalas. Aran ji numal Piliks nga parwera tweni sev nga marlesi esij rege Pol.

² Arverus Pol vini lolaim e, ko Tetalas owra tweni vaji nale se nir.

Owra “Numal, weretunen nik kuan mare, ko kuloli liken ne demat nga mīrres oto eprv ji kem. Erres ma nik, ko kumloli nanu se kerr muto mīrres pēlak.

³ Kem jijle namok-runge erres tetajer suri sev nga kumloli.

⁴ Sete numrreni bolokloksi daron som, ko nungonim ma nga kuprorrmi kem ko

kupmurrong ta nale se kem welel nga nabwerai ngel.

⁵ Namtor sweri pa osuw nga morok evi jinibb nga m̄isij, ko evi batu liken nga m̄isij. Okloli pa laten nga marlelep nir tevi m̄eri Isrel nga marlik rrale iel ngatan, ko evi m̄erwomu re lenglengen gortien san nga marvivotu suri m̄eri Nasret san.

⁶ Ololi lesi nga puloli naim se Atua purrokitkit re no Atua, ko namrrul totkoni. [Ko kem namtur metmet nga nabwera tweni lat nga puto suri tevi renge sel ne nale neseseien se kem.

⁷ Ko numal gavman ngok Lisias eteseni tweni ji kem,

⁸ ko owrai nga si nga mimrreni puwra nanu san tere Pol parini ko parwerai tevi nik.]^D Ko poro kupsusi tevi, ko kuprunge mawose nga sev nga namwerai evi weretunen ko wor.”

⁹ Ko m̄eri Isrel nen nir arkorti re nale ngok se Tetalas, ko arwera arivi weretunen p̄t̄peti.

Pol erij ore nir

¹⁰ Ko numal gavman otungun tevi Pol nga p̄irij; mian ko Pol etipatun owra “Nurongwose nik komok-wera suri lat nga puto suri tevi jinibb ne vanu se kem nir evini ejpari lelingen ngel sia elep pa, ko inu nuir nga βerij ore nale ser ngok re nom.

¹¹ Ko poro kupmeteni lilane nale suk, ko kuplesi nga setewor easi nabong esngavöl drromon eru (12) nga mean mosrövi Atua Jerusalem.

¹² Ko m̄eri Isrel ngok nir sete arlesik nga m̄elat tevi jinibb sopor loloim re Naim On, rreknga re naim loten ser san, rreknga rege lat kele san Jerusalem.

¹³ Ko iok eviseni nga nale nga marwerai tevim lelingenok arivi gerisen.

¹⁴ Ko sansan kobbong ewretun, ngel: nusrövi Atua se batu tata se kem rege sel san nga nir marwera m̄isarr. Ko nuosuri ma nanu p̄t̄peti nga muto rege nale neseseien se Moses ko rege Naul se propet nir.

¹⁵ Ko inu norrorrmien suk oto eterter rege no Atua erpe nir kele, nga Atua pialoli jinibb jikle parmaur luwi kele re mijen, ngok nga m̄irres ko nga m̄isij.

¹⁶ Ko suri iok, niko nuplak tetajer nga bevijuri sel nga mumosawos m̄irres rege sev nga mololi tevi Atua ko tevi jinibb kele.

¹⁷ “Ko nuvel lingi Jerusalem sia elep pa sapon easi, niko memrreni bolwi kele van nga βelai merrenien san sapon tevi nir nga nijor ser mijkie ne vanu suk, ko bololi sulsulen sopor van ji Atua.

¹⁸ Ko nomok-loli malum norrorrmien ngok, ko mian ko marsekai inu re loloim se Atua, daron nga mololi jile nanu san nga muloli nuwokwok. Ko sete jinibb elep arlik tevik, ko laten kele ejki jik.

¹⁹ Ko m̄eri Isrel sopor nga marivel Asia vini arlik loloim re daron ngok. Ko poro nir arlesi nanu san esij renge inu, ko erres parini parwerai tweni rege nom;

²⁰ rreknga poro pijki, ko nir ngok ma parwerai tweni sev nga m̄isij nga mololi. Suri daron nga motur re no gortien ser, ko sete artor sweri rragrag nanu san nga m̄isij rege inu.

²¹ Ko nale sansan kobbong arongwos parwerai, ni le: Daron nga motur rege nor ko nukail temijpal nuwra “E, kamloli nukot lelingen suri nuosuri nga jinibb nga marmij para-maur luwi kele rengen mijen.”

²² Ko Piliks orongwos erres nospon sel se Numal. Mian ko ewer otvi nospen ser ko owra “Bea-werai lweni wor nale san daron nga burtur Lisias pia-vini e.”

²³ Mian ko owrai tevi jinibb ne nuval sen nga parmetmete Pol, ko sete parloli p̄ilik talev pelak, ko sete parwer ore nga poro jinibb sen san pimrreni pivini p̄ila nanu san tevi.

Jinibb nuval armetmete Pol

²⁴ Nabong evis arasi osuw ko Piliks nuru nesen sen Drusila, nga mivi nesen Isrel, orini lat nga marmetmet Pol e; ko Piliks owrai nga partekai Pol vini jin. Ko omurronge vajin Pol mokjilwer suri nosurien sen rege Iesu Kristo.

²⁵ Ko daron nga Pol m̄ijiljilwer suri murrun nga m̄irres, ko nga jinibb p̄iwer ore sev nga ni kobbong mimrreni, ko nabong nga Atua pia-wer sesre lat nga puto suri tevi jinibb nir; ko Piliks emtutu ko owra “Kupiel vajin! Bea-lesi nabong m̄inij kele san ko bea-verus lwenim kele vini.”

²⁶ Ko ni orrorrmi nga putor sweri nevöt sapon ji Pol nga puloli Pol pivel sisarow. Ko niko nabong elep okwera Pol pokini jin nga porok-jiljilwer.

²⁷ Ko sia eru easi, ko Piliks osuw vajin rege nga mivi numal gavman. Ko elinglingi Pol elik malum rege naim ne nekaien, suri emrreni puloli m̄eri Isrel nir parunge p̄irres re ni. Mian ko Posias Pestas evini ela wani vajin milngen.

25

Pol emrreni Sisa pia-wer sesesre lat nga puto suri tevi

^D 24:8 Nale nga muto re nolo [], rrek sete Luk oli, ko jinibb san ea-uli vitue daron nga muli tweni kopi san ne naul ngel.

¹ Ko Pestas elai majingen sen ejpari nabong itul easi, ko evel lingi Sisaria van Jerusalem e.

² Ko ie batu jinibb sulsulen nir ko numal se mēri Isrel nir arwer visvisenie suri nale nga nir marlingi tere Pol. Ko arngoni kele tevi Pestas

³ poro orongwose pimarong partekai Pol vini Jerusalem e. Arngoni erpok suri arloli pa nale san nga parevji pini Pol rengo live sel.

⁴ Ko Pestas owrai tevir owra “Pol pilik ko pa re naim ne nekaien iok Sisaria, ko sete mia-periv, inu bolwi kele van iok.

⁵ Ko poro ewretun ololi nanu san nga mīsi, ko kaplingi mērwomu se kami sapor parpivevik nga parwera tweni rengo nospen nen nanu san nga pitre ni ie.”

⁶ Pestas elik kele nabong owil rreknga esngavōl musuw ko mia-van vajin Sisaria e. Ko mevinen vajin ko esakel re kot sen ko owrai nga partekai Pol vini jir.

⁷ Ko daron nga Pol mīasi vini loloim, ko mēri Isrel nir ne Jerusalem arser rrare ko arwerai tweni nale nga marterter milep tere Pol. Ko sete nale ser arrow rragrag erpe nga arweretun.

⁸ Ko Pol eweli nale ser owra “Inu sete nuloli rragrag nanu san tere neseseien se mēri Isrel, rreknga tere Naim On rreknga tere Sisa, batu numal ne Rom.”

⁹ Ko suri Pestas emrreni kobbong puloli mēri Isrel nir parunge pīres ren, niko mususi tevi Pol muwra “Erpese? Nik kumrreni kupan Jerusalem nga parsupsupe nanu nir nga marlingi rengo nik ie?”

¹⁰ Pol erij weli nale sen owra “Inu nutur pa re kot se Sisa san, ko osorsan kobbong nga ni kobbong kot sen puspe inu. Kurongwose erres pelak nga inu sete nuloli nanu san nga pulokloksi mēri Isrel nir.

¹¹ Poro ewretun nutur otvi nale neseseien ko nuloli nanu san nga musorsan nga bemij suri, ko erres kobbong pīpok, numarong. Ko poro nale ser ngok nga marlingi rengo inu parivi gerisen, ko san sete orongwose pīngik rengo nevrer. Ko inu numrreni bean botur re kot se Sisa iak Rom!”

¹² Ko daron nga Pol muwrai jile mirpok, ko Pestas ejlilwer sapon tevi nir ne gortien sen musuw, ko owrai tevi Pol owra “Poro nik kumrreni kupan kuptur re nospen se Sisa, ko erres kobbong, kupan ko.”

Pol otur re no batu numal Erot Akripa

2

¹³ Nabong sapon arasi van, ko batu numal Erot Akripa nuru jokin Benis orini Sisaria nga porlesi Pestas ko porwera erres tevi re nga mia-vini.

¹⁴ Orloli jile erpok, mian ko eprepriv ko pa sapon mian ko Pestas mia-supe Pol tevi batu numal Akripa. Ko owrai tevi owra “Daron nga Piliks musuw re majingen sen ko elinglingi jinibb san elik jer iok re naim ne nekaien.

¹⁵ Ko daron nga mean Jerusalem e ko jinibb sulsulen nir tevi mērwomu se mēri Isrel nir arini arwerai tevik nga bea-wera suri lat nga puto suri tevi.

¹⁶ Ko nuwrai tevir nga sete evi sel se kem mēri Rom nga belngi nawone jinibb san van re nevre nir nga marok-tere ni re nospen; womujnen, daron sen puto wore ko nga ni putur re no jinibb nir nga puwrai tweni weli nale sen re sev nga nir marok-werai tere ni.

¹⁷ Ko daron nga lartul nen marpelari iel ko nusaro ngavilvil, ko mevinen mawos, nuan nulik re kot ko nuwrai tevi jinibb suk nir nga partekai Pol vini.

¹⁸ Ko daron nga jinibb martur imera nga parwera nale ser tere Pol, sete arwerai rragrag nale san nga inu nulesi mivi nanu nga murray, ejki rres.

¹⁹ Arij latlat kobbong tevi Pol suri nosurien ser ko wor mēri Isrel nir, ko suri kele jinibb san nga nisen Iesu nga mimij, ko nga Pol muwra emaur luwi kele rengo mijen.

²⁰ Ko rengo murrun nga mirpok, sete nurongwose pelak sel nen erres. Ko iok ololi nususi tevi Pol muwra “Erpese? Nik kumrreni kupan Jerusalem nga inu bevinuk borng nospen surim ie?”

²¹ Ko Pol ongoni nga bokoni van Rom nga batu numal ne Rom ngok Sisa pia-wera suri lat nga puto suri tevi ni ie. Ko iok ololi nuwrai tevi jinibb suk nir nga parmetete pijpari belesi daron san nga bokoni van ji Sisa.”

²² Ko batu numal Akripa owrai tevi Pestas owra “Inu kele numrreni borng nale se morok.” Pestas erij weli owra “Iow, ko rrek mevi ko pa.”

²³ Ko re nabong mīnij nen, batu numal Akripa nuru Benis orini re kot ser. Ko batbatu jinibb nuval nir ko nir nga maran mare re ngaim ngok arloli kele sel ser nga marok-tori batu numal ren. Mian ko Pestas elai nale nga partekai Pol vini loloim e,

²⁴ ko owrai tevir owra “Batu numal Akripa ko kami jile nga rramkorti lelingen, kapmeteni morok! Meri Isrel jile nir ne Jerusalem ko Sisaria arok-ini jik ko arloli nale suri, ko arkail arwera sete erres bololi morok pimaur.

²⁵ Ko inu sete nulesi ololi nanu san esij nga pimij suri. Ko suri ongoni nga pian wor puloli Sisa piwer sesese lat nga puto

suri tevi, niko nurrorrmi bokoni tweni van ji Sisa Rom.

²⁶ Ko sete nutor sweri rragrrag norrorrmien san suri nga boli van ji Sisa. Iok ko ololi m̄elai vini mutur kele re no kami ko no nik batu numal Akripa kele. Nuwra kaplai tweni norrorrmien sopen ren nga boli van ji Sisa Rom.

²⁷ Suri daron nga markoni jinibb san van ji Sisa, ko sete parkoni nawone, ko parwera suri wor nanu san nga m̄isij nga muloli.”

26

Pol erij ore nir

¹ Ko batu numal Akripa owrai tevi Pol owra “Iow, numarong vajin nik luwi kup-sup̄e lweni nik.” Mian ko Pol ete tweni vajin nevren ko erij ore nir nale ser, owra

² “Batu numal Akripa, nulesi erpe daron suk nga m̄irres le san lelingen, suri nik kumlik ko inu daron suk otoo nga βerij ore nale se m̄eri Isrel nir re nom.

³ Suri kurongwose lilane erres murrur kerr m̄eri Isrel nir, ko lalaten se kem. Ko niko nungonim nga nolom pipriv nga kupmurrong sev nga bowrai.

⁴ “Meri Isrel jile nir arongwose lilane murrur erres, etipatun re pa daron nga mewelili malum e ko. Arongwos pae murrur rengo vanu suk mawos ko re kele Jerusalem.

⁵ Arongwose erres nga daron nga mevi malum m̄elakel e ko nukorti tevi gortien ngok se kerr nga marivi Parasi nga murrurr m̄iterter kele wor, ko inu kele nuvi san. Ko m̄eri Isrel arongwose parwera nale ngok evi were-tunen.

⁶ Ko lelingenok nutur pa iel nga par-sup̄sup̄e inu nospen nek, suri inu nulngi norrorrmien suk oto eterter rengo rijrijen nga Atua muloli pa tevi βirterawarrens se kerr nir ne tuwi.

⁷ Rijrijen ngok kobbong nga metka es-ngavöl drromon eru (12) se kerr ngok marok-surōvi Atua nutpong ko nutrin nga partor sweri.

⁸ Batu numal Akripa, suri nanu ngok mawos kobbong, m̄eri Isrel ngel nir arlingi nale tere inu lelingen. Ko m̄eri Isrel nir, suri sev sete kamrongwos kaposuri nga Atua murongwose puloli jinibb pimaaur luwi kele re mijen?

⁹ “Tuwi nulesi erres nga bololi nanu jijle nga puore nise m̄eri Nasret ngok Iesu.

¹⁰ Nuloli womue Jerusalem, ko jinibb sulsulen ko nir arlai derteren tevik nga m̄elngi jinibb se Atua milep van re naim ne nekaien. Ko daron nga numal nir

marwera nga nir parmij ko wor, ko inu kele nuwrai erres, parmij ko wor.

¹¹ Daron elep nomok-ivel suri naim ne loten nir, nomok-virralir, ko nuloli lesi nga bololi parij βisij tere Iesu. Nulolarsi temipjal nir ko nuojir van ngasu nga borrrul totkonir rengo vanu m̄inij nir nga bololi βisij tevir.”

Pol ospe suri erpese mivini mivi jinibb se Atua

¹² Ko Pol owra “Niko nabong san nuvel re sel van Damaskas e tevi derteren nga batu sulsulen m̄ilai tevik.

¹³ Ko leval re sel, nulesi moron nga milep san eplari re melrin nga mumor vaseni inu tevi nir nga marvivotu surik. Moron nen omor easi nial.

¹⁴ Ko kem jijle namvitan re dan. Ko nurnge drrelan san re nale se m̄eri Isrel nir owrai tevik owra “Sol, Sol, suri sev komok-loli m̄isij tevik mirpok? Sete erres kopok-loli terter nanu tere inu.”

¹⁵ Ko nususi tevi nuwra “Wurru, Numal, nik isi le?” Ko Numal erij welik owra “Inu nuvi Iesu le nga komok-loli m̄isij tevik ngel.

¹⁶ Ko kupmera, kuptur. Inu nurrmali jim erpel nga bosusture nik nga kupivi jinibb ne majingen suk. Nik kupwera tweni ko wor tevi jinibb nir sev nga kumlesi lelingen suri inu, ko nanu nga kele beaviseni tevim.

¹⁷ Inu bemetmet nik βirres nga m̄eri Isrel tevi jinibb ne vare nir sete arongwos parlokloksim.

¹⁸ Kupa-loli jinibb ne vare nir parmeteni wose. Kuprieni norrorrmien ser nga parlinglingi nemalik ko parini re moron. Kuprienir nga parlinglingi derteren se Demij ko parini vajin re derteren nga milep se Atua,

ko Atua pitlasi tweni vajin nololien ser. Ko nosurien ser rengo inu pitkair vajin nga parini parivi jinibb nga maron se Atua.”

¹⁹ Ko Pol owra kele, “Batu numal Akripa, evi nale se wor ni nga m̄ilik rengo melrin le mosuri ngel.

²⁰ Womujnen, nuwerwer tevi jinibb nir iak Damaskas, mian ko nutajer kele van Jerusalem e ko lat jijle ne jutia, ko mian ko ji kele jinibb ne vare nir. Nuwrai tevi jinibb nir nga parieni norrorrmien ser suri nololien ser, ko parosuri Atua. Ko murrur piviseni ko wor nga arieni pa norrorrmien ser osuw.

²¹ Ko suri majingen ngok ko, daron san nga m̄elik re Naim On Jerusalem ko, m̄eri Isrel martur imera ko marrul totkonik, ko marloli lesi nga parevji pinik.

²² Ko Atua ewilwil se inu tetajer elep epari lelingen ngel, ko niko inu nutur iel, ko nurij tevi kami jijle, jinibb nawon

ko jinibb nga marlelep nir. Nale nga mowrair ngok arivi pa nale nga propet nir ko Moses kele marwerai tweni pa womu nga pïrmali, ngel:

²³ Mesaea purnge pïisij ko wor renge niben, ko pivi mïrwomu jer kele nga pimaur luwi renge mijen. Ko puspe suri moron tevi mïri Isrel nir ko tevi kele jinibb ne vare nir.”

²⁴ Ko daron nga Pol mïrij mirpok mian ko Pestas ekail van jin owra “E, Pol, kulengleng! Norrorrmien som owlu pelak, ko ololi batum erpe poklengleng pa.”

²⁵ Ko Pol erij weli owra “Numal nga mïrres, inu sete nulengleng. Nale ngok nga mowrai arvijuri wor sel nen ko, ko arweretun.

²⁶ Ko nanu ngel jijle sete arremali re lat san nga muto teptepi. Nurongwose nik kurongwose sev nga mospe suri ngok. Niko nurongwose nga sete kutor jabble nanu ngok san.

²⁷ Numal Akripa, nik kuosuri nale se propet nir? Nurongwose erres nga nik kuosurir.”

²⁸ Akripa osusi tevi Pol owra “Erpese, rrek daron beblen welel lebbong kumrreni kuprevek nga bevini bevi kalesia?”

²⁹ Ko Pol erij weli owra “Rrek daron nga mipriv rreknga daron nga mumrrol, ko inu nulot tevi Atua, sete suri nik kobbong, ejki, ko suri kami jijle nga kamok-murronge nale suk ngel, ko numrreni lenglengen nga kami jijle kampirpe bbong inu ko. Re bbong dil delrrurr suk pijki, sete numrreni kapruj mori ko kapan ren.”

³⁰ Mian ko batu numal Akripa, ko batu gavman nen, ko Benis, tevi nir mïnij kele artur imera

³¹ arivel, ko arwerwerai tevir arwera “Morok sete ololi nanu san esij nga pimij suri rreknga pian re naim ne nekaien suri.”

³² Ko batu numal Akripa owrai tevi Pestas owra “Poro nga sete Pol owrai pa nga mimrreni pian putur re kot se Sisa, ko pivel sisarow kobbong.”

27

Pol owlu lingi Sisaria van Rom e

¹ Ko arlingi pa nale osuw nga nabwolu van Itali e, mian ko arlingi Pol tevi jinibb kele sopor ne naim ne nekaien renge nevre mïrwomu san nga mimetmete jinibb nuval ongut vesan (100), nga nisen Julias. Ni evi ne gortien ngok nga marveruse Gortien se Batu Numal.

² Drrav san elinglingi Atramitiam evini iel, ko owra pulwi kele van re ngaim ne Esia e nir. Ko naman namsa re drrav nen; ko mïri Masetonia kele san eptevi kem, nga sisen Tesalonaeka ko nisen Aristakas.

³ Ko mevinen namjipari Saeton. Julias ololi erres tevi Pol ko ololi ean ngaut nga pïleslesi selen nir sapon, ko selen nen nir armetmet ni erres.

⁴ Daron nga namwolu lingi Saeton, ko namwolu tere ling ko namwolu van mori norour nga Saepras van devjen nga muruv e.

⁵ Ko namwolu lingi ngaut, naman re dis mot vajin van renge devjen ne saot ne Silisia ko Pampilia, mian ko namjipari Lisia re ngaim ngok Maera.

⁶ Ko iok, mïrwomu se jinibb nuval nir elesi drrav kele san nga mïlinglingi Aleksantria ko pian Itali e, ko ololi kem namsa re drrav ngok.

⁷ Namwolu tere malum ling mirpok mian ejpari nabong evis wor nga namtor sweri ling nga marterter, mian ko namwolu jipari ngaim ngok Nitas. Ko ling eser elep pelak, ko daptap elep, ololi setemun namrongwose nabwolu tajer. Mian ko namrieni drrav, namwolu pelaot nga naban re norour ngok Krit; ko namwolu asie bongsin nga marwera Salmone, ko namwolu sere devjen nga muruv e.

⁸ Nampelak elep namwolu seresre namtajer van, ko namjipari lat san nga marwera Sale Malum e nga muto mori ngaim ngok Lasea.

⁹ Ko namlik iok eprepriv sapon; mian ko nivelen ne dis setemun erres, suri evi pa daro ling ravij. Ko nanen se mïri Isrel kele nir, nga marveruse Nabong nga marloli lilane nololien e, easi kele pa, ngok re Oktoba ko, mian ko Pol erij tevir nga puwnir.

¹⁰ Owra “Lartul, kapmurrong ta. Poro rrapwolu lelingenok, ko drrav se kerr tevi nijor nen nir parsij petpeti, ko mauren kele pilep pijijki.”

¹¹ Ko Julias emrreni bbong pumurronge mïrwomu ne drrav nale sen tevi mïr nga drrav sen nen, easie pumurronge nale se Pol.

¹² Ko suri sale ngok sete evi sale nga mïrres pelak re daron ne ling, ko otomori kem jijle nabir nga poro nabwolu lesi kele van re sale mïnij ne Krit e san, nga nisen Piniks, nga nablik ie renge daron ne ling. Piniks evi sale nga mïrres, bongsin eru, tuwen emawos re not wes, tuwen emawos re saot wes.

Ling serser nga milep san ejpari drrav ser

¹³ Sete epriv ko ling narrosiw nga mïrres san etipatun eserser. Mian ko nir arrorrmierres ko pa nga parloli sev nga marrorrmï. Mian ko arevei angka vini mare, arwolu. Arok-wolu seresre jeli botunmal.

¹⁴ Ko sete epriv ko ling serser nga milep san nga nisen Merri etewut ngaut evini.

¹⁵ Daron nga ling nen mirevji kem, ko sete namrongwos nabwolul tere; ko namrieni lweni drrav namwolul suri ling, namsestre dis.

¹⁶ Ko namasi re norour ngok Kaota rengo devjen ne saot, ololi namoruv e beblen. Erpe elai daron tevi kem nga nablingi lilane drrav nga welili putu p̄irres, ko jinibb nga marmajing re drrav nir arpelak elep sopen

¹⁷ nga parevei vini mare. Ko arevei dil sopen arselabe drrav e ngatan ko ar̄nelji totkonir nga purrul totkoni drrav. Ko nir armetutu sopen, suri van ngalu jer re Lipia sou sopen arto ren, ko nir armetutu drrav tires ren. Ko iok ololi arjurōni nabin vini ngatan ko arlinglingi bbong drrav esal ling.

¹⁸ Ko ling eterter elep malum, ololi mevinen, nir arwirr tututweni kele nanu nga marenginir sopen van rengo dis e.

¹⁹ Ko re mevinen kele, nir arwirr tututweni kele nijor ne drrav nir sopen arivel.

²⁰ Ko nabong elep setemun namlesi nial; ko natmupong kele, setemun namlesi moju nir. Ko tetajer ling okser lenglengen. Ko ololi norrorrmien se kem evitan vajin, ko namrorrmi rrekma setemun namrongwose nabmaur.

²¹ Ko nabong evis kis vajin nga sete kem san eaani nanen, mian ko Pol otur imera ko owrai tevir owra "Selek nir, poro kapmurrong pa nale suk nga mowrai womu pa, ko rrek sete rrama-wolu lingi Krit, ko sete rrama-tor jabble nanu nir mia-irpok.

²² Ko lelingenok nuwrai eterter tevi kami nga sete kapmetutu. Kerr san mauren sen sete mia-jijki, ko drrav ngel kobbong pijijki.

²³ Suri natmupong, anglo se Atua san evini jik. Ngok anglo se Atua nga mevi jinibb sen, ko nga nomok-surōvi.

²⁴ Ko owra 'Pol, sete kupmetutu, nik kupan ko wor kuptur re no Sisa iak Rom. Ko rengo Atua nalol nga m̄irres sen eir bbong nga puloli kami p̄et̄p̄eti nga kamsa rengo drrav kapmaur.'

²⁵ Ko niko, selek nir, sete kapmetutu! Nuosuri Atua nga nanu jikle p̄irrmali pu-sorsan pirpe nga ni muwrai ngok.

²⁶ Ko womujnen, ling ngok puti pepteni drrav se kerr rengo norour san."

Aruj mori norour san

²⁷ Ejpari nutpong esngavōl drromon ivij (14) nga dis mokuti karkar kem ngok rengo dis ne Metiterenian, ko oruj mori nat p̄irrang vajin sopen, ko jinibb nga

marmajing re drrav nir arrorrmi vajin nga otomori nabjipari ngaut san.

²⁸ Mian ko arkai delrurr san rengo dil ko arjurōni van re nabbō dis; ko arlesi ningaw nen evi bbong ngavōl eru (20). Artiriv beblen mian ko arjurōni kele, ko arlesi ejpari vajin ningaw esngavōl drromon elim (15).

²⁹ Ko armetutu nga drrav tumoworwor re nevōt, ko arjubbi angka ivij vitu re drrav aran ngatan. Ko arok-lot van ji atua ser nga nat p̄irin pingavil.

³⁰ Ko jinibb nir nga marmajing re drrav arloli lesi nga parwolu lingi drrav; arjurōni natu drrav van ngatan ko arkerkeris arwera paran parjurōni kele angka n̄inij womu.

³¹ Ko Pol owrai tevi burtur se jinibb ne nuval nir tevi jinibb nuval sen nir owra "Poro jinibb nga marmajing re drrav sete parlik re drrav, ko sel kele san ejki nga rrapasi ren."

³² Mian ko jinibb ne nuval nir artevei otvi dil nga murrul totkoni natu drrav ko arloli evitan van re dis e.

³³ Ko otomori vajin nat p̄isal p̄irin, ko Pol erij eterter tevir nga paraan. Owrai tevir owra "Ejpari nabong esngavōl drromon ivij (14) pa, nolo kami orrum p̄elak, ololi sete kamurroi rragrage nanu san.

³⁴ Nuwrai eterter tevi kami nga poro kapmerreni kapmaur, ko erres nga kapaan ko wor; puloli kami jikle kapterter nga sete san pijijki. Sete kami san niben p̄isij sopen."

³⁵ Daron nga Pol muwrai jile mirpok musuw ko elai bongsi niv san ko owra erres tevi Atua rengo no nir jile, ko obbri otvi ko orroi.

³⁶ Mian ko norrorrmien ser evini erres luwi kele, ko nir jikle arlai nanen ko arurroi.

³⁷ Kem p̄et̄p̄eti rengo drrav ejpari ongut varu bbulin ngavōl ebut drromon ouwon (276).

³⁸ Ko daron nga nir totoklai maraan jikle musuw, ko arwosi tweni bak wit nga marto re drrav ko arwirre van re dis nga puloli drrav p̄isisarow.

Drrav emawor ngaut

³⁹ Daron nga nat n̄irin vajin ko jinibb nga marmajing re drrav nir arlesi ngaut. Ko sete arlesi wose, ko arlesi ma sale san nga dep̄inan muto ren. Ko arrorrmi nga poro arongwose parloli ko parlai drrav pian ngaut ie.

⁴⁰ Ko artevei otvi dil ne angka nga ivij ngok ko arlinglingir arjipon rengo dis, ko arupaji dil nga marrul totkoni niwos nga martori alale drrav e; mian ko arevei

nabin nga womu, nga ling puwi drrav nga pian ngaut.

⁴¹ Ko no drrav osongti re sou deřinan san, ko eres jer; ko dis bburbbur erpe paruti worwor drrav batun.

⁴² Ko jinibb ne nuval nir arlingi nale nga parevji pini jinibb ne naim ne nekaien nir, suri arrormi tarilong toku ko tarwolu.

⁴³ Ko mērwomu ser emrreni pīla se Pol, ko ewer ore norrrmien ser ngok; ko owrai tevi jinibb nir nga si nga murongwos pīlong purow jubbul womu van reŋge dis ko pīlong van ngaut e.

⁴⁴ Ko owrai tevi nir mīnij nen nir nga sete marilong wos nga partori niriv parilong surir reŋge niriv ko bebje drrav nga marmawor tweni. Ko iok ololi kem jilje namjipari deřinan nga sete kem san ejjiki.

28

Pol elik Molta

¹ Daron nga naman ngaut musuw ko nammosi erres vajin. Ko nama-runge arwera norour ngok nisen ko Molta.

² Nir ne ie arloli erres pēlak tevi kem. Re daron nen, naus ous ko melas elep; ko arsere nabb nga nabteti ren, mian ko armetmet lilane kem.

³ Ko Pol esresre joro nabb sapor, ok-wirrwir nir van re nabb. Mian ko nuñet san ornge nabb erangi pēlake, ko eplari, ko eaji nevre Pol.

⁴ Ko daron nga jinibb ne ie marlesi nga nuñet murrurru re nevre Pol, ko arlongwis lululweni tevir arwera "O, kulesi rramwera, morok evi wor jinibb nga mokrevji jinibb ko! Ko easi bbong sete orron re dis, ko melrin nga musorsan sete emarong nga ni pimaur."

⁵ Ko Pol ewirrleni tweni nuñet kobbong evitan luwi van re nabb e; ko sete milnge liwen sapon oto re nevre.

⁶ Ko jinibb nen nir arrormi nga nevre pusol, poro pijki ko ni pivitan ngatan pivesane pimij pin. Arok-meteni suri epriv, ko setemun nanu san eplari jin; mian ko arieni norrrmien ser ko arwera "O, morok evi atua ko san!"

⁷ Ko batu jinibb ne norour ngok nga nisen Puplias, ni dan sen sapon oto mori ie. Puplias evi jinibb nga mīrres pēlak, ko ni eptevi kem van re naim sen. Ko namlik jin nabong itul.

⁸ Tata sen ematur re maling nga mesien dowalul muloli, ko nolon kele owlu eptiptevi drra. Ko Pol ean okuklue, elngi nevre renge ko olot tevi, ko ololi erres luwi vajin.

⁹ Ko vitunen, nir totoklai re norour ngok artekai nir nga marmesi vini ji Pol, ko ni ololi arres luwi.

¹⁰ Ko nir arlai merrenien elep tevi kem; ko daron nga namwolu vajin, ko nir arla nanen elep arlingir reŋge drrav nga pia-ivi mas se kem reŋge drrav.

Pol elinglingi Molta van Rom e

¹¹ Namlik navōl itul arasi osuw, mian ko nama-sa re drrav san nga mitepi ie reŋge daron ne ling. Drrav nen evi nga Aleksantria re Ijip, ko arveruse arwera 'Atua mēlew' (suri ewaji nise atua eru ngok nga morivi mēlew, Kasto ko Polakis).

¹² Namwolu vini namjipari Saerakus, ko namlik nabong itul ie.

¹³ Mian ko namwolu kele, ko namini re ngaim ngok Rejiam. Ko mevinen ling evi narrosiw nga mīrres, mian ko namwolu kele ejpari nabong eru, ko namjipari ie Puteoli.

¹⁴ Iok namlesi tasi kerr ko joji kerr sapor; ko arngoni kem arwera nablik tevir kele wik san. Mian ko vitunen nama-jipari vajin Rom.

¹⁵ Tasi kerr ko joji kerr ne Rom arunge nospen suri kem, ko arivel ore kem nga parsewute kem reŋge sel. Namsesewut re lat nga Apias mīli naim nga marok-wulwule nanen ren, ko re kele lat nga naim liliken mosien itul arto ren. Ko daron nga Pol nūlesir ko owra erres tevi Atua surir, ko norrrmien sen evini eterter kele wor.

¹⁶ Daron nga namjipari Rom vajin arlinglingi Pol pīsan pīlik reŋge naim san tevi jinibb nuval san nga pimetmete.

Pol ewerwer ie Rom

¹⁷ Namlik ie ejpari nabong itul arasi, ko Pol everus kortoni mērwomu se mēri Isrel nir ne ie, ko owrai tevir owra "Selek nir, sete nuloli rragrrag nanu san nga pulok-loksi jinibb se kerr nir; ko sete kele nutre neseseien se bīrterawarŋge se kerr nir. Ko nir nga Jerusalem ma arrul totkonik ko arlingik van re nevre mēri Rom nir.

¹⁸ Mēri Rom arsusi nale elep tevik, mian ko armarong vajin nga bevel sisarow kobong, suri arlesi sete nuloli nanu san nga puloli inu bemij suri.

¹⁹ Ko mēri Isrel nir armusus. Ko iok osonik nga mowra kele botur re no Sisa nga pia-wera suri lat nga puto suri tevik. Ko setemun nanu san oto nga řerij tere jinibb ne vanu suk nir reŋge.

²⁰ Iok ko ololi meverus kami nga řejiljilwer sapon tevi kami suri norrrmien ngok nir. Ewretun lenglengen, arkai totonik reŋge dil delrurr mirpel suri mēri nga kerr mēri Isrel nir rramtirive."

²¹ Ko nir arij weli arwera "Sete san reŋge Jutia ela naul san vini nga muspe nik, ko sete nir san evini iel nga puspe lokloksi nik sapon.

²² Ko nammerreni nabmurronge sev nga kupwerai. Suri namrongwose nga jinibb renge lat jikle arok-rij tere gortien nga mimerr ngok nga nik kumkorti rengen.”

²³ Mian ko arlingi nabong san nga parini parunge Pol pijiljilwer tevir. Ko nir elep arini re wosenen re naim sen. Etipatun rorpong, ko evini ejpari nata mupong, Pol ejilwer elep tevir suri batun vanu se Atua. Ela nale tevir nga maro renge nale nesereien se Moses ko re kele propet nir nga puloli nir parosuri Iesu.

²⁴ Nir sopor arwera erres renge sev nga Pol muwrai, ko sopor ejki, sete arosuri te.

²⁵ Ko niko arteri wukari nir eru e. Ko mian ko daron nga parivel vajin, ko Pol owra nale san tevir owra “E, nale ngok nga Nenin On nūlai tevi propet Asea nga puwrai tevi Birterawarrens se kerr, osorsan erres, suri owra

²⁶ ‘Kupan kupwerai tweni tevi jinibb ngel nir: ‘Kaprunge nga kaprunge, ko sete ma kama-rongwose. Kaplesi nga kaplesi, ko sete ma kama-lesi wose nabong sapon.

²⁷ Suri nir jikle batur eterter. Boror arirpe maruti ore metipo, ko arpil ore meter. Poro pijki, ko batur parongwose, ko boror parunge, ko meter pimteni, ko parieni lwenir vini jik, ko inu bololi parres luwi.’”

²⁸ Ko Pol evinvini ore nale sen owra “Kami kaprongwose ko wor nga Atua elai pa nale ne mauren van ji jinibb ne vare nir. Nir ko parunge!”

²⁹ Pol nūrij jile musuw, ko nir arij latlat lululwi tevir suri nale nga Pol ko muwrai tevir, ko arivel sisamis.

³⁰ Ko renge sia eru totoklai Pol elik re naim san nga marok-wuli re navöl. Ko eir tama re jinibb jikle nga mimrreni pivini pīlesi ni.

³¹ Ni sete emtutu nga miwerwer suri batun vanu se Atua, ko okvisvisenir kele suri Numal Iesu Kristo, ko sete san ewer ore sapon.

Naul nga Pol Muli tevi Kalesia Nir renge ROM Batu nale nga mivsvseni lut nga parmeteni naul ngel puto suri

Jinibb arlesi Pol evi jinibb nga milep re kalesia nir, asi kalesia minij nir, ne tuvi ko mijpari lelingenok. Womu, ko ni oji kalesia nir eterter, mian ko re daron nga ni mulesi Iesu rengen sel ne Damaskas, ko nolon olwi. Ko ni emajing vajin erpe Aposol, rreknaga jinibb san nga Iesu mukoni, asi sia ngavöl eru (20). Ko re daron ngok ko ni ospe suri nospen nga mürres re vanu petpeti nir nga Rom mutorig. Ko ni oli kele naul elep tevi kalesia nir. Kerr kele rramrongwos rrapmeteni naul ngok nir esngavöl drromon itul (13) nga marto malum, ko nga marlingir re Naul On. Ko naul nga ni muli tevi kalesia nir rengen Rom ospe erres pelak suri nospen nga mürres nga Pol mokwerwer suri re majingen sen. Ni owra jinibb jikle nir, meri Isrel nir ko jinibb ne vare nir, arlik re derteren ne nololien. Ko jinibb nir arongwos parmomsawos parres re bbong nosurien ser nga marosuri Iesu Kristo, daron nga marlingi nolor mitertter rengen ni. Ko nir nga marosuri arlik vajin rengen demat tevi Atua, ko Nemün On ololi nir arivel sisarow rengen nololien ko mijen.

Pol owra "erres" tevi nir

¹ Inu Pol, nuvi jinibb ne majingen se Iesu Kristo. Atua everuse inu tweni nga bevi aposol, ko okonik suri nanu sansan bbong: nospen nga mürres sen.

² Nospen ngok, Atua erijrij womu pae tevi jinibb sen nir rengen jingo propet nir, ko aruli tweni rengen Naul On.

³ Nospen ngok ospe suri Atua Natun, Iesu Kristo nga mivi Numal se kerr. Re devjen ne jinibb, ko ni eak rengen metka se Devet.

⁴ Ko re devjen se Atua, Atua eviseni rengen derteren nga milep sen nga Iesu evi ni Natun, suri nga muloloi ni mimaaur luwi kele re mijen.

⁵ Ko rengen Iesu Kristo Atua ololi nuvi aposol san rengen nalol nga mürres sen, ko okonik nga bololi jinibb ne vare nir rengen vanu jikle nir parosuri ko parvijuri Iesu Kristo, puloli nga jinibb pilep parsurovi vajin ni nisen.

⁶ Ko niko majingen suk ejpari kami kele nga kamlik re Rom, nga Atua miveruse kami nga kapivi jinibb se Iesu Kristo.

⁷ Nomok-uli naul ngel tevi kami nga kamlik Rom nga Atua mimrreni kami, ko miverus kami tweni nga kapivi jinibb nga kapon pirres. Nurongwose, Atua Tata se kerr ko Numal Iesu Kristo porok-wilwil se kami ko porlai demat tevi kami rengen nalol nga mürres se nuru.

Pol owra pian puklue nir

⁸ Womunen, nuwra bowra erres wor tevi Atua suk rengen nise Iesu Kristo suri kami jikle. Suri nosurien se kami arok-supsupe rengen iel ngatan petpeti.

⁹⁻¹⁰ Ko Atua arongwose numrreni temijpal bevinuk boklue kami. Nomok-majing sen tevi nolok petpeti rengen nospen nga mürres re Natun. Ko Atua arongwose nomok-rorrmi kami tetajer nabong jikle nga poro bolot, ko nomok-ngoni poro nga lelingenok vajin Atua pimarong ko borongwos vajin bevinuk ji kami. Suri nutriv tuvi le wor tweni nga bololi pipok.

¹¹ Numrreni temijpal belesi kami pipok ngok, suri nuwra bela merrenien se Nemün On san tevi kami nga puloli kaptur wor pitertter.

¹² Merrenien ngok nga mospe ngok evi nga rrapwer jilijle kerr tevi inu nosurien suk ko tevi kami nosurien se kami.

¹³ Ko niaken suk nir, nuwra kaprongwose nga vavis kis le pa, nuwra bevinuk ji kami; ko ejpari lelingenok, sete nurongwos wore. Nuwra betawe wenen sopen ji kami pirpe nga mololi pa ji jinibb ne vare minij nir.

¹⁴ Suri Atua elngik pa nga ban wor ji jinibb petpeti nir, jinibb ne dis, ko jinibb ne liven vanu; nir nga norongwosien ser mutoe, ko nir nga norongwosien ser mijkie.

¹⁵ Ko niko numrreni lenglengen bewerwer suri nospen nga mürres tevi kami kele nga kamlik Rom.

Derteren ne nospen nga mürres

¹⁶ Nuosuri nospen nga mürres ngok sete arongwos piasi nawon daron nga mewerwer e, suri derteren nga milep se Atua oto ren nga moklila mauren tevi jinibb jikle nir nga marosuri. Erpok re meri Isrel nir womu, mian ko vitunen re jinibb petpeti nir vajin.

¹⁷ Ko Atua eviseni sel sen nga ni puloli jinibb parmomsawos pirres rengen. Sel nen etipatun re nosurien ko owlu kis bbong re nosurien, ejpari bongsin mawos nga marmomsawos mürres petpeti vajin. Naul On owrai erpok re nga muspe mirpel: 'Ni nga mumomsawos mürres suri nosurien sen kis kobbong, mernen ko pimaaur.'

Jinibb nir arivel lingi Atua pa osuw

¹⁸ Atua eviseni pa lolaren sen re melrin vini iel ngatan. Lolaren sen ngok oto tere murrun nga marsij nir se jinibb nir nga marvilvil ore weretunen suri nololien ser nga marsij.

¹⁹ Lolaren sen oto terer erpok suri oto limjer ko pa nga parongwose Atua. Erpe Atua eviseni pa ni tevir.

²⁰ Sete arleslesi Atua, ko arlesi mawos mae erres renge nanu nir nga Atua mulolir, mītipatun nga muloli iel ngatan renge derteren sen nga sete orongwos pusuw. Arongwos pae erres p̄elak nga Atua ko ololi nanu ngok nir. Ko niko gerisen ser ejkie.

²¹ Suri arongwos pae Atua, ko sete artori erpe Atua, ko sete arwera erres wor tevi. Norrorrmien ser owlu elep, ko sete ejpari nanu san. Ko norrorrmien ser arlengleng vajin ko armalik.

²² Nir arwera norongwosien ser elep, ko arnganga nawon temijpal.

²³ Ko arkelkele Atua nga mimaaur tuwi ngok vini, ko nga nosrōvien sen milep, ko arsurōvi wanie vajin nanu nga jinibb mulolir re nevren nga misavi rrongrongvi jinibb, rreknga numōn, rreknga nur̄iet, nanu nga marmaur mumrrol kobbong, pian ko parmij kobbong.

²⁴ Ko niko Atua elngilngir nga parloli sev nga marsij nga nolor marmerr̄enir, ko arok-loli nanu nga marsij tevi nir sisamis lululweni.

²⁵ Atua elngilngir erpok suri arkelkele weretunen suri Atua ko arla vajin nga mivi gerisen ela wani. Ko arlot tevi ko arvijuri sev nga Atua mulolir kobbong, ko Atua ejki. Ko Atua ni esansan kobbong erres osorsan nga parsurōvi tuwi ngok vini. Pirpok ko.

²⁶ Ko ngok Atua elngilngir nga parvijuri nanu nga marsij nga nolor marmerr̄eni karkare nir. Nesevin nir arkelkel arla wani milnge diwen ser nir, ko ngok arlokloksi murrun nga musorsan.

²⁷ Ko erpok kele re norman nir. Nir arlinglingi sel nga musorsan nga parkorti tevi nesevin, ko armerr̄merreni temijpal lululweni nir, ko arok-loli nanu nga marsij tevi nir lululweni. Ko Atua erpe otorrlai pa nir renge sev nga miplari pa jir suri nanu nga marsij nga marlolir.

²⁸ Ko suri armusus partori norrorrmien suri Atua, ko niko Atua vajin elngilngir renge norrorrmien ne lenglengen ser ko nololien nga marsij ser.

²⁹ Nolor owun saute nanu lele nir nga marsij, nolor ela nanu jijle, arok-ungasi jinibb. Nolor owun saute lol leplep, murrun nga marevji pini jinibb, balpalen,

gerisen, murrun nga marloli nawone m̄isij tevi jinibb, ko arivi jungwarwar.

³⁰ Arok-linglingi nawon nale gerisen, arok-ungasi Atua, arok-rij teweswasi, batur eterer, arok-rij melmelas, armurri suri parloli p̄isij, arok-rong tweni tata ko tasu ser nir.

³¹ Norrorrmien ser ejkie, ko arok-tor otvi rijrijen ser, ko sete arrorrm̄i ragrrag jinibb.

³² Arongwos pae nale nesesreien se Atua nga muwra nir nga marok-loli mirpok parmij ko wor, ko arok-loli malum wore ko. Ko mare nen kele, arok-rij erres suri nir nga kele marloli mirpok.

2

Atua p̄iwer sesesre lat nga puto suri tevi jinibb nir renge sel nga mumomsawos

¹⁻² Rramrongwose, Atua ololi nanu nga mumomsawos kobbong daron nga mutor vitranḡi jinibb nir nga marok-loli nanu nir nga marirpok. Ko nik vajin nga komok-wer lokloksi jinibb m̄inij nir, nik lweni kupasi pirpese? Suri daron nga komok-wer lokloksi jinibb m̄inij, komok-wer lokloksi lweni nik, suri nik lweni komok-loli nanu mawos nen nir.

³ E selek, nik komok-loli nanu mawos nen bbong nga komok-wer lokloksi jinibb m̄inij nir suri! Ko kurrorrm̄i nik ma Atua sete arongwos p̄iwer lokloksi nik? Pirpese?

⁴ Rrek nik kurrorrm̄i Atua p̄itlasi tweni nawon tama nololien som? Ewretun, Atua oktori selsale jinibb nir erres temijpal, ko oktori totoni nolon epriv temijpal. Ko sete kurongwose Atua nolon nga m̄irres ngok owra bbong pirvei lweni nik nolom pulululwi?

⁵ Ko nik nga nolom m̄iterter ko mumusus pulululwi, komok-ser kortoni kobbong nanu nir nga Atua pia-wer lokloksim surir renge nabong nga ni pia-wera suri lat nga puto suri tevi jinibb nir renge murrun mawos sen, ko lolaren sen pia-rremali.

⁶ Re nabong nen, Atua pia-wuli jinibb sisamis nir pusorsan tevi majingen sisamis ser.

⁷ Nir nga martori majingen nga marres ser martarter, ko niko marok-p̄elpelak suri nga Atua p̄ilesir erpe parres ko pusrōvir ko p̄ilai mauren nga sete orongwos pusuw, tevi nir nga ngok ko Atua p̄ilai mauren ne tuwi ngok vini tevir.

⁸ Ko nir ma nga marok-rorrm̄i lweni kis nir lweni ko sete arvijuri weretunen, ko arvijuri bbong murrun nga m̄isij, tevi nir nga ngok ko Atua p̄ilai lolaren nga milep sen tevir.

⁹ Ko jinibb jijle nir nga marok-loli m̄isij parla norongen nga m̄isij ko norongen karkar nga marsij nir, womujnen re m̄eri Isrel nir, ko vitunen re jinibb p̄etp̄eti nir vajin.

¹⁰ Ko jinibb jijle nir nga marok-loli m̄irres parla demat ji Atua, ko Atua pusr̄ovir ko puosurir, womujnen re m̄eri Isrel nir, ko vitunen re jinibb p̄etp̄eti nir vajin.

¹¹ Suri Atua ololi omomsawos osorsan kobbong tevi jinibb jijle nir.

¹² Jinibb ne vare nir arrelenge nale nesereien se Moses. Arok-loli esij, ko arok-mij ko wor suri iok kobbong; Atua sete pivijuri nale nesereien se Moses daron nga pia-wera suri lat nga puto suri tevir. Ko m̄eri Isrel ma nir nga martori nale nesereien se Moses ko nga marok-loli m̄isij, ko Atua pia-wera suri lat nga puto suri tevi nir renge nale nesereien ngok.

¹³ Suri sete jinibb san orongwos pumom-sawos p̄irres re nga mok-runge nawone nale nesereien, ko re bbong nga mok-vijuri nale nen.

¹⁴ Ewretun, jinibb ne vare nir sete arongwose nale nesereien. Ko daron nga marvijuri bbong nir nolor ko arloli osorsan tevi nale nesereien, erpe artori pa nale nesereien, weretunen sete jinibb san elai tevir.

¹⁵ Murrur ngok eviseni nga Atua elngi nale nir nga nale nesereien muwrair oto pa rengen nolor. Norrorrmien ser kele eviseni kele nanu ngok, suri nabong sopen arongwos pae nga marloli m̄isij, ko nabong sopen arongwos pae nga marloli m̄irres.

¹⁶ Ko pia-irpok rengen nabong nga Atua pia-wera suri lat nga puto suri tevi jinibb nir nga nomok-werwer suri rengen nosp̄en nga m̄irres. Re nabong nen, Atua pia-koni Iesu Kristo pia-wera suri lat nga puto suri tevi jinibb nir pusorsan tevi norrorrmien ser nga muto silveni pa re nolor.

Nale nesereien sete orongwos p̄ila nawone se m̄eri Isrel nir

¹⁷ Ko kami m̄eri Isrel nir, rrek sete erres p̄elak re kami. Kambibto re nale nesereien, ko kamrij melmelas re nga kamrongwose Atua.

¹⁸ Ko kamrongwos pae marongen se Atua, ko kamlesi wos pae sev nga m̄irres, suri marvisviseni pa kami rengen nale nesereien.

¹⁹ Ko kamok-wera eterter nga kamivi m̄erwomu re metrorr nir, ko kamivi moron se nir nga marlik re nemalik,

²⁰ ko kamivi jinibb nevisvisenien se lartul nga marlengleng ko se nir kele nga sete marongwose nanu san. Suri rengen nale

nesereien nga kamtori ngok, aruli tweni p̄etp̄eti pa norongwosien ko weretunen.

²¹ Nanu ngok arivi weretunen nir. Ko erpese kami nga kamok-visviseni jinibb m̄inij nir, sete kamok-visviseni lweni kami nir? Kamok-werwer tere venao, ko erpese kami kamok-vevna?

²² Kamok-wer ore murrun nga marok-venae nesevin, ko erpese kami kamok-venvenae nesevin? Kamok-ungasi atua m̄inij nir, ko erpese kamok-evna rengen naim on ser nir?

²³ Kamok-rij melmelas rengen nale nesereien, ko kamok-tor ototvi kele kobbong. Erpok kamok-lokloksi nise Atua.

²⁴ Re iok eplari erpe Naul On muwrair pa, ngel: 'Jinibb ne vare nir arok-rij esij suri Atua suri bbong kami.'

²⁵ Ko re nga kaman pa rengen bae se m̄eri Isrel nir, ko kamlik erres, poro bbong kaptori nale nesereien ser. Ko poro nga kamok-tor otvi nale nesereien, ko kamsorsan vajin tevi jinibb ne vare nir nga sete maran rengen bae.

²⁶ Suri poro nga jinibb ne vare san nga sete mian re bae otori sev nga nale nesereien se m̄eri Isrel nir muwrair, erpe ean pa re bae ko osuw.

²⁷ Ko nir vajin nga sete marevji niber rengen bae ko nga marosuri ma nale nesereien parwer lokloksi kami nga nale nesereien ko bae muto ji kami, ko kamok-tor ototvi nale nen nir.

²⁸ Si evi jinibb weretunen se Atua? Sete evi nir nga martori kis bbong nanu ne vare nir, erpe bae nga marloli vare re nibe jinibb.

²⁹ Ko jinibb weretunen se Atua rramlesi wose rengen nolon. Ni ko bae sen oto re nolon, rengen nem̄in ko sete rengen niben. Ko ni ko sete jinibb nir arij erres suri, ko Atua ma.

3

Muru Atua omomsawos erres tetajer

¹ Ko poro pipok, nga m̄eri Isrel nir kele arivi jinibb ne nololien osorsan tevi jinibb ne vare nir, ko m̄eri Isrel nir nga martori bae ser, liken ser erresres rengen jinibb ne vare nir erpese?

² Ejki, arlik ko pa erresres rengen nanu elep. Womujnen, Atua elai nale sen tevir.

³ Weretunen, nir sopen sete arosuri. Ko murrun ser ngok orongwos puloli Atua p̄il ngilngir?

⁴ Ejki rres nawon! Jinibb jijle arongwos parkerkeris, ko Atua sete orongwos p̄ikrekris. Suri Naul On owra 'Niko parlesi wose nga nik Atua kummomsawos daron nga kumrij, ko kupasi daron nga marwera parwer lokloksi nik.'

⁵ Ko poro ßerij vajin pirpe jinibb rres nurongwos bowra "O, sel nga mäsij se kem mēri Isrel nir ololi jinibb nir arongwose parmeteri viringsi pīrres pēlak tevi sel nga mīrres pēlak se Atua. Ko niko sete osorsan nga Atua piwer lokloksi kem suri sel nga mäsij se kem."

⁶ Ejki rres nawon! Poro pipok, ko Atua pia-wera suri lat nga puto suri tevi jinibb nir ne iel ngatan pīrrese? Suri jinibb jijle nir arsi arirpe kem.

⁷ Ko poro pivi weretunen nga weretunen se Atua eplari elep pēlak suri gerisen suk, ko suri sev marwer lokloksi inu merpe malum jinibb nga mäsij?

⁸ Ko poro pipok, vesan kele ko jinibb san tuwra "Bololi pīsij, ko nanu nga mīrres piplari rengen." Nir sopor arij pa esij suri inu arsupuße pa nga inu nomokrij mirpok. Erres pēlak nga Atua pia-tor vitrangi nir suri nale ser ngok.

Jinibb san ejki rres nawon nga mumomsawos mīrres

⁹ Ko pīrrese vajin? Kem mēri Isrel nir nammomsawos asie jinibb ne vare nir? Ejki. Suri erpe nga mowrai pa, kem mēri Isrel nir ko jinibb ne vare nir kele rramrorsan, rramlik re derteren ne nololien.

¹⁰ Suri Naul On owra 'Sete san omomsawos, ejki rres nawon.

¹¹ Sete san orongwose, sete san eplak tweni nga purongwose Atua.

¹² Nir pētpēti arivel lingi pa Atua, nir jijle arloli esij. Sete san okloli erres, jinibb san ejki rres.

¹³ Birislar erpe dobbi jinibb san nga setewor martevni ore, ler armotot; nemer arok-kerkeris, nevlv jingor arsi arirpe nuñet korpila, nale ser arerngis.

¹⁴ Jingor owun saute rijen nga marsij nga marpelari rengen nolor nga markarkar,

¹⁵ nevrer esisarow nga parevji jinibb.

¹⁶ Lat jijle nga maran e, arlokloksi pētpēti nanu nir,

¹⁷ ko arrelenge sel ne demat.

¹⁸ Ko metutuen se Atua sete oto sapon re nolor.'

¹⁹ Ko rramrongwose nga nale jijle ne nale nesereien owrai tevi nir nga marlik rengen, ngok mēri Isrel ko nir. Ko niko nir jijle jingor arwonwon vajin, setemun arongwos para-wera kele nanu san. Atua pia-tor vitrangi nir, ko jinibb pētpēti nir, suri nololien nga marsij ser.

²⁰ Berij otvi vajin, bololi nale suk pumrrrol: jinibb san ejki rres nawon nga murongwose pumomsawos pīrres re no Atua re nga mivijuri nale nesereien nga Moses mīlai tevi mēri Isrel nir. Renge ma nale nesereien arlesi wose nololien ser.

Jinibb san orongwos pumomsawos pīrres rengen nosurien kis kobbong

²¹ Ko Atua eviseni vajin sel sen nga puloli jinibb pumomsawos pīrres. Sete eplari rengen nale nesereien, ejki. Ko nale nesereien ko propet nir aruji tweni.

²² Atua puloli jinibb pētpēti parmomsawos parres poro bbong parosuri Iesu Kristo. Suri kerr jijle rramrorsan kobbong.

²³ Kerr jijle rramloli nololien ko rrammumrrrol re nosrövien se Atua.

²⁴ Ko rrammomsawos rramrres nawon suri nalol nga mīrres sen kobbong, erpe sete rramloli nanu san suri. Iesu Kristo kobbong ojri lweni kerr.

²⁵ Atua elngi Iesu Kristo nga pimij nga puloli sel rengen drra ne mijen sen nga pītasi tweni nololien nir se jinibb nir nga marosuri. Iok eviseni nga Atua ololi omomsawos erres re nga mimalie nololien se Bīrterwarreng nga womu sopor,

²⁶ suri nolon nga mipriv. Atua eviseni tevi kerr lelingenok nga ni mumomsawos mīrres re nga sete mīwer lokloksi nir ngok, suri Iesu Kristo emij esre nir.

²⁷ Si vajin orongwos pīrij melmelas? Sete jinibb san. Ko suri sev? Ko suri kerr sete rrammajing tweni liken mawos se kerr re nga rramvijuri nale nesereien, ko re bbong nga rramosuri Iesu Kristo.

²⁸ Suri nomok-werai eterter nga jinibb san orongwos pumomsawos pīrres rengen nosurien kobbong, sete rengen majingen ne nale nesereien.

²⁹ Ko evi weretunen nga mēri Isrel arok-wera "Atua evi Atua se kem kis kobbong?" Ejki, evi kele Atua se jinibb ne vare nir.

³⁰ Suri Atua esansan bbong, ko okloli osorsan tevi mēri Isrel nir nga maran pa rengen bae ser, ko tevi jinibb ne vare nir, nga sete maran re bae. Nuru korti, Atua okloli ormomsawos erres suri bbong nosurien se nuru.

³¹ Ko re iok nuwra bejkie nale nesereien suri nosurien? Ejki rres nawon, nutori ko wor mare.

4

Epram omomsawos suri bbong nosurien sen

¹ Ko pīrrese vajin re Epram, batu tata se kem mēri Isrel nir?

² Poro nga Epram omomsawos erres suri nga mivijuri nale nesereien, ko orongwos pīrij melmelas suri. Ko ejki, ni sete orongwos pīrij melmelas re no Atua.

³ Suri Naul On owra 'Epram osuri Atua, ko Atua elesi vajin erpe ni omomsawos erres.'

⁴ Poro jinibb san ðimajing tweni nowlin, ko parlai wor nowlin ko suri majingen sen ngok, sete parlai pirpe merrenien san.

⁵ Ko poro jinibb san sete ðimajing, nanu nga marlai tevi vajin pivi merrenien. Erpok ko, jinibb san poro puosuri Atua nga mokloli jinibb nga marsij marmomsawos mïrres, ko poro mïrren sete ðimajing suri majingen ne nale neseseien, ko Atua vajin ðilesi ni omomsawos erres suri nosurien sen ngok kobbong.

⁶ Erpok kele Numal Devet erij erres suri jinibb san nga Atua mïlesi mumomsawos mïrres sete renge nga mivijuri nale neseseien:

⁷ 'Jinibb nga Atua mïtlasi tweni nololien sen ko musuw, elik pa erres vajin.

⁸ 'Jinibb nga Atua mïtlasi nololien sen elik erres.'

⁹ Ko rijen nga mïrres ngok oto re nir nga maran pa re bae se mïri Isrel nir, rreknga re nir nga sete maran? Erpese re Epram? Suri erpe nga rramlesi pa, Naul On owra 'Atua elesi erpe ni omomsawos erres'.

¹⁰ Ko re wosenen, daron nga Atua muloli mirpok, ko Epram ean pa re bae, rreknga ejki wor? Ejki ko wor, setewor ean wor.

¹¹ Ni bae sen evi pa nelesien ko san nga mivini vitu nga miviseni limjer nga ni omomsawos pa erres. Ko ni omomsawos erres erpok suri bbong nosurien sen, daron nga setewor mian re bae sen. Ko niko ni evi batu tata se nir nga marosuri ko nga sete maran re bae se mïri Isrel nir, ko nga Atua mïlesir marmomsawos mïrres suri nosurien ser.

¹² Ko evi kele batu tata se nir nga maran pa rege bae se mïri Isrel nir, ko nga marvijuri kele bbötö Epram re nosurien sen nga muto pa jin daron nga ni setewor ean re bae.

Atua ololi rijrijen sen tevi Epram suri Epram nosurien sen

¹³ Rijrijen nga Atua muloli tevi Epram ko tevi metka sen, nga nir para-lai iel ngatan, sete eplari rege nale neseseien se mïri Isrel nir, ko eplari bbong suri Epram omomsawos erres rege nosurien sen.

¹⁴ Ko poro nga nir nga marvijuri nale neseseien se mïri Isrel nir para-lai iel ngatan, ko niko nosurien vajin evi nanu nawon, ko rijrijen ngok se Atua evitan nawon.

¹⁵ Ko ejki, nale neseseien ervei bbong lolaren se Atua. Suri poro nga nale neseseien pijki, ko nololien kele pijki.

¹⁶ Ko niko rijrijen ngok se Atua oto rege nosurien, ko evi vajin merrenien. Ko ngok, metka ngok nir ðetþeti para-lai, sete nir kis nga rege nale neseseien se mïri Isrel

nir, ko nir ðetþeti nga nosurien ser mutoe mirpe Epram. Ko ngok Epram evi vajin batu tata se kerr ðetþeti.

¹⁷ Erpe Atua muwrai rege Naul On: 'Nulngi nik kuvi batu tata se jinibb ne vanu pilep.' Ko re no Atua nga Epram muosuri, rijrijen ngok otur. Atua ngok nalol nga mïrres sen erres ðelak. Ni okla mauren tevi nir nga marmij, armaur luwi kele, ko okloli nanu nga sete marto, arpelari arto.

¹⁸ Ko rijrijen se Atua nga mïlai tevi Epram owrai nga ni metka sen pilep lenglengen, ko erpok ni pivi batu tata se jinibb ne vanu pilep.

Ko Epram osuri nale ngok eterter, ko etravi eterter nga pia-pelari.

¹⁹ Nosurien sen ngok sete otor wolwolue sopen, ejki, otori totoni vane, ewretun ni etra temijpal ko ni orrorrmi ni sete orongwos pivasus. Niben etra lenglengen, osorsan erpe pimij, suri sia sen oji ongut (100). Ko Sera kele emïer.

²⁰ Ko Epram sete elngilngi nosurien sen, ko sete orong tweni rijrijen se Atua. Ko ni oksurövi Atua, ko okrujroni kele nosurien sen ðiterter re Atua.

²¹ Ni orongwos kemkanïe nga Atua nga mïla rijrijen ngok tevi evter temijpal ko pa nga puloli suri.

²² Ko re nga Epram muosuri Atua mirpok, ko Atua elesi ni erpe ni omomsawos erres, erpe nga Naul On muwrai.

²³ Ko nale ngok sete aruli suri ni kis,

²⁴ ko aruli kele suri kerr jijle nga Atua pia-lesi nosurien se kerr pirpe rrammomsawos mïrres. Kerr rramosuri Atua nga muloli Numal se kerr Iesu Kristo mimaur luwi kele rege mijen.

²⁵ Iesu ngok, arlingi re mijen suri nololien se kerr, ko Atua ololi emaur luwi kele re mijen nga puloli kerr rrammomsawos ðirres.

5

Demat ko neiren

¹ Ko ngok, rrammomsawos erres pa suri nosurien se kerr, ko sete suri rramvijuri nale neseseien se mïri Isrel nir. Ko rramlik vajin rege demat tevi Atua suri Numal se kerr Iesu Kristo.

² Suri Kristo kele, rramjipari pa mauren ngel se Atua nga rrammaur rengen. Ko rramïr vajin suri rramrongwose rrapajipari nosrövien se Atua.

³ Ko sete re iok kis kobbong, ko rramïr kele suri norongen nga mïsiy nga jinibb nir marok-loli tevi kerr. Rramïr, suri rramrongwose norongen nga mïsiy ngok puloli nolo kerr ðiterter,

⁴ ko ngok vajin nalol nga mïtra mïrres puto rege kerr. Ko ngok, norrorrmien se

kerr p̄iterter kele wor vajin re Atua reŋge sev nga rramteravi jin.

⁵ Ko rramrongwose rrapa-lai ko pa nanu ngok nir nga rramteravir ji Atua, suri Atua ejivreni merrenien sen reŋge nolo kerr re nevre Nem̄in On sen nga m̄ila tevi kerr.

⁶ Reŋge daron nga rramtor pot malum, erpe sete rramrongwos rraploli lweni nanu san se kerr, ko Kristo emij sere kerr jinibb nga rramsij nir. Ko ololi erpok re daron momsawos nga Atua m̄ilngi.

⁷ Reŋge devjen ne jinibb, eterter nga san pimij suri jinibb san, poro m̄iernen pivi jinibb nga mumomsawos. Rrek poro nga m̄iernen p̄irres p̄elak, rrekma san pia-mij ko wor suri.

⁸ Ko Atua ma eviseni ni merrenien sen nga mim̄reni kerr temijpal, re nga Kristo mimij suri kerr daron nga rramivi jinibb nga rramsij malum.

⁹ Ko lelingenok vajin rrammomsawos erres suri dr̄ra ne mijen sen. Ko rramrongwos kemkar̄iŋe vajin nga ni pia-loli rrapasie lolaren se Atua vajin, suri ngok erpe nanu nga m̄isisarow vajin reŋge kerr.

¹⁰ Suri daron nga rramivi malum devje nuval se Atua, ko mijen se ni Natun ololi rramivi vajin sele Atua. Ko evi vajin nanu nga m̄isisarow nga rrapa-asi, suri rramivi pa sele Atua, ko Kristo emaur luwi pa reŋge derteren.

¹¹ Rrapa-asi ko wor, ko rrap̄ir kele reŋge Atua suri Numal se kerr Iesu Kristo, nga mivi nevre Atua nga muloli rramivi vajin sele Atua.

Atam ko Iesu Kristo

¹² Erpok ko, nololien mivini iel ngatan reŋge jinibb sansan kobbong, Atam, ko nololien ngok ololi mijen kele mivini. Ko mijen mian vajin re jinibb jikle, suri jinibb jikle arloli nololien.

¹³ Ko ngok, nololien oto womu ko pa iel ngatan osuw, ko vitunen nale neseseien se m̄eri Isrel nir mia-vini vajin. Ko sete areve nololien poro nale neseseien mijki.

¹⁴ Ko ewretun, mijen orrul totkoni jinibb p̄etpeti nir, m̄itipatun re Atam mijpari daron nga Moses m̄ila nale neseseien. Nir p̄etpeti armij, ewretun nir nololien ser sete arlelep jipari nga Atam, nga mutor otvi nale mawos se Atua. Ko re nga Atam m̄isan muloli nololien mivini iel ngatan, rramlesi rrurngi Kristo nga p̄isan pia-la tweni nololien ngok.

¹⁵ Ko merrenien se Kristo elep asi wor nololien se Atam. Ewretun, jinibb elep armij reŋge nololien se Atam esan. Ko merrenien ma se Atua ko nelaien nawon

nga Iesu Kristo m̄isan m̄ilai suri ni merrenien sen tevi jinibb elep, ngok elep p̄elak asi.

¹⁶ Ko nelaien ngok wenen sete erpe wenen ne nololien se jinibb sansan ngok. Suri wenen ne nololien sansan ngok evi nga Atua putor vitrangir; ko wenen ma ne nelaien ngok ololi jinibb armomsawos, ewretun nololien ser sete sansan, elep ko wor.

¹⁷ Ewretun, mijen orrul totkoni jinibb nir suri jinibb sansan bbong nga muloli nololien sen. Ko ewretun temijpal, kerr nga rramlai merrenien nga muwun saut se Atua ko nga rramivi vajin jinibb nga rrammomsawos nawone ren, kerr vajin rraprrul totkoni mauren ko rrapbb̄ot reŋge nololien suri Iesu Kristo esan.

¹⁸ Ko erpok ko, nololien se jinibb sansan kobbong ololi evter nga Atua putor vitrangir jinibb jikle nir. Ko erpok kele, majingen nga mumomsawos m̄irres se jinibb sansan kobbong ololi jinibb jikle nir parasi re iok ko parlai mauren nga mumomsawos m̄irres.

¹⁹ Ko niko, jinibb elep arini arivi jinibb ne nololien suri jinibb sansan otor otvi nale. Ko erpok kele, jinibb elep arini arivi vajin jinibb nga marmomsawos m̄irres suri jinibb sansan otori suri nale.

²⁰ Atua ela nale neseseien nga puloli jinibb parlesi wose limjer nololien ser nga muwun saut. Ko merrenien ma se Atua owun saut asi temijpale vajin.

²¹ Tuwi, nololien orrul totkoni kerr reŋge mijen. Ko lelingenok vajin merrenien se Atua orrul totkoni kerr; ko suri Iesu Kristo Numal se kerr rrammomsawos erres, ko rraplai mauren ne tuwi ngok vini.

6

Rrammij jile re nololien

¹ Ko pirpese vajin? Rraplik reŋge nololien, nga merrenien se Atua piplari puwun saut?

² Ejki rres nawon! Kerr rrammij jile, ko niko rramtor otvi derteren ne nololien. Ko pirpese vajin rrapok-maur malum reŋge nololien ngok?

³ Rrek sete kamrongwose nga reŋge daron nga marpaptaese kami nga kapivi se Iesu Kristo, ko arpaptaese kami kele reŋge mijen sen.

⁴ Erpe reŋge baptaesen se kerr, erpe artevni kerr tevi ni reŋge mijen sen. Oto erpok nga kerr kele rramrongwos rrap-maur reŋge mauren nga mimerr, pirpe Iesu Kristo mimaur luwi kele re mijen suri nosr̄övien ne derteren nga milep se Tata sen.

⁵ Ko suri rramlik erpe artevni kerr tevi ni re mijen sen, ko niko rramrongwos pae nga rrapa-maur luwi kele re mijen pirpe ni, rrapa-korti tevi ni.

⁶ Ko rramrongwose, mauren nga mītra se kerr emij tevi Kristo rengo nai pelaot, ko ngok olokloksi nibe kerr nga mokloli nololien. Ko niko setemun vajin rrapivi demij maur ne nololien.

⁷ Suri si nga mimij, evel sisarow vajin re devjen ne nololien.

⁸ Ko suri rrammij tevi Kristo, ko niko rramosuri nga rrapa-maur kele tevi.

⁹ Ko rramrongwose Kristo, nga Atua muloli mimaur luwi kele pa re mijen, setemun pia-mij kele, suri mijen setemun orrul totkoni.

¹⁰ Re mijen nga mimij ren, ko emij vesansan kobbong, ko otor otvi derteren ne nololien ko osuw. Ko mauren sen nga mimaur rengen vajin, ko emaur korti luwi tevi Atua.

¹¹ Ko kami, kapmeteni lululweni kami erpe kammij ko kamtor otvi derteren ne nololien, ko kammaur korti luwi tevi Atua suri Iesu Kristo.

¹² Ko niko, sete kaplingi nololien purrul totkoni nibe kami, nga kaposuri nanu nga marsij nga nibe kami marmerrrenir.

¹³ Ko sete kaplinglingi murrmmurr ne nibe kami san pivi nevre nololien, pijki. Ko kaplai kami pētḗḗḗ tevi Atua erpe kammaur luwi re mijen. Ko murrmurru kami vajin nir parivi nevre Atua nga parok-loli pumomsawos pīrres.

¹⁴ Ko niko nololien setemun purrul totkoni kami, suri setemun kamlik re nevre nale nesereien, ko kamlik vajin rengo nevre merrenien se Atua.

Demij maur rreknga slev ne murrun nga mumomsawos

¹⁵ Ko pirpese vajin? Rrek rraploli nololien suri setemun rramlik re nevre nale nesereien ko rramlik re nevre merrenien se Atua? Ejki rres nawon.

¹⁶ Rrek sete kamrongwose nga poro nga kammarong kapivi demij maur se jinibb san, ko setemun kamiel sisarow vajin, ko kapvijuri wor mīnren ko. Ko erpok ko, poro nga kapmarong kapvijuri sel ne nololien, ko derteren nen orrul totkoni vajin kami ko pa, ko kapa-mij ren. Ko poro nga ma kapmarong kapvijuri nale se Atua, ko kapa-asi ko, kapa-momsawos pīrres.

¹⁷ Ko rramwera erres wor elep tevi Atua suri kami. Suri womu kamivi demij maur ne nololien, ko lelingenok vajin kamvijuri tevi nolo kami nevisvisenien nga mīrres nga marvisviseni kami ren.

¹⁸ Murrun ne nololien setemun orrul totkoni kami vajin, ko kamivi vajin demij maur ne murrun nga mumomsawos.

¹⁹ Nomok-rij rrongrrongvi suri demij maur nir ngok nga puloli kaprongwose pīrres. Ko niko, kapmarong vajin kapvijuri pētḗḗḗ pīrres sel nga mumomsawos, pirpe demij maur san mivijuri pētḗḗḗ numal sen. Ko ngok puloli kapa-on pīrres. Ko setemun kapirpe bonevis nga kamok-vijuri sel nga sete muwokwok ko nololien se kami muwun saut ren.

²⁰ Suri re wosenen, kamirpe demij maur ne nololien, ko murrun nga mumomsawos derteren nen ejki re kami.

²¹ Ko lelingenok vajin, no kami esij suri nololien ngok nir. Ko wene nir arirpese re wosenen? Suri bongsir para-vini re mijen.

²² Ko lelingenok vajin, murrun ne nololien derteren nen ejki re kami, ko kamirpe vajin demij maur se Atua. Ko wenen nga kaplai vajin evi murrun nga muon mīrres, ko bongsin pia-vini re mauren ne tuwi ngok vini.

²³ Bowra ototvi vajin, bololi nale suk pumrrol: nowli nololien evi mijen. Ko merrenien ma se Atua evi mauren ne tuwi ngok vini, rrrurrngi Iesu Kristo Numal se kerr.

7

Nale rrongrrongvien ne totkoi

¹ Niaken suk nir, kami kamrongwose nale nesereien se mīri Isrel nir. Ko niko kamrongwose nga nale nesereien derteren nen oto re jinibb san daron nga mimaur malum.

² Ko erpok, re nesevin san nga mīlik ji diwen sen, ko nale nesereien esre totoni tevi diwen sen daron nga diwen sen mimaur malum. Suri owra nir nga marlik pa ji diwen ser sete arongwos parkorti tevi norman mīnij. Ko poro nga diwen sen pimij vajin, ko erpe artelasi tweni vinnen vajin rengo nale nesereien nen nga mīsre totoni tevi diwen sen.

³ Ko poro nga diwen sen mimaur malum ko vinnen pukorti tevi norman mīnij, ko ngok otor otvi pa nale nesereien nen vajin, ololi pa esij. Ko poro nga diwen sen emij, ko nale nesereien nen setemun orrul totkoni vajin, ko ni sete ololi esij poro pukorti tevi norman mīnij.

⁴ Ko kami niaken suk nir, kamirpe vinnen. Ko kami kammij re devjen ne nale nesereien rengo mijen se Kristo. Ko erpe kamkorti vajin tevi diwen mīnij vajin, nga kamkorti tevi Kristo. Ko Kristo emaur luwi re mijen nga kami kapwene wenen se Atua.

⁵ Daron nga rramlik malum renge mauren tera se kerr, ko norrorrmien nga marsij se kerr nga nale nesesreien mukonkonir armajing renge nibe kerr, nga rrapwene wenen ne mijen.

⁶ Ko lelingenok vajin, artelasi tweni kerr renge nale nesesreien, erpe rrammij lingi, ko setemun orrul totkoni kerr. Ko rrammiejmajing vajin renge sel nga mimer se Nemün On, ko sete renge sel nga mītra, sel ne nale nesesreien.

Nololien evi nanu nga mīsij pērper

⁷ Ko rrapwera pīrpese vajin? Rrapwera nale nesesreien esij? Ejki rres nawon! Poro nga nale nesesreien pijki, ko sete borongwose nanu nga mīsij. Erpe poro nga nale nesesreien nen pijki nga muwra 'Sete kupmerrmerreni karkar nanu san se jinibb mīnij', ko sete borongwose vajin nga murrn ngok esij.

⁸ Ko nololien eska sel sen renge nale nesesreien, ko emajing vajin renge inu merrenien karkar lele nir. Ko poro nale nesesreien ejki, ko nololien emij vajin, derteren nen ejki rres nawon.

⁹ Ko bonevis, daron nga nale nesesreien ejki wor, ko inu numaur. Ko nale nesesreien evini vajin, ko nololien emaur vajin,

¹⁰ ko inu numij. Ko nale nesesreien nga muwra pīla mauren tevi jinibb, ejki mun, ela mijen vajin.

¹¹ Erpe nololien eska sel sen renge nale nesesreien ko ekrekrasik ko otor pinik renge nale nesesreien.

¹² Ko iok rramlesi wose nale nesesreien on ko nale nen nir aron ko armomsawos erres pelak.

¹³ Ko niko, nale nesesreien, nga mivi nanu nga mīrres, ela mijen tevi inu rrek? Ejki rres nawon! Ko nololien, nga mīmajing renge nanu nga mīrres ngok, ololi numij. Ko ngok rramlesi wose nololien evi nanu nga mīsij pērper, ko renge nale nesesreien evan pelak renge sel nga mīsij sen.

¹⁴ Ngok rramrongwose nga nale nesesreien erres, ko evel ji Atua. Ko inu ma nuvi jinibb kobbong, derteren suk ejkie, ko nurpe demij maur ne nololien.

¹⁵ Ko sete nurongwose nanu nga nomok-lolir. Suri nanu nga memrrenir, sete nomok-lolir, ko nanu nga mongasir, ngok ko nomok-lolir.

¹⁶ Ko suri nomok-loli nanu nga sete memrreni bololir, ko ngok nurongwos bowra ewretun, nale nesesreien erres kobbong.

¹⁷ Ko setemun evi inu nga nomok-loli mīsij ngok, ko nololien nga mīlik renge inu.

¹⁸ Suri nurongwose nga sete nanu san nga mīrres elik renge inu, erpe renge

nibek ngel. Suri nomok-marong nga bololi pīrres, ko sete nurongwos bololi luwe.

¹⁹ Suri sete nomok-loli sev nga memrreni, ko nomok-loli nanu nga marsij nga numusus bololir.

²⁰ Ko suri nomok-loli nanu nga numusus bololir, ko ngok erpe setemun inu nga nomok-loli nanu ngok nir, ko nololien nga mīlik renge inu, ni ko ololir.

²¹ Nulesi erpok tetajer ko: daron nga nuwra bololi nanu nga mīrres, ko nanu nga mīsij evini mori inu.

²² Nuir renge nale nesesreien se Atua renge nolok;

²³ ko nulesi tetajer, nololien nga mīlik renge nibek okval tevi norrorrmien suk nga mīrres ngok. Ko ololi vajin nololien ngok orrul totkonik tetajer.

²⁴ O, nulik esij pērper. Siko pītka tweni inu renge nibek ne mijen ngel?

²⁵ Nuwra erres wor tevi Atua nga muloli mirpok rrrurungi Iesu Kristo Numal se kerr.

Bowra ototvi vajin, bololi nale suk pumrrol: poro nga inu besan, ko norrorrmien suk kobbong orongwos pivijuri nale nesesreien se Atua. Ko nibek ma emelisna ko tetajer evijuri nololien.

8

Mauren nga Nemün On mīlai

¹ Ko ngok Atua setemun orongwos puwra kerr nga rramkorti pa tevi Iesu Kristo rramsij kele mun, suri rramasi pa.

² Suri derteren se Nemün On etlasi tweni kerr renge nololien ko mijen nga mīka totoni kerr, ko ela mauren tevi kerr nga rramkorti tevi Iesu Kristo.

³ Ko nale nesesreien, derteren sen ejkie nga pītasi tweni kerr renge nololien ko mijen, suri nibe kerr ololi emelisna. Ko Atua okoni ni Natun, niben erpe nibe kerr nga marsij, tweni nga pīla tweni nololien suri mijen sen nga niben mimij rengen.

⁴ Atua ololi erpok tweni nga kerr nga rramok-vijuri Nemün On ko setemun rramvijuri nibe kerr nga marsij, rrapirpe vajin rramloli pētpeti pa sev nga nale nesesreien muwrai.

⁵ Nir nga marok-vijuri niber nga marsij arok-rrorrmī suri niber nanu nen nir. Ko nir nga ma marok-vijuri Nemün On arok-rrorrmī suri Nemün On nanu sen nir.

⁶ Nga marok-rrorrmī suri niber erpok evi sel ne mijen, ko nga marok-rrorrmī suri Nemün On evi sel ne mauren ko demat.

⁷ Suri murrn nga marok-rrorrmī suri niber ololi arivi devje nuval se Atua, ko nir nga maripok sete arok-osuri nale nesesreien se Atua, suri sete arongwose.

⁸ Ko nir nga marok-vijuri niber nga marsij ngok setete arongwose parloli Atua purnge p̄irres surir, ejki.

⁹ Ko kami ma setemun kamvijuri nibe kami, ko kamvijuri Nem̄in On, suri Nem̄in On se Atua elik pa rengo kami. (Ko si nga Nem̄in On sete m̄ilik rengen, ni sete evi jinibb se Kristo.)

¹⁰ Ko suri Kristo elik rengo kami, ewretun nibe kami armij suri nololien, ko Nem̄in On emaur rengo kami, suri kamomsawos erres pa re no Atua.

¹¹ Ko niko Atua, nga muloli Iesu mimaur luwi kele re mijen, Nem̄in On sen elik pa re kami. Ko derteren sen nga milep temijpal ngok puloli nibe kami kele parmaur rengo nevre Nem̄in On sen nga mimaur rengo kami.

¹² Ko niko, niaken suk nir, rrapvijuri ko wor Nem̄in On, ko setemun rrapvijuri nibe kerr nga marsij.

¹³ Suri poro nga kapvijuri nibe kami nga marsij ko kapa-mij. Ko poro nga ma kaprevji pini murrun ne nibe kami nga marsij re nevre Nem̄in On, ko kapmaur vajin.

¹⁴ Suri nir p̄et̄peti nga Nem̄in On se Atua mokwowomue nir arivi pa natu Atua ko.

¹⁵ Suri Nem̄in On se Atua nga kamlai ngok setemun mia-loli kele kapivi kele demij maur rreknaga kapmetutu, ko ololi kamivi natu Atua. Ko Nem̄in On ngok ololi rramok-verus Atua erpe "Tata".

¹⁶ Nem̄in On se Atua erij se nem̄i kerr nga muwra rramivi natu Atua.

¹⁷ Ko suri rramivi natu Atua, ko niko rrapa-korti tevi Kristo ko rrapa-la nanu nga marres nir se Atua. Ko rrapkorti ko wor tevi Kristo rengo norongen nga m̄isij ne ngatan ngel nir, tweni nga rrapa-korti kele tevi rengo nosrövien sen.

Nosrövien nga rrapa-lai

¹⁸ Re inu nelesien suk, nulesi nga norongen nga m̄isij nga rramok-runge m̄isij rer lelingen ngel arivi nanu nawon daron nga rrammetenir tevi nosrövien nga Atua pia-lai tevi kerr.

¹⁹ Suri nanu p̄et̄peti nir nga Atua mulolir arok-tiriv malume eterter terai nga kerr rrapala p̄et̄peti milnge kerr vajin nga rrapivi natu Atua.

²⁰ Suri nga Atua elngi nanu p̄et̄peti nir parvasil nawon. Ko iok sete suri nanu nir armarong p̄irpok, ko suri Atua ko wor emarong. Ko Atua elngi kele nga nanu nir partiriv tweni

²¹ nga Atua p̄ila twenir rengo murrun ngok nga marvasil nawon, erpe nga marok-maur m̄irres mian ko tetajer marok-mij pin ko marpo. Ko nanu nir

para-asi vajin re iok ko para-korti tevi kerr natu Atua nir rengo nosrövien se Atua.

²² Suri rramrongwose, ejpari lelingen ngel, nanu p̄et̄peti nir arirpe nesevin san nga m̄ingirr re nga puwosi natun. Suri nanu nir arok-tiriv eterter nga para-asi p̄irpok.

²³ Ko kerr kele, rramirpok kele. Rramlai ma Nem̄in On, nga mirpe wenen womunen ne sev nga rrapa-lai, ko nolo kerr engirr vane rengo norongen nga m̄isij ngel. Ko rramok-tiriv nga Atua pia-juri lweni nibe kerr ko rrapa-ivi natun mawos vajin.

²⁴ Ko Atua ewilwil se kerr nga rraprtiriv tweni nanu ngok. Ewretun, setewor rramlesi; ko poro rraplesi, ko setemun rramtiriv vajin. Sete san oktiriv tweni nanu san nga m̄ilesi pae meten musuw.

²⁵ Ko kerr rramok-tiriv tweni nanu san nga setewor rramlesi, nga rrapa-ivi Atua natun mawos. Ko rramlingi no kerr eterter mawose nga rrapa-lai ko.

²⁶ Ko erpok kele, Nem̄in On kele ewilwil se kerr rengo lolmijmij se kerr. Suri kerr sete rramrongwose kele lut nga rraplot puto suri, ko Nem̄in On ongungun se kerr ji Atua. Ko engirr bbonge, suri nale san sete evter nga puwra tweni iok.

²⁷ Ko Atua nga murongwos alje nolo jinibb orongwos kele nororrmien se Nem̄in On, suri nga Nem̄in On ongungun se kalesia nir osorsan tevi marongen se Atua.

²⁸ Ko rramrongwose nga Atua okdoli nanu jijle nir nga marpelpelari ji kerr arres bbong re kerr jijle, suri rrammerreni Atua, ko Atua everus pa kerr suri nororrmien sen nga muto tuwi pa.

²⁹ Erpe Atua otobbobbu wowomue kerr tuwi pa nga rrapa-ivi sen, ko elngi kerr nga rrapa-sorsan p̄et̄peti ko wor tevi ni Natun. Ko Natun nen niaken sen pilep vajin, ko ni puwowomu re nir, pivi tuwar.

³⁰ Ko kerr nga Atua m̄ilngi kerr nga rrapa-sorsan p̄et̄peti tevi ni Natun, Atua everus tweni kerr pa osuw. Ko ololi kele rrammomsawos erres osuw, ko ela kele pa nosrövien sen tevi kerr osuw. Ko iok rramasi vajin re nanu p̄et̄peti osuw.

Merrenien se Atua nga mimrreni kerr e

³¹ Ko rrapwera p̄irpese vajin? Atua ko otur tevi kerr, ko si mun p̄itre kerr vajin?

³² Atua sete orrull totkoni jere Natun mawos, ko okoni tweni vini, emij suri kerr jijle. Ko suri sev sete orongwos p̄ila nanu p̄et̄peti tevi kerr vajin, suri ololi jile pa nanu nga m̄iterter nen osuw?

³³ Ko si mun orongwos p̄ilngi nanu nga m̄isij san re kerr nga Atua miverus tweni kerr? Suri Atua ko ololi rramasi, okwera rrammomsawos jile pa erres osuw.

³⁴ Si mun puwra rramsij? Iesu Kristo ejki. Suri ni emij suri kerr, ko emaur luwi kele osuw, ko elik vajin re Atua nevren rres, ko okngun-ngun vajin tevi Atua suri kerr.

³⁵ Ko sev pirvei tweni kerr re merrenien se Atua nga mimrreni kerr e? Norongen nga m̄isij? Mauren nga m̄iterter? Daron nga jinibb marojoji sarsarr kerr? Numer? Daron nga nanu san ejki nga rrapuri ore nibe kerr? Daron nga rramlik re liven ne mijen? Nuval? Ejki rres nawon!

³⁶ Erpe Naul On muwrai, 'Suri namivi jinibb som, Atua, ko jinibb arwera parevji pini kem nabong jile. Arlesi kem erpe sipsip nga parpal.'

³⁷ Nanu ngok nir ewretun arto tetajer ji kerr, ko rramasi kemkar̄ne p̄etp̄eti rer. Atua nga mimrreni kerr ololi rramasie nir.

³⁸ Suri nurongwose erres, sete nanu san orongwos pirvei tweni kerr re merrenien se Atua nga mimrreni kerr e, poro pivi mijen, rreknga mauren, anglo nir rreknga derteren tama san re melrin, rreknga nanu tama san ne lelingenok, rreknga nanu tama san nga pia-vini

³⁹ rreknga nanu tama san re mare, rreknga nanu tama san reнге lat nga jinibb nga marmij marlik ren, rreknga nanu kele san nga Atua muloli, ko ejki. Sete nanu san orongwos pirvei tweni kerr re merrenien se Atua nga mimrreni kerr e rruungi Iesu Kristo Numal se kerr.

9

Atua otobbtobbue m̄eri Isrel nir tuwi pa

¹ Inu nuvi jinibb se Kristo weretunen. Sete nukrekris ko, ejki. Ko norrorrmien suk kele, Ner̄in On owowomue ko owrai tevik, ko nurongwose nga inu sete nukrekris ko.

² Norrorrmien suk nga morrorrmie ololi tetajer nurnge esij elep temijpal. Ololi nolok erpe p̄iap nawone.

³ Suri nga m̄eri Isrel ngok nir arivi inu metka suk nir, drra sansan, ko arlik malum ngasue Kristo. Inu nurrorrmi poro bololi nanu san ko puloli nga nir parongwos parini ji Kristo e. Rrek poro mijki, ko parla twenik ma ji Kristo, puloli Atua pulolarsik e, poro p̄irpok orongwos bololi sel ser san.

⁴ Suri nir arivi pa Atua jinibb sen, ko Atua ololi pa nir arivi ni natun ko eviseni pa nosr̄ovien sen tevir. Ko ololi pa rijrijen sen nga marterter milep tevir osuw, ko ela nale neseseien tevir, ko loten weretunen.

⁵ Ko nir arivi metka se jinibb se Atua nga tuwi pa nir. Ko Kristo kele reнге mauren sen nga mimaaur e iel ngatan, ni evi metka ser nen san. Ko ni elep asi wore

nir ko jinibb jijle, suri evi pa Atua. Ko kerr rrapusi nisen van mare tetajer tuwi ngok vini. P̄irpok ko!

⁶ Ko bosusi ta: Suri m̄eri Isrel arlik ngasue Atua erpok ngok, ngok rijrijen se Atua suri m̄eri Isrel nir evitan? Ejki, suri sete m̄eri Isrel jijle nir arivi m̄eri Isrel weretunen se Atua.

⁷ Erpok kele, sete nir jijle nga marivi metka se Epram arivi Atua natun, ejki. Suri Atua owrai tevi Epram owra 'Renge Aesak kis kobbong, metka som nir nga m̄erijrij ngel e tevi nik para-iaak jin.'

⁸ Ko niko, reнге bipi nga mariak, sete nir jile arivi Atua natun, ejki, bipi nga bbong mariak ko reнге rijrijen se Atua arivi ni natun mawos.

⁹ Atua ololi rijrijen sen erpel le, owra 'Renge daron mawos nen ko, inu bea-luwi vini e. Ko ngok ko Sera pia-wosi bipi norman sen san.' Ngok niko rijrijen se Atua suri Aesak.

¹⁰ Ko sete ngok ko pa ko osuw, ejki. Suri Repeka natun norman eru nga morivi m̄elew, nuru kele tata se nuru mawos ko apu se kem Aesak.

¹¹⁻¹² Ko suri bbong reнге norrorrmien se Atua ko, owra putobbtobbue bipi nen nuru tuwen. Ko ngok, reнге daron nga setewor moriak e, ko setewor morloli nanu san nga m̄irres ko nga m̄isij, ko Atua erij tevi Repeka owra 'Natun nga mivi m̄erwomu nen pokmajing se natun nga m̄iak vitunen.' Murr̄un ngel eviseni nga daron nga Atua mutobbtobbue jinibb nir, ololi sete suri majingen ser, ejki, ko suri bbong norrorrmien se ni ko.

¹³ Erpe nale on se Atua muwrai, 'Numrreni Jekop ko nungasi Iso'.

Atua okloli erres kobbong

¹⁴ Ko p̄irpese, rrapwera Atua ololi esij? Ejki rres nawon, ololi wor erres ko.

¹⁵ Suri owrai pa tevi Moses osuw, owra 'Poro nga inu borrorrmi jinibb san, ko inu bololi ko wor pirpe morrorrmi. Ko poro nga inu berres tevi jinibb san, ko inu bololi ko wor pirpe morrorrmi.'

¹⁶ Ko niko lat nga puto suri tevi jinibb nir sete evijuri sev nga nir marm̄erreni rrek marloli, ko sansan kobbong, evijuri norrorrmien se Atua nga murrorrm̄i jinibb e.

¹⁷ Renge Naul On Atua owrai tevi numal ne Ijip, owra 'Inu nulngi nik suri nanu sansan kobbong, nga nabong sopen, bololi nanu nga marlelep tevi nik, beviseni dert-eren suk, nga jinibb nga iel ngatan totoklai parlesi wose derteren suk.'

¹⁸ Ko niko Atua orrorrmi si nga ni murrorrm̄i ko wor, ko Atua ololi esij tevi si nga ni mimrreni puloli p̄isij ko wor tevi.

¹⁹ Poro kami san puwrai tevik, puwra 'O, poro nanu ngel pīrpok, ko Atua puwra jinibb san esij pīrpese? Isi purongwos pīwer ore nanu nga Atua mimrreni puloli? Sete san orongwos pīwer ore marongen se Atua!'

²⁰ Ko inu bowra lweni: 'Ko isi ko nik selek, nga kumrij weli Atua mirpok? Sete sospen dan san orongwos pīrij tevi mēr nga mumoli tweni ni renge dan pīrpel, "Erpese nik kumlolik mērpel?"

²¹ Suri ewretun lenglengen, mēr nga mokmoli dan nivi sospen esansan kobong elesi suri lat nga puloli surie. Orongwos pumoli tweni sospen pīeru renge dan san. Pumoli tweni tuwen pumomsen pīrres pēlak nga pivi ne nabong nga milep, ko pumoli tweni tuwen pivi ne nabong jijle.

²² Ko erpok kele, sev nga Atua muloli, sete san orongwos pususi kele. Suri emrreni nga piviseni lolaren sen, ko puloli parongwose derteren sen. Ko ni ololi nolon epriv tevi nir nga mulolarsir nga paran renge mijen nga pia-vini.

²³ Ko ni emrreni piviseni kele batun ne mete nosrövien sen nga muwun saut piplari, nga pimejivjiv vini renge kerr nga murrorrmi kerr, ko rraplai nosrövien sen.

²⁴ Suri kerr rramivi jinibb nga ni miveruse. Sete renge mēri Isrel kis kobong, ko ejki, renge kele jinibb ne vare nir.

²⁵ Ngel evi nale nga muwrai renge Osea: 'Jinibb nga sete marivi suk, inu bea-verus nir 'jinibb suk'; ngaim nga sete memrrenir inu bea-verus nir 'Inu numrreni lengleng nir'.

²⁶ Ko renge vanu jijle nga mowra 'Kami sete kamivi jinibb suk te', renge ie bea-wera 'kami kamivi jinibb suk'; renge ie bea-veruse nir arivi Atua nga mīlik tuwi ngok vini natun.'

²⁷ Ko Aesea ospe suri mēri Isrel nir, owra 'Poro nir pimauro pilep lengleng pīrpe deḡinan nga ngalu renge dis, ko nir pievīs kobbong Atua pia-lai ser para-maur.

²⁸ Suri oto mori pa nga Atua putor mēljeni iel ngatan pēḡpeti nir nga marsij, sete pisansan pijpon.'

²⁹ Erpe Aesea nale sen nga muwrai tuwi pa renge daron nga nanu ngok nir setewor marini marpelari e, ko owra 'Poro Atua ne dromsen mare nga derteren jijle muto jin sete pīlingling metka se kerr sopen parmauro jer, ngok rrapmij pēḡpeti pīrpe jinibb ne Sotom ko jinibb ne Komora nir. Ko ejki, suri ni orrorrmi kerr.'

Meri Isrel elep sete arongwose nospen nga mīrres se Kristo

³⁰ Ko niko vajin kerr rramwera jinibb ne vare nir nga sete marpelak tweni parloli

nir lweni parres re no Atua, nir arres vajin renge no Atua renge bbong nosurien ser ko.

³¹ Ko mēri Isrel nir nga marpelak milep nga parloli lweni nir parres renge no Atua renge sel ne nale neseseien se Moses, sete artor wos.

³² Ko suri sev nga nir sete martor wos mirpok? Suri sete armajil renge nosurien, ko armajil bbong renge sev nga nir kobong marloli. Ko niko marjilaklak renge nevöt nga marok-jilaklak e.

³³ Ngok Atua ospe suri pa renge nale on, owra 'Inu nusi nevöt san renge Saeon nga puloli jinibb parjilaklak ren, ko nir pilep parvitan ren. Ko jinibb nga puosuri nevöt ngok, ko nevöt ngok sete orongwos pulokloksi rragrage.'

10

¹ Selek nir, renge inu ma nolok numrreni lengleng wore nga poro Atua pīla se jinibb suk nir parmauro. Ko niko inu nomok-pelak, nomok-lot suri nir.

² Nurongwos bowrai tevi kami nga nir armerreni Atua elep; ko armerreni ma erpok, ko arrelenge sisini sel weretunen nga parlesi Atua rengen.

³ Ko arreleng sel nga Atua puloli jinibb pumomsawos pīrres renge ni non, ko arloli sel ser ela wani milngen; ko armusur parvijuri sel se Atua.

⁴ Suri Kristo evnivni ore pa nanu nga nale neseseien se Moses muto tweni. Ko niko jinibb jile nga marosuri ni arres ko pa osuw renge no Atua.

Atua elai mauren tevi mēri Isrel nir ko jinibb ne vare nir

⁵ Moses oli suri ngel, erpel: owra nga jinibb nga mimrreni pumomsawos pīrres renge no Atua renge sel ne nale neseseien se Moses pivijuri wor nale ne neseseien ko, nga muwra 'Isi tama san nga pivijuri nanu nga nale neseseien muwrai, mērienen pimauro ko wor.'

⁶ Ko jinibb si nga mimrreni pumomsawos pīrres renge no Atua renge sel ne nosurien pīrpel ma: 'Sete kapsusur lululweni tevi kami lweni kapwera "Isi ko pian renge melrin?" (nga pīlai Iesu vini iel ngatan).

⁷ Rreknga kapwera "Isi pian ngatan ji jinibb nga marmij nir ko pīla lweni Iesu ji jinibb nga marmij nir vini?". Ejki, suri Iesu evini pa iel ngatan, ko emaur luwi pa renge mijen.

⁸ Ko sev nga marwerai ngok ni le ngel, "Nospen nga mīrres se Atua oto mori bbong, renge jingo kami ko nolo kami." Nospen nga mīrres ngok evi nospen ne

nosurien nga kem namwerwer rengen pa tevi kami, erpel:

⁹ Poro nga kami kapwera tweni tevi jingo kami nga Iesu evi Numal, ko kaposuri rengen nolo kami nga Atua ololi ni emaur luwi keke rengen mijen, ko kami kapmaur ko pa.

¹⁰ Suri rengen nosurien se kerr ko, rengen nolo kerr, niko Atua ololi kerr rrammomsawos erres ko pa rengen ni non. Ko rramwera tweni nale ngok nir rengen jingo kerr, ko niko kerr rrammaur ko pa osuw.

¹¹ Naul On owra 'Isi tama san nga puosuri Atua sete orongwos pimanun te, ejki rres nawon.'

¹² Ko nale ngel etawi ore jinibb jile nir. Suri sete enije rengen mēri Isrel nir ko jinibb ne vare nir. Atua evi Numal se jinibb jile nir, ko erij erres suri jinibb jile nga marveruse ni.

¹³ Erpe Naul On owra 'Jinibb jijle nga parverus van ji Numal, ni pia-lai mauren tevir.'

¹⁴ Ko nir parverus van jin pipese ko poro sete parosuri? Ko nir parosuri ni pipese ko poro sete parunge nospen nen? Ko nir parunge pipese poro nospen nen sete parsupsupe tevir?

¹⁵ Ko parwerai nospen nen pipese, poro sete parkoni san pian tweni nga puwrai? Erpe Naul On owra 'Erres pelak nga jinibb nga marok-konkoni mivini nga pila nospen nga mīrres tevi jinibb nir.'

¹⁶ Ko sete jinibb jijle armerreni nospen nga mīrres; Aesea ko owra 'Numal, isi osuri nospen se kem?'

¹⁷ Ko erpel ko, nosurien evini rengen marunge nospen nen. Ko parunge daron nga parwerwer rengen nospen se Kristo.

¹⁸ Bosusi keke mun, Evi weretunen ko nga nir sete arunge nospen nen? Ejki rres nawon ma, nir arunge ko pa osuw. Suri Naul On ospe suri nir nga marwerwer rengen nospen se Kristo, ko owra 'Drrelar owlu jile pa van rengen ngatan jijle, ko nale ser ejpari pa rengen bongsi ngatan totoklai osuw.'

¹⁹ Bosusi lweni keke mun, Evi weretunen ko wor nga mēri Isrel nir sete arongwose? Ejki rres nawon ma, nir arongwose ko pa; Moses ko evi mēri nga muwra wowomue: 'Mian ko bea-koni jinibb nga marsij nir para-loli jinibb suk nir nolor pileplep. Beakoni jinibb nga marlengleng kobbong nga parloli kami kaplolar.'

²⁰ Aesea owra rujrujoni keke owra 'Lartul nga sete marpej inu nabong san, nir arlesi inu pa. Lartul nga nabong san sete marverus inu, inu nuplari pa jir osuw.'

²¹ Ko Atua ospe ma suri mēri Isrel nir owra 'Rengen nabong totoklai ngel pian ejpari nial piwaj pini, nusale nevrek nuru

roroni mēri Isrel nir, nuwra berake to-tonir, ko armusus. Sete arosuri inu, ko artere inu tetajer.'

11

Atua emrreni malume mēri Isrel

¹ Inu numrreni bosusi keke ta, Atua elngi kurtweni mēri Isrel nir nga ni mutobbobbu wowomue nir tuwi jer pa? Ejki rres nawon! Suri inu ngel nuvi mēri Isrel le san, nga mevi metka nga meplari rengen metka se Benjamin san, nga miplari re metka se Epram.

² Ejki, Atua sete elngi kurtweni jinibb sen nir nga ni mutobbobbu womu nir tuwi jerjer pa. Kami kamrongwose sev nga Naul On muwrai rengen nale nga Elaeja mīrij tere mēri Isrel nir rengen tevi Atua

³ nga muwra "Numal, lartul ngel nir arevji pini propet som nir, ko artingtingi nawot som ne sulsulen. Ko inu le vajin nusansan nujpon jer, ko nir arloli lesi keke nga parevji pini inu."

⁴ Ko Atua owra lweni tevi erpese? Owra "Inu numetmete jinibb suk nir evi nuvasngavöl vabut (7000) nga sete marlotoe Atua keris ngok Bal."

⁵ Ko erpok keke, lelingenok, nir evis bbong nga Atua mutobbobbbue nir, suri ni bbong merrenien sen.

⁶ Ni otobbobbbue nir rengen bbong ni ko merrenien sen, sete rengen sev nga nir marok-majinge. Poro Atua putobbobbbue jinibb rengen sev nga marmajinge, ngok ko merrenien sen setemun pivi merrenien.

⁷ Ko erpese? Mēri Isrel nir setemun arlesi sev nga marpej. Nir evis kobbong nga Atua mutobbobbbuer arlesi. Nir jijle nga ngok nen e nir arjimje ore boror rengen verusen se Atua.

⁸ Erpe Naul On owrai owra 'Atua ololi norrorrmien ser ko nolor arsiror pa, mivini mijpari lelingen ngel. Sete arongwos parkulkulu ko parungunge.'

⁹ Ko erpe keke Devet owrai owra 'Poro bbong parlair e niva ko nimet rengen nanen ser, poro bbong parvitan, ko poro bbong Atua putor vitrangir.'

¹⁰ Poro bbong meter parrorr ko puloli sete parkulkulu, ko poro bbong durer parru tetajer rengen solosloen ser.'

Mian ko Atua pila lweni mēri Isrel nir

¹¹ Bosusi keke: Daron nga mēri Isrel nir marjilaklak ko arvitan, ko arvitan jer? Ejki ma, suri marloli nololien ko ololi Atua ela mauren tevi jinibb ne vare nir, nga puloli mēri Isrel nir nolor pileplep tevir e vajin.

¹² Nololien se mēri Isrel nir ololi Atua ela nanu nga marres nir tevi jinibb totoklai ne iel ngatan nir. Ko suri mēri Isrel nir marvitan, ko ngok ololi Atua ela nijor nga

marres nga marivi se Nenin tevi jinibb ne vare nir. Ko poro pipok, ko pia-lai kele wor pia-asi jere ngok nir daron nga pia-la lwenir vajin.

Atua ela mauren tevi jinibb ne vare nir

¹³ Lelingen ngel inu nurij tevi kami jinibb ne vare nir. Daron nga Atua milngi inu mevi aposol renge jinibb ne vare nir, ko nomok-sursurovi majingen suk.

¹⁴ Nomok-loli erpok tweni nga bololi metka suk sopor nolor pilelep ko parini vajin, ko pipok ko inu borongwose bela se nir sopon.

¹⁵ Ko daron nga Atua misir duren tevi nir, ko loli jinibb minij nir nga marivi devje nuval se Atua arivi selen e vajin. Ko pia-irpese vajin poro Atua pila lwenir? Pia-irpe marmij ko marmaur luwi kele!

¹⁶ Poro kuloli niv sopor, ko kula san tevi Atua, ko niv petpeti nen nir arivi vajin se Atua. Ko poro kuwer ore batu nai san, evi se Atua, ko rengsin petpeti nir arivi vajin se Atua.

¹⁷ Nai olip ne orsel san rengsin emabbur tweni, ko Atua ela rengsi nai olip ne lommarrul ko ejipijpteni wanie. Ko kami jinibb ne vare nir kamirpok ko, kamirpe nai olip ne lommarrul ngok, ko kamijipijpti vajin renge nai olip ne orsel. Ko niko lelingen ngel vajin kami kamlai mauren nga mirres nga mivi se meri Isrel nir.

¹⁸ Ko niko erpok ko, sete kapungasi lartul nga marirpe rengsi nai olip marmabbur tweni ngok nir. Kaplololie kami pipese? Kami kamirpe bbong rengsin nir. Kami sete kamla suwen tevi durun, ejki, durun ko ma ela suwen tevi kami.

¹⁹ Ko nik kupwera "O-o, ko rengsin ngel nir nga marmabbur twenir ngel nir arloli inu milnguk."

²⁰ Ngok ewretun, ko armabbur twenir suri sete arosuri. Ko kami ma kamosuri, ko kamlik malun. Ko sete kaplololie kami e te pijki, ko kapmetutu ma.

²¹ Atua ela tweni rengsi nai olip ngok nir. Ni esesri vassenir. Ko kapmetmet, kami kele takok-irpok, tisesri tweni kami kele tirpe nir.

²² Tel rramlesi erpese nga Atua murrun mirres, ko erpese nga murrun mitertter. Ni eta tweni nir nga marvitan, ko ololi erres tevi kami, poro kami kaplik tetajer pirres renge merrenien sen. Ko poro sete kaploli pipok, ko kami kele, tita tweni kami.

²³ Meri Isrel ngok nir, poro parlingi tweni murrur nga sete marosuri ngok e, ko Atua pilngi lwenir renge milnger. Suri Atua orongwos puloli pipok.

²⁴ Kami nga tuwi kamivi jinibb ne vare, kami kamirpe nai olip ne lommarrul ngok rengsin. Ko Atua ejipijpteni kami tevi nai

olip ne orsel sen san, nga sete kamsorsan pelak tei. Ko meri Isrel ma arirpe rengsi nai olip weretunen ne orsel ngel, ko evi nanu nga misisarow nga ni pijipteni lweni nir renge batur mawos kele.

Atua orrorrmi jinibb jijle

²⁵ Selek nir, nale weretunen kobbong san ngok nga Atua muloli muto teptepi ngok, inu numrreni kami kaprongwose, suri nga esij nga kami kaprorrmi kami wor norongwosien se kami easi nale nen. Evi nga muspe suri butterter se meri Isrel nir sete evi murrun san nga puto tetajer, ejki. Murrun ngok orongwos puto renge nir pian pijpari bbong jinibb ne vare totoklai nga Atua mutobbobbu nir nen parini ji Atua. Ko murrur ngok pia-suw vajin.

²⁶ Ko meri Isrel nir petpeti para-lai mauren vajin, erpe Naul On owrai owra 'Ni nga mokla mauren tevi jinibb nir pivel Saeon e vini ko pia-la tweni nanu nga marsij nga metka se Jekop marloli.

²⁷ Bea-loli rijrijen ngel tevir daron nga inu belasi tweni nololien ser.'

²⁸ Suri nga nir marsir durer tevi nospen nga mirres, meri Isrel nir arivi devje nuval se Atua, ko ngok erres re kami jinibb ne vare nir. Ko suri nga marivi jinibb nga pa Atua mutobbobbu nir, ko niko nir arivi pa sele Atua, suri renge apu ser nga tuwi pa nir.

²⁹ Atua sete orongwos pirieni norrorrmien sen renge sev nga ni mutobbobbu pa ko mirij mirres suri pa.

³⁰ Ko erpe renge kami jinibb ne vare; bonevis sete kamosuri Atua, ko lelingen ngel vajin Atua orrorrmi kami, daron nga meri Isrel arsir durer tevi, nga sete arosuri.

³¹ Ko niko renge sel ngel ko, suri Atua orrorrmi kami pa osuw ko, meri Isrel nir nga sete arosuri Atua, nir kele Atua piarrorrmir.

³² Jinibb jijle sete arosuri, ko Atua ololir arivi demij maur suri, nga ni pia-loli jinibb jijle parivel sisarow.

Murru Atua erres pelak

³³ Atua murrun erres nga erres elep tevi jinibb nir. Norrorrmien sen ko norongwosien sen oran ngasu nga ngasu lengleng. Si orongwos puwra suri norrorrmien sen? Isi orongwos purongwose sel sen nir?

³⁴ Erpe nga Naul On muwrai muwra, 'Isi orongwos norrorrmien se Iova? Isi orongwos puwra nanu san tevi?'

³⁵ Nanu jile ngok nir, isi pa ela san tevi Atua, ko ngok ni puwli lweni tevi?'

³⁶ Nanu jijle Atua kobbong ololir, ko nanu jile nga marto nir arto bbong renge ni ko

marongen sen, ko arivi sen. Nosrövien pian ji Atua tuwi ngok vini. Pirpok ko.

12

Loten weretunen se kalesia nir

¹ Niko selek nir, suri nga Atua murrormi kerr milep, ko niko inu nuwrai eterter tevi kami nga kapla kami lweni tevi Atua pirpe sulsulen san nga mimaur ko nga muon, ko nga ni p̄ir ren. Ngel ko evi loten weretunen nga kami kaplai.

² Sete kapvijuri norrormien se jinibb ne iel ngatan nir, ko kaplingingi ma Atua p̄irieni norrormien se kami p̄etp̄eti parmerr kele, ko puloli kami kapviter nga kaprongose sev nga Atua mimrreni, sev nga marres renge Atua non, ko sev nga ni purnge p̄irres renger, ko nga parsorsan parres p̄etp̄eti.

Norrormien se kami pian ngatan

³ Ko suri Atua erres temijpal tevi inu, ko inu vajin nuwrai tevi kami jijle: sete kaploli norrormien se kami pian mare jer. Kaploli norrormien se kami pian ngatan, ko kapmeteni lululweni kami renge norngov ne nosurien nga Atua m̄ilai pa tevi kami sisamis musuv.

⁴ Nibe kerr kalesia sansan kobbong, ko murrmurr nen elep wor. Ko renge murrmurr ngok nir armajing majingen lele ko wor.

⁵ Ko ngok osorsan tevi kerr: kerr elep ko wor, ko rramivi sansan bbonge, suri rramjipijpteni kerr renge murrmurr ne nibe Kristo. Ko niko rramivi pa sansan ko.

⁶ Ko niko kerr jijle rrapmajing renge derteren lele ngok nga Atua m̄ilai tevi kerr ngok, pusorsan tevi nga m̄ilai. Poro nga derteren nga m̄ilai tevi kerr evi nga rrapwerai tweni nale sen, ko rrapwerai pusorsan tevi nga rramosuri.

⁷ Poro nga derteren nen nga m̄ilai tevi kerr evi nga rrapmajing se kalesia nir, ko rrapmajing wor se kalesia nir. Ko poro nga derteren nen nga m̄ilai tevi kerr evi nga rrapvisviseni, ko rrapvisviseni wor.

⁸ Ko poro derteren nen pivi nga rrapwer jilijle jinibb, ko rrapa-loli ko wor; ko isi nga moklai merrenien tevi jinibb m̄inij nir, puloli ko wor tevi nolon nga m̄ir m̄irres; ko isi nga muwowomue nir, p̄imajing wor p̄iterter; ko isi nga moklai tevi nir nga nevrer marmumrrol re nanu san, puloli wor tevi nolon nga m̄ir.

Murrun nga marmerrreni temijpale jinibb

⁹ Kami kapmerreni wor jinibb ko nir re weretunen, sete kapmerreni kerkeris bbonge nir. Ko tetajer kapungasi nanu

nga m̄isij, ko kaprrul totoni ma nanu nga m̄irres.

¹⁰ Kami kapmerrmerreni kami lululwi p̄iterter pirpe kalesia nir, ko tetajer kaprrerres tevi kami lululwi ko wor.

¹¹ Kapmajing p̄iterter ko wor, sete nibe kami pimijmij e. Ko kaploli majingen se Numal tevi nolo kami p̄etp̄eti, sete sopen pijjon jer.

¹² Kaplingi norrormien se kami puto p̄iterter renge Atua, ko kaḗir. Ko daron nga poro nanu nga m̄isij piplari ji kami e, kaptor totoni wor nolo kami ko p̄iterter. Ko renge nabong jijle, kaplot.

¹³ Kami kaptututweni joro kami nir tevi jinibb nga marivi kalesia nir nga joror muwelili, ko kaptasi metali ne naim se kami tevi jinibb neturvitan nir.

Jinibb nga marivi kalesia nir parmerreni devje nuval ser

¹⁴ Kapngoni tevi Atua nga p̄irij p̄irres tevi jinibb nga marloli m̄isij tevi kami. O-o pipok ko, kapngoni ni p̄irij p̄irres surir, sete kapwerai tevi nga pulokloksi nir.

¹⁵ Ko kami kaḗir kobbong tevi jinibb nga marir nir, ko kapting tevi jinibb nga marting nir.

¹⁶ Kami norrormien se kami pivi sansan bbonge ko tevi jinibb nir. Sete kaplololie kami te, ko kaploli ma sel tevi nir nga marivi jinibb malum. Ko sete kaprrormi kami kamivi jinibb nga norongwosien se kami milep.

¹⁷ Poro jinibb san ololi esij tevi kami, ko sete kaploli lweni p̄isij tevi, kapkele e. Ko kaploli lesi ma kaploli sev nga p̄irres renge jinibb jijle nir.

¹⁸ Kaploli nanu jile p̄irres renge devjen nga kami nen, nga puloli kami kaplik p̄irres renge demat tevi jinibb totoklai nir.

¹⁹ Poro jinibb san ololi esij tevi kami, ko kami sete kaploli lweni kele pipok tevi. Kaplingingi puto. Atua pia-tor vitrangi m̄ernen. Suri Naul On owra 'Murrun ngok nga jinibb puloli lweni tevi jinibb nga muloli m̄isij, inu kobbong nusan nurongwos bololi, ko bekle lweni tevi.'

²⁰ Erpe Naul On owrai kele, 'Poro devje nuval som numer aji, kupla nanen tevi; ko poro nolon ememes, kupla nuwi tevi pimni. Renge nga kuploli pipok ko puloli ni pimanune.'

²¹ Sete kaplingingi nanu nga marsij parevei tweni kami, ko kaploli ma nanu nga m̄irres p̄ila tweni nanu nga m̄isij.

13

Kalesia parosuri wor numal ko nir

¹ Kalesia parosuri wor numal nga martori derteren ko nir, suri numal nir arwaji nais ngok suri bbong nanu sansan ko, suri

Atua kobbong elai tevir. Ko erpok numal nga marlelep nga marlik, Atua kobbong elngir.

² Poro jinibb san pitre numal nga marlelep ngok nir, ni etre sev nga Atua muloli pa. Ko ngok poro jinibb san ololi wor erpok, ko ni lweni ololi nga partor vitrangi.

³ Jinibb nga marok-loli m̄irres sete arongwos parmetutu numal nir, ko jinibb nga marok-loli m̄isij arongwos parmetutu numal nir. Ko poro kami kapmerreni nga sete kapmetutu numal nir, ko ngok kaploli nanu nga marres nir, ko puloli numal nir parsurōvi kami.

⁴ Suri nir arivi jinibb ne majingen se Atua, armajing suri nanu nga parres renge kami. Ko poro nga kami kaploli nanu nga sete parres, ngok iok kami kapmetutu ko wor. Suri nir derteren ser otoo nga partor vitrangi kami. Iel ewretun le, suri nga nir arivi jinibb ne majingen se Atua. Arla wani milnge Atua nga marvirrivali jinibb nir nga marloli nanu nga marsij.

⁵ Suri nanu ngel ko, niko kami kaposuri wor numal nga martori derteren ko nir. Ko sete erres nga kami kaploli pipel suri bbong nga kami kammetutue nga Atua pia-virralli kami; ejki, kami kaposuri wor numal nir nga puloli norrorrmien se kami sete pulokloksi kami.

⁶ Ko ngok erpok ko muloli kami kamwuli takis. Suri numal nir arivi jinibb ne majingen se Atua daron nga marloli majingen ser.

⁷ Ko erpok ko kami kaplai wor nevōt ne takis lele nir nga numal nir marwera kaplair; ko kaptorir van mare ko kaposuri nir.

Jinibb nir parmerreni tuwar ko tasir

⁸ Sete erres nga kami kaploli nivnon ji jinibb pisan; ko nanu kobbong san nga kami kaploli pirpe pivi nivnon se kami, evi merrenien nga kami kapmermerreni kami lululweni. Isi san nga puloli pipel erpe osuri nale neseseiren ko pa.

⁹ Nale neseseiren nga marto ngel, 'Nik sete kupvena nesevin, Nik sete kuprevji pini jinibb, Nik sete kupvevna, Nik sete kupmermerreni joro jinibb nir', nale neseseiren nga mowrair ngel nir, ko nale neseseiren nga marjijpon, sete mowrair nen nir, nale neseseiren sansan kobbong etawi ore nir jijle, ni le ngel: 'Kupmerreni selem pirpe nik luwi kobbong'.

¹⁰ Poro kupmerreni jinibb m̄inij nir, ko sete kuma-loli m̄isij rragrrag tevir. Niko nga jinibb pimrreni jinibb pipok, erpe otori nale neseseiren jijle ko pa nir osuw.

Kerr rramivi jinibb ne moron

¹¹ Kami kaploli pipel, suri kamrongwose daron evini nga kaptaol vajin renge

meturen se kami nga kammatur e, kapmera. Suri daron nga rrapla mauren evini mori jer vajin, asie nga womu daron nga rrama-osuri e.

¹² Nat nga mupong otomori pa p̄iasi, nat erin le pa ngel. Niko setemun rraploli nanu nga marsij nga marivi se nemalik, ko rrapla nijor ne nuval nga rrapval renge moron vajin.

¹³ Erres ma kerr rrapok-loli nanu nga marok-rres nir pirpe jinibb nga marlik pa renge moron ne nat nga m̄irin. Ko sete rraploli dabbun nga p̄isij, ko sete rrapmini p̄elake norro rreknga nuwi nga m̄iterter nga puloli rraplengleng. Ko sete rraploli p̄isij tevi nesevin, rreknga rraploli murrun nga marsij. Ko sete rraplat, ko sete nolo kerr pileplep.

¹⁴ Ko rraplai Numal se kerr Iesu Kristo erpe sunsun ne nuval se kerr nga orongwos puto ore nanu jijle nga marsij. Ko setemun kapok-rroormi murrun nga marsij nir nga norrorrmien se kami muwra purrorrmir.

14

Sete kapwer lokloksi tuwa kami nir ko tasi kami nir

¹ Kami kapmarong ko wor nir nga nosurien ser muwelili ngok parini ji kami. Ko sete kaprij tevir suri norrorrmien ser.

² Jinibb sopor renge norrorrmien ser arosuri nga nanen jijle arres kobbong renge parurroir. Ko jinibb sopor nga nosurien ser muwelili, nir arurroi kis bbong nanen ne orsel ko nir, ko sete arurroi nanu nga visor mutoe.

³ Jinibb nga marurroi nanen jijle ngok nir, sete erres nga nir parmeteni p̄isij renge nir nga sete marurro nanen jijle ngok nir. Ko jinibb nga marurroi kis bbong nanen ne orsel ngok nir, sete erres nga nir parwer lokloksi jinibb nga marurroi nanen jijle ngok nir, suri Atua emarong pa nir maran jin.

⁴ Nik kuvi isi, nga kupwer lokloksi jinibb ne majingen se jinibb m̄inij? Ngok oto pa renge Numal ser ko nga pia-werai suri tevir, arloli erres rreknga arloli esij. Ko nir para-loli p̄irres ko, suri Numal ser orongwose puloli para-loli p̄irres.

⁵ Jinibb sopor arorrm̄i nabong sopor aron wor arasi nabong m̄inij nen nir, ko jinibb sopor arorrm̄i nabong jile ngok nir arorsan kobbong. Re iok, ko kerr sisamis rraprorrm̄i ko wor p̄irres, sete norrorrmien se kerr p̄ieru e.

⁶ Jinibb nga marrorrm̄i ko martor tutune nabong ngok nir van mare, arloli wor erpok renge marosuri Numal ko. Ko jinibb nga marurro nanen jijle ngok nir arloli

erpok renge wor marosuri Numal ko. Suri arwera erres pa tevi Atua renge nanen ngok. Ko jinibb nga marmusus weretunen nga parurroi vison ngok nir, arloli erpok renge wor marosuri Numal ko, ko nir kele arwera erres tevi Atua.

⁷ Sete kerr san nga mauren sen evi se ni kobbong, ko sete san mijen sen evi se ni kobbong.

⁸ Poro kerr rrapmaur, evi se Numal nga kerr rrammaur. Ko poro kerr rrapmij, ko evi se Numal nga kerr rrapmij. Erpok ko, poro rrapmaur rreknga rrapmij, evi se Numal.

⁹ Suri Kristo emij pa ko emaur luwi kele pa renge mijen nga pivi Numal se nir nga marmaur ko se nir nga marmij pa.

¹⁰ Ko niko, erpe kami nga kamaani nanen ne orsel kobbong nir, suri sev kami kapwer lokloksi jinibb minij nir? Ko kami nga kamrro nanen jikle nir, suri sev nga kami kammeteni pisij renge sele kami bbong nir? Kerr jile rraptur renge no Atua, nga pia-wera suri lat nga puto suri tevi kerr.

¹¹ Suri Naul On owrai nga Atua ojuji lweni ni ko owrai owra 'Nale ngel ewretun erpe inu numaur, Jinibb jikle parjipa ngatan jik parsurovi inu, parwerwera nga inu nuvi Atua'.

¹² Ngel erpe owra kerr jikle rraptur renge no Atua ko rrapwowa tweni nanu nga marres ko nanu nga marsij nga rramlolir.

Sete rraploli sele kerr nir parvitan

¹³ Ko niko setemun rrapok-supsupe lokloksi lululweni kerr nir pipok; rrap-supupe suri ma lat san nga pila wani, nga puloli setemun rrapok-loli sele kerr nir parjilaklak rreknga parvitan van renge nololien.

¹⁴ Inu nukorti pa tevi Numal Iesu, ko ngok ololi nurongwose nga ewretun nanen jikle arres kobbong, sete san orro. Ko poro nga san puosuri nga nanen san orro, ko ngok erpok ko pa, orro ko pa rengen.

¹⁵ Ko poro san nga mirpok ornge esij daron nga milesi nik kurro nanen san, ko ngok setemun kuvijuri sel nga kumrreni ni e ko. Sete kuploli nanen nga kumrroi pulokloksi jinibb san nga Kristo mimij suri pa.

¹⁶ Sete kuploli jinibb nir parworworsur suri nanu nga kumlolir marres, ko parwer lokloksir parwera arsj.

¹⁷ Suri nga batun vanu se Atua sete evi ne nanen ko minminen, ko evi ne ma murrun nga marres, ko demat, ko neiren nga Nem'in On milair.

¹⁸ Renge daron nga kuploli majingen se Kristo renge sel ngel, ko ololi Atua ornge erres e ko, ko jinibb kele nir arlesi erres e.

¹⁹ Ko ngok niko, kerr tetajer rrapvijuri sel nga milai demat, ko ngel puloli kerr rraplila lululweni se kerr nir.

²⁰ Kami sete kaploli nanen pulokloksi sev nga Atua muloli pa musuw. Nanen jikle parurroi kobbong, ko esij ko ma renge parurroi san nga pulokloksi jinibb san pivitan van renge nololien.

²¹ Nanu nga mirres nen ma nga nik kuploli evi nga nik sete kupro vison, ko sete kupmini norro, rreknga sete kuploli nanu minij nen kele san nga puloli selem pivitan van renge nololien.

²² Nik nosurien som oto livö renge Atua ko nik. Ko inu nosurien suk oto livö renge Atua ko inu. Nik sete kupon tertere inu bevijuri nik renge vison, ko inu sete bon tertere nik kupvijuri inu. Ko neiren ma renge nir nga sete norrorrmien ser eru e re daron nga marvijuri norrorrmien ser nga muwra nanu ngok evi nanu nga mirres.

²³ Ko poro norrorrmien se kami daron nga kamrroi pieru e, ko Atua piwer lokloksi kami nga kamurroi. Suri kami sete kamloli renge nosurien te. Ko nanu jikle nga sete muto renge nosurien evi nololien.

15

Sete rraprorrmi kerr kis kobbong, kerr rraprorrmi wor jinibb minij ko nir

¹ Kerr nga nosurien se kerr miterterter pa musuw, rrapla se wor nir nga nosurien ser muwelili, ko sete rraploli nanu nga parres renge kerr kis bbong nir.

² Ko rraploli ma pipel: rraprorrmi sele kerr nir, nanu nga nir marmerrnir, nga puloli nir nosurien se nir parterter kele wor.

³ Suri Kristo kele sete ololi nanu nga mirres renge ni luwi bbong, ko erpel ma, erpe Naul On muwrai muwra 'Nale ser nga marsij nir, nga marok-werair tevim, nir kele le ngel marwerair tevi inu.'

⁴ Nanu jikle nga maruli renge Naul On, arulir suri nga parvisviseni kerr, nga puloli norrorrmien se kerr piterter. Suri nale on nga marto renge Naul On arloli kerr rramrunge erres, ko ololi nosurien se kerr pipriv.

⁵ Atua okloli nosurien se kami arperiv ko kamrunge erres. Ko ngel evi verusen suk, nga ni puloli kami jile norrorrmien se kami parivi sansan bbonge. Suri kami kamvijuri pa sel se Iesu Kristo.

⁶ Ko ngok puloli nga kami jile kaprongwos kapsurovi Atua Tata se Numal se kerr Iesu Kristo renge drrelan sansan.

Meri Isrel nir ko jinibb minij nir parini wor lat pisansan ko

⁷ Kami kaprevei wor sele kami ko nir parini ji kami kapkorti lat pisansan, pirpe

Iesu Kristo mirvei kami vini lat sansan, kamkorti nūrres tevi ni. Renge sel ngok ko ololi nosrövien van ji Atua.

⁸ Nuwrai tevi kami renge mauren se Iesu renge daron nga mīlik iel ngatan e emajing se mēri Isrel nir, nga piviseni nga Atua ololi jile rijrijen sen nga muwrai pa tevi apu ser nga tuwi nir arpelari.

⁹ Ko ni ololi erpok nga puloli jinibb ne vare nir kele parsusi Atua nisen van mare suri murrormir, erpe nga Naul On owrai nga muwra 'Ko inu bea-susi nisen van mare ji jinibb ne vare nir mian ko βela nubosusi nisen van mare.'

¹⁰ Ko Naul On owrai kele, 'Kami jinibb ne vare nir, kappitevi jinibb se Atua nir, kaβir korti tevir.'

¹¹ Vesan kele, Naul On owra 'Kami jinibb ne vare nir, kappitevi jinibb jikle nir, kapsusi Atua nisen pian mare.'

¹² Ko vesan kele Aesea owra 'Mian ko metka se Jese san pia-pelari. Ni pivini nga pivi mērwomu renge jinibb ne vare nir, ko nir para-lingi norrorrmien ser rengen pīterter.'

¹³ Selek nir, ngel evi verusen suk, nga Atua nga rramlingi nolo kerr rengen nga rrapla nanu nga rramtirive jin, ni pia-songni neiren ko demat renge nolo kami nga kamosuri ni. Ko ngok renge derteren se Nēmīn On puloli nolo kami pututun suri malume nanu nga kamtiriv tweni.

Majingen se Pol nga mīmajing se jinibb ne vare nir

¹⁴ Selek nir, inu nurongwose nga kami kamwun saute murrun nga mūrres ko norongwosien, ko kamrongwos kapvisviseni kami lululwenie nir.

¹⁵ Renge naul suk ngel inu nula nale nga marterter sapon tevi kami, nga puloli kami kapprormi malume nale nga namwerair pa tevi kami. Inu nurij eterter erpok suri wor Atua ko elngi inu.

¹⁶ Ni elngi inu nga bevi jinibb ne majingen se Iesu Kristo, nga βemajing se jinibb ne vare nir. βemajing pirpe jinibb ne sulsulen san nga βewerwer renge nospēn nga mūrres se Atua. Ko pirpok ko nga puloli jinibb ne vare nir parirpe sulsulen san nga Atua pīlai, ko Nēmīn On puloli nir paron.

¹⁷ Inu nukorti pa tevi Iesu Kristo, ko niko rreknga inu nurongwos bosrosrōvik e sapon renge majingen se Atua;

¹⁸ ko bosrosrōvik suri bbong sev nga Kristo mīlgi renge inu bololi nga puloli jinibb ne vare nir partori Atua, renge nale nga mowrair ko renge nanu nga mololir.

¹⁹ Ko Kristo emajing renge derteren ne nanu nga marinijnij nawone nir, ko emajing renge derteren se Nēmīn On se Atua.

Ko niko renge daron nga mevel suri sel renge Jerusalem mevini mejpari Ilirikam, tetajer renge sel inu nomok-wera tweni nospēn nga mūrres se Kristo pētpēti.

²⁰ Tetajer norrorrmien suk eterter nga bowra tweni nospēn nga mūrres renge vanu nga jinibb nen nir setewor marunge. Numusus βemajing naim nga jinibb nūnij mīlil tur jile pae.

²¹ Erpe nga Naul On muwrai muwra 'Jinibb nga sete marunge nospēn nen parlesi ko, ko jinibb nga sete marunge nospēn ne ni wor parongwose.'

Pol orrorrmi nga pian pukluklu Rom

²² Nabong elep nga nomok-wera nobokinuk nobok-kulkulue kami, ko majingen suk nir arok-to ore.

²³ Ko lelingen ngel inu numajing jile pa majingen suk nir nga iel nir, ko numrreni lengleng wor nga bevinuk bokluklu kami renge sia elep pa arasi osuw.

²⁴ Ko niko lelingen ngel nurongwos bololi le vajin. Ko numrreni bokluklue kami renge daron nga bean Spen e, ko βelik beblen tevi kami. Ko renge daron nga bokluklu jile kami, renge daron nga bevel e, ko kami sopor parpitevik renge sel.

²⁵ Ko renge lelingen ngel inu bean mun Jerusalem, bololi majingen se jinibb se Atua sopor nga marlik ie.

²⁶ Suri kalesia ne Masetonia ko kalesia ne Akaea arsupsupe nga parlai merrenien sapon tevi jinibb nir nga joror mijjike renge Atua jinibb sen nir renge Jerusalem.

²⁷ Norrorrmien ngok evi wor nga nir ko, nga parloli pirpok. Ko erpe norrorrmien ngok ewretun. Suri mēri Isrel nir arla nale nga mūrres se Atua tevi jinibb ne vare nir, ko ngok niko erres jinibb ne vare nir parloli lweni pirpok, parla joror sopor nga Atua mīlai tevir tevi mēri Isrel nir nga nevrer marmumrrol.

²⁸ Ko renge daron nga bosuw renge majingen ngok, nga βela nevōt nga jinibb ne vare marlai ngel tevir pusuw, ko bevijuri sel nga bean Spen e ko bea-asi ji kami, bokluklue kami.

²⁹ Nurongwose renge daron nga bevinuk ji kami, ko bea-la nanu pilep lengleng nga marres se Kristo tevi kami.

³⁰ Selek nir, renge nise Numal se kerr Iesu Kristo ko renge merrenien nga Nēmīn On mīlai pa tevi kerr, inu nunngoni tevi kami nga kappitevik renge loten suk, nga kami kaplot surik van ji Atua pīterter.

³¹ Kami kapngoni tevi ni pīterter nga ni putor totoni nolo jinibb ne Jutia nir nga sete marosuri, nga puloli nir sete parevjik, ko puloli nga majingen suk nga bololi

Jerusalem, jinibb se Atua nga marlik ie parlesi p̄irres.

³² Ko inu ßeir pilep nga boklukue kami vajin, poro nga Atua pimarong, ko ßeir pilep nga ßelik ji kami, puloli nga inu ßeterter kele.

³³ Ngel le evi verusen suk tevi kami, nga Atua nga mivi batu demat se kerr; ni p̄ilik tevi kami jijle. Pirpok ko.

16

Pol nale sen nga muwra erres tevi jinibb nir

¹ Nusrövi joji kerr nga n̄imajing se kalesia nir nga Kenkria nga nisen Pipi. Ni evi nesevin nga n̄imajing n̄irres milep san.

² Ko niko kami kaptekai ni van reнге naim se kami nir reнге nise Numal se kerr, pirpe jinibb se Atua nir marloli. Ko poro nga ni emrreni nanu san ji kami, ko kami kaplai ko wor tevi ni. Suri nga ni ololi sel tevi delung elep, ko evi nesevin san nga n̄irres tevi jinibb nir; ko tevi inu kele.

³ Ko nuwra erres tevi Akwila ko nesen sen wor Prisila, nga nuru morpitevik pa, kem nammajing reнге majingen se Iesu Kristo.

⁴ Nuru ormarong pa pormij suri inu bonevis. Ko niko inu nuwra erres nga erres temijpal wor tevi nuru; ko sete inu kis nusan ko, nir kalesia nga marivi jinibb ne vare kele wor nir arunge epok.

⁵ Ko nuwra erres kele tevi kalesia nir nga marok-korti reнге naim se nuru.

Ko nuwrai erres kele wor tevi inu wor selek nga memrreni Epaenetas. Ni evi n̄er nga muosuri womue Kristo reнге jinibb ne Esia nir.

⁶ Nuwra erres tevi Merri, reнге nga n̄iplak temijpale kami.

⁷ Nuwra erres tevi laru ngel nuru, Antronikas ko Junias. Ko n̄eri Isrel nga itul ngel ko, namlik reнге naim ne nekaien namvesane. Laru ngel nuru, aposol nir arongwose nuru erres, ko orivi kalesia owowomu mian ko vitunen vajin ko inu.

⁸ Inu nuwra erres elep tevi Ampliatus nga mukorti pa tevi Numal. Ni evi selek nga memrreni milep.

⁹ Nuwra erres tevi Opanas nga mukorti pa tevi kami reнге majingen se Kristo, ko Stakis nga inu memrreni lengleng.

¹⁰ Nuwra erres tevi Apeles, n̄er nga miviseni nga ni nosurien sen eterter were-tunen reнге Kristo. Ko nuwra erres kele tevi metka se Aristopolas nga marlik reнге naim sen.

¹¹ Inu nuwra erres tevi Erotien n̄eri Isrel ngok, ko tevi nir nga markorti pa tevi

Numal se kerr nga marlik reнге naim se Nasisas.

¹² Nuwra erres tevi nesevin ngel nuru Tritaena ko Triposa nga morok-majing milep reнге majingen se Numal se kerr; ko tevi Persis kele, selek nga memrreni milep nga n̄iplak milep reнге majingen se Numal se kerr.

¹³ Nuwra erres tevi Rupus. Ni evi jinibb san nga n̄imajing milep reнге majingen se Numal se kerr. Ko nuwra erres wor tevi tasu sen, nga ni mimetmete inu n̄irres erpe wor nga ni mivesik.

¹⁴ Nuwra erres tevi lartul ngel nir, Asinkritas ko Relkon ko Eremes ko Patropas ko Eremas, ko kalesia n̄inij nen kele nir nga marok-lik tevir iok.

¹⁵ Nuwra erres tevi Pilolokas ko vinel Julia, ko Nereas ko jojin wor, ko Olimpas ko jinibb se Atua nga marok-lik tevir iok.

¹⁶ Kapwera erres tevi kami lululwi tevi merrenien ko demat. Ko kalesia nir se Kristo kele nir arwera erres tevi kami.

Bongsi nale se Pol tevi nir

¹⁷ Selek nir, inu nuwrai eterter tevi kami nga kami kapmetmet ko wor reнге jinibb nga marwerai parloli kami kapser wirrwir, ko armerreni parllokloksi nosurien se kami, ko artere nesesreien nga kem namlai tevi kami. Kami kapwij wor ngasue nir ko.

¹⁸ Lartul nga marloli nanu ngok nir sete armajing se Kristo Numal se kerr; nir arok-vijuri bbong norrorrmien ser nga marsij ko nir, ko arok-rij nale melmelas nir ko nale nga marrun nir. Ko arok-kerkeris, ko arevei tweni jinibb sapor nga sete arloli nanu nga n̄isij san nabong san.

¹⁹ Jinibb jile arunge pa nga kamtur n̄iterter reнге nospen nga n̄irres, ko suri murrun ngel ko ololi inu nuir reнге kami. Ko numrreni kami kaprongwose sev nga marres ko sev nga marsij, ko niko kami sete kapan reнге nanu nga marsij nir, pijki rres nawon.

²⁰ Sete ngasu nga ngasu rragrag te nga Atua ne batu demat se kerr puni Demij van ngatan reнге nolon ßela kami kapbböt ren. Ngel evi verusen suk, merrenien se Numal se kerr Iesu pipatevi kami tuwi ngok vini.

²¹ Timoti nga mok-majing tevik, ni owra erres tevi kami. Ko n̄eri Isrel nga itul ngel, Lusias ko Jeson ko Sosipata, nir kele arwera erres tevi kami.

²² Inu le Tosias nuli tweni Pol nale sen nga muwrai reнге naul ngel, ko inu kele nuwra erres tevi kami nga kerr rramivi pa kalesia, rramkorti pa tevi Numal se kerr Iesu.

²³ Jinibb san nga nisen Gaeas nga inu Pol nomok-lik renge naim sen, ko kalesia nir marok-ini jin marok-korti renge naim sen, ni owra erres tevi kami. Ko Erastas nga mivi m̄er nga mok-metmete nevöt ne ngaim ngel, ko tasi wor kerr Kwotas, nuru korti orwera erres tevi kami.

²⁴ [Ko ngel evi loten suk, nga merrenien se Numal Iesu Kristo pipitevi kami. Pirpok ko.]^A

Nale ne parsurövi nise Atua pian mare

²⁵ Kerr rrapsurövi Atua nisen pian mare. Ni kobbong esan orongwos puloli kami kaptur p̄iterter renge nosurien se kami. Nale ngok osorsan tevi nospen nga m̄irres nga nomok-werwer rengen suri Iesu Kristo, ko osorsan tevi nale nga Atua m̄ilngi silveni tuwi jer pa, ko lelingen ngel vajin ololi oto limjer erres.

²⁶ Atua nga mimaur tuwi ngok vini, ni emajing renge nale nga propet sen nga tuwi jer pa nir maruli nga parwowrai nale nga Atua m̄ilngi silveni ngel tuwi jer pa, piplari vajin limjer. Ko ni owrai eterter nga nale ngel puwlu jile renge vanu nga musuwsuw ngok nir, ko puloli jinibb parosuri ni, ko partori ni.

²⁷ Atua sansan bbong, ko esan norong-wosien sen otoa, ko niko kerr rrapsurövi ni renge nise Iesu Kristo tuwi ngok vini. Pirpok ko.

^A **16:24** Nale nga muto re nolo [], rrek sete Pol oli, ko jinibb san ea-uli vitue daron nga muli tweni kopi san ne naul ngel.

**Naul nga Pol Muli Womue
tevi Kalesia Nir renge
KORIN
Batu nale nga mivsivseni
lut nga parmteni naul
ngel puto suri**

Naul (leta) nga Pol muli womue van ji kalesia ne Korin nir, oli suri nanu lele elep arok-imare re mauren se kalesia nir ie, ko owra piwilwil se nir. Pol ko evi n̄erwomu nga mian Korin, ko ololi womu n̄eri Korin nir arivi kalesia.

Korin evi ngaim nga milep se n̄eri Gris nir ko evi kele ngaim womu ne vanu ngok Akaea nga Rom mimetmete. Jinibb ne vanu lele elep arlik ie, ko evi kele lat nga jinibb elep marongwose re devjen ne bisnes, ko re devjen ne kastom ser kele, ko re devjen ne murrun nga m̄isij kele, ko re kele sel nga marloli nosr̄ovien van ji atua lele nir.

Nanu nga marlelep nir nga Pol m̄ijilwer suri renga naul ngel aripel: os̄pe suri murrun nga kalesia nir marok-sisamis e, ko murrun nga marok-loli m̄isij tevi ne-sevin. Nir arsusi womu pa nanu sopor tevi Pol, ko renga naul ngel ni erij welir, ko os̄pe murrun ne totkoien, ko pirpese re nanen nga jinibb marlai tevi atua m̄inij nir. Ko eviseni sel mawos nga parvijuri re Naim On re daron nga markorti, ko derteren nir nga Ner̄in On m̄ilai tevi kalesia nir, ko murrun nga jinibb pimaaur luwi kele.

Re batun esngav̄öl drromon itul (13) os̄pe suri murrun nga rrapmerreni lenglengen Atua ko jinibb nir nga evi nanu nga m̄irres temijjal nga jinibb se Atua nir parvijuri.

¹ Inu Pol nuvi aposol se Iesu Kristo nga Atua miveruse inu, ko mimrreni Bemajing re majingen ngel. Ko Sotinis nga mivi niaken se kerr,

² nomorwera erres tevi kami, jinibb nga marosuri Atua iak Korin. Kami, Iesu Kristo ololi kamon ko kamivi jinibb sen. Ko Atua everus kami nga kapkorti tevi jinibb sen m̄inij kele nir. Renge lat jilje iel ngatan, nir arlot van ji Iesu Kristo nga mivi Numal se kerr ko nga mivi Numal se nir kele.

³ Ngel evi loten suk, nga Atua Tata se kerr tevi Numal Iesu Kristo porwilwil se kami renga nalol nga m̄irres, ko porlingi demat puto tevi kami tetajer.

Pol owra erres tevi Atua

⁴ Tetajer nomok-werai erres tevi Atua suri kami, renga nalol nga m̄irres nga ni m̄ilai nga muloli kamkorti pa tevi Iesu Kristo.

⁵ Ko suri gortien se kami tevi Kristo ololi kamasasi renga norongwosien, ko kamrongwose kapwer rrrerrarre nanu jilje puto limjer.

⁶ Nale nos̄pen nga marsūpe suri Kristo evini pa oto eterter renga kami,

⁷ ololi kamlai merrenien elep ji Ner̄in On daron nga kamok-tirive Iesu Kristo Numal se kerr pia-rremali vini.

⁸ Ni purrul totkoni kami p̄iterter nga sete nanu san p̄isij re kami, pianan pijpari nabong nga Numal se kerr Iesu Kristo pia-luwi kele ren.

⁹ Atua nga miveruse kami ko mukortoni mauren se kami tevi mauren se Iesu Kristo Numal se kerr, okloli suri erpe nale sen muwrai tetajer.

Kalesia nir arwirr sarrsarr

¹⁰ Renge nise Iesu Kristo Numal se kerr, inu nuwrai eterter tevi kami tasik nir, nga wurru kapivi sansane kobbong. Sete erres kapwij sarrsarr van renga gortien wowar-reng nir. Murru kami ko norrorrmien se kami pivi sansane kobbong.

¹¹ Suri metka se Kloe sopor arwera tweni tevik nga kami kamok-latlat lululweni kele kami.

¹² Nuwrai erpok suri kami sisamis kam-sūpe nale sisamis m̄inij. San ok-wera, “Nuvijuri Pol”, m̄inij ok-wera “Nuvijuri Apolos”, san kele ok-wera “Nuvi se Pita”, ko sopor kele arok-wera “Namivi se Kristo”.

¹³ Erpese? Kami kamrrorrmii kamrongwose kaptor otvi Kristo pirpok ngok? Kamrrorrmii inu Pol numij renga nai pelaot nga bewilwil se kami? Kami sete kampaptaes renga inu nisek, ejki!

¹⁴ Nuwrai erres tevi Atua nga inu sete nupaptaese rragrag kami san, ko Krispas ko Gaius kobbong.

¹⁵ Niko sete san orongwos puwra “Renge nise Pol arpaptaese inu.”

¹⁶ O, ko nupaptaese kele Stephanas tevi metka sen kele nir, ko nurrlenga, nupaptaese kele san rreknga ejki.

¹⁷ Kristo sete okoni inu nga bepaptaese jinibb nir, ko okoni inu nga bowrai tweni nos̄pen nga m̄irres sen. Ko sete okoni inu nga b̄ewerwer renga nale norongwosien se jinibb, ejki, ngok puloli mijen se Kristo renga nai pelaot pivi nanu nawon.

Kristo, derteren ko norongwosien se Atua

¹⁸ Nale nga muwrai tweni mijen se Kristo renga nai pelaot evi nale lenglengen kobbong ji jinibb nejikien. Ko tevi kerr nga

Atua mok-la mauren tevi kerr; nale nen eviseni derteren sen.

¹⁹ Ko Naul On se Atua owrai owra 'Norongwosien se jinibb nga marwera marongrongwos, inu bololi parjijki jer. Ko nororrmmien ne norongwosien bololi parivi nanu nawon.'

²⁰ Jinibb ne norongwosien nirbe? Nibeni jinibb nga marongrongwos? Nibeni jinibb nga marok-rij melmelas suri nanu ne iel ngatan nir? Arjiki rres. Atua ololi pa norongwosien ser pivini pivi nale lenglengen vajin.

²¹ Atua, norongwosien sen elep p̄elak, ko ololi jinibb sete arongwos parongwose Atua renge sel ne nir norongwosien ser. Ko emrreni puloli nale nga rramok-werai tweni ngok, nga jinibb marwera evi nale lenglengen, nale nen ko p̄ila mauren tevi nir nga marosuri ni.

²² Meri Isrel armerreni wor parlesi renge meter majingen nga marinijnij nawone se Atua, ko m̄eri Gris armerreni parunge nale norongwosien.

²³ Ko kerr ma kalesia, rramok-werwer suri Kristo nga marevji re nai pelaot. Nale ngok, m̄eri Isrel nir nolor sete erres suri, ko jinibb ne vare nir arunge erpe nale lenglengen kobbong.

²⁴ Re ma kerr korti, m̄eri Isrel ko m̄eri Gris nga Atua miveruse kerr; Kristo ngel evi derteren se Atua ko norongwosien nga milep se Atua.

²⁵ Murrun se Atua nga jinibb m̄ilesi mivi lenglengen, ni kele easi wor norongwosien se jinibb. Ko murrun se Atua nga jinibb marlesi derteren nen mijkie, derteren nen elep kele wor easi derteren se jinibb.

²⁶ Tasik ko jojik nir, kaprrorrmī ta daron nga Atua miveruse kami, kamivi jinibb sev ko? Renge no jinibb nir sete kami elep kamrongwos, sete kami elep derteren se kami otoo, ko sete kami elep kamivi jinibb nga marlelep.

²⁷ Ko Atua otobbobbue nanu nga jinibb ne iel ngatan marwera evi lenglengen, puloli nir nga marongrongwos parmanun. Ko otobbobbue nanu nga jinibb ne iel ngatan marok-werai nga derteren nen ejkie, puloli nir nga derteren ser martoe parmanun.

²⁸ Ko otobbobbue si nga jinibb ne iel ngatan marlesi erpe niser ejkie, ko otobbobbue sev nga jinibb ne iel ngatan marlesi arivi nanu nawon, nga puloli sev nga nir marlesi arivi nanu nga marlelep parini vajin parivi nanu nawon.

²⁹ Ngok niko sete jinibb san orongwose p̄irij melmelas renge no Atua.

³⁰ Ko kami, Atua okortoni pa kami tevi Iesu Kristo, ko elngi Iesu nga pivi norongwosien se kerr. Ololi rramon ko rramivi

jinibb sen, ko owli tweni kerr rramasi pa renge nololien nga marok-kai totkoni kerr.

³¹ Ko erpok, erpe Naul On muwrai, 'Jinibb nga mimrrēni p̄irij melmelas, p̄irij melmelas bbong suri nanu nga marres nir nga Numal muloli tevi ni.'

2

Pol owrai tweni mijen se Kristo

¹ Tasik ko jojik nir, nuvinuk ji kami seveling pa iok nga bowrai tweni nororrmmien se Atua nga womu miteptepi. Sete nuvinuk nga bowrai tweni renge rijen melmelas rrek renge nale norongwosien se jinibb, ejki.

² Ko daron nga meptevi kami, nuloli nororrmmien suk nga bemalie nanu jijle, ko nanu sansan kobbong bos̄pe suri, evi Iesu Kristo, tevi mijen sen renge nai pelaot.

³ Re wosenen derteren suk ejki rrese, tetajer numtutu ko nuririr.

⁴ Ko werweren suk sete eplari renge norongwosien se jinibb nga pirvei kami ren, ejki. Ko werweren suk evi nga piviseni derteren ne Nem̄in On,

⁵ nga puloli batu nosurien se kami sete puto renge nale norongwosien se jinibb, ko puto renge derteren se Atua kobbong.

Nem̄in se Atua okloli rramrongrongwose norongwosien se Atua

⁶ Ko ewretun, kem namok-wer visviseni nale norongwosien tevi nir nga nolor m̄itra pa renge mauren ne kalesia. Ko sete evi norongwosien nga mivi ne iel ngatan, rreknga derteren ne iel ngatan san, ejki. Derteren ngok nir para-jijki ko para-sij nabong sapon.

⁷ Ko norongwosien ma nga kem namwera tweni ngok, Atua sansan kobbong orongwose, ko esilveni nga jinibb nir sete parongwose. Evi nororrmmien nga Atua murrorrmī ko pa nga pia-susi kerr van mare, mian ko mia-loli iel ngatan.

⁸ Jinibb nga marlelep ne iel ngatan san sete orongwose norongwosien ngok. Ko poro parongwose, setemun mara-revji Numal ne melrin renge nai pelaot. Ko sete artor sweri norongwosien ngok.

⁹ Ko Naul On owra 'Atua elngi lilane nanu elep oto metmet tweni nir nga marmerrēni ni milep. Setewor jinibb arlesi nanu ngok nir renge meter, setewor arunge nale ner rege boror, ko setewor arrorrmī nir renge nororrmmien ser, ejki wor.'

¹⁰ Ko Atua elai Nem̄in On sen nga piviseni nanu ngok nir tevi kerr. Nem̄in On sen ngok orongwose p̄iskai nanu nga miteptepi. Nororrmmien se Atua nga jinibb sete murongwose p̄iskai, ko Nem̄in On orongwose p̄iskai kobbong.

¹¹ Ko evi nemî jinibb kobbong nga muto renga ni, orongwose piviseni nga mîernen erpese. Ko erpok kele, Nemîn On se Atua kobbong orongwose puwra tweni kele nga Atua erpese.

¹² Ko kerr kalesia, Nemîn nga rramlai pa sete evi nemîn nga miplari iel ngatan, ejki. Evi Nemîn nga Atua mukoni vini nga puloli rraprongwose nelaien nga marres nir nga Atua mîlai tevi kerr.

¹³ Ko erpok, nale nga namrij rengen sete eplari renga norongwosien se jinibb, ejki, ko namlai nale nga Nemîn On mivisviseni kem e. Ko namok-werai tweni nale were-tunen sen renga nale nga mîlai tevi nir nga Nemîn sen mîlik renger.

¹⁴ Ko si nga Nemîn On sete mîlik rengen, sete orongwose pîlai derteren lele nga Nemîn On mîlai. Ko mîernen meten orrorr nga sete mia-rongwose nanu nen nir, elesi erpe arivi nanu ne lenglengen, suri Nemîn On kobbong orongwose puloli jinibb purongwose nanu nen nir.

¹⁵ Ko jinibb nga Nemîn On se Atua mîlik rengen orongwose sev nga mîrres ko sev nga mîsij, ko sete jinibb mînij san orongwose puwra suri jinibb nga mîrpok san.

¹⁶ Erpe Naul On muwrai, 'Sete san orongwose norrorrmien se Atua, sete san orongwose pîsesre ni.' Ngok ewretun, ko kerr rramlai pa norrorrmien se Kristo osuw.

3

Jinibb se Atua

¹ Ko tasik ko jojik nir, rijen nga mîelai tevi kami seveling nga daron nga mîelik tevi kami, sete erpe rijen nga moro belai tevi nir nga Nemîn mîlik renger, ejki, nurij tevi kami erpe kami kamivi malum jinibb nawon ne iel ngatan, rrek erpe bipiwarreng nga mara-iak renga kalesia nosurien ser.

² Erpe kamsus malum, ko sete nurongwose belai nanen nga mîterter tevi kami, suri sete kamvitere. Ko kamirpok malum ejpari lelingenok.

³ Suri murru kami evijuri malum murru jinibb ne iel ngatan. Lol lelep muto renga kami, ko kamok-latlat lululweni kami. Ko ngok eviseni nga kamirpe malum jinibb ne iel ngatan, ko kamvijuri murrun ne iel ngatan, ko kamlik malum erpe jinibb ne iel ngatan marlik.

⁴ Daron nga kami sopor marwera, "Namvijuri Pol", ko mînij kele marwera "Namvijuri Apolos", ngok kamirpe jinibb mawos ne iel ngatan ko pa.

Jinibb ne majingen se Atua, majingen ser

⁵ Kaplesi. Apolos evi si? Ko inu Pol nuvi jinibb si? Komru kes nomorivi bbong jinibb ne majingen se Atua ko, nga nomor-pitevi kami vini kamosuri Kristo. Kerr sisamisi okloli majingen ngok bbong nga Numal mîlai tevi nga puloli.

⁶ Erpe inu mîeli dan ko morwi jelangin, ko Apolos evsi jelangin nen nir. Ko Atua kobbong ololi jelangin nen marmera mîrres.

⁷ Jinibb nga murwi ko jinibb nga mivsi orivi nanu nawon kobbong, ko batu majingen ngok oto ji Atua; suri ni ololi jelangin emra ko wenen otoa.

⁸ Ko inu nga merpe jinibb nga murwi jelangin, ko Apolos nga mirpe jinibb nga mivsi jelangin ngok, nomorsorsan kobbong; ko Atua pia-wuli komru pusorsan tevi majingen nga nomorloli.

⁹ Erpe komru nomorkorti tevi Atua nga noborloli majingen sen. Ko kami kamirpe orsel se Atua, ko kamirpe kele naim san nga ni mîmajinge.

¹⁰ Ko numajing suri ko wor derteren nga Atua mîlai tevik, ko numajing erpe metusu rrek jinibb nga mokmaje naim, ko nuli nabur nen. Ko jinibb mînij evini etajer tevi majingen nen. Ko jinibb si nga mîtajer renga majingen nen purongwos wore, ko pimmetmet pîrres erpese nga mîmajing renga naim ngok.

¹¹ Suri Atua elngi pa Iesu Kristo erpe esan rres kobbong nga mivi nabur nga murrul totoni naim mîterter, ko nabur nga mîrpok ejki kele mun nga marongwose parili.

¹² Renge naim ngok, sopor arongwose parmajinge renga narrong, jeli, ko niat nga mîrres, nga puloli putu pipriv. Ko jinibb sopor ma parlai nevu, wirip, ko botrro.^A

¹³ Ko nabong nga milep se Kristo piviseni majingen se jinibb jikle nir limjer. Renge nabong ngok nabb pia-throwrow lesi majingen totoklai se jinibb nir. Daron ngok, nabb pia-viseni limjer si majingen sen erres ko si majingen sen esij.

¹⁴ Poro jinibb san majingen sen erres ko otur jer malum daron nga nabb musuw e, ko morok pia-lai nowli majingen sen ko.

¹⁵ Ko poro san majingen sen pia-in nivniv, ko otur jabble joron ko pa osuw; ko otomori pîn tevi joron nir, ko Atua puloli puwlu lingi tevi nevren kiskis.

Kalesia nir arirpe naim se Atua

^A 3:12 Erpe iel, Pol ospe nevöt, ko murrun nga nir marili naim muto suri, ko kem namrieni erpe kerr rramîli naim iel, nga puloli mining ne nale se Pol piplari limjer.

¹⁶ Rrek kami kamrongwos pae nga kami kamirpe naim se Atua nga Nen̄in se Atua m̄ilik pa re kami musuw.

¹⁷ Ko poro san pulokloksi naim se Atua, ko Atua pulokloksi m̄nrenen. Suri Atua naim sen on elep, ko nik ko inu, kerr jijle rramivi naim se Atua.

Jinibb sete p̄irij melmelas suri majingen sen

¹⁸ Jinibb nga ni murrormi lweni murongwose rengo no jinibb nir pimmetmet ni p̄irres. Sete erres nga ni p̄ikrekrasi lweni ni. Erres ma ni pimteni lweni ni pirpe bbong lenglengen san, ko iok puloli norongwosien pivini jin vajin.

¹⁹ Suri norongwosien se jinibb ne iel ngatan nir, Atua elesi arirpe lenglengen kobbong. Naul On owra 'Atua ololi jinibb norongwosien ser arongsarr, ko aron luwi rengo norongwosien ser.'

²⁰ Ko Naul On owrai erpel kele owra 'Numal Atua orongwos pae norormien se jinibb ne norongwosien, ko owra arivi nanu nawon kobbong.'

²¹ Ko erpok, sete erres nga kapok-rij melmelas suri sev nga jinibb muloli, suri nanu jijle arivi se pa kami osuw.

²² Inu Pol tevi Apolos ko Pita, namivi se kami. Ko iel ngatan evi se kami, ko nanu ne mauren nga m̄irres ko derteren nga kapasi re mijen, ko nanu jijle nga marto pa, ko nanu jijle nga para-pelari kele, nir jijle arivi se kami.

²³ Ko kami, kamivi se Kristo, ko Kristo evi se Atua.

4

Aposol se Kristo nir

¹ Rrek erres kapmeteni kem pipel: namivi bbong jinibb ne majingen se Kristo. Atua elngi kem nga nabwera tweni majingen sen nga womu marto teptepi.

² Ko daron nga numal ne majingen m̄ilngi majingen rengo si nga pimmetete, norormien nga milep evi nga m̄nrenen pimmetmet ko wor p̄irres ko puloli suri ko wor sev nga numal sen muwrai tevi.

³ Poro kapmerreni kapwer lokloksi inu, rrek poro botur rengo no numal nir nga parwera suri inu majingen suk, ko sete nurormi evi nanu san, ko sete numtutue. Ko inu kele sete nurongwose bowra suri lweni inu majingen suk.

⁴ Renge inu nelesien suk numajing erres; ko sete nurongwos bowrai poro nuwretun iok rrenga ejki. Jinibb sansan kobbong pia-wera suri inu majingen suk, ngok evi Numal ne melrin.

⁵ Ko erpok, sete erres kapwera suri majingen se jinibb san rengo setewor mivi daron mawos nen. Rraptiriv ko

wor pijpari daron nga Numal pia-luwi e vini. Ko ni vajin pia-la tweni norormien ne nemalik nga jinibb marsilvenir parini limjer. Ko rengo daron ngok, Atua puloli nise jinibb pian mare pusorsan tevi lat nga m̄irres ren.

Meri Korin arkowkowrir elep

⁶ Tasik ko jojik nir, nuloli komru Apolos nomorvijuri nale ngok nir nga mowrair ngok, ko ngok kami vajin kamrongwos kaploli suri pirpe nga komru nomorloli pa. Ko niko kaprongwose vajin murrin ne nale ngel, nga muwra 'Kaprrul totkoni ko wor nale nga maruli pa musuw'. Sete erres nga kapsurōvi jinibb nga kamok-vijuri ko kaprrormi p̄isij suri jinibb m̄inij nir.

⁷ Si ololi kami kaman mare re jinibb sopor? Atua kobbong, suri ni ela nanu jijle tevi kami. Niko sete erres kamsursurōvi lweni kami, erpe kammeteni kami bbong kamsan kamloli.

⁸ Ia, ko nanu jijle nga kammerreni, kamtor swerir pa osuw? Ko kamimare pa rengo kalesia mauren se kami, a? Kamivi pa numal nir, a? Ko kem ejki rres wor, namto malum ngatan! O, ko poro evi weretunen kamivi numal, ko naβir pilep. Suri poro pipok ko kem kele nabkorti tevi kami, ko kerr jijle vajin rrapivi numal nir.

⁹ Ko nulesi Atua elngi kem aposol namvivitu jerjer. Namirpe jinibb nga marsuβe suri pa musuw nga naban vajin re mijen, rengo no jinibb jijle nir ko re kele no anglo nir. Namok-tur rengo no anglo ko no jinibb ne iel ngatan kele nga parmeteni nekaien se kem.

¹⁰ Suri namivi se Kristo, ololi jinibb armeteni kem erpe namivi lenglengen kobbong. Ko kami ma kamkorti pa tevi Kristo, ko kamwun saut pae norongwosien osuw. Kem nammelisna, ko kami ma kamterter! Jinibb arkulu wutan re kem, ko artori ma kami.

¹¹ Ko tetajer numer aji kem, ejpari lelingen ngel; ko tetajer nolo kem emesmes, ejpari lelingen ngel. Sunsun se kem armer-rerrerr. Jinibb arevji kem, ko sise kem ejkie nga nablik rengo.

¹² Nammajing elep tevi nevre kem nga nabla nanen se kem. Daron nga jinibb marij m̄isij tevi kem, ko namrij erres bbong surir. Daron nga marloli m̄isij tevi kem, ko kem sete namloli nanu san.

¹³ Daron nga marwer lokloksi kem, ko kem namrres bbong tevir. Jinibb armeteni kem erpe nanu nawon kobbong, ko evini ejpari lelingenok, nir arlesi kem namirpe nubus ne iel ngatan.

Wurru, kapvijuri murrin suk

¹⁴ Nuli nale ngok tevi kami, sete evi nga puloli kaprunge p̄isij, ejki, ko nga

puloli kaprongwose. Suri kamivi natuk nga memrreni kami milep.

¹⁵ Rrek delung jinibb elep wor niko nga marvisiseni kami renga mauren nga kamkorti tevi Kristo; ko jinibb sansan kobbong nga mivi tata se kami. Ko renga mauren kortien se kami tevi Iesu Kristo, inu le nuvi tata se kami nga m̄elai womu nosp̄en nga m̄irres tevi kami.

¹⁶ Ko niko nuwrai eterter tevi kami nga kapvijuri ko wor murrun suk.

¹⁷ Nukoni Timoti vinuk ji kami nga piwilwil se kami renga sel ngok nir. Renge kalesia mauren sen, ni evi natuk nga memrreni milep, nga mokterter renga majingen ngok nir. Ni piwer visviseni kami renga murrun nga mevijuri renga mauren nga mimerr nga miplari ji Iesu Kristo. Evi murrun nga mevisviseni jinibb e nir renga lat jille.

Pol norrrrmien sen nga pian kele Korin

¹⁸ Kami sopor arwera "O, setemun Pol mia-vini mia-lesi kerr", ko norrrrmien ser evan mare p̄elak.

¹⁹ Ko poro pivi marongen se Numal, ko sete mia-periv, ko bevinuk ko ji kami. Ko ðelesi vajin nir nen nga nolor mian mare nga marok-rij melmelas, poro derteren ser osorsan tevi nale ser.

²⁰ Suri batun vanu se Atua sete evini re rijen nawon, ko evini re derteren mawos se Atua.

²¹ Ko kami kammerreni p̄irpese? Inu bevinuk ðelesi kami ko bevrrali kami? Rreknga kaplinglingi norrrrmien se kami nga mian mare, ko bevinuk vajin bewilwil se kami renga murrun nga mumolmol p̄irpe nga memrreni kami milep.

5

Jinibb nga mivi kalesia san ololi nanu nga m̄isij san

¹ Ko nale san ermali nga muwra san re kami ngok ololi nanu nga m̄isij p̄erp̄er. Ololi nanu nga jinibb ne vare kele nir marlesi sete musorsan. Mernen sel nga m̄isij, ok-matur tevi tata sen mawos nesen sen tuwen.

² Ngok, suri sev norrrrmien se kami mok-an mare p̄elak? Erres p̄elak ma kami kapt̄ing ko kaprunge p̄isij suri nanu ngok. Ko erres nga kami kapwirr tweni jinibb nga muloli m̄isij p̄elak mirpok nga setemun pukorti tevi kami.

³⁻⁴ Ko ewretun nuvel lingi kami renga nibek, ko renga nen̄ik, nulik malum tevi kami renga. Ko renga nise Iesu Kristo Numal se kerr; nuwer lokloksi jile pa m̄ernen osuw renga sev nga muloli, erpe

nga inu nulik pa tevi kami. Ko daron nga kamkorti renga nise Iesu Kristo Numal se kerr; ko inu nukorti tevi kami renga nen̄ik; ko renga derteren se Iesu, ko

⁵ kami kaplingi m̄ernen van renga nevre demij. Ngok puloli niben pijijki, ko Atua p̄ia-la ma mauren tevi nem̄in renga nabong nga vitu daron nga Numal se kerr pia-wer sesesre lat nga puto suri tevi jinibb p̄etp̄eti nir ren.

Kami kaplai tweni ko wor jinibb nga marloli nololien tetajer

⁶ Ko sete erres nga kaploli norrrrmien se kami pian mare p̄elak p̄irpok. Kami kamrongwos pae nga is beblen kobbong orongwose puloli niv p̄ipau.

⁷ Kami kapsuw vajin re kamok-loli nololien, erpe kapwirr tweni ko pa is nga m̄itra, puloli kapirpe plaoa nga marloli niv ne nanen ne asien nga is mijki ren. Ko arevji pa Kristo erpe natu sipsip san nga marloli terai nanen ne asien e; ko niko nanu jille oto metmet pa.

⁸ Ko niko rraploli nanen ne asien, ko poro is nga m̄itra rreknga nololien ko murrun nga sete musorsan oto malum renga kerr; ko rrapla tweni, ko kerr rrapvijuri ko wor murrun nga muwokwok m̄irres ko mivi weretunen, puloli rrapirpe vajin niv nga is mijki ren.

⁹ Renge naul nga moli womu pa tevi kami musuw, nuwrai tevi kami nuwra "Sete kapkorti tevi jinibb nga marloli murrun nga m̄isij tevi nesevin."

¹⁰ Tok nuwrai bbong nir nga marwera marivi kalesia kobbong sopor ko marok-loli kele m̄isij mirpok. Suri jinibb nga sete marivi kalesia ko marok-loli mirpok owun saut. Nir nga marok-loli murrun nga m̄isij tevi nesevin, nir nga nolor mukul ko nga marmerrni lenglengen nanu nir; nir nga marvevna, ko nir nga marlot tevi atua m̄inij nir; nir kele owun saut. Ko poro kapmerreni sete kapkorti tevi nir ngok nabong sopen, ko kapiel lingi ko wor iel ngatan!

¹¹ Ko renga nale nga mowrai norrrrmien nen erpel: sete kapkorti tevi jinibb nga marwera arivi kalesia, ko marok-loli malum nololien. Poro parloli p̄isij tevi nesevin, rreknga nolor pukul, rreknga parlot tevi atua m̄inij, rreknga parok-worworsur, rreknga parok-minmin p̄elak rreknga parvevna. Sete kapan kapkorti tevi nir, ko sete kapan kaplik tevi jinibb nga marirpok nir nga kapaan tevir.

¹²⁻¹³ Sete evi inu majingen suk nga bewer sesesre lat nga puto suri tevi jinibb ne vare nir; Atua ko wor puloli nanu ngok. Ko poro san nga mukorti pa tevi kami muloli murrun nga m̄isij, ko kami kamrongwos

wore kapwer sesesre lat nga puto suri tevi m̄nien. Suri Naul On owrai owra 'Kami kapkur tweni jinibb nga mok-loli nololien tetajer, nga setemun pukorti tevi kami.'

6

Sete erres jinibb ne vare nir parsuḡe otvi lolaren se kalesia nir

¹ Kami kamok-loli erpese ko? Daron nga kami san m̄ilat tevi selen kalesia san, suri sev m̄ilai norrormien ngok tevi nir nga sete marivi kalesia nga parsuḡe otvi? Suri sev sete mimrreni puloli jinibb se Atua nir parsuḡe otvi?

² Rrek sete kamrongwose nga jinibb se Atua nir parwer sesesre lat nga puto suri tevi jinibb ne iel ngatan ꞑetꞑeti nir? Ngok, ko poro kamrongwos kapviter nga kapwer sesesre lat nga puto suri tevi jinibb ne iel ngatan nir, ko kamviter kele nga kapwer sesesre murrurun wowarrend kele pipok.

³ Rrek sete kamrongwose nga kerr rrapwer sesesre lat nga puto suri tevi anglo nir? Ko poro pipok, ko murrurun wowarrend re mauren ne iel ngatan emalum kobbong nga rrapuḡe otvi.

⁴ Ko ejki! Suri daron nga laten nga mirpok mimare, kamtur imare ko kaman kamwerwerai tasi kami tevi nir nga sete marivi kalesia, nga nir ngok ma parloli lilane.

⁵ Wi, sete kammanun suri nanu ngok? Erpese, kami san ejki nga norongwosien sen mutoe, nga murongwos puloli lilane laten ngok nga jinibb m̄ilat tevi tasin kele?

⁶ Sete erres nga kalesia eru porij latlat rengen kot nga jinibb ne vare nir parwera suri lat nga puto suri tevi nuru.

⁷ Ko nga laten nga maripok nir arto re kami eviseni limjer nga kamvitan pa osuw. Suri sev sete kamrongwos kaplinglingi kobbong san nga muwra puloli ꞑisij tevi kami? Suri sev sete kamrongwos kaplinglingi kobbong san nga muwra ꞑikrekrasi kami?

⁸ Ko ejki ma! Suri kami kobbong kamok-loli esij. Kami kobbong kamok-kerkerasi jinibb, ko sete jinibb nawon nir, ko jinibb nga marivi kalesia tasi kami.

⁹ Kapmetmet! Suri kamrongwos pae osuw nga jinibb nga marok-loli mirpok sete mara-sil van loloim rengen batun vanu se Atua. Sete kaprongsarr rengen norrormien. Jinibb nga mok-oloji nesevin, ko jinibb nga moklot tevi atua m̄inij, sete orongwos pian loloim rengen batun vanu ngok. Jinibb nga mimatur tevi nesen se jinibb m̄inij, ko nesevin nga muloli m̄isij tevi diwen sen, ko norman nga mokmatur tevi norman m̄inij kele, ko nesevin

nga mimatur tevi nesevin m̄inij kele, sete arongwose paran loloim rengen batun vanu se Atua.

¹⁰ Jinibb venao, ko jinibb nga mimrreni nanu milep, ko jinibb nga mok-minmin ko batun m̄ilengeng, ko jinibb nga mok-lokloksi nise jinibb m̄inij kele, ko jinibb nga muloli murrurun lele nga pivnae nevõt rengen, sete mia-van loloim rengen batun vanu se Atua.

¹¹ Tuwi kami sopor arirpok, ko lelingenok Atua errawe tweni nololien se kami ko ololi kamwokwok. Ololi kamon ko kamivi jinibb sen. Ololi kammomsawos erres rengen non suri nise Iesu Kristo Numal se kerr, ko rengen Ner̄in se Atua se kerr.

Kami kapmetmet nibe kami nga kapsusi nise Atua van mare

¹² Jinibb sopor arwera "O, erres kobbong nga rraploli nanu ꞑetꞑeti nir". Erres, ko sete nanu jille nga kerr rramrres ren. Rramrongwose rrapwera "O, erres kobbong nga rraploli nanu ꞑetꞑeti nir", ko sete rrapmarong te nga nanu ngok nir san pirvei tweni norrormien se kerr, ejki rres.

¹³ Jinibb sopor arwera "O, nanen evi nga pusongni depai kerr, ko depai kerr evi nga ꞑilai nanen." Ewretun, ko nanu ngok korti nuru, pian ko pora-suw nga Atua ꞑilai tweni nuru. Ko erpok kele, nibe kerr sete evi nga rrapoji nesevin e, ko evi nga rraporti puon nga rrapuruvi Atua rengen, ko Atua ꞑilai sev nga nibe kerr mimrreni.

¹⁴ Atua esa raji Numal Iesu rengen mijen, ko rengen derteren sen kele ni ꞑia-loli kerr kele rrapa-maur luwi kele rengen mijen.

¹⁵ Kami kamrongwos pae nga nibe kami erpe murrumuru nibe Kristo. Ko erpok, sete nurongwos bean bematur tevi nesevin ne sel. Kami kamrormi erres nga parkortoni murrumuru ne nibe Kristo san tevi nesevin nga mirpok? Ejki rres nawon!

¹⁶ Ko kami kaprongwose ko wor nga daron nga jinibb san mian mimatur tevi nesevin ne sel san, nuru orirpe nibe jinibb sansan kobbong. Ngok erpe nga Naul On muwrai muwra 'Nuru korti, nibe nuru pivi sansane'.

¹⁷ Ko si nga mukortoni mauren sen tevi Numal se kerr, ko nuru ngok erpe evi sansane ko pa.

¹⁸ Setemun kaploli murrurun nga m̄isij tevi nesevin. Nololien lele nga jinibb muloli sete olokloksi niben, ko daron nga jinibb muloli m̄isij tevi nesevin, ololi esij ko pa tevi niben, erpe olokloksi niben pa.

¹⁹ Erpese sete kamrongwose nga nibe kami evi naim se Ner̄in On? Ner̄in ngok, Atua elai pa elik tevi kami osuw, ko oto vajin ji kami. Ko niko nibe kami sete evi se kami, ko evi se Atua vajin.

²⁰ Suri Atua owli tweni pa kami osuw. Ko ngok kapmetmet nibe kami ko wor reнге sel nga pususi nise Atua pian mare.

7

Arsusi rongorngae totkoien

¹ Nuwra bowrai vajin tevi kami suri sev nga kamsusi daron nga kamulul vini jik. Ewretun, jinibb nga sete mītakai nesevin ololi murrun nga mīrres p̄elak.

² Ko suri jinibb elep arok-loli esij, erres ma nga norman, nesen sen putoe, ko nesevin, diwen sen putoe.

³ Ko norman pukorti ko wor p̄irres tevi nesen sen reнге murrun nga musorsan ne totkoien nga morlik korti rengen, ko nesevin kele puloli pipok kele tevi diwen sen.

⁴ Ko sete nesevin kis emetmete niben, ko diwen sen kele.

Ko reнге murrun ngok kele, sete diwen sen emetmet kis ni niben, ko nesen sen kele.

⁵ Sete kopor-musmuse kamru lululwi tevi kamru. Ko poro kamru korti komor-marong, orongwos kopor-ivel ngangasu mun kamru sopen nga kopor-lot mun sopen, ko erres, mian ko vitunen kopora-vini ko wor nga kopora-korti luwi kele. Poro pijki ko demij orongwose p̄iskai sel nga p̄ikrekrasi kamru rengen, suri sete komorterter.

⁶ Nale ngok nga mowrai tevi kami sete nuwra nga kaptotko ko wor, ko nuwra bbong nga poro pipok kamtotko, ko kapvijuri lat nga mowrai ngok.

⁷ Poro jinibb jijle sete partotko, ko pipre inu kobbong, ngok erres p̄elak. Ko Atua elai derteren lele tevi jinibb. Elai derteren ne norrorrmien tevi san nga puloli nanu san, ko elai derteren ne norrorrmien tevi san nga puloli nanu san.

⁸ Ko tevi nir vajin nga sete martotko wor, ko tevi nir nga diwen ser marmij lingir, nuwrai tevi kami, erres nga kami kaplik pipre inu kobbong.

⁹ Ko poro kami san purnge nga nolon mimrreni lenglengen wor nga putotko, ko erres, putotko. Erres nga putotko asi nga poro p̄ilik nawon ko tetajer nolon ok-venae nesevin.

¹⁰ Ko norrorrmien san ngel, sete evi nga inu kis ko evi se Numal, ko pian ji nir nga martotko pa musuw. Ko owrai owra 'Nesevin sete p̄ilinglingi diwen sen.

¹¹ Poro nesevin p̄ilinglingi diwen sen, ko p̄ilik nawon pipok, nga sete putotko kele; rrek poro pijki ko pulwi ma pukorti tevi diwen sen kele. Ko norman sete p̄ilngi kurtweni nesen sen.'

¹² Tevi kami m̄inij nir vajin, ngel evi norrorrmien suk lebbong, sete evi se Numal:

poro kalesia norman san nesen sen otoc nga sete mivi kalesia, ko vinnen emarong nga p̄ilik tevi m̄nernen, m̄nernen sete p̄ilngi kurtweni.

¹³ Ko poro kalesia nesevin san ototko tevi norman nga sete mivi kalesia, ko m̄nernen emarong nga p̄ilik tevi, vinnen sete p̄ilingi kurtweni.

¹⁴ Suri norman nga sete mivi kalesia ngok, on re no Atua daron nga mukorti m̄irres tevi nesen sen; ko nesevin nga sete mivi kalesia ngok kele, on kele re no Atua daron nga mukorti m̄irres tevi diwen sen. Poro sete pipok, ko bipi se kamru nir parirpe bipi ne vare kobbong. Ko ejki, bipi ngok aron vajin.

¹⁵ Ko poro nuru tuwen nga sete evi kalesia owra pivel lingi nuru tuwen nga mivi kalesia, ko kalesia nen sete p̄iwer ore, p̄ilinglingi kobbong. Ko kalesia norman rreknga nesevin ngok pimarong bbong nga pivel lingi, sete nolon p̄isij tevi suri. Suri Atua everus kerr nga rraplik reнге liken nga mumolmol m̄irres.

¹⁶ Poro nik kuvi nesevin san, ko suri sev kurrorrmi nga sete kurongwose kuplai se diwen som nga nabong san pivini pivi kalesia? Ko poro nik kuvi norman san, ko suri sev kurrorrmi nga sete kurongwose kuplai se nesen som nga nabong san pivini pivi kalesia?

Kaplik pipre nga Atua miveruse kami

¹⁷ Kerr sisamis purrul totkoni ko wor p̄irres murrun nga Numal Atua m̄ilai tevi kerr daron nga miveruse kerr, ko rraplik malum reнге liken nga rramlik pa ren womu. Ngok evi nale nesesreien nga nomok-visviseni tevi jinibb nga marok-korti reнге Naim On jijle.

¹⁸ Poro jinibb san pian pa re bae daron nga Atua miveruse, ko sete erres nga ni pian puloli lesi p̄irieni kele nanu ngok. Ko poro san setewor ean re bae daron nga Atua miveruse, ko sete ni pian re bae kele.

¹⁹ Suri poro jinibb pian re bae rreknga poro sete pian, osorsan kobbong, evi nanu nawon. Ko nanu nga milep nen evi nga jinibb pivijuri ko wor nesesreien se Atua.

²⁰ Ko poro rrapivi demij maur rreknga jinibb nga mivēl sisarow daron nga Atua miveruse kerr, ko erres nga rraplik pipok kobbong.

²¹ Rrek kuvi demij maur se jinibb san daron nga Atua miveruse nik, ko erres kobbong, sete kuprorrmi. Ko poro sel san oto nga kurongwos kupini kupivi jinibb nga mivēl sisarow, ko erres, kuplai, ko kupiel sisarow vajin.

²² Daron nga Kristo miveruse jinibb san nga mivi demij maur, ni erpe evel sisarow ko vajin reнге Kristo. Ko erpoc kele,

poro Kristo piveruse jinibb san nga mivel sisarow, ko m̄nernen pivini ko vajin pirpe demij maur se Kristo.

²³ Ko renge iok, Atua owli tweni pa kerr osuw, ko sete emrreni nga rrapini rrapivi kele demij maur kele suri murrun nir se jinibb.

²⁴ Ko niko, tasik ko jojik nir, renge kalesia mauren se kerr, kerr sisamis p̄ilik malum ko wor renge liken nga m̄ilik ren womu, daron nga Kristo miveruse.

Arsusi suri sel se nir nga sete martotko ko nir nga diwen ser marmij lingr

²⁵ Ko kamsusi kele suri nir nga sete martotko wor. Sete nutor sweri nale san nga miplari ji Numal se kerr nga musp̄e suri. Ko bowrai bbong norrrormien suk. Ko suri Numal se kerr okwilwil se inu renge nolon nga m̄irres, ko kaposuri ko wor nale suk.

²⁶ Rrek erres nga jinibb parlik suri mun marlik, suri lelingenok evi daron nga m̄itterter san.

²⁷ Nik nga kumtotko pa musuw, sete erres nga kuptor oti totkoi en som. Ko nik nga sete kumtotko wor, sete erres nga kuptotko kele.

²⁸ Ko poro kuptajer renge norrrormien nga kumrreni kuptotko, ko ngok sete evi nololien. Ko poro nesenwarreng san putotko, ko ngok sete evi nololien. Ko suri nanu wovarreng tetajer arok-vijajeng re jinibb nga martotko, niko nuwra erres nga parsan kobbong parlik.

²⁹ Tasik ko jojik nir, nale nga mowrai ngok erpel le: Suri daron setemun mia-periv, ko erres nga jinibb nga mutotko p̄ilik ko pa pirpe jinibb nga sete mutotko.

³⁰ Ko jinibb nga mokting, erres nga p̄ilik pirpe jinibb nga dengen mijki jin. Ko jinibb nga mokir, erres nga p̄ilik pirpe jinibb nga sete mokir. Ko jinibb nga mok-wulwul, erres nga p̄ilik pirpe jinibb nga nijor sen mijkie.

³¹ Ko jinibb nga mok-majing suri norrrormien ne iel ngatan, erres nga sete puloli nanu ngok nir parevei totkoni. Nomok-rij erpok suri otomori le pa iel ngatan tevi murrun lele nen nir parjijki.

³² Inu numrreni lenglengen e nga sete nanu san pirvei tweni norrrormien se kami. Suri jinibb nga sete mutotko orrorrmi wor elep suri majingen se Numal nga puloli Numal sen p̄ir rengen,

³³ ko jinibb nga ma mutotko ok-rorrrmi elep suri nanu ne iel ngatan, ko owra pipej sel nga puloli nesen sen p̄ir rengen.

³⁴ Ko norrrormien sen ngok evijuri sel eru. Ko erpok kele, nesevin nga sete mutotko rreknga nesenwarreng, ok-rorrrmi elep suri majingen se Numal se kerr.

Emrreni nga niben tevi norrrormien nuru korti porwokwok nga porivi se Atua. Ko nesevin nga ma mutotko ngok epejpej sel nga puloli kobbong diwen sen p̄ir.

³⁵ Nomok-werai nale ngok nir nga par-wilwil se kami, ko sete numrreni parrowsi kami, ejki. Ko numrreni nga kapvijuri murrun nga musorsan ko kaploli majingen se Numal nga sete norrrormien san pirvei totkoni kele kami.

³⁶ Ko poro nesevin san nuru norman san orloli rijrijen nga ormerreni portotko, mian ko norrrormien sapon eplari kele nga muloli porlik sisamis mun, setewor portotko. Ko mian ko poro norman nen elesi nga mokloli murrun sapon nga sete m̄irres p̄elak tevi selen ngok, mian ko orrorrmi kele nga erres portotko, rrek erres ma portotko, erpe puto re norrrormien nga ni mimrreni. Ko ngok sete evi nololien ko.

³⁷ Ko poro jinibb san niko nga selen mutoe, nga sete san owraie, ko renge norrrormien sen bbong orrul totoni nolon nga sete putotko, ko norrrormien sen omolmol ko setewor ololi esij tevi selen, ko ngok morok ololi erres ko.

³⁸ Berij oti nale suk vajin: si nga mutotko tevi selen ololi erres. Ko si nga sete mutotko tevi selen ololi erres kele wor.

³⁹ Ko nesevin nga mutotko pa sete orongwose puwlu lingi diwen sen daron nga mimaure malume, ko daron nga diwen sen mimij vajin ko orongwose pia-lik ji jinibb m̄inij. Ko diwen sen nen pivi ko wor kalesia.

⁴⁰ Ko renge norrrormien suk, poro putur nawon ko rrek ni p̄ir kele wor. Nurrorrmi Nem̄in se Atua ko elai norrrormien ngok tevik.

8

Nanen nga marsulie van ji Atua m̄inij nir

¹ Ko erpese re vison nga marsulsul lingi mijpon tevi atua m̄inij nir? Erres re kerr kalesia rrapurroi, rreknga ejki? Ko nale nga kamok-werai ngok, nga kerr jijle norongwosien se kerr otoa, ewretun kobbong. Ko norongwosien ngok ololi norrrormien se jinibb ean mare ko okowkowi e kobbong. Ko merrenien ma ololi mauren ser evini mare erres.

² Jinibb nga murrorrrmi nawone ni orongwos, sete orongwos alje rragrag nanu san renge norongwosien weretunen.

³ Ko jinibb nga ma mimrreni lenglengen Atua, Atua orongwos pae m̄nernen erres osuw, ko evi selen nga m̄irres.

⁴ Ko erpese vajin re iok, re nanen nga marsuli van ji atua m̄inij nir? Rramrongwose pa nga atua m̄inij ngok nir sete arivi weretunen, ko Atua nga ma kerr rramlot tevi evi weretunen jerjer nga m̄isan rres kobbong.

⁵ Ko poro atua nga marirpok nir pilep nga jinibb marok-lot tevir nga marto mare rreknga re ngatan, ko pirpese ko? Rrek atua elep ko numal elep nga marirpok.

⁶ Ko kerr nga rramivi kalesia rramrongwose nga Atua se kerr sansan kobbong, ngok Tata se kerr nga mauren ko nanu jijle marivel jin vini. Ko Numal se kerr nga sansan kobbong, evi Iesu Kristo nga muloli nanu jijle nir ko muloli kerr rrammaur.

⁷ Ko sete jinibb jile arongwose nanu nga mivi weretunen ngok. Jinibb sopor nga lelingenok marivi kalesia, tuwi ko arok-lot tevi atua m̄inij nir renge sia elep. Ko evini ejpari lelingenok, daron nga marurroi nanen nen, ko arunge erpe arosuri malume atua m̄inij nen nir, suri norrorrmien ser setewor eterter, ko arunge erpe arok-loli nanu nga sete m̄irres.

⁸ Ewretun, nanen evi nanu nawon. Nanen sete arongwose pirvei kerr nga rrapruj mori Atua, ejki. Sete rramrongwose rraprorri jabble nanu san poro sete rrapurroi nanen ngok; ko erpok kele poro rrapurroi nanen ngok, sete rramrongwos rraprorri sweri nanu san rengen.

⁹ Iok ewretun ko, ko kupmetmet re nanu san ngel: Tukrorri nanen san nga marsuli pa tevi atua m̄inij, ko selem san nga nosurien sen sete eterter tilesi ko ni kele tuloli tirpok ko tivitan van re nololien vajin.

¹⁰ Suri ni nosurien sen sete eterter, ko elesi nik nga tetajer komok-wera norongwosien som otoo, kukorti kele rengen nanen nga marloli tevi atua m̄inij nir, ko ngok tirvei norrorrmien sen nga tuloli ni tukorti kele renge kele nanen ngok, rengen norrorrmien sen nga sete m̄irres.

¹¹ Ko norongwosien som ngok tuloli vajin m̄ier nga nosurien sen sete m̄iterter ngok tijijki suri, ngok tasim nga Kristo mimij suri.

¹² Ko rengen murrun ngok, tomok-loli tisij tevi tasim ko tomok-lokloksi nga norrorrmien sen sete titerter, ko erpok tomok-loli tisij kele tevi Kristo kele.

¹³ Poro kalesia tasik rreknga jodik orrorrmi nga ololi nololien daron nga murroi nanen nga marloli tevi atua m̄inij ngok nir, ko inu ma ejki, sete inu mea-urroi nanen ngok nabong san, suri sete numrreni bololi tasik pivitan rengen nololien.

Pol evi Aposol ko setewor ela nanu jijle nga moro pilai

¹ Erpese? Kamrroormi inu sete nuvel sisarow? Kamrroormi sete nuvi Aposol? Kamrroormi sete nulesi metek e Iesu ngok nga mivi Numal se kerr? Erpese? Kami ko kamivi wenen rengen majingen ngok nga mololi tevi Numal se kerr.

² Rrek jinibb sopor arlesi inu erpe sete nuvi Aposol, ko kami ma ejki. Suri mauren se kami nga kamkorti pa tevi Numal se kerr eviseni erres pelak nga inu nuvi Aposol.

³ Ko ngel evi weli nale suk daron nga jinibb marwera parwer lokloksi inu, nuwra:

⁴ Erpese? Kamrroormi inu sete nurongwos bela nanen rreknga nuwi pivi nowli majingen suk?

⁵ Ko kamrroormi inu nusan sete erres nga belesi nesen suk san nga mivi kalesia ko piptevik re nivelen suk nir, pirpe Pita, ko aposol nga ngok nir, ko tasi Numal Iesu nir marloli?

⁶ Kamrroormi erres nga komru Banapas kobbong noborok-pelak nga nobor-tor sweri nijor ko nanen nir rengen mauren se komru?

⁷ Sete pa jinibb nga mivi jinibb ne nuval san owli lweni kele sel sen nga pian pipalpal. Ko sete pa jinibb san orwi orsel san ko sete ok-an nga pilai wenen rengen orsel nen; ko sete pa san owngani nawon buluk ko sete orroi rragrrag san.

⁸ Kamrroormi norrorrmien ngok eplari rengen mauren se kerr kobbong? Ejki rres. Oto kele wor rengen nale nesereien se Moses.

⁹ Suri Moses oli pa rengen nale nesereien nen owra 'Daron nga kamlai buluk nir nga paran parbböt jijreni batu wit nir nga parlai tutweni jelingan nir, sete kapkai totkoni jingor, ko kaploli ko wor parurroi wit ngok nir.' Erpese, Atua ok-rroormi buluk ko nir?

¹⁰ Ejki, nale ngok ejpari kerr, ko emawose kerr. Jinibb nga murwi ko jinibb nga pilai wenen, nuru korti porloli wor majingen se nuru ko, suri norrorrmien se nuru oto nga pora-korti rengen wenen nga pia-pelari.

¹¹ Majingen se kem erpe namruwi orsel san ji kami nga nanen nen mivi kalesia mauren. Ko erpese? Erres kobbong nga nablai nanen rres ji kami nga kaplai tevi kem nabrooi?

¹² Kammarong bbong nga jinibb sopor parok-la nanen ji kami, ko kem ma namivi jinibb mawos nga moro nablai nanen ji kami. Ko kem sete namloli erpok, ejki. Nammusus nabon tertere nanu pirpok, suri tulokloksi ni ne nospen nga m̄irres se

Kristo. Sev nanu nga murrow nga mivini, ko namwosi ko pa.

¹³ Ko kami kamrongwos pae nga jinibb nga martori majingen renga Naim On arlai nanen ser iok. Ko jinibb nga marok-revji nanu rrum nir nga parlai van loloin renga lat ne sulsulen, arok-urroi kele sopen renga nanen ngok nir.

¹⁴ Ko renga murrun ngok, Numal se kerr elngi nale, owra jinibb nga marok-werai tweni nospen nga mürres sen, para-lai ko wor nowlir suri.

¹⁵ Ko nurongwos bololi pipok nga belai nowlik, ko ejki, sete nuloli. Ko sete nuspe nowlik erpel nga bevijajenge. Rrek erres nga inu bemij kobbong, asi nga poro san pila tweni nanu ngel nga nurnge erres ren, nga sete marwulik re majingen suk.

¹⁶ Sete nurongwose berij melmelas suri nomok-werwer renga nale se Kristo. Suri ngok evi wor majingen nga bololi ko. Ko poro sete bewerwer tweni nospen nga mürres ngok, ko ngok pisij pilep re inu.

¹⁷ Poro inu bbong belngi inu nga bololi majingen ngel, ko orongwose bowra 'O, rrek belai nowlik sopen rengen.' Ko suri sete inu nulgik, ko Numal suk ko wor elngi inu nga bevi demij maur sen.

¹⁸ Ko nowlik evi bbong nga bewerwer tweni nospen nga mürres van ji jinibb nir nga sete nir san muwli tevik. Suri sete nuloli norrorrmien suk nga belai nevöt nga moro belai suri nospen nga mürres ngok. Re murrun ngok ko pa erpe evi nowlik ren.

Pol erpe demij maur se jinibb nir

¹⁹ Inu Pol nuvel sisarow. Sete nuvi demij maur se jinibb san. Ko inu kobbong nulngi inu nuvi demij maur se jinibb nir, nga bervei nir pilep parini parivi jinibb se Kristo.

²⁰ Nuvijuri murrun se mēri Isrel nir nga bervei nir parini parivi jinibb se Kristo. Ewretun sete nulik re nevre nale nesereien se Moses, ko renga no mēri Isrel nir nga marlik re nevre nale sen, inu nuloli erpe inu kele nulik rengen, nga bervei nir parini parivi jinibb se Kristo.

²¹ Ko sete nulik ngasu re nesereien se Atua erpe jinibb ne vare nir, ko nulik re nevre nesereien se Kristo; ko renga no jinibb ne vare nir nga sete marlik re nevre nale nesereien se Moses, nuloli erpe nga inu kele sete nulik re nevre nale nen, nga bervei jinibb ne vare ngok parini parivi jinibb se Numal.

²² Ko renga no jinibb nga derteren ser mijkie, nuloli erpe inu kele derteren suk ejkie, nga bervei nir parini parivi jinibb se Kristo. Renga no jinibb lele nuloli erpe nuvijuri kele kobbong murrun nga muto

jir, nga bevijuri sel totoklai nga bewilwil tama se nir sopor.

²³ Nuloli nanu ngok nir suri nospen nga mürres ngok, nga puloli borongwose botor sweri beblen renga nanu nga marres renga nospen nga mürres ngok.

Rrapwolu ko wor piterter nga rraplai nowli kerr

²⁴ Kamrongwos pae murrun ne woluen. Jinibb elep arwolu, ko nir sansan kobbong orongwos pilai nowlin nen. Ko erpok kele, kapwolu ko wor piterter renga woluen se kami ngok nga kaplai nowli kami nga Kristo pia-lai.

²⁵ Jinibb ne woluen orongwose piplak daron pilep ko wor nga pia-lai vajin nowlin. Ko nowlin nen puto beblen kobbong. Ko kerr ma erpe nga rramwolu tweni rraplai nowlin san nga sete mia-jijki nabong sopen.

²⁶ Iok ko ololi nga numrreni bowlu nunsu wor lat nga woluen musuw e. Iok ko ololi nurpe kele jinibb san nga mian renga boksing nga sete ewirr sarsarr nevre.

²⁷ Ko erpok nomok-rrul totoni nibek eterter erres, nga puloli nibek pumolmol ko sete pirveik van lat nga müsij. Inu nuverus pa jinibb elep nga parini parivi jinibb se Kristo, ko esij poro nga inu vajin bejjiki.

10

Sev nga miplari ji mēri Isrel tuwi evi nga puwni kerr

¹ Tasik ko jojik, nuwra kaprongwose sev nga miplari ji apu se kem nir ne tuwi re daron se Moses. Nir jijle arteptepi renga namol re nabor nen, ko sete nanu san olokloksir. Nir jijle arivel bbong belar ko arivel otvi dis nga musongsong.

² Ko renga dis ngok rreknga nabor ngok, nir jijle arkorti tevi Moses, erpe arpaptaese kerr lelingenok rramkorti tevi Kristo.

³ Nir jijle arurroi nanen ngok mana nga Atua mlilai tevir.

⁴ Ko armini kele bbong nuwi sansan ngok ko nga Atua mlilai tevir, suri arlai nuwi renga nevöt nga milep nen. Nevöt nen erpe Kristo, nga miptevir tetajer.

⁵ Ko nir eleplep Atua sete eir rer, niko muloli armij renga lat karkar renga lolo merwer.

⁶ Ko nanu ngok nir arivi nga parsusur metue kerr ko nga parwuni kerr. Sete erres nga nolo kerr pivnae nanu karkar nir pirpe nir ngok ne tuwi marloli.

⁷ Sete erres rraplot tevi atua minij nir, pirpe nir ngok ne tuwi sopor marloli. Naul On ospe suri nir owra 'Nir ngok aran arkorti nga maraan ko marminmin, mian

ko artur mera ko arloli detnijen nga sete marres.’

⁸ Sete erres rraploli murrun nga m̄isij tevi nesevin pirpe nir ne tuwi marloli, ko mian ko nir evi nuvarrerleng ngavöl eru drromon itul (23,000) marmij reнге nabong sansan.

⁹ Sete erres rraprrowrrowe Numal se kerr pirpe nir ne tuwi sopor marloli, mian ko num̄et nir maraji pinpinir.

¹⁰ Ko sete erres nga rraploli nale pirpe nir ne tuwi nir marloli, mian ko anglo nga mok-revji pini jinibb nir evini erevji pinpinir.

¹¹ Nanu karkar nga nir ngok ne tuwi nir marok-tor swerir ngok arivi nga parviseni kerr, ko aruli jiljilwren ser reнге naul ngok nga puwni kerr lelingenok. Suri rrammaur jipari daron san nga otomori le pa nabong nga vitu pivini.

¹² Niko si nga orrorrmi otur eterter, pimetmet ko wor p̄irres nga sete pivitan kele.

¹³ Nanu karkar nga marok-rrowrrowe kami arsorsan kobbong tevi nanu karkar nga marok-rrowrrowe kalesia jille nir kele. Ko Atua orrul totkoni rijrijen sen, ko ni sete mia-marong nanu san nga m̄iterter p̄elak purrowrrowe kami; ko re daron mawos nga nanu nga mirpok muloli lesi nga purrowrrowe kami, Atua puloli sel san nga kami kapasi reнге nanu ngok nir.

¹⁴ Selek nir, sete erres kapsurövi atua m̄inij nir.

¹⁵ Nomok-rij tevi kami erpok erpe kami kamrongrongwos pae, ko kaprorrmi ta poro nuwrai erres rreknga esij.

¹⁶ Ko erpese reнге biles ngok ne nanen se Numal nga rramwerai erres wor tevi Atua suri? Daron nga rramminmin reнге biles ngok, ko rramivi sansan tevi Kristo reнге drran nga m̄iseser. Ko erpese kele reнге niv ngok nga rramok-rroi? Daron nga rramurroi niv ngok, ko rramivi sansan tevi Kristo reнге niben.

¹⁷ Kerr elep, ko niv sansan rres kobbong. Ko kerr jille rramurroi niv ngok, ololi erpe kerr jille rramivi niben sansan kobbong.

¹⁸ Kaprorrmi ta murrun ngok se m̄ieri Isrel, erpese reнге jinibb nga marurroi nanu rrum nir nga marevjr nga parloli sulsulen van ji Atua? Nir ngok arivi gortien sansan kobbong reнге sulsulen ngok.

¹⁹ Ko re devjen se nir nga marloli sulsulen van ji atua m̄inij nir, inu sete nuwra atua m̄inij ngok nir arivi Atua weretunen, ejki, ko sete nuwra viso nanu rrum nga marevjr nga parloli sulsulen van ji atua m̄inij nir evi nanu san, ejki.

²⁰ Ko norrorrmien suk erpel ma: nir arok-loli sulsulen tevi demij nir, sete arloli

tevi Atua. Ko numusus lenglengen nga kapkorti tevi demij nir.

²¹ Sete kamrongwose kapminmin reнге biles se Numal se kerr ko reнге biles se kele demij, ejki. Ko sete kamrongwose kaplik nga kapurroi kele nanen nga Numal m̄ilai ko nanen se kele demij, ejki.

²² Erpese? Kamwera kaploli Atua nolon pilelep suri sev nga kamloli ngok? Kamrorrmi rrek dert-eren se kami easi wore ni derteren sen?

²³ Ko kamok-wera “O, rramrongwos rraploli nanu jille nga sete san orongwos p̄iwer ore kerr ren.” Ewretun, ko sete nanu jille erres nga rraploli, ko sete nanu jille orongwose piwilwil se kerr.

²⁴ Sete erres jinibb nga mivi kalesia san pipepej sel nga piwilwil se bbong ni ren-gen, ko rrapepej ma sel nga purongwose piwilwil se sele kerr nir.

²⁵ Kamrongwos kaproi kobbong vison nga marsulsul lingi mijpon tevi atua m̄inij nir nga kamwuli ji jinibb nga marok-wulwule, nga sete norrorrmien se kami puwlu karkar suri.

²⁶ Suri Naul On owrai owra ‘Ngatan ngel ko nanu jille nga marto reнге arivi se Atua nga mivi Numal se kerr.’

²⁷ Poro jinibb san nga sete muosuri Atua piveruse kami nga kapan kapaan reнге naim sen, ko erres kobbong kamrongwose kapan ko kapurroi nanu jille nga m̄ilai nga sete nolo kami puwlu karkar suri nanen sev nga marto.

²⁸⁻²⁹ Ko poro san puwrai puwra “O vison ngok evi ne nanu rrum san nga marloli sulsulen e van ji atua m̄inij nir. Sete erres rraproi.” Ngok kapvijuri nale se morok, ko sete kapurroi vison ngok. Suri nik nolom erres bbong, ko m̄ernen ma nolon tuwlu karkar suri. Ko poro kami san pususi kele re iok, puwra “O, borroi le! Inu nuvel sisarow. Suri sev bevijuri kele norrorrmien se jinibb m̄inij?

³⁰ Poro bowra erres tevi Atua suri nanen suk, sete san orongwose p̄iwer lokloksi inu suri nanen suk nga mowra erres tevi Atua suri.”

³¹ Iok erres kobbong, ko nanu san ni le: sev tama san nga kamurroi rreknga kammini rrek nanu tama san nga kamloli, tetajer kapsusi ko wor nise Atua pian mare suri.

³² Ko sete kapok-loli nga daron sopon m̄ieri Isrel rreknga jinibb ne vare nir rreknga jinibb ne kalesia se Atua nolor parok-sij suri murrun se kami.

³³ Tetajer reнге inu murrun suk nomok-p̄elak nga bololi jinibb nir parir bbong reнге sev nga mololi. Sete nuloli nanu nga p̄irres re inu kis, ejki. Nuloli nanu nga p̄irres re jinibb m̄inij nir nga puloli sel nga

Ĥelai mauren tevir. Ko kami kaploli surie pirpe inu mololi.

11

Murrun mawos se nesevin re daron nga marwerwer e

¹ Kapvijuri murrun suk pirpe nga mevi-juri murrun se Kristo.

² Nusrövi kami suri kamok-rrorrmu teta-ger inu ko kamvijuri erres nevisvisenien suk nga mevisviseni kami e womu.

³ Ko numrreni kaprongwose Ĥirres nanu san, ngel: norman ean mare wor easi nesen sen, ko Kristo ean mare kele easi jinibb jijle, ko Atua ean mare kele wor easi Kristo.

⁴ Ko daron nga jinibb san mulot rreknga muwra tweni sev nga Atua mĭlai tevi, ko musunsun ore batun, mĕrnen ololi Kristo non ewis ko. Suri renga murrun se kerr; jinibb san pusunsun ore batun nga piviseni nga jinibb san ni ko nga mian mare re ni. Ko ejki, Kristo esan rres ean mare re kerr.

⁵ Ko daron nga nesevin san mĭwerwer rreknga mulot ko sete osunsun ore batun, nesevin ngok ololi diwen sen non ewis ko. Suri ni pusunsun ko wor, nga renga murrun se kerr miviseni nga diwen sen ni ko ean mare easi re ni. Poro pijki, ko erres ni pimanun pirpe nesevin san nga markiri batun mumus ĤetĤeti. (Ngok nesevin ne sel nir arok-loli.)

⁶ Ko poro nesevin san pumusus pusunsun ore batun, ko erres ma nga pitvei tweni jomro batun ĤetĤeti. Ko poro pimanun nga pitvei rreknga Ĥikri pumus, ko erres ma nga ni pusunsun ore kobbong.

⁷ Ko sete erres nga norman pusunsun ore batun, suri ni erpe Atua, ko eviseni nosrövien se Atua. Ko nesevin ma eviseni nosrövien se norman.

⁸ Suri tuwi Atua sete elai nesevin nga muloli norman e, ko elai ma norman nga mĭmajing nesevin e.

⁹ Ko Atua sete ololi norman nga piwilwil se nesevin, ejki. Ololi nesevin nga piwilwil se norman.

¹⁰ Ko renga iok, osorsan kobbong nga nesevin pusunsun ore wor batun ko, nga piviseni tevi anglo nir nga elik renga nevre diwen sen.

¹¹ Renge kalesia mauren ngok, nesevin sete orongwos pisan puloli nanu san, ko norman kele sete orongwos pisan puloli nanu san. Nuru kes pormajing kokorti ko wor.

¹² Suri ewretun, tuwi Atua emajing nesevin re norman, ko lelingenok norman eak vajin renga nesevin. Ko nanu jijle arpelari wor ji Atua.

¹³ Kami kaprrorrmu ta, bowrai lweni kele sapon: Erres nga nesevin putur re no jinibb nir ko pulot van ji Atua nga sete pusunsun ore batun, rreknga ejki?

¹⁴ Ko murru kerr muto suri eviseni nga daron nga jomro batu norman san mipriv Ĥelak ko evi nanu nga mĭsij.

¹⁵ Ko nesevin ma san, daron nga jomro batun mipriv, ko erres Ĥelak, evi nanu san nga Atua mĭlai tevi nga pitawi ore batun.

¹⁶ Ko poro sopor parmerreni parok-lat malum suri nanu ngok, ko ngel evi nale suk tevir: kem sete namok-loli murrun mĭnij kele, ko nir ne Naim On jijle nir se Atua sete arongwose parloli kele.

Sopor arloli murrun nga mĭsij daron nga markorti re nanen se Numal se kerr

¹⁷ Ko re nanu san ngel, rrek sete bosrövi kami. Suri daron nga kamkorti lat sansan, ko liken ngok se kami sete ewilwil se kami, ko ololokoksi bbong kami.

¹⁸ Ko nanu nga womujnen nga nuwra bowrai erpel: nurnge nale nga daron nga kamini kamkorti lat sansan, ko kamlatlat lululweni tevi kami, ololi kamsisamis. Ko nurongwose nga nale ngok ewretun sapon.

¹⁹ Ko nga kamsisamis mirpok eviseni limjer re kami sisamis si nen ololi osorsan.

²⁰⁻²¹ Ko daron nga kamkorti lat sansan nga kapurroi nanen se Numal se kerr; sete kamtori weretune, suri kamsisamis suri nanen se kami sisamis, ko sete kamtotrong suri lat nga moro kaputweni nanen puto suri. Ko kami sopor numer eajir; ko sopor arorr elep ko arminmin elep.

²² Poro kammerreni kapaan pilep ko kapminmin pilep, rrek erres kaploli Ĥirpok re bbong naim se kami sisamis. Suri daron nga kamaan milep ko kamminmin milep re no tasi kami nir nga nanen ser mijkie, ko kamloli nor ewis, ko kamloli nanu nga mĭsij renga Naim On se Atua. Ko kamwera bowra Ĥirpese re iok? Kamwera bosrövi kami? Ejki nga ejki.

²³ Nale san nulai ji Numal se kerr ko nuwrai tweni tevi kami ngel: "Renge nutpong mawos nen nga martekai kerasi Iesu, ko ni elai niv

²⁴ ko otori ko olot owra erres van ji Atua ko obbri otvi, ko owra "Ngel evi nibek nga bemaronge suri kami. Kapurroi, puloli nga kapok-rrorrmu inu rengen."

²⁵ Ko erpok kele, daron nga marurroi jijle niv, ko elai biles kele ko owrai owra "Biles norro ngel erpe se nga mimerr se Atua nga drarak Ĥiseser nga pitasi. Daron tama san nga kapok-minmin ren, kaprrorrmu inu tetajer."

²⁶ Ko niko, daron tama san nga kamurroi niv ngok ko kammini norro ngok, erpe

owra tweni mijen se Numal se kerr, pianan pijpari daron nga pia-luwi kele e vini.

Kapurroi nanen se Numal renge murrun nga musorsan

²⁷ Ko niko poro jinibb san purroi niv rreknga piminmin renge biles se Numal se kerr renge murrun nga sete musorsan, ko ololi esij renge drra ko nibe Numal se kerr.

²⁸ Ko erpok ko, erres nga jinibb pimteni lilane ni puwomu, ko pia-vini nga purroi niv ko piminmin renge biles ngok.

²⁹ Suri jinibb nga mokaan ko mokminmin tama, orrorrmi ololi nanu ngok nir arirpe detnijen kobbong, ko Atua putor vitrangi ko suri.

³⁰ Niko nir milep re kami marok-mesi ko niber sete miterter, ko nir elep re kami armij pa osuw suri murrun ngok.

³¹ Poro jinibb sisamis pimteni lilane pa womu renga mauren sen, ko sete Numal se kerr mia-tor vitrangi.

³² Ko daron nga Numal se kerr mutor vitrangi kerr, ko otor vitrangi kerr nga rrapvijuri sel nga musorsan. Ko daron nga pia-wera suri lat nga puto suri tevi jinibb jijle nir vajin, ko kerr rrapasi.

³³ Ngok, tasik ko jojik nir, poro kapkorti lat sansan renge nanen se Numal se kerr, kami totoklai kaplik ko wor.

³⁴ Ko poro san numer eaji, ko erres nga piaan ko pa renga naim sen, musuw ko pia-vini. Ko daron nga kapini lat sansan, ko Atua sete mia-tor vitrangi kami vajin.

Ko nanu minij nen nir nga kamsusi surir, poro bea-rremali kele ji kami ko bea-loli lilaner.

12

Derteren nga Nem̄in se Atua mokclair tevi kerr

¹ Tasik ko jojik, inu numrreni nga kaprongwose p̄irres murrun nga Nem̄in se Atua mokclair derteren lele nga marres nir tevi kerr.

² Tuwi, daron nga kamluk malum renga mauren nga misij, atua nga sete marongwose parij nir arevei tweni kami van jir e, nga sete orongwose kapwer ore.

³ Suri iok, numrreni kaprongwose lilane nale suk ngel: jinibb nga Nem̄in se Atua mokpitevi weretunene sete orongwose puwra "O, Iesu esij." Ko jinibb sete orongwose puwra tweni puwra "O, Iesu evi Numal suk", poro Nem̄in On sete eptevi.

⁴ Ko derteren lele se kerr elep, ko Nem̄in se Atua sansan kobbong nga moklai.

⁵ Ko majingen lele kele elep nga rramokloli, ko Numal sansan kobbong nga rramok-majing sen.

⁶ Ko murrun lele nga jinibb p̄imajinge elep, ko Atua sansan kobbong nga mokrij renge nolo kerr jijle nga rraptajer renge majingen ngok nir.

⁷ Atua elai Nem̄in sen tevi kerr sisamis nga kerr sisamis rrapwilwil sisamis se kerr luwi ren.

⁸ Ko erpok, re jinibb sapon, Nem̄in ngok orongwose p̄ilai nale ne norongwosien tevi; ko renge sapon, Nem̄in ngok kele kobbong orongwose p̄ilai norongwosien nga purongrongwos.

⁹ Ko Nem̄in ngok orongwos p̄ilai nosurien nga m̄iterter tevi jinibb sapor. Ko renga Nem̄in ngok kele kobbong, orongwose p̄ilai derteren lele nga parloli jinibb nga mimsi p̄irres luwi kele.

¹⁰ Renge jinibb sapon orongwose p̄ilai derteren nga jinibb puloli nanu nga marinijnij nawone. Ko renge sapon, elai derteren nga parwerai tweni nale se Atua. Ko renge sapon, elai derteren nga parlesi wose nem̄in nga misij ko nem̄in nga m̄irres. Ko renge sapon kele, Nem̄in ngok orongwose p̄ilai derteren tevir nga parij renga nale minij nir. Ko renga sapor, Nem̄in ngok elai derteren tevir nga parieni nale minij nen nir nga jinibb purongwose.

¹¹ Ko ngok, Nem̄in sansan ngok kobbong nga moklai derteren ngok jijle nir. Moklai derteren lele ngok tevi jinibb jijle osorsan erpe nga ni mimrreni.

Pol owra rrongrongvi kalesia nir renge nibe kerr jinibb

¹² Nibe jinibb sansan kobbong, ko murrmurrun nen elep. Ko murrmurrun ngok sete arorsan, ko arkorti ma nga marloli niben sansan. Ko Kristo kele erpok ko.

¹³ Kerr jijle, m̄eri Isrel, rreknga jinibb ne vare nir, rreknga demij maur rreknga jinibb nga mivel sisarow, rramirpe niben sansan kobbong renga Kristo. Daron nga marpaptaese kerr, ko Nem̄in sansan okortoni kerr, ko rramivi vajin niben sansan, ko rramok-la mauren ji Nem̄in nga sansan ngok bbong. Atua elai Nem̄in ngok kobbong tevi kerr jijle nga rraplai mauren rengen.

¹⁴ Ko sete nibe jinibb murrmurrun sansan, ko elep ko wor, ko parmajing ko wor lat sansan.

¹⁵ Poro belak purnge p̄isij renga majingen sen ko puwrai tevik puwra "O, nevrem ma emajing erres, ko inu sete nurongwos bololi majingen nga m̄irres san renga nibem", nale ngok evi nale nawon kobbong, suri belak sete orongwos p̄ila tweni ni renga inu.

¹⁶ Ko poro borok puwra "O, metem ma emajing erres, ko inu sete nurongwos bololi majingen san renga nibem", erpe

nale ngok evi nale nawon, suri borok sete orongwos p̄ila tweni ni renge inu.

¹⁷ Ko poro nibek jijle pivi metek bbong, ko borngunge nanu p̄irpese? Ko poro nibek jijle pivi borok bbong, ko bongus re nanu p̄irpese?

¹⁸ Ko sete erpok; Atua elngi murrmurrin lele re nibe jinibb erpe nga ni murrormi.

¹⁹ Poro murrmurrin lele ngok nir parsorsan, ko nibe jinibb p̄irres p̄irpese?

²⁰ Ko ewretun, murrmurrin lele elep renge nibe jinibb, ko nibe jinibb evi bbong sansan.

²¹ Ko erpok kele, metek sete orongwose p̄irij tere nevrek, puwra “O, sete numrenim”; ko batuk sete orongwose puwrai tevi belak puwra “O, sete numrenim”.

²² ko sete erpok, ko murrmurru nibe kerr nga rramrormi derteren ner mijkie, nir majingen ser nga marlelep arto pae ko nga parloli;

²³ ko murrmurru nibe kerr nga rramlesir sete marres, ngok nir rramloli lilaner ko. Ko murrmurrin nga rrammanune nir, rramlavlav orer wor erres;

²⁴ ko murrmurru nibe kerr nga rramlesir marres bbong, rramlingi kurtweni nawone nir erpok. Niko Atua okortoni murrmurru nibe kerr ngok nir, ko emrreni nga murrmurrin nen nir nga rramlesir sete marres, ko rraploli lilaner p̄irres.

²⁵ Renge murrin ngok kobbong, murrmurru ne nibe kerr sete orongwose parlatlat nir. Armetmet lululwi nir ma erres, ko arwilwil ser.

²⁶ Poro murrin nibek san purnge p̄isij, ko ngok nibek totoklai purnge p̄isij. Ko poro parsurōvi murrin nibek san, ko ngok nibek totoklai purnge p̄irres ko wor.

²⁷ Ko erpok, kerr jijle rramivi nibe Kristo, erpe kerr sisamis rramivi murrmurrin re niben ngok.

²⁸ Ko renge kalesia, Atua elngi majingen sisamis se jinibb jijle. Womujnen, elngi aposol nir. Ko suri nen e, elngi propet nir. Ko vatolin, elngi jinibb nevisisenien nir. Mian ko nir nga marloli nanu nga marinijnij nawone, musuw ko elai derteren tevi nir nga parloli jinibb parres luwi renge mesien, mian ko nir nga parwilwil se jinibb, mian ko nir nga marmetmete majingen ne Naim On, mian ko nir nga marongwos parij renge nale lele.

²⁹ Ko sete kerr jijle rramivi aposol, sete kerr jijle rramivi propet, sete kerr jijle rramivi jinibb nevisisenien. Sete kerr jile arlai derteren tevi kerr nga rraploli nanu nga marlelep marres,

³⁰ rreknga rraploli jinibb parres luwi renge mesien, rreknga rraprij renge nale m̄inij nir, rreknga rrapwer tweni mining

ne nale nen nir nga jinibb purongwose, ejki.

³¹ Renge iok, kami kaploli norrormien se kami p̄iterter kele wor nga kaplai derteren nga marres nen nir. Ko beviseni vajin sel nga m̄irres asi san, nga boli suri ngel:

13

Merrenien nga jinibb mimrreni Atua ko jinibb nir

¹ Poro nurongwose berij nale jijle ne iel ngatan ko nale se anglo kele nir, ko merrenien suk mijkie, ko ngok nale suk evi nanu nawon kobbong, erpe naβe nga drrelan mivijajeng nawon ko sete owra nanu san.

² Ko poro derteren suk putoe nga bowrai tweni nale nga Atua m̄ilai tevik, ko merrenien suk mijkie, ko ngok nale suk evi nanu nawon kobbong. Ko poro norongwosien suk pilep, ko nurongwos nanu nga musuw ngok, ko merrenien suk mijkie, ko ngok inu sete nuvi jinibb san. Ko poro nosurien suk pilep, evter nga purujoni botwen nga marlelep nir, ko merrenien suk mijkie, ko ngok inu sete nuvi jinibb san.

³ Poro belai nawone jorok p̄etp̄eti nir tei jinibb nga joror marjiekie nir, ko bemarong nga devje nuval nir parsulik renge nabb suri nuvi jinibb se Kristo, ko merrenien suk mijkie, ko sete mea-tor sweri rragrag nanu san, ejki.

⁴ Merrenien, nolon epriv, okrorrmi elep suri jinibb, ko erres tevi jinibb nir. Sete nolon pilelep ko sete nolon pian mare p̄elak, ko sete pukowkowrie.

⁵ Sete p̄iwer lokloksi jinibb, sete purrormi lweni kis ni. Sete pulolar pingavilvil, ko sete poklolar pipriv p̄elak.

⁶ Merrenien sete orongwos p̄ir renge sev nga m̄isij, ko eir ma renge sev nga mivi weretunen.

⁷ Merrenien, nolon sete orongwose pivitan nga mokwilwil se jinibb nir. Tetajer osuri Atua, ko norrormien sen oto eterter renge Atua tetajer; ko nekaien nga marlelep arongwose parini ren, ko nolon sete orongwose pivitan.

⁸ Merrenien sete mia-suw nabong san. Rrek jinibb sopor derteren ser otoo nga parwerai tweni nale nga Atua m̄ilai; pian ko pusuw. Rrek sopor derteren ser putoe nga parij renge nale m̄inij; mian ko pijpon. Ko rrek sopor norongwosien ser pilep lenglengen; pian ko pijjiki.

⁹ Suri norongwosien ngok se kerr evi beblen kobbong, ko derteren nga rramwerai tweni nale nga Atua m̄ilai kele evi beblen kobbong.

¹⁰ Ko daron nga nanu nga musorsan m̄irres jikle p̄irmali, ko nanu nga sete musorsan p̄elak pian pijijki vajin.

¹¹ Tuwi daron nga mewelili malum e, ko rijen, norrorrmien, ko norongwosien suk erpe bipiwarreng. Ko daron nga mevini mevi jinibb vajin, ko nukurtweni murrun se bipiwarreng vajin.

¹² Erpok kele, lelingenok erpe rramlesi drranu oto ore malum nanu nir; mian ko nabong san, nanu jikle pia-to limjer, ko rrapa-lesi Atua mawos vajin. Lelingenok norongwosien se kerr oto re liven kob-bong; ko mian ko rengo daron ngok inu bea-rongwose nanu jikle pirpe nga Atua murongwose lilane inu.

¹³ Ko niko murru sel itul oto nga sete mara-jijki. Nga womu, evi nosurien se jinibb nga muosuri Atua. Nga suri nen e evi norrorrmien se jinibb nga m̄iterter rengo Atua. Ko itolin evi merrenien. Ko nga m̄iasi jerjer re nir nga itul ngok evi merrenien.

14

Rijen re nale m̄inij ko rijen erpe propet

¹ Kami kapp̄elak ko wor pilep nga kapvijuri sel ne merrenien. Ko kappej kele derteren nir nga Atua m̄ilair; ko womunen kappej derteren nga kapwera tweni nale se Atua erpe propet.

² Suri jinibb nga m̄irij rengo nale m̄inij erpe nga Nem̄in On m̄ilai, sete erij tevi jinibb, ko erij tevi Atua kobbong. Nem̄in On elai derteren ngok tevi nga puwrai tweni nale ngok suri nanu nir nga jinibb sete murongwose.

³ Ko jinibb nga ma muwra tweni nale se Atua rengo nale se kerr mawos, ni vajin erij erpe propet; erij limjer nga jinibb nir parongwose, ko okwilwil se nir ko osusi norrorrmien ser van mare, ololi arunge erres.

⁴ Jinibb nga m̄irij rengo nale m̄inij ewilwil sen lweni kobbong, ko jinibb nga ma muwra tweni nale nga Atua m̄ilai, rengo nale se kerr jikle, ni ko vajin okwilwil se kalesia totoklai.

⁵ Rrek p̄irres poro nga kami jikle kaplai derteren ne marij re nale m̄inij; ko poro kaprongwose kapwera tweni nale nga Atua m̄ilai rengo nale se kerr jikle, ko inu ßeir kele wor. Erpe poro jinibb nga m̄irij rengo nale m̄inij sete orongwose p̄irieni nale nen nga kalesia parongwose, ngok erresresres jinibb m̄inij puwra tweni nale se Atua rengo nale se kerr jikle, ko niko vajin pia-wilwil ser.

⁶ Tasik ko jojik nir, p̄irres pirpese poro bevinuk ko ßerij nale m̄inij tevi kami nga setemun nuwra lilane sel nga muto suri?

Nale ngok piwilwil se kami pirpese? Ko rrek p̄irres ma poro bowra mawos sev nga Atua miviseni tevik, rreknga norongwosien rreknga nevisvisenien rreknga nale kele san nga muto limjer.

⁷ Kaprrorrm̄i ta nabbu nga maruwi ko gita. Nanu ngok nir arivi nanu nawon, ko jinibb kobbong ololi drrelan mutoe. Ko poro drrelar sete p̄ir̄erer, ko jinibb sete mia-rongwose nubo nga marlai.

⁸ Ko poro davō paruwi sete drrelan p̄ir̄erer p̄irres, ko sete jinibb san mia-rongwose nga evi daron ne nuval.

⁹ Ko erpok kele, sete jinibb san mia-rongwose sev nga kamwera, poro nga nospen se kami oto tetajer rengo nale m̄inij; nale se kami pian bbong pijijki rengo mesa nawon.

¹⁰ Ko nale lele elep lenglengen iel ngatan, ko nir jikle mining ner artoe.

¹¹ Ko poro sete borongwose nale se jinibb san, ko borngre erpe m̄iernen enganga, ko ni kele purnge inu erpe benganga.

¹² Ko erpok kele re

kami, suri kamm̄erreni lenglengen dert-eren nir nga Nem̄in On m̄ilair, kapp̄elak ko wor pilep nga kaplai derteren nen nir nga marwilwil se kalesia jikle nir.

¹³ Ko niko, si nga derteren sen otoe nga m̄irij rengo nale m̄inij mirpok, pulot ko wor nga Nem̄in On p̄ilai derteren tevi nga purongwose kele p̄irieni nale m̄inij nen.

¹⁴ Suri poro bolot pirpok rengo nale m̄inij san, nem̄ik kobbong olot ko norrorrmien suk oto nawon.

¹⁵ Ko ngok, pirpese ko vajin? Ko erres daron nga rramlot rengo nem̄i kerr; ko rrapkortoni tevi norrorrmien se kerr kele; ko daron nga rramlai nubo tevi nem̄i kerr kele, ko rrapkortoni kele tevi norrorrmien se kerr.

¹⁶ Daron nga kumlot nga kupwera erres tevi Atua rengo nale m̄inij san, ko jinibb nir sete arongwose parwera "Pirpok kol!" rengo loten som, suri sete arongwose nale nga kumrij e.

¹⁷ Rrek loten som ngok tevi Atua erres p̄elak, ko sete mia-wilwil rragrag se jinibb ngok nir.

¹⁸ Nuwra erres wor elep tevi Atua nga inu nomok-rij rengo nale m̄inij easi kami jikle.

¹⁹ Ko re Naim On numrreni ßerij e nale evis bbong nga marmumrrol nga jinibb orongwose ko nga parvisiseni nir erres, easi nga ßerij rengo nale puwun saut rengo nale m̄inij nga marrelenge.

²⁰ Selek nir, sete kapirpe bipiwarreng nir rengo norrorrmien se kami. Kapirpe bipiwarreng nir nga marrelenge nanu nga

marsij, ko re ma norrorrmien se kami, kapirpe jinibb tera.

²¹ Suri Naul On owra 'Inu bowrai tweni nale suk tevi jinibb suk nir, ko ßerij rrrurngi nir ne nale n̄inij nir, ko ßerij rengo neturvitan kobbong nir. Ko re sel ngok kele jinibb suk nir sete mara-murrong inu.'

²² Ko erpok kele, oto limjer nga derteren ne parij re nale n̄inij evi nga piviseni jinibb nga sete marosuri Atua, parlesi wose, ko sete evi se nir nga marosuri. Ko derteren ne parwera tweni mawos nale se Atua erpe propet rengo nale se kerr evi nga piwilwil se nir nga marosuri, ko sete evi se nir nga sete marosuri.

²³ Poro jinibb m̄inij sopor, rreknga nir nga sete marosuri Atua parini daron nga kami kalesia jile kamkorti, ko kami jile kaprij rengo nale n̄inij nir, ko erpese? Rrek parwera "O, arlengleng ko!"

²⁴ Ko poro kami jile kapwera tweni mawos nale se Atua rengo nale se kerr daron nga jinibb san nga sete muosuri Atua ðilik loloim, ko ngok enije. Ngok nale se kami jijle pujuji nolon suri nololien sen, ko piviseni kele ni, lat nga mauren sen muto suri.

²⁵ Nale se kami ngok pirvei tweni norrorrmien sen nga mokteptepi ngok pivini puto limjer, puloli m̄ernen pijipa vitan pusr̄ovi Atua, puwra, "Ewretun, Atua elik liven re kami iel."

Parsur̄ovi Atua rengo sel nga musorsan ko wor m̄irres

²⁶ Tasik ko jojik nir, bowra sev tevi kami? Bowra, daron nga kamini kamkorti nga kapsur̄ovi Atua, ko kami jile kamloli majingen. Rrek san evi nga ðilai nubo, ko san evi nga pivisviseni, ko san evi nga puwra tweni norrorrmien nga m̄imerr nga Atua miviseni tevi, ko san evi nga ðirij rengo nale m̄inij, ko san evi nga ðirieni nale nen; ko kami jijle puloli wor sev nga muloli rengo sel nga piwilwil se delung.

²⁷ Poro sopor parij rengo nale n̄inij, ko erres nga nir ðieru rreknga ðitul bbong parij. Ko san ðirij jile pusuw ko m̄inij kele, ko jinibb san ðirieni nale ser.

²⁸ Ko poro jinibb san pijki nga ðirieni nale ser ne nale m̄inij ngok, ko erres nga m̄er nga m̄irij ngok ðilik malum kobbong rengo liven ne kalesia ko ðirij kobbong tevi ni lweni kobbong ko tevi Atua kele.

²⁹ Ko re devjen ne nir nga marwera tweni mawos nale se Atua erpe propet rengo nale se kerr, erres poro nuru ðieru rreknga ðitul parij, ko nir n̄inij nen parselepor ko parmurronge nale ser, poro osorsan erres rreknga ejki.

³⁰ Ko poro jinibb san elik nga murnge nale se Atua ko ornge nga Atua eviseni nanu san tevi, ko erres m̄er nga m̄irij pumosi mun ko ðilinglingi m̄ernen puwrai tweni nanu nen.

³¹ Erpok kami jijle kamrongwose kapwera tweni nale se Atua, san pusuw, ko san. Ko rengo murrun ngok puloli kaprongwose nanu, ko norrorrmien se kami pivini ðiterter kele wor.

³² Puloli propet nir parmajing tevi dert-eren ngok rengo murrun nga musorsan m̄irres.

³³ Suri Atua sete evi batu sel nga m̄ikarkar, ko evi ma batu demat. Renge Naim On totoklai se Atua nir arok-vijuri murrun ngel, ko kami kele kapvijuri ko wor:

³⁴ nesevin parþerþer rengo Naim On. Sete erres parij, ko parlik malum ko parosuri, erpe nale nesesreien se Moses muwrai.

³⁵ Poro nesevin san puwra purongwose nanu san, ko erres nga pususi tevi diwen sen re naim se nuru. Ko sete erres nga nesevin parij rengo Naim On.

³⁶ Ko erpese? Kami kamr̄orrmi nale se Atua eplari womu ji kami? Kamr̄orrmi nale se Atua evini ejpari ji kami kobbong?

³⁷ Poro san re kami orrorrmi derteren sen otoo erpe propet nga puwrai tweni nale se Atua, rreknga orrorrmi Nem̄in On okpitevi ni, ko ni ðilesi wose kobbong nga nale nga nomok-uli tevi kami evi weretunen nale nesesreien se Numal se kerr.

³⁸ Ko poro san sete owor suri nale suk ngel, ko Atua kele sete pia-wor suri ni.

³⁹ Tasik ko jojik nir, kaplingi ko wor norrorrmien se kami rengo derteren nga kapwera tweni nale se Atua erpe propet. Ko sete ma kama-wer ore jinibb nga dert-eren sen mutoe nga ðirij re nale m̄inij.

⁴⁰ Kaploli nanu jijle rengo murrun nga musorsan m̄irres nga jinibb parir rengen.

15

Kristo emaur luwi kele re mijen

¹ Tasik ko jojik nir, nuwra kaprongwose suri nosþen nga m̄irres nga m̄ewerwer e pa tevi kami, nga kamlai pa musuw, ko nga nosurien se kami muto m̄iterter malum rengen.

² Ngok evi nosþen nga m̄irres nga m̄ewerwer e tevi kami. Ko Atua pia-loli nosþen nga m̄irres ngok pia-lai mauren tevi kami, poro kaprrol totoni ðiterter. Poro pijki, ko rrek nosurien se kami pivi nanu nawon kobbong!

³ Sev nga m̄elai, nuvijngeni tevi kami. Evi norrorrmien nga milep temijpal re

nosurien se kerr, ngel: nga Kristo emij suri nololien se kerr erpe maruli pa re Naul On;

⁴ nga artevni, ko nabong itul easi ko Atua ololi emaur luwi erpe maruli pa rege Naul On;

⁵ nga mürmali ji Pita, mian ko ji kele jinibb sen esngavöl dromon eru.

⁶ Ko vitunen errmali ji gortien ne jinibb nir nga nir easi ongut valim (500), nga nir jijle arlesi ni. Nir sopor re gortien ngok armij pa, ko nir elep armaur malum.

⁷ Vitunen errmali ji Jemes, ko vitunen kele errmali ji aposol sen jijle nir.

⁸ Ko vitu jerjer errmali ji inu ngel nga sete nuvi jinibb san.^B

⁹ Nuwrai erpok suri nulesi inu nuan ngatan easi aposol münij nir; ko nurnge nibek nen nga sete erres parveruse inu aposol, suri tuwi inu nomok-ojoi kalesia nir.

¹⁰ Ko suri Atua ewilwil se inu rege nolon nga mürres, niko mewaji vajin nais ngok. Ko Atua sete ewilwil nawon se inu, ko wenen nen oto wore, ko inu numajing wor elep easi aposol münij nir. Ko ewretun, sete inu ko nga mëmajing; Atua ko nga mok-wilwil se inu rege nolon nga mürres sen, ni ko eptevik rege majingen ngok nir.

¹¹ Ko ngok, poro nga inu bewerwer, rreknga nir parwerwer, ko eplari osorsan kobbong, kami kamosuri pa.

Jinibb se Atua para-maur luwi kele

¹² Ko nospen nga mürres owra nga Atua ololi Kristo emaur luwi kele rege mijen. Ko ngok nale nga kami sopor kamok-werai nga nir nga marmij sete mara-maur luwi kele, sete evi weretunen.

¹³ Poro evi weretunen nga nir nga marmij sete mara-maur luwi kele, ko pipok ko, Kristo sete emaur luwi kele rege mijen.

¹⁴ Ko poro Kristo sete emaur luwi kele rege mijen, ko nospen nga namokwerwer tweni ngok evi nanu nawon kobbong, ko nosurien kele se kami evan lat nawon.

¹⁵ Ko ngok eviseni kele nga rramloli gerisen re Atua daron nga rramwera ololi Kristo emaur luwi rege mijen. Ko poro nga Atua sete orongwose puloli nir nga marmij parmaur luwi, ko ngok sete ololi Kristo emaur luwi.

¹⁶ Suri poro nir nga marmij sete parmaur luwi, ko Atua sete ololi Kristo emaur luwi rege mijen.

¹⁷ Ko poro Kristo sete emaur luwi rege mijen, ko nosurien se kami rege Kristo evi nanu nawon kobbong, ko Atua setewor etlasi tweni nololien se kami.

¹⁸ Ko nir nga marosuri Atua mianan ko marmij pa musuw, aran rege nejijkien ko pa.

¹⁹ Poro rramlingi norrorrmien se kerr rege Kristo suri nowlin nga rraplai bbong iel ngatan, ko rramlik esij easi jinibb p̄et̄peti ne iel ngatan ko!

²⁰ Ko ejki. Evi weretunen jerjer nga Atua ololi Kristo emaur luwi rege mijen. Ko rege nir nga marmij pa osuw, ni evi m̄er nga muwowomu jer nga mimaur luwi rege mijen. Ni erpe wenen san nga m̄itra womu rege naut san.

²¹ Erpe mijen evi nanu san nga jinibb sansan kobbong, Atam, elai errmali iel ngatan. Ko mauren nga miplari rege mijen errmali kele ji jinibb sansan kobbong vini.

²² Ko kerr jijle nga rrampelari rege metka se Atam, rrapan ko wor rege mijen, mian ko rrapa-korti tevi Kristo nga rrapa-maur luwi kele rege mijen.

²³ Ko nanu nir parpelari pipel le: ni nga mimaur luwi womue evi Kristo, nga mirpe nanen nga m̄itra womu rege orsel. Ko vitunen, re daron nga Kristo pia-rremali, ko jinibb sen vajin para-maur luwi.

²⁴ Ko vitunen, bongsi nanu jijle nir p̄irmali. Renge daron ngok Kristo pulokloksi bathatu jinibb nir ko gavman nir ko numal nga marivi se demij, para-jijki jile, ko pilai lweni derteren totoklai pulwi van re nevre Atua Tata sen.

²⁵ Ko rramrongwose nga Kristo pivi Numal pian pian pijpari nga Atua pilngi jile devje nuval jijle nir se Kristo ngatan ko pubbötbböt renger re belan ngatan.

²⁶ Musuw ko devje nuval nga vitu jer nen nga Atua pia-lingi ngatan evi mijen.

²⁷ Suri Naul On owra 'Atua elngi nanu jijle arto rege melve belan'. Ko nga muwrai ngok, 'Nanu jijle arto rege melve belan', ngok sete etawi ore Atua. Suri Atua ko elngi nanu jijle rege melve bela Kristo.

²⁸ Ko daron nga nanu jijle parto vajin pipok re derteren se Kristo, ko vitunen, Kristo nga mivi Atua natun, ni kele kobbong pilngi ni lweni van ngatan re derteren se Atua ngok nga womu m̄ilngi nanu jijle maro rege derteren se Kristo. Ko Atua vajin putori derteren rege nanu jijle.

²⁹ Ko erpok kele, poro jinibb nga marmij nir sete parmaur luwi kele re mijen, ko suri sev jinibb nir marok-lai baptaes marla wani nir nga sete marbaptaes tuwi, mian ko marmij?

³⁰⁻³¹ Ko suri sev kem namok-p̄elak tetajer nga namloklokli mauren se kem nga otomori nabmij nabong jijle? Neiren nga milep nga muto rege inu suri kami, ko

^B 15:8 Iel Pol owra ni erpe hipi san nga m̄iak otvi, ko niko rrek owra puwra ni sete evi jinibb san.

mauren nga kamlai reнге Iesu Kristo, Numal se kerr, evi batun nga mowrai iok.

³² Ko iel Epesas erpe inu nomok-palpal tere nanu rrum nir, ko ßelesi sev ko ßirres suri reнге iel ngatan? Poro nir nga marmij sete parmaur luwi keге reнге mijen, ko rrek erres ma rrapvijuri norrorrmien nga muwra 'Erres ma rraplik rraplelea rrapaan ko rrapminmin kobbong, suri mevi le pa rrapmij, ko setemun rrama-lesi keге nanu nga mïrres san.'

³³ Sete kaplengleng, sele kami nga murur marsij arongwose parlokloksi kami.

³⁴ Kaploli lilane norrorrmien se kami ßirres, ko kaplingi kurtweni nololien nga marsij se kami. Ko erres no kami pimanun ko pa, suri kami sopor nirko arrelenge Atua.

Nibe kerr pia-irpese re daron nga rrap-maur luwi re mijen?

³⁵ Ko rrek jinibb sopor para-susi nabong sapon, parwera "Jinibb nga marmij parmaur luwi pirpese?" Ko "Niber keге para-irpese ko?"

³⁶ Kamwolu lengleng! Sete kamrongwose nga drrum pimij ko wor, nga puloli drruvi nga mïrres san piplari, erpe mauren nga mimerr.C

³⁷ Ko winen nga maruwi sete evi drruvi, ejki. Drruvi evi nanu nga mïmerr taktak, ko elep ko erres ßelak asi winen, nga mumutmut jile vajin.

³⁸ Atua ko ela sinan tevi drruvi nir erpe nga ni mimrreni. Ko erpok keге, oklai niben tevi nanu jikle nir.

³⁹ Nibe nanu nir sete arsansan. Viso jinibb sete osorsan tevi viso nanu rrum. Numön vison enije, ko mesal keге vison enije.

⁴⁰ Ko nanu sopor arto mare re melrin, ko nanu sopor keге arto ngatan. Ko moron ne nanu ne melrin artoe, ko moro nanu ne iel ngatan keге artoe.

⁴¹ Nial sete erpe navöl ko, navöl keге sete erpe moju, ko moju sisamis arinije.

⁴² Ko pia-irpok ko re daron nga jinibb para-maur luwi keге e reнге mijen. Niben nga martevni, pian ko pupo ko pumutmut; ko daron nga para-maur luwi keге reнге mijen, ko setemun mara-mutmut.

⁴³ Ko nibe jinibb daron nga rramtevni ko rramlesi esij elep, ko derteren sen ejkie; ko daron nga para-maur luwi keге reнге mijen, ko niber parres ßelak, ko derteren ser pilep temijpal.

⁴⁴ Niben nga marmij nga martevnir arivi ne mauren ne iel ngatan kobbong; ko daron nga para-maur luwi reнге mijen, ko arivi vajin nga parmaur tevi Atua.

Niben ne iel ngatan otoe, ko niko niben ne mauren tevi Atua oto keге e.

⁴⁵ Ko Naul On owra 'Merwomu ngok Atam, Atua ololi evi jinibb nga mïlai mauren ne iel ngatan'; ko ni nga mivi Atam nga vitu jer nen, Atua ololi evi nemïn, nga orongwose ßilai mauren tevi kerr.

⁴⁶ Ko sete mauren ne nemïn oto womu, ejki, ko mauren ne iel ngatan oto womu, mian ko mauren ne nemïn ea-to vitu.

⁴⁷ Merwomu, armajinge reнге maw ne iel ngatan; ko mïervitu eplari re melrin vini.

⁴⁸ Jinibb jikle ne iel ngatan, niber erpe niben nga marmajinge reнге maw ne iel ngatan; ko jinibb jikle ne melrin, niber erpe niben nga mivel reнге melrin vini.

⁴⁹ Ko erpe lelingenok rramirpe mïerwomu nen, nga mivi Atam; ko erpok keге rrapa-irpe mïervitu nen nga miplari re melrin vini, nga mivi Kristo.

⁵⁰ Tasik ko jojik nir, ngel evi mining ne nale suk: Nibe kerr nga vison ko drra mutoren sete mara-van rragrag reнге batun vanu se Atua. Ko niberr ngel nga pian ko pimij, sete orongwos ßila mauren ne tuvi ngok vini.

⁵¹ Selek nir, kapmurrong ßirres; ngel evi nale teptepi le san, bowrai tevi kami. Sete kerr jikle ko rrama-mij.

⁵² Ko daron nga drrela davö nga milep ne nabong nga vitu ßiting, ko Atua ßirieni nibe kerr jikle pivesan rrese, pirpe navil nga mivil. Suri daron nga davö ngok ßiting, ko Atua puloli nir nga marmij parmaur luwi keге reнге mijen, nga setemun mara-mij keге nabong san. Ko ßirieni keге nibe kerr nga rrammaur malum re daron ngok.

⁵³ Suri nibe kerr nga marok-mij, parieni ko wor nga parivi niben nga sete mia-mij nabong sapon. Ko nibe kerr nga marivi ne nejikien, parieni ko wor nga parivi niben nga sete mia-jijki nabong sapon.

⁵⁴ Ko daron nga nanu ngok nir pararremali, ko nale ne Naul On keге ßirmali nga muwra 'Nanu ngok mijen, Atua olokloksi pa osuw, olokloksi jikle pa.'

⁵⁵ 'E mijen, ngabe ko derteren som vajin? E mijen, erpese kurongwose kuplokloksi kem?'

⁵⁶ Suri nololien ko elai derteren tevi mijen nga muloli mijen orongwos pulokloksi kerr; ko nale neseseien elai derteren tevi nololien.

⁵⁷ Ko rramwera erres temijpal wor tevi Atua suri mukortoni kerr reнге Iesu Kristo, Numal se kerr; ko tetajer ololi rramok-asi.

⁵⁸ Ko ngok, tasik ko jojik nga mar-res p̄elak, kami kaptur ko wor p̄iterter, sete kapririr. Tetajer kapmajing ko wor p̄iterter renge majingen ngok se Numal se kerr. Ko kamrongwose pae nga daron nga kammajing se Numal se kerr; ko majingen ngok wenen puto wore ko.

16

Merrenien nga piwilwil se kalesia nir ne Isrel

¹ Ngok, ko daron nga kamtuwtuw nevöt suri jinibb se Atua nir, ko numrreni kaploli pusorsan pirpe sev nga mowrai tevi kalesia nir ne Galesia.

² Ko ngok evi nga re nabong on jijle nir, kami sisamis p̄ilngi taleve nevöt sopen, piprel: Ni nga n̄ila nevöt nga milep p̄ilngi pilep, ko ni nga n̄ila nevöt nga welili p̄ilngi puwelili bbong, puto metmet. Suri poro pijki, devinuk ko taka-tipatun bbong nga taka-loli.

³ Ko kaplingi kami sopor nga para-tori nevöt nen nir van Jerusalem e. Ko daron nga bea-luwi vinuk ko bea-uli naul sopen nga bea-wera suri nir tevi kalesia nga Jerusalem nir, ko bokonir van vajin.

⁴ Ko poro ßlesi erres nga inu kele bean, ko nabkorkorti vises van.

Norrormien se Pol suri sel sen

⁵ Daron nga ßeasi Masetonia vajin ko bevinuk ji kami vajin e.

⁶ Ko rrek ßelik piprepriv sopen tevi kami, rrek ßelik pijpari daron ne melas pusuw. Vitunen ko kapa-meteni sel suk lat nga bea-van kele e.

⁷ Sete numrreni ßelik beblen kob-bong tevi kami, ko norrormien suk oto nga poro Numal pimarong ko inu ßelik piprepriv sopen tevi kami.

⁸ Ko norrormien suk oto nga ßelik mun iel Epesas pianan pijpari nabong ne Pentekos.

⁹ Suri sel etp̄ir erres nga bololi majingen iel nga puloli majingen se Numal pian mare. Ko jinibb elep kele arok-tere inu.

¹⁰ Ko poro Timoti piplari iok ji kami, ko kapmetmete p̄irres, puloli purnge p̄irres nga p̄ilik tevi kami, suri okmajing se Numal se kerr kobbong erpe inu nomok-loli.

¹¹ Sete kami san puklu wutan re ni, ko kapwilwil ma sen nga pitajer malum re sel sen re demat, puloli sete putor sweri nanu nga n̄ikarkar, mian pijpari ni ko tasi kerr nir parluwi kele vini jik. Suri namok-teravi malume le.

¹² Ko re devjen ne tuwa kerr ngok Apolos, nuwrai lilane tevi nga numrreni wor pivivitu suri tasi kerr ngok nir nga parinuk parlesi kami. Ko ni setewor emrreni

pivinuk. Rrek poro daron sen putoe ko p̄ia-vinuk pia-lesi kami vajin.

Bongsi nale se Pol tevir

¹³ Kapmetmet p̄irres, sete kaplelea, ko kaptur p̄iterter renge nosurien se kami. Sete kapmetutu.

¹⁴ Kaploli nanu jijle re sel ne merrenien.

¹⁵ Tasik ko jojik nir, kamrongwos pae jiljilweren ne Stepanas ko metka sen nir. Nir arivi n̄eri Akaea nga womu jerjer marlingi nosurien ser renge Kristo, ko marok-pelak nga parwilwil se kalesia nir.

¹⁶ Ko inu numrreni lenglengse nga kaposurir p̄irres, tevi kele nir nga marmajing tevir.

¹⁷ Nuir temijpal nga n̄elesi Stepanas, Potunatas ko Akaekas. Nir ko arlai wani milnge kami ko arloli nurngse erres.

¹⁸ Arloli inu nolok eir luwi, erpe kele arloli pa nolo kami eir luwi. Erres kaposuri jinibb nga marirpok.

¹⁹ Ko gortien nir se kalesia nir nga Esia arwera erres tevi kami. Ko Akwila nuru Prisila tevi gortien ne kalesia nir nga marok-ser korti renge naim ser armerreni lenglengen parwera erres tevi kami renge nise Numal se kerr.

²⁰ Tasi kerr ko joji kerr jijle nir iel arwera erres ser tevi kami. Kapwera erres tevi kami lululwi, tevi merrenien ko demat.

²¹ Inu Pol vajin, nula pensil ji n̄er nga mok-uli tweni nale suk ngel nir, ko nuli vajin 'erres' suk ngel tevi kami.

²² Poro san sete emrreni Atua, ko lolaren se Atua puto ren.

Erres wor Numal, ko sete pipriv ko kupluwi.

²³ Ko nalol nga n̄irres se Numal Iesu piptevi kami.

²⁴ Ko merrenien suk piptevi kami jijle renge nise Iesu Kristo. Remse kami.

**Naul Erwen nga Pol Muli
tevi Kalesia nir renge
KORIN
Batu nale nga mivsvseni
lut nga pargeteni naul
ngel puto suri**

Naul (leta) erwen nga Pol muli tevi kalesia nir re Korin, oli re daron nga nir sopor arlolarsi ni ko artere ni. Ko Pol eviseni tevir nga ni orrorrmi eterter nga puloli lilane nanu ngok, ko puloli parkorti luwi keke.

Re bongsi naul ngel nga womunen (batun 1 musuwsuw re 9), Pol ospe suri sev ni nūrij nale nga marteter tevir renge naul san nga milai tevir, ko owrai nga ni eir nga nir marunge nale sen, ko marieni norrorrmien ser suri nale sen, ko marloli lilane nanu karkar nga muto livō e nir, ko markorti luwi keke tevi ni. Ko vitunen owrai keke tevir nga nir partuwtuw ko wor merrenien sopen nga parlai tevi kalesia seler nir ne jutia nga joror mijkie.

Ko re bongsi naul ngel nga vitunen (batun 10 musuwsuw re 13), Pol erij eterter sopen tere mēri Korin nga marwera nir arivi aposol weretunen, ko arok-lokloksi kalesia nir ne ie re nevsivsenien ser nga sete musorsan. Arok-werai nga Pol sete evi aposol weretunen, ko Pol erij orer eterter ko eviseni nga ni evi weretunen aposol se Iesu Kristo.

¹ Inu Pol nuvi aposol se Iesu Kristo suri marongen se Atua. Ko komru Timoti ngel, tasi kerr, nomor-uli naul ngel tevi kami kalesia ne Korin nir, ko tevi jinibb on pētpeti nir nga marlik renge Akaea totoklai.

² Ngel evi loten suk, nga Atua Tata se kerr ko Numal Iesu Kristo porij pīrres suri kami ko porlai demat tevi kami jile.

Pol owra erres tevi Atua

³⁻⁴ Rramwera erres wor elep tevi Atua, Tata se Numal se kerr Iesu Kristo, ko Tata se kerr keke. Ni orrorrmi kem tetajer, ko tetajer okla lweni kem daron nga namrunge esij suri jinibb nga marloli mīsij tevi kem. Ngok ololi kem keke orongwos nabra lweni tasi kerr nir poro parunge pīsij suri jinibb nir marojir, renge murrn mawos nen nga Atua muloli pa tevi kem.

⁵ Ngok niko, ewretun jinibb elep pelak aroji kem suri namivi jinibb se Kristo, evi nanu nga mīrres kobbong. Suri Kristo ela lweni norrorrmien se kem, ko kem keke orongwos nabra lweni norrorrmien se

kalesia mīnij nir. Ko iok ololi jinibb elep arunge erres nga erres.

⁶ Ko niko poro kem namrunge esij, ko nanu ngok orongwos puloli kami kaprunge pīrres, ko kapasi van renge mauren nga mīrres nga Atua moklai. Ko poro ma namrunge erres, ko nanu ngok keke orongwos puloli kami kaprunge pīrres; ko kaptur pīterter, ewretun jinibb nir aroji kami, erpe maroji kem.

⁷ Ko nolo kem nga namlingi renge kami sete pivel lingi kami, suri namrongose nga kamtur tevi kem renge norongen nga mīsij ko renge keke vajin norongen nga mīrres.

⁸ Tasi kem ko joji kem nir, sete nabsilveni norongen nga mīsij milep nga mijpari kem renge vanu ne Esia. Elep asi pētpeti nga namrongwos nabtori, ko namwera rrek nabmij.

⁹ Ko ewretun namtori mijen se kem tetajer. Ko ngok ololi setemun nambibto renge kem lweni, ko nambibto ma renge Atua nga muloli nir nga marmij armaur luwi.

¹⁰ Ko erpe ololi jile pa tevi kem renge Esia, ko orongwos puloli keke. Namlingi nolo kem oto eterter ren.

¹¹ Ko loten se kami keke suri kem ewilwil se kem. Jinibb elep arok-lot suri kem, ko daron nga marlesi nga Atua mīrij mīrres suri kem vajin, ko parwera erres tevi Atua suri.

Murru Pol oto limjer bbong

¹² Ko namrunge erres suri majingen se kem iel ngatan, suri nammajinge renge sel nga musorsan mīrres; ko namloli erpok keke tevi kami, ko ean mare keke wor. Sete namsilveni nolo kem sopen, ko sete namvijuri norongwosien se jinibb kobbong. Atua ko ewilwil se kem.

¹³ Ko sev nga namok-uli tevi kami, kami orongwos kaprongwose kobbong. Ko nammerreni kaprongwose nanu pētpeti nir,

¹⁴ erpe nga kamrongwose kem sopen. Ko kami kaplololi kami e kem vajin renge nabong nga milep se Numal Iesu, erpe keke kem nablololi kem e kami.

¹⁵⁻¹⁶ Ko suri nurongwose erres nanu ngok, norrorrmien suk oto nga bevinuk bokluklu womue kami, mian ko bean Masetonia e; mian ko bolwi keke vinuk ji kami, nga puloli kaprunge pīrres pivaru. Mian ko kapmeteni sel suk nga ban keke Jutia e.

¹⁷ Ko kami daron nga kamrunge norrorrmien suk ngok suri nivelen suk, ko kamwera "O, Pol elengleng, owluwlu elep pelak." Ko sete erpok te. Ko norrorrmien suk sete oto re devjen ne jinibb kobbong norrorrmien ser, nga puloli bowra "O-o",

ko mian ko sete epriv ko bowra “Ejki” vajin.

¹⁸ Ko suri Atua tetajer okwilwil suk, ko niko sete nurongwos bowrai nale ngel nuru korti porvesane, “O-o” ko “Ejki”.

¹⁹ Suri Iesu Kristo, natu Atua, nga mīlik rengo nolo kami suri kem Saelas ko Timoti namwerwer rengo nospen nga mīrres tevi kami, ni sete orongwos puwra “O-o” ko “Ejki” orvesane, ko owra “O-o” ko pa.

²⁰ Suri rijrijen p̄etp̄eti se Atua arpelari rengo Kristo. Niko rengo ni rramwera “Pirpok” tevi Atua, ko rramsurōvi Atua.

²¹ Ko Atua ololi inu ko kami kele rramtur eterter rengo Kristo. Ko Atua otobbtobbue kerr;

²² ko ela kele Nerīn On van rengo nolo kerr, nga muloli kerr rramrongwose ko jinibb jijle arongwose nga rramivi jinibb se Atua.

²³ Ko suri sev setewor nuvinuk ji kami? Nuwretun, nujuji mare, setewor nulwi vinuk ji kami suri numusus bololi kaprunge p̄isij.

²⁴ Iok sete namwera kaprunge p̄isij suri nosurien se kami ewelili, ko nga kem elep; ejki, suri nosurien se kami otur pa, ko namwera kem ko kami, rrapmajing lut sansan, nga puloli kapir.

2

¹ Ko norrorrmien suk eterter nga sete bevinuk kele ji kami poro bololi kami kaprunge p̄isij pirpe daron nga mevinuk womu.

² Ko poro bololi kami kaprunge p̄isij, ko si puloli inu borngē p̄irres luwi? Kami ejki, suri inu nuloli pa kami kamrunge esij.

³ Ko nuli naul suk nga womu nga puloli sete mia-irpok, ko sete kapa-loli inu borngē p̄isij daron nga bevinuk, ko kaploli ma beir; suri erpok ko osorsan. Suri nurongwose, poro nga inu beir, ko kami jijle vajin kapir kele.

⁴ Daron nga moli naul nen, ko nulik rengo norongen nga m̄isij, nurngē esij elep, ko nuting elep. Sete nuwra norrorrmien ngok nga puloli nolo kami pivitan, ko nga ma puloli kaprongwose merrenien suk nga milep nga memrreni kami e.

Kaptelasi ko wor jinibb nga muloli m̄isij

⁵ Ko poro nga san ololi inu nolok evitan, ko sete ololi inu kis kobbong, ko erpe ololi kami jile nolo kami evitan sapon. Iok nuwretun, sete nukrekris.

⁶ Ko suri erpok, ko erpe kami elep kamloli pa m̄nren orngē esij, ko setemun oto nga san puloli pirpok kele.

⁷ Ko erres kapla lweni vajin nolon, kaploli p̄ir luwi, suri nolon tivitan p̄etp̄eti.

⁸ Kaploli bbong p̄irres tevi, nga puloli p̄ilesi wose merrenien se kami.

⁹ Nuli erpok rengo naul suk nga womu nga borongwose nolo kami erpe, poro kaposuri nale suk jijle nir, rreknga ejki.

¹⁰ Ko si nga kami kamtelasi, ko inu kele nutlasi pa. Ko poro nanu san oto nga beṭlasi san suri, ko beṭlasi rengo no Kristo suri kami.

¹¹ Ko erpok ko puloli Demij sete putor tevtevnie kerr. Rramrongwose erres gerkerisen sen nir.

Daron nga Pol m̄ilik re Troas ko nolon orrum

¹² Nuvini Troas re majingen suk nga nomok-werwer suri Nospen nga Mirres se Kristo, ko nulesi Numal ololi metali nga milep san et̄pir tevik.

¹³ Ko nolok orrum sapon, suri Taetas ejki. Ko niko nuvel lingir, ko nuvini iel Masetonia.

Kristo ololi Pol easi

¹⁴ Ko nuwra erres wor elep tevi Atua nga tetajer ololi rramok-asi suri Kristo, ko ololi mapun nga m̄irres sen nga muto ji kerr suri rramrongwose ni, esesbel iok jijle nir.

¹⁵ Suri Atua ololi kerr rramirpe mapun nga m̄irres se Kristo rengo gunsu nir nga marivi sen, ko para-lai mauren nga m̄irres; ko re kele gunsu nir nga para-van re mijen.

¹⁶ Tevi nir nga marosuri, mapun ngok erpe mapu mauren; ko tevi nir nga para-van re mijen, erpe mapu mijen kobbong. Ko si orongwos puloli nanu ngel nir?

¹⁷ Suri jinibb elep arok-werwer rengo nale se Atua nga bbong parla nevōt ren. Ko kem sete namsilveni nolo kem sapon. Atua okoni kem, ko namok-majing rengo no Atua ko rengo derteren se Kristo.

3

Sel nga mimerr ko sel nga m̄itra

¹ Ko iok nantipatun kele nga nabrij melmelas rrek? Rrek namirpe jinibb sapor ko nammerreni san puli naul nga pusrōvi kem nga nablai tevi kami, rrek kami kapuli naul san nga pusrōvi kem nga nablai tevi jinibb m̄inij nir?

² Ejki! Kami ko pa kamivi naul se kem, nga maruli rengo nolo kem, nga jinibb jijle nir marlesi ko marlesi wose.

³ Ko oto limjer vajin nga kami kamivi naul san se Kristo nga kem nammajinge, nga maruli sete tevi pensil, ko tevi Nerīn se Atua nga derteren sen mutoe. Naul nen sete mariki re nevōt, ko re ma nolo jinibb.

⁴ Nanu ngel nir namrongwoser erres suri Kristo. Namrij re no Atua.

⁵ Sete namwera kem namviter rrek namrongwos nabwera namsan ko namloli

nanu san, ejki. Atua ko eptei kem ko ela derteren tevi kem.

⁶ Ni ko ololi namvitere nabmajing reнге Sel nga Mimerr sen. Sel ngel sete erpe nga tuwi nen nga muto reнге naul san, ejki. Nga ngel, ko Nerñin On ko eviseni. Naul derteren nen ejki, ko nir nga marvijuri para-mij kobbong. Ko Nerñin On derteren sen otoi, ko orongwos ðila mauren.

⁷ Sel nga mñtra nen nga mariki re nevõt nir nga mñmajing bbong mijen eplari tevi nosrövien nga milep. Meri Isrel nir sete arongwos parmeteni Moses non suri erinrin elep ðelak ren. Mian ko sete epriv ko nosrövien nen osuw.

⁸ Poro pipok, ko nosrövien ne sel nga mimerr se Nerñin On ðirinrin pilep ðiasi.

⁹ Suri Sel se Moses nen ewer lokloksi bbong jinibb, ko nosrövien nen otoi. Ko Sel nga Mimerr ngel ololi jinibb omom-sawos erres, ko niko nosrövien nen pilep asi.

¹⁰ Sel nga mñtra, nosrövien nen otoi bonevis, ko lelingenok ejki, suri etra vajin. Ko nga mimerr vajin nosrövien nen elep nga elep lingi.

¹¹ Sel nga mñtra oto toto bbong, ko nosrövien nen otoi. Ko Sel nga putu tetajer, nosrövien nen elep asi lenglengen.

¹² Suri nga namosuri nga Sel nga namok-werwer ren erinrin erres erpok, no kem sete emanune sapon;

¹³ ko sete namrongwos nabloli pipre Moses, nga mñtawi ore non tevi kalik san, nga puloli mñri Isrel nir sete parlesi nosrövien nga muto ren nga moka ngatan.

¹⁴ Ko mñri Isrel nen nir, erpe nor eseser wonti vane. Ejpari lelingenok, erpe kalik nen oto orer vane daron nga mareve naul ne Sel nga Mitra. Suri Kristo esan kobbong orongwos ðila tweni jir.

¹⁵ Ko ejpari lelingen, daron nga mareve naul se Moses, ko erpe kalik nen oto ore norrorrmien ser vane.

¹⁶ Ko daron nga san erieni lweni ni van ji Numal, ko kalik nen ejki tweni vajin.

¹⁷ Suri Numal evi Nerñin, ko daron nga Nerñin se Numal mivini, ko okla tweni noslosloen jijle nir nga rramsolosloir.

¹⁸ Ko kerr jijle, nanu san ejki nga muto ore no kerr, ko rrammeteni erres nosrövien se Numal. Ko daron nga rrammeteni, ko Numal, nga mivi Nerñin, tetajer mok-rieni kerr reнге nosrövien nga tetajer mok-an mare, nga mian ko rrapa-sorsan tevi ni.

4

Derteren nga milep jer nen oto wor ji Atua

¹ Ko ngok, suri Atua orrorrmi kem ko ela majingen ngel tevi kem, sete nolo kem evitan.

² Ko namtur ngasue sel nga marloli silveni nanu nga marsij nir. Sete namvijuri gerkerisen, ko sete namrieni nale se Atua pivi gerkerisen, ko nomok-werwer limjer re weretunen. Jinibb jijle arongwose, ko Atua kele erij se kem nga namweretun.

³ Ko poro nospen nga namok-werwer ren oto kelti sapon, ko oto erpok ji nir bbong nga marok-an re mijen.

⁴ Nir ko sete arosuri, ko atua ne ngatan ngel opongi mete norrorrmien ser nga sete parlesi moron ne nosrövien ne nospen nga mñrres ne Kristo, nga musorsan pini tevi Atua.

⁵ Suri sete namok-supe suri kem lweni, ko namsupe Numal Iesu Kristo, nga mñlengi kem namivi jinibb ne majingen sen.

⁶ Suri Atua, nga tuwi muwra "Moron piplari reнге nemalik", ni kele ololi moron sen omor vaseni vajin nolo kerr nga rraplesi wose nosrövien se Atua re no Kristo.

⁷ Ko nanu nga marres ðelak ngel nir namok-torir reнге nibe kem, nga mirpe bbong sospen dan san. Ko niko rramlesi nga derteren nga milep jer nen oto wor ji Atua, ko kem ma ejki.

⁸ Jinibb tetajer aroji kem, ko sete artor pini nolo kem. Namtur mñemav, ko sete namtur pot.

⁹ Arok-loli esij tevi kem, ko sete Atua elinglingi kem namsan. Artoni kem namvitan, ko sete nammij.

¹⁰ Ko tetajer erpe namwosi mijen se Kristo reнге nibe kem. Ko ngok puloli mauren sen kele piplari reнге nibe kem.

¹¹ Tetajer kem nammaur ma, ko suri namvijuri Iesu, ko jinibb nir arwera parsoni kem van re mijen. Ko ngok puloli mauren se Iesu piplari reнге nibe kem ne mijen.

¹² Niko derteren ne mijen emajing ji kem, ko niko ololi mauren emajing ji kami.

¹³ Naul On owra 'Nuosuri, ko niko nurij'. Nerñin On ko ela nosurien nen, ko Nerñin On kele elik ji kem. Ko niko kem kele namosuri, ko namok-rij.

¹⁴ Ko namrongwose, Atua nga muloli Numal Iesu emaur luwi re mijen, puloli kem kele nabmaur luwi kele tevi Iesu, ko puloli nabtur tevi kami reнге non.

¹⁵ Nanu jijle oto nga piwilwil se kami, ko niko merrenien se Atua daron nga mijpari jinibb elep vajin, ko puloli jinibb pilep parwera erres wor tevi Atua ko parsurövi.

Rrambitbo re Atua

¹⁶ Niko sete nolo kem evitan. Ewretun nibe kem ngel vare okan ngatan nga pimij,

ko nolo kem ma, Atua nabong jijle okloli nga pian ko pimerr luwi kele.

¹⁷ Ko norongen nga n̄isij ngel ewelili bbong ko oto bbong omrrol, ko puloli rrapvitere nosrövien nga milep nga milep temijjal, ko nga puto tuwi ngok vini.

¹⁸ Ko niko sete namok-meteni nanu nir nga mete kem ngel nir marongwos parlesir, ko namok-meteni ma nanu nir nga mete kem sete arongwos parlesir. Suri nanu nir nga meter marlesir paran ko parsuw kobbong, ko nanu nga ma sete rramlesir lelingenok parto tuwi ngok vini.

5

¹ Rramrongwose nga poro nga nibe kerr ngel, nga marirpe naim nga rramlik rer iel ngatan, poro nga parsij vajin, ko Atua p̄ilai naim nga mimerr tevi kerr. Nanu ngok, sete san emajinge; oto re melrin mare, ko puto tuwi ngok vini.

² Renge naim ngel iel ngatan orongwos rraprunge p̄isij, ko rrammerreni lengleng rraplik re naim nga re melrin nen.

³ Ko nibe kerr nga mimerr pirpe kele sunsun nga mimerr nga rrapuri, puloli sete erpe rrama-malmal.

⁴ Rramlik mirpel re nibe kerr ko rramrunge esij, nanu nir arrowsi kerr. Iok sete erpe rrammerreni rrapmalmal, ko rrammerreni ma rrapuri nibe kerr nga marmerr nir. Ko niko mauren pia-torrlai mijen.

⁵ Atua ko ololi rramvitere nanu ngel, ko ni kele ela Nen̄in On, nga muloli rramrongwose erres nga rramivi sen.

⁶ Niko sete nolo kerr evitan nabong san, suri rramrongwose nga daron nga rramlik re nibe kerr ngel, ko setewor rramlik re naim se Numal.

⁷ Rrambibto bbong re Atua; setewor rramlesi nanu nga marres nir nga ni pia-lai tevi kerr.

⁸ Niko nolo kerr sete evitan, ewretun jinibb elep arloli esij tevi kerr, ololi rrammerreni rrapiel lingi nibe kerr ngel ko rraplik ji Numal.

⁹ Ko nanu nga milep nga rrampelak tweni, poro rramlik malum re nibe kerr ngel rreknga ejki, evi nga majingen se kerr puloli ni p̄ir.

¹⁰ Suri kerr p̄etp̄eti rrapatur ko wor nabong san re no Kristo, ko ni puwra suri majingen se kerr sisamis, poro p̄irres rreknga p̄isij, ko pia-lai nowli kerr.

Kristo emij sere kerr

¹¹ Niko nammetutue Numal, ko namok-p̄elak nga nabrevei jinibb nir. Sete namrongwos nabsilveni nolo kem e Atua, ko nuwra rrek kami kele kamrongwose nolo kem.

¹² Iok ete namok-sursurövi kem kele; kami kobbong orongwos kapsurövi kem, daron nga kamjiljilwer tevi nir nga marsursurövi lweni nir suri nanu ne vare nir, ko nanu ne nolor ejki.

¹³ Suri poro nga ewretun namlengleng, ko namlengleng suri namok-loli majingen se Atua. Ko poro norrorrmien se kem erres, ko iok evi nga nabwilwil se kami.

¹⁴ Merrenien se Numal owowomue kem, suri namrongwose, san emij sere jinibb jile. Iok erpe nir jijle armij.

¹⁵ Ko ni emij serer, nga daron nga marmaur malum, ko sete parmaur suri nanu nga nir kobbong marmerrrenir, ko parmaur ma nga parmajing se ni nga mimij serer ko mimaaur luwi.

¹⁶ Niko setemun namlesi nanu nir erpe jinibb kobbong nir marlesir. Bonevis ko namlesi Kristo erpok, ko lelingenok vajin ejki mun.

¹⁷ Suri poro san okorti tevi Kristo, ko evi jinibb nga mimerr. Nanu nga martera nir arasi pa, ko nanu nga marmerr nir arini vajin.

¹⁸ Atua ko evi batu nanu jijle ngel nir. Ni ko ololi namivi lweni selen, ko ololi kem nammajing sen nga nabsuḗ tevi jinibb nir nga nir kele parivi lweni Atua selen nir.

¹⁹ Erpe Atua emajing rrrungi Kristo nga puloli jinibb jijle parivi lweni selen nir. Setemun puwra lokloksir suri nololien ser nir. Ko ololi kem namivi jinibb sen nga nabsuḗ suri nosḗen nga n̄irres sen, sel nga jinibb nir parivi lweni selen.

²⁰ Erpe namivi devje nevre Kristo; erpe Atua erij re kem jingo kem. Namngoni kami eterter rege majingen se kem se Kristo, kapini kapivi sele Atua.

²¹ Ni nga n̄irrlenge puloli nanu nga n̄isij san, Atua evrrali erpe jinibb nga n̄isij, nga puloli kerr nga rrama-korti vajin tevi Kristo, rrapivi jinibb nga marmomsawos n̄irres re no Atua.

6

¹ Niko nammajing tevi Kristo, ko namngoni eterter nga sete kaplokdoksi nanu nga n̄irres p̄elak nga Atua m̄ilai tevi kami.

² Suri Atua owrai rege Naul On, 'Renge daron mawos nen ko nurnge nale se kami, ko rege nabong mawos nen ko nula mauren tevi kami.' Lelingenok le evi daron mawos nen; nabong mawos nen evini le pa.

Majingen se Aposol nir

³ Nammusus nablingi niblaot san puto ore san, suri jinibb nir tarwer lokloksi majingen se kem.

⁴ Ko oto limjer rege majingen se kem totoklai nga namivi jinibb se Atua. Jinibb

elep arloli esij tevi kem, ko namtur eterter, pesveni nat esij p̄etp̄eti, namrunge esij,

⁵ jinibb arvirrali kem, arwirre kem van re naim ne nekaien, jinibb arpalpal vi-jajeng. Nam̄pelak lenglengen, numer aji kem, sete namrongwos nabmatur.

⁶ Ko tetajer namvijuri sel nga mumom-sawos m̄irres, namvijuri norongwosien nga m̄irres, namloli nolo kem epriv, nam-loli erres tevi jinibb jikle nir. Sete namsil-veni nolo kem sopen, nammerreni jinibb jikle nir, ko Nem̄in On eptevi kem.

⁷ Nale se kem ewretun tetajer, ko Atua ela derteren tevi kem. Joro nuval nir nga marval e tweni murrun nga mumomsawos m̄irres arto re nevre kem rres ko nevre kem mair.

⁸ Nabong sopen, ko jinibb nir arongwos partori kem p̄irres; nabong sopen, ko arongwos parlokloksi nise kem. Nabong sopen, arij erres suri kem, ko nabong sopen, arij esij suri kem. Arwera namk-erkerasi jinibb nir, ko ejki, namweretun tetajer.

⁹ Jinibb elep sete arongwose kem, ko kami ma kamrongwose kem erres. Erpe nabmij, ko ejki, nammaur. Arvirrali kem ma, ko sete nammij.

¹⁰ Erpe nabting, ko ejki, nam̄ir. Erpe joro kem ejkie, ko namla nijor nga marres milep tevi jinibb elep. Erpe nijor se kem ejkie, ko erpe kele nanu p̄etp̄eti nir arivi se kem.

¹¹ Meri Korin nir, nale se kem tevi kami oto limjer, sete namsilveni sopen. Metali ne nolo kem et̄p̄ir tevi kami.

¹² Sete nanu san ekikior renge kem devjen nga kem, oto bbong ji kami nolo kami.

¹³ Nomok-rij tevi kami erpe nurij tevi natuk mawos nir. Kami vajin, kaptasi nolo kami.

Moron sete orongwos pibbōlji nemalik

¹⁴ Sete kapkorti p̄elak tevi nir nga sete marivi kalesia. Murrun nga m̄irres sete orongwos pukorti tevi murrun nga m̄isij. Moron sete orongwos pibbōlji nemalik.

¹⁵ Kristo sete orongwos p̄imajing korti tevi Demij. Kerr nga ramosuri, sete orongwos rrapkorti rragrag tevi nir nga sete marosuri.

¹⁶ Nai demij nga marsavi rrongrongvi sete orongwos putur renge Naim On se Atua. Ko kerr le rramivi Naim On se Atua nga mimaur tuwi ngok vini. Suri Atua owra 'Belik tevir ko pa, ko bevi Atua ser, ko nir parivi jinibb suk nir.'

¹⁷ Niko Atua owra kele, 'Kapruj ngasue nir nga marsij, ko kaplik ngasue nir. Sete kappipari nanu nga m̄isij, ko niko vajin βetkai kami

¹⁸ ko bevi Tata se kami, ko kami kapivi natuk norman ko nesevin nir.' Niko nale se Atua ne derteren p̄etp̄eti.

7

Pol eir suri m̄eri Korin nir

¹ Sele kem nir nga nammerreni kami, suri nga rijrijen se Atua oto erpok, rrap-wirre murrun nga m̄isij pibbōlji batu nai ngok. Rrapmetutue Atua, ko rraploli nibe kerr ko nen̄i kerr poron p̄etp̄eti.

² Kaprrorrmii kem renge norrorrmien nga m̄irres. Sete namloli esij tevi san, sete namlokloksi san, ko sete namla ore joro kami san e joro kem.

³ Nomok-rij erpok, sete evi nga bewer lokloksi murrun se kami. Suri erpe nuwrai pa, nutori kami re nolok. Rrammaur korti ko rrapa-mij korti.

⁴ Nolok otutun suri kami, nurnge erres suri kami. Nat m̄ikarkar re kem, ko sete nolok evitan sopen, ko nuir lenglengen.

⁵ Ko daron nga namini Masetonia e, ko sete namlesi mosien sopen, ko nat ekarkar p̄etp̄eti. Balpalen oto rrerrale kem, ko metutuen oto re liven.

⁶ Ko Atua nga mokla lweni nir nga nolor maran ngatan ela lweni kem daron nga Taetas miplari.

⁷ Nam̄ir luwi, sete kis nga namlesi Tae-tas, ko nga ni os̄pe kele nos̄pen ne kami. Owra kamrrorrmii inu elep, kamtengsik, ko kamrij tere nir nga marwera parwer lokloksik. Ko niko nuir elep.

⁸ Rrek naul nga moli ololi kamrunge esij, suri nale suk eterter, ko nolok sete olwi nga moli. Suri ewretun ololi kamrunge esij beblen;

⁹ ko mian ko kamlesi wose nanu nga mowrair, ko nolo kami olululwi, ko kamlinglingi murrun nir nga mowra surir. Niko nuir. Suri Atua emajing daron nga kamrunge esij ngok, ko niko nale se kem nga m̄iterter sete olokloksi kami sopen.

¹⁰ Suri daron nga norongen nga m̄isij miplari ji Atua, ko orongwos puloli nolo kerr pulululwi, ko rrapasi van re mauren. Iok erres. Ko norongen nga m̄isij nga mok-pelari re bbong ngatan ngel okloli rrapan re mijen.

¹¹ Ko norongen nga m̄isij nen nga mi-plari ji Atua ololi erres elep. Ololi nibe kami ous nga kaploli nise kami p̄irres luwi. Ololi kamlolarsi nir nga marloli m̄isij, ko kamvirralir. Kamrrorrmii elep nanu nga mowrair, ko kamrrorrmii tutuner. Kamloli erres p̄etp̄eti.

¹² Ko nurongwos bowrai, batu norrorrmien nga muloli moli naul nen tevi kami sete eplari re devjen ne ni nga muloli m̄isij, rrek re devjen ne ni nga marloli m̄isij tevi.

Ejki, nuli erpok nga puloli kaplesi wose rengo ne Atua norrorrmien se kami lweni nga kamrorrmi vane kem miterter.

¹³ Ko inu nulesi, ko nolok eir.

Ko nolok eir lenglengen daron nga Taetas mivini. Suri ni eir rengo murrin nga kami jikle kamla lweni ni daron nga milik ji kami.

¹⁴ Nusrosrövi pa kami tevi Taetas, ko ni elesi nuwretun. Nuwretun rengo nale suk minij nir nga mowrair tevi kami, ko nuwretun rengo kele nale nir nga mosrosrövi kami tevi Taetas.

¹⁵ Ko norrorrmien sen nga murrormi kami e okan mare daron nga murrormi jipari murru kami, nga tetajer kamvijuri nale sen tevi metutuen nga milep daron nga milik ji kami.

¹⁶ Niko nuir, suri nurongwose, kaposuri tetajer.

8

Murrin nga marlai tevi nir nga nevrer mumrrol

¹ Tasi kem nir, nammerreni kaprongwose sev nga meling kalesia ne Masetonia nir arloli, nga miviseni nolon nga mürres se Atua.

² Nir arlik rengo norongen nga misij nga murrorowe nir, ko joror ejki rres. Ko suri neiren ser nga milep, arloli nolor erres nga erres

³ ko arlai tevi tasi kerr nga marlik Jutia sev nga marongwos parlai, ko asi nga marongwos parlai. Nir kobhong

⁴ arsusi eterter tevi kem nga poro parongwos parwilwil se jinibb on nen nir.

⁵ Ko arloli asi nga namrorrmi, ko arlai womu nir lweni tevi Atua ko tevi kem, suri marongen se Atua.

⁶ Niko namwera jilijle tevi Taetas nga mitipatune nanu nga mürres ngel tevi kami, nga pivinvi ore pirres.

⁷ Suri kaman pa mare rengo nanu jikle nir: rengo nosurien, rengo nale, rengo norongwosien, ko rengo merrenien nga kammerreni inu e, nibe kami ous. Ko niko nammerreni kapan mare rengo nanu ngel kele.

⁸ Numusus bosoni kami, ko nurij suri nanu nga kalesia nga Masetonia marloli, nga borongwos weretunen kami merrenien se kami erpese.

⁹ Kamrongwose nalol nga mürres pelak se Numal se kerr Iesu Kristo. Ni joron elep nga elep, ko evel lingir nga pivini iel ngatan, nga puloli kami vajin joro kami pilep.

¹⁰ Renge inu nelesien suk, rrek erres poro kapvinvini ore vajin sev nga kamtipatune re

sia nga womu. Kami kamrorrmi womue, ko kami kele kamloli womu jere nir jikle.

¹¹ Ko ngok, kaploli jile vajin, nolo kami pimaaur ren. Ko kaploli tevi sev nga muto pa re nevre kami.

¹² Poro kammarong erres, ko Atua pir re sev nga kamlai. Sete orongwos kaplai piasie sev nga kamlingi nika, ko poro bbong pusorsan tevi, ko erres.

¹³⁻¹⁴ Ko re iok kele, numusus kami kappelak, ko nir minij nen parmosi bbong; ko suri lelingenok kami joro kami elep nika, erres nga kaplai tevi nir nga nevrer mumrrol. Ko poro nabong sapon kami nevre kami omrrol ko nir nijor ser elep, ko nir vajin arongwos parlai tevi kami. Erpok ko osorsan re devjen nuru kes.

¹⁵ Aruli pa rengo Naul On, 'Ni nga miser kortoni milep, sete oup pelak; ko ni nga miser kortoni ewelili bbong, sete numer aji.'

Taetas nir paran Korin

¹⁶ Namwera erres tevi Atua nga muloli Taetas kele orrorrmi tutune kami erpe kem.

¹⁷ Ko ni emarong daron nga namwerai tevi nga pian pilesi kami, ko ni kobhong emrreni elep pian.

¹⁸ Ko nabkoni san kele pipitevi Taetas. Mernen kalesia jikle arsurövi, suri ewerwer erres pelak rengo Nospen nga Mirres.

¹⁹ Mernen ko kalesia nir artobbtobbue nga pipitevi kem rengo nivelen se kem nga nablai nevöt ngel van. Ko nevöt ngel evi nga puloli jinibb nir parsurövi Numal, ko puloli jinibb nir parlesi wose nga nammerreni nablai se nir nga nevrer marmumrrol rengo nanu nir.

²⁰ Namtobbtobbue nuru ngok porpitevi kem mirpok nga puloli sete san purongwos piwer lokloksi kem rengo sel nga namloli tevi nevöt nga milep ngel.

²¹ Nammerreni elep sel se kem pusorsan petpeti rengo no Atua ko re kele no jinibb nir.

²² Niko nabkoni kele tasi kerr kele san, nga namok-lesi tetajer mivi drav nga marale mürres, ko lelingenok vajin daron nga milesi nga kamterter mirpok, ko emrreni lenglengen kele wor pipitevi kem.

²³ Ko Taetas eptevik nabong elep rengo majingen suk petpeti, ko re kele nga noborlai se kami. Ko tasi kerr minij nen nuru, nuru ormajing se kalesia petpeti nir, ko majingen se nuru ololi jinibb nir arsurövi Kristo.

²⁴ Ko niko kapmetmete nir ngok rengo merrenien nga milep, nga puloli kalesia petpeti nir parongwose nga namweretun daron nga namok-sursurövi kami.

9

Nevöt nga piwilwil se kalesia nir renge Jutia

¹ Nurongwose, nolo kami erres ðelak pa, ko boli tama sapon kele renge naul ngel suri nevöt ngok. Erpe kamrongwose, evi nga rraplai tevi kalesia nir iak Jutia.

² Nurongwose, kammorong pa nga kaplai sapon van, ko nusrövi pa kami tevi kalesia nir nga renge Masetonia. Nuwrai tevir, nuwra "Kalesia nir nga renge Akaea artur metmet nga parlai van, etipatun pa sia nga womu pa." Ko nolo kami nga nür mirpok ngok ololi nir elep kele iak Masetonia armarong kele parlai van.

³ Ko nukoni tasi kerr ngok nir nga puloli nale se kem ngok suri kami sete pivini pivi nale nawon, ko kaptur metmet ko pa terai, pirpe nga namsupe pa suri kami tevi mēri Masetonia nir.

⁴ Poro mijki, ko dea-pitevi mēri Masetonia nir sapon vinuk ko nada-lesi nga sete kamtur metmet, ko no kem tia-wis renge nale nga namwera suri kami, ko kami kele no kami tia-wis lenglengen.

⁵ Ko niko nulesi erres poro bokoni tasi kerr ngok nir parwowomue kem, parinuk ji kami ko parloli lilane nanu nir re devjen ne nevöt ngok. Ko erres ðelak nga kamwera pa kaplai. Ko mirpok ko puto metmet þirres tera daron nga kem nabinuk, ko puloli kele kaplai renge nolon nga mürres, ko sete suri marsoni kami.

Atua emrreni ni nga mīlai renge nolon nga nür

⁶ Kaprrormi nanu ngel: ni nga muruw muwelili þili tweni kele puwelili kobhong, ko ni nga muruw milep þili tweni pilep kele wor.

⁷ Jinibb jijle þilai ko wor pusorsan pirpe nolon nür nga þilai, sete nga puloli nolon purnge þisij e, rrek suri ornge marsoni. Suri Atua emrreni ni nga mīlai renge nolon nga nür.

⁸ Ko Atua joron elep temijpal, ko ni þilai nanu nir tevi kami tetajer, puloli tetajer nevre kami sete pumrrol re nanu san, ko orongwos vajin kaplai tetajer tevi nir si nga nevrer marmumrrolle nanu nir.

⁹ Erpe Naul On owrai, owra 'Ni elai elep tevi nir nga nevrer marmumrrol. Sel nga mürres sen oto tetajer.'

¹⁰ Ko Atua nga mok-lai winen tevi nir nga maruw ko nanen nga rrapaani, þilai kele winen pilep tevi kami, ko puloli kapili tweni pilep kele wor suri sel nga mürres se kami.

¹¹ Ko orongwos kaplai pilep tevi jinibb nir tetajer, puloli jinibb pilep parwera "Erres wor" tevi Atua suri nevöt nga kami kamlai ko kem namtori van jir.

¹² Suri majingen nga mürres ngel nga kamloli ololi nanu eru kis: ela se kalesia nir nga nevrer marmumrrol, ko ololi kele nga jinibb elep arwera erres wor tevi Atua.

¹³ Nanu nga mürres nga kamloli ngok ololi jinibb nir arlesi wose nolo kami, ko puloli parsurövi Atua, suri kamosuri nospen nga mürres se Kristo erres, ko suri kamlai tevi nir ko tevi jinibb jijle nir.

¹⁴ Ko puloli parlot suri kami nga parrormi kami pilep suri nanu nga milep nga Atua muloli renge nolo kami.

¹⁵ Rrapwera erres wor elep tevi Atua suri merrenien nga mürres asi nga ni mīlai tevi kerr!

10

Pol erij tevi nir nga marwera derteren ser ejkie

¹ Kami sopor kamwera nga inu nomok-manun re no kami, ko nga nomok-rij eterter sapon re bbong daron nga mēlik ngasu vajin. Ko numrreni kapmurrong nale suk ngel, suri Kristo kele nolon ean ngatan ko nolon emaot.

² Erpok kele, kami sopor kamwera nga mevijuri murrun ne iel ngatan. Daron nga bevinuk vajin þelesi kami, ko rrek þerij wor þiterter sapon tevi nir. Sete kaploli nga þerij pipok.

³ Ewretun namlik iel ngatan, ko sete namvijuri murrun ne iel ngatan.

⁴ Ko joro nuval se kem sete arivi nanu ne iel ngatan, ko derteren ner otoo nga Atua mīlai, nga nabrrerrarre lat nga Demij murrul totkoni. Ko namok-rrerrarre nale gerisen

⁵ ko namok-lokloksi norrorrmien jijle nga mian mare ko nga muto ore ko muloli jinibb nir arrelenge Atua. Ko namrrol totkoni norrorrmien jijle nir se jinibb nir, ko namloli marosuri Kristo.

⁶ Ko daron nga kami kaposuri erres vajin, ko nabort alje nir nga marmusuri parosuri.

⁷ Kamok-meteni bbong nanu ne vare nir. Poro san ok-wera nga ni evi jinibb se Kristo, ko ni purongwose ko wor nga kem kele namivi jinibb se Kristo.

⁸ Rrek ewretun nurij elep ðelak suri derteren suk nga Numal mīlai tevi kem aposol. Ko derteren nen sete evi nga nablokloksi kami, ko nga nabort jilijle kami. Ko sete nok ewis nga mērij mirpok suri derteren nen.

⁹ Ko numusus bololi kapmetutue inu suri nale nga moli re naul suk nir.

¹⁰ Suri kami sapon kamok-wera "Pol naul sen nir arwun saute nale nga miterter. Ko daron nga ma mīlik ji kerr, evi jinibb

nga milemij nawon, ko nale sen nir armel-jariv nawon.”

¹¹ Nir nga marij mirpok parmetmet ko wor, suri daron nga nablík vajin ji kami ko nabloli vajin pusersan pirpe nale se kem nga marto renga naul.

Pol erij tevi nir nga marwera ni os-rosrövi lweni ni

¹² Ko nammetutu nabwera kem namrres asi nir nga marok-wera nir lweni niser aran mare. Ko nir arlengleng, suri tetajer arok-wera nga nir marres, ko arok-meteni lweni bbong nir kis kobbong.

¹³ Ko kem nammusus nabsursurövi kem pirkok suri nanu nga sete musorsan nga nabrij suri. Nabrij bbong suri majingen nga Atua mukoni kem nabloli. Ko majingen se kem ejpari kami kele.

¹⁴ Ko niko sete namsursurövi þelake kem lweni, suri kem namla nosþen nga mïrres evinuk ji kami.

¹⁵ Ko sete kem namok-sursurövi kem suri majingen nga jinibb mïnij muloli. Ko nammerreni nga kami kapan mare renga nosurien se kami, puloli majingen se kem pivini mare kele iok. Ngok mirpok tetajer nammerreni nabloli.

¹⁶ Ko nabwerwer renga nosþen nga mïrres renga vanu nga ngasu wor nir e kami vajin, lat nga setewor jinibb san evan ewerwer. Ko erpok sete nabsursurövi kem suri majingen se jinibb mïnij.

¹⁷ Ko Naul On owrai owra ‘Sete san pusrurövi lweni ni, pijki, ko pusrövi ma Numal.’

¹⁸ Nir nga marok-wera nir lweni niser aran mare sete arweretun. Atua kobbong esan orongwos puwra jinibb san erres rreknga erpese.

11

Pol erij tere aposol ne gerisen

¹ Kaplinglingi ta inu þerij mun se lenglengen sopon.

² Nurrormi terae kami, erpe Atua kele orrormi terae kami. Kami kamirpe nesenwarreng nga setewor mian ji jinibb san, ko nga inu nulngi ore pian ji Kristo kis kobbong.

³ Ko numtutu vajin suri nulesi erpe nga nir nga marini ji kami ko marok-rij melmelas marwera niser maran mare ko marivi ‘aposol’, erpe parlökkloksi vajin norrormien se kami nga kamlingi pa renga Kristo. Erpok kele numet nga mïsiþ nen muloli tuwi daron nga mïkrekrasi Iv renga nale ne neni rretrrun nga muwrai tevi.

⁴ Suri kammarong pae nir arinuk ji kami. Ko arwerwer ma suri Iesu, ko nale ser suri Iesu arinijnij wore. Ko arwerwer suri

Nemïn On ko suri Nosþen nga Mirres, ko nale ser suri ngok nuru kele arinijnij wore. Ko kamosuri bbong nale ser, nga sete pa osorsan tevi nga inu nuwerwer e ko nga kamosuri womu.

⁵ Niser mïrres O! Ko inu nisek sete ean ngatan rragrag renga nir.

⁶ Ewretun re devjen ne rijen, sete nurongwos þerij kemkamne erpe nir, ko re ma devjen ne norongwosien, sete nuan ngatan rragrag re nir. Ngok kamrongwos pae erres.

⁷ Rrek nuloli esij nga sete nungoni nevöt san ji kami daron nga miewerwer renga Nosþen nga Mirres se Atua tevi kami, rrek? Ko nuloli inu nuan ngatan, ko kami kaman mare.

⁸ Ko nuloli kalesia mïnij nir arwulik daron nga memajing ji kami. Erpe nuvnae nir nevöt ser nga puwlik daron nga memajing se kami.

⁹ Ko tetajer daron nga mïelik ji kami iok, poro nevrekk pumrröl re nanu san, ko tasi kerr nga Masetonia arok-lai tevik, ko sete nuloli kami kamþelake tevik. Ko numusus bololi pirkok nabong pisan.

¹⁰ Nuwretun renga weretunen se Kristo nga muto jik, nok eterter nga pirkok ko pa tetajer renga iok Akaea, ko sete san piwer orek nga mosrosrövik renga.

¹¹ Ko suri sev sete nungoni nanu san ji kami? Suri nga sete numrreni kami? Ejki, Atua ko orongwose nga memrreni kami elep!

¹² Ko þetajer nga bololi pirkok. Erpok ko bolökkloksi nale se aposol gerisen nen nir nga marok-sursurövi nir lweni, marok-wera marmajing osorsan erpe inu.

¹³ Nir sete arivi aposol weretunen. Ark-erkeris suri majingen ser, ko arloli mete jinibb owonwon, ko arloli jinibb nir arormi nga marivi aposol se Kristo.

¹⁴ Ko sete rraptaole iok, suri Demij kele ololi mete jinibb nir owonwon, ko ololi arormi ni evi anglo ne moron!

¹⁵ Niko jinibb sen nir arloli osorsan erpe ni daron nga marloli mete jinibb owonwon ko marwera marmajing suri sel ne murrun nga musorsan. Atua putor vitrangir pilep suri nanu nga marloli.

Norongen nga mïsiþ se Pol

¹⁶ Sete kaprormi nga inu nulengleng. Ko poro ewretun kamrormi ko erpok, ko kaplinglingik bosrosrövik mun sopon pirpe lenglengen san!

¹⁷ Berij le sopon; rrek nale suk sete pivi nale se Numal, ko pivi nale se san nga mïlengleng.

¹⁸ Ko suri nir elep arsursurövi nir lweni suri nanu nga nir kobbong marloli, ko rrek inu kele bololi pirkok, bosrosrövik sopon.

¹⁹ Kami norongwosien se kami oteo, a? Ko niko kammorong bbong kaprunge nale se nir nga marlengle.

²⁰ Kammorong bbonge san nga mukoni lokloksi kami, san nga mīkrekrasi kami, san nga mivnae ji kami, san nga murrormi ni evi jinibb san ko muwje vasu kami.

²¹ Numanun nga bowrai, ko daron nga kem namlik ji kami, ko kem sete namviter ko nabloli pipok!

Ko poro san owra pusrosrōvi ni lweni, ko inu kele bololi pipok. (Kamlesi nurij se lenglengen vajin!)

²² Nir arivi mēri Ipru, a? Ko inu kele nuvi san. Meri Isrel ko nir? Ko inu kele. Metka se Epram ko nir? Inu kele.

²³ Jinibb ne majingen se Kristo ko nir? Rrek nulengle nga bowrai, ko bowrai tama: inu nuasie nir renge iok. Nurat elep asie nir, nuan re naim ne nekaien nabong elep asie nir, arvirralik vavis kis asie nir, ko otomori bemij vavis kis.

²⁴ Valim kis ko nupal ji mēri Isrel nir nga marvirralik ejpari ngavōl itul drromon esij (39).

²⁵ Vatul ko mēri Rom nir arevjik tevi nai nga milep san, ko nabong san jinibb sopor artuwek e nevōt. Drrav nga mēsa rer nir, itul kis arron. Ko rengen drrav nga itul nga marron nga, rengen san, nuilong jer rengen dis nutrin ko nutpog san.

²⁶ Nivelen suk elep lenglengen, ko nutori mijen suk rengen nuwi nga muwlu milep, rengen jinibb venao, rengen niaken suk nir mēri Isrel, rengen jinibb ne vare nir, rengen ngaim nga marlelep nir, rengen lolo merwer, rengen dis, ji nir nga markerkeris nga marwera marivi kalesia.

²⁷ Nuplak elep, nurat elep. Nabong elep sete numatur erres. Numer ajik, nolok emesmes, melas ajik suri sunsun nga mori sete emtul, eminmaniv, ko sete evtere melas.

²⁸ Ko nanu kele san nga muto jik tetajer evi nga nomok-rrormi pēlak kalesia nir rengen lat jille nir.

²⁹ Poro nir san nolon pimelisna, ko inu kele erpok, nolok emelisna. Ko poro nir san evitan, ko inu nurnge esij e.

³⁰ Poro bosrosrōvik, ko bosrosrōvik bbong suri derteren suk nga mijkie.

³¹ Atua, Tata se Numal Iesu Kristo orongwose nga sete nukrekris. Rapsurōvi ni tuwi ngok vini.

³² Daron nga mēlik Damaskas, ko jinibb nga mimetmete ngaim nen se numal Aretas ololi jinibb nuval sen sopor artur metmet re metali ne ngaim nga parrul totonik.

³³ Ko ejki mun, suri selek sopor arsongnik van re narr san ko arjurōnik rrrurngi lat nga mītṗir e san re naworr,

ko arjurōnik van ngatan re dan, ko nuwlu asi.

12

Pol owra tweni nanu nga milep nga ni mīlesi

¹ Bosrosrōvik ko wor. Bela sev ko pīrres ren? Ko bololi tama. Bosṗe vajin suri nanu sopor nga Numal mivisenir tevik.

² Nurongwose jinibb le san nga mivi kalesia san. Ko evi sia esngavōl drromon ivij (14) pa, ko arlai van re melrin itolin, nga mare jer nen. Nurrleenge, ematur lesi lebbong, rreknga niben mawos le wor mian. Atua kobbong esan orongwose iok.

³ Erpe nga mowrai, nurongwose nga mēnren arlai van re melrin, ko nurrleenge, ematur lesi lebbong, rreknga niben mawos le wor mian. Atua kobbong esan orongwose iok.

⁴ Ko arlai van re melrin; ko rengen ie ni ornge nanu sopor nga marres nga marres nga sete orongwos jinibb san pusṗe re nale san ne iel ngatan.

⁵ Niko bosrosrōvi mēnren; ko re inu devjen nga inu, sete nurongwos bosrosrōvik. Bosṗe bbong derteren suk nga mijkie.

⁶ Ko poro nga bosrosrōvik, ko iok sete nulengle, suri nuwretun bbong. Ko sete bosrosrōvik, suri numusus kapmetenik van mare, ko numrreni kaprrormi bbong nanu nir nga mololir pa ko nale nir nga mowrair pa.

⁷ Ko Demij ololi nanu san esij re nibek, ko nanu ngok erpe evrralik ko orrul totoni nolok nga sete pian mare pēlak, ko nga sete bolololik suri nanu nga marlelep nga mēlesir.

⁸ Ko nulot van ji Atua vatul nga pīla tweni nanu ngok jik.

⁹ Ko ni owra lweni teik, owra “Ewretun, nik derteren som ewelili, ko inu derteren suk puwosim ko pa. Ko daron nga nik niben mimelisna, ko inu derteren suk emajing erres pēlak vajin.” Ko niko nuir nga bosṗe pilep lenglengen nibek nga mimelisna vajin, nga puloli derteren se Kristo puto jik.

¹⁰ Ko niko numarong bbong derteren suk puwelili, jinibb nir parwer lokloksik, jinibb nir parojik, daron nga nūiterter pijparik, ko niblaot lele nir parto pelaot suri mevijuri Kristo. Suri poro derteren suk puwelili, ko ngok derteren suk pilep ko vajin.

Pol orrormi kalesi ne Korin nir

¹¹ Nurij se lenglengen nga mērij re devjen suk mirpok, ko kami ko kamloli mololi mirpok. Moro kami ko kapsurōvi inu, ko ejki! Inu sete ma nuvi jinibb nga welili

rengé nir ngok nga marsursurövi lululwenir marwera marivi aposol, ewretun sete nuvi jinibb san!

¹² Orongwos kaplesi kobbong emërer nga mevi aposol suri nelesien nir ko nanu nga marinijnij nawone nir nga mololir, rengé nolok nga mipriv, daron nga mëlilik ji kami.

¹³ Kamjikie nanu sansan kobbong nga meling kelesia mînij nir marloli, nile: sete kammeteni suri inu. Kaptelasi inu nga mololli mîsij tevi kami erpok!

¹⁴ Pivatul le pa bevinuk ßelesi kami. Ko sete bongoni nanu san ji kami. Sete numrreni nevöt se kami, ko numrreni kami kobbong. Suri sete erres nga bipi san puwngani tata sen, ko tata sen ma puwngani bipi.

¹⁵ Numarong ßela nevöt suk jilje, ko nibek kele, nga bewilwil se kami. Ko ewretun merrenien nga kammerreni inu e pian ngatan suri inu merrenien nga memrreni kami e ean mare?

¹⁶ Niko kamlesi vajin nga sete nuloli kappëlak suri inu. Ko rrek kapwera "Pol ololi erpok nga ßikrekrasi kerr, musuw ko pia-lai nanu san ji kerr."

¹⁷ Ejki nga ejki rres! Ko nir san nga mokonir vinuk ekrekrasi kami, rreknga ejki? Ejki rres ma.

¹⁸ Nuloli Taetas evan, ko nukoni kele tasi kerr mînij nen kele eptevi. Rrek Taetas ekrekrasi kami rrek? Ejki, suri ni norrorrmien sen osorsan bbong tevi nga inu, ko ni ololi osorsan bbong tevi nga inu nomok-loli.

¹⁹ Kami kamrorrmi rrek tetajer namok-rij nga nabwer ore nale se kami nga muwra pulokloksi kem? Ejki! Tetajer namok-rij erpe Kristo emrreni ko erpe Atua emrreni. Ko nanu jilje nga namloli, namloli nga nabwilwil se kami, sele kem nir nga nammerreni kami.

²⁰ Ko numtutu dea-vinuk ji kami ko delesi kami sete kamlik erres erpe numrreni, ko kami kele taklesi inu dololi nanu san nga kami sete kapmerreni. Suri numtutu delesi takrij latlat, nolo kami tilelep, nolo kami tumrrol, nolo kami tukul, takwor-worsur, takrij otot tevi kami lululweni, nolo kami tian mare, ko nat tikarkar ji kami.

²¹ Numtutu dea-vinuk ko Atua tuloli nok tiwis re no kami, ko dea-tengsi nir tilep nga tarloli pa nololien ko sete nolor olululwi, ko nga nolor timrreni aseni nesevin, ko nga tarloli tisij tevi nesevin.

¹ Vatolin le vajin bevinuk ßelesi kami. Naul On owra 'Poro jinibb san owra ßirij tere selen, ko nuru ßieru rrek nir ßitul ko pa parij se nale nen.'

² Nuwra bowrai tevi nir nga marloli pa nololien, ko tevi nir mînij nen nir, erpe nga mowrai pa re daron erwen nga mëlilik ji kami, ko bowrai lweni kele nga mëlilik ngasue kami vajin: Poro bolwi kele vinuk, ko botor vitrangi kami vajin.

³ Ko kaprongwose ßirres vajin nga Kristo erij rrurrngi inu. Ko ni daron nga muwra ßiete kami, ko ni derteren sen sete puwelili, ko derteren sen pilep.

⁴ Ewretun derteren sen ewelili daron nga murrul re nai pelaot, ko lelingenok vajin ni emaur rengé derteren nga milep se Atua. Ko kem namkorton tevi Kristo, ko kem kele derteren se kem ewelili; ko nabmaur rengé ni mauren sen re derteren nga milep se Atua rengé no kami.

⁵ Kaprrowrrow kami lweni. Kamtur ko rengé nosurien se kami, rreknga ejki? Rrek sete kamrongwose nga Iesu Kristo elik livö e kami? Poro pijki, ko kamtor jabble ßëtþeti!

⁶ Ko numrreni kami kaprongwose nga kem sete namtor jabble.

⁷ Namok-lot van ji Atua nga sete kaploli ßisij. Iok sete namloli nga jinibb nir parlesi kem majingen se kem erres, ko nga kami kobbong kaploli ßirres, pesveni jinibb nir arlesi kem majingen se kem erres rreknga erpese.

⁸ Suri sete namrongwose nabloli nanu san nga puto ore weretunen, ko nga ma putor jiljile.

⁹ Namir bbong daron nga derteren se kem ewelili ko derteren se kami elep. Ko namok-verus van ji Atua nga kapamomsawos ßirres ßëtþeti.

¹⁰ Niko nomok-uli naul ngel vinuk ji kami daron nga mëlilik ngasu ngel; nuli nga kami kapete lweni kami, ko poro bevinuk vajin ko setemun bololi nanu nga marterter sopen tevi kami rengé derteren nga Atua mîlai pa tevik. Suri derteren nen sete evi nga ßerrarre nanu, ko nga ma bololi pian mare.

¹¹ Rrek otomori nale suk pusuw ngel. Nuwra erres wor tevi kami. Kappëlak nga kapa-momsawos ßirres ßëtþeti; kaprunge nale suk nir; norrorrmien se kami pisansan; kaplik rengé demat. Ko Atua nga mivi Atua ne merrenien ko Atua ne demat ßilik livö e kami.

¹² Kapwera erres tevi kami lululweni tevi merrenien ko demat.

¹³ Kalesia jilje nir arwera erres tevi kami.

¹⁴ Ngel evi loten suk, nga nalol nga mîrres se Numal Iesu Kristo, ko merrenien

13

Bongsi nale se Pol

se Atua, ko gortien se Nem̄in On puto ji
kami ijle.

**Naul nga Pol Muli tevi
Kalesia Nir renge
GALESIA
Batu nale nga mivsviseni
lut nga parmteni naul
ngel puto suri**

Renge daron nga ni muli naul ngel, ko Pol ornge esij elep ko orrorrmi elep mēri Galesia nir suri nga nir elep arivel lingi nevisvisenien nga Pol mīlai tevir bonevis, ko arvijuri nevisvisenien se jinibb mīnij sopor nga marok-wer lokloksi Pol ko nospēn nga mīrres. Nir arwera kalesia nir parvijuri ko wor nale neseseien rreknga lo (law) nga Moses mīlai tuwi tevi mēri Isrel nir, ko paran re bae ser. Ko Pol owra eterter nga nosurien esan kis kobbong, nga jinibb muosuri Iesu Kristo, evi sel nga jinibb san pumomsawos pīrres re no Atua. Renge sel ngok, ko Nemīn On okpitevi kalesia nir, ko ololi murrūn ser erres pēlak easi jinibb san nga mīplak nga pivijuri nale neseseien tama san.

Pol owra "Erres" tevi nir

¹ Inu Pol, nuvi aposol san. Sete jinibb san elngik, suri nanu ngok sete eplari re devjen ne jinibb. Iesu Kristo ma elngik, ko Atua Tata nga muloli ni mimaaur luwi kele re mijen.

² Inu tevi kalesia niaken suk jille nir ne iel, namwera "Erres" tevi kami kalesia nga kamlik re vanu ngok Galesia.

³ Nurongwose, Atua Tata se kerr ko Numal se kerr Iesu Kristo porlai merrenien ko demat tevi kami.

⁴ Iesu Kristo emarong lweni ni pimij pīsre nololien se kerr, nga pītka tweni kerr re ngatan nga mīsij ngel. Iok evi kele marongen se Atua Tata se kerr.

⁵ Rapsurōvi ni tuwi ngok vini. Pipok ko.

Nale mīnij ngok nga kamrunge sete evi nospēn nga mīrres se Kristo

⁶ Nutaol lengleng nga kamwolu lingi Atua ngavilvil mirpok ko kamvijuri vajin nospēn mīnij san! Suri Atua everuse kami renge merrenien se Kristo.

⁷ Ko nospēn nga mīrres mīnij san ejki kele mun, ko jinibb kobbong sopor arwera parlokloksi kami ko parieni nospēn nga mīrres se Kristo.

⁸ Ko poro nga kem bbong, rreknga anglo san pivel re melrin vini ko pīwerwer re nospēn mīnij san tevi kami nga sete musorsan tevi nga inu mīewerwer pa ren tevi

kami, Atua putor vitrangi ko wor rengen suri.

⁹ Iok namwerai pa osuw, ko lelin-genok nuwra lweni kele: poro jinibb san pīwerwer tevi kami renge nospēn mīnij san nga sete musorsan tevi nga kamrunge pa musuw, Atua putor vitrangi ko wor rengen suri.

¹⁰ Nga mērij mirpok, kamrunge erpe numrreni bololi jinibb nir parunge pīrres kobbong re inu, rrek numrreni bololi Atua purnge pīrres re inu? Ko ejki, Atua kobbong, Rreknga numrreni bololi berres re no jinibb? Ejki! Poro nga bololi pipok ngok, setete nuvi jinibb ne majingen se Kristo. Ko niko nir nga marieni nospēn nga mīrres se Kristo ko nga marwer lokloksi inu erpok arkerkeris kobbong.

Pol ospē suri ela majingen sen ji Kristo erpese

¹¹ Tasik nir, numrreni kaprongwose nanu ngel: nospēn nga mīrres nga nomok-werwer ren sete eplari ji jinibb, ejki.

¹² Ko sete jinibb san elai tevik, ko sete jinibb san evisvisenik ren, ejki. Ko Iesu Kristo ko wor eviseni tevik.

¹³ Kamrunge pa nospēn ne sev nga nomok-loli daron nga mevijuri malum sel se mēri Isrel nir nga marok-lot rengen. Nomok-oloji pēlak kalesia se Atua nir; nuwra betelmajir pijpari loten ser pusuw.

¹⁴ Ko nuan mare renge sel se mēri Isrel nir nga marok-lot rengen, asi re mēri Isrel elep nga marivi dul suk. Ko nuvijuri pēlak bīrterwarrang se kem nir renge sel nga marwerai tuwi.

¹⁵ Ko Atua obtobtobbu womue inu re daron nga mematur malum re depai tasu suk, ko everuse inu, suri ni nolon nga mīrres. Ko emarong vajin

¹⁶ piviseni ni Natun tevi inu, nga bospē suri nospēn ne ni tevi jinibb ne vare nir. Re daron mawos nen, sete nususi rongorngge kele tevi jinibb kele san,

¹⁷ ko sete nuan Jerusalem nga belesi nir nga marivi aposol womu re inu. Ko nuvel ko numawos pa Arepia nuvesane, mian ko nulwi vini kele Damaskes e.

¹⁸ Vitunen vajin re sia itul, ko nuan vajin Jerusalem nga bosusi rongorngge tevi Pita. Ko nulik jin ejpari nabong esngavōl dromon elim (15).

¹⁹ Sete nulesi aposol mīnij san, Jemes kobbong, tasi Numal.

²⁰ Nanu nga molir ngok tevi kami sete arivi gerisen, arivi weretunen ko wor mawos Atua.

²¹ Mian ko nuan vajin re vanu Siria ko re vanu Silisia.

²² Ko kalesia nir nga marlik Jutia setewor arlesi wose nok.

²³ Arunge ma nospen nek nga marsupe mirpel: "Ni nga mok-ojoi kerr bonevis, lelingenok vajin okwerwer re nosurien nga bonevis mok-lokloksi."

²⁴ Ko arsurövi Atua suri inu.

2

Pol ejiljilwer tevi aposol minij nir

¹ Vitunen vajin re sia esngavöl drromon ivij (14), ko nuan kele Jerusalem e tevi Banapas, ko nula Taetas kele eptevik.

² Nuan suri Atua owrai tevik nga ban ko wor. Ko nukorti tevi nir nga martorir marivi jinibb nga marlelep, kem namsan kis. Ko nuwra suri nospen nga mürres nga nomok-werwer ren tevi jinibb ne vare nir. Suri dotor jabble re lat san, tuloli majingen suk tivi nanu nawon, ko nir ma parwera momsawose ko tevik.

³ Ko ejki, nir arlesi nanu jijle armom-sawos erres kobbong. Re devjen ne bae kele, ko sete aron tertere selek Taetas. Ni evi mēri Gris san, ko setewor ean re bae se mēri Isrel nir.

⁴ Ko nir sopor armerreni ni pian re bae. Nir ngok arkerkeris nga marwera marivi kalesia, ko arvij vini tweni parleslesi suri nivelen nga kerr rramiel sisarow ren re Iesu Kristo. Ko nir arwera parloli rrapivi demij maur kele.

⁵ Ko sete nammarong parasie kem sapon, suri nammerreni nabor totoni weretunen ne nospen nga mürres ngel puto pürres tetajer, suri namrormi kami.

⁶ Ko nir nga ma jinibb martorir marivi jinibb nga marlelep, sete arwera kele nale san tevik. (Poro pivi weretunen nga marivi jinibb nga marlelep evi nanu nawon ji inu, suri Atua elesi jinibb jijle nir arsansan kobbong.)

⁷ Ko nir sete arwera kele nale san tevik, ejki rres. Ko arlesi evi weretunen Atua elngi pa renge inu nospen nga mürres sen nga bowra tweni tevi jinibb ne vare nir, pirpe nga nillingi womu pae renge Pita nga ni puwra tweni tevi mēri Isrel nir.

⁸ Ko Atua ela derteren tevi Pita nga pivi aposol nga pian ji mēri Isrel nir, ko Atua kele ela derteren tevi inu nga bevi aposol nga bean ji jinibb ne vare nir.

⁹ Ko Jemes ko Pita ko Jon arlesi wose vajin derteren nga Atua mēlai tevik. Nir ngok, jinibb nir artorir erpe burtur. Ko arini vajin ko arrul totkoni komru Banapas nevre komru rres, erpe nomorivi seler. Ko armarong nga komru noboran ji jinibb ne vare nir, ko nir paran ji mēri Isrel nir.

¹⁰ Ko arwera bbong nga komru noborrorrmi Beres ko nir. Ko nanu ngok mawos kobbong, numrreni lengleng womu pae nga bololi.

Pol ewer ore Pita

¹¹ Ko mian ko daron nga Pita mivini Antiok vajin, ko nutur imare re non nutre ni, suri lololi sarrsarre.

¹² Suri womu Pita okaani nanen tevi jinibb ne vare nir. Ko daron nga jinibb sopor nga Jemes mukonir marini vajin, ko ni ewij ngasu kerkerasi jinibb ne vare nen nir, suri emtutue nir nga martori nale neseseien se mēri Isrel nir eterter, ko nga marungasi jinibb ne vare nir.

¹³ Ko nir mēnij nen nir nga marivi kalesia re mēri Isrel nir arkorti tevi Pita renge murrun gerisen ngok. Ko Banapas kele arwos tweni vajin renge gerisen ser ngok.

¹⁴ Ko daron nga inu mēlesi marloli mirpok, ko sete arivel mawos renge weretunen ne nospen nga mürres, ko nuwrai tevi Pita renge no nir jijle, "Nik kuvi mēri Isrel san. Ko kulik vajin erpe jinibb ne vare san, suri setemun kuvijuri nale neseseien se mēri Isrel nir, suri kuvi pa kalesia. Ko erpese vajin kuruj ngasue jinibb ne vare nir erpok, erpe kungasir kele, ko kuwra kupon tertere nir parlik pirpe mēri Isrel nir?"

Nosurien evi nanu nga milep ji mēri Isrel nir ko ji jinibb ne vare nir kele

¹⁵ Kem namiak namivi mēri Isrel, ko sete namivi jinibb ne vare nga mēri Isrel nir marungasir.

¹⁶ Ko lelingenok vajin kem namrong- wose nga jinibb san sete orongwos puloli lweni ni pumomsawos pürres re nga mivijuri nale neseseien se mēri Isrel nir, ejki. Orongwos pumomsawos pürres ko re bbong nosurien sen re Iesu Kristo. Ko niko kem kele namosuri pa Iesu Kristo nga Atua puloli kem nabmomsawos pürres suri nosurien se kem re Kristo, ko sete suri nga namvijuri nale neseseien. Suri sete san orongwos pumomsawos pürres re nga mivijuri nale neseseien, ejki.

¹⁷ Ko mēri Isrel nir nga martori nale neseseien ser nir eterter arungasi kele kem vajin, suri setemun namvijuri nale neseseien ser, ko namok-vijuri sel nga Atua puloli kem nabmomsawos pürres suri bbong nosurien se kem re Kristo. Ko nir arwera vajin kem nololien se kem otoo erpe jinibb ne vare nir, ko arwera kele Kristo evi batu nololien. Ko ejki nga ejki rres nawon!

¹⁸ Nurrerrarre tweni nale neseseien ser nir nga marok-wer ore nanu milep. Ngok sete evi nololien nga mēisij nga mololi mirpok. Ko poro nga bemajing lweni nale neseseien ngok nir, ko ngok ko ma erpe nololien nga mēisij suk putoe vajin!

¹⁹ Ko re devjen nga renge nale neseseien, numij ko pa ren. Nale neseseien

nen kobbong otor pinik. Ko ngok evi nga bemaure se Atua nga ßemajing sen vajin. Erpe arwuse totonik pa re nai pelaot tevi Kristo.

²⁰ Ko erpe inu vajin setemun numaur, ko Kristo ko vajin emaur renegek. Ko re nga memaur malum renege nibek ngel, numaur suri nosurien suk kobbong nga mosuri natu Atua. Ni emreniek elep, ko ela ni lweni suri inu.

²¹ Bololi ototvi vajin nale suk pumrrol: Merrenien se Atua, nga mukoni natun Iesu Kristo nga pimij sere kerr, elep nga elep temijpal. Ko nir nga marwera jinibb san orongwose pumomsawos þirres suri nga mivijuri nale neseseieren arkerkeris kobbong. Suri poro nale ser ngok evi weretunen, ko niko Kristo emij nawon vajin, ko merrenien se Atua evi nanu nawon.

3

Nale neseseieren rreknaga nosurien?

¹ E, kami ñeri Galesia, kamlengle. Siko ololi suri kami, nga muloli kamieli lingi Kristo? Nuwer metelepe mijen se Kristo renege nai pelaot tevi kami.

² Nuwra borongwos nanu sansan ji kami, ngel: Kamlai pa Nemim On suri nga kamvijuri nale neseseieren? Ejki, kamlai suri kamrunge ko kamosuri nosþen nga ñirres.

³ Erpese kamlengle temijpal mirpok? Kamtipatun pa re Nemim On, ko kamwera vajin kapvinvini ore re derteren ne nibe kami kobbong!

⁴ Nanu elep arpelolari ji kami, ko pesveni ko? Ejki, nuosuri wener partoe ko.

⁵ Bosusi kele: Atua nga mokla Nemim On tevi kami ko nga mokloli nanu nga marinijnij nawone nir livõ re kami okloli erpok suri nga kamvijuri nale neseseieren, rreknaga suri kamrunge ko kamosuri nosþen nga ñirres?

⁶ Erpok kele 'Epram osuri Atua, ko Atua owrai vajin nga ni omomsawos erres suri nosurien sen', erpe Naul On owrai.

⁷ Niko kamrongwose nir nga nosurien ser mutoe, nir mawos nen ko arivi metka mawos se Epram.

⁸ Naul On owra wowomu pae nga suri nosurien ser kobbong Atua pia-loli jinibb ne vare nir parmomsawos þirres ren. Ko niko Naul On owra wowomue tevi Epram erpel: 'Atua þirij þirres suri jinibb ne vare nir renege nik.'

⁹ Epram osuri Atua ko Atua erij erres suri Epram. Ko erpok kele nir þetþeti nga marosuri Atua, Atua erij erres suri nir.

¹⁰ Nir nga marmajil renege nale neseseieren nga parvijuri majingen nen, ko Atua

oungasir. Suri Naul On owra 'Atua ongasi jinibb jille nir nga sete marvijuri tajer nale þetþeti nir nga marto renege nale neseseieren.'

¹¹ Ko vesan kele, rramrongwos alje nga sete san orongwos pumomsawos þirres re no Atua renege nga mivijuri nale neseseieren, suri Naul On owra 'Mer nga bbong mumomsawos ñirres renege nosurien sen ko, ni ko pimaure.'

¹² Ko sel nga jinibb san pumomsawos þirres renege nale neseseieren sete evi sel ne nosurien, ejki. Suri Naul On owrai kele, 'Ni nga bbong mivijuri nale neseseieren nir pimaure surir.'

¹³ Ko Kristo ervei tweni kerr, ololi Atua setemun ongasi kerr, suri nga ni ela luwe nungasien nga Atua ongasi kerr ren, nga nale neseseieren musþe. Ololi erpok re nga murrul re nai pelaot, suri Naul On owra 'Jinibb san nga marevji pini, ko marruloni niben re nai san, ngok rramlesi wose nga Atua ongasi, suri ela norongen nga ñisij temijpal.'

¹⁴ Ko niko renege Iesu Kristo vajin Atua purongwos þirij þirres suri jinibb ne vare nir pusorsan tevi nga ñirij ñirres suri Epram. Ko kerr rramrongwos vajin raplai Nemim On nga Atua ñirijrij e nga þilai, suri nosurien se kerr.

Nale neseseieren rreknaga nale ne rijrijen?

¹⁵ Tasik nir, borrongrongvi re jinibb. Poro nga jinibb þieru pormarong kokorti re nanu san nga porloli ore marongen se nuru ngok, ko sete jinibb san orongwos vajin þirieni kele rrek puwra kele mun nale san kele pian ren. Suri orloli ore jile ko pa.

¹⁶ Ko erpok, Atua ela rijrijen sen womu pa tevi Epram, ko nale neseseieren nga miavini vitu sete orongwos þirieni. Ko Atua ela rijrijen sen ngok tevi Epram ko tevi metka sen san. Ko re iok, Naul On sete owra 'tevi metka som nir', ejki, ko owrai ma 'tevi metka som san'. Metka sen ngok evi Kristo ko.

¹⁷ Ko nanu nga milep nga mowra bowrainen, erpel: Atua elai pa rijrijen sen tevi Epram owomu. Ko vitunen, sia ongut vavij bbulin ngavõl itul (430) easi osuw, ko nale neseseieren ea-vini vajin. Ko niko nale neseseieren ngok sete orongwos pulokloksi marongen ngok se Atua ko þirieni rijrijen sen.

¹⁸ Suri poro nga nelaien se Atua eplari renege nale neseseieren, ko setemun orongwos piplari renege rijrijen. Ko Atua ela nawon pae tevi Epram suri rijrijen sen.

¹⁹ Ko erpese vajin re nale neseseieren? Evinu suri sev? Arevei oto tevi nale rijrijen

suri bbong nololien nir se jinibb nir. Ko arlingi oto erpok pijpari nga metka nen se Epram nga marlai nale rijrijen ngok tevi pia-pelari. Ko nale neseseien nir, Atua elair tevi anglo nir, ko nir vajin arlai tevi Moses, ko Moses elai tevi mēri Isrel nir.

²⁰ Ko daron nga ma Atua nūla nale rijrijen sen tevi Epram, ko ni esan kis kobbong elai mawose tevi Epram, sete jinibb san otur liven.

²¹ Ko erpok, nale neseseien ngok oto tere nale rijrijen se Atua rrek? Ejki nga ejki rres nawon! Ko poro nga nale neseseien orongwos puloli jinibb parmaur, ko niko vajin jinibb nir parmomsawos pīrres ren. Ko ejki, sete erpok.

²² Suri Naul On owrai pa nanu pētpeti nir arto pa re derteren ne nololien. Ko nale rijrijen kobbong vajin orongwos pīla tweni jinibb re derteren ne nololien suri nga marosuri Iesu Kristo.

Kerr pētpeti rramivi sansan re Iesu Kristo

²³ Ko daron nga nosurien ngok setewor mivini wor, ko nale neseseien owl ore kerr, ejpari nga nosurien ngok mīrrmali vajin.

²⁴ Erpe nale neseseien emetmete kerr mijpari nga Kristo mivini vajin, ko rramomsawos erres suri nosurien vajin.

²⁵ Ko suri nga nosurien mīrrmali vajin, ko nale neseseien setemun emetmete kerr vajin.

²⁶ Kami jikle kamivi natu Atua suri kamosuri Iesu Kristo.

²⁷ Suri kami pētpeti nga kampaptaes rengo Kristo, erpe kamuri pa mauren se Kristo.

²⁸ Ko kerr jikle vajin rramsorsan, poro rramivi mēri Isrel rrek poro rramivi jinibb ne vare, ko poro rramivi demij maur rrek poro rramiel sisarow, ko poro rramivi norman rrek poro rramivi nesevin. Kerr pētpeti rramivi sansane rengo Iesu Kristo.

²⁹ Ko poro kamivi jinibb se Kristo, ko kamivi vajin metka se Epram, ko kaplai vajin nelaen se Atua nga mīrijrij e rengo nale rijrijen sen.

4

Rramivi natu Atua

¹ Bowra rrongrrongvi re bipiwarrensang nga tata sen joron milep. Daron nga mēr wel nen muwelili malum, setewor otori joro tata sen san. Ko jinibb mīnij sopor nga tata sen mīlŋgir armetmete ni ko nijor nen nir, pian pia-jipari daron nga tata sen mīlŋgi nga ni pilep vajin ko pīlai nanu pētpeti nir vajin.

² Ko poro puwelili malum, ko pusorsan pini tevi demij maur se tata sen nga sete mutori nanu san evi sen.

³ Ko erpok kele re kerr. Daron nga rramwelili malum rengo sel se Atua, ko rramivi demij maur se demij nir ne iel ngatan.

⁴ Mian mian ko ejpari momsawos daron mawos nen vajin, ko Atua okoni vajin ni Natun. Ni eak re nesevin san, ko eak re daron momsawos nga nale neseseien murrul totkoni malum mauren se jinibb nir.

⁵ Ko ni evini nga pujri lweni kerr nga nale neseseien murrul totkoni kerr, ko nga kerr rrapivi vajin natu Atua.

⁶ Ko suri rramivi vajin natu Atua, ko Atua okoni Nerū Natun vini rengo nolo kerr, ololi kerr rramverus Atua evi Tata se kerr.

⁷ Ko niko kerr setemun rramivi demij maur, rramivi vajin natu Atua. Ko suri nga rramivi natu Atua, ko niko Atua pia-lai tevi kerr nanu jikle nga mīlŋgir parivi se natun nir.

Pol orrorrmi mēri Galesia nir

⁸ Ko erpok ko, bonevis kamrrerlŋge Atua, ko kamivi demij maur se demij nir nga sete marivi atua.

⁹ Ko lelingenok vajin, kamrongwos pae Atua (rreknga erresrres ma bowrai Atua orongwose kami). Ko erpese kammerreni kele kapluwi van ji demij ngok nir, nga marmelisna ko joror marjiki? Erpese kammerreni kapivi luwi demij maur ser kele?

¹⁰ Kamtori nabong sopor, ko navōl sopor, ko daron sopor, ko sia sopor nga marsup-super rengo nale neseseien se mēri Isrel nir!

¹¹ Numtutu deplak nawon pa suri kami.

¹² Niaken suk nir, nungoni kami eterter nga kapipe inu, erpe nga inu nurpe pa kami. Sete kamloli rragrag nanu nga mīsij san tevik.

¹³ Kamrongwose inu numsi re nibek daron nga mēwerwer re nospen nga mīrres tevi kami womu.

¹⁴ Ko mesien nga mulolik sete kamungasik tevi, nurongwos ma kamlesi evi nanu nga mīsij. Ko sete kamruj ngasue inu, ko kamlaik erpe anglo san se Atua, erpe Iesu Kristo.

¹⁵ Ko nibe neiren se kami ne wosenen? Nurongwose, re wosenen kami kapla tweni mete kami ko kaplai tevi inu, poro kaprongwose kaploli pīropok. (Erpe iok nuspe suri nolo kami nga mīrres nga sete murongwos pusuw tevi inu.)

¹⁶ Ko erpese kamok-rij tere inu vajin, kamloli inu nurpe vajin devje nuval se

kami? Rrek kamloli erpok suri nga m̄erij re weretunen tevi kami?

¹⁷ Ko lenglengen ne jinibb ne nevisvise-nien ngok nir arsurōvi kami re nale nga marivi neni rretrrun marres arwera par-lunū nolo kami rer. Ko partur ore kami vajin ko kami vajin kapsurōvi kis nir vajin.

¹⁸ Erres nga parsurōvi kami, poro wor nolor parres. Ko erres kele nga kamsurōvi inu daron nga m̄elik tevi kami. Ko suri sev kammosi re daron nga m̄elik ngasu vajin?

¹⁹ Natuk nir! O, nuḗlak elep re kami daron nga womu kamini kamivi kalesia, osorsan tevi nesevin san eḗlak nga puwosi bipi sen ḗiak. Ko rrek beḗlak luwi kele vajin pijpari nga nolo kami parini par-momsawos pirpe nolo Kristo.

²⁰ O, poro nga belik tevi kami lelingen ngel! Ko poro nga borongwos ḗerieni nale suk tevi kami! Suri nomok-rrormi lenglengen kami.

Jiljilweren suri Eka ko Sera

²¹ Kapwerai ta tevi inu, kami nga kammerreni kaplik reнге nale ne nesereien, sete kamrunge nanu nga nale ngok muwrai?

²² Suri aruli erpel, nga Epram natun norman eru. Tuwen evi natu Eka, nga mivi nesevin ne majingen sen; ko tuwen evi natu nesevin nga mivel sisarow san, nisen Sera, Epram wor nesen sen mawos.

²³ Ko bipi nga nesevin ne majingen muwosi, eak suri marongen se jinibb kob-bong. Nisen ko Ismael. Ko bipi nga ma nesevin nga mivel sisarow muwosi, eak suri rijrijen se Atua ko wor. Ni nisen ko Aesak.

²⁴ Ko ngok orrongrrongvi nanu ko san. Nesevin ngok nuru orirpe sel eru ngok nga jinibb san puruj mori lesie Atua. Sel tuwen nen eplari reнге botwen ngok Sinae, botwen nga Atua m̄ila nale nesereien tevi Moses. Ko nir nga marvijuri sel ngok arivi demij maur, erpe Eka ko metka sen nir.

²⁵ Ko niko Eka erpe botwen nga Sinae nga muto reнге vanu Arepia, ko erpe kele Jerusalem ne lelingenok, suri ni tevi metka sen nir arivi demij maur.

²⁶ Ko Jerusalem nga mimerr nen nga muto reнге melrin, ni erpe jinibb san nga mivel sisarow, ni ko evi tasu se kerr.

²⁷ Suri aruli erpel reнге Naul On: 'Kuḗir, nik nga kum̄er nga setewor kumvesi natun san rragrrag. Kupsvij ko kupkail suri kuḗir, nik nga setewor kumwosi bipi san wor. Suri ni nga mutur nawon, natun pileplep ḗiasie ni nga diwen sen mutoe.'

²⁸ Ko kami, niaken suk nir, kamivi natu Atua suri rijrijen sen, erpe Aesak, natu Sera.

²⁹ Ko erpe re wosenen, Ismael, nga m̄iak suri marongen se jinibb, okoji Aesak nga m̄iak suri rijrijen se Atua, ko erpok kele lelingenok arok-oji kerr.

³⁰ Ko Naul On owrai erpese? Owrai erpel: 'Kupwirr tweni nesevin ne majingen nuru natun, suri natu nesevin ne majingen sete orongwos ḗilai nijor se tata sen pirpe natu nesevin nga mivel sisarow pia-lair.'

³¹ Ko kerr, niaken suk nir, sete rramivi metka se nesen ne majingen ngok, ko rramivi ma metka se nesevin ngok nga mivel sisarow.

5

Kaptur ḗiterter reнге nivelen sisarow se kami

¹ Kristo ololi rramiel sisarow, ko owra rrapiel sisarow ḗetḗeti vajin. Ko ngok, kaptur ḗiterter reнге nivelen sisarow ngok, ko sete kaploli lweni kami kapivi luwi demij maur.

² Kapmurrong! Inu Pol, nuwrai tevi kami nga poro nga kaploli nir parevji kami reнге bae ser, ko ngok Kristo sete orongwos ḗila mauren tevi kami vajin.

³ Nuwrai eterter kele tevi jinibb jilje nga maran reнге bae se m̄eri Isrel nir nga nir parvijuri ko wor nale nesereien ser ḗetḗeti vajin.

⁴ Kamjkie Kristo, kami nga kammerreni kapmomsawos reнге nale nesereien. Kamruj pa ngasue merrenien se Kristo.

⁵ Ko kerr ma, Neḗin On se Atua eḗtevi kerr, ko rramteravi nga Atua pia-loli kerr rrapmomsawos suri nosurien se kerr kob-bong.

⁶ Suri bae evi nanu nawon reнге jinibb san nga mukorti pa tevi Iesu Kristo, poro ean pa reнге rreknga ejki. Ko nanu nga ma milep evi nosurien. Ko nosurien se kerr okpelari reнге merrenien se kerr nga rrammerreni jinibb nir.

⁷ Womu, kamwolu erres reнге mauren ne kalesia se kami. Siko ololi nga kami setemun kamvijuri weretunen?

⁸ Nanu ngok sete eplari ji Atua, nga mokveruse kami.

⁹ Jinibb sansan kobbong orongwos puloli delung nir parsarr.

¹⁰ Ko nurongwose, norrorrmien se kami sete orongwos ḗinije reнге nga inu. Nurongwose iok suri nga kamkorti pa tevi Iesu Kristo. Ko isi nga pivi m̄ernen nga moklokloksi kami, Atua putor vitrangī ko.

¹¹ Tasik nir. Kamrongwos pae inu norrorrmien suk suri bae. Nomok-wera nga kalesia nir setemun paran reнге. Ko niko arok-ojik suri. Nir arlesi murrun se Kristo nga mokla nawon mauren tevi kerr suri mijen sen reнге nai pelaot evi nanu nga

m̄isij. Suri armerreni nir wor parloli nanu sopor nga p̄ila lweni se nir, armusus Kristo p̄isan kobbong p̄ila se nir.

¹² Numrreni poro nga nir nga marwera parllokoksi kami re nga parevji kami rege bae ser parla nesip ser ko parevji loklokso lweni nir!

Kapla wenen ne Neñin On ko sete ne mauren tera se kami

¹³ Ko kami, niaken suk nir, Atua everuse kami tweni nga kapiel sisarow. Sete nale ne nesereien san orrul totkoni mun kami. lok erres. Ko nanu sansan kobbong ni le: sete kapwera "O, nanu san setemun orrul totkonik, inu bololi sev nga memrreni vajin", ko ngok kamvijuri lweni vajin mauren tera nga m̄isij se kami. Sete kaploli pirpok, pijki. Ko kaplila ma se kami lululweni suri merrenien.

¹⁴ Suri poro nga kupvijuri nale ngel, 'Kupmerreni selem pirpe nik luwi', ko ngok kuvijuri p̄etp̄eti pa nale nesereien ngok nir ko osuw.

¹⁵ Ko poro nga kaploli pirpe nanu rrum nir nga marijaji lululwenir, ko iok kapmetmet ren, takloklokso p̄etp̄eti lululweni kami.

¹⁶ Ko nuwrai tevi kami, kapvijuri Neñin On kobbong, ko sete kapvijuri mauren tera nga m̄isij se kami.

¹⁷ Suri mauren tera se kami etre Neñin On, ko Neñin On etre mauren tera se kami. Nuru ngok orivivi devje nuval se nuru, ko orok-tontoni kami; ko niko, kami sete kamok-loli sev nga m̄irres nga kammerreni.

¹⁸ Ko poro nga kapvijuri Neñin On, ko niko nale nesereien setemun orrul totkoni kami.

¹⁹ Ko majingen ne mauren tera se kami arto limjer, nir le ngel: murrun nga norman ko nesevin morojoji nuru mirpe guli,

²⁰ murrun nga marvijuri atua m̄inij nir, murrun nga marloli suri jinibb, murrun nga martertere nir, murrun nga marpalpal, murrun nga nolor marlelep, murrun nga marok-lololar, murrun nga marivi lolkul, murrun nga marwijwirir,

²¹ murrun nga nolor marvevna, murrun nga marm̄inmin, ko murrun nga marloli nanen san nga puloli bbong parkarkar ren, ko murrun lele nir nga marsorsan tevir marirpok. Nususur metue kami erpe nga mowrai womu: Nir nga marok-loli mirpok sete parlai batun vanu se Atua.

²² Ko wenen ma ne Neñin On erpel: merrenien, neiren, demat, nolon nga mipriv, drorin nga m̄irres, nolon nga m̄irres, nolon nga mokrrormi tutune nanu,

²³ nolon nga mimalum, ko nolon nga mimij nga sete orongwos pulolar. Nanu ngok nir arres p̄elak, ko poro nga jinibb san pulolir, ko sete nale nesereien san orongwos piplari suri, suri evijuri p̄etp̄eti pa nale nesereien p̄etp̄eti osuw.

²⁴ Ko nir nga marivi jinibb se Iesu Kristo arwuse mauren tera ser rege nai pelaot tevi murrun nga mokmerreni karkar nanu nir.

²⁵ Neñin On ela mauren tevi kerr, ko niko rrapvijuri vajin Neñin On.

²⁶ Sete kapsursurövi lululweni kami, sete kaprij kerkerasi lululweni kami, ko sete nolo kami pokvenvenae nanu se kami m̄inij.

6

¹ Niaken suk nir, poro nga kaptor sweri jinibb san nga mok-loli nanu nga m̄isij san, ko kami nga kamvijuri malum Neñin On kaḗete m̄ernen pumomsawos. Ko kaploli pirpok rege sel ne murrun nga mimalum. Ko kapmetmet re kami, suri murrun ngok tirvei kele nolo kami, ko kami kele takirpok.

² Kapwosi jilijle soloslo nga marrow se kami lululweni, ko niko kapvijuri p̄etp̄eti nale nesereien se Kristo pusuw.

³ Ko poro nga jinibb san nolon ean mare ko orrorrmi ni evi jinibb nga milep san, ko re weretunen ni evi jinibb nawon, ko ngok ni okkerkerasi lweni ni kobbong.

⁴ Kami sisamis kapmeteni suri majingen se kami sisamis luwi ko wor, ko sete kapmeteni viringsi tevi majingen se jinibb m̄inij. Ko niko kaprongwos vajin kaprij melmelas suri majingen se kami kis kobbong.

⁵ Suri Atua elngi majingen sisamis ji jinibb jijle nir nga nir parlolir. Ko niko sete erres nga kapmeteni viringsi majingen se kami tevi majingen se jinibb m̄inij.

⁶ Nik nga marok-visvisenim, kopoktutweni nanen ko nanu nga marres p̄etp̄eti nir nga komok-lair tevi ni nga mokvisvisenim.

⁷ Sete kaprongsarr, sete jinibb san orongwos p̄ikrekrasi Atua rege nanu ngel: sev nga jinibb san murwi, nanu nen pimauro ko wor.

⁸ Niko poro nga jinibb san purwi nanu nga marsij ne mauren tera sen, ko pia-tawe mijen ren. Ko poro purwi ma nanu nga marres nga Neñin On mimmrenir, ko pia-tawe mauren nga Neñin On m̄ilai nga sete orongwos pusuw.

⁹ Ko niko kerr nga rramok-loli m̄irres, sete nibe kerr pimijmij ren; suri rrapatawe wenen nen re daron mawos nen, poro bbong sete rraplinglingi majingen ngok ko.

¹⁰ Ko niko rraploli þirres ngarr tevi jinibb þetþeti nir, ko womunen, tevi kalesia nir.

Bongsi nale se Pol nga puwnir

¹¹ Kamlesi, nulul elelep tevi vajin inu nevrek vajin.

¹² Nir nga maron tertere kami nga kapan renge bae ser, lartul ngok nir arwera parij melmelas suri nanu nga muto re nibe jinibb kobbong. Ko arok-loli erpok suri bbong arwera jinibb tarojir poro parwera mijen se Kristo re nai pelaot esan ela mauren tevi jinibb.

¹³ Ko nir kele nga maran pa renge bae, nir kele sete artori nale neseseien, erpe kami kele sete kamrongwos kaptori, suri sete jinibb san orongwose putori nale neseseien. Ko nir arwera bbong parij melmelas suri nibe kami.

¹⁴ Ko renge inu ma, setete þerij melmelas re nanu pisan, pijki rres. Berij melmelas re bbong nai pelaot se Numal se kerr Iesu Kristo. Renge mijen se Kristo renge nai pelaot, Atua obbri tweni murrun ne derteren ne iel ngatan nir renge inu, ko ololi nuvel sisarow vajin re murrun ngok nir.

¹⁵ Ko erpok ko, poro nga jinibb san pian pa re bae, rreknga poro pijki, evi nanu nawon. Ko nanu nga milep ma evi mauren nga mimerr nga Atua nūlai tevi kerr renge Iesu Kristo.

¹⁶ Ko nurongwose, Atua þila demat ko netlasien tevi nir jikle nga marvijuri nale ngok, ko tevi jinibb sen þetþeti nir.

¹⁷ Setemun jinibb san puloli kele vajin vitunen bornge þisij suri nanu ngok nir. Suri nuwosi nabil elep re nibek nga devje nuval se Iesu marevjik rer. Nabil ngok nir arviseni nga inu nuvi demij maur sen.

¹⁸ Nurongwos mae tasik nir, merrenien se Numal se kerr Iesu Kristo puto renge nolo kami sisamis. Pirpok ko. Nuwra "Remse kami jikle.

**Naul nga Pol Muli tevi
Kalesia Nir renge
EPESAS
Batu nale nga mivsvseni
lut nga pargeteni naul
ngel puto suri**

Renge naul ngel Pol ospe suri norrorrmien se Atua nga jinibb jijle nir parlik parivi sansan renge Iesu Kristo. Ko gortien ngok eplari pa ji kalesia nir. Nir arirpe nibe Kristo, ko Kristo evi batun. Ko arirpe kele naim san nga Kristo mivi batu nabur nen, ko arirpe nesen se Kristo. Nale rrongrrongvien rreknga pikja nale ngok nir arviseni nga kalesia nir arivi sansan renge Kristo. Ko rramlesi Pol eir elep ko ejiljilwer kemkamie renge nale nga marres nir daron nga murrormi merrenien nga milep se Atua nga rramlesi renge Iesu Kristo nga mila mauren tevi kerr. Mian ko ospe kele suri lat nga liken ser puto suri renge mauren nga marmaur rengen nabong jijle.

Pol owra erres tevi nir

¹ Inu Pol nuvi aposol se Iesu Kristo suri marongen se Atua. Nuwra 'erres' tevi kami jinibb on nir nga kamlik Epesas, ko kami kangur eterter renge Iesu Kristo.

² Nurongwose, merrenien ko demat se Atua Tata se kerr ko se Numal Iesu Kristo piptevi kami.

Atua elai pa nanu jijle nga marres tevi kerr

³ Rraprij pirres suri Atua Tata se Numal se kerr Iesu Kristo, suri ni elai pa nanu jijle nga marres nga marto renge melrin ko elngi re nolo kerr nga rramkorti pa tevi Iesu Kristo.

⁴ Ko ni otobbobbu womue kerr nga rrapa-korti tevi Iesu Kristo, vitunen ko ealoli iel ngatan muto vajin. Elngi pa kerr nga rrapon ko rrapwokwok renge ni non, ko nga rrapmerrmerreni kerr pilep.

⁵ Owra wowomu pae nga kerr rrapivi natun suri Iesu Kristo, suri ni kobbong marongen sen elesi erres pipok.

⁶ Ololi erpok tweni nga jinibb nir parsurovi ni nosrovien sen ko merrenien sen re nga mila Kristo nga ni mimreni milep tevi kerr erpe merrenien nga milep sen san nga mila nawone tevi kerr.

⁷ Renge drra ne mijen se Kristo ko ni ojri lweni kerr nga rramkorti tevi Kristo. Iok erpe etlasi tweni nololien se kerr, suri merrenien sen nga mirres milep

⁸ nga mijivreni milep renge kerr. Re norongwosien sen nga murongwose nanu petpeti nir

⁹ elesi erres nga kerr rraprongwose marongen sen, nga womu muto teptepi. Ko iok evijuri norrorrmien sen nga milngi womue renge Kristo

¹⁰ nga pia-pelari renge daron momsawosen. Ko norrorrmien sen evi nga piser kor-toni nanu petpeti nir renge Kristo, nanu nir ne melrin ko nanu nir ne iel ngatan, ko Kristo pivi batu nanu ngok petpeti nir vajin.

¹¹ Atua okloli nanu petpeti nir arok-pelari osorsan tevi ni marongen sen. Ko ni otobbobbu kem renge Kristo, ko owra wowomu pae

¹² nga jinibb jijle nir parsurovi nosrovien se Atua suri kem nga namlingi womu nolo kem renge Kristo.

¹³ Ko renge Kristo kami kele, nga kamrunge pa nale ne weretunen, ko nospen nga mirres nga muspe suri sel nga Atua pila mauren tevi kami rengen, kami kele kamlingi nolo kami rengen. Ko Atua otore kami tevi Nemnin On nga muwrai pa wowomu nga pia-koni.

¹⁴ Ko Nemnin On ngok eviseni womue nga Atua pia-lai ko wor nanu petpeti nir nga milngir pa parivi se kerr. Ko ngok rrapurovi ni nosrovien sen.

Loten se Pol

¹⁵ Suri nanu ngok ko nir, mitipatun re daron nga morng nosurien se kami renge Numal Iesu ko merrenien se kami nga kammerreni kalesia nir,

¹⁶ sete numosi nga bowra 'erres wor' tevi Atua suri kami. Nomok-rrormi kami renge loten suk,

¹⁷ ko nomok-ngoni tevi Atua se Numal se kerr Iesu Kristo, nga mivi Tata ne nosrovien, nga pilai norongwosien nga murrew tevi kami renge Nemnin On sen, ko nga Nemnin On sen kele piviseni Atua tevi kami, nga kaprongwose ni pirres.

¹⁸ Ko niko, kaplesi wose pirres renge nolo kami vajin nanu nga marres temijpal nir nga Atua miverus kami tweni, nanu nga marwun saute nosrovien, nga Atua milngir pa se kerr jinibb on sen nir, nga rrapiriv twenir.

¹⁹ Ko numrreni kele nga kaprongwose kele derteren sen nga milep nga milep temijpal nga mok-majing renge kerr nga rramosuri. Iok osorsan tevi derteren nga milep sen

²⁰ nga muloli Kristo mimaur luwi re mijen, ko misakel renge Atua nevren rres renge melrin.

²¹ Ko iok Kristo ean mare re numal petpeti nir, ko nisen ean mare re nais

ḗtḗḗti nir re daron nga ngel ko daron nga pia-vini.

²² Ko Atua elngi nanu jile re Ḃelan ngatan, ko ololi kele ni evi batu kalesia nir renge nanu ḗtḗḗti nir,

²³ ko kalesia nir arirpe ni niben. Ko mauren ser owun saute Kristo, nga mok-songni nanu jille nir nga Atua mulolir.

2

Re mijen van re mauren

¹ Ko kami bonevis erpe kammij re nololien se kami ko nanu nga marsij nga kamok-lolir.

² Re wosenen kamvijuri sel nga ḡisij ne ngatan ngel, ko kamosuri Demij, nga mivi numal se demij nir nga marlik ngatan ḗtḗḗti nir, ko nga mok-majing malum renge nir nga sete marvijuri Atua.

³ Ko kerr jille bonevis rramvijuri sev nga nolo kerr nga ḡisij ko norrormien se kerr nga ḡisij mimrrenir. Ko nalol se kerr esij erpok ko wor, ko rramivi jinibb nga Atua mulolarsi kerr, erpe jinibb jille nir.

⁴ Ko Atua orrorrmi terai kerr. Ko suri merrenien sen nga milep nga mimrreni kerr e,

⁵ ololi rrammaur luwi tevi Kristo, daron nga rramij pa renge nololien. Ko ngok rramlesi, Atua ela mauren tevi kerr suri ni merrenien sen kobbong.

⁶ Ko ni ololi kerr rrammaur luwi kele tevi Kristo, ko ololi rramsakel kokorti tevi Kristo renge melrin.

⁷ Ololi erpok nga piviseni renge sia sia nga para-vini, merrenien sen nga milep lenglengen ko murrun nga mokrorrmi kerr renge Iesu Kristo.

⁸ Atua ela mauren tevi kami nga kamosuri, suri bbong merrenien sen ko. Erpe evi nelaian san nga ni ḡila nawone tevi kami, sete eplari renge kami.

⁹ Ko sete eplari kele renge majingen nga ḡirres san nga kamloli, ejki. Ko niko, sete jinibb san orngwos pulololi lwenie.

¹⁰ Kerr rramirpe nanu san nga Atua kobbong ḡimajinge. Ko ni ela mauren nga mimerr tevi kerr suri Iesu Kristo, tweni nga rraploli majingen nga marres nga ni ḡilngir wowomu pae nga rrapmajing twenir.

Kerr jille rramivi meling sansan renge Kristo

¹¹ Re womu kamiak kamivi jinibb ne vare. (Ko ḡeri Isrel nir, nga martori bae ser ḡiterter, arok-ungasi kami, ko arok-wera tevi kami, 'Sete kaman re ḡovil'. Ko iok evi nanu san nga jinibb kobbong muloli, ko epari bbong nibe jinibb kis ko.) Ko kaprorrmi wos kamirpese re wosenen.

¹² Rrek re wosenen kamlik ngasue Kristo, ko kamivi jinibb ḡinij re ḡeri Isrel nir, ko sete kamkorti renge nanu nga marres nir nga Atua muwra ḡilai tevi ḡeri Isrel nir. Ko niko sete nanu san nga kaptiriv tweni vitunen otoo, ko kamlik ngasue Atua iel ngatan.

¹³ Ko lelingenok vajin kamkorti tevi Iesu Kristo, ko setemun kamlik ngasu erpe womu, ejki. Kamini pa mori suri drra ne mijen se Kristo.

¹⁴ Ko Kristo ololi demat livö ne kem ḡeri Isrel nir ko kami jinibb ne vare nir, ko ololi kerr rramivi meling sansan. Erpe tevi ni niben ko etngitngi naworr nga martuwe muto kokorti mivi nawot nga muwlu livö ne nuru. Ko ololi nuru vajin setemun orivivi devje nuval se nuru.

¹⁵ Ko ni ela tweni nale neseseien se ḡeri Isrel nir tevi neseseien wowarrencen nir, nga puloli nuru nga womu orivel sisamis porivi vajin ḡielew, porirpe jinibb sansan renge Kristo, nga muloli demat ngok.

¹⁶ Mijen se Kristo renge nai pelaot erevji tweni jerjere murrun nga kem ḡeri Isrel nir, ko kami jinibb ne vare nir, rramivivi devje nuval. Ko mijen se Kristo renge nai pelaot ejipteni gortien se kerr nga eru ngok evi niben sansan vajin, evi ni niben. Ko ela kerr jille ko ejipteni kerr tevi Atua.

¹⁷ Ko erpok, Kristo evini ko ewerwer suri nosḡen nga ḡirres suri demat. Ewerwer tevi kami nga kamlik ngasue Atua, kamivi jinibb ne vare nir, ko ewerwer kele tevi kem ḡeri Isrel nir nga marlik morie Atua.

¹⁸ Ko suri Kristo, kerr jille rramrongwose rrapan ji Atua, ḡeri Isrel nir ko jinibb ne vare nir. Ko Nerḡin On nga mivi sansan okpitevi kerr jille.

¹⁹ Ko ngok, kami jinibb ne vare nir, setemun kamivi jinibb neturvitan. Ko setemun kamlik toto, ejki. Ko kamivi pa jinibb tera se Atua erpe jinibb sen jille nir, ko kamivi pa naim se Atua.

²⁰ Naim nen, batu nabur nen evi Iesu Kristo, ko nabur nir nga martur suri arivi propet nir ko aposol nir.

²¹ Ko nibe naim nen ḗtḗḗti arjipijipti renge Kristo, ko armajing rujrujoni malume renge Kristo, pivi Naim On se Numal.

²² Ko kami kele, kamivi nibe naim nen sapon, suri kamivi se Kristo. Ko renge naim nen, Atua ko ḡilik ren, suri Nerḡin On sen.

3

Majingen se Pol suri jinibb ne vare nir

¹ Ko suri nanu ngok nir, inu Pol nomoklot tevi Atua suri kami. Nulik re naim ne

nekaien ngel suri nuvi jinibb se Iesu Kristo. Ko nomok-majing se kami jinibb ne vare nir.

² Rreknga kamrunge pa osuw nga Atua mīla tevi

inu majingen ngel nga mēmajing se kami, suri ni merrenien sen kobbong.

³ Atua eviseni nospen nga mīrres tevik, nga womu muto teptepi. (Ko moli pa sopen tevi kami re murrun nga miviseni tevik ngok.

⁴ Ko poro nga kapeve sev nga moli ngok, ko kaplesi wose norongwosien suk suri nospen se Kristo ngok.)

⁵ Nospen ngok, Atua sete eviseni tevi dul ne jinibb nga wowomu nir, erpe nga miviseni pa re nevre Nerāin On tevi aposol nga maron nir ko tevi propet nir lelingenok.

⁶ Ko nanu nga milep nga muto teptepi sia sia renge nospen ngok evi: jinibb ne vare nir parkorti tevi nir nga marosuri re nanu nga marres nir nga marpelari rege Iesu Kristo, nga marsupe rege nospen nga mīrres sen, ko nga rraplik terair. Ko parkorti kele renge niben sansan.

⁷ Ko Atua ololi inu nuvi jinibb ne majingen nga bowrai tweni nospen ngok suri merrenien sen nga mīlai tevik ko suri derteren nga milep sen.

⁸ Inu nuvi jinibb nga welili jer renge jinibb on jikle nir, ko Atua elai ma merrenien ngel tevik, nga bowra tweni tevi jinibb ne vare nir nospen nga mīrres suri nanu nga marres temijpal re Kristo nga jinibb nir marong wonwone nir.

⁹ Ko erpok kele, bowra tweni tevi jinibb jikle nir suri majingen se Atua nga pia-majing piprel, pipok, ko piprak. Majingen ngok se Atua nga pia-majinge oto teptepi sia ko sia ji Atua nga mīmajing nanu jikle nir wowomu pa.

¹⁰ Ko Atua emarong nga lelingenok norongwosien sen nga sel lele nen milep piplari vajin renge liken se kalesia nir, puloli nga jinibb nga marlelep nir ko anglo nga marlelep nir re melrin parongwose.

¹¹ Ko iok evi marongen sen nga muto tuwi pa, nga miplari suri majingen se Iesu Kristo Numal se kerr.

¹² Suri Kristo ngok, kerr nga rramosuri ni rramrongwos rrapiel ruroni re no Atua daron nga rramlot, tevi nolo kerr nga sete mimtutu.

¹³ Ko niko, nungoni kami nga nolo kami sete pivitan suri norongen nga mīsij nga mijparik suri kami. Ngok evi nga ma pususi kami imare ko.

Loten se Pol

¹⁴ Ko suri nanu ngok ko nir, nujipa re no Atua Tata, nulot.

¹⁵ Ko ni evi batun ne tata nir, ko metka jikle nir renge melrin ko renge iel ngatan arokla murrun se tata renge ni.

¹⁶ Ko nomok-ngoni tevi nga puloli kapterter pilep pusorsan tevi nosrōvien nga milep sen, tevi Nerāin sen nga moklik re nolo kami.

¹⁷ Ko nomok-ngoni kele nga Kristo kele poklik re nolo kami suri nosurien se kami. Ko nomok-ngoni kele nga mauren se kami puto renge merrenien, pirpe lape nai nga murrul totkoni dan, ko pirpe kele naim san nga mutur mīterter re dan nga mīterter mīrres.

¹⁸ Ko nulot erpok nga kapviter nga kaprongwos vajine merrenien se Kristo, tevi jinibb sen jikle nir. Merrenien sen ngok elep temijpal; ean ngasu jer, ko ean mare jer, ko ean ngatan jer.

¹⁹ Merrenien se Kristo ngok elep pelak re jinibb san purongwose, ko nulot nga kami kaprongwose. Ko ngok, kapwun saute murrun nga mīrres se Atua.

²⁰ Atua orongwos puloli asi jere temijpal isev nga rramngoni ko isev kele nga rramrrormi, suri derteren sen nga mokmajing livō ne kerr.

²¹ Ko kerr nga rramivi kalesia, nga rramkorti pa tevi Iesu Kristo, rrapsturōvi ni tuwi ngok vini. Piprok ko.

4

Kerr kalesia rramirpe nibe Kristo

¹ Ko niko inu, nga mēlik re naim ne nekaien suri nomok-majing se Numal, nomok-werai malume eterter tevi kami nga liken se kami pīrres pusorsan tevi nga Atua muwrai womu daron nga miveruse kami.

² Nolo kami pumolmol ko wor, ko kapivi jinibb malum. Nolo kami pipriv, ko kaprresres ko wor tevi kami, sete kapsisij tevi kami, suri merrenien nga kammermerreni kami ren.

³ Ko erpok, kapsaro pīterter nga sete nanu san pulokloksi gortien se kami nga Nerāin muloli mīrres pa tevi demat nga mubbōlji kortoni kami.

⁴ Kami kamirpe niben sansan, ko Nerāin sansan elik livō ne kami. Ko Atua everuse kami nga kamok-tiriv tweni nanu sansan kobbong, nabong se Kristo nga pia-luwi vini rengen.

⁵ Ko Numal se kerr kele evi sansan, ko nosurien se kerr nga rramosuri evi sansan, ko baptaesen nga marpaptaese kami evi sansan.

⁶ Ko Atua, nga mivi Tata se jinibb pētpeti nir, ni kele evi sansan. Ko ni ean wor mare re jinibb jikle nir, ko emajing rrurnngi

jinibb jijle nir. Ko ni elik livö ne jinibb jijle nir.

⁷ Ko Kristo ela merrenien tevi kerr sisamis pusorsan tevi nga ni mimarong.

⁸ Nale san suri nanu ngok oto renge Naul On, nga muwra 'Daron nga ni mian mare re melrin, ko ni etkai kele devje nuval sen nir nga niasie pa nir. Ko re wosenen ela merrenien nir tevi jinibb nir.'

⁹ Ko iok, nga muwra 'mian mare' iok, eviseni nga ni ean ngatan womu re nolo dan.

¹⁰ Ko ni nga mian ngatan ngok evi ni nga mian kele mare asi p̄et̄peti melrin, nga ni puwun saut re nanu p̄et̄peti nir nga Atua mulolir.

¹¹ Ko merrenien ngok nir nga m̄ilair arivi derteren lele. Elai derteren tevi jinibb sopor nga parivi aposol. Ko elai derteren tevi jinibb sopor nga parivi propet. Ko elai derteren tevi jinibb sopor nga parwera tweni nos̄pen nga m̄irres. Ko elai derteren tevi jinibb sopor nga parivi jinibb nga parmetmete kalesia nir. Ko elai derteren tevi jinibb sopor nga parvisviseni kalesia nir.

¹² Kristo ololi erpok nga jinibb sen nir parviter parmajng se kalesia nir, ko nga nibe Kristo nga mivi kerr kalesia purujruj p̄irres kele wor,

¹³ pianan pijpari nga kerr jijle rrapur kokorti renge nosurien pisansan, ko nga rraprongwos alje Natu Atua, rraprus rraplep p̄irres pusorsan tevi Kristo, ko rrapivi vajin jinibb tera mawos.

¹⁴ Ko niko, setemun rrapirpe bipiwar-reng, ko setemun rrapirpe jinibb san nga daptap ne dis marsilsileni rreknga nga ling mokuwi petpate. Nevisvisenien se jinibb nga marivi botgerisen arwera parloli pipok. Nir arok-majng nanu elep nga p̄arevvevi tweni jinibb nir.

¹⁵ Ko kerr ma, rrapok-rij re weretunen renge merrenien se kerr, ko rrapmaur pijpari nga rraporsan p̄et̄peti tevi Kristo, nga mivi batun.

¹⁶ Ko Kristo ololi kerr jijle nga rramirpe ni niben, rramjijipti erres. Ko niko, poro nga murrurrun jijle nir re niben ngok parmajng kokorti p̄irres, ko niben totoklai pimaur p̄irres, ko pilep rujruj kele wor renge merrenien.

Liken nga mimerr se kami

¹⁷ Ko niko, re nise Numal, nususus metue kami: setemun kapok-lik pirpe jinibb ne vare nir, nga marvijuri norrormien ser nga marlengleng.

¹⁸ Norongwosien ser emalik, ko arrelenge nanu suri nolor nga marsiror ore, suri armusus temijpal parunge nale se

Atua. Ko niko, arlik ngasue mauren nga Atua moklai.

¹⁹ Setemun arongrongwos suri nanu nga marsij nga marok-lolir. Ko aroji nesevin nir, ko arloli karkar nanu nga marsij nir. Ko armerreni temijpal nga parloli murrun jijle nir nga sete marwokwok.

²⁰ Sel se Kristo nga marvisviseni kami ren sete erpok.

²¹ Ko kamrunge ko pa nale sen, ko arvisviseni ko pa sel sen tevi kami, suri kamivi kalesia. Suri weretunen oto renge Kristo.

²² Ko niko, kapla tweni liken tera se kami nga womu, nga kammerreni sarsarr nanu nga marsij nir, ko sete kamrongwose nga kami kammosoksok rer.

²³ Ko kaploli Atua p̄irieni norrormien se kami pivini pimerr p̄et̄peti.

²⁴ Ko kapla liken nga mimerr nga Atua muloli mivi se kami, nga musorsan tevi ni liken sen. Liken nga mimerr ngok, osorsan erres, on erres, ko eplari re weretunen kobbong.

²⁵ Ko pipok ko, kapla tweni nale gerisen nir, suri kerr jijle rramirpe murrurrun ne niben sansan; ko Naul On owra 'Kami kaprij re weretunen tevi kami.'

²⁶ Ko Naul On owrai kele, 'Poro nga kaplolar, ko sete kaploli nanu nga p̄isij suri ren.' Sete kaploli lolaren se kami putu pijpari nial pian ngatan.

²⁷ Ko niko Demij daron sen pijkie.

²⁸ Ko jinibb nga mokvevna setemun pokvevna, ko p̄imajng majingen re nevren renge nanu nga marres nir. Ko niko purongwos p̄ilai tevi nir nga nevren murrrol renge nanu san.

²⁹ Ko nale nga m̄isij sete piplari re jingo kami, ko nale nga m̄irres kobbong, nga murongwos p̄irres re jinibb sisamis parmerreni. Ko niko, kamrongwos kapluñi nolor p̄irres ren.

³⁰ Ko sete kaploli Nem̄in se Atua purnge p̄isij. Suri Atua ela Nem̄in sen tevi kerr, erpe oto ore kerr pijpari nabong nga piari lululweni p̄et̄peti kerr.

³¹ Sete nolo kami pubbubuj, ko sete kaplolar rragrag, ko sete kapkikail renge balpalen. Ko sete kaprij p̄isij tere jinibb san, ko sete kapsisij tevi kami. Murrun ngok nir paruj ngasue kami.

³² Ko kaprreres tevi kami, kaprrorrorrmi kami, ko kapteltelasi lululweni kami, pusorsan pirpe Atua etlasi tweni pa nololien se kami suri Kristo.

5

Rraplik re moron

¹ Ko pīrpok ko, kaploli rrongrrongvi murrū Atua, suri kamivi ni natun nga mimrrēni kami milep.

² Merrenien pivi ko wor nanu nga milep rengo liken se kami, pusorsan tevi merrenien se Kristo nga mimrrēni kerr. Ko ni elai mauren sen esre pa kerr, erpe sulsulen san nga marsuli van ji Atua nga mapun mīrres.

³ Ko murrūn nga norman muoji nesevin, ko murrūn nga nesevin muoji norman, ko murrūn jijle nir nga sete marwokwok ko murrūn nga marmerreni nawon nanu, arivi lat on ko pa. Sete kaplolir, ko sete kapsupsupēr kele. Pīrpok erres kobbong re jinibb on nir.

⁴ Ko sete omomsawos nga kaprij nale nga marsij nir, nale ne lenglengen nir, ko nale sopsopēn nga marsij nir. Omomsawos ma nga kapok-wera “erres” tevi Atua.

⁵ Kaprongwose nanu ngel pīrres: jinibb jijle nga marok-oji nesevin, ko jinibb jijle nga marok-loli murrūn nga sete marwokwok, ko jinibb jijle nga marok-merreni nanu jijle (ko iok erpe arvijuri nanu ngok nir arirpe atua ser nir), sete milnger putoe rengo batun vanu se Kristo ko se Atua.

⁶ Sete kaploli jinibb san pīkrekrasi kami tevi nale lenglengen sen. Suri nanu ngok ko pa nir, lolaren se Atua pia-pelari re nir nga marong tweni ni nale sen.

⁷ Sete kapan kapkorti tevi nir pisan, pijki.
⁸ Suri bonevis kamlik re nat nga mimalik, ko lelingenok vajin kamlik re moron suri kamkorti pa tevi Kristo. Ko niko, liken se kami pusorsan ko wor tevi jinibb ne moron.

⁹ Wenen se jinibb ne moron eplari re nanu jijle nga marres, nga mokloli nanu jijle nga marmawos, ko nanu jijle nga marivi weretunen.

¹⁰ Ko kappēlak pīterter kaprongwose sev nga Numal mimrrēni.

¹¹ Ko sete kappitevi nir nga marmajing majingen nir ne nemalik nga wener marjike. Ejki, ko kaploli ma jinibb nir parlesi wose nga majingen ser arsi.

¹² Sev nga nir marloli teptepie, rramsup-supēr kobbong, ko rrammanūn pae ko.

¹³ Ko daron nga moron mimor vaseni nanu san, ko arlesi wose vajin evi nanu nga mirpese ko, mīrres rreknga mīsi.

¹⁴ Suri nanu jijle nga moron mimor vaseni arirpe vajin moron. Niko nubo san muwra

‘Kupmera, nik nga kummatur
Kuptur imare re mijen
Ko Kristo pia-mor vasenim.’

¹⁵ Ko ngok, kapmetmet re liken se kami. Sete kapirpe jinibb lenglengen, ko kapirpe

ko wor jinibb san nga norongwosien sen mutoe.

¹⁶ Kapmetmet re nabong jijle, sete san pīasi nawon, suri lelingenok evi daron san nga mīsi.

¹⁷ Ko ngok, sete kaplengleng, ko kaprongwose pīrres sev evi marongen se Numal.

¹⁸ Ko sete kapmini pēlak norro. Ngok puloli murrūn karkar parpelari ko. Ko kapwun saute Nemīn kobbong.

¹⁹ Ko daron nga kamrijij tevi kami, ko kapla nale ne Sam nir, ko nubo nir nga kalesia nir marok-lair, ko nubo nir nga marsurōvi Atua rer. Kapla nubo lele nir, ko nubo ne Sam nir, nga kapsurōvi tevi nolo kami.

²⁰ Ko kapok-wera “erres” tetajer tevi Atua Tata suri nanu pētēpeti nir nga marpēpelari, rengo nise Numal se kerr Iesu Kristo.

Murrūn ne totkoiēn

²¹ Kapok-osuri kami, suri kamosuri Kristo.

²² Nesevin nir nga kamlik ji diwen se kami nir, kaposuri diwen se kami nir, pirpe nga kamosuri Numal.

²³ Suri diwen sen owomu re nesen sen, pirpe Kristo owomu re kalesia nir. Ko ni okla mauren tevi nir, nga marirpe ni niben.

²⁴ Ko erpe kalesia nir arosuri Kristo, pīrpok ko nesevin ser nir parosuri diwen ser rengo nanu jijle nir.

²⁵ Ko kami diwen ser nir, kapmerreni nesen se kami nir, pirpe Kristo mimrrēni kalesia nir ko ela mauren sen tevir sere.

²⁶ Kristo ololi erpok nga kalesia nir paron pīrres, daron nga mīla nale sen tevir. Re iok erpe ejivler e nuwi nga parwokwok.

²⁷ Kristo ololi erpok suri owra pīla lweni kalesia nir tevi ni lweni rengo nosrōvien, pirpe jinibb san mītka nesen sen. Ko owra kalesia nir parirpe naruru mete nesen-warreng san nga mīrres pēlak, nga niben sete mimeriri ko namot nen ko nanu nga marsij mirpok kele nir arjiki re niben. Ko pīrpok ko, Kristo owra kalesia nir paron ko parwokwok pīrres.

²⁸ Ko niko, diwen ser nir parmerreni nesen ser nir pirpe nir lululweni niben. Jinibb nga mimrrēni nesen sen eviseni nga emrrēni lweni ni.

²⁹ Sete jinibb san ongasi ni niben lweni, ejki, ko okwungani ko okmetmete erres. Ko erpok kele, Kristo emetmete kalesia nir,

³⁰ suri kerr rramivi murrūmurr ne ni niben.

³¹ Naul On owra ‘Ko niko jinibb san pīlginglgi tata sen ko tasu sen ko pukorti

tevi nesen sen, ko nuru korti porini porivi niben pisansan vajin.'

³² Rrek murrun nga milep san oto silveni wor re nale ngok, ko inu nulesi erpe ospē suri murrun se Kristo tevi kalesia nir.

³³ Erres kobbong, ko kami jijle kapmerreni nesen se kami pirpe kami lululweni, ko nesevin nir parosuri kele diwen ser nir.

6

Murrun ne metka

¹ Bipiwarreng nir, kaprunge nale se tata ko tasu, suri kamivi pa kalesia, ko suri murrun ngok omomsawos erres.

² Naul On owra 'Kuposuri tata som ko tasu som'. Ko ngok evi womujnen re nale nesesreien nga nale rijrijen san muto tevi, ngel:

³ 'Ko niko, p̄irres rem, ko kuplik pipirvi iel ngatan.'

⁴ Ko kami tata nir, sete kaploli kele natu kami parlolarsi kami. Ko kaptor pipi p̄irres tevi bipiwarreng se kami nir; kapeter parmomsawos, ko kapvisvisenir pirpe Numal mokete ko mokvisviseni kerr.

Murrun ne jinibb ne majingen nir ko numal ser nir

⁵ Kami jinibb ne majingen nir, kaprunge nale se nir nga marivi numal se kami iel ngatan. Kaposurir p̄irres tevi metutuen ko tevi nolo kami p̄etp̄eti, pirpe kamosuri Kristo.

⁶ Sete kapok-majing p̄irres re bbong daron nga numal se kami marlik e, nga nir parunge p̄irres nawon re kami. Ko kapmajing ko wor pirpe jinibb ne majingen se Kristo nga marmajing m̄irres se Atua tevi nolor.

⁷ Ko kapmajing tevi nolo kami nga mivi weretunen, erpe kammajing se Numal ko sete se jinibb kobbong nir.

⁸ Kamrongwos pae nga Numal pia-kele lweni jinibb jilje nir pusorsan tevi majingen nga marres ser, poro parivi jinibb ne majingen rreknge poro sete parivi jinibb se numal san.

⁹ Ko kami numal nir, kami kele kaploli pipok kele tevi jinibb ne majingen se kami nir, ko sete kapsorponir. Suri kamrongwos pae nga Numal se nir ko se kami kele oto re melrin, ko ni setete okloli erres tevi jinibb sansan, ko okloli osorsan tevi jinibb p̄etp̄eti nir.

Rramok-palpal tevi Demij

¹⁰ Ngel evi bongsi nale suk: kapterter renge Numal ko renge derteren sen nga milep temijpal.

¹¹ Kapuri sunsun p̄etp̄eti ne nuval nga Atua m̄ilair pa tevi kami, ko ngok kapviter

vajin nga kaptur p̄iterter tere sel ne gerisen lele nir se Demij.

¹² Suri sete rramok-tertere jinibb, ejki. Rramok-tertere numal nga marlelep nir se demij nir, nir nga marok-metmete nemalik ne iel ngatan, ko neñin nir nga marsij re melrin.

¹³ Ko niko kapuri sunsun p̄etp̄eti ne nuval nga Atua m̄ilair pa tevi kami, nga kapviter nga kaptur p̄iterter re nabong nga m̄isij. Ko vitunen, daron nga kamval jile, ko kaptur p̄iterter malum kobbong.

¹⁴ Ko pipok ko, kaptur lilane tera nuval. Kaploli weretunen pirpe netatuw se kami. Ko murrun nga mumomsawos m̄irres pirpe puto ore morko kami.

¹⁵ Ko nosp̄en nga m̄irres nga mokla demat, nga kamtur tera kapwerai tweni, pirpe but nga kamrae.

¹⁶ Ko nanu nga milep nga kaplai evi nosurien, nga mirpe nanu san nga milep miteberber nga kaptori ore nibe kami e daron nga Demij muwra p̄ilwe kami. Ko ngok neliw sen nga marsij nga marin mirpe nabb sete parjipari kami sopon.

¹⁷ Ko murrun se Atua nga mokla mauren tevi kami erpe nuvan ne balpalen. Kaplai kapuri re batu kami. Ko nale se Atua erpe nesip nuval nga Neñin On m̄ilai tevi kami. Kaplai ko kaptori metmete.

¹⁸ Ko renge nanu jilje nga kamlolir, ko kaplot, ko kapngoni Atua pipitevi kami. Ko tetajer, kaplot renger derteren se Neñin On. Ko kapmetmet kapkulkulu p̄irres, ko sete kapmosi nga kaplot suri kalesia p̄etp̄eti nir.

¹⁹ Ko kaplot kele suri inu nga daron nga bowra tweni nale se Atua, ko Atua p̄ila nale sen mawos tevik nga bowrai tweni. Ko sete bemanun nga bospe jir suri nosp̄en nga m̄irres nga bonevis muto teptepi.

²⁰ Inu nuvi jinibb ne bowra tweni nosp̄en nga m̄irres ngok, ko nile marwirrek re naim ne nekaien ngel. Kaplot nga bololi nok p̄iterter. Iok osorsan kobbong nga inu bololi.

Bongsi nale se Pol

²¹⁻²² Numrreni kaprongwose nosp̄en nek, ko sev nga nomok-lolir, ko niko nukoni pa Tikikas vinuk ji kami. Ni evi niaken se kerr san nga rrammerreni, ko evi kele jinibb ne majingen se Numal nga mok-majing lilane. Ko ni, poro pivinuk, ko pia-wera tweni nanu jilje ne nosp̄en nek. Ko pia-wer jiljile kele nolo kami.

²³ Nurongwose nga Atua Tata ko Numal Iesu Kristo porlai demat ko merrenien ko nosurien tevi kami niaken suk nir.

²⁴ Ko nurongwose kele nalol nga mĩrres se Atua puto tevi kami jikle nga kammerreni Numal se kerr Iesu Kristo tevi merrenien nga sete orongwos pusuw. Nuwra “Remse kami jikle.”

**Naul nga Pol Muli tevi
Kalesia Nir renge
PILIPAE
Batu nale nga mivsvseni
lut nga parmeteni naul
ngel puto suri**

Pilipae evi ngaim rreknga taon san renge vanu ne Masetonia. Ko iok Pol etipatun majingen sen nga mīmajing ji dosalsal nir nga marlik renge Iurop. Ko daron nga muli naul ngel tevir, ko ni elik renge naim ne nekaien iak Rom. Ko rramlesi nolon sete evitan, ko neiren sen owun saut malam kobbong, ko evijuri malam sel nga mīrres nga Kristo miviseni. Ko owrai tevi nir nga nir kele parirpok ko wor renge nanu nga marsij nir nga marok-pelpelari ji nir. Ko ni owra kele erres wor tevi nir suri merrenien nga marlai tevi, ko owra Atua pīlai nanu pētpeti nir nga poro neverr marmumrrol rer.

Pol owra erres tevi nir

¹ Inu Pol ko Timoti nomorivi jinibb ne majingen se Iesu Kristo, nomorwera ‘erres’ tevi kami nga kamivi jinibb se Iesu Kristo renge iok Pilipae. Ko nomorwera kele ‘erres’ kele tevi kami nga kamok-metmete kalesia nir, ko tevi kami nga kamok-majing ser.

² Nurongwos mae, merrenien ko demat se Atua Tata se kerr ko se Numal Iesu Kristo puto tevi kami.

Pol oklot suri nir nga renge Pilipae

³ Nomok-wera ‘erres wor’ tevi Atua teta-ter re morrorrmi kami.

⁴ Ko renge verusen suk pētpeti nir suri kami jikle, nomok-ir kobbong rer.

⁵ Nomok-ir mirpok ngok suri nga kamkorti erres tevik renge majingen ne nospen nga mīrres suri Iesu Kristo, re nga kamok-la nanu tevik, mītipatun re nabong womunen mijpari lelingenok.

⁶ Nurongwose erres nga Atua nga mia-majing rrongvi majingen nga mīrres sen livō e kami pia-vinvi ore ko wor renge nabong nga Iesu Kristo pia-luwi vini ren.

⁷ Ko erpok erres kobbong osorsan nga bowrai pirpok tevi kami jikle, suri nomok-rorrmi kami tetajer renge nolok, ko suri renge nalol nga mīrres se Atua, ni elngi kami jikle kappitevi inu renge majingen ne nospen nga mīrres. Rramkorti nga rramwera tweni nospen nen puto pīrres limjer nga jinibb jikle parlesi evi weretunen. Ko sete kamieli lingi inu eppari lelingen ngel nga marsere totoni inu.

⁸ Atua orongwos puwrai nga nuwretun, numarong elep belesi kami jikle. Numrreni kami tevi merrenien weretunen se Iesu Kristo.

⁹ Ko verusen suk suri kami erpel, nga merrenien se kami purujruj pilep malam tevi norongwosien nga kaprongwos alje nanu nga marres ko nanu nga marsij.

¹⁰ Kaprongwose vajin kaptobbobbue sel nga marres nir. Ko re murrun ngok, renge nabong nga vitunen nga Kristo pia-wera suri lat nga puto suri tevi jinibb jikle ren, ko kami mauren se kami puwokwok jikle pīrres vajin, ko sete jinibb pisan purongwos pīwer ngusngasi kami.

¹¹ Ko kapwun saute wenen nga marres renge murrun nir nga marsorsan mīrres nga marpelari renge Iesu Kristo. Ko jinibb nir parsurōvi vajin nise Atua ko parsusi nisen pian mare.

Pol elik re naim ne nekaien, ko majingen ne nospen nga mīrres etajer van malam

¹² Numarong kami niaken suk nir kaprongwose pīrres nanu ngel le: nanu nga marsij nir nga marpelari ji inu sete artor ore sel nga parwera tweni nospen nga mīrres, ejki, ko arwilwil se nospen nga mīrres kobbong.

¹³ Suri jinibb ne nuval nir nga marok-metmet suri iel, ko nir pētpeti nga marlik iel renge naim se numal ser, arongwos pae nga marsere totoni inu suri bbong nomok-majing se Kristo.

¹⁴ Ko suri kele nir eleplep lingir renge kalesia niaken se kerr, nolor arterter kele wor renge Numal. Ko setemun armetutu mun, ko tetajer arok-asasi rer nga parlingi nor van nga parwera tweni nale se Kristo.

¹⁵ Ewretun, nir sopor arok-wera tweni nale se Kristo suri nolor eleplep suri inu, ko arwera parloli inu belik pīsij suri. Ko nir mīnij nen ma nir arok-wera tweni nale se Kristo re nolor nga marres kobbong.

¹⁶ ko suri merrenien ser. Suri nir arongwos pae nga Atua elngi inu iel nga bowra tweni nospen nga mīrres puto limjer.

¹⁷ Ko nir mīnij arok-supe nospen se Kristo re nolor nga sete marres, nga parsusi lweni nir imare kobbong, ko arwera parloli inu belik pīsij kele wor renge naim ne nekaien ngel.

Mauren weretunen nibe?

¹⁸ Ko erres kobbong! Erres nga parwera tweni nospen se Kristo, poro piplari renge nolon nga mīsij rreknga renge nolon nga mīrres. Ko nuir kobbong suri. Ko bea-ir kele,

¹⁹ suri nurongwos pae nga inu bea-tela ivare bea-ivel sisarow vajin, suri verusen se kami ko suri nga Nēnīn se Iesu Kristo nga moklila se inu.

²⁰ Nanu sansan kobbong nga nurongwose pia-pelari, nga mēlŋgi norrorrmien suk rengen, ngel: nga sete inu mea-vitan nabong san reŋge majingen suk, ko nga ŋelŋgi nok van ren. Ko erpok, jinibb jijle nir parsurōvi Kristo suri nanu nir nga marpelari ji inu lelingenok pirpe nabong jijle, poro nga bemaŋur rreknga poro nga parevji pinik iel re naim ne nekaien.

²¹ Batu mauren weretunen nibe ko? Nga inu nen oto reŋge Kristo. Niko, erres ŋelak poro nga bemij, ko ban vajin ŋelik tevi.

²²⁻²³ Ko poro nga ŋelik re mauren ne ngatan ngel, ngok orongwose wenek nen piwen e majingen nga marres. Erpe nuvini re mesekle sel suk, ko inu sete nurongwose sel ngabes nen erres reŋge nuru nga inu botobbobbue. Re inu kobbong, numrreni bevel lingi mauren ngel ko bean ŋelik tevi Kristo. Ngok erres temijpal womu ne sel tuwen.

²⁴ Ko poro pirpok, ko si pimetmete kami? Rrek erres ŋelak malum poro nga ŋelik malum re ngatan ngel tevi kami.

²⁵ Nurongwose emawos erpok, ko niko ŋelik ko pa. Bepevi kami jijle nga bololi nosurien se kami purujruj pilep kele wor tevi neiren.

²⁶ Ko niko, poro nga ŋelik kele tevi kami vajin, ko kamrongwos kapwera, 'O, Pol ololi majingen nga mīrres temijpal. Rapsurōvi Iesu Kristo ren.'

Rraptur ŋiterter ko rrapval

²⁷ Ko re lelingenok, nanu nga milep evi nga liken se kami ŋirres pusorsan tevi nga marwera tweni reŋge nospen nga mīrres se Kristo. Ko ngok, poro nga bea-vinuk bea-lesi kami, rreknga poro nga pia-jiki ko bea-runge kobbong nospen suri kami, bea-rongwose nga kamlik eterter, ko kamkorti erres reŋge norrorrmien nga mivi sansan e. Ko kappalpal vajin pirpe jinibb pisansan suri nosurien ne nospen nga mīrres.

²⁸ Ko bea-rongwos pae nga setete kammetutue devje nuval nir. Ko murrun ngok nga sete kammetutue nir piviseni nir nga nir para-jijki, ko kami kapa-maur. Suri Atua pia-la mauren tevi kami.

²⁹ Ko reŋge nalol nga mīrres se Atua, ni elngi kami nga kaposuri Kristo, ko nga kaplesi kele norongen nga mīsij suri ni.

³⁰ Ko ngok lelingenok erpe kamtur pa vajin tevi inu reŋge balpalen suk nga kamlesi bonevis nēpalpal ren, ko nga kamrunge nomok-palpal malum rengen.

2

Pol owra parlik reŋge merrenien, gortien nen, ko lolmalum nen

¹ Erpese reŋge kami? Mauren nga kamlai reŋge Kristo okloli nolo kami eterter?

Murrun se Atua nga mokmerreni temijpal kerr e okjinge kami? Neñin On okkorti tevi kami erres? Kamok-loli erres tevi kami ko kamok-rrorrmī kami?

² Poro pirpok, erres, ko kaploli neiren suk pilep temijpal, pirpel: Kaploli norrorrmien se kami pivini lat sansan, ko kami jijle kapmermerreni kami. Kaploli nolo kami parini parivi sansane.

³ Sete kami san puloli nanu san nga pususi lweni ni imare kobbong, pijki rres, rreknga nga pulololi lweni ni e. Ko reŋge nolo kami nga mian ngatan mīrres, kapmeteni jinibb mīniji nir pirpe parres asie kami.

⁴ Ko sete kapmetmete nanu nga marivi se kami kis, ko kapmetmet lululweni nanu jijle nga marivi se kami jile nir.

⁵ Kaploli nolo kami pirpe nolo Iesu Kristo.

⁶ Iesu tetajer osorsan tevi Atua, ko sete orrorrmī nga owra purrul totkoni nanu ngok, ejki.

⁷ Elngilngi tweni nanu ngok nir, ko eak iel ngatan, ko rramlesi osorsan tevi jinibb vajin. Ko ololi lweni ni vajin osorsan tevi jinibb ne majingen san.

⁸ Ololi nolon ean ngatan temijpal ko osuri Atua, ejpari mijen sen nga mīsij reŋge nai pelaot.

⁹ Ko suri nanu ngok, Atua osusi ni ean mare temijpal, ko ololi ewaji nais nga mian mare jijle re nais nir.

¹⁰ Ko ngok, reŋge nise Iesu, jinibb jijle nir para-jipa baur ngatan, anglo ne melrin nir, ko jinibb nir ne iel ngatan, ko jinibb nir nga marmij martevnir pa ngatan.

¹¹ Ko nemer jijle para-wera tweni nga Iesu Kristo evi Numal, ko parsurōvi Atua Tata reŋge ni.

Kami kamirpe moron ne iel ngatan

¹² Ko ngok, selek nir nga memrreni kami, kapvijuri inu ŋirres. Kamloli pa erpok daron nga mēlik tevi kami, ko kaploli ko wor pusorsan kele lelingenok nga mēlik ngasue kami. Atua elai pa mauren tevi kami. Ko kapmetutu ko kapririr reŋge majingen se kami nga kammajing tweni wenen nga mīrres nen reŋge mauren se kami.

¹³ Suri Atua kobbong okmajing re nolo kami nga puloli kapmarong ko kapterter nga kaposuri ni marongen sen.

¹⁴ Sete kapwer ngusngasi, ko sete kapwera lweni "O, esij" daron nga marlai majingen san tevi kami.

¹⁵ Ko niko kapwokwok ŋirres, ko nanu nga mīsij

pijki re nolo kami. Kapirpe natu Atua nir nga marres ŋetpeti, nga kamlik liven

ne dul nga marsij p̄erp̄er. Liven ne nir, kapmor pirpe moju rengo iel ngatan.

¹⁶ Ko kapsupsuḡe nale ne mauren tevi nir. Ko niko, re nabong nga Kristo pia-luwi vini ren, ko inu ḡeir re kami, suri sete woluen suk nga mowlu rengen evi woluen nawon, ko sete ḡelaken suk evi ḡelaken nawon.

¹⁷ Ko pesveni poro nga parevji pinik. Iok pirpe parjivreni drrak rengo nosurien se kami nga muto rengo nawot ne sulsulen se Atua. Ko Atua purngo mapun ḡirres. Ko inu ḡeir ren, ko ḡeir korti tevi kami jijle.

¹⁸ Ko kami kele kapir ko wor, ko kapir korti tevi inu.

Pol orrorrmi pukoni Timoti van jir

¹⁹ Poro nga Numal Iesu pimarong, nuwra bokoni Timoti sete ngasu pivinuk ji kami. Ko numrreni ni pia-la lweni kele nosḡen ne kami vini jik, puloli nolok pumolmol ḡirres.

²⁰ Sete jinibb san erres emawos erpe ni. Ni okrorrmi weretune kami.

²¹ Jinibb jijle arrorrmi lweni nir kobong, sete arrorrmi suri nanu nga marivi se Iesu Kristo.

²² Ko kami kamrongwose, Timoti murrun erres, ko eptevi inu rengo majingen re nosḡen nga m̄irres erpe natun miḡtevi tata.

²³ Ko niko, nurrorrmi bokoni ni vinuk ji kami re daron momsawos nga borongwose lut nga puto suri tevi inu.

²⁴ Ko nurongwos kemkaḡe erres nga poro Numal pimarong, ko sete ngasu inu kele bevinuk.

Pol orrorrmi nga pukoni tweni Epaprotetas van jir

²⁵ Inu nurrorrmi pa osuw nga bokoni kele m̄erel Epaprotetas pulwi vinuk ji kami. Ni evi niaken se kerr san nga komru nomorok-majing kokorti, ko nomorok-val kokorti. Kamkoni ni vini bonevis nga piwilwil se inu re majingen.

²⁶ Ni emarong lengleng nga ḡilesi kami, ko ornge esij nga kamrunge ni mimsi.

²⁷ Ewretun, ni emsi, ko otomori pimij. Ko Atua orrorrmi ni; ko sete ni kis, inu kele. Suri poro nga ni pimij, ko inu nolok purngo ḡisij kele wor.

²⁸ Ko niko, numrreni lenglengen nga bokoni ni vinuk ji kami, nga kami kapir kele daron nga kamlesi, ko inu kele sete borng ḡisij.

²⁹ Ko kami kaplesi ni tevi neiren nga milep, erpe niaken san rengo Numal. Ko kaposuri jinibb nir nga marirpe ni.

³⁰ Suri ni otomori pimij suri majingen se Kristo, ko emajing tama se inu rengo majingen nga kami sete kamrongwos kaploli.

3

Murrun nga mumomsawos m̄irres

¹ Niaken suk nir, bevnivni ore nale suk iel: Kapir rengo Numal. Nga boli viringsi kele nanu nga moli womu sete evi ḡelaken tevi inu, ko puloli kami kapreleng kapsarr ren.

² Kapmetmet ḡiterter ko wor rengo butterter nir nga marok-loli m̄isij ko nga marwera paron tertere kami kapan rengo bae ser.

³ Suri kerr rraman pa rengo bae nga mivi weretunen, ko Nem̄in On eptevi kerr daron nga rramlot. Ko rramlololi kerr e rengo Iesu Kristo, ko sete rramlingi nolo kerr rengo nanu san nga muto rengo nibe kerr, erpe bae.

⁴ Ewretun, inu nurongwose ḡelngi nolok rengo nanu nga marirpok nir. Poro jinibb pisan purrorrmi ḡilngi nolon rengo nanu nga jinibb ḡbong marlingi nawone mirpok, ko inu kele ḡeasi wore ni.

⁵ Inu nuvi drra sansan tevi m̄eri Isrel nir, ko nuplari rengo metka se Benjamin. Re bongik muowil, nuan pa re bae, osorsan tevi murru m̄eri Isrel nir. Ko re devjen ne nale ne neseseiren se m̄eri Isrel nir, nutori eterter temijjal, suri nuvi san rengo gortien ne Parasi nir.

⁶ Ko nuasi ḡelak re iok, ko nuoji kalesia nir vajin. Ko nusorsan nurres ḡetḡeti re devjen ne nga mevijuri nale ne neseseiren.

⁷ Ko re womu, nulesi nanu ngok nir arres; ko re Kristo vajin, nulesi arirpe nanu nga marsij kobbong.

⁸ Ko sete nanu ngok kis kobbong. Nulesi nanu ḡetḡeti nir arirpe arsi, suri nga nurongwose Iesu Kristo, nga mivi Numal suk. Ko ngok evi nanu nga m̄irres asi nanu ḡetḡeti nir. Suri re Kristo ko nuwir tututweni nanu ḡetḡeti nir, suri daron nga memteni viringsir tevi Kristo, arirpe nubus kobbong.

⁹ Numrreni bokorti ḡirres tevi ni. Sete-mun ḡeḡlak nga bevijuri sel ne nale ne neseseiren nga bololi lweni inu bosorsan ḡirres, ejki. Ko bosorsan ḡirres suri ḡbong nosurien suk nga muto rengo Kristo. Ko iok evi sel nga Atua kobbong muloli nga jinibb san pusorsan ḡirres ren, suri nosurien sen.

¹⁰ Nga ngok kobbong numrreni vajin, nga borongwose Kristo ḡirres, ko nga bebbḡlji derteren se Atua nga muloli Kristo mimaur luwi re mijen. Nuwra bokorti tevi ni re nga inu kele nibek purngo ḡisij pirpe ni, pijpari nga bea-mij kele pirpe ni.

¹¹ Ko ngok Atua pia-loli inu kele vajin bea-maur luwi re mijen.

Pol eḡlak malum, owlu tweni norrngov

¹² Sete nurongwos bowra nujpari pa nanu ngok nir, ejki. Setewor nuvi jinibb nga mimawos m̄irres jile wor. Ko nomok-ḡelak tweni ko wor nga bea-rrul totkoni nanu ngok nir, suri Kristo orrul totkoni pa inu.

¹³ Niaken suk nir, inu nulesi erpe setewor nurrul totkoni wor, ejki wor. Ko nanu kobbong san nomok-loli, ni le: nomok-mali nanu nir ne bonevis nga marto renge durek, ko nomok-tortor suri vajin nga ḡelai nanu nga marto renge nok.

¹⁴ Nuḡlak nga bowlu mawos tweni norngov ko nowlin. Ko nowlin ngok evi nga Atua everuse kerr nga rrapkorti tevi Iesu Kristo, ko rrapan rraplik sisen mare.

¹⁵ Ko kerr jijle nga rramtera m̄irres jijle, rraprormi ko wor pirpok. Ko poro nga san orrorrmi jabble, ko Atua piviseni lweni puto limjer tevi.

¹⁶ Ko sev nga rramjipari pa, rraprrul totkoni, ko rrapvijuri ko wor.

¹⁷ Niaken suk nir, kapok-rrongrrongvi inu tetajer, ko kapmeteni suri ḡirres re si nir nga marviseni murrin nga m̄irres.

¹⁸ Ko nale ngel, nuwrai pa nabong elep tevi kami, ko lelingenok kele, nuwra lweni tevi suwen metek nga mubbun: nir elep arok-loli esij, arlik erpe devje nuval ne murrin nga nai pelaot se Kristo eviseni.

¹⁹ Nir arivi jinibb nga parjijki kobbong. Nanu nga bbong nolor marmerrni arivi atua ser, ko arok-lololir e murrin nir nga jinibb non ḡisij e, ko arok-lingi norrorrmien ser renge nanu nir ne ngatan ngel kobbong.

²⁰ Ko kerr ma nir, rramivi pa jinibb ne melrin, rramivi jinibb gortien nen. Ko rramtiriv Numal Iesu Kristo eterter, nga pia-luwi re melrin vini ko pia-la mauren tevi kerr.

²¹ Ko ni pia-rieni nibe kerr ne ngatan ngel nga marmelisna, para-irpe ni niben ne nosrövien. Pia-loli pirpok renge dert-eren sen nga milep nga murongwos puloli nanu jijle nir parosuri ni.

4

Pol ela nale sapon tevir

¹ Ko niko, niaken suk nir nga memrreni temijpal kami ko morrorrmi kami, kaptur ḡiterter pirpok renge Numal. Nomok-ir suri kami, ko bea-la nowlik ji Kristo suri kami.

² Kamru Iuotia ko Sintike, inu nungoni tevi kamru eterter nga norrorrmien se kamru puto kokorti ḡirres pirpe Numal mimrreni.

³ Ko nungoni nik kele, nga kerru rrommajing kokorti pa erres, nga kuppitevi nuru, suri orḡelak tevi inu renge majingen

ne nosḡen nga m̄irres, tevi kele Klemen ko nir nga marok-majing korti tevi inu. Niser nir, aruli pa renge naul nga maruli nise jinibb nir nga para-lai mauren nga m̄irres.

⁴ Kaḡir tetajer renge Numal. Iok bowra lweni kele: kaḡir.

⁵ Kapviseni nolo kami nga mimalum tevi jinibb ḡetḡeti nir. Otomori Numal pulwi vini.

⁶ Sete kaprormi ḡelake nanu san, ko daron nga kamlot ko tetajer kapwera erres wor tevi Atua, ko kapok-ngoni sev nga nevre kami marmumrrol rer.

⁷ Ko demat se Atua nga m̄iasi norongwosien se kerr, purrul totkoni nolo kerr ko norrorrmien se kerr renge Iesu Kristo.

⁸ Niaken suk nir, bevnivni ore nale suk iel: nanu nir nga marivi weretunen, nanu nir nga maran mare, nanu nir nga marmawos, nanu nir nga marwokwok, nanu nir nga marres, nanu nir nga jinibb marij m̄irres suri, murrin nir nga marsorsan m̄irres ko nga marsorsan nga rrapsumsi paran mare, ngok kaplingi norrorrmien se kami renge nanu ngok nir.

⁹ Ko sev nga kamrunge ko nga kamlai renge nale suk, ko sev nga kamlesi renge liken suk, ngok kaploli surir ko wor. Ko Atua nga mivi batu demat pipitevi kami.

Pol owra erres wor tevir

¹⁰ Nuir elep re Numal nga lelingenok kami kamviseni lweni merrenien se kami tevi inu. Epriv le pa, ko sete kamla merrenien san tevi inu. Kamrormi ma inu, ko sel ejki.

¹¹ Sete nusḡe nanu ngok suri nevrek omrrol renge nanu san, ejki. Suri nurongwos pae vajin ḡelik ḡirres pirpe moup pa tevi sev nga muto pa jik.

¹² Nurongwose ḡelik ḡirres poro nga jorok puwelili, rreknga poro nga jorok pilep. Renge liken ḡetḡeti nir, nurongwos pae ḡelik ḡirres; poro nga nanen pilep rreknga nanen pijki, poro nga nijor pilep rreknga nijor pijki.

¹³ Nurongwos ḡelik re liken ḡetḡeti nir suri Kristo nga mokla derteren tevi inu.

¹⁴ Ko erres ma nga kamrormi inu renge norongen nga m̄isij suk.

¹⁵ Ko kami m̄eri Pilipae, kamrongwos pae nga renge daron ne majingen ne nosḡen nga m̄irres, etipatun daron nga mevel lingi vanu Masetonia, ko kami kam-san kamkorti tevi inu, suri kamok-la nanu tevi inu. Sete kalesia m̄inij kele nir arloli erpok tevik re wosenen.

¹⁶ Ko erpok kele, daron nga m̄elik iak Tesalonaeka, ko vavis kis kamok-la nanu nir nga nevrek mumrrol rer.

¹⁷ Sete erpe nomok-rrormi kis nanu nga ḡelair ji kami, ejki. Ko nomok-rrormi

wenen nga piplari renge nolo kami nga m̄irres suri.

¹⁸ Nula pa nanu ngok jile nir, ko nula p̄elake. Nup pa, suri nulai pa ji Epaprotætas merrenien se kami nir. Arirpe sulsulen nga mapun m̄irres van ji Atua nga p̄ir ren.

¹⁹ Ko Atua p̄ilai p̄etp̄eti nanu jikle nir nga nevre kami marmumrrol rer tevi kami, pusorsan tevi nga m̄ilngi pa m̄iasi ji Iesu Kristo re nosrövien.

²⁰ Rrapsurövi Atua Tata se kerr lelingen ngel ko tuwi ngok vini. Pirpok ko.

Bongsi nale se Pol

²¹ Kapwerai 'Erres' tevi nir nga marivi jinibb nga markorti tevi Iesu Kristo. Ni-aken se kerr nir nga marlik tevi inu iel arwera 'Erres' tevi kami.

²² Ko kalesia jikle nir ne iel arwera 'Erres' tevi kami, ko mare nen nga marlik renge naim se numal nga milep jer se m̄eri Rom nir.

²³ Merrenien se Numal Iesu Kristo puto tevi nen̄i kami. Nuwra 'Remse kami'.

**Naul nga Pol Muli tevi
Kalesia Nir renge
KOLOSI
Batu nale nga mivsviseni
lut nga pargeteni naul
ngel puto suri**

Pol oli naul ngel tevi kalesia nir nga marlik renge Kolosi, ngaim san ie Esia. Oli suri nevisvisenien gerisen san nga miplari jir. Nir nga marvisviseni nevisvisenien gerisen nen arwera jinibb nir parosuri anglo nir ko parosuri kele nale wowar-reng elep nga marto renge nale nesereien rreknga lo (law) se Moses, ko niko parong-wose weretunen Atua vajin. Ko Pol owra Iesu Kristo esan okla mauren tevi jinibb, ko daron nga marvijuri nale gerisen ngok ko aruj ngasu kobbong e ni. Ko ospē kele suri mauren ser nga marlai renge Kristo, ko piprese renge mauren ser vajin renge nabong jijle. Ko daron nga muli jile naul ngel, ko elai tevi selen Tikikas putori van jir. Ko Onesimas kele eptevi Tikikas, suri re wosenen Pol okoni ni pulwi van ji numal sen Pilimon.

Pol owra erres tevi nir

¹ Inu Pol nuvi aposol se Iesu Kristo renge marongen se Atua. Tevi Timoti tasi kerr,
² nomoruli naul ngel tevi kami mēri Kolosi nga kamivi tasi komru renge Kristo, ko nga kamosuri mīrres renge sel nga muon. Nurongwos mae, merrenien ko demat se Atua Tata se kerr pipatevi kami.

Pol owra erres tevi Atua suri nir

³ Tetajer daron nga nomorok-verus suri kami, ko nomorok-wera 'erres' tevi Atua, Tata se Numal se kerr Iesu Kristo.

⁴ Suri nomorunge pa nospē nen nga kami kamosuri Iesu mīterter, ko kami kammerreni temijpale kalesia nir.

⁵ Kami kamok-loli murrun ngok suri nga kami kamok-lingi norrorrmien se kami oto eterter renge nanu nir nga Atua mīlengi tera kami re melrin. Nanu ngok nir, kamrunge pa nospē ner womu daron nga kamrunge nospē ne nale weretunen suri Kristo.

⁶ Nospē ngok ejpari kami pa osuw. Ko etajer malum, pīla wenen renge ngatan ngel totoklai, pusorsan tevi nga miwen pa ji kami musuw, mītipatun re daron nga kamrunge e, ko kamrongwose weretunen merrenien se Atua.

⁷ Kamrungrunge womu pae nanu ngel nir ji Epapras, nga mivi sele kerr san nga nomormerreni. Ni evi jinibb nga

mokmajing lilane mīrres se Kristo tevi kami.

⁸ Ko ni owrai pa tevi komru merrenien nga Nēnin On mīlai pa tevi kami.

Verusen se Pol suri nir

⁹ Ko suri nospē ngok ne kami, ololi komru nomorverus suri kami tetajer, mītipatun renge daron nga komru nomorunge. Komru nomorok-ngoni tevi Atua nga Nēnin On puloli kapivi jinibb nga kaplesi wose, ko puloli kami kaprongwos alje marongen se Atua.

¹⁰ Ko ngok, liken se kami pumomsawos pīrres vajin piprese Numal mīmrrēni. Ko puloli mauren se kami wenen putoe renge majingen nga marres nga kamok-lolir, ko puloli kami kaprongwos temijpal kele wore Atua.

¹¹ Ko kapterter pētpēti pusorsan tevi derteren nga milep se Atua, nga puloli kami kaptur pīterter tetajer malum renge nanu nga marsij nga marok-ini. Ko kapir bbong.

¹² Ko kapwera vajin 'erres' tevi Tata suri nga muloli kami kamviter kaplai pivsvises nanu nga marres nga mīlengi kortonir nga marto tera jinibb sen nir, re lat nga moron kis muto ren.

¹³ Ko Atua etka tweni kerr pa renge derteren ne nemalik, elngi kerr renge batun vanu se Natun nga mīmrrēni.

¹⁴ Ko ojri lwēni kerr suri Kristo, erpe etlasi tweni nololien se kerr.

Kristo evi batu nanu jile nga Atua mulolir

¹⁵ Sete jinibb san orongwos pīlesi Atua. Ko Kristo ma, rramlesi pa Atua ren, suri ni osorsan pētpēti tevi Atua. Ko Kristo owomu re nanu jijle nir,

¹⁶ suri Atua elngi re nevre Kristo nga ni puloli nanu jile parpelari; nanu nga marto re melrin ko nanu nga marto iel ngatan, nanu nga rramlesir ko nanu nga sete rramlesir, ko derteren jile se anglo nir ko se jinibb. Ni lolir, ko arivi sen ko wor.

¹⁷ Ko ni owowomu re nanu jile, ko nanu jile arto kokorti erres re ni kobbong.

¹⁸ Ko kalesia nir arirpe nibe Kristo, ko ni erpe batur. Ni owowomu re kalesia nir; ni emaur wowomu re mījen, nga puwowomu re nanu pētpēti.

¹⁹ Suri Atua eir nga pīlengi mauren sen jile renge Kristo,

²⁰ ko eir kele nga Kristo pivi nevren nga puloli ore lolaren se Atua pusuw jerjer. Ko Kristo ololi vajin nanu jile arkorti erres luwi tevi Atua, poro parivi nanu ne melrin nir rreknga nanu ne ngatan ngel. Ololi demat ngok suri drra ne mījen sen nga mīseser renge nai pelaot.

Kaptur p̄iterter reŋge murrun ne nosurien

²¹ Ko bonevis sopen, kami Atua kamturtur telur e kami, ko kamivi devje nuval se Atua, ko kamok-loli majingen nga marsij nir.

²² Ko lelingen ngel vajin, suri Kristo ololi niben erpe jinibb ko emij suri kerr, niko muloli kerr rramkorti luwi tevi Atua. Ko ololi kami kele kamivi jinibb on nga marwokwok, ko jinibb sete parongwos parok-wor suri kami. Ko Kristo pia-pitevi kami p̄irpok van re no Atua.

²³ Ko ni puloli p̄irpok poro bbong kaptur p̄iterter reŋge murrun ne nosurien. Sete kaptur m̄emav, ko sete kapruj lingi nanu nga kamok-tiriv tweni nga marsupe reŋge nospen nga m̄irres nga kamrunge pa. Nospen ngok, arwerwer ren tevi jinibb jile nga melrin m̄isalsal orer. Ko inu Pol nuvi jinibb nga m̄emajing ren.

Pol erpe jinibb nga m̄imajing se kalesia nir

²⁴ Nomok-runge esij elep reŋge naim ne nekaien ngel. Ko nuir kobbong, suri erpe nuwosi luwe norongen nga m̄isij se kami reŋge inu nibek. Kristo kele ornge esij elep daron nga ni m̄ilik iel ngatan. Ko jinibb sen jijle nir arirpe vajin ni niben, ko nir kele parunge p̄isij ko wor iel ngatan. Ko erpe inu nuwosi luwe sopen norongen nga m̄isij se kami.

²⁵ Ko inu nuvi jinibb nga mok-majing se kalesia. Majingen ngok, Atua ko elngi re inu nevrek nga b̄emajing jile e suri kami. Ko majingen suk evi nga bowrai tweni nale sen puto limjer.

²⁶ Ko nale ngok oto teptepi sia ko sia reŋge dul ko dul, ko lelingenok vajin Atua ololi eplari limjer jile ji jinibb sen nir.

²⁷ Atua emrenni piviseni tevir nale sen nga muto teptepi ngok, nga nuspe suri nanu san nga m̄irres temijpal nga miplari pa musuw reŋge jinibb ne vanu jijle nir, ngok: Kristo elik pa re kami, ko kamtiriv tweni vajin nga kapa-korti re nosrovien sen.

²⁸ Kristo ngok, namok-werwer ren. Namsusur metue jinibb jile ko namok-visviseni jinibb jile reŋge norongwosien jile nga murrow nga nabpitevi jinibb jile nir partera p̄irres p̄etpeti reŋge Iesu van ji Atua.

²⁹ Nuplak tweni nanu ngok, nurat suri reŋge derteren sen nga m̄iterter nga mok-lai tevik.

2

Rraposuri p̄iterter Kristo

¹ Numarong kaprongwose nga nurat temijpal suri kami ko suri m̄eri Laotisia

nir, ko suri nir jile nga sete marlesi wos wore nibek ko nok.

² Nurat suri nga nolor p̄iterter ko pumolmol nga parkorti p̄irres reŋge merrenien. Ngel evi nanu nga m̄irres p̄elak san: numrenni parongwos alje, parongwos p̄irres nga p̄irres kemkan̄e Kristo, nga bonevis nospen nen oto teptepi ji Atua.

³ Ko Atua esilveni reŋge Kristo norongwosien totoklai nga marres.

⁴ Nomok-supe nanu ngok suri jinibb sopor arok-loli ler erres, ko tarkkerkasi kami.

⁵ Nulik ngasue kami reŋge nibek, ko reŋge nemik ma, nukorti tevi kami. Ko nuir nga m̄elesi kamtur vivongsur ko kamtur m̄iterter reŋge nosurien se kami reŋge Kristo.

Mauren se kami p̄irres ko wor reŋge Kristo

⁶ Erpok, kamlai pa Iesu Kristo evi Numal se kami. Kaploli mauren se kami totoklai vajin p̄iptevi ni.

⁷ Kaprrul totkoni ni p̄iterter, p̄irpe lape nai murrul totkoni dan, ko kaptur p̄iterter ren p̄irpe naim san nga mutur m̄iterter reŋge dan. Ko nosurien se kami pivini ko wor p̄iterter malum tetajer, p̄irpe nga marvisviseni kami pae. Ko kapwera 'erres' temijpal wor tevi Atua.

⁸ Kami kapmetmet p̄irres, lartul ngok nir tarrul totkoni kami re nale nawon ser ko gerisen ser nga marvijuri norormien nawon se jinibb nir, ko sel ne nevisvisenien ne ngatan ngel nir. Sete arvijuri sel se Kristo.

Kristo kobbong evi batu jinibb nir ko anglo kele nir

⁹ Kristo niben otoe erpe jinibb, ko mauren totoklai se Atua elik ren.

¹⁰ Ko kami kele, daron nga kamkorti tevi ni, ko kamlai mauren totoklai. Kristo owowomu re Numal p̄etpeti nir ko derteren p̄etpeti nir.

¹¹ Ko erpok kele, daron nga kamkorti tevi ni, erpe kaman re pa bae ko osuw. Ko iok, sete nuspe suri bae nga norman mian ngalu marevji, ko nuspe suri bae nga Kristo mirevji tweni murru nalol nga m̄isij reŋge mauren se kami.

¹² Ko daron nga marpaptaese kami, erpe artevni kami tevi Kristo. Ko erpok kele, daron nga kamtawij luwi re nuwi ngok, erpe kammaur luwi tevi Kristo reŋge m̄ijen, suri kamosuri Atua nga derteren sen ololi Iesu mimaur luwi re m̄ijen.

¹³ Ko erpe kami kammij pin reŋge nololien se kami ko reŋge murrun nga m̄isij se kami. Ko lelingenok vajin, Atua ololi kami kammaur luwi tevi Kristo. Ni etlasi tweni nololien jile se kerr,

¹⁴ ko olokloksi nanu nga maruli kortoni martere kerr tevi nale neseseien nga marwer ore kerr rer, ko ela tweni p̄t̄p̄etir ko owser rengo nai pelaot tevi Kristo.

¹⁵ Renge nai pelaot ngok, Kristo obbri otvi derteren se jinibb nga marlelep nir ko jinibb nga marwowomu nir rengo devjen se Demij. Kristo otorrlair pa osuw, ko ololi tevir erpe Numal san nga mutorrlai devje nuval sen musuw, ko ololi nor arsjij, nga jinibb arongwos parmetenir.

Kristo evi batu kami

¹⁶ Ko lartul ngok arwera parwer lokloksi kami suri nanen lele nga kamroi, ko nanu lele nga kammini. Ko arwera kele kamloli esij nga sete kamtori nabong sopor, ko sete kamtori nanen ne navöl muwut rrongvi, ko sete kamtori murrun ne nabong ebun, nga marmosi ren. Ko sete kapmarong parij p̄irp̄ok, p̄ijki.

¹⁷ Nanu ngok nir, m̄eri Isrel nir arvijuri tuwi. Ko arjuji bbong Kristo. Ko daron nga Kristo mivini vajin, rramlesi vajin ni sel sen nga m̄irres p̄elak asi nanu ngok nir.

¹⁸ Lartul ngok nir, norrorrmien ser ean pa mare osuw, suri arlesi nanu sopor re bori ser. Ko arkerkerasi jinibb nir, arwera jinibb nolor pian wor ngatan ko, ko par-surövi wor anglo ko nir. Sete kaplinglingi nir parwer lokloksi kami, parwera kamsij rengo nanu ngok nir. Norrorrmien ser ean mare temijpal, ko pesveni ko. Arok-rorrmii nanu ngok nir suri murru jinibb kobbong nir.

¹⁹ Ko setemun artori Kristo eterter, ko ni mawos ma evi batu jinibb sen nir. Ko jinibb sen nir arirpe ni murru niben nir nga marokla nanen ser rengo batun, suri nau ko murrmurr arjijipti erres re niben. Ko erpok vajin, Atua orongwos puloli niben totoklai pimaaur rujruj pilep p̄irres.

Mauren nga mimerr rengo Kristo

²⁰ Kami erpe kammij pa osuw tevi Kristo. Kamivi vajin jinibb nga kamiel sisarow osuw, setemun nevisvisenien ne ngatan ngel nir arrowsi kami. Ko erpese kamok-vijuri malume murrun ne ngatan ngel? Erpese kamvijuri nale neseseien ne ngatan ngel nir, nga muwra:

²¹ ‘Sete kaptori nanu ngok ko nanu ngok’, ‘Sete kaproi nanu ngok ko nanu ngok’, ‘Sete kapjipari nanu ngok ko nanu ngok?’

²² Ko iok arsupe suri nanu nga partorir ko parsij bbong. Ko nale neseseien ngok ko nevisvisenien ngok arivi se jinibb kobbong.

²³ Nale ser ngok, rramlesi rrongvi erpe erres, erpe eviseni norongwosien erres p̄elak, suri osoni jinibb nga parlot, ko

nga nolor pian ngatan, ko nga partor ore p̄iterter murrun nga marmerreri karkar nanu nga marsij nir. Ko neseseien ngok nir, derteren ser ejki rres nawone nga partor ore weretunen nanu nga nolo jinibb mok-merrmerreni sarrsarr nir. Ko rramlesi, daron nga rramvijuri sel ser, murrun nga m̄isij ngok oto erpok malum kobbong.

3

¹ Kami, erpe Atua ololi kammaur luwi re mijen evesane tevi Kristo. Ko niko, kapp̄elak suri nanu nga marto re melrin tevi Kristo, nga m̄isakel pa re Atua nevren rres.

² Kami kaplingi norrorrmien se kami ko wor puto re nanu nga marto re melrin nir, setemun kapok-rorrmii nanu ne ngatan ngel nir.

³ Suri erpe kammij pa osuw, ko mauren se kami oto teptepi tevi Kristo ji Atua pa osuw.

⁴ Ko ngok, batu mauren weretunen se kami evi Kristo kobbong. Ko daron nga Kristo pia-rremali, ko kami kele kaparremali tevi ni vajin rengo nosrövien.

Mauren se kami nga mitra pusuw vajin

⁵ Ko ngok, kapbböt pini murru kami nga marivi ne ngatan ngel kobbong, erpe norman muoji nesevin, ko nesevin muoji norman, murrun nga sete muwokwok, ko armerreni nanu nga marsij nir. Ko nir arok-merrmerreni nanu jile, ko iok erpe arosuri nanu ngok nir arirpe atua m̄inij nir.

⁶ Suri murrun ngok nir, lolaren se Atua pian rengo nir nga sete marosuri ni.

⁷ Ko kami kele, bonevis kamok-vijuri murrun ngok nir, daron nga kammaur rengo er.

⁸ Ko lelingenok vajin, kami kapjiekie murrun jijle nga marsij, erpe lolaren, nolon nga mulolar, nalol nga mungasi jinibb, murrun nga marij m̄isij tere jinibb, rereren nga marsij nir. Setemun kapok-rij p̄irp̄ok nabong pisan.

⁹ Ko sete kapkerkerasi lululweni kami. Suri kamla tweni pa mauren nga womu tevi murrun nen nga marsij nir,

¹⁰ ko kamuri lweni pa mauren nga mimerr ngok, nga Atua mokloli lululweni mimerr tetajer. Suri Atua emrreni nga kaprongwose ni p̄irres, ko nga kapsorsan tevi ni.

¹¹ Ko niko, setemun jinibb san orongwos puwra, ‘O, inu nuvi m̄eri Isrel ko san, ko nik kuvi jinibb ne vare ko san’, rreknga ‘O, inu nuan pa rengo bae, ko nik setewor kuan re bae’, rreknga ‘O, inu nurongwose erres, ko nik kurlenge nanu’, rreknga ‘O, inu nuvel sisarow, ko nik kuvi jinibb

ne majingen'. Setemun kapok-rij pirpok, pijki. Suri Kristo elep asi nanu ngok nir, ololi arirpe nanu nawon kobbong nir. Ko ni elik pa renge jinibb sen nir.

Mauren se kami emerr

¹² Iow, erres, kamivi jinibb nga Atua mutobbobbue kami, kamivi jinibb on, kamivi jinibb nga Atua mimrreni kami. Ko niko, kapuri mauren nga mimerr nga murrun mirpel: kaprorrmi jinibb nir, kaprres tevir, nolo kami pian ngatan ko kapivi jinibb malum, ko norrorrmien se kami pipriv.

¹³ Kaptor totoni nolo kami, ko kaptelasi lululweni nololien se kami renge sel nga Numal mītlasi tweni pa nololien se kami ren.

¹⁴ Ko murrun ngok nir, kapjipjipteni tevi merrenien. Suri merrenien evi nanu san nga murongwos pījipjipteni nanu jijle pīrres.

¹⁵ Ko demat se Kristo puwowomu re nolo kami. Suri demat evi nanu nga milep nga Atua mimrreni puto renge jinibb sen nir, nga markorti mirpe niben sansan. Ko kapok-wera 'erres' tevi Atua suri nanu pētēpeti nir.

¹⁶ Ko nale se Kristo puto pētēpeti re nolo kami. Ko kapvisviseni lululweni kami, ko kapsusur metu lululwi tevi kami renge norongwosien jile nga murrow. Ko kapok-lai nubo lele tevi Atua nga kapsurōvi ni, nubo nir ne Sam renge Naul On, nubo nir nga kami kamkoji, ko nubo nir nga Nerñin On mīlair tevi kami. Kaplai nubo ngok nir tevi nolo kami nga marok-wera "erres" tevi Atua tetajer.

¹⁷ Ko nanu pētēpeti nga musuwsuw ngok nga kamwera, ko nanu pētēpeti nga musuwsuw ngok nga kamloli, ko kaplolir ko wor renge nise Numal Iesu. Ko kapok-wera tetajer 'erres' tevi Atua Tata renge nise Iesu mawos.

Murrun ne metka renge mauren nga mimerr

¹⁸ Kami nesevin nga kamlik ji diwen se kami nir, kaposuri diwen se kami nir. Murrun ngok osorsan erres kobbong renge kalesia nir.

¹⁹ Ko kami norman nga kamlesi nesevin, kapmerreni nesen se kami, ko sete kapok-sij tevir.

²⁰ Ko bipiwarreng nir, kapvijuri nale pētēpeti se tata ko tasu se kami nir, suri Numal ornge erres re murrun nga mirpok.

²¹ Ko tata nir ko tasu nir, sete kaploli natu kami nir parungasi kami suri sel nga mīterter nga kamok-loli tevir, suri nolor tarok-vitan.

Murrun ne jinibb ne majingen nir ko numal ser nir

²² Jinibb ne majingen nir, kaposuri nale pētēpeti se nir nga marivi numal se kami iel ngatan. Sete kapok-majing pīrres re bbong daron nga numal se kami marlik e, nga nir parmerreni nawone kami. Ko kapmajing ko wor renge nolo kami nga mīrres pētēpeti, suri kammetutue Numal Kristo.

²³ Ko nanu jile nga kamloli, kapmajinge tevi nolo kami, pirpe kammajing se Numal, sete se jinibb kobbong.

²⁴ Suri kamrongwose nga Numal pia-lai nowli kami tevi kami, nga marivi nanu nga marres nir nga ni mīlŋgir terai kami e. Erpe kamok-majing pa se Numal Kristo.

²⁵ Ko nir nga ma marok-loli mīsij, ko Numal pīkle lweni tevi nir pētēpeti pusorsan tevi nga marloli ngok. Suri Numal ololi osorsan tevi jinibb pētēpeti nir, poro parivi jinibb nga marwelili rreknga jinibb nga marlelep.

4

Pol ela nale tevi nir

¹ Ko kami numal nir, kaploli murrun nga mumomsawos mīrres tevi jinibb ne majingen se kami nir, pusorsan pirpok tevi nir pētēpeti. Suri kamrongwos pae nga kami kele Numal se kami oto pa re melrin, ko ni pia-loli tevi kami pusorsan tevi nga kami kamloli tevi nir.

² Kami kapok-lot tevi nolo kami nga marterter tetajer. Kapkulkulu pīrres renge loten se kami, ko kapok-wera 'erres' tevi Atua.

³ Ko kaplot suri kem kele, nga Atua pītasi metali nga nabwera tweni nospēn suri Kristo, nga bonevis muto teptepi. Ko inu nulik renge naim ne nekaien le ngel suri numajing ren.

⁴ Ko kaplot suri nga inu berij pīrres, puloli nale nen parñerer. Iok pirpe pusorsan pīmawos tevi nga inu bololi.

⁵ Kapok-loli murrun nga mivijuri norongwosien tevi jinibb ne vare nir. Kaploli womue pīrres ngarr tevir, nabong tarasasi nawon.

⁶ Kapok-rij pīrres tevi nir tetajer, puloli nir parir nga parunge nale se kami. Ko kaprongwose pīrres vajin lut nga kaprij weli jinibb jile nir parto suri.

Nospēn ne Pol

⁷ Tikikas pia-supe suri nospēn nek tevi kami. Ni evi niaken se kerr san nga rrammerreni, ko nga mokmajing korti lilane mīrres tevi inu renge majingen se Numal.

⁸ Nukoni vinuk ji kami suri nanu ngel le, nga puloli kaprongwose nospēn ne kem, ko nolo kami parmolmol suri pīrres.

⁹ Ko bokoni keke Onesimas pipitevi ni. Ni keke evi niaken se kerr san nga rrammerreni, ko nga mokmajing lelane m̄irres, ko evi kami san. Nuru ngok porloli kaprongose nanu jile nga marok-pelpelari iel.

Bongsi nale se Pol

¹⁰ Aristakas le nga m̄ilik renge naim ne nekaien ngel owra ‘erres’ tevi kami, ko Mak keke nga mivi tasi Banapas san, ni keke owra ‘erres’ tevi kami. Nuwra rrurrngi pa tevi kami nga poro ni pivinuk, ko kapatekai ni.

¹¹ Ko m̄erel nga nisen muwaji Iesu nen nga marverus keke nisen tuwen Jastas, ni keke owra ‘erres’ tevi kami. Nir itul ngok kobbong renge m̄eri Isrel nir arpitevi inu renge majingen ne batun vanu se Atua, ko arok-loli nolok erres.

¹² Ko Epapras keke, nga mivi keke kami san, owra ‘erres’ tevi kami. Ni evi jinibb ne majingen se Iesu Kristo, ko okrat tetajer suri kami renge loten sen nga kaptur p̄iterter jile, kaptera jile, ko nga kaploli marongen p̄etp̄eti se Atua.

¹³ Nurongwos bowrai nga ni mokp̄elak milep suri kami, ko suri nir nga renge Laotisia, ko nir nga renge Ierapolis.

¹⁴ Ko dokta Luk le, nga rrammerreni ni, ko Demas keke, orwera ‘erres’ tevi kami.

¹⁵ Kapwera ‘erres’ tevi tasi kerr nir nga marlik Laotisia, ko tevi vinok Nimpa, ko tevi kalesia nir nga marok-korti renge naim sen.

¹⁶ Ko poro nga para-eve jile naul ngel tevi kami, kaplai keke van para-eve keke tevi kalesia nir nga renge Laotisia. Ko naul suk nga m̄elai tevi kalesia nir nga renge Laotisia, kami kaplai vinuk ko kaploli para-eve tevi kami.

¹⁷ Ko kapwerai tevi Akipas, ‘Kupmetmet p̄irres nga kupmajing jile majingen ngok nga Numal m̄ilai tevi nik.’

¹⁸ Inu mawos vajin, nula pensil ji m̄er nga mok-uli tweni nale suk ngel nir, ko nuli vajin “erres” suk ngel tevi kami. Erres kaprrorrmi inu renge dil delrrurr nga marserek e. Nurongwos mae, merrenien se Atua puto tevi kami. Nuwra ‘Remse kami’.

**Naul nga Pol Muli Womue
tevi Kalesia Nir renge
TESALONAEKA
Batu nale nga mivsvseni
lut nga parmeteni naul
ngel puto suri**

Tesalonaeka evi ngaim nga milep ne Masetonia. Pol evan ie daron nga mivel lingi Pilipae, ko etipatun re majingen ne kalesia ie. Ko sete epriv, ko ñeri Isrel sopor nga nolor mileplep suri jinibb elep arosuri nospen nga mïrres, aroji tweni Pol. Ko Pol etajer kele, okmajing renge ngaim mïnij sopor. Ko mian ko orrorrmi ñeri Tesalonaeka nir elep, ko okoni Timoti nga ni pimteni suri liken ser erpese. Mian ko Timoti olwi vajin ko ospe nospen se nir tevi Pol, ko ololi Pol nolon eir elep suri. Ko eauli vajin naul ngel nga rramveruse 1 Tesalonaeka nga puloli norrorrmien ser pïterter renge nosurien ser, ko liken ser puon pïrres. Ko ni ospe kele sopen suri nanu sopor nga nir marsusi, erpe pïrrese re nabong nga Kristo pia-luwi vini rengen.

Pol owra erres tevi nir

¹ Inu Pol, Silas, ko Timoti, namuli naul ngel tevi kami kalesia nir nga Tesalonaeka nga kamkorti pa tevi Atua Tata ko Numal Iesu Kristo. Nurongwos mae, merrenien ko demat se Atua pipitevi kami.

Pol owra erres tevi Atua suri murrun ko nosurien se nir

² Tetajer namok-wera erres elep tevi Atua suri kami jille, ko namok-verus suri kami renge loten se kem tetajer.

³ Namrorrmi re no Atua Tata se kerr erpese nga kammajing tweni nosurien se kami, ko nga merrenien se kami muloli kampelelak; ko nga norrorrmien se kami mutoto mïterter malum renge Iesu Kristo Numal se kerr, ko sev nga ni pia-loli tevi kami.

⁴ Niaken se kem nir, kem namrongwose erres nga Atua emreni kami elep, ko elngi pa kami osuw nga kapivi jinibb sen.

⁵ Suri daron nga kem namwerai tweni nospen ngel nga mïrres tevi kami, ko sete evi nale nawon, ejki. Ko Atua elai pa derteren sen ko Nemïn On sen orpitemi nale se kem, ko ololi kamrongwose erres nga evi nale weretunen. Ko kamrongwose, liken se kem omomsawos erres daron nga namlik tevi kami. Ko namloli erpok nga piviseni sel tevi kami.

⁶ Ko kami kamvijuri sel ngok kobbong nga kem namviseni. Evi pa sel se Numal.

Ko daron nga kami kamlai nospen nga mïrres, ko kami kele, jinibb nir arloli esij tevi kami. Ko Nemïn On ololi kami kamïr kele.

⁷ Ko re murrun ngok, kami kamviseni kele sel nga mïrres re no kalesia nir ne vanu nga Masetonia ko kalesia nir ne vanu ne Akaea, nga nir parvijuri kami.

⁸ Suri kami kamwera tweni nale se Numal renge Masetonia ko Akaea kobbong, ko nospen ne nosurien se kami renge Atua etajer kele wor re vanu petpeti. Ko niko muloli kem setemun namrongwose nabwerai tweni nanu san suri nosurien se kami tevi jinibb nir.

⁹ Suri lartul ngok nir kobbong arsupsupe suri kami, ko sev nga miplari daron nga namini ji kami, nga kami kamlingi tweni pa atua mïnij nir, ko kamini kamvijuri Atua nga mimaaur ko nga mivi weretunen.

¹⁰ Ko arsupsupe kele nga kami kamoktiriv Iesu nga mivi Atua Natun nga Atua muloli mimaaur luwi re mijen, nga pia-luwi kele wor re melrin vini, ko pia-lai mauren tevi kami re nabong nga pia-vini nga Atua pia-wera suri lat nga puto suri tevi jinibb nir.

2

Majingen se Pol renge Tesalonaeka

¹ Tasi kem nir, kamrongwos pae nga sete naminuk nawon ji kami, ko jelangin nga namlingi emaur pa ji kami.

² Ko kami kamrongwose, daron nga namlik malum ngaim Pilipae, ko jinibb arloli esij tevi kem ko arij esij elep kele wor tevi kem. Ko arij tere kele kem daron nga naminuk ji kami. Ko Atua se kerr ololi norrorrmien se kem eterter nga nabwera tweni nospen nga mïrres sen tevi kami.

³ Ko nale se kem nga miveruse kami evi weretunen. Sete erpe nga nir marokwerai, nga namsarr, rreknga namwera nablai nanu san ji kami kobbong, rreknga namkerkerasi kami, ejki.

⁴ Ko Atua emteni pa nolo kem ko elesi erres, ko elai pa nospen sen tevi kem nga nabwerai tweni. Ko niko nammajing se Atua, nga puloli ni pïr re majingen se kem; ko sete nammajing se jinibb, nga nir parir renge majingen se kem. Ko Atua okmeteni nolo kem malum rengen.

⁵ Ko kamrongwose erres nga kem sete naminuk nga nabsurövi nawon kami, rrek suri nabloli sel nga nabvenae joro kami nir, ejki. Atua orongwos puwrai nga nale ngok evi weretunen.

⁶ Ko kem sete namloli murrun ngok nga nabloli jinibb parsurövi kem, poro pivi kami, rreknga jinibb mïnij kele.

⁷ Ko kem namrongwose nablolir par-surövi kem, suri namivi pa aposol se Kristo. Ko sete namloli erpok. Ko namloli nolo kem omolmol pa livö ne kami, erpe tasu san nga moktor lilane natun nir.

⁸ Ko erpok kele, nammerreni kami elep, ko nammarong nga nablai, sete nosþen se Atua kis kobbong, ko mauren se kem kele wor tevi kami. Suri merrenien se kem elep wor tevi kami.

⁹ Tasi kem nir, kaprrorrmu wose nga namþelak elep. Nutrin ko nutpong nam-majing tevi nevre kem, nga kami sete kaprrorrmu þelak kem renge nanen daron nga namok-werai tweni nosþen se Atua tevi kami.

¹⁰ Kami kamrongwos kapwerai, ko Atua kele orongwos puwrai nga murrun nga kem namloli tevi kami kalesia owokwok, ko osorsan erres. Ko sete jinibb san orongwos þirij tere kem renge murru kem ngok.

¹¹ Ko kami kamrongwose nga kem namvisviseni kami sisamis kobbong osorsan tevi tata san nga mivisviseni natun nir.

¹² Ko kem namok-rij nale elep nga mïrres tevi kami, nga puloli nevre kami þiterter, ko nolo kami sete pivitan. Ko Atua everuse kami nga kapan renge batun vanu sen ne nosrövien, niko muloli namok-rij mïterter mirpok tevi kami, nga kami kaptori murrun nga musorsan mïrres renge no Atua.

Lartul nga marok-oji kalesia nir

¹³ Ko suri nanu mïnij kele namok-wera erres tevi Atua suri kami tetajer, nga daron nga namlai nale se Atua vinuk ji kami, ko kami kamlai erres. Kami kamlesi wose weretunen nga evi pa nale se Atua, sete nale se jinibb kobbong. Ko nale ngok okmajing malum tevi kami nga kamok-osuri.

¹⁴ Ko tasi kem nir, eplari osorsan tevi kami erpe nga miplari tevi kalesia se Atua nir renge vanu ne Jutia nga martur renge Iesu Kristo. Suri jinibb ne vanu se kami nir arloli esij tevi kami osorsan erpe nga mïeri Isrel nir marloli pa mïisij tevi kalesia nga nir.

¹⁵ Ko meling ngok kele kobbong nir arevji pini Iesu Numal se kerr, ko propet nir ne tuwi; ko arok-oji kem kele, ko arloli Atua sete eir renge sev nga marloli. Ko artere jinibb totoklai,

¹⁶ suri arok-tur ore kem nga sete nabwera tweni nale se Atua tevi jinibb ne vare nir, nga Atua sete þilai mauren tevi nir. Ko erpok nololien ser ean þelak tetajer, ko lolaren se Atua oto tevir ko pa osuw.

Pol emrreni þilesi nir kele

¹⁷ Tasi kem nir, daron nga namiel lingi kami, ko namrrorrmi kami elep, erpe

norrormien se kem elik malum tevi kami. Ko sete epriv nga namrunge erpe nammerreni kelewor nablesi no kami.

¹⁸ Niko nammerreni nabinuk ji kami. Ko inu Pol, nulwi lesi vavis le pa, ko Demij oktur ore kem.

¹⁹ Ko daron nga Iesu Numal se kerr pialuwi e vini, ko naba-runge þirres renge ni non suri kami kis kobbong. Ko naba-rij melmelas suri kami kis kobbong, ko nabalai nowli kem suri kami kis kobbong.

²⁰ Suri kami kamjoroj pa kem, ko kami kamlai pa neiren tevi kem.

3

¹ Ko namrrorrmi kami elep erpok mian, ko nolo kem setemun orongwos putu malum. Ko niko nammarong nga komru Saelas noborlik jer ko pa iel renge ngaim ne Atens,

² ko nomorkoni Timoti. Ni evi tasi kerr san, ko okpitevi komru renge majingen se Atua nga parwerai tweni nosþen nga mïrres suri Kristo. Nomorkoni ni vinuk nga puloli kaptur þiterter renge nosurien se kami, sete nolo kami pivitan

³ suri nanu nga marsij nga marok-loli tevi kami. Ko kami kamrongwos pae nga para-loli pirpok, suri evi pa marongen se Atua.

⁴ Ko kem, daron nga namlik malum ji kami, ko namwerai womu pae tevi kami nga nir para-loli þisij tevi kami pirpok. Ko kami kamrongwos pae, suri eplari pa osuw osorsan tevi nga namwerai.

⁵ Niko muloli setemun nurongwos þelik malum, mian ko nukoni Timoti nga pimteni suri nosurien se kami erpese. Nomok-rorrmu Demij nga mokrowrowe jinibb tikrekrasi pa kami ko tuloli þelaken se kem tarivi vajin nanu nawon.

Neiren nga milep se Pol suri mïeri Tesalonaeka nir

⁶ Ko lelingenok vajin Timoti evel lingi kami ko olwi pa vini ji kem, ko elik pa tevi kem osuw, ko osþe nosþen nga mïrres suri nosurien se kami ko merrenien se kami. Ko ni owrai nga norrormien se kami okres tetajer suri kem, ko nga kammerreni kaplesi kem, osorsan erpe nga kem kele nammerreni nablesi kami.

⁷ Tasi kem nir, suri namrunge pa nosþen ngel nga mïrres suri nosurien se kami, niko muloli nolo kem sete evitan renge norongen nga mïisij ko nanu nga marsij nir nga marok-loli tevi kem.

⁸ Ko suri kami kamtur pa eterter renge Numal, niko muloli vajin kem nammaur renge mauren nga mïrres.

⁹ Kem sete namviter rragrrag nga nabwera erres tevi Atua suri kami, ko suri

neiren nga milep nga nanir suri kami rengen re no Atua se kerr.

¹⁰ Nutpong ko nutrin namok-verus eterter nga nabrongwose nablesi no kami kele, ko nga nablai kele sev nga nosurien se kami mumrrol rengen.

¹¹ Ko ngel evi loten se kem, nga Atua Tata ko Iesu Numal se kerr porloli sel nga kem nabinuk nablesi kami,

¹² ko nga Numal puloli merrenien se kami nga kammerrmerreni kami ko nga kammerrreni jinibb jikle pimaur kele van mare pilep, pusorsan tevi merrenien se kem nga nammerreni kami.

¹³ Ko nomok-lot kele nga ni pia-loli norrorrmien se kami piteterter ko puon pirres re no Atua Tata se kerr, pijpari daron nga Iesu Numal se kerr pia-luvi vini kele tevi jinibb sen nir.

4

Murrun nga marmomsawos renge no Atua

¹ Tasi kem nir, nuwra bospe suri vajin liken se kami. Namvisviseni pa kami renge sel nga puloli Atua pir tevi kami, ko lelingenok kamok-vijuri sel nen. Ko namngoni kami renge nise Numal Iesu nga kapvijuri sel nen pirres kele wor, ko nga nolo kami puto piteterter rengen.

² Ko kami kamrongwos pae nale nga namlai tevi kami renge nise Numal Iesu, ngel:

³ Atua emarong nga kapivi jinibb nga muon mirres. Norman sete puloli sel nga misij tevi nesevin, ko nesevin sete puloli sel nga misij tevi norman.

⁴ Kami sisamis kaptor sweri ko wor nesen se kami renge sel nga muon ko muwokwok mirres,

⁵ ko sete renge sel nga misij mirpe jinibb ne vare nir nga sete marongwose Atua. Suri nir arok-vijuri nolor kobbong nga marvenae nesevin.

⁶ Ko kami sete kaploli pisij tevi tasi kami san nga kapvenae nesen sen. Suri Numal pia-tor vitrangi isi nga marloli mirpok. Namwerai womue ko namwerai eterter tevi kami erpok.

⁷ Suri Atua everuse kerr nga rrapvijuri sel nga muon, sete sel nga misij.

⁸ Ko si nga murong tweni nale ngok, sete orong tweni jinibb kobbong, ko orong tweni kele Atua nga moklai Nemın On sen tevi kami.

⁹ Ko re devjen ne merrenien, setemun nurongwose boli nale san tevi kami. Suri Atua evisviseni pa kami osuw nga kapmermerreni kami,

¹⁰ ko kamok-loli erpok tevi tasi kerr jikle nga marlik sisamis renge Masetonia

totoklai. Ko namok-werai eterter tevi kami nga kapan mare kele wor renge sel ngok,

¹¹ ko nga kami kappelak ko wor nga mauren nga mumolmol puto ji kami, ko nga kapmetmet nga kapmajing lululweni majingen se kami kobbong. Ko erpe namok-werai pa, sete kaplik nawon, ko kami kapmajing ko wor tevi nevre kami.

¹² Ko nanu ngok nir parloli nir nga sete marosuri Iesu parlesi kami pirpe jinibb mawos kobbong, ko setemun kapkulu van ji jinibb minij nir renge sev nga nevre kami mumrrol ren.

Pol ospe suri nabong nga Iesu pia-luvi e vini

¹³ Tasi kem nir, nammerreni kaprongwose erpese renge kalesia nir nga marmij pa. Sete nammerreni nga kami kapting ko kaprunge pisij pilep suri nir pirpe lartul nga norrorrmien ser sete muto renge Atua, ko nga sete marteravi nanu san jin.

¹⁴ Kerr rramosuri nga Iesu emij, ko emaur luwi kele. Ko erpok kele, renge kalesia nir nga marmij, Atua pia-la lweni nir kele paran renge melrin tevi Iesu.

¹⁵ Sev nga namok-sesre tevi kami ngel evi neseveren se Numal: Kerr nga rramaur jer re daron nga Numal pia-luvi vini setete rrama-wowomu renge kalesia nir nga marmij pa.

¹⁶ Atua pia-werai nale, ko numal se anglo nir pia-verus, ko san pia-uwi davö se Atua. Ko Numal vajin pia-linglingi melrin vini ngatan. Ko kalesia nir nga marmij paramaur luwi puwomu.

¹⁷ Para-maur luwi jile pusuw, ko kerr vajin nga rramaur malum mijpari nabong ngok, Atua pia-tekaı kerr vajin, ko pukortoni kerr tevi nir nga marmij, renge nabor nir. Ko kerr jile rrapa-lesi Numal renge mesa nawon. Ko ngok ma rrapa-lik tevi Numal tuwi ngok vini.

¹⁸ Ko niko erres ma nga kami kapok-supsupe nale ngok tevi kami lulweni, nga puloli norrorrmien se kami puto piteterter.

5

Sete jinibb san orongwose nabong nen

¹ Tasi kem nir, sete nurongwos boli tevi kami suri nabong ko daron nga nanu ngok nir para-rremali ren.

² Suri kami kamrongwos alje pae nga Numal pia-vini re nabong san nga jinibb sete marongwose, osorsan erpe nga jinibb venao san mivini natmupong.

³ Jinibb nir para-wera, 'O erres kobbong, nanu jikle erres bbong', ko nanu nga mikarkar pivini pijpari nir pivesane ko pulokloksir, ko sete parongwos parasi. Pirpe kele nesevin san nga milelea mian ko murnge depain nga pivasus.

⁴ Ko kami, tasi kem nir, sete kamlik rengenemalik, nga kapa-taole nabong ngok pirpe nga martaole jinibb venao nga mivini.

⁵ Suri kami jijle kamivi pa jinibb ne moron, ko jinibb ne nat nga mürin. Sete kamivi jinibb ne nemalik, rrek jinibb ne natmupong.

⁶ Ko sete rrapmatur porporwon pirpe lartul ngok nir, ko rrapkulu metmet ko wor, ko norrorrmien se kerr p̄irferer p̄irres.

⁷ Ko nir nga marok-matur porporwon arok-matur natmupong, ko nir nga marok-minmin arok-minmin natmupong.

⁸ Ko kerr rramivi pa jinibb ne nat nga mürin, ko niko norrorrmien se kerr p̄irferer ko wor p̄irres. Nosurien ko merrenien porirpe sunsun nga puto metmet nga neliw se devje nuval sete purongwos p̄ilik rurrngi. Ko rraplingi norrorrmien se kerr rengenemalik nga pia-la mauren tevi kerr, ngok erpe evi nuvan re batu kerr nga muto metmet erpok kele.

⁹ Suri Atua sete elngi kerr nga pulolarsi kerr kele, ejki. Elngi pa kerr ji Iesu Kristo, Numal se kerr, nga ni pia-lai mauren tevi kerr.

¹⁰ Ni emij suri kerr nga kerr rrapa-korti tevi ni rengenemalik mauren, poro nga rrapmaur rreknga rrapmij daron nga pia-luwi e vini.

¹¹ Ko ngok ma kami kapok-rij ko wor p̄irres tevi kami lululweni, nga puloli norrorrmien se kami p̄itertter, ko kapok-lilai se kami, pirpe nga kamok-loli lelingenok.

Bongsi nale se Pol

¹² Tasi kem nir, namngoni eterter tevi kami nga kaposuri p̄irres nir nga Numal m̄ilngir parpelak rengenemalik ko nevisisenien se kami.

¹³ Kapmerrenir ko kaposurir p̄irres rengenemalik majingen nga marok-lolir. Ko tetajer kapok-korti lulweni tevi kami p̄irres, nga demat puto livö e kami.

¹⁴ Tasi kem nir, namwerai eterter tevi kami nga kapsulngatir ko wor nga niber p̄itertter nga parloli majingen. Ko kaprij p̄irres tevi nir nga nolor marmetutu, nga puloli parterter luwi kele; ko kaplai se nir nga derteren ser mijkie. Ko tevi nir totoklai nolo kami pipriv ko wor.

¹⁵ Kami kapmetmet ko wor nga kami san sete p̄ikle lweni murrun nga m̄isij tevi jinibb san. Ko kami kapp̄elak pilep nga kaploli p̄irres tetajer ko wor tevi kami lulweni ko tevi jinibb m̄inij kele nir.

¹⁶ Kami kapir ko wor tetajer.

¹⁷ Kami kaplot ko wor tetajer, nga nolo kami sete pijebreni.

¹⁸ Ko kami kapwera 'Erres' ko wor tevi Atua rengenemalik nanu jijle nga marok-pelari ji

kami. Suri ngok evi marongen se Atua rengenemalik gortien se kami tevi Iesu Kristo.

¹⁹ Sete kapvisi pini Nerün On se Atua.

²⁰ Sete kapkulu wutan re nale se jinibb san nga muwra nga ni mivi propet ko m̄irij nale se Atua.

²¹ Ko kaprrowrow wore nanu jijle, ko kaplesi nga m̄irres ko kaptori;

²² ko kaplinglingi nanu jijle nga marsij.

²³ Ko ngel evi loten suk, nga Atua nga mivi batu demat, puloli kapon nga kapon p̄etp̄eti; ko ni putori totkoni kami nga norrorrmien se kami, mauren se kami, ko nibe kami puto p̄irres totoklai, pian pijpari daron nga Iesu Kristo Numal se kerr pia-luwi e vini.

²⁴ Atua nga miveruse kami pia-loli nanu ngok nir, suri ni okloli pa nanu nga muwrai nir osuw.

²⁵ Tasi kem nir, kaplot suri kem kele ko wor.

²⁶ Kapwera "erres" tevi kalesia selerr nir, rengenemalik sel nga m̄irres san. Ko ngok ma piviseni nga rramirpe niaken mawos vajin.

²⁷ Nuwrai eterter tevi kami, rengenemalik Numal se kerr, nga kapeve naul ngel tevi kalesia jijle nir.

²⁸ Merrenien se Iesu Kristo, Numal se kerr, puto tevi kami. Nuwra "Remse kami jijle."

**Naul Erwen nga Pol Muli
tevi Kalesia Nir renge
TESALONAEKA
Batu nale nga mivsijseni
lut nga parmeteni naul
ngel puto suri**

Ngel evi naul tuwen nen nga Pol muli tevi kalesia nir ie Tesalonaeka. Ospe keke suri nabong nga Kristo pia-luwi vini rengen, ko ewer rrerrarre nale gerisen ngok nga muwra nabong nen eplari pa osuw. Ko owrai tevir nga partur piterter renge nosurien ser, ewretun jinibb sopor arok-loli esij tevir. Ko owrai keke nga sete parlik nawon, ko nir sisamis parmajing tweni ko wor nanen ser, ko nga parok-loli majingen nga marres tetajer.

Pol owra erres tevi nir

¹ Inu Pol, Silas, ko Timoti, namuli naul ngel tevi kami kalesia nir nga Tesalonaeka nga kamkorti pa tevi Atua Tata ko Numal Iesu Kristo.

² Merrenien ko demat se Atua Tata ko se Numal Iesu Kristo pipitevi kami.

Pol owra erres tevi Atua suri nir

³ Tasi kem nir, namok-werai erres ko wor tevi Atua tetajer suri kami. Ko erres nga nabloli pipok, suri nosurien se kami okmaur elep, ko merrenien se kami nga kamok-merrmerreni kami okan mare elep keke wor.

⁴ Ko ngok ololi kem vajin namok-surövi kami tevi kalesia se Atua nir renge vanu totoklai. Namok-supe murrun ngel, suri nga kamtur eteter pa daron nga jinibb nir marloli misij tevi kami. Ko jinibb ne vare nir arok-oji kami ko arok-loli esij tevi kami nabong elep, ko nosurien se kami sete evitan rengen.

Atua putor vitrangi nir nga marok-loli misij tevi mieri Tesalonaeka nir

⁵ Ko nanu ngok nir para-loli kapivi jinibb mawos ne batun vanu ne melrin, ko ngok evi batun nga marok-loli misij tevi kami. Ko suri arok-loli esij tevi kami erpok, niko miviseni nga Atua puloli pusorsan pirres daron nga putor vitrangi jinibb nen nir.

⁶ Ko rrek pirres pelak ma poro Atua puloli pisij tevi nir nga marok-loli misij tevi kami ngok.

⁷ Ko re wosenen keke kobbong, Atua pia-la tweni norongen nga misij ji kami ko ji kem keke. Re daron ngok, Numal Iesu pia-linglingi melrin ko pirrmali iel ngatan tevi anglo sen nir nga marterter,

⁸ ko tevi nabb nga muror milep. Ko ni pia-tor vitrangi nir nga marivi devje nuval se Atua, ko nir nga sete marosuri nospen nga mirres suri Iesu Numal se kerr.

⁹ Atua pia-tor vitrangir renge nabong ngok daron nga pilngi kurtwenir, ko parlik vajin ngasue Atua renge lut nga misij san pijpari tuwi ngok vini. Ko setemun parini mori ji Numal nga parlesi nosrovien sen rreknga derteren sen.

¹⁰ Renge nabong ngok, kami kapa-pitevi nir nga marres, suri kami kamosuri pa nale nga namwerai tevi kami. Ko Iesu pia-luwi vini, ko jinibb sen nir nga marosuri ni partaole ko parsurovi ni.

Loten se Pol suri nir

¹¹ Niko muloli namok-lot tetajer suri kami, nga Atua se kerr puloli kapviter renge mauren nga ni miveruse kami tweni; ko nga pilai derteren keke tevi kami nga kaprongwos kapmajing nungsi norrorrmien jikle nga marres ko majingen jikle nga muto pa renge nosurien se kami.

¹² Murrun ngok puloli jinibb parsurovi nise Iesu Numal se kerr suri kami, ko parsurovi kami keke suri ni, suri merrenien se Atua se kerr ko se Numal Iesu Kristo.

2

Murrun nga Iesu Kristo pia-luwi e

¹ Tasi kem nir, namwera nabsupe vajin suri murrun nga Iesu Kristo pia-luwi e, ko pirpese rrapa-korti tevi ni.

² Ko namwera nabwerai piterter tevi kami nga sete norrorrmien se kami pisarr pingavilvil, rreknga sete kaprunge pisij renge nale karkar nga marwerai 'O, nabong se Numal evini pa.' Rrek kami kamrunge nale ngok ji jinibb san nga muwra Nemün On elai tevi ni, rreknga ji jinibb san nga mokwerwer, rreknga renge naul san nga marwera kem namuli. Ko ejki, sete kaprunge.

³ Sete kaploli jinibb san pikrekrasi kami renge sel san. Suri nabong ngok sete mia-vini womu. Kapa-lesi womu nabong nga milep san nga pirrmali, nga jinibb partur imera ko partere Atua. Ko jinibb nga moktor oti nale pia-rremali, ni nga mivi jinibb ne nejikkien.

⁴ Ni pia-tere atua minij nir nga jinibb marok-surövir, ko pilngi ni pian mare re nir ngok. Ko ni pian vajin renge Naim On se Atua ko pisakel ko puwra tweni nga ni kobbong evi Atua.

⁵ Ko erpese? Kami kammalie nga nuwrai pa nanu ngel tevi kami daron nga meptevi kami e?

⁶ Ko nanu keke san nga murrul totkoni nanu ngel nga sete pirrmali lelingenok, ko rrekna kami kamrongwos pae nanu

nen. Purrul totkoni mian, ko renge daron mawos nen, jinibb nen pia-rremali.

⁷ Suri murrun nga marok-tor otvi nale okimare pa osuw, ko eteptepi malum. Ni nga mokrrul totkoni murrun ngok puloli pīrpok ko wor pijpari nga Atua pia-lai tweni ni renge sel ngok.

⁸ Ko jinibb nga moktor otvi nale pīrrmali ko vajin limjer. Ko Numal Iesu sowin pīlai mīnen ko pīrevji pini. Ni pia-mij pivesan daron nga Iesu pia-luwi e vini.

⁹ Mernen pia-vini suri majingen se Demij, ko derteren sen pilep nga puloli nanu pilep nga jinibb nīr partaole, ko pīkrekrasi jinibb pilep nga parosuri ni.

¹⁰ Ko ni pia-loli gerisen lele nga marsij nga pīkrekrasi nīr nga para-jijki. Nīr ngok para-jijki suri sete armerreni parvijuri weretunen, ko ngok kobbong evi sel nga Atua pia-lai mauren tevi nīr rengen.

¹¹ Ko renge murrun nga muto jir, Atua okloli norrorrmien ser nga pīlengleng kele wor nga parok-osuri gerisen.

¹² Niko nīr jile nga sete marosuri weretunen ko marok-ir suri nanu nga marsij, Atua pia-tor vitrangir ko suri.

Atua elngi pa jinibb sen nīr osuw

¹³ Ko kami ma, tasi kem nīr, Numal emrreni kami elep. Ko tetajer, nammerreni nabwera erres wor tevi Atua suri kami. Suri Atua elngi pa kami osuw nga kapwomu renge nosurien renge vanu se kami, nga Atua pia-lai mauren tevi kami. Ko ni ela mauren tevi kami renge sel ngel, nga Nerñin sen puloli kapon, ko kaposuri weretunen.

¹⁴ Ko Atua everuse kami renge nospen nga mīrres nga namwerai tweni pa tevi kami osuw, nga kaptor sweri mauren ne nosrōvien se Numal se kerr Iesu Kristo.

¹⁵ Ko ngok, tasi kem nīr, kaptur pīterter, ko kaprrul totkoni nevisvisenien nga namvisiseni tevi kami renge jingo kem ko renge naul nga namuli tevi kami.

¹⁶ Atua Tata se kerr emrreni kerr. Ko renge merrenien sen, otori nolo kerr nga puto pīterter, sete pivitan nabong san. Ko ni elai kele nanu nga mīrres nga rrapa-tīriv tweni.

¹⁷ Ko Atua tevi Numal se kerr Iesu Kristo porloli norrorrmien se kami pīterter nga sete orongwos pimijmij renge majingen ko nale jijle nga marres.

3

Pol owra parlot suri ni

¹ Tasi kem nīr, rreknga ngel evi bongsi nale suk. Kami kaplot ko wor suri kem nga nale se Numal se kerr orongwos

putuw asasi pingavilvil, nga jinibb arongwos parosuri renge vanu lele nīr pīrpe pa iak ji kami.

² Ko kaplot kele nga Atua pīlai tweni kem renge nevre nīr nga sete marsorsan mīrres, ko nga marivi jinibb nga marsij. Ko suri sete nīr pētpeti ko nga nosurien ser mutoe.

³ Ko Numal osorsan erres nga rraplingi nolo kerr rengen, ko ni puloli nolo kerr pīterter, sete pivitan. Ko putor ore Demij nga sete pivini mori ji kerr.

⁴ Ko Numal ololi nosurien se kem oto eterter re kami nga lelingenok kamok-loli erpe nga namwerai pa, ko nga kapok-loli pīrpok tetajer ko wor.

⁵ Ko ngel evi loten se kem kele san, nga Numal puwrai visviseni tevi kami nga kami kapmerreni Atua pilep, ko nga puloli kaptur pīterter kele wor renge derteren se Kristo.

Kalesia nīr sete parlik totrong nawon

⁶ Tasi kem nīr. Renge nise Iesu Kristo, Numal se kerr, namwera eterter tevi kami nga sete kapkorti tevi kalesia nīr nga marlik totrong nawon, ko sete marvijuri nale nga namlai pa tevi kami, nga kalesia nīr parmajing ko wor.

⁷ Kami kamrongwos pae nga kaploli rrongrongvi kobbong sev nga kem nam-loli pa. Daron nga namlik tevi kami, sete namlik totrong nawon.

⁸ Sete namlai nawon nanu san ji kami san, ejki, namwuli ko wor. Nammajing eterter elep tevi nevre kem natmīirin ko natmupong, nga puloli kami sete kapḗlak re nanen se kem.

⁹ Ko kem namrongwos nabngoni nanu pilep, suri namivi pa aposol. Ko sete namloli erpok. Ejki, nammajing tweni ko wor nanen se kem, nga piviseni sel nga kami kapvijuri kem.

¹⁰ Daron nga namlik tevi kami, namokwerai erpel tevi kami: 'Jinibb si nga mumusus pīmajing, sete kaplai nanen tevi.'

¹¹ Suri namok-runge nale nga kami sopor arok-lik totrong nawon, sete armajing, ko areses ma nanu van re majingen se jinibb mīnij nīr.

¹² Renge nise Numal Iesu Kristo kem namwerai nale ngel nga puwni nīr ngok: kaplik malum, ko kapḗlak nga kaptor sweri nanen se kami kobbong.

¹³ Ko kami, tasi kem nīr, sete nibe kami pimijmij nga kaploli majingen nga marres nīr.

¹⁴ Rrek kami sopor ni ko iok nga sete marvijuri nale nga namok-lai tevi kami renge naul ngel. Poro san ni ko nga mirpok, erres ma nga kaprongwos ni pīrres,

nga sete kapok-korti mun tevi, puloli ni non p̄isije sev nga muloli.

¹⁵ Ko sete kapmeteni ni pirpe devje nuval se kami, ejki. Evi pa tasi kami ko. Ko niko kaploli lesi wor nga nolon pulwi.

Bongsi nale se Pol

¹⁶ Ko ngel evi loten suk, nga Numal, nga mivi batu demat, p̄ilai demat tevi kami tetajer renge sel jijle nir. Ko Numal piptevi kami jijle.

¹⁷ Inu mawos vajin Pol, nula pensil ji m̄er nga mok-uli tweni nale suk ngel nir, ko nuli vajin ‘erres’ suk ngel tevi kami. Nomok-uli erpok renge naul suk jijle nir, nga kami kaprongwose nga evi weretunen naul suk.

¹⁸ Ko ngel evi loten suk, nga merrenien se Numal se kerr Iesu Kristo puto tevi kami jijle. Nuwra “Remse kami jijle.”

**Naul nga Pol Muli
Womue tevi
TIMOTI
Batu nale nga mivsviseni
lut nga pargeteni naul
ngel puto suri**

Timoti tasu sen evi nesen Isrel san nga mivi kele kalesia, ko tata sen evi m̄eri Gris. Ko etipatun majingen sen nga m̄imajing tevi Pol daron nga mivi m̄elakel malume. Pol oli naul ngel nga rramveruse 1 Timoti tevi Timoti daron nga ni mokmetmete kalesia nir ie Epesas. Pol owra Timoti puwer ore nevisvisenien gerisen nga jinibb sopor marok-visviseni ie. Ko ospe kele suri lat nga marlot muto suri, ko lat nga kalesia liken ser puto suri renge devjen sopor kele.

Pol owra erres tevi Timoti

¹ Inu Pol, nuvi aposol se Iesu Kristo suri nale se Atua nga m̄ilai mauren tevi kerr, ko Iesu Kristo Numal se kerr nga rramok-teravi.

² Nuwrai 'erres' tevi nik Timoti. Kurpe natuk woswos renge kalesia nir. Ko ngel evi loten suk, nga merrenien, netlasien, ko demat se Atua Tata ko Numal se kerr Iesu Kristo piptevim.

Pol owra puwer ore nevisvisenien gerisen

³ Erpe mowrai pa musuw tevim daron nga m̄elinglingim nga bean Masetonia, numrreni nik kuplik ko wor Epesas, nga kupwer ore nir nga marok-visviseni gerisen nir.

⁴ Ko kupwera i tevi nir nga nir parlinglingi tutunmasa gerisen ser ko naul nga marpepriv lenglengen ne nise metka ser nir. Daron nga margeteni nanu ngok nir, ko arpalpal elep. Ko marongen se Atua sete orongwos piplari renge nanu ngok nir. Eplari kobbong renge nosurien se jinibb nir.

⁵ Ko Atua owrai kerr rrap̄elak tweni merrenien nga miplari renge nalol nga muwokwok m̄irres, ko nga sete mubjubjub suri nanu nga marsij nga rramlolir, ko renge nosurien nga mivi weretunen.

⁶ Jinibb sopor arlinglingi pa murrun ngok nir ko arsarr pa renge nale nawon.

⁷ Nir arwera arongrongwos elep suri nale nesereien se Atua, ko arok-rij eterter erpe norongwosien ser mutoe kobbong. Ko setete arongwose suri murrun nale nga marok-wera i.

⁸ Ko rramrongwose erres nga nale nesereien se Atua erres poro parrul totkoni renge sel momsawos nen.

⁹ Ko tetajer rraprongwose nga nale nesereien sete eplari tweni jinibb nga marres kobbong, ko purrul totkoni ma jinibb nga marok-tor otvi nale, ko jinibb nga marok-loli batur, ko jinibb nga sete marosuri Atua, ko jinibb nga marok-loli nololien nir, ko jinibb nga sete marvijuri sel se Atua ko sete marok-rro rmi Atua nabong sopon, ko jinibb nga marok-revji pini tata ser ko tasu ser, rreknga marok-revji pini jinibb lele.

¹⁰ Ko evi nga purrul totkoni norman nga sete puloli p̄isij tevi nesevin, ko nesevin nga sete puloli p̄isij tevi norman, ko norman nga sete puloli p̄isij tevi norman pipok kele. Ko evi kele nga purrul totkoni nir nga marok-venae jinibb, ko nir nga markerkeris, ko nir nga marlai nale gerisen re nospen se numal nir, ko nir nga marloli murrun m̄inij kele nga marsij ko martor otvi nale nga musorsan.

Kristo etlasi Pol ko elngi nospen nga m̄irres renge nevren

¹¹ Nale ngok nga musorsan eplari renge nospen nga m̄irres ne nosrovien se Atua. Rrap̄surövi ni rengen. Ko nospen ngok Atua elngi pa renge nevrek osuw nga inu bowra tweni.

¹² Inu nuwra erres tevi Iesu Kristo, Numal se kerr, nga m̄ilai derteren tevi inu, ko m̄ilesi inu mosorsan nga botori majingen sen.

¹³ Tuwi, nomok-rij esij tere ni, nomok-oji jinibb sen nir, ko nomok-loli esij tevir. Ko iok erpe nuloli esij tevi ni mawos. Ko erres kobbong, ni ornge esij suri inu, suri inu sete nurongwose nanu nga nomok-loli nir, ko sete nuosuri re wosenen.

¹⁴ Ko merrenien se Numal se kerr emejivjiv nawon ko elai nosurien ko merrenien nga morivi se kerr kokorti vajin tevi Iesu Kristo.

¹⁵ Ko nale ngel nga muwrai Iesu Kristo mivini iel ngatan nga p̄ila mauren tevi jinibb nga marsij evi nale weretunen, nga kerr rraposuri ko wor tetajer.

Ko inu nusij wor asi nir ngok.

¹⁶ Ko Iesu Kristo etlasi inu suri emrreni piviseni rrongi renge inu nolon nga mipriv torrlai tevi jinibb nir nga nir kele parasuri ni, nga para-tor sweri mauren nga puto tuwi ngok vini.

¹⁷ Atua evi Numal ne tuwi ngok vini nga mauren sen sete orongwos pusuw nabong san. Evi Atua nga sete rramrongwos rraplesi; esan kobbong evi Atua. Rrap̄suture ko wor nisen pian mare, ko rrap̄surövi

lelingenok ko pian pijpari tuwi ngok vini. Amen.

¹⁸ Belai nale ngel tevim, natuk Timoti, nga pusorsan tevi nale se Atua nga marwerai pae womu piplari suri nik. Kuptori totkoni nale ser nir, puloli norrorrmien som puto p̄iterter nga kupbböt totkoni nanu nga marsij nir.

¹⁹ Kupmetmete nosurien som p̄irres, ko kupmetmet kele nga norrorrmien som sete pubbujbbuj, ko kupiel lingi sel nga m̄isij pivesane. Jinibb sopor sete arloli erpok, ko arlokloksi pa nosurien ser osuw.

²⁰ Renge laru ngok nuru Aemenaes ko Aleksanda, nuru orloli pa esij erpok, ko nulngi pa nuru re derteren se Demij nga porlinglingi murrin ne nale nga m̄isij.

2

Loten

¹ Nale suk nga womujnen nga kupwerai p̄iterter tevi nir, ngel: nga nir parlot ko wor pilep tevi Atua suri jinibb nir.

² Ko parlot rengen loten lele nir suri numal nir ko jinibb nga marlelep nga martori totkoni vanu nir, nga Atua purongwos p̄ilik tevir rengen majingen ser; ko nga rraprongwos rraplik rengen liken nga mumolmol m̄irres, ko nga rraprongwos rraplot tevi Atua ko nga rraprongwos rrapvijuri murrin jijle nga m̄irres.

³ Murrin ne loten nga mirpok erres p̄elak, ko ololi Atua nga m̄ila mauren tevi kerr ornge erres.

⁴ Suri ni emrreni p̄ila mauren tevi jinibb totoklai, ko nga parlesli wose sev nga mivi weretunen.

⁵ Atua esan rres kobbong. Ko jinibb san esan rres kele nga m̄ilik livö e Atua ko jinibb nir, evi Iesu Kristo nga mivi jinibb.

⁶ Ko ni elngi mauren sen nga puloli lilane sel nga pujri lweni jinibb jijle nir rengen. Iok eviseni erres rengen daron momsawos nen nga Atua mimrreni p̄ila mauren tevi jinibb totoklai.

⁷ Ko Atua okoni inu erpe aposol nga bowra tweni nanu ngok. Nuwretun, sete nukerkeris; majingen suk evi nga bevisviseni jinibb ne vare nir murrin ne nosurien nga mivi weretunen.

⁸ Renge lat jijle, numrreni jinibb nir parlik malum nga lolaren ko laten pijki jir, ko nga parsusi nevrer paran mare ko parlot loten nga mumomsawos vajin tevi Atua.

Murrin momsawos se nesevin nir

⁹ Renge murrin ngok kele, numrreni nesevin nir paruri nijor ser nir rengen sel nga

m̄irres, sete parkowkorrir nga parlokloksi mete jinibb nir. Ko sete parlokloksi daron pilep nga parviri batur. Ko sete parlokloksi nevöt pilep nga parwuli gol, rreknga nevöten nga marok-lai lolo botrrum, rreknga sunsun nga nowlin mian mare p̄elak.

¹⁰ Ko parjoroi lweni nir sete tevi sunsun ko tevi majingen nga marres. Suri ngok evi murrin momsawos se nesevin san nga muwra ni evi kalesia nesevin san.

¹¹ Nesevin parlik malum rengen Naim On, ko parloli norrorrmien ser pian ngatan nga parlongrongwos.

¹² Nomok-wer ore nesevin nir nga sete parok-visviseni jinibb nir rengen Naim On, ko sete paran mare re norman, ko parlik malum kobbong.

¹³ Suri tuwi jer pa, Atua ololi Atam womujnen, ko vitunen ea-loli Iv.

¹⁴ Ko sete Atam ko nga murrin nale gerisen nen, ko vinnen ko ornge nale gerisen nen, ko otor otvi nale nesesreien se Atua.

¹⁵ Ko sel san otoo nga Atua p̄ilai mauren tevi nesevin nir rengen, suri nesevin arvesi bipi. Ko nesevin parrul totoni kele ko wor nosurien ser ko merrenien ser ko paron p̄irres, sete parkowkorrir.

3

Murrin se jinibb nga marlelep se kalesia

¹ Nale ngel evi nale weretunen: 'Poro nga san emrreni pivi jinibb nga pilep se kalesia, ko ni emrreni majingen nga m̄irres p̄elak ngok.'

² Mernen sel sen p̄irres kemkar̄ie ko wor, pimrreni temijjal nesen sen ko sete puoji nesevin m̄inij;^A sete pivi jinibb nga pokminmin; pokmetmet lweni ni ko murrin puwokwok p̄irres. Ni p̄ir ko wor nga p̄ilai jinibb neturvitan paran jin. Ko ni purongwos p̄iwerwer kele.

³ Jinibb ne minminen ko jinibb ne balpalen sete putori majingen ngok. Pivi jinibb nga nolon mumolmol, sete mokkarkar, ko sete norrorrmien sen puto p̄elak rengen nevöt.

⁴ Ko pivi kele jinibb nga purongwos pimmetmet metka sen nir ko puloli natun nir parosuri ni nga parunge drrelan.

⁵ Poro jinibb san sete purongwose sel nga pimmetete metka sen nir rengen, ko pia-metmete kalesia nir p̄irpese ko?

⁶ Ko jinibb nga mia-ivi taol kalesia bbong sete orongwos putori majingen ngok, suri nolon turow p̄elake, ko Atua tia-tor vit-rangi tirpe pia-tor vit-rangi Demij.

^A 3:2 Erpe iel, Pol owra 'Nesen sen pisansan kobbong', ko rengen nale se m̄eri Gris nir, ngok erpe betile nale san nga mining nen erpe nga namlingi, 'pimrreni temijjal nesen sen ko sete puoji nesevin m̄inij.'

⁷ Ko jinibb nga putori majingen ngok kele pivi wor jinibb san nga jinibb ne vare nir parwerai pirlpel: 'O, m̄nerel evi m̄ner nga m̄irres p̄elak.' Ko re murrun ngok puloli nisen sete orongwos p̄isij, ko sete orongwos pivitan re nimet nga Demij m̄ilngi.

⁸ Ko re murrun ngok kele kobbong, jinibb nga marlai majingen nga marmajing se kalesia nir, parmomsawos p̄irres ko parvijuri nale nga marok-werai p̄irres, sete parok-mini p̄elak norro rreknga nuwi nga m̄uterter, ko sete parmerreni p̄elak nev̄ot.

⁹ Ko parosuri p̄iterter nale weretunen ngok renye murrun ne nosurien nga Atua miviseni pa musuw, nga sete nanu san pubbujbbuj renye norrorrmien ser suri.

¹⁰ Ko kalesia nir parrowrrow lesi lartul nga marwera parlai majingen ngok nir puwomu, ko poro parviter, kalesia nir arongwos para-susture nir vajin.

¹¹ Ko nesen ser kele parmomsawos p̄irres, ko sete parworworsur, ko sete parok-minmin, parivi nesevin nga parok-majing tetajer suri norrorrmien ser p̄irres.

¹² Lartul ngok nir parmerreni temijpal nesen ser nir, ko sete paroji nesevin m̄inij.^B Ko parivi jinibb nga parongwos parmetmete natur nir ko metka ser nir p̄irres.

¹³ Nir nga marmajing m̄irres renye majingen ngok, niser orongwos pian mare ko norrorrmien ser orongwos p̄iterter kele wor nga parrul totkoni murrun nga marosuri m̄irres Iesu Kristo.

Kerr kalesia rramtori totkoni weretunen se Atua

¹⁴ Timoti, daron nga moli naul ngel tevim, nomok-rorormi rreknga sete mia-periv nga bevinuk belesim iok.

¹⁵ Ko poro sete bevinuk pingavil, ko naul ngel evi nga puwrai visviseni murrun nga marsorsan nga rraptori, kerr nga rramivi kalesia se Atua nga mimaur. Kerr kalesia rramivi pa metka se Atua, ko rramtori totkoni weretunen oto erres.

¹⁶ Ko weretunen, nale nga miteptepi suri Kristo renye murrun ne nosurien se kerr ean mare elep. Arsuṣuṣe erpel: Kristo ngel, Atua ololi eplari ko evi jinibb erpe kerr nga rraprongose ni. Ko Neñin On ewilwil sen nga muwra, 'Mernen le ngel.' Ko anglo sen kele arlesi ni. Jinibb ne vare nir arunge nosṣen nga m̄irres sen, ko jinibb ne iel ngatan nir arosuri ni. Ko Atua elai ni vajin ean elik tevi renye melrin.

4

Nevisvisenien gerisen

¹ Neñin On owrai tweni pa osuw nga daron nga iel ngatan putomori pusuw, jinibb sopor arongwos parlinglingi murrun ne nosurien ser renye Atua, ko parosuri neñin ne gerisen kobbong nir. Ko demij parongwos parkerkerasi nir rengen.

² Jinibb ne gerisen ngok nir nga markerkerasi jinibb nir mirpok, setemun arunge nanu san obbujbbuj re nolor daron nga marloli m̄isij.

³ Nir parwer ore nga jinibb sete putotko, ko sete purro nanen lele. Ko Atua elngi pa nanen ngok nir nga jinibb nga marosuri ni ko marongwose weretunen parwera erres wor tevi Atua renye ko parlai parurroi.

⁴ Nanu jijle nga Atua muloli arres kobbong; rramrongwos rrapurroi nanu jijle poro rraplot ko rrapwera 'erres' tevi Atua renye.

⁵ Suri nale se Atua ko loten nga mirpok arongwos parloli nanu jijle paron p̄irres re no Atua.

Jinibb ne majingen nga musorsan se Iesu Kristo

⁶ Poro nik Timoti kopok-werai tweni nale ngok tevi tasi kerr nir, nik kupivi jinibb ne majingen se Iesu Kristo nga musorsan m̄irres. Ko nale ne nosurien ko nevisvisenien nga m̄irres nga komok-vijuri pararpe nanen som renye kalesia mauren som.

⁷ Sete kuprunge tutunmasa gerisen nir nga marij tere nale se Atua. Ko kup̄elak ko wor p̄iterter tweni mauren nga musorsan m̄irres nga Atua mimrreni.

⁸ Rrek erres sopen nga marp̄elak tweni nga niber p̄iterter, ko erres kele renye sel jijle nga marp̄elak tweni mauren nga musorsan m̄irres nga Atua mimrreni. Suri jinibb nga muloli mirpok orongwos purnge p̄irres renye mauren nga lelingenok ko mauren nga pia-vini vitu kele.

⁹ Nale ngok evi nale weretunen nga kerr rraposuri torrtorrlai ko wor tetajer.

¹⁰ Ko rramlingi pa norrorrmien se kerr osuw renye Atua nga mimaur, nga mokla mauren tevi jinibb jijle nir, ko mare nen kele ela mauren tevi jinibb nga marosuri ni. Ko niko rramok-p̄elak milep renye majingen se kerr.

¹¹ Ko nik Timoti kuprij p̄iterter ko wor ko kupvisviseni nanu ngok nir tevi kalesia nir.

¹² Sete kuploli jinibb parkulu wutan renye nik suri nik kuvi melakel kobbong san. Ko renye nale som ma ko liken som ko merrenien som ko nosurien som ko sel nga

^B 3:12 Erpe iel, Pol owra 'Nesen ser pisansan kobbong', ko renye nale se m̄eri Gris nir, ngok erpe beṣile nale san nga mining nen erpe nga namlingi, 'parmerreni temijpal nesen ser ko sete puoji nesevin m̄inij.'

mīrres som nga komok-loli tevi nesevin nir; puloli kupviseni sel nga mīrres tevi kalesia nir nga parvijuri.

¹³ Pian pijpari daron nga inu bea-luwi e vini, nik kuppelak nga kopok-eve wor Naul On, ko kopok-werwer, ko kopok-visviseni nir renge nale weretunen.

¹⁴ Sete kuploli norongwosien som nga Nemīn On mīlai tevim seveling nga pa puto nawon. Arlai tevim suri nale se Atua nga propet san muwrai tweni tevim, daron nga Bīterawareng nir nga marwowomue kalesia marwilwil nga marlingi nevrer renge batum.

¹⁵ Nik kuploli wor majingen ngok ko nir, norrorrmien som puto pīterter renge nanu ngok nir, nga puloli jinibb parongwos parlesi wose nga norrorrmien som oktajer malum.

¹⁶ Kupmetmete nik, ko kupmetmet renge nevisisenien som kele. Kuptur pīterter renge nanu ngok nir, suri poro kuploli pipropok, nik kupa-loli nik lweni kupasi van re mauren, ko nir nga marunge drrelam kele.

5

Murrun nga mīrres nga pīrij tevi jinibb nir

¹ Sete kupan kuprij pīterter tevi jinibb nga mītra, ko kuprij ma rijrijen lilane tevi ni, erpe ni evi tata som woswos kobbong. Ko kuprij tevi mīelakel nir parirpe tasim woswos.

² Ko kuprij pīrres tevi lekterwarreng nir pirpe nir arivi tasu som woswos. Ko kuprij kele tevi nesenwarreng mīelakel nir pirpe nir arivi jojim woswos, renge sel nga muwokwok mīrres.

Murrun nga parmetmete nesevin nir nga diwen ser marmij lingir

³ Kuposuri pīrres nesevin san nga diwen sen mimij lingi ko nga metka sen san mijki nga pimetmete ni.

⁴ Ko poro natun rreknga mebbun putoe, nir ngok ko parloli wos wore majingen nga milep ngel se kalesia nir, nga parmetmete metka ser. Nir parloli ko wor pipel, erpe parkele lweni belaken se nir nga marvesir nga marloli tevir. Ngok evi nanu san nga Atua pīr rengen.

⁵ Ko osorsan nga kalesia nir parmetmete nesevin nga diwen sen mimij lingi ngok ko nga metka sen arjkie nga parmetmete ni, ko nga mīlgi norrorrmien sen muto mīterter renge Atua, ko nga muklu tetajer nat mīrin ko nat mupong nga Atua pokmetmete ni renge liken sen.

⁶ Ko poro nga ni mokrorrmi lweni ni kobbong, ngok erpe niben emaur malum ko nerīn emij pa osuw.

⁷ Nale ngok kupwera tweni ko wor tevi nesevin ngok nir, nga parloli san sete orongwos pīwer lokloksi nir rengen.

⁸ Ko jinibb nga mumusos pimetmete metka sen mirpe tasu sen san nga diwen sen mimij lingi, eviseni nga ni setemun orrul totkoni murrun ne nosurien, ko evan ngasu malum wore Atua easi jinibb san nga nosurien sen mijkie.

⁹ Ko renge naul ngok nga maruli tweni nise nesevin nir nga diwen ser marmij lingir rengen, nga kalesia nir parmetmete nir, kupuli bbong nise nesevin nir nga sia ser mīasi ngavōl ouwon (60), ko nga marmerrēni temijpal diwen ser mijpari daron nga marmij lingir, ko sete maroji norman mīnij.^C

¹⁰ Ko nir niser parres ko wor, suri nir arok-loli majingen nga marres. Nir parivi nesevin nga marres, suri artor pipi erres ejpari nga natur marlelep, ko arok-ir nga parok-la neturvitan parini jir, ko parmetmete kalesia san pīrres pelak poro pivini jir, ko parlai se nir nga jinibb marojir. Suri nir norrorrmien ser eterter pa nga parloli majingen jikle nir nga marres.

¹¹ Ko sete kupuli tweni nise nesen mīelakel nir nga diwen ser mimij lingir. Suri daron nga norrorrmien ne totkoiēn mivini mīterter renger, ko taran ngasue Kristo vajin.

¹² Ko jinibb nir tarwer lokloksi nir vajin, suri arlinglingi tweni rijrijen ser nga womu, nga setemun partotko kele ko parkorti tevi Kristo pisan vajin.

¹³ Ko pipropok kele, tartipatun nga tarlik totrong nawon, ko tarivel karkar renge naim nir, ko tarunge lokloksi ko tarwor-worsur, ko tarsupe nanu nga sete mīrres re nir parwerai.

¹⁴ Ko niko numrreni nesen mīelakel nir nga diwen ser marmij lingir partotko kele ko wor, ko natur partoe, ko parmetmet lilane naim ser. Ko ngok puloli devje nuval se Kerr sel ser pijki rrese nga parongwose parij tere Kerr.

¹⁵ Nesevin nga diwen ser marmij lingir ngok sopor arivel lingi pa sel nga mimawos ko arvijuri Demij vajin.

¹⁶ Ko poro kalesia nesevin san evi sopuspen e nesevin san nga diwen sen mimij lingi, ni ko pimetmete pīrres sopuspen ngok. Sete parloli belaken nen pian re kalesia jikle nir. Ko kalesia nir vajin para-metmete nesevin nir nga diwen ser

^C 5:9 Erpe iel, Pol owra 'Diwen sen pisansan kobbong', ko renge nale se mēri Gris nir, ngok erpe betile nale san nga mining nen erpe nga namlingi, 'pimrreni temijpal diwen sen ko sete puoji norman mīnij.'

marmij lingir ko metka ser san mijkie nga pimetmete nir.

Majingen se Birterawarrenc nir nga marok-wowomue kalesia nir (elta)

¹⁷ Birterawarrenc nir nga marok-wowomue kalesia nir, poro nga parmajing p̄irres, ko kalesia nir parosurir ko wor. Ko parlai kele nevõt tevir, ko ngok erpe arlai nowlir evaru ko. Parloli pipok pilep ko wor tevi nir nga marpelak milep nga marwerwer ko marvisviseni.

¹⁸ Suri Naul On owra 'Daron nga kumlai buluk nga parhbõt tututweni jelangi wit nir, kami kaploli ko wor parurroi jelangin ngok sopor, sete kapkai totkoni jingor.' Ko nale owrai kele nga 'Poro jinibb san puloli majingen san, erres nga ni pia-la nowlin ren ji jinibb nga mokmajing ser.'

¹⁹ Sete kaprunge nale san nga marwera 'O, Birterawarrenc ngok nga mok-wowomue kalesia nir ololi esij', poro sete nir pieru rreknga pitul nga parwera pipok ewretun.

²⁰ Ko poro Birterawarrenc ngok san puloli p̄isij, kuprij p̄iterter tevi rengo no kalesia nir, nga puloli nir m̄inij parmetutu kele.

²¹ Inu nuwrai eterter tevim rengo no Atua ko rengo no Iesu Kristo tevi anglo sen nir nga ni m̄ilngir pa musuw, nga kupvijuri ko wor nale suk ngok nga m̄elai tevim. Kuploli pusorsan ko wor tevi jinibb p̄etp̄eti. Sete kuploli sel nga m̄iterter tevi jinibb sopor, ko sel nga mimalum tevi nir sapon kele.

²² Sete nolom pingavilvil nga kuplingi nevrem rengo jinibb san nga kupsusture ni nga putori majingen san se Atua. Ko sete kupkorti tevi jinibb karkar nir nga parloli kupvitan van rengo nololien ser. Kuprrul totkoni mauren som puwokwok p̄irres.

²³ Sete erres nga nik kopok-mini nuwi kis kobbong, ko suri nik komok-mesi daron elep, ko erres nga nik kopok-mini norro behlen nga puloli lilane depaim.

²⁴ Nololien se jinibb sopor arto limjer rres, ko jinibb jikle arlesi wos pae nololien ser osuw. Ko jinibb sopor ma arloli nololien ser arto kelti, nga jinibb sete p̄ilesi wose pian pijpari nabong nga Atua piawera suri lat nga puto suri tevi jinibb nir. Ko iok evi batun nga mowrai sete nolom pingavilvil nga kuplingi jinibb san putori majingen san se Atua.

²⁵ Ko erpok kele, majingen nga marres kele arto limjer kobbong. Ko poro sete parto limjer womu, ko nir para-pelari ko wor nabong sapon.

6

Murrun nga mumomsawos se jinibb ne majingen nir

¹ Nir nga marivi jinibb ne majingen parosuri ko wor numal ser nir p̄irres, puloli sete jinibb san purongwose p̄iwer lokloksi nise Atua ko nevisvisenien se kerr, nga parwera 'O, kalesia nir sete armajing erres'.

² Ko jinibb ne majingen nga numal ser marivi kalesia sete arongwos parloli murrun ngok nga parwera "O, numal suk erpe tuwak kobbong", ko sete parosuri p̄irres suri. Ejki, parmajing p̄irres kele wor, suri arok-majing se kalesia san nga marmerrreni.

Nevisvisenien gerisen ko nijor nga marres

Nanu ngok nir, kupwer visviseni ko kupwer sesesre ko wor tevir.

³ Ko si nga mivisviseni nevisvisenien m̄inij nga sete musorsan tevi nale weretunen se Iesu Kristo Numal se kerr ko tevi nosurien nga m̄imawos m̄irres,

⁴ ko m̄ernen sete orongwose nanu san, ko norrorrmien sen ean mare p̄elak. Ko murrun ngok ololi arok-merreni lenglengen partertere nir re nale, ko nolor eleplep, ko parsisij tevir, ko parlat, ko norrorrmien nga marsij p̄elak parto tevir.

⁵ Ko ngok evi murru jinibb nga norrorrmien ser m̄ilengleng, ko weretunen ejki rres jir, ko niko marmerrreni parlat tetajer. Ko nir arrorrm̄i nosurien se jinibb orongwos puloli sel nga putor sweri nevõt pilep.

⁶ Ko ewretun, murrun nosurien se kerr evi sel nga jinibb orongwos putor sweri nanu pilep, poro ni p̄ir suri sev nga muto pa jin.

⁷ Ko kurongwose, daron nga rrampelari iel ngatan sete rramtori nanu san tevi kerr. Ko daron nga rrapluwi kele, sete rramatori nanu san kele tevi kerr.

⁸ Ko poro nanen se kerr putoe, ko sunsun se kerr puto kele, ngok evter pa kerr ko.

⁹ Ko p̄isij re jinibb nga marok-merreni nga joror pilep, parirpe jinibb san nga nover misrapo ore. Ko murrun nga marmerrreni joror pilep ngok e orongwos puloli parvitan p̄isij nga mauren ser pian p̄isij p̄etp̄eti.

¹⁰ Murrun nga marmerrreni p̄elak nevõt e evi batbatu murrun lele nga marsij. Ko jinibb sopor arok-vijuri sel ngok eterter, ko aran ngasue murrun ne nosurien vajin, ko arloli nanu elep nga nir kele marunge m̄isij milep suri.

Nale mawos se Pol tevi Timoti

¹¹ Ko nik, Timoti, kuvi jinibb se Atua. Kupruj ngasue nanu ngok nir. Ko kuppelak ko wor pilep nga kuploli murrun nga musorsan mīrres, ko murrun nga muon mīrres, ko nosurien, ko merrenien, ko nga kuptur pīterter pijpari bongsin, ko nga kupivi jinibb malum.

¹² Kupwolu pīterter renge woluen ne nosurien, nga kuplai mauren nga muto tuwi ngok vini pivi som. Suri Atua everuse nik nga kuplai mauren ngok renge daron nga kumwerai tweni nosurien som bonevis renge no delung nir.

¹³ Ko womu ne Atua, nga mīla mauren tevi nanu jijle, ko womu ne Iesu Kristo nga muwra tweni nosurien nga mīrres sen renge no Ponjes Paelet,

¹⁴ nuwrai eterter tevim nga kupvijuri nale nen nir pīterter, sete kupvitan re nanu san, pianan pijpari nabong nga Iesu Kristo Numal se kerr pia-luwi kele vini rengen.

¹⁵ Kristo ngok, Atua pia-viseni ni renge daron momsawos sen. Atua ngok esan kobbong derteren sen otoa, ko jinibb jijle parsurövi ko wor, ko evi Numal se numal ngabe ngabe pētpēti nir.

¹⁶ Ni esan rres kobbong nga mauren nga muto tuwi ngok vini oto jin. Ko lat nga mīlik ren erinrin erres, nga jinibb san sete orongwos pian mori. Atua ngok, sete jinibb san elesi wor nabong san, ko sete san orongwos pīlesi. Ko kerr rrapwasi nisen pian mare tetajer, ko rrapwerai tweni derteren sen nga puto pijpari tuwi ngok vini. Pipok ko.

Kalesia nir nga nijor ser milep

¹⁷ Kuprij pīterter ko wor tevi nir nga nijor ser milep iel ngatan, nga sete parloli norrorrmien ser pian mare pēlak, ko puto pēlak renge nevöt ser. Suri rrek nevöt orongwos pijijki kobbong. Ko nir parlingi norrorrmien ser puto renge Atua kobbong. Suri ni oklai pa nanu elep nga rraprunge pīrres rengen.

¹⁸ Nik kupwerai ko wor tevir nga nir parloli majingen nga marres, ko nga parir renge majingen ngok nir pīasi nga marir renge nijor ser nir. Nolor parres, ko parvijngeni joror tevi nir nga joror mijkie.

¹⁹ Re murrun ngok erpe arok-lingi lilane joror nga marres nir re melrin nga parto pīterter tetajer tuwi ngok vini. Ko parongwose vajin parlai mauren nga mivi mauren weretunen.

Bongsi nale se Pol tevi Timoti

²⁰ O Timoti, kuptor totkoni pīrres nanu nga Atua mīlŋi pa re nevrem musuw. Kupan ngasu re nale nawon ngok nga marij tere Atua rengen, ko lenglengen se nir nga marwera evi norongwosien, ko ejki, nir arkerkeris kobbong.

²¹ Suri jinibb elep arok-vijuri murrun ngok, nga muloli maran ngasu pa renge murrun ne nosurien.

Ko ngel evi loten suk, nga merrenien se Atua piptevi kami jijle. Nuwra "Remsom".

Naul Erwen nga Pol Muli tevi TIMOTI Batu nale nga mivsviseni lut nga pargeteni naul ngel puto suri

Nanu nga milep nga Pol muspe suri rengen naul erwen nga muli tevi selen Timoti evi nga Pol mimrreni Timoti nosurien sen piteter ko puloli majingen sen pumomsawos, ko nga sete pimtutue jinibb. Ko Pol owra Timoti puruj ngasue murrun nga nir sopor marok-loli nga marok-palpal suri nale, ko owra Timoti pivijuri sel nga nirres nga nilesi Pol muwlu rengen.

Pol owra erres tevi Timoti

¹ Inu Pol nuvi aposol se Iesu Kristo suri marongen se Atua, nga bowra tweni nospen nga nirres ne mauren nga mivi se nir nga markorti pa tevi Iesu Kristo.

² Nuwrai “erres” tevi nik, Timoti, natuk nga memrrenim milep. Ngel evi loten suk, nga merrenien, netlasien ko demat se Atua Tata ko Iesu Kristo Numal se kerr piptevim.

Pol erij nga pususture norrorrmien se Timoti

³ Nuwra “erres” tevi Atua. Nomok-majing sen nga nolok sete obbujujbuju, erpe firterawararang suk nir ne tuwi marok-loli. Ko natmirin ko natmupong, daron nga nomok-lot, tetajer nomok-rrorrmni nik, ko nomok-wera “erres” tevi Atua surim.

⁴ Nomok-rrorrmni daron nga melinglingim ko kumtengsik, ko numrreni lenglengen wor nga bevinuk Belesim kele, nga puloli beir lenglengen luwi kele.

⁵ Ko nurrorrmni wose nosurien som nga sete mivi gerisen, nga musorsan kobbong tevi nosurien nga apu som lekter Loes ko tasu som Iunis mortori. Ko nurongwose erres nga nik kele nalol ngok oto malum tevim.

⁶ Ko suri nanu ngok, nuwrai tevim nga derteren nga Atua nilai tevim daron nga melngi nevrek rengem, kopok-wuni suri ko wor, nga sete pian ngatan.

⁷ Suri Nerin nga Atua mila tevi kerr, sete evi nga puloli rrapmetutue jinibb, ejki. Nerin ngok

evi nga pila derteren ko merrenien, ko nga puloli kerr rramrongwos rrapatur ore sev nga kerr kobbong rrammerreni.

⁸ Ko suri nanu ngok, nik sete kupmanun nga kupwera tweni nospen se Numal se kerr. Ko sete kupmanue inu kele suri

nga inu mean re naim ne nekaien suri numajing sen. Ko nik kupmarong ko wor nga jinibb parloli pisij tevim suri nospen ngok, ko Atua puloli kuptur piteter vajin.

⁹ Atua elai mauren tevi kerr, ko everuse kerr osuw nga rrapivi jinibb on sen tuwi jer pa, suri Iesu Kristo. Ko ni sete ololi erpok suri elesi majingen se kerr erres, ejki. Ololi erpok suri ni kobbong marongen sen ko merrenien sen.

¹⁰ Ko Iesu Kristo nga mokla mauren tevi kerr ermmali vajin ji kerr. Ko ni eviseni merrenien se Atua, ko erevji pini pa derteren ne mijen, ko ololi mauren nga sete murongwos pusuw ermmali vajin rengen nospen sen.

¹¹ Ko Atua okonik erpe aposol nga bowra tweni ko bevisviseni nospen sen nga nirres nen.

¹² Ko ngok evi batun nga marwirrek vini re naim ne nekaien ngel. Ko sete nurongwos bemanun, suri nurongwos pae jinibb nga mosuri osuw. Ko nurongwose erres nga ni orongwose pimete inu rengen nanu jilje nga ni melngi pa re nevrek, pianan pijpari nabong nga Atua pia-wera suri lat nga puto suri tevi jinibb nir.

¹³ Kuptori totkoni nale weretunen nga mevisviseni tevim. Ngok eviseni sel nga kupvijuri, rengen murrun ne nosurien ko merrenien nga rramok-korti tevi Iesu Kristo rengen.

¹⁴ Nanu nga marres pelak ngok nir, nga Iesu Kristo melngi pa re nevrem, nik kuptori totkoni wor nir ko rengen derteren se Nerin On nga melik pa re nolo kerr musuw.

Pol owra tweni murrun se Onesiporas

¹⁵ Erpe kurongwos pae osuw, selek nir nga iel Asia, tevi nuru nga Pukelas ko Emojenes, arwolu lingi pa inu osuw.

¹⁶ Ko ngel evi loten suk, nga Numal puloli pirres tevi metka se Onesiporas, suri womu ni okla lweni inu vavis le pa. Ko ni sete emanun nga inu melik iel Rom re naim ne nekaien, ejki;

¹⁷ ko daron nga miplari iel, ko epejpej inu eterter, mianan ko eskai inu vajin.

¹⁸ Ko nulot nga Numal pilai netlasien tevi rengen nabong nga Atua pia-wera suri lat nga puto suri tevi jinibb nir. Suri nik, Timoti, kurongwose erres pelak ni ololi nanu elep nga marres tevik iak Epesas.

2

Jinibb ne nuval mawos se Iesu Kristo

¹ Ko natuk, kupterter rengen merrenien nga mivi se kerr nga rramkorti tevi Iesu Kristo.

² Ko kuptori nevisvisenien nga kumrunge pa jik rengen no delung nir. Ko

kuplingi nale ngok nir reнге nevre nir nga kurongwos nir murrur erres, ko nolom eterter reнге nir nga parviter parvisviseni nir m̄inij kele vajin reнге nale ngok nir.

³ Nik kupmarong ko wor nga jinibb parloli p̄isij tevim suri nale ngok. Ko kupirpe vajin jinibb ne nuval san nga m̄irres se Iesu Kristo.

⁴ Re daron ne nuval, jinibb ne nuval sete orongwos pivel sarsarr pirpe lartul nga nuval mijki jir. Ni piplak ko wor p̄iterter nga puloli nabur sen purnge p̄irres rengen.

⁵ Ko jinibb nga mokwolu re woluen san sete orongwos putor sweri nowlin nga womujnen poro sete puosuri murrun mawos ne woluen nen.

⁶ Ko jinibb nga mokp̄elak milep reнге orsel sen, erres p̄elak nga ni piaani nanen nen puwomu.

⁷ Kuprormi nale rrongrongvi suk ngok nir, ko Numal se kerr piviseni nik nga kuprongose murrun p̄etp̄eti nen tweni mauren som.

Erres nik kuprormi Iesu Kristo

⁸ Kuprormi Iesu Kristo, nga mimaur luwi reнге mijen, ko nga mivi metka se Numal Devet san, erpe nga nomok-werwere pa reнге nosp̄en nga m̄irres.

⁹ Suri nosp̄en nga m̄irres ngok nga nomok-werwer e, ko jinibb arok-loli nomok-runge esij ko arka totkoni inu e dil ngel nga mivi delrrur, erpe nga marok-loli tevi jinibb san nga mokloli m̄isij. Ko nale se Atua ma sete arongwos parkai totkoni reнге dil san.

¹⁰ Ko ngok, nolok sete evitan reнге nanu nga marsij nir nga marloli tevik; ko nuplak nga b̄eskai sel nga Atua p̄ilai mauren tevi nir nga markorti tevi Iesu Kristo, nga paran para-korti kele reнге mauren ne nosr̄ovien reнге melrin nga sete mia-suw nabong sopen.

¹¹ Ko ngel evi nosp̄en weretunen san: 'Kerr erpe rramkorti ko pa tevi reнге mijen sen; ko niko, rrapa-korti kele vajin tevi reнге mauren sen.

¹² Poro nga rrapok-tur p̄iterter, ko rramrongwos rrapa-korti tevi reнге derteren nen se Numal. Ko poro rrapok-kerkeris nga rrapok-wera sete rramivi jinibb sen, ko ni kele orongwos pia-wera tweni nga ni sete evi Numal se kerr.

¹³ Ko poro kerr sete rraporti totkoni rijrijen se kerr, ko ni pia-tori totkoni wor rijrijen sen ko tetajer, suri ni sete orongwos p̄irieni kele nale sen san.'

Sel mawos nga musp̄e suri nale were-tunen se Atua

¹⁴ Nik kopok-werai visviseni nale ngok ko tevi jinibb som nir. Ko nik kopok-r̄ij p̄iterter tevi nir reнге no Atua nga

nir parlinglingi murrun ngel nga marok-lat suri nale kobbong. Murrun ngok ololi mauren se jinibb nga marok-runge evan esij kele wor elep.

¹⁵ Ko nik kupp̄elak ko wor pilep nga kupivi jinibb ne majingen nga Atua purnge p̄irres surim, ko kupivi jinibb nga sete pimanun reнге majingen sen; ko kupivi jinibb nga mokvisviseni jinibb reнге nale weretunen se Atua reнге murrun nga musorsan m̄irres.

¹⁶ Sete kupruj mori nale ngok nir nga marij karkar tere Atua. Rijen nga mirpok okrevei tweni bbong jinibb ko nir, nga paran ngasu kele reнге Atua.

¹⁷ Rijen se jinibb nga maripok erpe bolkar san nga sete murongwos p̄irres luwi kele. Tetajer okkar elep nga pulok-loksi b̄elan. Ko nale se nuru Aemenaas ko Paelitas erpok.

¹⁸ Nuru ngok ortor jabble pa sel suri nale weretunen, ko nuru orok-lokloksi kele murrun ne nosurien se kalesia sopor. Suri nuru orok-werai nga meraien ne mijen eplari jile pa osuw, ko niko, daron nga kerr rrammij, ko nibe kerr sete mara-maur luwi.

¹⁹ Ko batu nale nga m̄iterter nga Atua m̄ilngi pa sete orongwos putoto, ko nale nga muto reнге batu nale ngok owrai erpel: 'Numal Atua orongwos pae jinibb sen nir osuw'. Ko nale m̄inij san kele reнге Naul On owrai erpel kele, 'Ko si nga muwra ni evi jinibb se Atua p̄ilngilngi ko wor murrun nga sete marsorsan m̄irres.'

²⁰ Renge naim se jinibb nga joron milep, narov lele arto rengen. Sopor armajinge reнге nanu nga marerr m̄irres, ko sopor arsavi reнге duru nai, rrek armajing nir reнге dan kobbong. Sopor arivi nga parlingi nanen renger daron ne nabong nga milep, ko sopor arivi nga marlingi nanen renger nabong jijle kobbong.

²¹ Ko poro jinibb san puloli ni puwokwok reнге nanu nga marsij ngok nir ko puon p̄irres, ko ni pia-irpe vajin narov ngok nga numal sen purongwos pia-rrul totkoni reнге nabong nga milep. Ko m̄ernen elik metmet vajin nga pia-loli majingen jijle nga m̄irres.

Jinibb ne majingen se Atua nga Atua murnge m̄irres rengen

²² Kupruj ngasue murru lenglengen se m̄elakel nir nga marmerr̄eni sev nga marsij nir.

Ko kupp̄elak tweni murrun nga musorsan m̄irres, nosurien, merrenien, ko demat, tevi nir nga norrormien ser muwokwok m̄irres, ko marok-verus van ji Atua tetajer. ²³ Ko kupan ngasu reнге laten se nir nga marlengleng, suri nik kurongwos pae nga

murrun ngok orongwos pivesi balpalen kobbong.

²⁴ Ko jinibb ne majingen se Numal sete pivi jinibb ne balpalen. Ni pivi wor jinibb ne nevisvisenien, ko norrorrmien sen pimalum, ko nolon pipriv tevi jinibb totoklai.

²⁵ Ko ni purongwos piviseni lilane nir nga marok-tere ni, renge murrun nga mumol-mol kobbong. Ko rrek Atua ko puloli nolor pulululwi nga puloli parini parongwose weretunen nen vajin.

²⁶ Ko norrorrmien nga m̄irres pijpari vajin batur, ko parwolu lingi never nga Demij m̄ilngi, nga m̄ilair rengen nga puloli parvijuri norrorrmien sen.

3

Murru jinibb renge daron ne nabong nga vitu

¹ Nik kuprongwose wor nanu ngel: nga mauren ne iel ngatan pivini p̄iterter pilep re daron ne nabong nga vitu.

² Jinibb parrorrm̄i lweni nir kobbong, ko parmerreni nev̄ot pilep. Nir parij melmelas, ko norrorrmien ser pian mare p̄elak, ko parij p̄isij tevi jinibb nir, ko sete marasuri tata ser ko tasu ser. Ko sete marawera "erres" tevi seler renge nanu san, ko sete mara-rongwos parrorrm̄i Atua.

³ Parivi jinibb nga parloli terter nanu tevi jinibb m̄inij nir nga sete parunge p̄isij ren, ko parongwos parllokloksi nise jinibb m̄inij. Parivi kele jinibb nga marok-verver ko marerri lenglengen. Ko nir parungasi sev nga m̄irres.

⁴ Parivi jinibb nga parllokloksi seler nir nga sete parosurir, ko sete partotrong suri sev nga parloli, ko norrorrmien ser pian mare p̄elak. Parivi jinibb nga marmmerreni nanu nga parunge p̄irres ren, easi nga parmerreni Atua.

⁵ Renge no jinibb nir, nir parok-loli nga parvijuri murrun se kalesia nir, ko sete parmerreni derteren se Atua p̄irieni norrorrmien ser nga marsij. Sete kupruj mori rragrag jinibb nga marirpok.

⁶ Nir sopor arokan loloiem nga parkerkerasi nesevin nir nga batur marjkie ko marok-likto suri nololien ser; ko norrorrmien lele nga marsij marok-revei totkonir.

⁷ Nesevin ngok nir tetajer arok-merreni jinibb pivisvisenir, ko sete arongwos parator sweri weretunen nabong san.

⁸ Nir ngok artere nale weretunen, erpe tuwi laru nga morongrongwos ngok nuru, Janes ko Jabres, ortere Moses. Jinibb nga marirpok nir, norrorrmien ser sete osorsan, ko murrun ne nosurien ser evi gerisen kobbong.

⁹ Ko majingen ser sete mia-to mia-periv, suri jinibb jijle para-lesi murru lenglengen ser, pirpe nir nga tuwi marlesi murru lenglengen se nuru ngok.

Kupvijuri ko wor murrun suk

¹⁰ Ko nik, Timoti, kuvijuri pa nevisvisenien suk, murrun suk, ko sev nga inu m̄elngi nolok rengen, ko murruk ne nosurien, ko nolok nga mipriv, ko merrenien suk, ko murruk nga nomok-rrul totkoni majingen puto p̄iterter pijpari bongsi majingen nen.

¹¹ Ko nik kulesi pa nga jinibb marok-oji p̄elak inu, ko marloli nibek murnge m̄isij. Nik kurongwos pae sev nga mutor sweri inu Antiok ko Ikoniam ko Listra, nga jinibb marok-oji inu, ko marok-loli m̄isij p̄elak tevik. Ko Numal elai tweni inu re nanu ngok nir.

¹² Ko si nga marmmerreni parmaur korti tevi Iesu Kristo renge mauren nga musorsan m̄irres, nir ngok kele ko para-ojir ko para-loli p̄isij tevir pirpok kele.

¹³ Ko jinibb nga marsij ko jinibb ne gerisen nir partajer malum ko parkerkeris malum tevi jinibb nir, ko nir kele vajin parongwos parosuri nale gerisen ser.

¹⁴ Ko nik ma kuptori totkoni nanu nga namvisviseni tevim tuwi, ko nga kumosuri pa m̄irres musuw, suri nik kurongwose erres murrun se kem nga namvisviseni nik e.

¹⁵ Ko nik kurongwos pae daron nga kumivi bipi mivini mijpari lelingenok, nga kurongwose erres nale ne Naul On. Nale nen orongwos puloli kuprongwos p̄irres renge sel nen nga Atua purongwos p̄ila mauren tevi nir rengen. Ko sel nen evi nga parosuri Iesu Kristo.

¹⁶ Ko nale jile renge Naul On arpelari ji Atua, ko erres nga pivisviseni jinibb, ko puwrai tweni gerisen sen poro putoe; ko erres nga p̄iete murru lenglengen, ko pivisviseni jinibb nir renge murrun nga musorsan m̄irres.

¹⁷ Atua elai nale ngok nir nga puloli jinibb sen nir norongwosien ser pilep jijle ko nga partiriv terai vajin majingen jijle nga marres.

4

Kuptori totkoni ko wor nale se Atua

¹ Renge no Atua ko renge no Iesu Kristo, nga pia-wer sesesre lat nga puto suri tevi jinibb jijle nir, nir nga marmaur, ko nir nga marmij pa, inu nuwrai nale nga m̄iterter ngel tevim. Suri nga Iesu Kristo pia-luwi kele vini, ko suri batun vanu sen nga pia-rremali vajin, inu nuwrai eterter tevim:

² Kupwerai tweni ko wor nale sen. Poro parmerreni parunge rreknga ejki, ko erres kobbong. Tetajer nik kupterter nga kupwerai tweni. Kuprevei jinibb nga parosuri Kristo, ko kuprij p̄iterter tevir nga sete parloli karkar nanu, ko kuploli norrorrmien ser parterter. Kuploli nolom pipriv nga kupvisiseni nir p̄irres.

³ Suri daron pia-vini nga jinibb sete parmerreni parunge nale nga mivi nale weretunen, ko parvijuri lweni nir kobbong norrorrmien ser, ko paran parpej jinibb nevisisenien pilep nga parongwos parwera-i nale sev nga nir kobbong parmerreni parunge.

⁴ Ko nir partur telure nale weretunen ngok, ko paran ngasu ko parunge tutun-masa nawon kobbong nir.

⁵ Ko nik kupmetmet ko wor p̄irres renge sev nga marinuk jim, nga kupvijuri sel nga musorsan. Ko poro nga parloli p̄isij tevim, ko nik kuploli wor norrorrmien som p̄iterter ko pipriv. Nik kuploli ko wor nga kupwerai tweni nosp̄en nga m̄irres se Kristo, ko kuploli p̄etp̄eti majingen ngok nga Atua m̄ilai tevim.

Mauren se Pol otomori pusuw

⁶ Ko inu, daron suk evini pa nga belinglingi mauren suk; partor pinik suri nuvi jinibb se Atua.

⁷ Nuḗlak pa elep renge woluen, nuwlu nunci p̄etp̄eti lat ne woluen nen, ko nurrul totkoni nosurien suk tetajer.

⁸ Ko nowli jinibb nga mokasasi renge woluen oto metmet pa teraik nga bean belai. Nowlin ngok Numal pia-lai tevik renge nabong nga Atua pia-wera suri lat nga puto suri tevi jinibb nir. Numal osorsan erres, ko ni pia-lai nowlik ngok tevik suri inu mauren suk osorsan erres. Ko sete inu kis kobbong, ko tevi kele nir jijle nga marok-tiriv kele tevi merrenien daron nga ni pia-remali luwi e.

Pol elai nosp̄en tevi selen nir

⁹ Inu numrreni nga kupsaro pingavil nga kupini kuplesi inu.

¹⁰ Suri Demas emrreni p̄elak mauren ne iel ngatan, ko owlu lingk pa evan Tesalonaeka e. Ko Kreseus kele evan pa Galesia e, ko Taetas kele evan pa Dalmatia e.

¹¹ Ko Luk kobbong elik tevik lelingenok. Ko erres ma kupan kuplesi Mak nga ni piptevim; suri ni okpitevik erres renge majingen.

¹² Ko nukoni pa Tikikas evan Epesas pae.

¹³ Daron nga kupini e, ko erres kuplai sunsun ne melas suk tevim nga m̄elngi tweni mijpon jer Troas, renge naim se Kapas. Ko erres kuplai kele naul suk nir parini, o ko womujnen renge naul ngok

nir, kuplai kele naul ngok nga marmajing nir renge nevlun nanani.

¹⁴ Morok Aleksanta nga mivi jinibb nga mokmajing delrrurr nir olokloksi inu elep. Ko Numal pia-kele lweni sev nga muloli ngok.

¹⁵ Ko nik kele kupmetmet renge ni, suri etre nale se kerr eterter.

¹⁶ Ko womujnen daron nga mean loloim re kot iel Rom nga bowrai tweni nale suk, sete san erij suk. Nir jijle arwolu lingk. Ngel evi loten suk, nga Atua sete putor vitrangir suri.

¹⁷ Ko Numal ma elik tevi inu, ko elai dert-eren tevik, niko ololi nurongwos bowrai tweni p̄etp̄eti nale sen, ko jinibb ne vare p̄etp̄eti nir parunge. Ko otomori jer parl-lingi inu van re mijen, ko Atua ela tweni inu.

¹⁸ Ko Numal ngok pia-lai tweni inu renge nanu jijle nga marsij, ko pia-teakai inu p̄irres van renge batun vanu sen ne melrin. Ko rrapok-susi nisen pian mare tetajer pijpari tuwi ngok vini. Pirpok ko.

Bongsi nale se Pol

¹⁹ Kupwera “erres” suk tevi Akwila ko nesen sen Prisila, ko tevi kele metka se Onesiporas.

²⁰ Erastas elik jer iak Korin; ko daron nga m̄elinglingi iak Maelitas, nulinglingi Tropimas elik jer iak, suri ni emsi.

²¹ Inu numrreni nga kupsaro pingavil nga kupini kuplesi inu puwomu, ko daron ne melas pia-vini. Iupulas, Putens ko Linas, tevi joji kerr Klotia, ko tevi tasi kerr ko joji kerr nga iel jijle nir, arwera “erres” tevim.

²² Ko ngel evi loten suk, nga Numal piptevi nik renge norrorrmien som. Ko merrenien sen piptevi kami jijle. Nuwra “Remsom”.

Naul nga Pol Muli tevi TAETAS Batu nale nga mivsviseni lut nga parmeteni naul ngel puto suri

Pol elngi Taetas nga ni p̄imajing reнге norour ne Krit, ko oli naul ngel tevi nga puspe suri lat nga p̄imajing tweni majingen sen puto suri. Pol ospe suri liken se jinibb san nga puwowomu re kalesia nir. Ko ospe kele suri liken se kalesia nir puon ko p̄irres p̄irpese.

Pol owra 'Erres' tevi Taetas

¹ Inu Pol nuvi jinibb ne majingen se Atua. Ko Iesu Kristo okonik erpe aposol nga βela se jinibb nga Atua m̄ilngir pa musuw nga nir parosuri ni, ko nga parongwose nale ne weretunen nga mivi batbatu kalesia mauren se kerr.

² Ko ni okonik kele nga bololi nir parlingi norrorrmien ser puto p̄iterter reнге mauren nga muto tuwi ngok vini. Mauren nen, Atua, nga sete orongwos p̄ikerkeris, owrai womu pae tuwi jer nga p̄ilai tevi kerr.

³ Ko reнге daron momsawos nen, eviseni mauren nen, reнге nale sen. Ko Atua nga m̄ila mauren tevi kerr elngi nale ngok reнге nevrek, ko owrai eterter nga inu bowra tweni ko wor tevi jinibb nir.

⁴ Taetas, nik kurpe natuk woswos reнге metka ne nosurien, nomok-uli nale ngel tevim. Ngel evi loten suk, nga merrenien ko demat se Atua Tata ko se Iesu Kristo nga m̄ila mauren tevi kerr p̄iptevim.

Majingen se Taetas iak Krit

⁵ Nulngim iak reнге norour nga Krit nga nik kupmajing lilane majingen nir nga mevel lingir. Nuwrai pa tevim nga kup-susture b̄irterawarreng nga parwowomu re kalesia nir reнге lat jikle nir. Ngok kuprrorrmie nale lilane suk ngel:

⁶ B̄irterawarreng nga pokwowomu re kalesia nir pivi wor jinibb nga mauren sen musorsan ko m̄irres. Ko pimrreni temijpal nesen sen ko sete puoji nesevin m̄inij.^A Ko natun kele nir parosuri Atua ko wor. Sete erres nga nospen nga m̄isij puto suri natun nir, nga marwolu karkar rrek sete marosuri nale.

⁷ Jinibb san nga pokmetmete kalesia nir, mauren sen pusorsan wor p̄irres. Suri Atua elngi pa majingen sen oto re nevren. Ni nolon sete pian mare p̄elak,

sete purongwos pulolar pingavil, sete pokminmin, sete pokpalpal, ko sete pokmerreni nevöt pilep.

⁸ Ni poklai ko wor neturvitani nir paran re naim sen. Ko pimrreni sev nga m̄irres. Ko pivi m̄er nga pusorsan p̄irres, ko puon p̄irres. Ko sev nga m̄isij nga ni mimrreni, pubböt ore tetajer.

⁹ Ni putor totkoni nale nga rramokvisviseni jinibb nir ren p̄iterter ko nga sete purongwos pimjabböl. Ko ni purongwose vajin pivisviseni jinibb nir reнге nale momsawos nen, ko p̄iwer rrerarre nale se nir nga martera nale nen.

Jinibb ne nevisvisenien gerisen

¹⁰ Ko jinibb elep sete arosuri nale, ko arkerkerasi jinibb m̄inij nir reнге kalesia tevi norrorrmien ser nga m̄ikarkar. Nir elelep reнге nir ngok arivi m̄eri Isrel.

¹¹ Kapwer ore ko wor nale ser, suri reнге metka sopor, nale nga mirpok erpe poklokloksi pa jinibb p̄etpeti nir. Jinibb ngok nir arvisviseni jinibb nir reнге nale nga sete m̄irres nga jinibb puwrai, nga puloli parongwos parevei bbong nevöt ser pilep ren. Ko murrun ngok evi nga jinibb non p̄isij e kobbong.

¹² Meri Krit lweni kobbong san nga mivi propet se nir, owra 'O, m̄eri Krit arivi jinibb nga marok-kerkeris tetajer, arirpe nanu rrum nga marsij, arivi jinibb nga sete marongwos parmajing, ko marorr m̄ilep.'

¹³ Ko nale sen ewretun kobbong. Ko suri nanu ngok, nik kupsurponir ko wor nga puloli nosurien ser p̄iterter.

¹⁴ Nik kupwer ore nir nga setemun parrul totkoni tutunmasa gerisen ngok se m̄eri Isrel nir, ko nale se nir nga marivel lingi pa nale weretunen musuw.

¹⁵ Nanu jikle arwokwok tevi nir nga nolor marwokwok, ko sete nanu san owokwok tevi nir nga nolor marrokkitkit ko sete marosuri. Suri norrorrmien ser orongta pae reнге nanu nga m̄isij osuw, ko nolor setemun arongwos parbbujbbuj re nanu nga marsij nga marok-lolir.

¹⁶ Nir ngok arok-wera arongwose Atua, ko murrun nga marok-loli arviseni nga nale ngok nga marok-werai evi gerisen kobbong. Nir ngok arsi p̄erp̄er. Arok-tor otvi nale, ko sete arongwos parloli nanu nga m̄irres san.

2

Nale tevi jinibb nga martera nir

¹ Ko nik Taetas kupwera tweni ko wor nevisvisenien nga musorsan tevi nale weretunen.

^A 1:6 Erpe iel, Pol owra 'nesen sen pisanan kobbong', ko reнге nale se m̄eri Gris nir, ngok erpe βetile nale san nga mining nen erpe nga namlingi, 'pimrreni temijpal nesen sen ko sete puoji nesevin m̄inij.'

² Kupwerai tevi Birterawarrend nir nga sete parmini p̄elak norro rreknga nuwi nga m̄iterter, ko nga murrun nga mumom-sawos puto tevir. Ko sev nga m̄isij nga nir marmerr̄eni, partur ore tetajer. Nosurien ser ko merrenien ser porsorsan p̄irres, ko parongwos partori majingen ser p̄iterter pian pijpari bongsin.

³ Ko renye murrun ngok kele kobbong, kupwera tevi lekterwarrend kele nir nga nir parloli wor murrun nga marmom-sawos, pirpe nesevin nga marlik renye sel nga muon m̄irres. Ko sete parij p̄isij suri nise jinibb m̄inij nir. Ko sete parok-mini p̄elak norro rreknga nuwi nga m̄iterter. Ko parvisviseni sel nga m̄irres ko wor,

⁴ nga parongwos parsesre nesenwarrend nir nga nir parmerreni lenglengen diwen ser tevi natur nir.

⁵ Ko sev nga m̄isij nga nir marmerr̄eni, partur ore ko wor, puloli nga nir paron p̄irres. Ko parvisviseni nga parmetmete naim ser p̄irres, ko nga parosuri diwen ser. Ngok puloli jinibb san sete purongwos p̄irij tere nale se Atua.

Nale tevi m̄elakel nir

⁶ Ko renye murrun ngok kele kobbong, nik kupvevi m̄elakel kele wor nir nga sev nga m̄isij nga nir marmerr̄eni, partur ore tetajer.

⁷ Renge nanu jikle nga kumloli, kupviseni ko wor renye nor majingen nga marres nga komok-lolir, nga puloli nir parvijuri vajin. Ko daron nga kopok-wer visviseni, ko nale som pivi wor weretunen ko, ko purrow p̄irres.

⁸ Ko kupvisviseni nale nga musorsan kobbong, nga jinibb sete parongwos parij p̄isij suri. Ko kuprongwos kuploli vajin jinibb san nga mutur tere kerr non p̄isij, suri ni nanu nga puwrai tere kerr pijkie, suri murrun ne kalesia nir osorsan erres.

Nale tevi jinibb ne majingen nir

⁹ Nik kupviseni jinibb ne majingen nir nga parosuri numal ser ko parloli numal ser parir renye nanu jikle nga marlolir. Ko sete parij weli kele numal ser,

¹⁰ ko sete parsesaro renye nanu se numal ser. Ko nir parviseni tetajer nga nir arok-loli erres, puloli numal ser parongwose parbibto re nir. Ko re murrun ngok, nanu jikle nga marlolir ngok parjoro renye no jinibb nir nale se Atua nga mokla mauren tevi kerr.

Batbatu mauren se kalesia nir

¹¹ Merrenien se Atua ermali pa nga p̄ilai mauren tevi jinibb jikle nir.

¹²⁻¹³ Ko kerr rramok-tiriv nga rraplesi nabong nga milep ngok nga norrorrmien se kerr muto renye, nga Iesu Kristo nga

mivi Atua ko nga p̄ilai mauren tevi kerr pia-rremali renye tevi nosr̄ovien sen nga milep. Ko lelingenok nga rramok-tiriv, merrenien ngok se Atua eviseni tevi kerr nga lelingenok ko pa rraplinglingi murrun nga sete marsorsan re no Atua. Sete rrapmerreni p̄elak nanu ne iel ngatan nir. Ko nanu nga marsij nga kerr rrammerreni, rraprur ore tetajer. Rraploli murrun nga marsorsan marres nga Atua purnye p̄irres suri kerr renye.

¹⁴ Iesu Kristo ela mauren sen nga p̄ila mauren tevi kerr. Ko ni ojri lweni kerr renye murrun nir nga sete marsorsan, ko ololi kerr rramirpe gortien san nga mauren se kerr muwokwok m̄irres. Rramivi jinibb san kobbong, ko rramterter nga rraploli majingen nga marres nir.

¹⁵ Kupwera nale ngok tevi jinibb som nir. Ko kupusture norrorrmien ser, ko kuprij p̄iterter nga kupwer ore murrun nga m̄isij se nir renye derteren jile nga muto jim. Ko sete kuploli jinibb san puklu wutan re nik.

3

Murru kalesia nir

¹ Kupwerai lilane tevi jinibb som nir nga parosuri ko wor jinibb nga marlelep nir nga martori vanu, ko nga parvijuri nale ser. Ko parlik metmet tetajer nga parloli majingen nga marres nir.

² Ko kupwerai tevir nga sete parij p̄isij tere jinibb san, ko sete parivi jinibb nga parok-lat; parivi jinibb nga parok-loli sel p̄irres tevi jinibb nir. Ko murrur pumol-mol tevi jinibb totoklai.

³ Ko kerr kele, benevis rramok-irpok, nga rramok-lengle ngabong sapon, ko rramok-tor otvi nale ko rramok-sarr, ko nabong sapon rramok-loli nanu nga rraprunge p̄irres ren nga kerr kobbong rrammerreni. Ko iok rramirpe demij maur se nanu ngok nir. Ko tetajer, nolo kerr oklelep, ko rramok-tori lolaren epriv p̄elak. Jinibb nir arungasi kerr, ko kerr rramungasi nir.

⁴ Ko daron nga merrenien se Atua ko sel sen nga mokloli m̄irres miplari ji kerr, ko ni elai mauren tevi kerr vajin.

⁵ Ko sete ololi erpok suri kerr rramloli majingen nga marres, ejki. Ela mauren tevi kerr suri ornye esij kobbong suri kerr. Erpe Nen̄in On errawe vaseni nolo kerr ko ololi kerr erpe rramiak luwi tevi mauren nga mimerr kele.

⁶ Erpe Atua ololi Iesu Kristo nga m̄ila mauren tevi kerr ejivreni Nen̄in On sen renye kerr.

⁷ Ko nalol nga m̄irres sen elai mauren tevi kerr nga muloli rramivi jinibb nga marsorsan m̄irres renye non, ko kerr

rramrongwos rraprot sweri mauren nga sete orongwos pusuw. Rramlingi norrorrmien se kerr oto pa rengen mauren nen osuw.

⁸ Nale ngok evi weretunen.

Ko numrreni nik Taetas kuprij wor suri nanu ngok nir, nga puloli jinibb nga marosuri Atua arongwos parloli norrorrmien ser p̄iterter kele nga parloli majingen nga marres, ko nga marongwos para-rres kele wor tevi jinibb jijle nir.

⁹ Ko nik kupan ngasu wor re laten se nir nga marlengleng ko nga marok-meteni p̄elak re naul ne nise metka ser nir nga tuwi pa, ko kupan ngasu wor re laten ko balpalen nga marok-loli rengen murrun wowarrens nga marpelari rengen nale neseseien se Moses. Nale nga marirpok arivi nale nawon rres, sete arongwos parloli nanu san p̄irres.

¹⁰ Poro jinibb san pokloli jinibb parwi-jwij ngasu nir rengen nale nga mirpok, ko nik kupan kupser metutue pijpari pivaru kobong, ko vitunen setemun kupan. Ko setemun kupkorti tevi m̄ernen kele.

¹¹ Suri nik kurongwos pae jinibb nga mirpok, norrorrmien sen esij ko pa, ko nololien sen eviseni nga ni ololi pa esij.

Bongsi nale se Pol

¹² Ko daron nga mokoni Atemas rreknga Tikikas nuru tuwen vinuk jim, nik kupp̄elak p̄iterter nga kupini jik Nikopolis, suri inu nurrorrmi bean belik ie daron ne melas.

¹³ Ko kupp̄elak kele nga kupla se nuru ngok Apolos ko jinibb nga mokvisviseni nale ngok Sinas, nga kupseser tevi nuru rengen nanu jijle nga portori rengen sel se nuru.

¹⁴ Ko jinibb se kerr nir parongwos parterter ko wor rengen majingen nga marres, nga parongwos parlai se nir nga nevrer murrrol rengen nanu san. Sete erres nga parlik nawon.

¹⁵ Nir nga marlik tevik iel arwera “Erres” tevi nik. Ko nik kupwerai “erres” tevi sele kem nir nga marivi kalesia. Ko ngel evi loten suk, nga merrenien se Atua puto tevi kami jijle. Nuwra “Remsom”.

Naul nga Pol Muli tevi PILIMON Batu nale nga mivsviseni lut nga parmeteni naul ngel puto suri

Pilimon evi jinibb nga nijor sen milep, ko evi kele kalesia. Ni elik rrek ie Kolosi. Ko jinibb ne majingen sen san nga nisen Onesimas owl lingi. Mian ko Onesimas mivini mīlesi Pol, nga re wosenen mīlik re naim ne nekaien. Ko Pol ela Onesimas vini ji Kristo, evi vajin kalesia. Ko Pol okoni vajin Onesimas nga pulwi van ji Pilimon, ko oli naul ngel tevi nga Onesimas putori suri. Ko Pol owra Pilimon sete pulolarsi Onesimas. Ko owra kele nga Pilimon pia-koni Onesimas pia-luwi kele van ji Pol ko pīmejmajing sen pijpari nga Pol pia-ivel sisarow rengo naim ne nekaien nga marrul totkoni ni rengo.

Pol owra "Erres" tevi Pilimon

¹ Inu Pol, nga mīelik re naim ne nekaien ngel suri Iesu Kristo, ko Timoti kele nga mivi tasi kerr, nomorwera "erres" tevi nik, Pilimon. Kerr itul ngel, rramlik rengo majingen sansan kobbong, ko komru nomormerrenim elep.

² Ko nomorwera "Erres" tevi joji komru Apia, ko tevi natu kamru Akipas, nga kem namivi jinibb ne nuval ne gortien sansan kobbong. Ko nomorwera "Erres" kele tevi kalesia nir nga marok-korti rengo naim som.

³ Ko ngel evi loten suk, nga merrenien ko demat se Atua Tata ko se Iesu Kristo nga mīla mauren tevi kerr, piptevīm.

Merrenien ko nosurien se Pilimon

⁴ Pilimon, daron nga molot e, tetajer nomok-rrormi nik, ko nomok-wera "Erres" tevi Atua,

⁵ suri nomok-runge nospen suri merrenien nga komok-merreni lenglengen jinibb se Atua nir, ko nosurien som nga muto mīterter rengo Numal Iesu.

⁶ Nomok-lot suri nga nik komok-korti tevi kem rengo murrin ne nosurien, ko numrreni kele nga kuprongwos kele nanu nga marres nir nga Atua moklai tevi kerr nga rramkorti tevi Kristo.

⁷ Niaken suk, merrenien som ela neiren nga milep tevik, ko ololi norrorrmien suk eterter kele vajin. Ko murrin som ngok okloli jinibb se Atua nir arunge erres luwi vajin rengo norrorrmien ser.

*Pol ongoni Pilimon nga pīlai lweni
Onesimas*

⁸ Ko suri nanu ngok, ko suri rromorkorti pa tevi Iesu Kristo, nurongwos berij pīterter tevim nga kuploli ko wor nanu ngel nga musorsan mīrres nga kuploli.

⁹ Ko suri memrrenim, sete numrreni berij pīterter tevim, ko bongonim kobbong. Inu le Pol, nutra le pa, ko lelingenok nulik re naim ne nekaien ngel suri Iesu Kristo.

¹⁰ Ko nungonim suri Onesimas, nga mivi jinibb ne majingen som womu, mian ko muwlu lingim. Ko daron nga mīelik malum re naim ne nekaien ngel, ko mīelai vini ji Kristo. Ko ni erpe natuk ko vajin.

¹¹ Womu Onesimas sete orongwos puloli majingen som nga mīrres san, ko lelingenok vajin orongwos puloli majingen nga marres pilep se nik ko se inu kele, suri evi vajin kalesia.

¹² Ko lelingenok nukoni ni pulwi vinuk jim. Ko norrorrmien suk oto malum bbong tevi.

¹³ Ko numrreni poro pīlik mun iel spon tevik, nga ni pīla milnge nik nga pīmejmajing se inu rengo naim ne nekaien ngel nga mīelik ren suri nospen nga mīrres.

¹⁴ Ko inu sete numrreni nga bosortonim nga kuploli nanu ngok nga pīrres tevik pipok. Nik kuploli suri nik ko wor kumrreni. Ko sete nurongwos bololi nanu san poro nga nik sete kupmarong.

¹⁵ Rrek kutor jabble Onesimas beblen, nga daron nga kupla lweni, ko pīlik tevim pijpari tuwi ngok vini vajin.

¹⁶ Ko lelingenok ni asi kele pa jinibb ne majingen. Ni evi vajin tasi kerr nga mīrres, nga inu memrreni milep. Ko rrek nik kupmerreni kele wor pīasi, suri ni evi jinibb ne majingen som, ko okorti kele tevi Numal.

¹⁷ Ko poro kopok-lesi inu pirpe nga rromorivi niaken kobbong, erres nga sete kuplolarsi ni, ko kuploli pirpe nga kupla inu vinuk rengo naim som.

¹⁸ Poro ni ololi esij pa tevim rengo nanu tama san, rreknga nivnon sen san oto jim, erres nga nik kuplingi inu nisek puto rengo nivnon sen nen.

¹⁹ Nale ngel nuli tevi inu nevrek kobbong. Inu Pol bea-wuli lweni nivnon ngok tevim. Ko sete kupmalie nga nik nivnon som oto pa jik, suri inu nuvi batun nga nik kumtor sweri pa mauren ji Kristo.

²⁰ O tasik, kupla se inu rengo nanu ngel, suri kerru rromorkorti pa tevi Numal. Kuploli inu bornge pīrres luwi rengo norrorrmien suk.

²¹ Nomok-uli nale ngel vinuk jim, ko nurongwose erres nga nik kuploli nanu nga inu mongoni jim. Ko nurongwose nga nik kuploli kele wor pīasi sev nga mowrai ngel.

²² Ko re daron mawos nen kele, kuploli milnguk san puto metmet teraik rengen naim som. Suri tetajer inu nomok-rrorrmu nga Atua okrunge verusen se kami jikle ko pia-la lweni inu vinuk ji kami kele.

Bongsi nale se Pol

²³ Epapras ngok, nga moklik rengen naim ne nekaien tevi inu

²⁴ suri Iesu Kristo, tevi Mak, ko Aristakas, ko Demas, ko Luk, nga marok-majing tevi inu, arwera "Erres" tevim.

²⁵ Ko ngel evi loten suk, nga merrenien se Iesu Kristo Numal puto tevi kami jikle. Nuwra "Remse kami".

**Naul nga mian ji
Meri Isrel Nir (Ibrus)
Batu nale nga mivsiwseni
lut nga parmeteni naul
ngel puto suri**

Sete rramrongwose si oli naul ngel: Pol, rreknga Apolos, rrek nir m̄inij nen san. Ko oli van ji m̄eri Isrel sopor nga marivi kalesia. Ko owra Iesu ean mare re anglo nir (1:5-14), ean mare re propet nir, ko ean mare kele re Moses ko Josua (2:1—4:14). Iesu evi batu jinibb ne sulsulen nga mumomsawos m̄irres p̄etp̄eti, suri ni ejkie nololien. Ni emarong bbong pimij erpe sulsulen san nga mian ji Atua, ko setemun rrammerreni sulsulen m̄inij kele san nga rraplai tevi Atua (9:23—10:18). Ko Atua ololi ni emaur luwi re mijen, ko etasi vajin sel nga jinibb jijle arongwos paran ji Atua (4:14—5:10; 7:1—8:13).

Ko naul ngel os̄pe nosurien kele, owra kerr rraposuri ko wor Iesu. Nosurien ololi kerr rramrongwose erres nga rraplai ji Atua nanu nir nga lelingenok sete rramleslesir. Os̄pe nosurien se jinibb se Atua nga tuwi nir (11:1-40), ko owra kerr kele nosurien se kerr p̄iterter ko wor (12:1-3).

Iesu ean mare wor easi propet nir

¹ Tuwi jer vini, Atua ok-rij tevi b̄irterawarng se kerr nir renge sel lele nir rrrurrngi propet nir.

² Ko renge ma nabong nga mivi bongsi iel ngatan erpe rramlik vajin rengen lelingenok, erij mawos vajin rrrurrngi Natun mawos. Natun ngok ko, womu jer daron nga iel ngatan m̄itipatun e, ko Atua emajng nanu jijle renge ni nevren; ko owrai nabong sapon nanu jijle para-ivi sen e.

³ Natun ngok, moron se Atua omor rengen, ko non omor erpe Atua, ko eviseni erres Atua. Ni kobbong orrul totkoni nanu jijle, ko ololi kele arto erres renge derteren ne rijrijen sen. Ko emarong lweni kele nga mivini m̄irrawe tweni nololien se kerr jijle. Daron nga mivinvini jijle majingen sen ngok iel ngatan ko olwi van re melrin e, ko elik vajin tevi Tata sen renge nevren rres, nga mivi Numal nga mian mare renge melrin.

Iesu ean mare kele wor easi anglo nir

⁴ Iesu ean mare kele wor easi anglo nir, ko nisen nga miwajie ean mare wor easi nise anglo nir.

⁵ Rramrongwose iok, suri Atua sete owrai nabong san tevi anglo sen san owra 'Nik kuvi natuk. Lelingen nuvini bevi tata

som woswos'; ko Atua sete os̄pe kele anglo sen san nga muwra, 'Inu bevi Tata sen ko ni pivi natuk.'

⁶ Ko daron nga ma Atua muwra pukoni natun norman nga mivi m̄erwomu vini iel ngatan, ko owra 'Anglo p̄etp̄eti se Atua parsusi wor nisen ko van mare.'

⁷ Ko renge nos̄pen tweni anglo nir Atua owra 'Nuloli anglo suk nir arirpe ling nga muwuw karkar, ko nuloli nir nga marmajng suk arirpe nabb nga muroror.'

⁸ Ko daron nga ma nale on mus̄pe suri natu Atua, ejilwer suri erpe nga ni osorsan bbong tevi Atua, owra 'O Atua, nik kuvi Numal, ko kupivi Numal ko pa pijpari tuwi ngok vini. Ko komok-loli erres p̄elak ko pa renge murrun nga kummetmete jinibb jile nir ren.

⁹ Kumrrreni sev nga m̄irres ko musorsan, ko kungasi sev nga m̄isij. Iok ko evi batun nga Atua nga mivi Atua som mutobbobue nik ko ololi kurnge erres nga mususi nisen van mare temijpal easi jinibb nga marlik rrale nik.'

¹⁰ Ko vesan kele Atua owra 'Numal, tuwi jer pa, nik kobbong kuloli iel ngatan muto, ko renge nevrem kobbong kulngi melrin mare.

¹¹ Nanu ngok nir paran ko parjiki, ko nik ma kuplik tetajer. Nanu ngok nir pian ko partera daron sapon pirpe sunsun nga mian ko m̄itra,

¹² pirpe boriti nga m̄itra san nga marlulngi tweni mijkie, erpe nijor nga martera nir nga marlai twenir. Ko nik ma kusorsan kumerr tetajer, ko mauren som sete orongwose pusuw nabong san.'

¹³ Ko nale se Atua san oto kele nga ni setewor owrai rragrage tevi anglo sen, ko owrai ma tevi Natun mawos, owra 'Kuplik ko pa kuptiriv renge devjek rres pijpari nga b̄elngi devje nuval som nir parirpe boriti nga kupververasi ngatan.'

¹⁴ Ko niko anglo nir arirpese? Arivi bbong nem̄in nga marmajng se Atua, ko arivi nga parwilwil se kerr, ngok kerr nga Atua p̄ila mauren tevi kerr.

2

Nos̄pen nga m̄irres se Iesu ean mare wor easi nale neseseien se Moses

¹ Renge iok ko, kerr rrapterter ko wor nga rraprrul totkoni nale weretunen nga rramrunge pa musuw, puloli sete rrapror jabble sel se kerr.

² Rramlesi pa renge nale se Moses nga miplari ji anglo nir tuwi pa tevi metka se kerr nir, nga arivi weretunen; ko nir nga martor otvi nale ngok ko sete marosuri, artor sweri pa norongen nga m̄isij osuw.

³ Iow, ko rrapasi pirpese renge norongen nga n̄isij ngok poro sete rrapvijuri sel nga mimerr nga Atua mimrreni piwilwil se kerr ren lelingenok? Iesu, Numal se kerr, owomu jer nga muwrai tweni sel ngok nga Atua piwilwil se kerr ren. Ko nir nga marunge ni arviseni tevi kerr nga sel ngok evi weretunen jerjer;

⁴ ko Atua vajin okorti tevi nir nga puwrai lilane nga sel ngok evi pa weretunen jerjer. Ok-loli nanu nga marinijnij nawone nir ko nanu nir nga jinibb marok-taole nir; ko ok-tututweni derteren nir nga marpelari ji Nemin On aran ji jinibb, osorsan erpe nga ni mimrreni.

Iesu owomu renge liken nga pia-vini vitu

⁵ Atua sete osusture anglo nir nga parivi numal renge liken nga mimerr nga pia-vini, ngok liken nga rramok-jiljilwere ngel.

⁶ Suri nale san nga muto renge Naul On owra 'O Atua, suri sev kumrrormi milep suri jinibb, nga mivi nanu nga welili jer kobbong?

⁷ Kuloli ni ean ngatan renge anglo nir beblen kobbong, ko lelingenok kulai nais nga mian mare ko kususture,

⁸ ko kuloli emetmete nanu jijle.' Nale nga muwra, 'emetmete nanu jijle', eviseni nga sete nanu san pijpon, ko nanu jijle vajin. Ko setewor rramlesi nga jinibb san emetmete nanu jijle nir.

⁹ Ko rramrongwos ma rraplesi Iesu nga mivini iel ngatan mivi jinibb, ni ko evi vajin Numal ne nanu jijle nir. Ko renge nalol nga m̄irres se Atua, ololi Iesu ean ngatan renge anglo nir beblen kobbong, puloli ni pimij nga piwilwil se jinibb nir. Iesu ornge esij renge niben eanan epari mimij; ko renge iok ko, Atua osusture lweni, ko elai nais nga mian mare tevi.

¹⁰ Atua ngok nga muloli nanu jijle nga marivi sen, emrreni p̄ilai jinibb pilep parini parkorti tevi renge mauren nga m̄irres p̄elak sen renge melrin. Ko osorsan erres tevi murrun sen nga muloli Iesu murnge n̄isij renge niben, nga pivi jinibb mawos nga puloli ni purongwose piwilwil se jinibb vajin. Ko Iesu owomu re nir nga Atua mimrreni piwilwil se nir.

¹¹ Atua ololi aron ko arwokwok erres renge nololien ser. Ko ni tevi nir nga muloli marwokwok, tata ser sansan kobbong. Ngok ko ololi Iesu sete emanun nga puwrai nga nir arivi tasin ko jojan nir.

¹² Iesu owra 'Atua, bowrai tweni murrun som renge no tasik ko jojik nir. Belai nubo ko bosrōvi nik renge no jinibb som nir.'

¹³ Ko owrai kele 'Belngi nosurien suk p̄iterter renge Atua'; ko owrai kele 'Inu le

ngel tevi natuk nir nga Atua m̄ilai pa tevik musuw.'

¹⁴ Ko kerr jijle nga rramivi natu Atua, kerr jijle rramivi jinibb, rramivi drra ko niben. Ko ewretun Iesu evini erpe tuwa kerr; ko emaur renge drra ko niben erpe kerr. Ko emarong kele niben nga pimij suri kerr. Ololi erpok suri renge mijen sen orongwose putor pini derteren ne mijen nga Demij murrul totoni.

¹⁵ Elai tweni derteren se Demij nga mulokloksi kerr nga tetajer muloli rramok-metutue mijen.

¹⁶ Ko oto limjer nga Iesu sete ewilwil se anglo nir, suri Naul On owrai, 'Ewilwil se nir nga marpelari renge metka se Epram.'

¹⁷ Ko norrorrmien se Atua erpok, elesi erpe Iesu pivini pivi niaken kobbong tevi kerr renge nanu jijle nir. Ko kerr rraptur p̄iterter ko wor renge nosurien se kerr renge majingen nga Iesu ololi tevi Atua suri nololien se kerr, nga puloli no kerr p̄irres tevi Atua. Erpe ni evi batu jinibb sulsulen se kerr nga mokrrormi kerr.

¹⁸ Otur tere daron nga marterter milep renge nanu elep nga marpelari renge mauren sen nga murnge n̄isij suri, mianan ko easi; ko lelingenok orongwose piwilwil se kele kerr daron nga nanu nga marterter marini marrowrowe kerr.

3

Iesu ean mare wor easi Moses

¹ Tasik ko jojik nir, Atua everus pa kami osuw nga kapon ko kapivi jinibb sen. Ngok, kaprrormi ko wor Iesu nga Atua mukoni ko m̄ilngi mivi batu jinibb sulsulen tevi kerr jijle nga rramosuri.

² Iesu ololi osorsan erres renge no Atua nga mususture ni renge majingen ngok, erpe tuwi Moses mok-loli musorsan renge majingen sen nga mimetmete jinibb se Atua nir.

³ Ko jinibb nga m̄imajing naim ean mare wor easi naim ngok; ko erpok kele osorsan nga Atua pususture Iesu pian mare kele wor p̄iasi Moses.

⁴ Ewretun naim jijle, jinibb sisamis emajinge; ko Atua ma emajinge nanu jijle nir.

⁵ Moses osuri ko ololi osorsan nga mimetmete jinibb se Atua nir. Ni evi jinibb ne majingen se Atua nga mok-werwer womu renge nanu nir nga jinibb n̄inij se Atua para-werai vitue.

⁶ Ko Kristo ma ololi osorsan renge majingen se Atua erpe evi pa natu Atua mawos. Ko kerr rramrongwose rrapivi jinibb sen, poro rraplingi norrorrmien se kerr puto p̄iterter renge nanu nir nga rramrongwose erres nga Atua pia-lai tevi kerr.

Meri Isrel ne tuwi artor jabble sel

⁷ Renge iok ko pirpe ko wor nga Nemñin On muwrai renga Naul On muwra 'Poro kaprunge nale se Atua lelingen

⁸ setemun batu kami piterter nga kaptere ni pirpe nga nir marok-loli tuwi. Sete kaploli murrin ngok nga marrowrrowe ni renga lolo merwer.'

⁹ Re daron nen kele, Atua owra 'Renge lolo merwer ngok, birterawarrens se kami nir arok-lesi murrin suk nga marres tetajer ejpari sia ngavöl ivij (40), ko arloli lesi wor nga parrowrrowe inu tetajer.

¹⁰ Renge iok ko ololi inu nulolarsi temipjal nir suri; ko nuwra, nir arlengleng nawon, ko sete artor sweri murrin suk rragrag.

¹¹ Inu nulolar ko nuwirr nale nga miterter san, nuwra 'Nir ngok sete paran renga dan ser nga moro belai teir parmosi ren.'

¹² Tasik ko jojik nir, kapmetmet nga sete kami san norrrmrien sen puwon saut re nanu nga marsij nir, ko sete tuosuri Atua nga mimaaur nga sete orongwos pimij nabong sapon, ko tutur imare, ko tivel lingi.

¹³ Kapwilwil sisamis se kami nabong jijle. Renge nabong jijle, kerr rramwera "Lelingen", ko niko, nale nen renga Naul On nga muspe suri 'lelingen' eplari ji kerr. Ko niko, nabong jijle, kaploli norrrmrien se kami puto piterter, nga puloli nololien sete orongwose pikrekrasi kami san, ko pirvei tweni kami san. Ko batu kami kele sete piterter.

¹⁴ Suri poro rraprrul totkoni nosurien se kerr nga rramtipatun ren piterter pianan pijpari bongsi mauren se kerr; ngok kerr jijle rrapok-korti tevi Kristo vajin nga rrapror sweri nale rijrijen se Atua.

¹⁵ Nale on owra 'poro kaprunge nale se Atua lelingen, setemun kaploli batu kami piterter pirpe nga birterawarrens nir se kami marloli tuwi nga martur imare ko martere ni.'

¹⁶ Ko siko nir nga marunge nale se Atua ko martur mera ko martere kele ni? Ko nir ngok ko nga Moses mitkai tweni nir Ijip.

¹⁷ Ko siko nir nga Atua mulolarsi temipjal nir mijpari sia ngavöl ivij (40)? Ko nir ngok kobbong nga marloli müsij ko marmij renga lat karkar renga lolo merwer.

¹⁸ Ko siko nir nga Atua muloli nale terter ngok tweni nir, nga muwra 'Nir ngok sete paran renga dan ser nga moro belai tevir parmosi ren'? Ngok nir nga bbong martur mera ko marok-tere ni.

¹⁹ Ko rramlesi wose nga nir ngok sete aran renga dan ser suri sete arosuri Atua.

4

Jinibb se Atua parmosi

¹ Ko Atua elai nale rijrijen san pa tevi kerr osuw nga kerr rrapror sweri mosien nga ni pilai. Ko rrapmetmet nga kerr san sete tivter.

² Suri rramrunge pa nospen nga mirres osuw erpe nir ngok nga tuwi marunge. Arunge, ko arunge nawone kobbong, suri daron nga marunge ko sete arosuri.

³ Ko kerr nga ma rramosuri, rraplesi ko wor mosien nga Atua pia-lai tevi kerr. Ngok mosien nga Atua muwrai pa nga muwra 'Nulolar ko nuwirr nale nga miterter san nuwra, nir ngok sete paran renga dan ser nga moro belai tevir parmosi ren.' Atua erij erpok, ko tuwi pa daron nga mimajing iel ngatan ko evinvini jijle wor majingen sen, ko omosi vajin.

⁴ Suri nale san oto renga Nale On nga muwra 'Atua elngi iel ngatan ko nanu jijle nir renga nabong ouwon, ko renga nabong ebutun ko omosi renga.'

⁵ Ko nale kele san ospe suri mosien ngok kele, owra 'Nir ngok sete mara-lesi mosien se Atua.'

⁶ Nir nga marunge womu nospen nga mirres ngok sete arlesi mosien ngok, suri sete arosuri Atua. Ko oto limjer nga nir minij ma partor sweri mosien ngok.

⁷ Renge iok ko Atua elngi nabong minij kele san nga marveruse "Lelingen". Mian ko sia elep arasasi, ko Atua owrai rurrngi re jingo Devet nale nen nga rramlesi pa nga muwra 'Poro kaprunge nale se Atua lelingen, setemun batu kami piterter.'

⁸ Ko daron nga Josua mitkai neri Isrel nir nga paran parlesi mosien ngok renga dan ser mawos, ko setemun arlesi. Poro weretunen wor parlesi jile pa, ko Atua sete orongwose pilngi daron minij kele tevi jinibb sen nir nga parlesi.

⁹ Ko niko, sel oto wor nga jinibb se Atua partor sweri mosien erpe nga Atua mumosi renga nabong ebutun.

¹⁰ Suri nir nga paran parlesi mosien ji Atua parmosi renga majingen ser osoran erpe Atua mumosi renga majingen sen womu.

¹¹ Renge iok ko, kerr rraprelak ko wor nga rraplesi mosien ngok ji Atua. Sete erres poro kerr san pivijuri butterter se nir nga tuwi nir, tuloli ni tutor jabble mosien ngok.

Nale se Atua eterter elep

¹² Nale se Atua emaur ko emajing eterter elep, ko oso easi nesip ne balpalen nga muso renga devjen korti nuru. Orongwose pijpari nolo jinibb, pirpe nesip ne balpalen nga mian mijpari nuwi nga muto renga ji jinibb. Nale se Atua orongwose puwra suri

norrormien ko nalol nga muto renge nolo jinibb.

¹³ Sete nanu san iel ngatan orongwose piteptepi renge no Atua. Nanu jikle arto limjer rres renge non. Ko renge no Atua kobbong kerr jikle rrapa-werai tweni murun ne mauren se kerr.

Iesu evi batu jinibb sulsulen se kerr

¹⁴ Kerr rraprrul totkoni ko wor piterter nosurien se kerr. Suri rramtor sweri pa batu jinibb sulsulen nga mürres pelak san, nga mivi Iesu ngok nga mivi Atua natun nga mian pa jin ko mülük loloim renge melrin.

¹⁵ Jinibb sulsulen ngok sete erpe jinibb sulsulen münij nir, nga daron nga derteren se kerr mijkie ko sete marong pote kerr. Ko nanu jikle nga marok-rrowrrowe jinibb ar-rowrrowe ni kele. Ni orongwos rrrerrarre pa osuw. Ko nanu sansan kobbong, ni nololien sen ejkie.

¹⁶ Ko ngok, daron nga nanu nga marterter marok-ini ji kerr, sete rramametutu, rrapini ko wor re no Atua nga mok-rorrormi kerr ko nga mok-wilwil se kerr renge nalol nga mürres sen, ko ni vajin piwilwil se kerr re daron mawos nga miterter.

5

¹ Tuwi, Atua oklai tweni renge jinibb nir san nga ni mülngi nga puloli majingen renge ni non renge nise jinibb nir. Jinibb sulsulen ngok oksuli nanu nga marres nir tevi Atua. Erevji nanu rrum nir nga puloli sel nga pilai tweni nololien se jinibb nir.

² Orongwos purnge püsij renge nir nga marvitan, suri daron sapon ni kele dert-eren sen ejkie ko okvitan renge nololien.

³ Ko niko ni pirevji nanu rrum, sete erpe nga pilai tweni nololien se jinibb münij kobbong nir, ko evi nga pilai tweni kele nololien se ni kele.

⁴ Ko sete evi marongen se jinibb san nga ni pivini pivi jinibb sulsulen. Atua everuse jinibb nga ni pivini pivi jinibb sulsulen, osorsan erpe nga miveruse Eron tuwi.

⁵ Ko erpok sete evi norrormien se Kristo nga piwaji nais nga mian mare ngok, 'batu jinibb sulsulen'. Ejki. Atua ko osusture Kristo ko owrai tevi owra 'Nik kuvi natuk, lelingen nuvi tata som weretunen.'

⁶ Ko owrai kele renge naul kele san renge Naul On, owra 'Nik kuvi jinibb sulsulen erpe jinibb sulsulen nga tuwi ngok Melkisetek. Ko kuptori majingen se jinibb sulsulen ngok pianan pijpari tuwi ngok vini.'

⁷ Renge mauren sen iel ngatan, Iesu ongoni eterter tevi dengen sen nga suwen

meten mujumjum tevi Atua, nga Atua piwilwil sen, sete mia-mij. Ko suri norrormien sen ean ngatan, ololi Atua orngedrelan.

⁸ Ewretun Kristo evi Atua natun, ko ornge ma esij re niben, ko niko elesi wose nga puosuri wor nale se Atua.

⁹ Ko norongen nga müsij sen ololi ni osorsan erres jikle, ko orongwos vajin pila mauren ne tuwi ngok vini tevi nir nga marosuri.

¹⁰ Ko Atua elai nais ngok nga piwajie, nga evi batu jinibb ne sulsulen nga muosuri jinibb sulsulen nga tuwi ngok Melkisetek.

Nale nga puwni nir

¹¹ Renge murrun ngok nale elep oto nga nabwerai tevi kami; ko eterter nga nabwerai lilane nir jikle tevi kami, suri norrormien se kami lolola pelak nga kaprunge wose.

¹² Tuwi le pa nga kamok-runge nale nga Atua muwrai, ko evter vajin kapvisviseni; ko sete kamrongwose, ko evter ma jinibb sopor kele wor parini parvisviseni kami renge batu nale ngok. Erpe kami kamluwi kele nga sete kamrongwose kapurroi nannen terter, ko kamsus malum.

¹³ Ko nir nga marok-sus malum arirpe bipi nga welili, nga setewor müsiesi wose sev nga mürres ko sev nga müsij.

¹⁴ Ko nanen nga miterter evi se nir nga marini pa marivi jinibb nga marlelep nga marok-pelak pa tuwi vini, ko arviter vajin nga parini parwera tweni murrun ngabe erres ko murrun ngabe esij.

6

¹ Ko niko, erres rraplinglingi norrormien nga womu renge nosurien se Kristo, ko rraptajer tevi norrormien nga müttra. Rramrieni pa kerr osuw renge majingen nga müsij ne mijen, ko rramlai nosurien ji Atua osuw; ko sete evi nga rrapok-luwi kele tetajer van re norrormien nga womu. Erpe rramloli lilane pa milnge naim, ko evi vajin daron nga rraploli naim putur e ko.

² Arviseni pa kerr osuw re sel ne marbaptaes ko nga marlingi nevrer re jinibb, ko rramosuri pa nga rrapmaur luwi kele renge mijen, ko rramrongwose nga norongen nga müsij san oto metmet nga jinibb nga marsij nir parlesi nga sete orongwose pusuw nabong sapon. Nanu ngok nir rraman pa renger osuw, ko sete erres rraplönilululwenir kele; ko rraptajer malum ma tevi Numal se kerr.

³ Ko ngok evi majingen nga rraploli, nga rraptajer ko pa, poro nga Atua pimarong pipok.

⁴ Erres nga rraptajer ko pa tevi ni tetajer. Ko pirpese reнге nir nga marvitan ko marluwi kele van re nololien? Nir ngok, womu arok-ivel erres reнге moron, ko arok-urroi pa nanen ne orsel re melrin osuw, ko Neñin On evan pa renger; ko daron nga marini marsij kele mirpok, ko setemun orongwose parieni lwenir parluwi vini reнге mauren kele.

⁵ Suri nale on se Atua ewilwil pa se nir, ko arlai pa derteren nen beblen ne batun vanu nga pia-vini.

⁶ Ko daron nga martur telur mirpok ko marloli batur mirpok, orongwose parini luwi kele? Ejki rres! Pisisj wor pilep reнге nir, suri erpe arok-wuse lweni kele Natu Atua mare kele reнге nai pelaot reнге nevrer, ko erpe arok-lingi ni mare nga parsowri lokloksi kobbong.

⁷ Kaprrorrmī ta dan nga mimni suwe naus nga mūrres tetajer, ko mok-lai wenen milep tevi nir nga marmajing rengen. Atua erij erres suri.

⁸ Ko dan nga mösmös nga mīsij mimauren, erpe nga Atua pilingi rijrijen ne mijen kobbong tevi, ko pusli reнге nabb.

⁹ Ewretun lenglengen selek nir, nale nga maripok arterter temijpal.

Ko re devjen se kami, sete nurrorrmī kami kamirpok, ejki. Nulngi nolok eterter reнге kami nga wenen nga marres ne mauren nga mimerr pok-maur pīrres malum wor reнге kami.

¹⁰ Nuosuri Atua nga ni sete mia-malie majingen nga mūrres se kami, ko ni purrorrmī pīterter murrūn ne merrenien nga kamlai tevi ni daron nga kamwilwil se kalesia mīnij nir. Kami kammajing erres erpok tuwi ko pa, evini erpe nga kamok-majing rengen malum, ko Atua eir elep suri. Ko ni kele puloli pusorsan ko pīrres tevi kami jijle.

¹¹ Ko erpok kele, numrreni bowrai pīterter tevi kami nga sete kapluwi kele, ko kapterter ko wor nga kaptajer malum pianan pijpari bongsin, nga puloli kaplai nanu jijle nga Atua mīlŋgir marto metmet reнге no kerr.

¹² Sete nibe kami pimijmij, ko kapmajing pīterter pirpe birterawarrens se kerr nga martori totkoni majingen mīterter. Norrorrmien ser mīterter ko mipriv eanan ejpari marlai nanu pētpeti nga Atua mīlai reнге nale rijrijen tevir.

Nale rijrijen weretunen se Atua

¹³ Daron nga Atua mīlai rijrijen sen tevi birtera Epram nga muspe suri metka nga para-rremali rengen, san ejki kele nga Atua orongwose pujuji nga puloli rijrijen ngok pīterter. Suri Atua ean mare reнге

nanu jijle, ko niko ojuji ni lweni kobbong daron nga mīlai nale rijrijen sen, ko owra

¹⁴ 'Inu Atua berij pīrres lenglengen suri nik. Bololi metka som nir pilep temijpal iel ngatan.'

¹⁵ Epram elesi nga Atua ololi rijrijen sen ngok eterter erres pelak, ko niko, daron nga mutor sweri daron nga mīterter milep, ko sete elngi kurtweni rijrijen se Atua; ko orrul totkoni eterter, mian ko elai vajin sev nga Atua mīrijrije tevi.

¹⁶ Renge murrūn nga parloli rijrijen pīterter, arok-juji jinibb nga marlelep. Ko sete arongwose parij latlate kele ren, suri nais ngok oto pae, ko ololi nale eterter.

¹⁷ Ko erpese reнге Atua? Ni kele emrreni puloli nale sen pīterter pīrres nga rraposuri ko sete rraprong tweni. Kerr rramirpe bipi nir nga rraplai nanu pilep ji Atua. Ko Atua owra rraprorrmī pīrres nga norrorrmien sen tevi kerr sete mia-suw nabong sopon. Ko niko ojuji ni lweni nga puloli rijrijen sen tevi kerr puto pīrres tetajer.

¹⁸ Ko nanu nga eru ngok, rijrijen sen, tevi murrūn nga mujuji ni lweni, nuru korti ormajing lat sansan, orviseni nga Atua sete ekekris, ko sete pīrieni nale sen nabong san. Niko rrapror pīterter reнге nale sen. Rramivi jinibb nga rramwolu lingi lat nga mīsij nga rramlik rengen tuwi, ko rramok-pejpej kele lat nga mūrres san. Ko rijrijen se Atua ok-wilwil se kerr nga muloli norrorrmien se kerr epriv, nga kerr rrapan rrapror sweri lat nga mūrres pelak ngok nga Atua mīlŋgi muto metmet reнге no kerr.

¹⁹ Nosurien se kerr nga mīterter ngok nga muwra Iesu pīlai mauren tevi kerr evi norrorrmien nga mirpe angka nga murrul totkoni mīterter drav nga mīsal murrong. Purrul totkoni mauren se kerr nga sete nanu san purongwose pīlai tweni kerr kele. Angka ngok erpe oto pa osuw reнге lat nga muon milep ji Atua, nga kalik nga milep murrul ore pa reнге melrin.

²⁰ Ko Iesu owowomu pa kerr van lat nen osuw, nga puloli majingen sen erpe mivi jinibb sulsulen se kerr nga puloli lilane kerr tevi Atua. Ni erpe batu jinibb sulsulen nga muosuri birtera ngok Melkisetek, ko ni putori majingen ngok pianan pijpari tuwi ngok vini.

7

Batu jinibb sulsulen ngok Melkisetek

¹ Naul ne Jenesis ospe suri Melkisetek. Owra ni elik re daron se birtera Epram nga tuwi pa. Birtera Melkisetek ngok evi numal re ngaim nga Salem, ko jinibb sulsulen se Atua ne drromsen mare. Daron

san Bırtera Epram evan ololi balpala sen tevi devje nuval sen nir, nga mirevji numal nir ivij. Ko daron nga mulwi vajin ko eskai Melkisetek, ko Melkisetek erij erres suri ni.

² Ko reнге joron nir nga Epram mlair reнге nuval, elai songovlon tevi Melkisetek. Ko nais ngok Melkisetek owra puwra 'Numal ne murrun nga musorsan'. Ko ni evi keke numal ne Salem.^A Ko Salem owra puwra Demat, ko niko ni evi keke 'Numal ne demat'.

³ Ko nale san ejki nga muspe suri Melkisetek tata sen rreknga tasu sen rreknga apu sen nir, ejki rres. Ko sete nale san ospe lat nga mlak e rreknga mimij e. Ni erpe natu Atua nga mutori majingen sen ne jinibb sulsulen mırres nga sete orongwose pusuw nabong sopen.

Melkisetek ean mare wor easi batu jinibb sulsulen se meri Isrel

⁴ Kaprrormi ta Melkisetek ngok, nga mivi nais nga mian mare lenglengen. Epram nga mivi Bırtera se kerr, daron nga mlai joron nir reнге nuval, ko emrreni wor plai songovlon tevi Melkisetek.

⁵ Ko nga marok-lai songovlon mirpok evi murrun nga meri Isrel marok-loli reнге sia jikle. Nale nesereien se Moses owra 'songovlon pok-an ko wor ji metka se Livae nga marivi jinibb sulsulen.' Ko meri Isrel jikle nir arivi sansan kobbong, erpe arivi metka se Epram.

⁶ Ko Melkisetek sete evi metka se Livae, ko Epram elai ma joron nir nga mlair re nuval songovlon tevi, ko Melkisetek erij erres suri. Ko Epram ngok ko, Atua mlai pa rijrijen tevi. Ko ngok evini eterer keke tevi kerr nga Melkisetek ean mare wor easi Epram,

⁷ suri oto limjer nga jinibb nga mian mare kobbong orongwose pirij pirres suri jinibb nga mian ngatan sopen.

⁸ Jinibb arok-lai joror songovlon tevi jinibb sulsulen nir. Ko jinibb sulsulen nir jikle paran ko parmij kobbong. Ko Melkisetek ma sete emij, erpe nga Naul On muwrai.

⁹ Ko lelingenok metka se Livae nir arok-lai songovlon ngok nir ji meri Isrel nir. Ko tuwi daron nga Epram mlai songovlon ngok van ji Melkisetek, ko erpe Livae keke elai tevi.

¹⁰ Nuwrai erpok, suri Livae evi metka se Epram ko san, nga mivitu. Ko niko, daron nga Epram mutori Melkisetek, ko erpe Livae keke otori Melkisetek.

Batu jinibb sulsulen re metka se Livae ko jinibb sulsulen nga mutori murrun se Melkisetek

¹¹ Atua osusture metka ne jinibb sulsulen nir, mian ko elai vajin nale nesereien sen tevi meri Isrel nir. Ko poro majingen se jinibb sulsulen ngok nir erres pa, ko jinibb sulsulen minij san pivini keke suri sev? Ko suri nir sete arviter, ko niko san pivini keke ko wor. Ko ni sete pirpe Eron, nga mivi merwomu nga mutori majingen ne jinibb sulsulen re metka se Livae, ko pirpe ma Melkisetek.

¹² Ko poro parlai tweni batu jinibb sulsulen nga womu ngok, ko nale nesereien keke rrek parieni ko.

¹³ Ko pipok ko wor, suri iok ospe Numal se kerr nga miplari reнге metka minij. Setewor nir san reнге metka nga Iesu miplari ren otur re nawot nga puloli majingen ne sulsulen se Atua.

¹⁴ Jinibb nir arongwos pae osuw nga ni eplari reнге metka se Juta. Ko Moses sete ospe rragrage sopen suri metka se Juta, daron nga mokjilwer suri majingen se batu jinibb sulsulen nir.

Batu jinibb sulsulen minij san nga murrul totkoni murrun se Melkisetek

¹⁵ Ko eplari limjer nga batu jinibb sulsulen minij ngok evi jinibb sulsulen nga murrul totkoni murrun se Melkisetek.

¹⁶ Otori majingen ne jinibb sulsulen, sete suri nga nale nesereien muwra ni metka sen ko wor putori majingen ngok, ejki. Otori suri derteren ne mauren sen nga bongsin mijkie.

¹⁷ Suri Naul On owra 'Nik kuvi batu jinibb sulsulen erpe jinibb sulsulen ngok Melkisetek ne tuwi. Ko kuptori majingen ne jinibb sulsulen ngok tetajer pijpari tuwi ngok vini.'

¹⁸ Nale ngok elai tweni sel nga mlira nga derteren nen ejkie ko sete orongwose puloli rrapmomsawos pirres.

¹⁹ Ko nale nesereien se Moses sete orongwose puloli nanu san pusorsan pirres. Ngok norrrormien nga mimerr san eimare nga plai milnge sel nga mlira ngok. Sel nga mimerr ngok ko vajin rraposuri piteter, suri evi sel ne mauren weretunen nga pitkai kerr rrapan mori ji Atua.

²⁰ Ko Atua ololi keke nale rijrijen sen san tuwi nga puloli sel nga mimerr nen pivini mare. Ko sete ololi nale rijrijen san daron nga jinibb sulsulen re metka se Livae nir marini marlai majingen ser.

²¹ Ko Iesu evini evi jinibb sulsulen suri nale nga Atua muloli miterter pa nga Naul On muwra: 'Atua ololi nale sen eterter pa, ko sete mia-rieni keke norrrormien sen. Ni owra 'Nik kuptori majingen se jinibb sulsulen tetajer pijpari tuwi ngok vini.'

^A 7:2 Nais ngok Salem evi nise Jerusalem, tuwi jer.

²² Ko Iesu orrul totkoni majingen sen erres, ko etasi sel nga mimerr se Atua tevi kerr, nga m̄irres wor asi nga womu.

²³ Ko nanu kele san ni le: jinibb ne sulsulen ne tuwi, nir elep ko wor, suri marmajing mianan ko san emij, ko san kele p̄ilai wani milngen.

²⁴ Ko Iesu ma emaur ko sete mia-mij nabong sopen. Sete mia-lai majingen sen ne batu jinibb sulsulen tevi jinibb m̄inij kele san.

²⁵ Ko niko etipatun lelingenok ko pijpari tuwi ngok vini, ni orongwos p̄ila mauren tevi jinibb nga markorti tevi nga parini ji Atua. Ni pimauro ko pulot tetajer tevi Atua suri nir.

²⁶ Rramwera erres wor elep tevi Atua nga mukoni jinibb sulsulen nga m̄irres p̄elak mirpel vini ji kerr nga pimete kerr. Ni on elep. Sete nanu san esij jin, ko nololien ejki jin. Sete erpe rragrag kerr jinibb ne nololien nir. Nisen ean mare temijpal easi nanu jille ne iel ngatan.

²⁷ Ni sete erpe batu jinibb sulsulen nga nabong jille marok-revji nanu rrum nga p̄ilai tweni nololien ser puwomu, ko vitunen pia-lai tweni kele se jinibb nir. Iesu evinvini ore murrin ngok ko pa osuw daron nga mimarong ni mimij nga p̄itlasi tweni nololien se jinibb nir ne iel ngatan totoklai.

²⁸ Nale nesereien se Moses osusture jinibb nga derteren ser mijkie, ko marok-loli nololien, nga parivi jinibb sulsulen. Ko rijrijen se Atua, nga mivini vajin vitunen, osusture natun Iesu Kristo nga musorsan m̄irres tetajer pijpari tuwi ngok vini.

8

Sel nga mimerr: Majingen se jinibb sulsulen nen erres wor asi

¹ Ngel evi batu rijen suk, nga batu jinibb sulsulen se kerr otoo, ko elik pa rengen melrin tevi Atua rengen nevrener rres tevi derteren sen nga milep. Ko nisen ko Iesu.

² Sete ololi majingen sen rengen naim on nga jinibb m̄imajinge, ko ololi majingen sen rengen Naim On mawos nga Atua kobong m̄imajinge rengen melrin.

³ Ko majingen se jinibb sulsulen ne iel ngatan tetajer evi nga parlai merrenien ko parevji nanu rrum nga parloli sulsulen van ji Atua. Ko batu jinibb sulsulen se kerr, Iesu, ni kele p̄ilngi wor nanu ko san nga p̄ilai tevi Atua.

⁴ Ko poro Iesu p̄ilik malum iel ngatan, ko sete mia-tori nais ngok jinibb sulsulen, suri jinibb sulsulen nir arlik pa nga parlai merrenien tevi Atua, osorsan erpe nale nesereien se Moses muwrai.

⁵ Majingen nga jinibb sulsulen nir arok-loli, erpe arloli rrongrongvi kobong nanu nga muto rengen melrin; ko nga rengen melrin ma evi weretunen jerjer. Ko ewretun, suri daron nga Atua muwrai tevi Moses tuwi pa nga pususture Naim On nga mivi devji ngok, ko owra 'Kupmetmet p̄irres

nga kupmajing nanu ngok nir pusorsan tevi nanu nga meviseni pa tevim rengen botwen iak.'

⁶ Ngok rramlesi vajin majingen se jinibb sulsulen nga Iesu m̄imajinge erres wor elep easie nga jinibb sulsulen nir iel ngatan marloli. Ko rengen murrin ngok kele, sel se Atua nga Iesu m̄ilai m̄irrmali ji jinibb nir erres kele wor easi sel ne tuwi. Suri nale rijrijen nga marres nir kele wor arto nga puloli putur.

⁷ Poro sel nga womu p̄irres malum, ko sete sel nga vitu mia-to kele.

Sel nga mimerr: Atua erijrij pae tuwi nga p̄ilai

⁸ Atua elesi nga m̄eri Isrel nir sete arvijuri sel nga womu erres, evi batun nga muloli rijrijen nga p̄ilngi nga mimerr kele san. Owrai tweni rengen nale san nga m̄ilai tevi propet Jeremaea nga puwrai tweni. Rengen nale nen, Atua rijen sen owrai erpel, owra 'Kapmurrong p̄irres. Numrreni bowrai tevi kami nga daron san pia-vini ni ko nga inu βelngi kele sel nga mimerr san tevi kami jinibb suk nir; kami nga rengen metka ne Isrel nir ko metka se Juta.

⁹ Ngel sete mia-irpe rijrijen nga m̄elai tevi apu se kami nir nga tuwi. Rengen daron nen erpe nuvel jiljile nir ko m̄etkai tweni nir Ijip. Ko suri nir sete artori rijrijen nga m̄elai tevi, ko iok ko ololi setemun nurrorrmi nir.'

¹⁰ Ko Numal owra 'Rijrijen nga bea-lingi tevi m̄eri Isrel nir rengen daron nga pia-vini, ni le vajin ngel. βelngi lilane nale nesereien suk rengen norrorrmien ser, ko boli tweni rengen nolor. Ko inu bevi Atua ser, ko nir parivi jinibb suk.

¹¹ Ko setemun evi nga paran parvisviseni seler, parwera 'O sel le ma ngel', rreknga, 'O Atua erpel, erpok, rreknga erpak wor.' Ejki. Setemun mara-loli mirpok, suri nir jille para-rongwose vajin inu rengen mauren ser sisamis, p̄itipatun rengen bipiwarreng nir pian pijpari jinibb nga m̄itra.

¹² Ko rijrijen suk evi nga, poro nololien sev oto ji nir, ko inu βetlasi tweni, puloli bemalie. Ngok evi sel suk nga mimerr tevi jinibb suk nir.'

¹³ Ko rengen nale sen ngok, Atua osp̄e suri sel nga mimerr ngok nga puloli rraplesi wose sel nga womu pa erpe etra pa osuw.

Ko norrorrmien oto renge sev nga Atua muwrai etra pa osuw; suri evan pa ngatan, ko sete mia-periv ko pia-jijiki p̄etp̄eti vajin.

9

Sel nga mimerr: Lat on nen erres wor asi

¹ Ko rramrongwose erres rijrijen nga n̄itra ngok, ko sel nen nga parsurōvi Atua ren otoa. Ko lat on nen kele san otoa nga muto bbong iel ngatan.

² Jinibb ne tuwi arsusture devji san nga mivi Naim On nga markel otvi m̄ierue. Loloim nga womunen arwerai lat nga muon. Renge loloim nen, laet san oto, tep san, ko niv sapon nga marok-lingi tetajer rengo no Atua.

³ Ko arruloni ore loloim nen tevi kalik nga milep san nga m̄irres p̄elak. Ko loloim tuwen nen evi lat nga muon nga muon lenglengen.

⁴ Ko rengo loloim nen, nawot nga mivi gol oto ren, nga marjingtēni nanu nir nga mapur marres nga parsulir tevi Atua. Ko bokis ngok kele ne rijrijen se Atua nga mivi gol ngok nga biles san nga mivi gol marjingtēni lolon, nga nanen ngok mana muto rengen. Ko nai san nga mivi nejjip̄ip̄ se Eron nga tuwi Atua muloli mimra luwi kele raon mutoe, ko nevōt nivev kele eru nga nale neseseien esngavōl se Atua maruli rengo nuru.

⁵ Mare rengo bokis ngok kele evi lat nga Atua mok-lai tweni nololien se jinibb e nir rengen. Ko mare rengen kele, nanu eru kele nga marveruse nisen jerubim nga n̄irirrin lenglengen nga piviseni nga Atua elik iok, ko naben kele orsalsal ore lat nen. Ko daron ejki nga rrasupe nunci p̄etp̄eti murrurrun wowarrens ne nanu nen nir.

Sel nga mimerr: Sulsulen nen erres asi

⁶ Ko nanu jikle muto mirpok vajin, ko jinibb sulsulen nir arok-an vajin rengo loloim nga womunen nabong jikle nga parloli vajin majingen se jinibb sulsulen nir.

⁷ Ko batu jinibb sulsulen kobbong orongwose pian rengo loloim nga erwen nen nga muon lenglengen, ko pian pivesan kobbong rengo sia san. Daron nga mian, ko elai drra nanu rrum nir erpe evi sulsulen van ji Atua. Drra ngok evi nga p̄ilai tweni ni nololien sen, ko p̄ilai tweni kele nololien nga n̄eri Isrel jikle nir marloli ko sete marongwose nga evi nololien.

⁸ Iok, Nemin On eviseni vajin nanu san em̄erer erres tevi kerr. Daron nga devji ngok mutur malum, ko metali setewor etp̄ir nga kerr jikle rrapan loloim rengo lat nga muon lenglengen ngok.

⁹ Ngok erpe nale rrongrongvi nga piviseni kerr daron nga rramlik ren lelingenok. Nale rrongrongvi ngok owrai erpok, nga merrenien nga jinibb sulsulen marok-lai tevi Atua, ko nanu rrum nga marok-revji nga p̄ilai tweni nololien se jinibb nir, sete evter. Nanu ngok nir sete arongwose parloli norrorrmien se jinibb puwokwok p̄irres rengo no Atua.

¹⁰ Iok arsupupe bbong murrun se jinibb n̄iaan ko miminmin ko n̄ilalos. Ko nanu

ngok nir arivi nanu nawon nga maro kobbong mijpari daron nga Atua n̄irrieni nanu jikle nir arini armerr luwi kele.

Kristo elai mauren sen nga p̄ilai tweni nololien se jinibb

¹¹ Ko Kristo ermali pa osuw nga mirpe batu jinibb sulsulen ne nanu nga marres ngok nga marpelari pa. Ko devji nga ni m̄imajing ren erres ko osorsan easi nga womu. Devji ngok, sete jinibb ne iel ngatan emajinge, ko sete evi nanu ne iel ngatan san.

¹² Daron nga Kristo mian loloim nga womu rengo devji ngok, ko etajer van rengo loloim nga muon lenglengen. Ko sete ololi erpe jinibb sulsulen m̄inij nir marloli. Sete elai drra nanu rrum san nga p̄itlasi tweni nololien se jinibb nir, ejki. Elai ni drran mawos kobbong. Ko ololi evesan rres kobbong, nga pivinvi ore sel nga n̄itra ngok ko p̄ilai tweni nololien se kerr, ko puloli rrapiel sisarow vajin pian pijpari tuwi ngok vini.

¹³ Drra nanani, drra buluk ko natu buluk nga marsuli mivi niavin, majingen ner otoa. Jinibb sulsulen arongwose parlai drra ngok sapon ko niavin ngok ko parwirrwrrenien rengo jinibb nga marrokkitkit rengo no Atua, ko nanu ngok orongwose puloli parwokwok luwi kele.

¹⁴ Ko drra Iesu orongwose puloli majingen nga n̄iterter kele wor easi majingen ne nanu ngok nir. Renge majingen se Nemin On nga mimaur tuwi ngok vini, Kristo elai mauren sen tevi Atua erpe sulsulen san nga musorsan m̄irres p̄etp̄eti. Ko drran ngok orongwose puloli norrorrmien se kerr puwokwok re nanu ne mijen nga rramloli, nga rraploli vajin majingen se Atua nga mimaur tuwi ngok vini.

Tetajer drra puwlu ko wor nga piviseni nga rijrijen otur

¹⁵ Ko suri majingen nga m̄irres mirpok, niko Iesu mustusture kele rijrijen nga mimerr se Atua. Emij nga puwli tweni jinibb nir rengo nololien ser nga martor otvi nale neseseien se Atua nga womu. Kristo ololi nir nga Atua miveruse nir arivel sisarow pa nga artor sweri nanu

nga sete mia-suw nabong sapon, nga Atua mirijrij pae musuw nga pilai tevir nabong san.

¹⁶ Poro jinibb san puloli marongen san puwra 'Daron nga bemij ko nanu ngok parivi se morok, nanu ngok parivi se morok', eniferer erres tevi jinibb nir nga poro mernen pia-mij, puloli marongen nen putur vajin.

¹⁷ Suri poro jinibb san ololi marongen nga mirpok san ko emaur malum, ko setewor mara-vijuri nale nen. Para-vijuri ko ma renga daron nga poro pia-mij.

¹⁸ Ko erpok kele renga marongen rreknga sel nga womu nga Atua muloli. Nanu san pimij ko wor, drran puwlu, ko niko sel nen putur vajin.

¹⁹ Erpok ko, Moses owra tweni jille nale nir re nale neseseien tevi jinibb nir. Daron nga muwrai tweni jille musuw, ko otor pini vajin sulsulen nga puloli nale renga nale neseseien ngok pimauro ko putur. Arevji pini natu buluk tevi nanani, ko elai drran sapon ko ejvi nuwi sapon van ren. Ko elai rao nai san nga marveruse isop tevi silvi sipsip nga musongsong, ko orrurrngoni van re drra nga, ko erringringe renga naul ngok nga maruli nale neseseien se Atua nir rengen ko renga kele jinibb nir, ko owra

²⁰ 'Ngel evi drra nga puloli sel se Atua putur. Atua owra kami kaposuri ko wor.'

²¹ Ko renga murrun ngok kele kobbong Moses ewirwirreni kele drra ngok sapon lat lele nir renga devji ko renga nanu sopor nga marto renga lat nga marok-surovi Atua rengen.

²² Sel ne majingen ne nale neseseien arirpok ko, nga otomori nanu jille nga marmajinge rengen, arok-wirwirreni ko wor drra pian ren nga puloli puon. Ko poro drra sete pisaser, ko Atua sete mia-telasi tweni nololien se jinibb.

*Kristo elai mauren sen, ko drran owl
nga pilai tweni nololien se jinibb.*

²³ Nanu nen nir, erpe devji nen, arloli rrongrongvie nanu ne melrin nir. Ko drra nanu rrum san puwlu ko wor suri nga puloli parwokwok. Ko nanu mawos ma nga marto renga melrin armerreni sulsulen nga mitertter kele ko wor san nga puloli nir parwokwok.

²⁴ Ko Kristo sete ean loloim renga lat nga muon lenglengen ngok nga jinibb kobbong marsusture nga mirpe marrongrongvie kobbong, ejki. Ean mawos renga melrin weretunen ko otur renga no Atua. Ko evan nga pila se kerr.

²⁵ Ko erpok, batu jinibb sulsulen ok-lai drra nanu rrum nir evesan renga sia jille nga mian renga lat nga muon lenglengen

ngok. Ko Kristo sete ololi lululweni erpe nir ngok, ejki. Ololi evesan kobbong.

²⁶ Suri poro ni pok-loli pirpok, ko kami kamrorrmi ni pok-rrul lululwi ko pa renga nai pelaot? Pok-runge pisij renga niben daron pilep, etipatun re daron nga iel ngatan mitipatun, mivini mijpari lelingenok? Ko ejki, sete erpok. Evini vesansan rres kobbong nga pivinini ore nanu jille nir ne daron nga womu. Ko ermali nga mlai mauren sen nga pilai tweni nololien se jinibb.

²⁷ Ko Atua owngani pa sel se jinibb jille nir, owra jinibb pimij pivesan kobbong, ko vitunen ko Atua pia-wera suri lat nga putu suri tevi vajin.

²⁸ Ko renga iok, Kristo elai mauren sen evesan rres kobbong nga pilai tweni nololien se delung. Ko pia-rremali luwi kele, ngok erpe pivi varwen ko vajin, sete nga pitlasi tweni nololien se jinibb. Ko evi nga piwilwil se nir nga marok-teravi.

10

Sulsulen se Iesu erres kele wor

¹ Nale neseseien se Moses owra rrongrongvi bbong nanu nga marto ko renga melrin, ko sete arivi nanu nen mawos nir; ko sete osorsan pelak tevir, namol ner kobbong. Ko mian ko nanu mawos nen nir para-pelari ko. Tetajer renga sia jille, jinibb sulsulen arok-revji nanu rrum nir renga murrun ngok ko pa, nga pilai tweni nololien se jinibb. Arpelak malume, ejpari lelingen ngel, ko ejki mun. Suri nale neseseien se Moses nga mimajing renga sel ngok sete orongwose puloli jinibb nga marwera parini ji Atua parmomsawos pirres.

² Ko nir nga marok-loli sulsulen van ji Atua sete arwokwok erres renga nololien ser. Poro parwokwok, ko setemun parunge nanu san purrowsir, ko sulsulen ser pusuw ko vajin. Ko sete erpok.

³ Sia jille, arpelak malum, ko sulsulen nir nga marloli arviseni lweni bbong tevi nir, nololien nga nir marok-loli.

⁴ Suri drra buluk rreknga nanani sete orongwose pirrawe tweni rragrrag nololien se jinibb.

⁵ Ko renga iok, tuwi pa, daron nga Kristo muwra pivini iel ngatan, owrai tevi Atua owra 'Nik sete kumrreni sulsulen ko merrenien nga marok-lai tevim, ko kula ma nibek tevik.

⁶ Nanu nga marsulir van ko marnivniv nawon, ko merrenien nga puloli jinibb puwokwok renga nololien, setemun kuir renger.

⁷ Ko nutur mera ko nuwrai lilane tevi Atua nuwra 'O Atua, nuir nga bololi

marongen som, erpe maruli pa renga Naul On.'

⁸ Womu jer Kristo owra 'Nik sete kumrreni nga jinibb parok-revji nanu rrum ko parok-lai merrenien tevim. Sete kumrreni parevji nanu rrum ko parloli sulsulen nga pilai tweni nololien ser. Sete kurnge erres renga murrun ngok.' Ko murrun nga marok-loli ngok osorsan mbong tevi nga nale nesereien se Moses muwrai.

⁹ Ko mian ko Kristo owra 'Atua, numarong le vajin nga bean bololi marongen som.' Renge iok, rramlesi sel nga womu ne sulsulen tweni nololien, Atua ewirr tweni; ko nga vitunen ma, elai ko otori.

¹⁰ Renge sel nga mimerr ngok ko vajin, Iesu Kristo ololi erpe marongen se Atua muwrai, nga milai niben erpe sulsulen mivesan kobbong nga sete mia-loli vesan kele. Ko suri muloli mirpok, Atua ololi rramwokwok ko rramon erres renga nololien se kerr.

Sulsulen se Iesu puto tuwi ngok vini

¹¹ Nabong jikle jinibb sulsulen se meri Isrel arok-loli majingen ser nga marevji nanu rrum nir nga pitlasi tweni nololien se jinibb. Ko murrun ngok sete orongwose pitlasi tweni rragrrag nololien se jinibb.

¹² Ko Kristo ma elai ni lweni niben nga pilai tweni nololien se jinibb nir. Ololi vesansan kobbong, renga mijen sen, ko evert nga pitlasi tweni ko pa nololien se jinibb nir pijpari tuwi ngok vini. Ko vitunen ko ean esakel vajin tevi Atua vajin renga nevren rres.

¹³ Ko Iesu pisakel iok pian pijpari nga Atua puloli devje nuval sen parlik ngatan pirpe boriti, ko Iesu pibbottbott er.

¹⁴ Daron nga Kristo mimij vesan bhong nga pitlasi tweni nololien se jinibb nir, ko ololi kele nir aron ko pa, ko arivi jinibb sen. Ko armomsawos erres jikle, ko parlik vajin pipok pian pijpari tuwi ngok vini.

¹⁵ Ko Nem'in On kele ok-werai lilane nanu ngok nir tevi kerr. Womujnen owra

¹⁶ 'Ngel evi rijrijen nga belai tevi meri Isrel nir renga daron nga pia-vini. Bevisviseni nir renga nale nesereien suk, ko belngi lilane nale nesereien suk renga nolor.

¹⁷ Ko setemun mea-rrorrm'i nololien ser tevi sev nga marsij nga marok-loli.'

¹⁸ Daron nga Atua mitlasi tweni nololien se nir mirpok, sel san ejki kele mun nga jinibb purrorrmi nga parlai kele wor merrenien van ji Atua nga pilai tweni kele nololien ser, ejki.

Erres nga rrapruj mori Atua

¹⁹ Tasik ko jojik nir, suri drra Iesu Kristo ololi rramwokwok pa osuw, rramrongwose rrapan loloin ko vajin renga

lat nga muon lenglengen ngok, nga sete rrammetutu rragrrag.

²⁰ Iesu etasi pa sel nga mimerr san osuw. Sel ne mauren ngok elik rrerssi kalik nga tuwi murrul ore lat nga muon lenglengen ngok, niko evi nga mimij suri.

²¹ Ngok rramtor sweri vajin batu jinibb sulsulen nga murrres nga pok-metmet vajin jinibb se Atua nir.

²² Ko niko erres rrapini mori ji Atua, nga norrorrmien se kerr puwokwok ko nosurien se kerr

pitertter. Drra Iesu Kristo errawe vaseni nolo kerr arwokwok, ko nibe kerr kele arlalos pa renga nuwi nga muwokwok.

²³ Erres nga rraplingi norrorrmien se kerr puto pitertter renga Atua, suri ewretun rramrongwose rraposuri Atua nga ni puloli rijrijen sen nir pia-rremali.

²⁴ Ko erres nga rrapok-lai se lululweni kerr nga puloli rrapir nga rrapmerreni sele kerr nir renga murrun nga murrres pelak.

²⁵ Sete erres nga rraplingi kurtweni sel nga rramok-korti lat sansan, pirpe kerr sopor marloli pa musuw. Tetajer ko wor rrap-korti renga jiljilweren, puloli norrorrmien se kerr pivini pitertter kele wor. Suri daron nga Numal se kerr pia-wera sesesre lat nga puto suri tevi jinibb e nir oto mori pa.

Sete rrapok-loli kele nololien

²⁶ Ko poro kerr nga rramtor sweri nale weretunen pa osuw, rrapatur mera ko rrapok-loli kele nololien, ngok, sel san ejki rres mun nga rraprevji kele nanu san nga pilai tweni nololien se kerr.

²⁷ Sel sansan kobbong oto, nga rrapmetutu temijpal Atua rengen, evi nga putor vitrang'i kerr, ko rrapmetutu nabb ngok nga mitertter lenglengen nga Atua pusli devje nuval sen nir ren.

²⁸ Renge nale nesereien se Moses tuwi, poro jinibb san otor otvi nale nesereien nen san, ko jinibb eru rrek itul orwera nga ewretun m'ernen muloli, ko osuw ko, partor pini m'ernen ko suri.

²⁹ Poro parloli pipok renga jinibb nga mutor otvi nale nesereien se Moses, ko pipese renga jinibb nga mungasi natu Atua? Atua putor vitrang'i ni pilep suri. Erpe olokloksi drra nga muon renga sel nga mimerr nga muloli muwokwok pa renga no Atua, ko Atua pulolarsie pilep suri.

³⁰ Suri Atua ko owra 'Bekle lweni nanu nga misij nga marloli.' Ko owra kele 'Atua piwer sesesre lat nga puto suri tevi jinibb sen nir.'

³¹ Ngok evi nanu nga rrapmetutue pilep san, poro rrapwera rrapwolu asi ji Atua, ko Atua purrul totkoni kerr, ko pivrivrrali

kerr. Suri Atua emaur, ko derteren sen elep.

³² Erres ma kaprrorrmī nanu ngok nir nga kamok-lesir tuwi, daron nga moron se Atua mia-rremali ji kami. Ewretun kamrunge esij suri nanu elep nga marterter, ko nolo kami sete evitan.

³³ Daron sapon jinibb arij esij tevi kami rengo no jinibb nir, ko arloli esij kele tevi kami. Ko daron sapon jinibb arok-loli esij tevi kami sopor rengo no kami, ko kami sete kammetutu, kamtur eterter lat sansan.

³⁴ Kamkorti tevi nir nga marlik rengo naim ne nekaien rengo norongen nga mīsij ser; ko daron nga jinibb marlai luwe joro kami ko sete kamrunge esij suri, norormien se kami erres bbong, suri kamrongwose nga joro kami mīnij san oto metmet nga mīrres kele wor, nga sete mia-jijki nabong san.

³⁵ Ko kaprrul totkoni ko pa norormien se kami pīterter pīrpok, suri nowlin nga kapa-lesi elep nga elep temijpal.

³⁶ Ko kami kaploli nolo kami pipriv, ko kaploli nanu nga Atua mimrreni, puloli kaplai sev nga nale se Atua muwra kaplai.

³⁷ Ngok pīrpe nale san nga muto rengo Naul On nga muwra 'Beblen kele ma, ko si nga muwra pia-vini, pīrmali ko. Sete mia-lolola.

³⁸ Renge daron ngok, jinibb suk nga marmomsawos ko marosurik, para-maur. Ko poro nir san pīrieni lweni kele, ko Atua sete mia-ir rengen.'

³⁹ Ko kerr ngel sete rramivi jinibb nga rraprieni kerr ko rrapluwi van rrapjijki kele, ejki. Rramivi ma jinibb nga rramo-suri Atua, ko ni pia-lai mauren tevi kerr.

11

Jinibb nga mimrreni pivini ji Atua, nosurien sen puto wore ko

¹ Sev ko evi nosurien? Nosurien erpe nga rramongwose erres nga rraplai ko wor sev nga rramlingi nolo kerr renger. Ko nosurien erpe nga rramongwose erres suri nanu nga sete rramlesisir.

² Birterawareng se kerr ne tuwi nir arlingi nosurien ser eterter rengo Atua erpok, niko muloli Atua mīr suri nir.

³ Murrūn ne nosurien kobbong ololi rramlesi wose nga ewretun, nale se Atua kobbong ololi nanu jijle ne iel ngatan marremali. Atua sete emajing tevi nanu san, ko ololi ma nanu jijle arpelari nga lelingenok rramlesisir.

⁴ Ko erres nga rraprrorrmī kele van re bīrtera ne tuwi nir. Womunen, rraprrorrmī luwe Apel. Renge ni nosurien sen, ko ololi merrenien nga mīrres pīlak van ji

Atua, easi Ken. Ko suri Epel osuri Atua, ko niko Atua muloli mumomsawos. Atua eir rengo sulsulen se Epel. Ko Epel ngok emij pa, ko murrūn ne nosurien sen ngok oto malum nga pīlai norormien tevi kerr.

⁵ San kele evi bīrtera Inok. Elnge nosurien sen eterter rengo Atua; ko niben sete emij, ko Atua elai tweni ni iel ngatan van mare e nga setemun arlesi kele. Ko Naul On owra 'Daron nga Inok mīlik iel ngatan, ko evi jinibb nga mīrres', ko niko Atua mīr suri ko vitunen mīlai lweni van mare e.

⁶ Ko ewretun lenglengen nga poro nosurien sete puto rengo kerr, ko Atua sete mia-ir suri kerr. Si nga mimrreni pivini mori ji Atua ko purongwose Atua rengo mauren sen, puosuri ko wor pīterter nga ewretun Atua elik pa, ko puloli pīrres pīlak tevi nir nga marok-pej ni eterter.

⁷ Ko nir san kele evi bīrtera Noa. Evi nosurien kele ko nga Noa osuri sev nga Atua muwra womue, nga setewor jinibb san mīlesi. Ko emajing drav nga mīlep nga piwilwil se metka sen nir rengen. Ngok erpe Noa ewer lokloksi jinibb jijle nir nga marlik iel ngatan re daron nen, lat nga puto suri tevir. Ko Atua vajin owra nga Noa omomsawos erres suri nosurien sen ngok.

⁸ Ko evi nosurien ngok kele nga muto ji bīrtera Epram nga muloli daron nga Atua miveruse nga pian rengo vanu mīnij, ko evan. Atua ololi pa nale rijrijen tevi nga pia-lai lat nen tevi ni, ko Epram elinglingi sigen nga pian lat nen. Daron nga mīlinglingi sisen, ko setewor orongwose lat nen oto ngabe;

⁹ ko suri osuri Atua, niko ean, ko elik ren. Ko elik iok erpe jinibb neturvitān kobbong, ni nuru Aesak ko Jepok, nga Atua mīlai rijrijen ngok tevir. Nir sete armajing naim; armajing devji kobbong, arlik toto rer.

¹⁰ Epram elik erpok suri etriv tweni ngaim san nga Atua mīmajenge ko piasusture, nga puto tuwi ngok vini.

¹¹ Epram evi pa bīrtera, etra pīlak pa, setemun orongwos natun putose. Ko Sera kele eñer. Ko suri Epram osuri Atua, niko Atua elai bipi san tevi nuru nga Sera muwosi. Epram osuri rijrijen se Atua nga muloli tuwi, mian ko ermalai vajin.

¹² Ko suri nanu ngok, Epram nga mītra lenglengen ko otomori pīmij, ko metka sen ma nir nga vitunen elep nga elep temijpal erpe moju nga rengo melrin mare, ko erpe kele depānan nga ngalu.

¹³ Jinibb ngok nir arosuri Atua, ko mian ko armij, ko setemun arlai sev nga Atua mīrijrije pīlai tevir. Arlesi ma nanu ngok nir, ko erpe arto ngasu lengleng malune nir; ko arir ma nga marlesir. Ko arwera

tweni limjer nga arlik iel ngatan arirpe jinibb neturvitan kobbong. Iel ngatan sete evi siser mawos.

¹⁴ Ko daron nga jinibb marok-rij mirpok, oto limjer nga arok-pej lat kele san nga mivi siser mawos.

¹⁵ Ko norrorrmien ser sete oto renge lat nga marivel e vini. Poro parrormi ko rrek parluwi ko, ko ejki.

¹⁶ Nir ngok natun sansan bbölbööl. Renge iok ko, Atua sete emanere te nga nir marok-werai nga evi Atua ser, suri ololi pa ngaim ser san oto metmet osuw.

¹⁷ Ko rramlesi kele Epram nosurien sen re nanu san kele, ni le: Aesak evi m̄er nga Atua m̄irijrije p̄ilai tevi Epram. Ko elai pa tevi, nga mivi natun sansan bbölbööl. Ko daron nga vajin Atua owra purrowrrowe Epram, ko Epram emarong bbonge nga p̄ilai natun Aesak tevi Atua.

¹⁸ Atua owrai tweni womu pae tevi Epram owra 'Renge Aesak ngok, metka som pilep lenglengen nga parrul totkoni nisen.'

¹⁹ Epram orrorrmi mian ko owra "O, rreknga Atua puloli pimaaur luwi kele renge mijen", ko niko emarong nga putor pini pirpe nga Atua muwrai. Ko erpe pirpe otomori pirpok, nga Atua muloli mimaaur luwi re mijen, suri otomori jer Aesak pimij.

²⁰ Mian ko suri Aesak muosuri Atua, niko Atua erij erres suri natun nuru Jekop ko Esao nga nanu nga parres nir parremali ji nuru.

²¹ Ko Jekop osuri Atua, niko ololi daron nga mutomori pimij, ko emajil renge ne-jipip sen ko olot van ji Atua, ko erij erres suri mebbun nuru nga morivi natu Josep.

²² Ko Josep kele osuri Atua, niko ololi daron nga mutomori pimij e, ejilwer suri daron nga m̄eri Isrel nir parivel lingi Ijip. Ko owra tweni ngarre tevir nga para-wosi lweni niben.

²³ Ko suri nosurien nga tata ko tasu se Moses morosuri Atua rengen, niko daron nga Moses m̄iak e, ko morsilveni mian mijpari navöl itul m̄iasi. Orlesi nga mivi bipi nga m̄irres p̄elak, ko sete ormetutu nga portor otvi nale se Pero, batu numal ne Ijip.

²⁴ Ko suri Moses kele osuri Atua, niko ololi daron nga milep vajin ko sete emrreni jinibb parok-wera ni evi mebbu Pero ko tasu sen e Pero natun nesevin.

²⁵ Orrrorrmi erres nga pian pukorti tevi jinibb se Atua nir nga marunge m̄isij, easi nga pukorti tevi nir nga marok-loli nololien nga neiren nen puto beblen kobbong, pian ko pijijki.

²⁶ Ko owrai, poro parmen kerajik suri Mesaea nga Atua pia-koni vini, ko sete inu

mea-manune. Bea-runge p̄irres kele ma p̄iasi nga nurongwos bornge renge nijor nir nga marres ne Ijip. Ko elngi meten oto eterter renge nowlin nga pia-tor sweri vitu.

²⁷ Ko suri Moses osuri Atua, ololi sete emtutu numal Pero nga mulolarsi, ko evel lingi Ijip. Ewretun jinibb sete orongwos p̄ilesi Atua, ko Moses evijuri ma sel nga Atua muwra pivijuri, etajer erpe m̄ilesi meten e, ko omusus p̄irieni lweni.

²⁸ Renge nosurien sen tevi Atua, ololi etipatun renge murrun ne nanen ne asien. Owrai tevi m̄eri Isrel nir nga parpertenri drra sipsip nir renge metali ne naim ser. Parloli pirpok nga anglo nga Atua mukoni vini nga p̄irevji m̄eri Ijip natur norman nga womunen nir, sete p̄irevji natu m̄eri Isrel nir.

²⁹ Ko suri m̄eri Isrel kele nir arosuri Atua, ololi dis ngok nga marwera dis nga musongsong emes evi dan, ko arivel otvi vajin. Ko daron nga m̄eri Ijip nir marini vajin nga paroji surir, ko dis devjen korti orlulngoni lweni vini, ko orwoj orer.

³⁰ Ko evi nosurien kobbong nga muloli nawot nga milep nga ngaim nga Jeriko mivitan daron nga m̄eri Isrel nir marivel rrale vabut.

³¹ Ko Reap evi nesevin ne sel san, ko suri nosurien sen kobbong, ololi m̄eri Isrel ngok nuru morini re naim sen. Iok ololi m̄eri Isrel nir sete arevji nesevin nen daron nga marevji jinibb ne ie nir nga sete marosuri Atua.

³² Ko sete inu mea-tajer. Sete daron oto nga ßejilwure nale se Kition, Barak, Samson, Jepta, Devet, Samuel ko propet kele nir.

³³ Ko suri arosuri Atua, ololi armajinge nanu elep. Lartul ngok nir artekai m̄eri Isrel nir aran arval tevi m̄eri m̄inij nir, mian ko arevji: Arloli murrun nga mumom-sawos, ko arlai nanu nga Atua m̄irijrije nga p̄ilai tevir. Daron sopen artur ore nanu rrum ngok laeon nga sete orongwos p̄iajir.

³⁴ Daron sopen arvisi pini nabb nga m̄in temijpal, ko daron sopen arwolu asi renge jinibb nga marwera parevji renge nesip ne nuval. Nir ngok derteren ser ejkie, ko Atua elai derteren tevir nga muloli marterter nga marevji jinibb nuval ne vanu m̄inij nir.

³⁵ Ko nesevin sopor arosuri Atua, ko Atua ololi natur nir armaur luwi kele renge mijen. Ko nir sopor, devje nuval ser arrul totonir, ko artorrlair, ko arwerai tevir 'Poro nga kaplingi kurtweni nosurien se kami renge Atua, ko ngok orongwos kapiel sisarow.' Ko armusus, suri arrorrmii eterter nga Atua puloli nir para-maur luwi

kele reнге mauren san nga m̄irres kele wor.

³⁶ Jinibb sopor nga marosuri Atua, arokmen keraji lokloksir ko arvirralir. Ko nir sopor, arkai totkonir ko arlingir van reнге naim ne nekaien.

³⁷ Nir sopor, artuw pinpinir. Nir sopor, arvarre otvir, morrlor eru e, armij. Nir sopor, arsari pinir e nesip nuval. Ko nir sopor kele nen arivel nawon erpok, ko aruri sunsun nga marsij bbong nga marloli reнге nevlul sipsip tevi nevlul nanani. Joror ejkie, ko jinibb arojir ko arloli esij tevir.

³⁸ Nir arivi jinibb nga marres p̄elak, ko iel ngatan sete erres evtere nir. Arivel sarsarr van reнге lolo merwer e nir, ko reнге botwen e nir, ko armatur reнге nolo ßereng ko reнге lolo bbulwil ne dan nir.

³⁹ Suri nosurien ser nga marosuri Atua rengen, elai nais nga m̄irres tevir arwajie nga sete orongwos pijijiki nabong sapon.

Ko setewor arlai sev nga Atua m̄irrijie tevir nga p̄ilai tevir.

⁴⁰ Suri Atua ololi pa norrorrmien sen san oto metmet kele osuw se kerr, nga m̄irres asi. Reнге norrorrmien sen ngok, emrreni pukortoni nir tevi kerr nga rrapivi sansane ko rrapmomsawos p̄irres.

12

Atua Tata se kerr

¹ Ko delung elep nga marlik rrale kerr, ko marok-meteni kerr. Niko rraplingi kurtweni nanu nga marok-to ore kerr ko nololien nga marrul totkoni kerr, ko rraploli norrorrmien se kerr p̄iterter nga rrapwolu reнге sel nga muto reнге no kerr.

² Ko tetajer rrapok-meteni Iesu. Nosurien se kerr arto p̄et̄peti reнге ni, etipatun reнге bongsin, ko ean osuwsuw reнге bongsin. Daron nga m̄ilngi non mawos nai pelaot nga pimij ren, sete elngi tweni sel sen, ejki. Reнге iok, orongwose nga neiren nga milep san oto metmet terai, ololi setemun orrorrmi nai pelaot nga mivi manunen nga milep, ko emawose ko pa van. Ko lelingen esakel vajin tevi Atua reнге nevren rres reнге nai seksakel sen reнге melrin.

³ Erres nga kaprorrmi wor daron nga martarter nga Iesu moklesir, nga jinibb nga marsij martur imare ko marungasi ni milep. Ko ngok puloli nosurien se kami puto p̄iterter nga sete kaplingi kurtweni.

⁴ Ko reнге balpalen nga kamok-tur tere nololien nga marini nir, setewor kami san emij esre.

⁵ Rrek kammali pae nale ngok nga pususi norrorrmien se kami van mare, nga muto reнге Naul On, nga Atua m̄irije tevi kami

mirpe natun mawos nir, muwra 'Natuk, inu nuvi Numal; ko daron nga m̄evrrali nik, kuprongwose nga nuvisisenim ko. Ko daron nga m̄erij m̄iterter tevim, ko sete nolom p̄isij nga norrorrmien seto pivitan.

⁶ Nuvi Numal Atua, ko norongwose bololi lilane nir nga memrreni lenglengen nir, ko ßete nir nga meveruse marivi natuk.'

⁷ Ko nanu totoklai nga marloli rramrunge m̄isij reнге nibe kerr ngok arirpe Atua mokete kerr. Murrun nga Atua muloli tevi kerr ngok eviseni nga rramivi natun. Setewor bipi san elik nawon nga tata sen sete erij tevi, rreknga evrrali.

⁸ Ko poro Atua sete pok-loli murrun ngok nir tevi kami pirpe nga mok-loli tevi natun jijle nir, ko ngok eviseni nga sete kamivi natun, ko kamivi bipi ne sel kobbong nir.

⁹ Reнге murrun se kerr jinibb, tata se kerr arvirrali kerr, ko rramosuri bbong nir. Ko erpese reнге tata se kerr nga m̄ilik reнге melrin? Rraposuri ko wor p̄iasi tata se kerr ne iel ngatan, puloli rraplai mauren e.

¹⁰ Daron nga tata se kerr marvirrali kerr, ko arvirrali kerr beblen kobbong, re norongwosien beblen nga muto jir. Ko Atua okvirrali kerr nga puloli lilane kerr nga rrapon p̄irres.

¹¹ Rramrongwose pae nga poro Atua pivrrali jinibb san, ko m̄ernen purnge p̄isij. Ko vitunen, nir nga Atua mivrralir nga puloli parmomsawos arongwos parlesi wenen nga m̄irres; parlesi mauren nga mumolmol ko mumomsawos m̄irres reнге no Atua.

¹² Ko iok, kapsusi nevre kami nga marnimij van mare, ko kaploli bau ßela kami nga marok-n̄imarring parini parterter luwi kele.

¹³ Kapok-ivel suri bbong sel nga m̄irres, ko poro bau ßela kami p̄isij, ko orongwose pivini p̄irres luwi kele kobbong.

Kapmetmet p̄irres

¹⁴ Kapkorti ko wor tevi jinibb nir reнге mauren nga mumolmol m̄irres. Tetajer kaploli mauren se kami puon p̄irres; poro pijki ko sete kama-lesi Numal se kerr nabong san.

¹⁵ Kapmetmet p̄irres nga kami san tirieni lweni ko tian ngasu reнге Atua ngok nga mok-wilwil se kerr reнге nalol sen nga m̄irres. Kapmetmet nga sete kami san pirpe duru nai ngok nga raon mimelme, ko daron nga jinibb marurroi ko armesi e, ko olokloksi delung elep.

¹⁶ Ko kapmetmet p̄irres nga sete kami san pirpe Esao, nga mauren sen sete omomsawos nga sete orongwose purrorrmi kele Atua. Suri ni evi m̄erwomu,

ko joron nga moro p̄ilai erpe m̄erwomu, ko ekle lweni nir p̄etp̄eti e nanen sansan bbong.

¹⁷ Ko vitunen, erpe kamrongwos pae, ko orrorrmi lweni nanu ngok nir; mian ko owra p̄irieni lweni kele, ko ejki mun. Otor jabble pa. Ko eting lenglengen vajin. Murrun nga muloli womue oto ore sel sen.

Sel nga m̄itra ko sel nga mimerr

¹⁸ Nanu nga kamini renger ngel sete erpe nanu nga m̄eri Isrel nir maran renger tuwi, ko sete arirpe nanu ne iel ngatan nga kamrongwose kaprunge nir renge nibe kami. Meri Isrel ngok nir aran renge botwen ngok nga marveruse Sinae. Iok, nabb okin rengen, ko nat kele emalik elep ko emalik ore nanu jikle nir; ko ling kele owuw elep.

¹⁹ Ko renge iok, davö nga milep san eting, ko m̄eri Isrel nir arunge nga Atua okraj tevir. Daron nga marunge drrelan, ko arungoni eterter, arwera setemun armerreni parunge nale ngok kele.

²⁰ Suri aririr elep daron nga marunge nale ngok nga muwra 'Poro jinibb san rrek nanu rrum san pijpari botwen ngok, ko kami kaptuwe pini ko wor.'

²¹ Daron nga Moses m̄ilesi nanu ngok nir, ko ni kele ornge esij elep, mian ko owra 'Inu nuririr ko numtutu elep suri.'

²² Ko kami kamjiekie nanu ngok nir: Suri kamini renge botwen ngok nga marveruse Saeon nga mivi ngaim nga milep se Atua nga mimaur. Ngok Jerusalem nga mimerr nga muto mare renge melrin, nga anglo elep nga elep arlik ren ko arir tetajer.

²³ Ko kamini re gortien se jinibb se Atua nga marirpe m̄erwomu se Atua nir nga marir tetajer, ko nga niser marto pa renge melrin musuw. Kamini ji Atua, nga p̄iwer sesesre lat nga puto suri tevi jinibb jikle, ko kamini ji nem̄i jinibb nir nga Atua mulolir marmomsawos m̄irres.

²⁴ Kamini ji Iesu nga ni evi jinibb nga musture sel nga mimerr ngok se Atua, nga drran puloli kapwokwok, erpe owrai tweni nanu nga m̄irres kele wor easi nanu nga drra Epel muwrai.

²⁵ Ko ngok, kapmetmet nga sete kapisir dure kami tevi si nga mokrij tevi kami ngok. Nir nga tuwi nga marmusus parunge drrela si nga muwrai tweni nale ngok vini iel ngatan sete mara-wolu asi. Ko poro kerr sete rraprunge nale ngok se Atua nga mivle renge melrin vini nga puwni kerr; ko rrapasi p̄irpese ko?

²⁶ Tuwi pa Atua ololi dan eririr. Ko lelingenok elai vajin nale rijrijen sen tevi kerr owra 'Bololi iel ngatan p̄iririr kele pivesan. Ko sete dan kis ko tevi melrin kele, nuru korti p̄iririr.'

²⁷ Nale ngok nga Atua muwrai nga muwra 'Vesan kele wor', eviseni erres nga Atua ospe suri nanu jikle nga m̄ilngi iel ngatan. Ni puloli nanu jikle ngok paririr; ko p̄ila twenir vajin. Ko sev nga sete marongwose paririr parjipon jer.

²⁸ Ko renge iok, erres nga rrapwera erres temijpal wor tevi Atua nga mivi Numal se kerr ko miverus kerr rramini re batun vanu san nga sete orngwos p̄iririr. Erres nga rrapurövi ni renge murrin nga p̄ir rengen, ko rraptori ni puon ko rrapmetutu wore ko.

²⁹ Suri ewretun, Atua se kerr osorsan tevi merre nabb nga muroror lenglengen san nga murongwose pusli nanu totoklai nir pianan ko parjijki p̄etp̄eti.

13

Murrun momsawos se Kalesia

¹ Kami kapmermerreni ko wor kami pirpe kamivi niaken woswos.

² Ko kapok-metmet tetajer nga kaptekai neturvitan vini re naim se kami. Kamrongwose nga jinibb sopor ne tuwi arloli murrin ngok, ko vitunen vajin artaol nga marteka anglo vini lololim re naim ser.

³ Kaprrorrm̄i nir nga marlik renge naim ne nekaien pirpe nga kami kamlik tevir renge naim ne nekaien. Ko kaprrorrm̄i nir nga marunge m̄isij renge niber pirpe nga kami kele kamrunge esij tevir.

⁴ Totkoien evi nanu san nga kaprrorrm̄i pilep suri. Norman p̄ilik tevi ko wor nesen sen mawos, ko nesevin p̄ilik tevi ko wor diwen sen mawos. Atua pivrrali norman m̄elakel nga mututur nawon malum, ko nesen m̄elakel nga mututur nawon malum, poro pormatur kokorti. Ko pivrrali kele norman nga mimatur tevi nesevin nga sete mivi nesen sen, ko pivrrali kele nesevin nga mimatur tevi norman nga sete mivi diwen sen.

⁵ Sete erres nga kaploli murrin nga kapmerreni p̄elake nevöt. Poro joro kami pilep rreknga joro kami puwelili, ko kaprunge p̄irres ko wor, suri Atua owrai pa osuw owra 'Sete mea-linglingim kumasan, ko sete mea-linglingim nabong san.'

⁶ Ko erpok, rramrongwose rraploli norrorrm̄ien se kerr p̄iterter nga rrapwera 'Sete mea-metutu, suri Numal Atua okwilwil se inu. Ko si vajin orngwos pulokloksik?'

⁷ Ko sete kapmalie nir ngok nga tuwi nga marwowomue kami, nga marlai nale se Atua vini ji kami. Kaprrorrm̄i ta murrin ser, mauren ser, ko mijen ser erpese, ko kapvijuri vajin murrin ne nosurien ser.

⁸ Iesu Kristo sete orngwose p̄irieni kele. Osorsan rres kobbong. Murrin

osorsan kobbong, etipatun tuwi pa, evini epari lelingenok, ko pianan sete orongwose pusuw nabong sopon.

⁹ Ko sete kaploli nale ne murrun lele parini parevni tweni kami rengo murrun nga mumomsawos. Rrapkulu ko wor van ji Atua nga piwilwil se kerr rengo nalol nga mürres sen, puloli rrapterter. Ko sete erres nga rrapvijuri nale se nir nga marokvile nanen sapor. Murru sel ngok nir sete arwilwil rragrrag se jinibb nga marvijurir, ejki.

¹⁰ Lat ne sulsulen se kerr oto, ko jinibb sulsulen se mieri Isrel nga marok-loli majingen ser rengo Naim On ser sete arongwose parla nanen ser rengo lat ne sulsulen se kerr.

¹¹ Ko batu jinibb sulsulen, daron nga mirevji nanu rrum ko elai drran van lat nga muon lenglengen, ko elai van ji Atua nga pilai tweni nololien se jinibb nir. Ko vitunen arlai nibe nanu rrum ngok nir van, arwirrer vare re ngaim ko arsulir.

¹² Ko rengo iok, Iesu keke eivare rengo ngaim ngok, ko ornge esij lenglengen rengo niben. Ko suri mijen sen ko drran nga murongwose puloli jinibb parwokwok rengo nololien ser, ko orongwose parini partur vajin rengo no Atua.

¹³ Ko kerr keke, rraploli ko wor piprok nga rrapan rrapkorti tevi ni vare re ngaim, ko rrapir kobbong daron nga jinibb parungasi kerr.

¹⁴ Renge iel ngatan, ngaim woswos se kerr san ejki nga putu tetajer. Ejki rres. Rramok-pej ngaim woswos se kerr nga piarremali daron sapor.

¹⁵ Renge iok, kerr rrapkorti ko wor tevi Iesu ngok nga tetajer rrapsumsi nise Atua van mare. Murrun nga mirpok erpe nga rramok-revji nanu rrum nga rramlai tevi. Suri tetajer daron nga rramok-werai tweni tevi jinibb nir nga Iesu evi Numal, iok erpe nga rramlai merrenien tevi Atua.

¹⁶ Ko kaploli murrun nga marres nir ko kapok-wilwil lululweni se kami tetajer, suri murrun ngok nir keke arirpe nga keke kamok-revji nanu rrum nir nga kaplai tevi Atua, nga ni mür lenglengen ren.

¹⁷ Kaposuri ko wor nir nga marokwomue kami, ko marivi burtur se kami, ko kaposuri nale ser. Nir erpe aroketmete mauren ne kalesia se kami ko, nga sete marongwos parmosi. Ko nir parwerai tweni ko wor tevi Atua erpese nga martori majingen ngok. Poro kaposurir, ko nir parir nga parloli majingen ser pürres. Ko poro sete kaposurir, ko sete mara-ir re majingen ser, ko murrun ngok sete mia-wilwil rragrrag se kami.

¹⁸ Ko kami kapok-tajer ko wor nga kaplot suri kem. Sete namrunge erpe norror-

rmien se kem erpe pürir lokloksi kem, ko namrunge bbong erres, suri nammerreni nga tetajer nabloli pürres kobbong.

¹⁹ Re iok ko ololi numrreni lenglengen wor nga kaplot van ji Atua ko kapngoni tevi pürterter keke wor nga inu borongwos bea-luwi keke vinuk ji kami pingavil.

Bongsi nale

²⁰⁻²¹ Ngel evi loten suk, nga Atua nga mivi batu demat pilai nanu jikle nga nevre kami mumrrol ren tevi kami, puloli kapviter nga kapmajing sev nga mimrreni. Iesu nga mivi Numal se kerr emij ko drran eseser nga pususture sel ngok se Atua nga sete mia-vitan nabong sapor. Ko Atua ololi emaur luwi rengo mijen. Ko suri drran nga mürseser, Atua ololi evi jinibb nga mürasi jer nga pimmetete sipsip sen nir. Ko ngel evi loten suk, nga Atua puloli kerr nga rramkorti tevi Iesu Kristo, rraploli pirpe nga ni mimrreni. Ko rrapsumsi nise Kristo pian mare keke wor pijpari tuwi ngok vini. Piprok ko.

²² Tasik ko jojik nir, kaploli norrorrmien se kami pipriv, ko kapmurronge nale suk nir pürres. Nale ngok arivi nga parjile norrorrmien se kami, ko naul nga moli ngel sete epriv pelak.

²³ Ko numrreni bowrai tevi kami nga tasi kerr ngok Timoti, arlai tweni pa rengo naim ne nekaien. Ko poro piplari pingavil, ko pia-pitevi suri inu re daron nga beavinuk belesi kami e.

²⁴ Kapwera erres suk tevi nir nga marivi burtur se kami, ko tevi keke kalesia jikle nir re sise kami. Ko kalesia nir ne Itali nir arwera erres keke tevi kami.

²⁵ Ngel evi loten suk, nga nalol nga mürres se Atua pipitevi kami jikle.

Naul nga JEMES Muli Batu nale nga mivsvseni lut nga parmteni naul ngel puto suri

Rrek Jemes nga muli naul ngel evi Jemes nga tasi Iesu, nga mivi m̄erwomu se kalesia nir Jerusalem (Majingen se Aposol nir 15:13, 21:18). Jemes oli naul ngel van ji kalesia p̄etp̄eti nir nga marlik sarsarr renge vanu nir nga batu numal se m̄eri Rom mutorir. Ko owra suri lat nga parlik puto suri.

Jemes owra, poro rraposuri, ko rraploli ko wor nanu sopor suri, sete rrapmatur tevi. Ko ospe nanu elep nga m̄ilesi m̄irres nga rraplolir. Ko owra, poro jorom ejkie, sete nolom pivitan. Sete kuplolar pingavil. Kuprres tevi jinibb nir. Kupmetmete nemem. Kupmarong nga kuploli sev nga Atua mimrreni, ko kuptur tere Demij. Sete kuprij melmelas suri sev nga kuwra kuploli. Poro jorom pilep, ko kupwilwil se nir nga joror mijkie. Nolom pipriv, nolom p̄irres.

Nale womujnen

¹ Inu Jemes, nuvi jinibb ne majingen se Atua ko se Iesu Kristo Numal se kerr. Nuwrai erres tevi kami, metka esngavöl drromon eru (12) ne m̄eri Isrel, nga kamlik sisamis iel ngatan.

Nosurien ko norongwosien

² Tasik ko jojik nir, daron nga nanu lele parini parrowrowe kami, sete kaplai pirpe nanu nga kaprunge p̄isij suri. Ejki, kap̄ir temijpal ko wor suri.

³ Erpe kami kamrongwos pae, daron nga nosurien se kami m̄iterter renge nanu nir nga marrowrowe kami, kamrongwose kapterter kele wor nga kaptur pipriv.

⁴ Kaptur p̄iterter ko wor tetajer. Ko ngok puloli kapa-ivi jinibb nga marmomsawos jile m̄irres, ko norrorrmien tera puto vajin p̄irres re mauren se kami, ko murrin jijle nga marres arto pa re mauren se kami.

⁵ Ko poro norongwosien pijki ji kami san, ni pungoni ko wor tevi Atua; ko Atua p̄ilai norongwosien tevi ni, suri nolo Atua nga m̄irres p̄elak oklai nawone wor nanu tevi jinibb totoklai, nga sete nolon p̄isij kele suri.

⁶ Ko daron nga kamngoni e, nosurien se kami pivi weretunen ko wor, sete piwelili. Suri jinibb nga norrorrmien sen miwelili

erpe dis kobbong; suri daron nga ling muwuwi, ko owlu karkar.

⁷⁻⁸ Jinibb si nga nolon mieru e mirpok, norrorrmien sen owluwlu, ko sete erres ni purrorrmi nga ni orongwose p̄ilai nanu san ji Atua, ejki.

Jinibb nga joror milep ko jinibb nga joror miwelili

⁹ Kalesia si nga joron miwelili sete purnge p̄isij suri. Ejki, p̄ir ko wor, suri Atua osusture ni.

¹⁰ Ko kalesia nga joron milep sete pukowkowri suri joron, ejki. Poro Atua p̄ilngi ni ngatan, ko ni pukowkowri kobbong. Suri jinibb nga joron milep erpe nevngu vava kobbong.

¹¹ Daron nga nial mivini mare nga mututun milep, p̄isne nevngun ngok nir parmeli ko parvitan, ko nulser nga marres p̄elak ngok parjijki. Ko pusorsan kele renge murrin ngok, daron nga jinibb nga joron milep ngok mokp̄elak nga joron pilep kele wor, ni pia-jijki suri.

Nanu nir nga marok-rrorwowe jinibb

¹² Jinibb nga mutur m̄iterter renge daron nga nanu nir marrowrowe purnge p̄irres ko wor. Suri daron nga m̄iasie nanu ngok nir, ko Atua pia-lai nowlin tevi vajin, nga mivi mauren nga m̄irres. Ngok evi nowlin nga muwrai pa musuw nga pia-lai tevi nir nga marmerrreni ni milep.

¹³ Poro jinibb san p̄ilesi nanu san purrowrowe ni, ko ni sete puwrai piprel "O, Atua ko orrowrowe inu." Ejki, suri nanu nga m̄isij sete orongwos purrowrowe Atua, ko Atua sete orongwos purrowrowe jinibb san nga puloli nololien nga m̄isij.

¹⁴ Ko nanu nir arngwos parrowrowe jinibb daron nga ni sete mivijuri Atua ko mivijuri lweni sev nga ni lweni mimrreni, ko nanu nga marsij markerkerasi ko marevei tweni.

¹⁵ Ko norrorrmien nga marsij ngok arvesi nololien, ko nololien, daron nga milep vajin, ko ewesi mijen.

¹⁶ Tasik ko jojik nir, numrreni kami elep. Sete kaploli jinibb parkerkerasi kami, ko kaprongwose p̄irres

¹⁷ nga nanu jijle nga marres ko merrenien jijle nga marres lenglengen arpelari mare ji Atua ko wor nga m̄ilngi moron re melrin, mian ko mara-vini ji kerr. Murru Atua sete orongwos p̄irreni, ko sete orongwos p̄ilik telure kerr ko p̄ilinglingi kerr renge nemalik.

¹⁸ Suri Atua emarong, niko m̄ilai nale weretunen sen tevi kerr nga rrapivi natun. Ko renge nanu jijle nga m̄imajinge ko m̄ilngi iel ngatan, kerr rramivi batbatun.

Kaprunge ko kaploli ko wor nale se Atua

¹⁹ Tasik ko jojik nir, numrreni kami elep. Kapmurrong p̄irres. Kami jijle, lolaren se kami sete pingavilvil p̄elak, ko rijen se kami kele sete pingavilvil, ko kapsaro ma pingavilvil nga kapmurrong.

²⁰ Suri murru jinibb nga mulolar sete orongwose puloli murrun nga mumom-sawos nga Atua mimrreni p̄irrmali.

²¹ Niko, kaplai tweni ko wor murrun jijle nga marrokkitkit ko murrun nga marsij nga marmaur wor milep re nolo kami, ko kaploli wor norrorrmien se kami pian ngatan. Ko kapmarong nga Atua purwi nale sen re nolo kami, nga puloli kapmaur.

²² Ko sete kapkerkerasi lweni kami nga kaprunge nawon bhonge nale se Atua ko sete kamloli. Kaploli wor nale nga naul ngok muwrai ko.

²³ Jinibb nga mumurronge nale ngok ko sete mokloli nanu nga nale ngok muwrai, osorsan tevi jinibb nga mokmeteni non renge natung.

²⁴ ko daron nga mivel lingi, setemun orongwose nga non erpese.

²⁵ Ko nale neseseieren ngok emawos jijle, ko orongwose puloli jinibb pivel sisarow. Ko m̄er nga mokmeteni lilane nale nen, ko mokmurronge m̄irres, sete ornge nawone, ejki, okloli ko wor. Ko morok ko ma, Atua puloli purnge p̄irres re sev nga muloli ngok.

²⁶ Poro jinibb san owrai nga ni okosuri Atua erres, ko sete otor metmet lilane nemen, morok rrek okkerkerasi lweni kobbong, ko murrun nga mokosuri Atua rengen evi nanu nawon kobbong.

²⁷ Murru sel nga rraposuri Atua Tata, nga m̄ilesi muwokwok m̄irres ko musorsan m̄irres, erpel: kerr pivivel ko wor ji bipiwarreng nga marivi melus, ko ji nesevin nga diwen ser marmij lingir, ko piwilwil se nir renge sev nga nevrer murrrol rer. Ko rraprrul totkoni mauren se kerr puwokwok, nga murrun nga m̄isij ne iel ngatan sete pulokloksi.

2

Sete kapmeteni nir nga joror muwelili parirpe nanu nawon

¹ Tasik ko jojik nir, kamosuri pa Numal se kerr nga mivi Numal ne nosrövien. Ko niko sete kaploli murrun nga kamtori jinibb nga joror milep nir, ko nga kamokmeteni jinibb nga joror muwelili nir arirpe nanu nawon kobbong.

² Ko niko, poro jinibb pieru porini loloiem re naim loten se kami, tuwen nga mujokjok m̄irres ko m̄ilngi nasum nga mivi gol renge bbös nevrer, ko tuwen nga joron

marmerrerrerr, ko esij poro norrorrmien se kami pieru e re laru ngok nuru.

³ Sete erres nga kaposuri m̄er nga mujokjok m̄irres ngok, ko kaprormi p̄isij suri m̄er nga joron m̄isij ngok. Sete osorsan nga kaplai m̄erwomu van lat nga m̄irres p̄elak ngok, ko kapwera "Numal, ngel evi lat nga nik, kupini kupsakel rengen", ko tevi m̄erwitu nen, kapwera "Kuptur pa iok ko!", rreknga "O, ejki, rrek kupini ma kuplik iel ngatan".

⁴ Daron nga kamok-loli mirpok, ko kamok-teri wukari vajin kalesia se kami evi meling eru e, ko kamok-wer lokloksi jinibb renge norrorrmien nga setete mumomsawos m̄irres.

⁵ Tasik ko jojik nir, numrreni kami elep. Kapmurrong p̄irres. Jinibb nga joror muwelili renge iel ngatan, Atua otobtobue tweni nir nga parimare parwun saut renge nosurien. Ko elai derteren tevi nir ngok nga paran loloiem renge batun vanu sen, erpe nga muwrai pa tevi jinibb nga marmerrreni ni milep.

⁶ Ko kami ma kamok-meteni beres nir nir arirpe nanu nawon kobbong. Weta, ko jinibb si nga marok-lokloksi kami, ko marok-lai kami van re nosp̄en se numal nir? Ngok sete jinibb nir nga joror muwelili, ko jinibb nga joror milep kobbong.

⁷ Ko nir kele kobbong marok-rij m̄isij tere nais nga m̄irres ngok nga Atua muloli kamwajie, nga jinibb nir parveruse kami 'Jinibb se Kristo'.

⁸ Renge Naul On, nale neseseieren san oto nga mivi batu nale neseseieren m̄inij kele se Atua, nga muwra 'Kupmerreni ko wor selem nir, kuploli p̄irres ko wor tevir pirpe nik komok-loli lweni m̄irres tevi nik.' Poro kapok-vijuri nale neseseieren ngok, ko kamok-vijuri sel nga musorsan ko.

⁹ Ko poro kapok-osuri jinibb nga joror milep ko kapok-meteni jinibb nir nga joror muwelili parirpe nanu nawon kobbong, ko ngok kami kamok-loli nololien ko, ko nale neseseieren se Atua puwrai nga kamivi jinibb nga kamok-tor otvi nale neseseieren.

¹⁰ Suri jinibb nga putor otvi nale sansan kobbong re nale neseseieren ngok ololi nololien, osorsan erpe nga poro putor otvi nale totoklai ren.

¹¹ Suri Atua nga muwra 'Sete kapvenae nesevin', Atua nen kele kobbong muwra 'Sete kaprevji pini jinibb'. Poro sete kapvenae nesevin ko kaprevji pini ma jinibb, kamivi ko wor jinibb nga kamtor otvi nale neseseieren.

¹² Renge nabong nga Atua pia-wer sesesre lat nga puto suri tevi jinibb nir, ko ni puloli kami kapa-asi kobbong. Ko niko

lelingenok kami kaploli murru kami ñirres ñetpeti.

¹³ Suri daron nga Atua pia-wer sesesre lat nga puto suri tevi ñer nga sete mokrorrmi jinibb, ni kele sete orongwose purrorrmi ñernen. Ko jinibb nga ma mokrorrmi jinibb, Atua sete mia-wer lokloksi ni.

Nosurien ko majingen

¹⁴ Tasik ko jojik nir, poro jinibb san pokwera okosuri Kristo, ko sete okloli majingen nga ñirres san suri, ni ñia-lesi sev ko ñirres rengen? Nosurien nga mirpok sete orongwose ñilai ni van re mauren nga ñirres.

¹⁵ Poro tasi kerr rrek joji kerr sopor sunsun ko nanen ser pijkie,

¹⁶ ko kerr san sete mia-van mia-lai ser, erpese ko? Ko poro kerr san puwrai tevi nir "Atua ñirij ñirres suri kami. Kapluwi van, kaplutun ko kapaan ñirres", ko sete ñilai sunsun rrek nanen tevir, ko iok sete ewilwil ser rragrag. Nale ngok evi nanu nawon kobbong.

¹⁷ Ko nosurien se kerr erpok: poro pisan bbong putur, ko majingen nga ñirres san sete putur tevi, ko ngok erpe emij jile ko pa osuw.

¹⁸ Ko poro nik kupwera, "Morok nosurien sen otoa, ko ñerak ma okloli majingen nga marres", ko inu bowra lweni tevim, "Eterter wor nga nosurien putoe renge jinibb san poro nga majingen sen ejkie. Suri majingen sen ko wor eviseni nga nosurien sen mutoe."

¹⁹ Nik kuosuri nga Atua esan kobbong otur? Erres, ko demij kele arosuri erpok, ko aririr elep suri!

²⁰ Jinibb nga muosuri ko sete mokloli majingen nga marres, nosurien sen ngok evi nanu nawon kobbong. Jinibb lenglengen, kumrreni beviseni nanu ngok tevim?

²¹ Erres, ko kuprorrmi ta firtera ngok se kerr Epram. Atua ololi evi jinibb momsawos renge non suri sev? Suri majingen sen kobbong, nga ñilai natun Aesak ko ñikai totkoni renge nawot nga pivi sulsulen van ji Atua.

²² Kuplesi, nosurien sen ko majingen sen orto korti erres, ko niko muloli nga nosurien sen ñirres jikle vajin.

²³ Ko nanu ngok ololi nale nga muto renge nale on ermali, nga muwra 'Epram osuri Atua, ko suri muosuri Atua, Atua ololi ni evi jinibb mawos renge non'. Ko jinibb arok-veruse ni 'Sele Atua'.

²⁴ Kaplesi ta suri: Atua ololi jinibb evi jinibb mawos renge non suri majingen sen, sete erpe nosurien sen kis kobbong.

²⁵ Ko osorsan kobbong tevi nesevin san ne sel nga tuwi ngok, Reap. Atua ololi evi

nesevin nga mimawos renge non suri sev? Suri emetmete ñeri Isrel ngok nuru erres, nga morini silveni porlesi wose Jeriko. Ko ni etkai nuru oran ortepeti renge naim sen, mian ko vitunen okoni tweni nuru orluwi van sise nuru e renge sel ñinij, nga ñeri Jeriko nir sete parrul re nuru.

²⁶ Niben nga ñerñin mijki ren sete mia-maur, pimij ko wor. Ko osorsan kele, nosurien nga majingen nga marres sete marpitevi, ni sete mia-maur, pimij kele ko wor.

3

Neme kerr

¹ Tasik ko jojik nir. Sete erres re kami pilep kapivi jinibb nevisvisenien se kalesia nir. Kaprongwose ko wor daron nga Atua pia-wer sesesre lat nga puto suri tevi kem jinibb nevisvisenien, ni pia-loli ñiterter kele wor tevi kem, ñiasi murrun nga pialoli daron nga pia-wer sesesre lat nga puto suri tevi jinibb ñinije nir.

² Daron elep nga kerr jikle rramok-loli esij. Jinibb nga sete mutur jabble nanu san renge nale sen evi jinibb san nga mimawos jile mirres, ko orongwose putor ore nanu nga marsij nga marivi neblaot van re mauren sen totoklai.

³ Rramok-lingi bebje delrurr nga welili van renge jingo os nga puloli puosuri kerr, ko orongwose rraploli pian lat nga rrammerreni pian e.

⁴ Ko kaprorrmi ta drrav nga marlelep nga niwos ner marwelili jer kobbong. Ko daron nga ling nga milep ñilai, jinibb nga mutori niwos ngok orongwose puloli ko wor pian lat nga mirreni pian e.

⁵ Ko neme kerr erpok ko. Evi nanu nga welili jer kobbong, ko orongwose ñirij melmelas renge nanu nga marlelep nir.

Nabb nga ñin nga welili jer kobbong evter nga puloli lat nga milep san ñinsa.

⁶ Ko neme kerr osorsan erpok. Evi nibe kerr sapon; ko nanu jikle nga marsij arok-pelari rengen, ko arok-lokloksi totoklai mauren se kerr. Neme kerr elai nabb renge lat ne nejikien, ko okloli nabb ngok okin surusri renge nolo kerr.

⁷ Jinibb orongwose puloli nanu rrum nir, numön, numet, ko mesal ne dis pardu, ko arok-loli pa erpok osuw.

⁸ Ko san sete orongwose puloli ni lweni nemen pumu. Nale nga miplari renge neme kerr esij elep, ko sete rramrongwose rrapjinge. Osorsan tevi nanu nga murongwose pirevji pini jinibb.

⁹ Rramrij ma tevi neme kerr nga rramok-surövi Atua Tata Numal se kerr, ko rramok-rij ñisij kele tevi jinibb nir nga

Atua muloli nir marsorsan kobbong tevi ni.

¹⁰ Renge jingo kerr sansan kobbong rramok-rij nale nga mīrres, ko nale nga mīsij kele. Tasik ko jojik nir, setete erres nga nanu ngok piplari piprok.

¹¹ Sete mete nuwi san orongwose nuwi ko dis, nuru korti porremali rengen.

¹² Kami kamrroormi nga duru mango orongwose piwen wene namul rengen, rreknga bainau orongwose piwen wene mango rengen? Ejki! Ko dis sete orongwose pivi nuwi nga rramok-mini. Erpok, poro nga jinibb san pokrij pīsij, ngok eviseni pae nga liken sen totoklai esij.

Norongwosien nga Atua moklai

¹³ Poro evis re kami ngok marok-wera nga norongwosien ser mutoe ko marongrongwos, erres nga parviseni nanu ngok renge mauren ser. Mauren ser pusorsan ko wor. Nolor pian ngatan, ko majingen ser piplari renge norongwosien ser ngok.

¹⁴ Ko poro nolo kami poklelep pēlak nga jinibb mīnij marivi jinibb nga marlelep, daron nga kami kele bbong kammerreni kapivi jinibb nga marlelep, ngok, sete kaprij melmelas suri norongwosien se kami, ko sete kaploli gerisen nga kapsilveni weretunen.

¹⁵ Norongwosien ngok sete evi norongwosien nga miplari renge melrin. Ngok evi norongwosien se jinibb kobbong, nga miplari iel ngatan, ko miplari ji Demij kele.

¹⁶ Daron nga jinibb nolon moklelep mirpok ko mimrreni pian mare re jinibb mīnij kele, niko muloli nanu jijle setemun orongwose pukorti pīrres, ko murrun jijle nga marsij arpelpelari vajin.

¹⁷ Ko murru jinibb nga ma mīlai norongwosien renge melrin enije. Womujnen, mauren sen owokwok erres. Evi jinibb ne demat, evi jinibb nga mīlik malum, evi jinibb nga mukorti mīrres tevi jinibb nir, ko evi jinibb nga mokrroormi jinibb. Ko evi jinibb nga wenen nga marres elep arto renge mauren sen. Ko morok sete pokwera jinibb san esij kele, ko sete poksilveni nolon.

¹⁸ Ko daron nga jinibb ne demat marmajing renge murrun nga mumolmol, osorsan tevi maruwi jelangin nga mīrres nga wenen mivi mauren nga musorsan mīrres.

4

Murrun nga marsij ne iel ngatan

¹ Batu balpalen ko batu laten nga marokpelari ji kami arivel ngabe vini? Arokpelari suri re norrorrmien se kami, kammerreni kaplai nanu jijle, ko ngok ololi nolo kami oto karkar.

² Nolo kami elai temijpal nanu nir, ko suri sete kamrongwose kaplair, niko kamrevji pini jinibb surir. Kammermerreni nanu elep, ko sete kamrongwose kaplair; mian ko kamlat, ko kampalpal surir. Ko sete kamlai wor nanu nga kammerreni, suri sete kamngoni tevi Atua.

³ Ko daron nga kamngoni tevi Atua, sete kamlai kele, suri norrorrmien se kami sete osorsan. Kamok-ngoni nanu ngok nir tevi Atua nga nolo kami kobbong mimrreni.

⁴ Kamirpe nesevin san nga mokloli batun. Suri sev sete kamrongwose nanu ngel: jinibb nga mivijuri murru iel ngatan, ko evi pa devje nuval se Atua. Niko, poro jinibb san pimrreni pivijuri murru iel ngatan, ko evi vajin devje nuval se Atua ko.

⁵ Nale On se Atua owrai erpel: 'Atua emrreni wor elep nga norrorrmien se kerr nga ni mīlengi muto re nolo kerr pīterter renge ni kobbong', ko ngok sete evi nale nawon ko.

⁶ Ko Atua elai malum wor se kerr, niko Nale On sen muwra 'Atua ewer ore jinibb nga mulololie, ko oklai se mēr nga nolon mian ngatan'.

⁷ Suri nanu ngok, kami kaplingi wor kami ko renge melve nevre Atua. Kami kaptur ore wor Demij ko pīterter, puloli ni puwlu lingi kami.

⁸ Kapruj mori Atua, ko ni puruj mori kami. Kamivi jinibb nga kamsij, kapjevavöl vaseni nevre kami ko wor. Kami nga nolon mieru e puloli lweni ko wor nolon pivini pivi sansan e, nga puwokwok luwi.

⁹ Lelingenok erres re kaprunge pīsij ko wor, ko kaptung. Erres re kaptung wor suri nololien se kami ko. Rrek erres setemun kapmen ko kaprunge pīrres, ko kaprunge pīsij ko kaptung.

¹⁰ Kaploli nolo kami pumolmol womu ne Atua, ko ni pia-loli kapa-tur imare.

Sete kapwer lokloksi tasi kami nir

¹¹ Tasik ko jojik nir, sete kapwer lokloksi lululweni kami. Suri si nga mīwer lokloksi tasin, ewer lokloksi kele nale neseseien se Atua, ko owra nga nale neseseien ngok esij. Ko daron nga kamwera nga nale neseseien ngok esij, setemun kamteptepi rengen; kamtur pa mare renge nale neseseien ngok osuw.

¹² Atua kobbong esan ela nale neseseien, ko esan kele orongwose piwer lokloksi jinibb. Derteren sen otoo nga pīla mauren tevi jinibb, rrek puloli jinibb parjijki kele. Ko kami kamrroormi kamivi Atua nga kamok-wer lokloksi jinibb nir mirpok?

Nale nga puwni jinibb nga mokrij melmelas

¹³ Kami sopor arongwose parwerai pipel, "O, lelingen rreknga mevi kem naban

re kele ngaim m̄inij e san, ko iok ma nablik e sia totoklai san, nabloli majingen nga nablesi nevõt pilep ren." Ko kapmurrong ta.

¹⁴ Kami sete kamrongwose sev nga p̄irmali rengo mauren se kami mevi. Kamirpe bbong numow ko nga m̄irmali ko muto beblen kobbong, ko vitunen mijiki kele.

¹⁵ Nale nga mumomsawos nga kapwera, erpel: "Poro Atua pimrreni nabok-maur, ko kem namrongwose nabloli piprel, pipok, ko pipak."

¹⁶ Ko lelingenok kami kamok-rij melmelas pa mirpok, ololi norrorrmien se kami ean mare p̄elak. Ko nale melmelas nga mirpok esij.

¹⁷ Ko si nga murongwose pa murrun nga musorsan ko sete muloli, erpe ololi pa nololien ko.

5

Nale nga puwni jinibb nga joron milep

¹ Ko jinibb nga joror milep, kami kele kapmurrong ta inu. Erres kaptng e daron nga m̄iterter nga piplari ji kami.

² Nijor se kami, erpe armutmut pa osuw. Ko sunsun se kami erpe momom mutir pa musuw.

³ Gol ko silva se kami arerra pa osuw. Ko rrrerraen ngok erpe nanu san nga m̄itre kami, ko p̄iani nibe kami pirpe nabb. Lelingenok bongsi iel ngatan oto mori, ko kami kamtur imare ko kamok-sere kortoni malum nevõt se kami.

⁴ Sete kamteve nowli jinibb nga marmajng rengo naut se kami, ko dngn ser ngok ejpari pa nolo boro Atua nga derteren nga milep muto jin.

⁵ Renge iel ngatan, mauren se kami emalun bbong, ko kamlai pa nanu jijle nga puloli kaprunge p̄irres. Kamirpe buluk nga marwungani milep m̄irres; ko nabong nga parevji e, kami kampelari pa ren osuw.

⁶ Kamok-wer lokloksi jinibb nga marmom-sawos ko kamrevji pinir. Ko jinibb mom-sawos ngok nir setete arjnge kami.

Kami kaploli wor norrorrmien se kami pipriv ko

⁷ Tasik ko jojik nir, kaploli wor norrorrmien se kami pipriv ko, nga kaptiriv pianan pijpari Numal se kerr pia-luwi kele vini. Kaprormi ta murrun ne marloli orsel. Kamrongwose kaploli norrorrmien se kami pipriv kele wor ko kamtiriv mi-anan mijpari orsel se kami wenen pia-toe. Kami kamtiriv naus nga pusani orsel se kami, ko kamtiriv kele ko wor nga kapan kaplai nanen rengen.

⁸ Ko rengo murrun ngok kele, kami kaploli norrorrmien se kami pipriv ko wor nga kaptiriv re nabong nga milep ngok nga Numal se kerr pia-luwi kele. Kaploli wor norrorrmien se kami p̄iterter ko, suri sete mia-periv nabong ngok piplari.

⁹ Tasik ko jojik nir. Sete erres kapok-worwor suri kami, kapwera "O, nanu nga m̄isij ngok, ni ko ololi." Poro kapok-loli murrun ngok, ko Atua putor vitrangi kami. Ko kami kamrongwose nga jinibb nga mok-tor vitrangi jinibb evini pa mori, ko otomori pa p̄irmali.

¹⁰ Tasik ko jojik nir, erres kaprormi propet ne tuwi nir nga marok-werwer rengo nise Numal Atua. Jinibb nir arloli arunge esij elep; ko norrorrmien ser sete evitan. Ko rengo murrun ngok, nir arviseni sel nga m̄irres p̄elak san tevi kerr.

¹¹ Ko suri nir arok-tur eterter tetajer, rramwera Atua ololi nir arunge erres. Ko kami kamrunge pa nale suri murrun Jop, nga muloli norrorrmien sen mipriv. Ko kami kamrongwos pae nga Numal Atua muloli m̄irres tevi vitunen. Suri Numal Atua okloli erres temijpal ko okrorrmi jinibb nir.

Murrun ne rijen

¹² Ko tasik ko jojik nir, mare re nanu jijle nir, daron nga kamloli rijrijen, sete kaplai nais m̄inij van re rijrijen se kami nga puloli p̄iterter kele. Sete kapjuji melrin, rreknga iel ngatan, rreknga nanu m̄inij kele. Poro kapwera "O-o", ko o-o ko pa, rreknga poro kapwera "Ejki", ko ejki ko pa. Ko poro kaprij karkar kele, Atua orongwos putor vitrangi kami ko.

Loten nga derteren nen mutoe

¹³ Erpese? Kami san ni ko nga norongen nga m̄isij miplari jin? Rrek erres ma ni pulot. Jinibb san ni ko re kami nga mokrunge m̄irres? Erres ma nga ni p̄ilai nuboo nga pusrövi Atua.

¹⁴ Kami san ni ko nga mimsi? Erres nga piveruse Elta se kalesia nir nga parini parlesi ni. Ko arongwose parlot suri ni ko parjivi oel van rengen re nise Numal se kerr.

¹⁵ Ko loten se nir nga nosurien ser mutoe ngok puloli morok p̄irres luwi. Ko poro morok ololi pa nololien sopor, ko Numal se kerr p̄itlasi tweni ko suri, ko puloli niben p̄iterter luwi kele.

¹⁶ Suri nanu ngok, kami kapwerwera tweni ko wor nololien se kami tevi kami, ko kaplot suri kami sisamis nga Atua puloli kapres luwi. Loten se jinibb nga mumomsawos m̄irres, derteren nen elep temijpal.

¹⁷ Elaeja evi jinibb nga mirpe kerr kobbong, ko olot eterter nga naus sete pus; ko

rengé sia itul ko devje sia kele san, naus sete ous rengé dan.

¹⁸ Ko vitunen olot kele, ko naus ous vajin, ko orsel nir arres ko nanen elep kele vajin.

Rrapteka jinibb nga mível lingi weretunen pulwi kele

¹⁹⁻²⁰ Tasik ko jodik, erres kaprongwose nanu ngel. Poro san re kami pível lingi weretunen ngok, ko mīnij re kami ngok pian pītakai porluwi kele, ko mīnij nen ngok ololi pa majingen nga mīrres pēlak ko. Jinibb nga mokririēni jinibb sij mijkie rengé sel nga sete mumomsawos, mulwi vini rengé sel nga mumomsawos kele, elai pa se mauren se jinibb nga mīsij ngok, ko mēr nga mīsij ngok sete mia-jijki. Ko mēr womu ngok ololi kele sel nga Atua pītiasi tweni nololien pilep.

**Naul nga
PITA
Muli Womue
Batu nale nga mivsvseni
lut nga parmeteni naul
ngel puto suri**

Pita oli naul ngel van ji kalesia nir nga marlik sarsarr mirpe jinibb neturvitán nir (strenja) renge lat sopor nga marwera Pontas, Galesia, Kapatasia, Esia, ko Bitinia (ko lelingenok iok p̄t̄p̄eti nir arwera vajin Teki e). Ko lartul nga marlik ie arok-sij tevi kalesia nir, suri sete armerreni kalesia. Ko Pita owra nir parir ko wor, suri norongen nga m̄isij ngok orongwos puloli nosurien ser p̄iterter p̄irres (1:6,7). Ko owra Kristo kele ornge esij daron nga m̄ilik iel ngatan, ko mian ko emij suri kerr, ko mian ko emaur luwi kele, ko mian ko nabong sapon ni pia-luwi vini ko p̄itkai jinibb sen nir. Ngok nir partur p̄iterter ko wor renge norongen nga m̄isij, ko parosuri Kristo p̄iterter.

Pita owra erres tevi nir

¹ Inu Pita nuvi aposol se Iesu Kristo, nuwra erres tevi kami jinibb se Atua nga kamlik lat sarsarr mirpe jinibb neturvitán nir, re Pontas, Galesia, Kapatasia, Esia, ko Bitinia.

² Atua Tata se kerr otobbobbue kami tuwi ko pa nga kapivi jinibb sen, ko Nem̄in sen ololi kamon erres. Kamosuri Iesu Kristo, ko dr̄an ejivle tweni nololien se kami. Ngel evi loten suk, nga tetajer Atua pok-wilwil se kami renge nalol nga m̄irres, ko tetajer p̄ilngi demat puto tevi kami.

Mauren nga m̄irres oto wor renge mel-rin

³ Erres nga rrapwera erres temijpal tevi Atua nga mivi Atua ko Tata se Numal se kerr Iesu Kristo. Atua ngok ok-rongpote kerr, ko renge murrn ngok, ololi erpe kerr rrañiak luwi kele, rramtor sweri mauren nga mimerr. Ko ngok eplari suri nga muloli Iesu Kristo mimaur luwi kele renge mijen. Ngok puloli nororr̄mien se kerr p̄iterter nga puto tetajer.

⁴ Ko rramrongwose nga Atua elngi merrenien nga milep oto metmet renge melrin terai jinibb sen nir. Nanu ngok sete orongwose p̄isij rreknga pumutmut rreknga pijjki, ejki. Atua emetmet lilane re melrin.

⁵ Nanu nga m̄irres ngok evi se kerr nga rramosuri Atua. Ko suri nosurien se

kerr nga muto m̄iterter renge Atua, Atua orrul totkoni kerr pianan pijpari nga p̄ilai mauren tevi kerr, ko pia-viseni vajin nanu jijle nir renge nabong nga vitu.

⁶ Kap̄ir lenglengen suri iok, ewretun poro lelingen wolok ko pa, kami kamrunge esij wor suri nanu karkar nga marini parrowrowe kami.

⁷ Nanu ngok nir arivi nga parrowrowe kami ko parlesi nga nosurien se kami evi weretunen. Netkur ne sir nga m̄ikipkap̄il, arolngi re nabb, mian ko emetet erres vajin.^A Ko norongen nga m̄isij se kami lelingenok erpe nabb ngok, ko orongwos puloli nosurien se kami pimetet p̄irres. Ko netkur ne sir puto beblen kobbong, mian ko p̄isij; ko nosurien se kami puloli Atua pia-susi nise kami pian mare renge nabong nga Iesu Kristo pia-luwi vini ren.

⁸ Kammerreni lenglengen Iesu Kristo, ko setewor kamlesi nabong san. Ko nosurien se kami oto eterter rengen, ko sete nale san orongwose p̄iwer jipari neiren nga m̄irres se kami nga muto m̄iterter renge Atua.

⁹ Ngok kap̄ipari sev nga nosurien se kami murrormi nga kaptor sweri ko, nga Atua p̄ilai se mauren se kami.

¹⁰ Propet ne tuwi kele nir arok-pejpej sel nga Atua p̄imajing ren nga piwilwil se jinibb ren. Ko ar̄pelak elep nga parlesi; ko sete arlesi, ko arwera pia-pelari nabong san. Ko kerr le vajin rrama-lesi.

¹¹ Propet nen nir arloli lesi, arpejpej sel sev, ko renge daron sev nga nanu ngok nir parremali ren, suri Nem̄in se Kristo nga muto renger ok-juji malum nanu ngok nir. Ok-werai tweni tevir nga Kristo purnge p̄isij renge niben, ko vitunen Atua p̄ilai nais nga mian mare temijpal tevi renge melrin.

¹² Atua eviseni tevi propet nir nga nale weretunen ngok sete evi rragrag se nir, ko evi se kerr nga rramaur lelingenok. Ko nale weretunen ngok ermmali pa ji kerr osuw.

Nir nga marwerai tweni vajin nosp̄en nga m̄irres renge derteren se Nem̄in On nga Atua mukoni renge melrin vini, nir ngok ko arlai eplari. Ko nale weretunen ngok, anglo kele nir arser rrale nga parlesi wose.

Kaptori murrn ko mauren nga muon

¹³ Re iok, kami kap̄loli nororr̄mien se kami puto metmet ko piñerer p̄irres. Ko kami kap̄lingi nororr̄mien se kami puto tetajer renge Atua nga ni piwilwil se kami renge nolon nga m̄irres daron nga Iesu Kristo pia-rremali ren.

^A 1:7 Erpe iel, Pita osp̄e gol, ko namlingi netkur ne sir, nga puloli mining ne nale se Pita piplari piñerer.

¹⁴ Kaposuri Atua. Sete kapmarong nanu nga kammerreni nir ne tuwi daron nga kamlengleng vane e, parevei murru kami.

¹⁵ Atua ngok nga mok-verus kami on, ko owokwok erres. Ko renge murrin ngok, kami kele kapon ko kapwokwok ðirres.

¹⁶ Suri Naul On owra 'Kami kapon ko wor ko kapwokwok ðirres, pirpe inu nuon ko nuwokwok erres.'

¹⁷ Ko kamok-lot van jin, ko kamveruse kamwera, Tata. Ko kaposuri kele ko wor ni ðirres re mauren se kami iel ngatan, suri Atua puwra suri lat nga puto suri tevi jinibb jikle re norngov sansan ngok kobbong, suri murrin nga marloli.

¹⁸ Ko kami kamrongwos pae sev nga Atua mlai nga puwli tweni kami e nga puloli kapiel sisarow renge murrin nga n̄isij nga kamtor sweri ji apu se kami nir ne tuwi. Ko sete elai nanu nga pian ko ðisij, erpe silva rreknga gol, ejki.

¹⁹ Elai drra Iesu Kristo natun mawos, nga n̄iseser renge nai pelaot, nga puwli tweni kerr. Drra ngok erpe drra sipsip san nga nabil san mijki rres ren. Ko renge no Atua, drra ngok se Kristo erres ðelak.

²⁰ Tuwi jer pa daron nga Atua setewor n̄ilngi iel ngatan, ko otobbobbu tweni pae Kristo nga pia-majing nanu ngok nir. Ko lelingenok nga sete mia-periv iel ngatan pusuw, Atua eviseni pa ni nga pia-lai mauren tevi kerr.

²¹ Ko suri nanu nga Atua muloli ngok, kami kamini pa kamosuri Atua nga muloli Kristo emaur luwi kele renge mijen ko mlai nais nga mian mare renge melrin. Ko kamosuri eterter ko kamlingi norrorrmien se kami oto malam eterter renge Atua.

²² Kamloli mauren se kami owokwok pa osuw re no Atua suri kamosuri pa nale weretunen osuw, ko orongwose kapmerreni tasi kami renge murrin nga musorsan m̄irres. Ko kapmerrmerreni lululweni kami tevi nolo kami ðetðeti vajin.

²³ Kan̄iak luwi pa, ko kamtor sweri mauren nga mimerr. Ko mauren ngok sete eplari renge jelangin nga mia-mutmut; eplari renge jelangin nga sete mia-mutmut nabong sapon. Jelangin ngok evi nale se Atua, nga mimaur ko sete mia-jijki nabong san.

²⁴ Naul On owra 'Kerr rramirpe mösmös kobbong, ko joro kerr nga m̄irres ðelak erpe bbong nevngu mösmös ko. Mösmös orongwose pukur, ko nevngun kele pian ko parvititan.

²⁵ Ko nale se ma Atua puto tetajer.' Ko nale ngok evi nale ne nospen nga m̄irres ngok nga marwera tweni pa osuw tevi kami.

2

Murru kami pivi ko wor weretunen jerjer

¹ Niko, kapsuw vajin re kamok-loli murrin nga n̄isij. Sete kaplolar, ko sete kapkerkeris, ko sete kapsilveni nolo kami. Sete nolo kami pilelep, ko sete kaprij ðisij tevi jinibb m̄inij.

² Kami kapiirpe bipi nga mia-iak nga mimrreni lenglengen pusuw; ko daron nga musus vajin mian ko jin eterter temijjal. Ko kami kele kapiropok, kaplai nanen nga puwngani ner̄i kami nga puloli Atua pia-lai mauren tevi kami rengen.

³ Suri nale ne Naul On owra 'Kami kamrrowrow pae murrin se Numal, ko kamlesi wose lat nga m̄irres muto suri.'

Burtur nga mimaur

⁴ Kapini ko wor rraptur tevi Numal se kerr. Ni erpe burtur nga mimaur. Jinibb ne majingen arwirr tweni ko pa osuw, ko Atua otobbobbu pa ni osuw. Ko renge no Atua, ni erres ðelak.

⁵ Kami kele kapiirpe burtur nga mimaur nga Atua puloli kapiirpe naim ne Ner̄in sen nga mimaur. Ko renge naim sen ngok, kami kapiirpe jinibb sulsulen nga muon se Atua, nga mok-lai merrenien van jin. Merrenien nen erpe nga kamlai norrorrmien se kami van ji Atua. Ko ni eir nga putor sweri merrenien nga mirpok, suri kamkorti tevi Iesu Kristo daron nga kamlai e.

⁶ Suri Naul On owra 'Kaplesi, inu nususture burtur nga m̄irres ðelak renge botwen nga Saeon. Evi burtur nga m̄irres ðelak ne naim. Ko si nga muosuri, ko sete nolon pijebreni.'

⁷ Tevi kami nga kamosuri, burtur ngok erres ðelak. Ko tevi nir nga sete marosuri, erpe nga Naul On muwra 'Burtur ngok nga jinibb ne naim marwirr tweni pa musuw, artaol lengleng nga evini kele evi burtur nga m̄irres ðelak vajin.'

⁸ Ko Naul On owrai kele 'Ngok evi burtur nga puloli jinibb parvitan rengen.' Jinibb ngok nir arvitan ren suri sete arosuri nale se Atua, ko ngok evi pa norngov nga Atua muloli pa musuw tevir.

⁹ Ko kami ma Atua otobbobbu kami pa nga kapiivi metka sen. Kamirpe jinibb sulsulen se Numal, kamivi jinibb on se Atua. Atua ololi erpok nga puloli kapwera tweni majingen nga m̄irres sen. Everus tweni pa kami renge nemalik nga kapini renge moron nga m̄irres sen.

¹⁰ Womu kamiel ngasue Atua, ko lelingenok kamivi vajin jinibb se Atua. Womu sete kamtor sweri nga Atua purrorrmi kami, ko lelingenok kamtor sweri vajin nga Atua orrorrmi kami.

Rramivi jinibb ne majingen se Atua

¹¹ Selek nir, kamlík iel ngatan erpe jinibb neturvitan kobbong nga siser mijkie. Ko nuwrai eterter tevi kami nga sete kaploli murrun nga marsij nga norrorrmien se kami mimrreni. Murrun ngok nir artere kami nga pulokloksi mauren se kami.

¹² Ko jinibb ne vare nir arpelak nga partor sweri nga kami kamivi jinibb nga kamtor otvi nale neseseien. Ko kami kaploli lilane wor murru kami pusorsan p̄irres re no nir, puloli parlesi majingen nga m̄irres se kami. Ko vitunen daron nga Atua pia-wera suri lat nga puto suri tevi jinibb nir renge nabong nga vitu, ko parasusi nise Atua van mare suri majingen nga m̄irres se kami.

¹³ Suri kamivi jinibb se Numal se kerr, ko kaposuri ko wor nir nga marivi numal gavman nga jinibb mususture ko ni nga mivi batbatu numal gavman, nga mimetmete jinibb totoklai nir.

¹⁴ Ko kami kaposuri gavman nga batu numal gavman mukonir nga parvirrali jinibb nga martor otvi nale neseseien, ko parsurövi kele nir nga marvijuri murrun nga musorsan m̄irres.

¹⁵ Ko ngok evi nanu san nga Atua mimrreni, nga re murrun nga musorsan se kami, kapwer ore nale nga marlengle se jinibb nir nga norrorrmien ser mijkie.

¹⁶ Kamivi jinibb nga kamiel sisarow pa osuw, ko murru kami piviseni ko wor nanu ngok. Sete erres nga kaploli nivelen sisarow se kami pitawi ore kele murrun nga m̄isij, ko kaplik ma pirpe demij maur se Atua.

¹⁷ Kaposuri jinibb p̄etp̄eti nir p̄irres. Kapmerreni lenglengen jinibb nga marivi kalesia nir. Ko kaposuri Atua p̄irres, ko kaposuri p̄irres batbatu numal gavman se kami.

Norongen nga m̄isij se Kristo eviseni sel tevi kerr

¹⁸ Jinibb ne majingen nir, kaposuri p̄irres numal se kami nir, ko tetajer kaptorir p̄irres. Kaploli pipok sete tevi kis nir nga marres ko marok-rorrmii kami, ko tevi kele wor nir nga markoni lokloksi kami.

¹⁹⁻²⁰ Poro kaploli p̄isij, ko parvirrali kami suri, ko kaploli nolo kami pipriv nga kaptori nekaien ngok. Ngok sete evi nanu san, suri kami kobbong kamrevei nekaien ngok. Ko poro ma kampal ko sete suri sev nga kami kamloli, ko kapkulu van ji Atua ko pa, ko ngok merrenien nga milep se Atua piptevi kami vajin.

²¹ Ngok evi murrun san nga Atua miveruse kami nga kaplai, suri Kristo ornge esij renge niben nga piwilwil se

kami, ko eviseni murrun ngok tevi kami nga kami kapvivotu kele suri renge bbötun ngok.

²² Ko Naul On owra 'Sete ololi nanu san esij, ko sete nale gerisen san eplari renge jingon.'

²³ Sete erij weli nale nga m̄isij san tevi jinibb san. Daron nga marloli murnge m̄isij renge niben, ko sete orrorrmi nga p̄ikle lweni tevi nir. Ni elngi norrorrmien sen oto eterter renge Atua nga mok-wer sesesre lat nga puto suri tevi jinibb nir renge murrun nga musorsan.

²⁴ Daron nga Kristo mian re nai pelaot, ko owosi nololien se kerr renge niben. Ololi erpok nga kerr rrapmij renge murrun nga rramloli m̄isij, ko rrapa-maur renge murrun nga rramloli musorsan. Renge niben nga mimabbur renge nai pelaot, ololi kerr rramterter luwi kele vajin.

²⁵ Tuwi rramirpe sipsip nga martor jable pa sel osuw, ko lelingenok rramluwi vajin vini ji Kristo, erpe jinibb nga mok-metmet vajin sipsip, erpe jinibb mawos vajin nga mok-metmete mauren se kerr.

3

Murrun ne totkoién

¹ Renge murrun ngok kele, kami nesevin, kaposuri ko wor diwen se kami. Ko poro diwen se kami sete parosuri Atua, ko murru kami kobbong orongwos pirvei nir vini nga parosuri, nga san sete mia-werai nanu san tevi nir,

² suri nir para-lesi meter e erpese kami kamlingi nosurien se kami tevi mauren nga musorsan m̄irres se kami renge Atua.

³ Ko sete erres nga kapkowkowri kami, nga kapviri batu kami, ko kapweni nasum nga marer nir ko sunsun nga marmerr nir, ko kapiel ngolngoli beta kami re mete jinibb nir.

⁴ Erres ma nga kaploli norrorrmien se kami pusorsan re no Atua. Erres ma nga demat puto renge nolo kami, ko kapivi nesevin nga nolo kami pian ngatan. Ko murrun nga mumolmol ngok pivi nanu san nga puto tetajer ko p̄irres temijpal kele renge mete Atua.

⁵ Ko nesevin ngok nir ne tuwi aron ko arwokwok erres re no Atua tevi norrorrmien ser nga m̄iterter, ko arosuri diwen ser erres. Iok ko ololi nir arres kele renge mete diwen ser.

⁶ Sera kele ololi erpok. Osuri Epram ko everuse owra 'Numal suk'. Poro kaploli murrun nga m̄irres ko sete kapmetutue nir nga sete marosuri, ko kami kapviter vajin nga parveruse kami natu Sera nir.

⁷ Ko renge murrun ngok kele, kami norman nga kamtotko, kaprorrmi ko wor

þirres suri nesen se kami renge murru mauren ne martotko. Suri nir sete arterter erpe kami, ko rijrijen se Atua oto livö ne kamru kes, nga renge nolo Atua nga mürres, ni þilai mauren tevi kamru. Ko ngok, kaposuri nesen se kami, puloli sete nanu san puto ore verusen se kamru.

Norrormien se kerr pivi ko wor sansan

⁸ Bevinvini ore nale suk. Kami kalesia jile, norrormien se kami pivi sansane, ko kaprrormi lululweni kami. Kapmermerreni lululweni kami pirpe niaken nir, ko nolo kami pian ngatan.

⁹ Daron nga jinibb muloli müsij tevi kami, ko sete kapkele lweni kele. Daron nga jinibb mürj müsij tevi kami, ko sete kapkele lweni kele, pijki. Kami kaplai lweni nale nga mürres tevi jinibb nga mirpok, suri daron nga Atua miveruse kami, ko ni emrreni þirij þirres tevi kami.

¹⁰ Naul On owra 'Jinibb nga mimrreni mauren nga mürres ko mimrreni purnge þirres tetajer setemun þikerkeris.

¹¹ Ni þilngi tweni sel nga müsij ko puloli murrun nga mürres; ko tetajer pipej mauren nga mumolmol ko þiplak ko wor þiterter nga putor sweri.

¹² Suri Numal Atua tetajer oklu van ji jinibb nga marsorsan nir ko ok-runge verusen ser, ko ok-sir duren tevi nir nga marloli müsij.'

¹³ Poro kapok-loli murrun nga mürres ko sete san orngwose pulokloksi kami ren, ejki.

¹⁴ Ko poro daron sopen jinibb nir arloli kampil suri bhong kamloli murrun nga mürres, ko ngok kaprunge þirres kobbong. Ko sete kapmetutu, ko sete kaprrormi þelake nir.

¹⁵ Kaploli Kristo pivi Numal se kami, ko kaploli ni puwowomu re norrormien se kami. Ko kami kaptiriv tetajer nga kaplai lweni weli nale tevi jinibb san, poro san pususi tevi kami puwra "Suri sev kamtori Kristo renge norrormien se kami?" Ko kami kapviter nga kapwerai lweni weli nale tevi.

¹⁶ Ko kapjiljilwer tevir renge murrun nga mumolmol nga demat muto ren, ko tetajer kaploli murrun nga musorsan nga norrormien se kami sete þiwer lokloksi kami suri. Renge sel ngok puloli jinibb parmanun renge nale nga marsij nga marwerai, suri sel nga kamvijuri se Kristo evi pa sel nga mumomsawos mürres.

¹⁷ Ko erres kobbong nga parvirrali nik nga kumloli nanu nga mürres san, poro evi marongen se Atua. Ngok erresres ma easi poro nga parvirralim suri nanu nga müsij nga kumloli.

Kristo emij pa suri kami

¹⁸ Kristo emij pa suri kami. Emij vesan kobbong ko sete mia-mij kele, nga þilai tweni nololien se kami. Jinibb nga musorsan emij suri kami nga sete kamsorsan, nga þilai lweni kami van ji Atua. Renge mauren sen iel ngatan, nir arevji pini; ko Atua ololi emaur luwi kele renge mauren nga mivi ne melrin.

¹⁹ Ko nerüi Iesu evan ji nerün nga marlik renge naim ne nekaien ko ewerwer tevir.

²⁰ Ngok lartul nga marong tweni Atua daron nga Noa mümajinge drrav sen. Ko Atua nolon epriv temijpal ko etriv nir, ko nir sete arosuri. Ko renge drrav ngok gortien nga welili san, erpe nir owil kobbong, nga Atua miwilwil se nir renge drrav se Noa daron nga muloli iel ngatan murrun ko jinibb jijle armij.

²¹ Nuwi ngok nga tuwi evi nelesien ne baptaes nga mülai mauren tevi kerr lelingenok. Ko baptaes ngok sete evi nga pirrawe tweni nijorjor re nibe kami, ko evi nga rijrijen se kami tevi Atua sete orngwose þiwer lokloksi kami suri. Ko baptaes ngok evi nga putor sweri derteren nga þilai mauren tevi kami, suri Atua ololi Iesu Kristo emaur luwi kele renge mijen.

²² Ko ean pa renge melrin e ko elik renge devjen rres ji Atua. Ko Atua ololi anglo tevi jinibb nga marlelep tevi numal nir ne melrin parsusi nisen pian mare.

4

Muru kami þinije ko wor

¹ Daron nga Kristo mülik iel ngatan, ko ornge esij renge niben. Ko renge iok, kami kele kaplai norrormien ngok nga puloli kapterter, suri nir nga marunge müsij renge niber setemun arloli nololien.

² Ko ngok, þitipatun lelingen, setemun kapmarong norrormien nga marsij parto ore kami. Ko kaplai ma nanu nga mivi se Atua puto ore kami.

³ Kamlokloksi daron elep pa womu nga kamloli sev nga jinibb ne vare nir marloli. Tuwi kamok-loli esij tevi nesevin, kamloli nanu nga müsij, ko kamok-minmin nga batu kami þilengleng. Ko evter vajin re sel nga kamlot van ji atua minij nir.

⁴ Jinibb ne vare nir artaol elep suri setemun kamkorti tevir renge sel ser nga marsij, ko iok ko ololi marworwor suri kami ren.

⁵ Ko nir parwerai tweni mauren ser re no Atua nga mütriv nga þiwer suri lat nga puto suri tevi jinibb nga marmij ko jinibb nga marmaur.

⁶ Iok ko ololi nosþen nga mürres mian pa ji nir nga marmij osuw. Daron nga marmaur ko artor sweri nekaien ko armij sere, erpe jinibb jile nir. Ko arwerwere

nospen nga mürres tevir nga puloli liken ne nenin nga mürres ser pirpe Atua.

Jinibb ne majingen nga mürres pelak se Atua

⁷ Rramini mori pa daron san nga nanu ne iel ngatan parjijki. Re iok kaploli lilane ko wor norrorrmien se kami pumolmol ko piñierer, ko kapok-lot ko wor.

⁸ Ko mare re nanu jijle, kapmerrmerreni lenglengen wor kami pilep, suri merrenien orongwose putor ore nololien pilep.

⁹ Tetajer naim se kami pitpir nga ne-turvitam rreknga jinibb tama san pisil van lolioim, nga sete nolo kami pisij suri kele.

¹⁰ Ko re Atua nolon nga mürres, elai dert-eren lele tevi kami nga kaploli majingen sen. Ko kaplai ko wor derteren ngok nga piwilwil se kami.

¹¹ Poro kapok-werwer, kapwerai tweni ko wor nale se Atua. Ko poro kapwilwil se jinibb, ko kaploli ko wor re derteren nga Atua milai tevi kami. Ko reнге murrun ngok nise Atua pian mare tevi nanu jijle nga marivi se Iesu Kristo, pianan pijpari tuwi ngok vini. Pirpok.

Kaprunge pisij daron sapon re nibe kami suri kamivi jinibb se Atua

¹² Selek nir, sete erres kaptaole nanu nga marsij nga marok-ini nga parrowrrowe kami, suri nanu ngok nir parok-pelari lululwi ko.

¹³ Ko erres nga kaprunge pirres erpe kamwilwil se Kristo reнге norongen nga misij sen. Ngok puloli kapwun saute neiren sen daron nga nalol nga mürres sen pirrmali e.

¹⁴ Poro jinibb parij pisij tevi kami suri kamivi jinibb se Kristo, ko kapir, suri ngok eviseni nga Nenin ngok ne melrin nga mivi se Atua evini pa iel ngatan ji kami.

¹⁵ Ko jinibb nga ma mokrevji jinibb, rreknga mivevna, rreknga mutor otvi nale nesereien, rreknga jinibb nga mieses nanu van re majingen se jinibb minij nir, nir ko Atua pia-tor vitrangir suri. Ko sete erres nga kami san pipal suri murrun nga mirpok.

¹⁶ Ko poro kami san pipal suri bbong ni evi kalesia, sete pimanun, ko pusurovi ko wor Atua suri nise Kristo nga muto pa reнге kami.

¹⁷ Ko daron evini nga Atua pitipatun nga piwer suri lat nga puto suri tevi jinibb nir; ko womujnen ni puloli tevi jinibb sen nir. Ko poro pitipatun tevi kerr, ko 'pia-irpese re nir nga sete marosuri nospen nga mürres se Atua?'

¹⁸ Ko nale se Atua owra 'Poro pitertter re Atua pilai mauren tevi jinibb nga marres nir, ko nir nga sete marosuri ni ko arok-loli esij, rrek sel pijki rragrag.'

¹⁹ Ko ngok, nir nga Atua mimarong nga parunge pisij reнге niber, parlingi ko wor mauren ser reнге nevre Atua nga rijrijen sen muto, ko parloli ko wor murrun nga mürres tetajer.

5

Nale tevi Elta nir

¹ Inu numrreni belai nale san tevi kami elta nir. Inu kele nuvi elta san, ko nulesi Kristo tevi metek daron nga ni murnge misij reнге niben. Ko inu nutur eterter nga bokorti reнге mauren nga mürres reнге melrin nga Kristo pilai pia-rremali. Ko nuwrai eterter tevi kami nga

² kapmetmete pirres nir nga Atua milair tevi kami, pirpe jinibb ne sipsip nga mokmetmete mürres sipsip sen nir. Ko kaptor lilaner pirres, ko nolo kami pir suri majingen pirpe nga Atua mimrreni. Ko sete erres nga kaploli suri bbong kammerreni nevot pivitan ren. Ko kaploli majingen pirpe nga nolo kami purnge pirres reнге.

³ Sete norrorrmien se kami pian mare pelak tevi nir nga kammetmete nir, ko kapviseni ma sel nga musorsan mürres tevi sipsip nir nga nir para-vivitu suri kami reнге.

⁴ Ko daron nga Kristo, Numal nga muwomumu re jinibb nir nga marmetmete sipsip nir pirrmali, ko kami kapa-tor sweri nowli kami nga mürres pelak nga sete orongwose mia-sij nabong sapon.

⁵ Ko reнге murrun ngok kele, kami melakel, kaposuri ko wor nir nga martera. Nolo kami pian ngatan ko kapwilwil se lulweni kami, erpe Naul On muwra 'Atua etre nir nga markowkowrire, ko ok-wilwil se nir nga nolor mian ngatan.'

⁶ Kaplingi kami van ngatan ji Atua nga derteren sen milep temijpal, ko ni pia-susi kami van mare re daron mawos sen nga ni kobbong milngi.

⁷ Kaplinglingi norrorrmien se kami nga muwlu pelak tevi ni, suri tetajer ok-rorrmami kami.

⁸ Kaptur pitertter, ko kapmetmet. Devje nuval se kami, Demij, ok-wolu rrerrale kami erpe bae san nga numer miaji milep, epejpej jinibb nga puwun totoklai.^B

⁹ Kaptur ore pitertter. Kamrongwose nga reнге lat sapon iel ngatan, kerr sopor rrampal suri nise Kristo, osorsan erpe nga kami kamtor sweri.

^B 5:8 Erpe iel, Pita orrongrongvi Demij erpe laeon, ko suri laeon ejki iel, namlingi bae, nga puloli mining ne nale se Pita pipal piñierer.

¹⁰ Ko Atua ok-wilwil se kerr tetajer renge nalol nga m̄irres sen, ko everus kerr nga rrapan rrapkorti tevi Kristo renge mauren nga m̄irres p̄elak re melrin nga sete mia-suw nabong san. Kaprunge p̄isij beblen kobhong, ko vitunen Atua puloli kapterter, kapsorsan p̄irres, ko p̄ilai derteren tevi kami ko pususture kami pirpe duru nai san nga sete orongwose putoto.

¹¹ Ko loten suk, nga derteren jijle puto renge nevren ko pa pijpari tuwi ngok vini. Pirpok.

Bongsi nale se Pita

¹² Naul suk nga welili ngel, Silas oli tevi kami. Silas erpe kalesia tasi kerr nga inu mosuri. Numrreni bowrai tweni nga sel nga Atua mok-wilwil se kerr renge nalol nga m̄irres sen evi sel weretunen, ko kaptori p̄iterter.

¹³ Ko nir ne Naim On ne Bapilon^C nga Atua m̄ilngir arwera erres tevi kami. Ko natuk kele Mak owra erres tevi kami.

¹⁴ Kapwera erres tevi kami lululwi tevi merrenien ko demat. Ko ngel evi loten suk, nga demat puto tevi kami jijle nga kamivi jinibb se Kristo.

^C 5:13 Nais ngok Bapilon evi nale teptepi san, ko owra puwra Rom.

**Naul Erwen nga
PITA
Muli
Batu nale nga mivsvseni
lut nga parmeteni naul
ngel puto suri**

Pita oli naul sen erwen ngel van ji kalesia p̄t̄peti nir. Re wosenen jinibb nevisvisenien sopor arlik nga nevisvise-nien ser sete arsorsan, ko kalesia sopor arvijurir renge murrun nga marsij ser. Ko Atua putorrlai nir (2:1-22). Daron nga jinibb nga marirpok nir marini ji kerr, ko kerr rraprrul totkoni ko wor nosurien se kerr, ko murrun nga marres nir.

Pita owra erres tevi nir

¹ Inu Saemon Pita nuvi aposol ko jinibb ne majingen se Iesu Kristo. Nuwrai erres tevi kami nga nosurien se kami m̄irres p̄lak mirpe bbong nga kem. Nosurien ngok kamlai suri murrun nga musorsan se Iesu Kristo nga mivi Atua ko m̄er nga mokla mauren tevi kerr.

² Ngel evi loten suk, nga Atua p̄irij p̄irres suri kami renge nalol nga m̄irres sen, ko p̄ilai demat pilep tevi kami suri kamrongwos pae Atua ko Numal se kerr Iesu Kristo.

Atua everus nga kapivi jinibb sen

³ Atua renge derteren sen elai nanu jijle tevi kerr, evter nga orongwos rraplik renge mauren nga musorsan m̄irres. Ngok eplari ji kerr suri rramrongwose Iesu Kristo, ngok jinibb nga miveruse kerr nga rrapkorti renge nisen nga mian mare ko mauren nga musorsan sen.

⁴ Re iok ko ololi nga m̄ilai tevi kerr rijrijen sen nga marlelep ko nga marres nir, nga puloli kaprongwose kapwolu lingi murrun nga m̄isij ne iel ngatan, murrun nga marmerrmerreni nawon nanu nir. Murrun ngok ela mijen. Ko kapini rrapkorti vajin re murrun nga m̄irres se Atua.

⁵ Ko suri iok ngok ko, kami kapp̄elak ko wor pilep nga kapla kele murrun nga musorsan m̄irres puto tevi nosurien se kami; musuw, ko kapp̄elak tweni kele nga norongwosien puto tevi murrun nga musorsan m̄irres se kami,

⁶ musuw, ko kapp̄elak tweni kele murrun nga kapwer ore sev nga kami kob-bong kammerreni, puto tevir. Musuw ko kapp̄elak tweni kele murrun nga marok-rrul totoni nolor mipriv, puto tevir. Musuw ko kapp̄elak tweni kele murrun nga muon m̄irres puto tevir.

⁷ Musuw ko kapp̄elak tweni kele murrun nga kapmerreni tasi kami puto tevir. Musuw ko kapp̄elak tweni kele murrun nga kapmerreni lenglengen jinibb jijle nir puto tevir.

⁸ Nanu ngok nir arivi nanu nga parto ko wor ji kami; ko poro parto pilep ji kami, ko ngok nibe kami pus, ko wene kami putoe, suri kamrongwose Numal Iesu Kristo.

⁹ Ko jinibb si nga nanu ngok nir sete marto renge mauren sen, erpe jinibb san nga meten mumot nga sete orongwose puklu van ngasu; ko emali pae nga Atua m̄irrawe tweni nololien sen nga muloli womu.

¹⁰ Ko niko, tasik ko jojik nir, suri Atua otobbtobbu pa kami ko everus pae kami nga kapivi jinibb sen, kami kapp̄elak pilep kele wor nga kaploli nanu ngok pivi weretunen renge mauren se kami. Poro kaploli p̄irpok, ko sete kama-vitan nabong san.

¹¹ Ko renge murrun ngok puloli sel pimetet tevi kami nga kapsil van lololim renge batun vanu ne tuwi ngok vini se Numal Iesu Kristo nga mokla mauren tevi kerr.

¹² Kami kamrongwos pae sev nga mowrai ngok, ko kamlingi norrorrmien se kami oto eterter renge weretunen nga kamlai; ko inu sete mea-tibbtibbot kele nga bowra lwenir kele tetajer.

¹³ Nulesi mirpok osorsan kobong nga bololi, nga bowni malum nanu ngok nir e tevi kami daron nga memaur malume.

¹⁴ Suri nurongwose, otomori bemij, ko b̄elngi kurtweni nibek ne mijen ngel, erpe Numal se kerr Iesu Kristo owrai pa limjer tevik.

¹⁵ Ko niko b̄eplak pilep ko wor nga b̄elngi sel sopor parto metmet tevi kami nga kaprrorrm̄i iok ngok nir rengen re daron tetajer. Ko poro inu bemij vajin, ko kami kaptur tetajer renger.

¹⁶ Daron nga namwera i tweni tevi kami nga Iesu Kristo Numal se kerr derteren sen otoo ko pia-luwi kele vini, ko sete namlai nale ngok renge sel, ejki, ko kem namlesi mawose tevi mete kem nga niben mumor nga mumor lenglengen.

¹⁷ Daron nga Atua Tata mususi nisen van mare ko muloli moron mumor vaseni, kem namlik ko, ko namrunge drrelan san nga miplari renge moron ngok mare vini nga muwra "Ngel evi natuk le nga memrreni lenglengen e, nuir temijpal wor suri."

¹⁸ Kem mawos ko namrunge drrelan ngok nga miplari renge melrin vini, daron nga nampitevi renge botwen nga muon ngok.

¹⁹ Nanu ngok nir arloli nga kem namrongwose kele erres nga nale se propet nir arweretun, ko erres kapmurrong surir

þirres. Suri nale se propet nir erpe moron san nga mumor renge nemalik. Ko pumor pijpari nga moju nutrin pia-pelari, ko nat pia-rin vajin renge nolo kami, renge nabong se Kristo nga ni pia-luwi vini rengen.

²⁰ Ko ngel evi norrormien nga milep san nga kaprongwose, nga sete san orongwose þisan puwra suri nale san nga muto renge Naul On, poro Nerñin On sete ewilwil sen rengen.

²¹ Suri nale se propet nir sete eplari renge nir bbong norrormien ser, ejki, ko arvijuri wor derteren nga mivel ji Nerñin On vini daron nga marlai nale nga mivel ji Atua vini.

2

Jinibb nevisvisenien gerisen

¹ Renge mñeri Isrel nir tuwi, propet ne gerisen sopor arlik tevir. Ko pirpok kele, jinibb nevisvisenien ne gerisen sopor parpelari renge kami. Arongwose parvisviseni silveni nevisvisenien gerisen nga marsij milep tevi kami nga murongwose pulokloksi kami. Arongwose parlingi kurtweni Iesu Kristo nga mivi Numal ser nga miwilwil se nir renge nololien ser. Renge daron wela ngok, nir luwi kobbong parllokloksi lweni nir.

² Ko jinibb pilep kele parvijuri nir renge murrun nga marsij þerþer ser ngok. Re murrun ser ngok jinibb pilep parij þisij tere sel ne nale weretunen.

³ Jinibb nevisvisenien gerisen ngok nir nolor evnae nevöt, ko parloli kapwulir pilep daron nga marvisviseni kami e nale gerisen ser. Ko tuwi jer pa Atua owra suri lat nga pia-to suri tevir, ko orrorrmi nga pulokloksir. Atua sete ematur, ko ni pia-lokloksir ko, pirpe nga ni muwrai pa nga puloli ko.

⁴ Ramrongwose nga Atua otorrlai pa anglo nga marloli nololien ko nir; ewir nir van ngatan jer ko ekai totkonir arlik renge nemalik, pian pijpari nabong nga Atua pia-wera suri lat nga puto suri tevi jinibb nir.

⁵ Ko rramrongwose nga re daron se Noa, Atua olokloksi jinibb nga marsij ne tuwi nen nir. Ololi vanu orron ko nanu jikle armij. Ko emetmet lilane bbong Noa tevi nir ebut kele. Noa evi jinibb nga mokvisviseni mauren nga muon ko mñirres tetajer.

⁶ Ko rramrongwos kele e nga Atua otorrlai jinibb ne ngaim nga Sotom ko Gommorra nga musli nuru tevi nabb. Ololi erpok nga þilai norrormien tevi nir nga para-vitu, ko piviseni sev nga pia-pelari kele tevi jinibb jikle nga marsij.

⁷ Ramrongwose nga Atua emetmet lilane Lot nga mivi jinibb nga mñirres. Suri Lot ornge esij elep renge murrun nga jinibb nga marsij marloli.

⁸ Jinibb nga mumomsawos ngok elik tevi lartul ngok nir, ko oklesi murru nir, ko okrunge nale ser, ko nabong jikle kobbong okrunge esij elep suri.

⁹ Nanu ngok nir arviseni nga Numal Atua orongwos þitkai tweni jinibb nga marres nir parjiekie renge nanu nga marrowrower; ko nir nga sete marres, orongwose purrul totkonir pijpari nabong nga milep nga Atua pia-wera suri lat nga puto suri tevi jinibb nir,

¹⁰ ko putor vitrangi nir nga marokloli murrun nga marsij nga nir kobbong marmerreri, ko nir nga marungasi Atua.

Murrun nga mñisij se jinibb sopor

Jinibb nevisvisenien gerisen ngok nir nolor ean mare lenglengen. Sete armetutu nir nga marlik renge melrin, ko arok-rij kele esij tevir.

¹¹ Ko anglo nir nga maran mare ko, derteren ser milep wor mñiasie jinibb nevisvisenien gerisen ngok nir, ko nir armetutu ko sete arongwos parij þisij tevi nir renge no Atua.

¹² Jinibb nevisvisenien gerisen ngok nir arirpe bbong nanu rrum ko nga marerri ko mariak tweni bbong nga jinibb parrul totonir ko parevji pinir. Nir ngok arij tere sev nga nir sete marongwose; ko para-jijki pirpe nanu rrum ngok ko nir.

¹³ Nowlir nga marloli jinibb marunge mñisij renge niber evi nga nir kele pararunge þisij. Daron nga marloli limjer nanu nga marsij nir nga nir kobbong armerreni, ko arir kele wor. Nir arloli kammanun ko arlokloksi kami; arini arlik korti tevi kami re nanen, ko daron ngok kele kobbong arok-loli silveni esij.

¹⁴ Daron nga marmeteni nesevin san, ko sete arongwose parmeteri nawone, ko armerreni parloli þisij ko pa tevi. Tetajer arloli nololien, ko sete arunge evter wor. Arteka kerasi nir nga batur mijkie van re nimet. Arvisiseni nir lweni nga nolor parvevna. Ko nale se Atua eplari pa nga muto pa ji nir, nga para-van re nejijkien ko suri.

¹⁵ Arlinglingi sel nga mumomsawos ko arsarr. Arvijuri sel se Balam nga mivi natu Boso. Ni emrreni temijpal nevöt nga murrormi þilai renge sel nga mñisij,

¹⁶ ko dongki sen ewer ore nga sete puloli. Dongki ngok erij tevi erpe jinibb, ko ewer ore murru lenglengen sen.

¹⁷ Jinibb nevisvisenien gerisen ngok nir arirpe mete nuwi nga mimes pa, ko arirpe nabor nga ling nga milep muwi sisamuse.

Atua ololi lat san oto metmet pa terair nga mimalik nga mimalik.

¹⁸ Arok-rij nale lenglengen ne kowkowrien nga pususture norrorrmien nga marsij nga jinibb mimrreni nanu ne niben kobbong. Renge murrun ngok arongwose parkerkerasi jinibb nga maralingi kurtweni bbong murrun ne nemalik nir, ko pirvei nir paran parlengleng kele.

¹⁹ Jinibb nevisvisenien gerisen ngok nir arok-werai tevi jinibb nir nga parivel sisarow; ko nir lweni sete arivel sisarow, ko arivi ma demij maur re murrun nga pulokloksir. Sete arivel sisarow rragrag, suri daron nga murrun san mīlai tweni jinibb san nga sete orongwose putor ore, ko mīnren ko erpe demij maur ko pa renge murrun ngok.

²⁰ Jinibb san nga murongwose mīrres Iesu Kristo Numal se kerr, evel lingi pa murrun ne iel ngatan nga muloli ni mur-rokitkit. Ko poro vitunen pian kele ko pīsarr kele renge murrun ngok nga nanu ngok parwowomu kele e ni, ngok nekaien se morok pīsij kele wor pīasi nekaien nga muto womu ren daron nga sete murongwose wore Iesu.

²¹ Erres pēlak renge jinibb nga mirpok san nga poro pa sete purongwose sel nga musorsan ko nale nga muon, asie nga ni murongwose ko mivijuri beblen bbong, mian ko mīvel lingi kele mirpok.

²² Murru jinibb nga mirpok eviseni nga nale ngok ewretun nga muwra ‘Guli olwi kele van orroi lweni sev nga mulu tweni.’ Ko eviseni kele nale ngok nga muwra ‘Berpēr nga muwokwok olwi kele van epēpalos luwi kele renge laplap.’

3

Rijrijen tweni daron nga Iesu pia-luwi kele e vini

¹ Selek nir, ngel evi naul suk erwen tevi kami. Renge naul suk nga eru ngok nomok-lai nale nga puwni kami, nga puloli norrorrmien se kami pusorsan pīrres.

² Numrreni kaprrormi tutune nale nga propet nga maron nir marwera tweni pa tuwi ko, tevi neseseiren se Numal Iesu Kristo nga aposol nir marlai tevi kami.

³ Ko ngel evi norrorrmien nga milep san nga kaprongwose, nga re nabong nga vitu ngel nir, jinibb sopor parini nga murrur pimrreni sev nga mīsiij. Nir parsopsop tevi kami ko parrowrowe nosurien se kami.

⁴ Parsusi parwera “Ai, pīrpesē le va-jin? Rijrijen sen owrai pa nga pivini, ko ean ngabe pae? Birterawareng se kerr, artevnir pa osuw, ko sete nanu san ermali wor. Etipatun tuwi jer pa evini ejpari

lelingenok, ko nanu jijle arsorsan bbong erpe nga marto.”

⁵ Arij erpok ko arkikiorore metali re nanu san, ngel: Renge tuwi jer pa Atua erij, ko melrin ko dan orpelari. Ela nuwi ololi dan e, ko dan ermali.

⁶ Ko erpok kele, ela nuwi ko olokloksi dan, re daron se Noa.

⁷ Ko melrin ko ngatan nga morto lelingenok, nale se Atua emetmet ore nuru, ortiriv ko vajin nga nabb pia-ani nuru. Nale ngok purrul totkoni pianan pijpari nabong nga milep nga Atua pia-wera suri lat nga pia-to suri tevi jinibb nga marsij nir, ko puloli nir para-jijki suri.

⁸ Selek nir, lut san kele nga kaprrormi jipari, erpel: Sia evi nuvasngavōl vesan (1000) osorsan kobbong tevi nabong sansan renge nelesien se Numal.

⁹ Jinibb sopor arrormi Numal se kerr ololola pēlak nga sete ololi rijrijen sen eplari engavil; ko sete erpok. Okloli norrorrmien sen epriv nga pītravi kami, suri sete emrreni nga jinibb parjijki. Emrreni ma nga jinibb jijle parieni norrorrmien ser suri nololien ser.

¹⁰ Ko nabong se Numal se kerr pīrmali pirpe nga jinibb venao mivini, renge daron nga kerr sete rramrongwose. Ko renge nabong nga milep ngok, drrela nanu nga milep piap mare, ko melrin pijijki. Nabb nga mīn milep pīani moju nir van ko parjijki, ko ngatan kele tevi nanu jijle nga marto ren parjijki.

Bongsi nale

¹¹ Suri pianan ko nanu jijle ne iel ngatan parjijki pīrpok, ko kami kapmetmet ko wor mauren se kami pīrres. Kami kapon ko wor, ko murru kami pīrres jijle re nanu pētpēti nga kamloli.

¹² Kaptirive nabong nga Atua pia-vini ren, ko kapmajing tweni nga nabong ngok pivini pingavil. Daron ngok, nabb pīani nanu tokoklai ne melrin parjijki, ko moju parliv.

¹³ Ko Atua owrai pa nga nabong sopon pia-lingi ngatan ko melrin nga mimerr, nga murrun nga musorsan mīrres kobbong puto ren. Ko rramok-tiriv rijrijen sen ngok.

¹⁴ Ko selek nir, kerr jijle rramtiriv tweni nabong se Atua. Ko daron nga kamoktiriv tweni nanu ngok nir parremali, kami kappēlak ko wor pilep nga kaploli mauren se kami puwokwok pīrres rengen no Atua, ko kaplik rengen demat.

¹⁵ Numal se kerr nolon epriv temijpal nga mok-teravi kerr. Ko erres nga rraplesi murrun sen ngok evi sel se kerr nga rraplesi mauren ren. Tasi kerr nga rrammerreni ngok Pol oli naul san tevi kami

nga musþe iok kele, rengo norongwosien nga Atua m̄ilai tevi.

¹⁶ Tetajer re naul sen nir oksuþe suri nanu ngok nir. Ko lat sopor re naul se Pol nir eterter nga jinibb parongwose. Jinibb nga sete batur mivter; ko jinibb nga norrorrmien ser sete musorsan, arieni murrū nale ngok enije, erpe marok-loli pa re nale nga marto pa sopen rengo Naul On. Re murrūn ngok nir arlokloksi lwenir; ko para-jijki ko suri.

¹⁷ Ko selek nir, kamrunge pa nale nga puwni kami. Re iok, kapmetmet ko wor þirres; poro pijki, ko nir ngok nga sete martori murrūn nga musorsan tarevei kami rengo nale gerisen ser nga tuloli takator jabble lat nga m̄irres nga kamtur e, ko tuloli takvitan.

¹⁸ Tetajer, kerr rraplik ko wor ko rrapimare kele rengo liken se kerr rengo sel nga rraprongwos rurrngi merrenien se Iesu Kristo, Numal se kerr ko m̄er nga mokla mauren tevi kerr, nga mok-wilwil se kerr rengo nolon nga m̄irres þelak. Tetajer rrapurōvi Kristo ko rraposuri, þitipatun lelingenok pianan pijpari tuwi ngok vini. Pirpok.

**Naul nga
JON
Muli Womue
Batu nale nga mivsvseni
lut nga parmteni naul
ngel puto suri**

Rrek Jon nga muli naul ngel evi Jon nen nga muli nospen nga m̄irres ivajin, ko nga m̄ilesi kele bori sen ko muli tweni mivi naul nga vitu jer nen renga Naul On nga Mimerr. Ko naul ngel nga rramveruse Naul (rrek Leta) nga Jon muli womue, ni oli van ji kalesia p̄t̄p̄eti nir. Ko ni owra batu merrenien oto ji Atua, ko kerr rrapmerrmerreni wor kerr ko. Ko erpok orongwos kerr rrapasie murrun nga marsij ne iel ngatan.

Nale ne mauren

¹ Namulul tevi kami suri Nale ne mauren nga muto pa tuwi musuw, ko Atua mia-loli nanu jikle vajin. Namrunge mauren nen ko pa ko namlesi ko pa tevi mete kem mawos. Nammeteni ko namjipari nevre kem e.

² Daron nga Atua miviseni mauren nen, kem namlesi ko pa, ko namwerai tevi kami suri mauren nga muto tuwi ngok vini tevi Atua Tata, nga muloli kerr rramrongwose vajin.

³ Sev nga namlesi pa ko namrunge pa, namwerai tevi kami kele, puloli nga kami kappitevi kem kele renga gortien se kem tevi Atua Tata ko Natun Iesu Kristo.

⁴ Ko namuli erpok nga neiren se kerr pokrrs kem̄kan̄e.

Atua evi moron

⁵ Ko ngel evi nospen nga namrunge pa ji Natun Iesu ko namwerai vajin tevi kami: Atua evi moron, ko nemalik ejki rres nawon ji ni.

⁶ Ko niko, poro kerr rrapwerai rramloli gortien tevi ni, daron nga murru kerr muto re nemalik kobbong, rramkerkeris ko sete rramok-loli osorsan tevi weretunen.

⁷ Ko poro murru kerr puto re moron, pirpe Atua m̄ilik pa re moron, rramok-loli gortien tevi kerr sisamis, ko drra Iesu Kristo Atua Natun okrrawe tweni kerr renga nololien jikle.

⁸ Poro rrapwerai nololien se kerr ejkie, rramok-kerkerasi lweni bbong kerr, ko weretunen ejki ji kerr.

⁹ Ko poro rrapwera tweni nololien se kerr tevi Atua, rramrongwose erres nga Atua puloli sev nga mumomsawos ko p̄ilai

tweni nololien se kerr ko p̄irrawe tweni kerr renga sel nga marsij.

¹⁰ Ko poro rrapwera “O, kerr sete rramloli nololien te”, ngok erpe rramwera “Atua ekerkeris kobbong”, ko nale sen ejki ji kerr.

2

Kristo nga mokpitemi kerr

¹ Nomok-uli naul ngel tevi kami, natuk nir, nga p̄ijle totoni norrorrmien se kami nga sete kaploli nololien kele. Ko poro kami san puloli kele pirpok, ko jinibb nen otoo nga p̄irij tevi Atua Tata nga p̄ilai mauren tevi kerr, evi Iesu Kristo nga mumomsawos.

² Ko Kristo esan evi jinibb nga p̄itlasi nololien se kerr, suri mijen sen. Ko sete nololien se kerr kis kobbong, ko nololien se jinibb jikle ne iel ngatan.

³ Ko poro rraptori totoni nale se Atua, ko ngok rramrongwose erres nga rramrongwose ni.

⁴ Poro jinibb san puwra “O, nurongwose ni”, ko sete otori totoni nale sen, morok ekrekris, ko weretunen ejki ji ni.

⁵ Ko si nga moktori totoni nale sen evi ni nga merrenien se Atua muto jile pa jin musuw, suri emrreni Atua elep. Ko renga nanu san rramrongwose nga rramkorti pa tevi Atua, ngel:

⁶ Si nga muwrai nga mukorti pa tevi Atua, murrun pusorsan ko wor tevi murru Iesu Kristo.

Nale neseseien nga mimerr

⁷ Selek nir, nale neseseien nga moli tevi kami ngel sete emerr. Ejki, evi nale nga m̄itra pa san, etipatun daron nga kamivi rrongvi kalesia e. Nale nga m̄itra ngel evi nale nga kamrunge pa musuw.

⁸ Ko nuwretun, nale nga moli tevi kami emerr kele. Suri lelingenok nemalik evanan pa pijjiki, ko moron weretunen omor pa. Eplari pa erpok renga liken se Kristo ko re kele liken se kami.

⁹ Isi nga muwra ni elik pa renga moron, ko mungasi tasin, osorsan erpe nga ni m̄ilik malum re nemalik mivini mijipari lelingenok.

¹⁰ Isi nga mimrreni tasin elik pa renga moron, ko nanu san ejki kele nga puloli m̄nren pivotan van re nololien kele.

¹¹ Ko si nga mungasi tasin elik re nemalik, otong nawon ko sete orongwose lat nga mivel ren, suri nemalik ololi meten orrorr.

¹² Natuk welili nir, nulul tevi kami suri Atua etlasi pa nololien se kami suri Kristo.

¹³ Tata nir, nulul tevi kami suri kamrongwos pae ni nga m̄ilik pa tuwi musuw. Melakel nir, nulul tevi kami, suri kabb̄ot ore pa nem̄in nga m̄isij ko kamtorrlai.

¹⁴ Natuk welili nir, nulul tevi kami kele, suri kamrongwose Atua Tata; tata nir, nulul tevi kami, suri kamrongwos pae ni nga m̄ilik pa musuw reнге daron nga womujnen. Melakel nir, nulul tevi kami suri kamterter; nale se Atua emaur reнге nolo kami pa, ko kabböt ore pa nem̄in nga m̄isij ko kamtorrlai.

¹⁵ Sete kapmerreni iel ngatan ko nanu nga marivi ne iel ngatan. Poro kapmerreni iel ngatan, ko sete kamrongwos kapmerreni Atua Tata, ejki.

¹⁶ Suri nanu jikle nga marivi ne iel ngatan, nga nolo jinibb m̄ilai, ko marlesi ko marmerr̄eni, ko nanu jikle nga jinibb m̄ir ko nolon mian mare suri, sete san evel ji Atua Tata vini; totoklai eplari reнге iel ngatan kobbong.

¹⁷ Ko ngatan ngel ko nanu jikle nen nga jinibb nen marmerr̄eni arok-jijki. Ko si ma nga mokloli marongen se Atua pilik ko wor tetajer pijpari tuwi ngok vini.

Devje nuval se Kristo

¹⁸ Natuk welili nir, sete mia-periv nga iel ngatan pusuw. Erpe kamrunge pa nga devje nuval nen se Kristo pia-vini; ko lelingenok, devje nuval se Kristo elep pa marpelari musuw. Ko ngok rramrongwose nga sete mia-periv iel ngatan pusuw.

¹⁹ Devje nuval ngok nir, womu arlik reнге gortien se kerr. Ko sete arivi kalesia weretunen, ko arivel lingi kerr. Poro parweretun nga marpatevi kerr reнге gortien se kerr, ko parlik ko wor tevi kerr; ko ejki. Ko suri arivel lingi pa kerr, ko eplari erres nga sete nir san reнге nir ngok evi jinibb weretunen reнге gortien se kerr.

²⁰ Ko kami ma, Kristo, Jinibb On se Atua, elai pa Ner̄in On tevi kami osuw; ko kami jikle kamrongwose.

²¹ Niko muloli nuli naul ngel kele tevi kami. Sete suri kamrrelenge sev nga mivi weretunen, ejki. Nuli naul ngel tevi kami suri kami kamrongwos pae weretunen, ko kami kamrongwose nga gerisen sete orongwose piplari reнге weretunen.

²² Ia, ko jinibb si evi botgerisen? Jinibb nga mokwera i nga "Iesu sete evi Kristo nga Atua mukoni". Mernen ko evi devje nuval nen se Iesu Kristo, nga mutur telure Atua Tata ko Natun Iesu.

²³ Nale ngok evi weretunen, suri daron nga jinibb mutur telure Natu Atua, ko otur telure Atua Tata kele ko pa, ko Atua Tata sete eptevi ni. Ko jinibb nga muwrai tweni nga muosuri Natu Atua, Atua Tata kele eptevi ni.

²⁴ Erpok, kaplingi nolo kami tetajer re nale nga kamrunge womujnen e pa musuw. Poro kaplingi nolo kami tetajer re

nale ngok, ko kaplik korti tetajer tevi Atua Natun ko Atua Tata.

²⁵ Ko ngel le evi merrenien nga ni muwra pia-lai tevi kerr, mauren nga muto tuwi ngok vini.

²⁶ Nuli nale ngok van ji kami tweni nir nga marwera parkerkerasi kami kapan re nololien nga marsij.

²⁷ Ko kami ma Kristo ejivreni pa Ner̄in sen re kami. Ko sete kama-pej kele mun m̄ir san nga pivisviseni kami, suri Ner̄in oto pa re kami osuw, ko okvisviseni kami suri nanu jikle. Ko sev nga mivisviseni sete evi gerisen, evi weretunen jerjer. Kaposuri nevisvisenien nga Ner̄in m̄ilai tevi kami, ko kaplik korti tevi Kristo.

²⁸ Pirpok, natuk nir, mauren se kami pukorti ko wor tevi Kristo. Ko pipok, daron nga pia-remali e, ko norrorrmien se kerr oto eterter pa. Setemun rramamanun ko setemun rrama-teptepi reнге non re nabong nga milep nga pia-vini e.

²⁹ Kami kamrongwos pae nga sel se Atua omomsawos kobbong. Ko ngok ma, kamrongwose kele nga nir jikle nga marokloli nanu nga mumomsawos arivi natu Atua.

3

Kerr rramivi Atua natun

¹ Kaplesi merrenien nga milep nga Atua Tata m̄ilai tevi kerr! Merrenien sen elep p̄elak nga miveruse kerr Atua natun. Ko weretunen rramivi pa natu Atua. Erpok ko, suri jinibb ne iel ngatan nir sete arongwose Atua, ko niko nir sete marongwose kerr.

² Selek welili nir, rramivi natu Atua pa osuw. Ko sete eplari wor erres nga rrapa-irpese. Ko kerr rramrongwose nga daron nga Kristo piplari e, kerr rrapa-irpe ni, suri reнге daron ngok rrapa-lesi momsawose ni reнге mete kerr.

³ Ko jinibb si nga moklingi nolon m̄iterter reнге Kristo mirpok, okloli lweni ni owokwok kele, erpe nga Kristo kele muwokwok.

⁴ Si nga mokloli nololien, erpe otor otvi pa nale neseseien se Atua. Suri sel ne nololien erpok ko, nga martor otvi nale neseseien se Atua.

⁵ Ko kamrongwose nga Kristo eplari pa nga p̄ilai tweni nololien se kerr; ko nololien san ejki ji ni.

⁶ Jinibb nga mauren sen mukorti tevi Kristo setemun okloli nololien. Ko jinibb nga marokloli nololien sete arlesi wose Kristo, ko sete arongwose ni.

⁷ Natuk welili nir, sete kaploli jinibb parkerkerasi kami. Si nga mokloli sev nga

mumomsawos, ni omomsawos, erpe kele nga Kristo mumomsawos.

⁸ Ko si nga mokloli nololien evi se Demij. Suri Demij ololi nololien sen oto pae, etipatun re daron nga iel ngatan setewor miplari e. Suri nololien se Demij muto pa, evi batun nga Iesu Atua Natun mivini kele nga pulokloksi sev nga Demij muloli.

⁹ Si nga mivi natu Atua setemun mia-loli nololien tetajer, suri wenen se Atua emaur rengen. Ko sete orongwose puloli kele nololien tetajer, suri evi pa natu Atua.

¹⁰ Rramrongwose rraplesi wose p̄irres si nga marivi natu Atua ko si nga marivi natu Demij mirpel ngel: Si nga sete mokloli sev nga mumomsawos rreknga sete mokmerreni tasin, sete evi natu Atua.

Rrapmerrmerreni kerr

¹¹ Nos̄pen nga kamrunge n̄itipatun re nga kamivi womu kalesia e erpel: rrapmerrmerreni wor kerr ko.

¹² Sete rrapirpe Ken. Ni evi se neñin nga n̄isij, ko erevji pini tasin Apel. Suri sev nga mirevji pini Apel? Suri, sev nga Ken mokloli arsi, ko sev nga Apel mokloli, arres. Ko niko muloli Ken mungasi Apel suri, ko mirevji pini.

¹³ Tasik ko jojik nir, sete kaptaol daron nga jinibb ne iel ngatan nir marungasi kami.

¹⁴ Rramrongwose nga rramasi pa renge mijen ko rramini re mauren. Rramrongwose erpok suri rrammerreni tasi kerr nir. Si nga merrenien sen mijkie elik malum renge sel ne mijen.

¹⁵ Si nga mokungasi tasin evi m̄er nga mokrevji pini jinibb. Ko kamrongwose nga jinibb nga mirpok sete elai wor mauren nga muto tuwi ngok vini ko.

¹⁶ Ko ngel le eviseni kerr nga merrenien erpese: Kristo emarong pa nga mimij suri kerr. Ko kerr rrapmaronge kerr kele ko wor nga rrapmij suri tasi kerr nir.

¹⁷ Ko poro jinibb nga joron milep p̄ilesi tasin nga joron san mijkie, ko ololi nolon okul tevi tasin, ko suri sev puwrai nga merrenien se Atua oto jin?

¹⁸ Natuk welili nir, merrenien se kerr sete pivi nale kobbong ko rijen; ko pivi merrenien weretunen ko wor, nga rramok-loli musorsan renge mauren se kerr.

Norrormien se kerr nga n̄iterter re no Atua

¹⁹ Erpok, rramrongwose nga rramivi jinibb ne weretunen, ko ngok ma orongwose puloli norrormien se kerr p̄iterter renge no Atua.

²⁰ Sete rraprorrmi nale sev nga norrormien se kerr mokrorrmi nga mokwer lokloksi kele bbong kerr rengen. Suri Atua

ean wor mare easi norrormien se kerr, ko orongwose nanu jijle.

²¹ Ko selek welili nir, poro norrormien se kerr sete mokwer lokloksi kerr; ko rrapan ji wor Atua ko, nga nolo kerr sete pintutu.

²² Ko poro rrapvijuri sel nga ni n̄ir ren, ko rraposuri nale neseseien sen, rramrongwose rraplesi sev nga rramngoni ji ni.

²³ Nale neseseien se Atua owrai erpel, nga rraposuri Natun Iesu Kristo, ko rrapmerrmerreni kerr pirpe Kristo muwrai pa tevi kerr.

²⁴ Si nga mokosuri nale se Atua elik korti tevi Atua, ko Atua okorti tevi ni. Ko suri Neñin nga Atua n̄ilai tevi kerr pa, rramrongwose nga Atua elik korti pa tevi kerr.

4

Neñin ne weretunen ko neñin ne gerisen

¹ Selekt nir, propet elep marok-ivel ko marok-wera "O inu ma Neñin se Atua elik re inu". Ko sete erres nga kaposuri nir jijle. Kaprrowrowe nir ko wor ko kaplesi poro neñin nen eplari ji Atua rreknga ejki. Suri propet ne gerisen elep marivel sarrsarr iel ngatan.

² Kapa-rongwose pia-irpel ko poro nga evi Neñin se Atua; nir nga marok-supe nga daron nga Iesu Kristo mivini iel ngatan niben evi jinibb rres erpe kerr; nir ngok Neñin nga miplari ji Atua oto pa ji nir.

³ Ko jinibb nga mokwera "Daron nga Iesu mivini iel ngatan, niben enije", ko morok Neñin nga miplari ji Atua ejki ko muto rengen ngok. Neñin nga muto jin ngok evel ji devje nuval se Kristo ko vini. Rramrunge pa nale nga ni pia-vini, ko lelingenok elik tevi pa kerr iel ngatan osuw.

⁴ Ko natuk nir, kami kamivi pa jinibb se Atua. Ko kabböt ore pa gerisen se propet ngok nir osuw, suri Neñin nga muto renge kami ngok, derteren nen easi neñin nga muto re jinibb ne iel ngatan nir.

⁵ Jinibb gerisen ngok nir arok-ivel arsupe suri norrormien ne iel ngatan, suri arivi pa jinibb ne iel ngatan. Ko jinibb nir armuronge nir, suri nir kele arivi jinibb ne iel ngatan kobbong.

⁶ Ko kerr ma rramivi jinibb se Atua, ko nir nga marongwose Atua arok-muronge kerr. Ko nir nga sete marivi jinibb se Atua, sete arongwose parmuronge kerr. Renge sel ngok ko, rramrongwose nga isi evi neñin ne weretunen ko isi evi neñin ne gerisen.

Batu merrenien oto ji Atua

⁷ Selek nir, rrammerrmerreni wor kerr ko, suri merrenien evel ji Atua vini. Si nga merrenien muto jin evi pa natu Atua ko orongwose Atua.

⁸ Ko si nga merrenien mijki jin sete orongwose Atua, suri batu merrenien oto ji Atua.

⁹ Ko Atua eviseni merrenien sen tevi kerr nga mukoni Natun sansan bbölbööl mivini iel ngatan, nga puloli sel se kerr nga rraplai mauren renge ni.

¹⁰ Merrenien erpel: sete evi nga kerr rrammerreni Atua, ejki. Atua ko wor emrreni kerr elep, ko okoni Natun nga pivini pimij nga pitlasi tweni nololien se kerr.

¹¹ Selek nir, suri Atua emrreni kerr elep erpok, niko kerr kele ko wor rrammerrmerreni lululweni kerr.

¹² Jinibb san setewor elesi Atua nabong san. Ko daron nga rrammerrmerreni lululweni kerr, ko Atua elik vajin liven e kerr, ko merrenien sen oto jile pa ji kerr osuw.

¹³ Atua elai pa Neñin sen tevi kerr, ko ngok rramrongwose erres nga rramkorti erres tevi Atua, ko Atua okorti tevi kerr.

¹⁴ Rramlesi pa nga Atua Tata se kerr mukoni Natun mivini nga mĩsre nololien se kerr, nga pilai mauren tevi kerr jinibb ne iel ngatan. Ko rramok-werai nga nanu ngok evi weretunen.

¹⁵ Si nga muwrai tweni nga Iesu evi Natu Atua, Atua okorti tevi ni, ko ni okorti tevi Atua.

¹⁶ Ko kerr rramrongwose ko rramosuri merrenien nga milep nga Atua mimrreni kerr rengen.

Atua evi batu merrenien, ko si nga moklik renge merrenien oklik korti kele tevi Atua, ko Atua oklik korti tevi ni.

¹⁷ Daron nga merrenien se Atua oto jile pa erpok ji kerr osuw, ko rrapa-tur pitertter renge nabong nga Atua pia-wera suri lat nga puto suri tevi jinibb nir, suri mauren se kerr iel ngatan osorsan pa tevi Kristo.

¹⁸ Jinibb nga mimrreni Atua setemun orongwose pimtutu. Daron nga merrenien se Atua muto jile pa ji kerr musuw, ko oji tweni vajin metutuen. Ko jinibb nga mokmetutu nga Atua putor vitrangi, rrekma merrenien se Atua setewor oto erres jin.

¹⁹ Kerr merrenien se kerr oto pa, suri Atua emrreni lenglengen wor kerr womujnen.

²⁰ Si nga muwra "O inu numrreni Atua", ko mungasi tasin, evi jinibb ne gerisen kobbong. Sete orongwose pimrreni Atua nga ni sete nĩlesi re meten, poro ni sete pimrreni tasin nga ni nĩlesi pa musuw re meten.

²¹ Ko ni le nale neseseien nga Kristo muwrai tevi kerr; muwra jinibb nga mimrreni Atua pimrreni kele wor tasin ko.

5

Rramasie murru iel ngatan

¹ Si nga muosuri nga Iesu evi Kristo nga Atua mukoni, evi pa natu Atua. Ko si nga mimrreni Atua Tata, emrreni natun kele.

² Poro rrapmerreni Atua pilep, ko rrapok-vijuri nale neseseien sen, ko ngok ma evi sel nga rramrongwose nga rrammerreni natun nir kele.

³ Poro rrapmerreni Atua, ko ngok rrapvijuri nale neseseien sen. Ko nale neseseien sen sete eterter nga kerr rrapvijuri.

⁴ Suri kerr jijle nga rrañiak pa ji Atua, rramrongwose rrapasie murru iel ngatan. Ko sel nga rrapasie iel ngatan erpel: rramok-asi suri rramosuri Iesu.

⁵ Sete jinibb elep arongwose parasie murrun nga marsij ne iel ngatan, nga parloli pusorsan. Jinibb nga muosuri nga Iesu mivi Natu Atua kobbong orongwose piasii.

Sev nga Atua muwrai suri Iesu

⁶ Iesu Kristo evi jinibb nga mivini; ko nuwi nga marpptaes ni rengen ko drran nga mĩsesei daron nga mimij e, ko erpe nanu ngok ko orviseni ni. Sete nuwi kobbong nga miviseni ni, ko nuru korti, nuwi ko drran nga morviseni. Ko Neñin On kele okwerai tweni nga Iesu evi Natu Atua, ko Neñin On ngok evi pa weretunen.

⁷ Nir itul nga martur tevi Iesu:

⁸ Neñin On, nuwi nga mipaptaese, ko drran nga mĩsesei daron nga mimij e. Ko nir itul ngok arwera nanu sansan kobbong.

⁹ Ko rramosuri sev nga jinibb marwerai; ko sev nga Atua muwrai ma easi kele wore nanu nga jinibb muwrai. Ko nanu itul ngok ariwi nanu nga Atua muwrai tweni Natun. Rrek rraposuri ko wor.

¹⁰ Ko si nga muosuri Natu Atua otori ko pa nanu nga Atua muwrai renge nolon osuw. Ko si nga sete muosuri Atua erpe owra "Atua ekrekris kobbong", suri sete osuri nanu nga Atua muwrai tweni Natun.

¹¹ Ko ngel evi nanu nga Atua muwrai, nga ni elai mauren nga muto tuwi ngok vini tevi kerr, ko mauren nen oto ji Natun.

¹² Si nga muosuri Natun re nolon ela pa mauren nen. Ko si nga sete muosuri Natu Atua re nolon setewor ela mauren nen.

Mauren nga muto tuwi ngok vini

¹³ Nuli naul ngel tevi kami nga kamosuri nise Natu Atua, nga kaprongwose nga kamlai pa mauren nga muto tuwi ngok vini ko sete mia-suw nabong sopon.

¹⁴ Ko daron nga rramini re no Atua nga rraplot e, norrorrmien se kerr eterter pa. Rramosuri nga poro rrapngoni nanu san ji ni nga musorsan tevi marongen sen, ni purnge verusen se kerr ko.

¹⁵ Ko suri rramrongwose nga ni ornge pa verusen se kerr, ko niko rramrongwose kele nga nanu jijle nga rramngoni ji ni arivi pa se kerr osuw.

¹⁶ Poro kami san p̄ilesi tasin puloli nololien nga sete pivi nololien nga pialai ni van re mijen, ni pulot ko wor suri tasin ngok. Ko Atua p̄ilai mauren tevi tasin nga muloli nololien ngok. Ko nololien nga mok-lai jinibb van re mijen oto wore, ko sete nuwra kaplot tevi Atua suri iok, ejki.

¹⁷ Murrun jijle nga sete marsorsan arivi nololien, ko sete nololien jijle arterter p̄elak. Nololien otoa nga sete mok-lai jinibb van re mijen.

Bongsi nale

¹⁸ Rramrongwose isi nga m̄iak ji Atua sete okloli nololien tetajer, suri Iesu Natu Atua okmetmete, ko nem̄in nga m̄isij sete orongwose pijpari ni.

¹⁹ Rramrongwose nga kerr ngel, rramivi jinibb se Atua. Ko nir p̄etp̄eti nga martur renge sel ne iel ngatan arlik renge derteren se nem̄in nga m̄isij.

²⁰ Ko rramrongwose nga Natu Atua evini pa iel ngatan, ko elai pa derteren tevi kerr nga rraprongwose Atua weretunen. Ko mauren se kerr okorti tevi Atua nga mivi weretunen, suri mauren se kerr okorti pa tevi Natun Iesu Kristo. Ngok ko Atua nga mivi weretunen, ko ngok ko mauren nga sete murongwose pusuw nabong sapon.

²¹ Natuk nir, kapmetmet lululweni kami p̄irres, sete kaplengleng kapvijuri atua gerisen nir.

**Naul Erwen nga
JON
Muli
Batu nale nga mivsvseni
lut nga parmeteni naul
ngel puto suri**

Jon olul kele, ospē suri merrenien ko weretunen. Ko olul van ji 'lekter' san ko 'natun' nir, ko rrek iok ni owra puwra meling kalesia (jos) san.

Nale Womujnen

¹ Inu le nga mevi mērwomu ne Naim On, nuwra erres tevi nik, lekter san nga Atua mutobbobbue nik, ko nuwra erres tevi natum kele nir. Inu numrreni kami elep, suri rramkorti renge nale weretunen. Ko sete inu kis kobbong, nir jijle nga markorti renge nale weretunen armerreni kami erpok,

² suri weretunen nga muto pa ji kerr ko puto kele tevi kerr tetajer.

³ Ngel evi loten suk tevi kerr nga rramlik renge nale weretunen, ko rramok-merreni jinibb nir. Atua Tata, tevi Iesu Kristo Natu Atua, porok-la se kerr tevi nolo nuru nga mūrres, ko porrorrmi kerr, ko porlai demat tevi kerr.

Weretunen ko merrenien

⁴ Inu nurnge erres nga mēlesi natum nir sopor marok-vijuri nale weretunen, erpe nga Atua Tata muwrai pa tevi kerr musuw.

⁵ Ko lekter, inu numrreni bowrai kele tevim nga kerr rrapmerrmerreni kerr pilep ko wor. Inu sete nuli nga beawerai neseseien nga mimerr kele san tevim, ejki. Neseseien ngok, rramrunge pa womujnen osuw.

⁶ Ko murrun nga rramok-merrmerreni lenglengen kerr e, ngok evi nga rrapvijuri neseseien nga Atua muwrai. Neseseien se Atua ngok rramrunge pa osuw daron nga rramrunge nale nga mūrres womujnen, nga muwra mauren se kerr puwun saut ko wor renge murrun nga rrapok-merrmerreni kerr pilep.

⁷ Jinibb ne gerisen elep pa marivel karkar iel ngatan musuw. Nir ngok sete arok-werai nga, daron nga Iesu Kristo mivini iel ngatan, niben erpe jinibb rres kobbong. Nir nga marirpok arivi jinibb ne gerisen mawos, ko arivi devje nuval se Kristo.

⁸ Kapmetmet nga taktor jabble sev nga kampēlak tweni, ko kapa-lai wor nowlin pētpeti.

⁹ Jinibb si nga mivel ngasu ko sete mivijuri nale neseseien se Kristo, Atua sete elik re mauren sen. Ko jinibb si nga mivijuri nale neseseien se Kristo, Atua Tata tevi Natun Iesu Kristo, nuru korti orlik tevi renge nolon.

¹⁰ Poro jinibb san pivini ji kami ko sete owra visviseni nale se Kristo, ko sete kaplai pian loloim se kami. Poro jinibb nga mirpok pivini, ko sete kapwrai erres tevi.

¹¹ Suri jinibb nga puwrai erres tevi mēnnen, ko erpe ni kele ko ok-korti tevi renge majingen nga marsij sen.

Bongsi nale

¹² Nale elep nga bowrai tevi kami, ko numusus boli tweni renge naul. Ko norrorrmien suk oto eterter erpel, nga bea-vinuk kele bea-lesi kami, ko rrapa-jiljilwer sopon. Renge murrun ngok kerr jijle rraprongwos rrapa-runge pīrres pilep ren.

¹³ Jojim nga Atua mutobbobbue, natun nir arwerai erres wor tevi nik.

**Naul Itolin nga
JON
Muli
Batu nale nga mivsvseni
lut nga parmeteni naul
ngel puto suri**

Jon olul kele, ko owra kalesia nir par-wilwil se nir nga marok-ivel tweni par-supupe Numal tevi jinibb nir. Ko oli van ji kalesia san nga nisen Gaeas, nga mivi burtur (lida) san, ko nga mokmetmete erres nir nga marok-ivel mirpok.

Nale womujnen

¹ Inu le nga mevi m̄erwomu ne Naim On ko nuwra erres tevi nik Gaeas, nga memrreni nik milep.

² Selek, nurongwose osuw nga mauren som renga no Atua oto erres. Ko nomok-lot suri nga liken som puto p̄irres renga nanu jijle nga marres, ko nibem kele p̄iterter.

³ Tasi kerr sopor arpelari pa osuw, ko arwerai nga nik kutur eterter nga kumtori nale weretunen ne nale nga m̄irres ngel, ko nga nik komok-vijuri nale weretunen tetajer renga mauren som. Daron nga mornge, ko nuir elep suri.

⁴ Daron nga mornge natuk nir marok-vijuri nale weretunen tetajer renga mauren ser, ngok ololi inu nuir kele wor easi nanu m̄inij kele nir.

⁵ Selek, nik komok-tori majingen eterter. Ko tasi kerr ngok nga marinuk jim, poro arivi jinibb nga dis nar mia-jumjum bbong, ko nik komok-metmete nir erres.

⁶ Ko nir arwerai tweni pa osuw tevi kalesia ne iel nga nik kumrreni nir elep. Ko daron nga parivel lingi naim som, erres nga kuppitevir renga nanu jijle renga murrun nga Atua p̄ir rengen,

⁷ suri lartul ngok nir arlinglingi siser suri majingen se Kristo kobbong, ko sete arlai nanu san ji jinibb nga sete marivi kalesia nga partotori.

⁸ Erres nga kerr ma rraplai tevi lartul ngok nir sev nga nevrer marmumrrol ren, nga rrapmajing korti tevir renga majingen ser nga parwerai tweni weretunen.

Diotrepes ko Demitrias

⁹ Inu nuli naul san pa osuw van ji kalesia nga sisom. Ko Diotrepes orong tweni nale suk, suri emrreni p̄ilngi lweni ni puwomu.

¹⁰ Ngok ma, poro bevinuk, ko bowrai tweni tevi m̄ernen murrun sev nga ni mokloli, ko bowrai tweni nale gerisen nga ni mokwerai nga poklokloksi liken suk. Ko murrun setewor osuw iok. Sete orongwose

p̄itkai kele tasi kerr ngok nir parini re naim sen; ko mare nen kele, okwer ore nir nga marwera partekair van re naim ser. Ko okoji tweni kele sele tasi kerr ngok nir renga Naim On.

¹¹ Selek, sete kupvijuri murrun nga m̄isij. Kupvijuri murrun nga m̄irres kobbong. Si nga mokloli murrun nga m̄irres evi natu Atua. Ko si nga mokloli murrun nga marsij rrek setewor okorti tevi Atua nabong san.

¹² Ko Demitrias, jinibb jijle arok-werai ni evi jinibb nga m̄irres, ko nale weretunen se Atua kele eviseni nga ni osorsan. Ko inu kele nulai devjen sen nga nuwrai ni erres osorsan, ko nik kurongwose nga nale suk ngel evi weretunen.

Bongsi nale

¹³ Nale elep nga bowrai, ko sete numrreni boli tweni renga naul.

¹⁴ Ko norrorrmien suk oto eterter nga sete mia-periv rrek bea-lesim kele ko rropora-jiljilwer sapon.

¹⁵ Ngel evi loten suk, nga demat pipatevi nik. Sele kerr nir nga iel arwerai erres tevim. Ko kupa-werai erres sisamis tevi sele kerr kele nir nga iok.

**Naul nga
JUT
Muli
Batu nale nga mivsviseni
lut nga parmeteni naul
ngel puto suri**

Jut nga muli naul ngel evi tasi Jemes, ko niko evi tasi Iesu san. Ko ospê jinibb nevisvisenien gerisen, ko owra Atua putor vitrangî (panisem) nir. Ko owra kalesia nir parrul totkoni wor nosurien ser.

Jut owra erres tevi nir

¹ Inu Jut nuvi jinibb ne majingen nga Iesu mukonik, ko nuvi tasi Jemes. Nuli naul ngel tevi kami, ko nuwrai erres tevi kami nga Atua miveruse kami ko nga merrenien se Atua Tata mipatevi kami, ko nga liken se kami muto mîrres re Iesu Kristo.

² Ngel evi loten suk, nga Atua purrorrmi kami, ko nga puloli demat puto ji kami kele wor nga kalesia mauren se kami pian mare kele wor, ko nga murrun nga kapmerreni sele kami pimaaur pîterter kele wor.

Jinibb nevisvisenien gerisen

³ Selek nir, nurrormi elep nga boli naul ngel tevi kami tweni nosurien nga muto pa ji kalesia nir. Ko lelingenok nurnge erpe boli wor naul vinuk ji kami nga pususture norrorrmien se kami, nga puloli kaptur pîterter, ko kapirpe nato dosevin nga miverver ore natun tevi nale weretunen nga kamosuri pa musuw. Ngok nale weretunen nga Atua mîlai pa musuw, ko setemun mia-lai mînij kele, ejki.

⁴ Inu nurnge erpe jinibb nga martere Atua sopor arini pa arkorti kele tevi kami re gortien se kami nga kami sete kamrongwose. Nir ngok artori nale nga muwra 'rengê nolo Atua nga mîrres, ni ewilwil se kerr'; ko artur imare, ko arwera 'Niko, orongwos kerr rraploli tama nanu san, ko Atua sete mia-lolarsi kerr.' Ko arok-loli murrun nga marsij nir ser vajin. Ko arwera kele sete armerreni Iesu Kristo, nga ni kele kobbong mivi Numal ko Atua se kerr!

Atua pia-tor vitrangî jinibb nevisvisenien gerisen nir

⁵ Nale ngok kamrongwos pae erres osuw, ko inu numrreni bowra lilane kele tevi kami. Daron nga Atua mîlai tweni mîeri Isrel rengê vanu ngok Ijip, ko vitunen olokloksi nir nga sete marosuri, ko ololi armij.

⁶ Ko kaprorrmi ko wor anglo nir nga sete marir nga partori nais nga mian mare nga Atua mîlai tevir, ko armerreni wor partori nais nga mian mare jer wor. Niko ololi marwolu lingi siser woswos. Atua ekai totkonir e dil delrurr nga sete mia-maot nabong sopen, ko parlik rengê nermalik pijpari nabong nga milep nga Atua pia-tor vitrangir e.

⁷ Ko erres kaprorrmi kele ngaim nga eru ngok Sotom ko Gomora, ko lat sopen nga marto mori kele nuru. Nir arlengleng kele erpe anglo ngok nir, ko arloli esij tevi nesevin ko arloli esij tevi nir lululweni kele; ko arla norongen nga mîsij ne nabb nga mîin nga sete orongwose pimij nabong san. Nanu ngok ok-viseni nelesien nga milep tevi jinibb, nga parmetutu.

Jinibb nevisvisenien gerisen arivi jinibb nga marij mîsij

⁸ Ko lelingenok, nir ngok arok-loli erpok kele kobbong, arok-tere Atua. Armatur lesi bori ner ko artajer nga marloli murrun nga marsij rengê niber. Armusus Atua pimetmete nir, ko arij esij tere anglo nir ne melrin.

⁹ Ko numal se anglo ngok nir nga nisen Maekel, ni kele sete ololi erpok. Daron nga mîlai tevi demij suri nibe Moses nga nuru si nen pîlai, ko Maekel sete elngi ni van mare nga piwirr nale nga mîsij tevi demij, ejki, ko owrai bbong, "Numal Atua piwer orem!"

¹⁰ Ko nir ngok ma poro sete arongwose nanu san ko rrek parij pîsij ko pa suri. Murru nir erpe nanu rrum nga norrorrmien ser mijkie ko arloli bbong nanu nga nir marmerreni parlorir; ko murrun ser ngok kobbong oklokloksir.

Jinibb nevisvisenien arok-lokloksi jinibb

¹¹ Woi, kaplesi ta lartul lepel nir. Arvi-juri sel se Ken nga tuwi ngok. Ko suri norrorrmien ne nevôt oto pèlak rengê batur, ololi artor jabble sel ser. Ko arvitan van kele re nololien nga Balam, muloli nir artor otvi nale se Atua erpe Kora, ko parajiki kele pirpe Kora.

¹² Daron nga kamini kamser korti rengê nabong nga mîrres pèlak se kami, nir ngok arirpe nevôt nga milep san nga mutur ore sale, ko drav san puwlu vini, ko pîres ren ko pimawor. Nir arrorrmi lwenir kobbong. Arirpe nat nga mimot milep nga ling mîlai vini ko sete mus rragrrag. Arirpe kele duru nai nga re daron mawos nga pîlengi wenen, ko mutur nawon; ko jinibb arrangi tweni ko emijmij jer.

¹³ Erpe daptap nga marlelep ne dis nga marerrre ko melabbser marut peleplari; nir kele murrur nga marsij arpelari arirpe melabbse dis ngok. Arirpe moju

nga marvitan nga Atua mīlŋgi pa siser nga mimalik nga mimalik muto metmet terair.

¹⁴ Ko Inok nga mivi ebutun re metka se Atam, nga tuwi pa muwrai tweni sel nga musorsan ngok tevir, nga muwrai muwra 'Kaplesi, Numal Atua pia-rremali tevi anglo sen nga maron nir owun saut lenglengen

¹⁵ ko pia-wera suri lat nga puto suri tevi jinibb jījle nir, ko tevi nir kele nga marloli mīsij ko sete marosuri ko marij mīsij tevi nale nga mīsij nga marlai tevi Atua.'

¹⁶ Nir ngok arivi jinibb nga marok-loli nale ko marij mīsij tetajer. Arvijuri norrorrmien nga mīsij ser ko arij melmelas p̄elak, ko nale ser erpe neni rretrrun nga puloli partor sweri bbong sev nga marmmerreni.

Nale nga puwnir

¹⁷ Selek nir, kaprroormi ko wor nale se aposol se Iesu Kristo nir nga marlai tevi kami tuwi nga piviseni sev nga pia-rremali.

¹⁸ Arwerai pa tevi kami nga renge daron ne bongsi iel ngatan pusuw, jinibb sopor parmen keraji murru kami ko parvijuri murrun nga nir kobbong marmmerreni, nga sete mara-osuri rragrag Atua.

¹⁹ Jinibb nga maripok arongwose parloli kapsisamis, suri arvijuri norrorrmien ser, ko sete arvijuri Nem̄in On.

Murrun nga parmerreni temijpal jinibb

²⁰ Selek nir, kami kap̄elak ko wor nga kapini kapterter renge murrun ne nosurien nga muwokwok m̄irres nga miplari ji Atua. Kaplot ko wor p̄iterter renge derteren se Nem̄in On.

²¹ Ko kaplik renge mauren nga merrenien se Atua muto tetajer tevi kami, daron nga kamok-tirive Numal Iesu Kristo nga mok-rrorrmī kami nga p̄ilai mauren nga muto tuwi ngok vini tevi kami.

²² Jinibb sopor nga nosurien ser sete eterter ko norrorrmien ser elele, ngok kami kaprroormir ko wor.

²³ Ko nir m̄inij kele, kapwilwil ko wor ser erpe nga kapteseni twenir renge nabb. Ko re nir sopor sel nga marsij ser arrul totkoni nir. Ko kaprroormi nir, ko kaptelasi nololien ser. Ko kapmetmet p̄irres nga nalol nga mīsij ser ngok tuloli takvitan re nololien ser.

²⁴ Ko lelingenok, Atua sansan kobbong nga orongwose purrul totkoni kerr nga sete rrapvitan. Nī kobbong orongwos p̄ilai kerr van rrapur renge non re melrin, nga norrorrmien se kerr p̄ir temijpal.

²⁵ Atua ngok kobbong nga miwilwil se kerr ololi rramkorti tevi Iesu Kristo Numal se kerr nga rapsusi nise Atua pian mare, ko nga rrapwerai tweni nga ni evi Numal nga mian mare ko mutori derteren ko

nosrövien totoklai, m̄itipatun tuwi jer pa, mivini mijpari lelingenok, ko pianan sete orongwose pusuw nabong sapon. Pirpok ko.

Bori se JON

Batu nale nga mivsvseni lut nga parmeteni naul ngel puto suri

Jon nga muli naul ngel rrek evi Jon nen nga muli nospen nga mīrres ivajin. Daron nga ni etra sopon, mēri Rom nir arloli ni evan elik talev renge norour san nga nisen Patmos, suri okwera tweni nale se Iesu. Ko ie, ni elesi bori san, ko oli totoni. Norrorrmien nga milep nga miplari renge bori nen evi nga owretun derteren se mēri Rom nir elep, ko derteren se Atua elep asie wor. Ko niko sete erres nga kalesia nir parmetutu nga parwer tweni nise Iesu.

Nale elep ne Naul On Tuwi arremali renge naul ngel, ko arivi vajin nale teptepi nga jinibb minij sete orongwos purongwose. San evi nale nga muspe Babilon (batun 18), nga mujuji Rom. Ko nale owra Babilon pivitan, ko iok osoni lweni norrorrmien se kalesia nir van mare. Ko nir partiriv tweni daron san nga pia-vini nga mijen pijki mun, dingan pijki mun, ko norongen nga mīsij pijki mun (21:4).

Nale nga mīwer visviseni naul ngel

¹ Ngel evi naul ne bori se inu Jon. Nanu ngel nir, Atua evisenir tevi Iesu Kristo nga ni piviseni tevi jinibb sen nir sev nga sete ngasu para-pelari. Ko Kristo okoni anglo sen nga pivisenir tevi inu Jon, nga mevi jinibb ne majingen sen.

² Ko inu nuli tututweni nanu jijle nir nga mēlesir, arto renge naul ngel. Arivi nale se Atua, ko arivi weretunen nga Iesu Kristo miviseni tevik.

³ Neiren renge mēer nga mieveve naul ngel, ko neiren renge nir nga marunge nale se Atua ngel nir, ko marosurir. Suri daron evini mori pa nga nanu ngel nir parpelari.

Jon owra erres tevi meling kalesia ebut

⁴ Inu Jon, nuli nale ngel tevi kami renge meling kalesia ebut nga kamlik rrale renge vanu ngok Asia. Ngel evi loten suk, nga Atua nga muwowomu tuwi jerjer, ko nga mīlik lelingenok, ko nga pīlik tuwi ngok vini, tevi nerīn ebut nga marlik liven renge nai seksakel sen, pīlai demat sen puto tevi kami renge nalol nga mīrres pelak sen.

⁵ Ko Iesu Kristo nga mīwerwer tweni nale se Atua ko nga orongwos rrapvijuri, ni kele pīlai demat sen puto tevi kami.

Ni evi mēer nga Atua muloli mimaaur luwi kele wowomue re mijen. Ko ni emetmete numal jijle nir ne iel ngatan. Ni emrreni kerr elep, ko drran nga mīsiser etlasi tweni nololien se kerr, ololi rramiel sisarow vajin.

⁶ Ko ni ololi rramivi numal, ko rramirpe kele jinibb nga marok-sulsul tevi Atua Tata sen. Ko tetajer rrapsumsi nisen pian mare temijjal, ko sete rrapmosi nga rrapwerai tweni nga derteren sen ean mare temijjal. Pirpok ko.

⁷ Ko ngok kaplesi sete mia-periv nga pīrmali renge nabor nir vini, ko namet jijle puklu pimteni. Ko renge daron ngok, nir nga maruni sir rengen ko jinibb jijle ne iel ngatan parunge pīsij ko parting daron nga parlesi e. Pirpok ko.

⁸ Numal Atua owra “Inu nuvi batu nanu jijle, ko nuvi kele bongsi nanu jijle.” Atua ngok elik tuwi jerjer, ko elik malum lelingenok, ko pia-lik pijpari tuwi ngok vini, ko evi Atua ne Derteren Jijle.

Nanu nga Jon mimatur kuluklu mīlesir

⁹ Inu Jon nga mevi tuwa kami suri nukorti pa osuw tevi Iesu ko nukorti tevi kami. Kerr jijle rraptur pīterter renge norongen nga mīsij nga rramrunge re niberr suri batun vanu se Atua. Ko arkonit tweni inu van re norour nga Patmos suri nomokwera tweni nale se Atua ko nale se Iesu.

¹⁰ Ko renge nabong on se Numal, Nerīn sen orrull totoni inu. Ko sete epriv nurnge drelan san renge durek nga mian mare temijjal, mirpe davō san.

¹¹ Ko owra “Kupuli tweni sev nga kumlesi, ko kuplai naul nen van ji meling kalesia ebut nga marlik renge ngaim ebut ngel nir, Epesas, Smana, Pekamam, Tuatira, Satis, Pilatelpia ko Laotisia.”

¹² Ko nurienik nga βelesi si mīrij tevik, mian ko nulesi lat ebut nga marmajing nir e gol, nga laet parjinet rer.

¹³ Ko re liven ne nanu ngok nir, san erpe jinibb mawos, ori sunsun nga mipriv temijjal ervirvi ngatan erpe sunsun se batu numal nir. Ko netatuw sen armajinge renge gol, ko etatuwe re morkon.

¹⁴ Ko jomro batun arow titis arirpe numow, ko meten oror erpe nabb nga muror.

¹⁵ Belan orinrin erres pelak, ko drelan erpe dis bburbur nga mīrre renge botumal.

¹⁶ Ko otori moju ebut renge nevren rres, ko renge jingon nesip nga muso renge devjen korti nuru eplari rengen vini. Ko non erinrin erpe nial nga muwosput.

¹⁷ Daron nga mēlesi ko nuvitan re Belan, nurpe jinibb nga mimij. Ko ni esareni

nevren rres ejarik ko owra “Sete kupmetutu, inu nuwowomu jerjer ko bea-vivitu jerjer kele.

¹⁸ Inu nuvi jinibb nga memaur. Womu numij, mian ko numaur luwi kele, ko setemun mea-mij kele. Ko derteren suk otoa nga bololi nir nga marmij parmaur luwi kele, ko nga ßela lweni jinibb re lat ne mijen.

¹⁹ Ngok kupuli tweni nanu nga kumlesir nga marpelari lelingenok, ko nga parapelari vitunen.

²⁰ Kulesi moju ebut nga marto rene nevrek rres ngok nir, tevi lat ebut nga laet marjinet rer marmajing nir e gol? Nanu ngok nir nospen ner arto wore, ko arto teptepi, nir le ngel: moju nga ebut ngok arivi anglo ebut ne meling kalesia ebut, ko lat ebut nga laet marjinet rer ngok arivi meling kalesia ebut ko.”

2

Nale tevi kalesia nir ne Epesas

¹ Ko owrai tevik owra “Kupuli tweni nale suk ngel nir, ko kuplai van ji anglo se kalesia nir nga Epesas, ko kupwera “Nale ngel evel ji san nga mutori moju ebut rene nevren rres ko mok-ivel suri lat ebut nga laet marjinet rer.

² Nurongwose sev nga kamloli, ko nurorrmii elep suri majingen nga milep nga kamloli ko norrorrmien nga mipriv temijpal se kami. Nurorrmii sete kamfir rragrag re nir nga marloli misij. Ko kamrrowrow pae ko kamlesi oti nir nga marwera marivi aposol, ko gerisen ser eviseni nga marivi botgerisen bbong.

³ Nurongwose, norrorrmien se kami epriv. Jinibb arloli kamrunge esij rene nibe kami suri inu nisek, ko norrorrmien se kami sete evitan.

⁴ Ko nanu nga misij san oto liven rene inu ko kami, ngel: Setemun kammerreni inu erpe nga womu kamok-merrenik.

⁵ Ko ngok kaprorrmi pirres suri murrin nga mirres nga kamvijuri tuwi, ko kapvijuri lilane lweni kele pirpe tuwi daron nga murrin nen mitkai kami vini nga kamlesi wose moron. Ko poro sete kaprieni norrorrmien se kami rene sel nga misij nga kamok-loli lelingenok, ko inu bevinuk ko ßela tweni jikle laet se kami.

⁶ Ko nanu san nga kamloli mirres ngel: sete kammerreni murrin ne gortien se Nikolas, kamungasi nir erpe inu kele nungasi nir.

⁷ Si nga nolo boron mutoe, pumurrong lilane nale nga Nemün On milai tevi kalesia nir. Ko tevi nir nga marevji devje nuval, inu bemaronge parurroi wenen ne duru nai ne

mauren nga mutur rene orsel nga mirres pelak se Atua.”

Nale tevi kalesia nir ne Smana

⁸ Ko owra tevik owrai “Kupuli tweni nale suk ko kuplai van ji anglo se kalesia nir nga Smana, ko kupwera “Inu nuwowomu jerjer ko bea-vivitu jerjer kele. Numij ko lelingenok numaur luwi kele. Kapmurrongse sev nga mowrai.

⁹ Nurongwose norongen nga misij nga kamlilik ren, ko joro kami kele ejkie; ko weretunen joro kami elep. Nurongwose nale nga marsij nga morgne nga nir marij tere kami, nir nga marwera marivi miri Isrel ko marwera nawone. Naim ne verusen ser evi bbong naim nga marlote demij ren.

¹⁰ Sete kapmetutue nanu sopor nga parini ko parloli kaprunge pisij. Demij piwirre kami sopor van re naim ne nekaijen nga purrowrowe nir, ko kaprunge pisij nabong pisngavöl. Kaptur pitertter pian pijpari kapmij, ko ßela mauren tevi kami pirpe nowli kami nga mirres.

¹¹ Si nga nolo boron mutoe ko pumurrong lilane sev nga Nemün On muwra tevi kalesia nir. Nir nga marevji devje nuval, mijen erwen nga vitunen sete orongwos pijparir.”

Nale tevi kalesia nir ne Pekamam

¹² Ko owrai tevik owra “Kupuli tweni nale suk ko kuplai van ji anglo se kalesia nir nga Pekamam, ko kupwera “Inu nga nesip nga muso rene devjen korti nuru miplari re jingok, nale suk le ngel:

¹³ Nurongwos pae lat nga kamlilik ngok e Pekamam, lat nga Demij misakel re nai seksakel sen. Ko nurongwose kamosuri malum inu eterter. Ko daron nga marevji pini Antipas, jinibb nga mokwerwer se inu ko mutur mirterter tetajer tevi inu iok ji kami, lat nga Demij milik e, ko sete kamvilvil ore inu.

¹⁴ Ko kamloli ma nanu sapon nga sete mumomsawos re metek. Kami sopor arvijuri malum sel ne tuwi erpe propet ngok Balam, nga muwrai tevi Balak nga pikrekrasi miri Isrel nir nga parurroi vison nga marsuli jile tevi demij ko nga parloli kele pisij tevi nesevin.

¹⁵ Ko erpok kele, kami sopor arvijuri nale se gortien se Nikolas nir.

¹⁶ Ngok kaprieni kami re nololien se kami. Poro pijki ko sete mia-periv inu bevinuk ko bepapal tere nir ngok tevi nesip nuval nga miplari re jingok.

¹⁷ Si nga nolo boron mutoe ko pumurrong lilane sev nga Nemün On muwrai tevi kalesia nir. Ko tevi nir nga marevji devje nuval, inu ßelai nanen san tevir nga muto teptepi re melrin, nga pirpe mana

nga mēri Isrel nir marurroi tuwi. Ko βelai kele
nevōt nga muow titis tevi nir sisamis nga
nais nga mimerr muto rengen ngok. Nais
nga mimerr ngok, mēr nga mīlai nevōt sen
kobbong orongwose purongwose.”

Nale tevi kalesia nir ne Tuatira

¹⁸ Ko owrai tevik owra “Kupuli tweni
nale suk ko kuplai van ji anglo se kalesia
nga Tuatira, ko kupwera: Inu nuvi Natu
Atua, ko metek oror orirpe nabb nga
muror, ko βelak orinrin erres βelak.

¹⁹ Nurongwose erres murrun se kami
iok Tuatira, ko nurongwose merrenien
ko nosurien se kami. Ko nurongwose
nga kamok-majing nga kapwilwil se jinibb
nir, ko nolo kami epriv temijpal nga sete
orongwose kapvitan. Ko majingen se kami
lelengenok erres kele easi majingen nga
kamloli womue.

²⁰ Ko nanu le san sete nuir tevi kami
ren, ngel: Sete kamwer ore vinok nga
muwra ni evi propet, ko ejki, ni erpe
bbong nesevin nga mīsij ngok Jesepel ne
tuwi. Ko nevisvisenien sen ololi jinibb suk
arlungleng nga marok-loli mīsij kele tevi
nesevin, ko arok-urroi kele viso nanu nga
marsulsul jile e tevi demij.

²¹ Nulai daron evter tevi nga pīlesi wose
ko pīrieni lweni renge murrun nga mīsij
sen, ko ni omusus.

²² Ko suri iok, inu βela mesien nga milep
tevi, bololi pimatur re maling. Ko ni tevi
nir nga marloli mīsij tevi bonevis parunge
pīsij lenglengen. Ko poro sete parienir re
nanu nga marsij nga marloli tevi, ko bololi
nanu nga mowrai ngok lelingen wolok.

²³ Ko berevji pini kele natun nir, puloli
kalesia nir parongwose, inu nurongwose
nanu jijle nga muto re nolo jinibb ko
norrorrmien se jinibb, ko bea-lai nowlin
mawos tevi nir sisamis re murrun nga
marloli.

²⁴ Ko nuwrai kele tevi kami mīnij kele
sopor ne ie Tuatira, kami nga sete kamvi-
juri nevisvisenien sen, ko nga sete kam-
rongwose nanu nga nir marwera evi ‘nale
teptepi se Demij’, nuwra: Nurongwose
kamtor sweri daron nga marterter evter,
ko sete numrreni βelngi kele soloslo nga
morrow kele re kami.

²⁵ Ko numrreni kaptajer malum, ko
kaprrul totoni sel nga mūrres ngok pīterter
pian pijpari daron nga bea-rremali kele e
vini.

²⁶⁻²⁸ Ko βelai derteren tevi si nga mirevji
devje nuval ko mutur mīterter nga muloli
sev nga memrreni mijpari bongsin. Dert-
eren nen, inu nulai ji Tata suk, ko bea-
lai tevi nir. Ko nir vajin parlik metmete
jinibb ne vanu jijle nir tevi nai delrrurr.

Ko parevji e erpe nga nai delrrurr mipir
worwor sospen dan. Ko bea-lai moju
nutrin kele tevir.

²⁹ Si nga nolo boron mutoe, erres pumur-
rarronge pīrres nale nga Nerūin On moklai
tevi kalesia nir.

3

Nale tevi kalesia nir ne Satis

¹ Ko owrai tevik owra “Kupuli tweni nale
suk ko kuplai van ji anglo se kalesia nga
Satis, ko kupwera: Ngel evi nale se inu nga
motori Nerūin se Atua ebut tevi moju ebut.
Nurongwose murrun se kami erres, ko
nurngē jinibb arok-wera, kammaur bbong;
ko ejki, rrek kami kammij pa.

² Ko kapmera kele, kaploli mauren se
kami nga mutomori pimij pimaure luwi
pīterter. Suri inu nulesi nga majingen se
kami setewor arres jijle renge nelesien se
Atua suk.

³ Kaprrormi nevisvisenien nga marlai
tevi kami, ko kaptur pīterter ren ko ka-
prieni kami renge nololien se kami. Poro
sete kapmera luwi nga kaplik metmet, ko
inu dea-vinuk re daron nga kami takrre-
lengē, tia-sorsan tevi murrū jinibb venao.

⁴ Ko kami sopor iok Satis sete kamloli
murrun nga mīsij, erpe sunsun se kami
sete arrokkitkit. Kami ngok ko kapa-uri
sunsun nga marow ko kaptutur tevik, suri
kamrres ren.

⁵ Si nga mirevji devje nuval, ni ko
parjuroi sunsun nga marow titis e nir, ko
sete mara-la tweni nisen renge naul ne
mauren. Ko bea-wera tweni renge no Atua
ko tevi kele anglo sen nir nga ni mivi suk.

⁶ Ko si nga nolo boron mutoe, ko erres
purngē ko purongwose sev nga Nerūin
muwrai tevi kalesia nir.”

Nale tevi kalesia nir ne Pilatelpia

⁷ Ko owrai tevik owra “Kupuli tweni nale
suk ko kuplai van ji anglo se kalesia nir
nga Pilatelpia, ko kupwera tevir nga ngel
evi nale suk, nga inu mon temijpal ko
mewretun. Inu nutori totkoni ki ngok nga
mivi se Devet tuwi, ko daron nga mētasi
metali ko sete san orongwose pīkikior
kele; ko daron nga mēkikior, ko sete san
orongwose pītasi kele.

⁸ Ko nurongwose majingen se kami nga
Pilatelpia. Nurongwose nga derteren se
kami ewelili bbong, ko kamvijuri ma
nevisvisenien suk, ko sete kamvilvil ore
inu. Kaplesi, nutasi pa metali etpīr re no
kami oto metmet nga sete san orongwose
pīkikior kele.

⁹ Kaplesi, bololi nanu san tevi gortien
ngok nir nga naim loten ser mivi naim
loten mawos se demij nir. Nir arwera arivi
mēri Isrel, ko arwera nawone. Ko bololi

parini para-jipa vitan ji kami ko parsusi nise kami van mare, puloli nir parongwose nga inu numrreni kami.

¹⁰ Ko nuwrai eterter tevi kami nga be-metmet lilane kami re daron nga mīterter nga pia-pelari renge iel ngatan ngel nga purrowerrowe jinibb nir, suri kamosuri nale suk nga mowra ‘Kaptur pīterter teta-jer, sete nolo kami pivitan.’

¹¹ Sete mia-periv bea-rremali ji kami. Ko kaptori totkoni pīterter sev nga kamtor sweri pa musuw, suri san tia-lai luwe nowlin nga moro kami kapa-lai.

¹² Si nga mirevji devje nuval, ko inu bololi pivi nabur nga mīterter renge Naim On se Atua suk, ko sete mia-jikie rengen. Ko bea-uli nise Atua suk rengen, tevi nise ngaim ngok kele se Atua suk, Jerusalem nga mimerr ngok nga Atua suk pia-koni tweni re melrin vini iel ngatan. Ko bea-uli nisek nga mimerr kele puto rengen.

¹³ Ko si nga nolo boron mutoe, ko erres purnge ko purongwose sev nga Neñin muwrai tevi kalesia nir.”

Nale tevi kalesia nir ne Laotisia

¹⁴ Ko owrai tevik owra “Kupuli tweni nale suk ko kuplai van ji anglo se kalesia nga Laotisia ko kupwera, Ngel arivi nale suk nga nomok-wera pipok ko pa tevi rijrijen se Atua nir, ko nga nomok-wera tweni nale se Atua, ko nga orongwos jinibb pivijurik. Ko nuvi batbatu nanu jijle nga Atua mulolir.

¹⁵ Nurongwos alje majingen se kami. Kami sete kamirpe nuwi nga mututun, ko kami sete kamirpe nuwi nga mimemrrali. Erres p̄elak ma poro kapirpe nuwi nga mututun, rrek poro kapirpe nuwi nga mimemrrali.

¹⁶ Ko suri kamivi liven re nuru, ko nuvirngise kami, ko boltuv tweni kami.

¹⁷ Ko kami kamwera “Kem ma joro kem elep temijpal, sete nevre kem armurrol re nanu san.” Ko sete kamlesi wose nga joro kami mijkie, kamlík esij, kammalmal, ko kamivi metrrorr.

¹⁸ Ko nuwrai tevi kami, kapwuli gol nga mīrres ji inu, puloli joro kami pilep. Ko kapwuli kele sunsun nga muow nga kapuri, ko puloli setemun kammanun nga jinibb parlesi kammalmal. Ko kapwuli kele roi ne meter ji inu, nga puloli kapkulkulu luwi p̄irres.

¹⁹ Inu nomok-rij eterter ko nomok-tor alje nir nga memrreni temijpale nir. Ko ngok, kaprrormi p̄irres ko kaprieni norrrmien se kami renge nololien se kami.

²⁰ Ngok, kapmurrong, inu nutur nututi metali, ko nuverus. Poro si nga murnge drrelak ko mītasi metali, inu bean re loloiin sen ko noboraan korti.

²¹ Si nga mirevji devje nuval, ko bololi ni p̄isakel renge nai seksakel suk renge nelik, erpe inu kele nurevji pa devje nuval ko nusakel pa renge neli Tata suk renge nai seksakel sen.

²² Ko si nga nolo boron mutoe, erres pumurrarronge p̄irres nale nga Neñin On mokwerai tevi kalesia nir.”

4

Nir nga renge melrin arsurövi Atua

¹ Mian ko numatur lesi nanu kele san, ko nulesi metali san ep̄ir renge melrin. Ko drrelan nga mornge womu, nga mirpe davö, erij luwi kele, ko owra “Kupini iel mare, ko beviseni tevim sev nga pia-pelari.”

² Ko derteren se Neñin On evini evesane ko orrul totonik. Ko iok renge melrin nulesi nai seksakel san, ko san esakel ren.

³ Mernen non erinrin erpe nevöt nga morres ngel nuru, jasper ko kanilian, nga morsongsong. Ko liwaliw san oto rrare nai seksakel nen, nga mīrinrin mirpe emral nga nulsen mirpe ro nai san nga miejejen mīrres.

⁴ Ko nai seksakel ngavöl eru drromon ivij (24) kele arto rrare nai seksakel nen, ko b̄irterawarreg ngavöl eru drromon ivij arsakel rer. Ko nir aruri sunsun nga muow ko aruri nuvan nga marivi gol re batur.

⁵ Ko navil okvil pelari renge nai seksakel nen, ko belver drrelan orrorrorr ko ever. Ko womu re nai seksakel nen, nasul ebut aror, nga marivi neñin ebut se Atua.

⁶ Ko iok kele, nulesi nanu san erpe dis nga mivilvil ko mīmerer mīrres p̄elak.

Ko netun vanu ivij nga meter marto p̄etp̄eti re niber, re nor ko re durer, artur rrare nai seksakel nen.

⁷ Nga mutur womunen erpe laeon; nga mutur surie erpe buluk norman; nga suri kele e non erpe jinibb; ko nga vitu jer nen erpe numön ngel ikel, ko ete naben erpe nga purow.

⁸ Ko nir jijle nga ivij ngok, naber sisamis ouwon. Ko meter arto p̄etp̄eti re niber, vini vare e ko lolor e. Ko nat m̄irin ko nat nga mupong, sete armosi nga parlai nubo, ngel: ‘Atua ne drromsen mare nga muon nga muon nga muon, ni elik tuwi pa, ko elik malum lelingenok, ko p̄ilik kele tuwi ngok vini. Ni otori derteren jijle.’

⁹ Ko netun vanu ivij nga arok-la nubo, arsurövi, artori, ko arwera erres wor tevi ni nga mimaar tuwi ngok vini, ko nga m̄isakel renge nai seksakel. Ko daron nga marlai nubo nen, ¹⁰ ko b̄irterawarreg nga ngavöl eru drromon ivij nga arjipa armatur van ngatan re no ni nga m̄isakel re nai seksakel, ko

arsurövi ni ngok nga mīlik tuwi ngok vini. Ko aruvi tweni nuvan ser ko artuwer van womu re nai seksakel e, ko arwera
¹¹ “Numal Atua se kem! Nik kures nga parsurövīm, partorim, ko parlai derteren jile tevīm. Suri nik kuloli nanu jijle nir, ko renge nik marongen som arpelari ko armaur.”

5

Naul nga marbbölji ore pa

¹ Mian ko nulesi naul san; ni nga mīsakel re nai seksakel otori re nevren rres. Arulul pētpeti ren, devjen ko devjen, ko arlungi jile pa, ko arla nabböl^A ko arwusi bongsin re lat ebut ko arbbölji ore pa.

² Mian ko nulesi anglo san nga derteren sen milep. Ni erij, drrelan ean mare, ko owra “Ngok, si erres re pīla tweni nabböl nga marbbölji ore naul ngok e, ko pieveve vajin?”

³ Ko san ejki renge melrin ko renge iel ngatan ko renge ngatan nga muto van re melve ngatan ngel e, nga mīrres re pieveve naul nen rreknga pimteni lolon.

⁴ Nuting lenglengen suri san ejki nga mīrres re pieveve naul nen ko pimteni lolon.

⁵ Mian ko san renge bīrterawarrens nen nir owrai tevik, owra “Ete kupting! Kuplesi, Laeon nen nga renge metka se Juta, ngok metka nen nga milep se Devet, ni erevji devje nuval, ko ni ko orongwos pīla tweni nabböl nga ebut ngok ko pieveve naul.”

⁶ Mian ko nulesi natu sipsip san^B otur liven ji ni nga mīsakel rege nai seksakel nga netun vanu nga ivij nga martur rrale tevi bīrterawarrens nir. Ko natu sipsip nen, nulesi erpe arevji pini womue. Batin ebut, ko meten ebut, nga marivi nemin ebut se Atua nga ni mok-konir van re iel ngatan totoklai.

⁷ Ko natu sipsip nga evan ko ela naul nen ji ni nga mīsakel re nai seksakel, re nevren rres.

⁸ Ko daron nga muloli, ko netun vanu nga ivij nga ko bīrterawarrens nga ngavöl eru drromon ivij arjipa armatur van ngatan rege no natu sipsip. Nir jijle artori nevis tingting ser, ko besin nga marmajing gol e ko nga marwun saute nanu san nga mapun mīrres, ni ko evi verusen se jinibb se Atua nir.

⁹ Ko nir arla nubo nga mimerr san, ni le: “Nik kures re kupla naul ko kupla tweni nabböl ko kupeveve. Suri nik arevji pinim, ko drram nga muwlu erpe sulsulen

nga muwli tweni jinibb nir arivi se Atua, metka nga marivel rege botnafe nir, ko renge vanu nir, ko arivi jinibb nga marij nale pētpeti nir.

¹⁰ Ko kuloli arivi jinibb ne sulsulen som nir nga parmajing se Atua, ko nir parwowomu rege jinibb nir iel ngatan.”

¹¹ Ko nulesi kele anglo elep nga elep, ko nurnge drrelar nga martur rrale nai seksakel, netun vanu nga ivij nga, ko bīrterawarrens nir,

¹² ko arla nubo, drrelar ean mare, arwera “Natu Sipsip nga marevji pini, ni erres re pīla derteren, nijor, norongwosien, ko nga partori, parsurövi, ko parsusi van mare!”

¹³ Mian ko nurnge drrela nir jijle nga marlik re melrin, ko renge iel ngatan, ko renge ngatan nga muto van re melve ngatan ngel e, ko renge dis; nanu jijle nir nga marmaur iok jijle nir. Ko arla nubo, arwera “Ni nga mīsakel rege nai seksakel, ko Natu Sipsip, parsurövi nuru ko partori nuru ko parsusi nuru van mare, ko parlai derteren jile tevi nuru tuwi ngok vini.”

¹⁴ Ko netun vanu nga ivij nga arij welir, arwera “Pirpok ko!” Ko bīrterawarrens nir arjiol armatur van ngatan ko arsurövi.

6

Natu Sipsip ela tweni nabböl rege naul

¹ Mian ko nulesi Natu Sipsip nen ela tweni nabböl^C nga womunen, ko nurnge drrelan san rege netun vanu nga ivij nga, drrelan erpe belver, ko owra “Kupini!”

² Ko nuklu ko nulesi os nga muow san. Ko jinibb san esakel ren, ko oke nevis, ko arla nuvan san tevi re batun. Ko ni ololi os sen owlu, ean epalpal re nuval. Ko tetajer okrevji devje nuval sen nir.

³ Mian ko Natu Sipsip ela tweni nabböl nga erwen nen. Ko nurnge drrela netun vanu nga erwen nen, owra “Kupini!”

⁴ Ko os kele san owlu vini, nga mu-songsong. Ko ni nga mīsakel ren ela derteren nga pirvei nuval pivini iel ngatan, nga puloli jinibb nir parevrevji pipini lululwenir. Ko arla nesip ne nuval nga milep san tevi.

⁵ Mian ko Natu Sipsip ela tweni nabböl itolin. Ko nurnge netun vanu nga itolin owrai

owra “Kupini!” Ko nuklu, ko nulesi os nga mumotmöt san. Ko ni nga mīsakel ren otori skel san re nevren.

⁶ Ko nurnge drrelan san eplari re liven ne netun vanu nir, ko owra “Nowli nanu nir paran mare. Niv ne nabong san, nowlin

^A 5:1 Nabböl evi nanu san nga marlai tuwi nga marbbölji ore naul e nga puloli jinibb nawon sete pieveve. ^B 5:6 Iesu ^C 6:1 Nabböl evi nanu san nga marlai tuwi nga marbbölji ore naul e nga puloli jinibb nawon sete pieveve.

7

pusorsan tevi nowli majingen ne nabong san totoklai. Ko nowli raes ne nabong itul, nowlin pivi nowli majingen ne nabong san totoklai. Ko nowli oel nga marok-tabbu e, ko nowli norro, pusorsan malum tevi nga womu ko pa.”

⁷ Mian ko Natu Sipsip ela tweni nabböl ivajin. Ko nurnge drrela netun vanu nga ivajin, owra “Kupini!”

⁸ Ko nuklu, numteni os nga mivi niavi betiv. Ko ni nga m̄isakel rengen, nisen ko Mijen. Ko san evitu bbong mori suri, nga nisen ‘Vanu se jinibb nga marmij.’ Ko Atua ela derteren tevi nuru nga poran renge iel ngatan totoklai ko renge lat jikle, porloli jinibb pivi meling pivivji, ko porevji tweni meling ivajin re nir p̄etp̄eti. Ko nanu ngel le nir porevjir e, nuval, numer, mesien, ko nanu rrum.

⁹ Mian ko Natu Sipsip ela tweni nabböl elmen. Ko nulesi re melve nawot nga marsulsul ren nem̄i nir nga jinibb nir marevji pinir suri arwerwer renge nale se Atua, ko arij sen.

¹⁰ Ko nir arkail drrelar ean mare, arwera “Atua ne Drromsen Mare! Nik kuon, kuwretun tetajer! Seveling ko kupvirrali jinibb nir suri marevji pini kem?”

¹¹ Ko arlai sunsun nga marow tevi nir sisamis, ko arwera tevir “Kapmosi beblen mun tera nga tasi kami jile nga marosuri ko marmajing se Atua nga marlik vane ko nga jinibb parevji pinir, parini jile mun.”

¹² Ko mian ko nulesi Natu Sipsip ela tweni nabböl ouwnon. Ko nar̄i san em̄i eterter, ko nial moron ejki, omot nawon, ko navöl osongsong erpe drra.

¹³ Ko moju nir ar̄metewtaw arvitan ngatan, erpe wene nai san daron nga ling m̄iser milep ko m̄iterure.

¹⁴ Ko melrin olulngi tweni erpe boriti, mijkie, ko botwen jile ko norour jile aruj lingi mlnger.

¹⁵ Ko numal nir ne iel ngatan, tevi jinibb nga marlelep nir, tevi batu jinibb ne nuval nir, tevi jinibb nga joror milep, ko jinibb jikle nir, jinibb nga marivi demij maur nir, ko jinibb nir nga marivel sisarow, aran arteptepi re nolo bereng nir ko re melve bereng nir nga renge botwen nir.

¹⁶ Ko arwerai tevi botwen nir ko tevi bereng nir, “Kaptawi ore kem pingavil, kaploli nabteptepi re mete ni nga m̄isakel re nai seksakel, ko re lolaren se Natu Sipsip!

¹⁷ Suri nabong nga milep nen evini pa ne lolaren se nuru. Si orongwos putur?”

D 7:2 Nabböl evi nanu san nga marlai tuwi nga marbbölji ore naul rrek nanu m̄inij san e nga puloli jinibb nawon sete pijpari. Jinibb jile arlesi wose nabböl se jinibb nga milep ko niko sete mara-jipari nanu sen nga mibbölji ore mirpok.

Meri Isrel nir nuvasngavöl ner evi ongut vesan bbulin ngavöl ivij drromon ivij (144 000)

¹ Mian ko nulesi anglo ivij artur renge bongsin ne ivij ne iel ngatan, artor ore mete ling nir nga puloli ling setewor parongwos parser sopen renge dan rreknga renge dis rrek renge duru nai san.

² Mian ko nulesi anglo kele san eplari renge lat nga nial mimrae e. Ni otori Atua nga mimaur nabböl^D sen. Ko ni everus drrelan ean mare van ji anglo nga ivij nga, suri Atua elai pa derteren tevir nga parlokloksi dan ko dis.

³ Ko anglo nen owrai owra ‘Sete kaplokloksi dan, rreknga dis, rreknga duru nai san, pijpari nga nabbölji nabböl se Atua ngel renge jinibb ne majingen se Atua se kerr borngir”.

⁴ Ko arbbölji nabböl se Atua renge borngir, mian ko arwerai tevik nir elep nga elep nga nir nga marbbölji nabböl se Atua renge borngir. Nuvasngavöl ner eipari ongut vesan bbulin ngavöl ivij drromon ivij (144 000). Ko nir arpelari renge metil naim nga esngavöl drromon eru se m̄eri Isrel,

⁵ evi nuvasngavöl vasngavöl drromon eru (12 000) renge metil naim sisamis, metil naim se Juta, metil naim se Rupen, metil naim se Gat,

⁶ metil naim se Asere, metil naim se Naptali, metil naim se Manase,

⁷ metil naim se Simeon, metil naim se Livae, metil naim se Isakara,

⁸ metil naim se Sepulun, metil naim se Josep, metil naim se Benjamin.

Delung jinibb nga milep ne vanu jikle

⁹ Mian ko nuklu, ko nulesi delung jinibb nga milep nga milep. Sete san orongwos pieve p̄etp̄eti nir, suri nir elep p̄elak. Arivel renge botnafe p̄etp̄eti nir, ko renge vanu p̄etp̄eti nir, ko arivi jinibb nga marij nale p̄etp̄eti nir. Ko artur womu re no Atua nga m̄isakel re nai seksakel ko re no Natu Sipsip. Aruri sunsun nga marow ko artori nablasi nini nga raor marto malum rer.

¹⁰ Ko arkail drrelar ean mare, arwera “Atua se kerr, nga m̄isakel renge nai seksakel, ko Natu Sipsip orla mauren tevi kem.”

¹¹ Ko anglo nir artur rrale nai seksakel, tevi birterawareng nir, ko netun vanu nga ivij nga. Ko nir arjipa armatur ngatan renge nai seksakel, ko arsurövi Atua,

¹² arwera “Pirpok! Atua se kerr, jinibb jijle nir parsurōvi, parsusi, partori, parw-
era erres wor tevi, ko parsupsuŕe norong-
wosien sen ko derteren sen, tuwi ngok
vini. Pirpok.”

¹³ Ko san reŕe ŕirterawarreng nir osusi
tevik, owra “Ia, ko isi ko jinibb ngel nir nga
maruri sunsun nga marow ngel nir, arivel
ngabe ko vini?”

¹⁴ Ko inu nuwra “Tawo, numal, inu
nurrleŕe. Nik ma kurongwose.” Ko ni
owra lweni tevik, owra “Nir le ngel nga
marlesi norongen nga n̄isij, nga jinibb nir
arowr elep. Nir arrawe sunsun ser, arloli
arow titis reŕe drra Natu Sipsip.

¹⁵ Niko artur womu re no Atua nga
n̄isakel re nai seksakel sen. Ko nutrin ko
nutpong, arlotoe reŕe Naim On sen. Ko
Atua nga mivi Numal ser ŕilik tevir tetajer,
ko pimemet nir ŕirres.

¹⁶ Setemun nabong san kele numer
ŕiajir, setemun nabong san kele
pimesmes; nial setemun ŕisne lokloksir, ko
nat nga mututun setemun puloli parunge
ŕisij.

¹⁷ Suri Natu Sipsip nga mutur morie nai
seksakel se Atua, ni pimemet nir ŕirres,
ko pipetevir paran re mete nuwi ne mauren
nir. Ko Atua pitwasi tweni suwen meter
jijle nir.

8

Nabböl ebutun

¹ Mian ko Natu Sipsip ela tweni nabböl^E
ebutun, ko nat emnena nawon re melrin
oto beblen, setemun eppari mete nial san.

² Mian ko nulesi anglo ebut nga martur
re no Atua, arlai davö ebut tevir.

³ Ko anglo kele san, nga mutori nai juljul
san nga mirpe niwos nga marmajing gol
e, evini ko otur re nawot ne sulsulen nga
mivi gol nga muto re no Atua. Arla nanu
san nga mapun n̄irres tevi, nga puto tevi
verusen nir se jinibb se Atua nir, nga ni
ŕisale nai sen e ko pusulsule reŕe nawot.

⁴ Ko ololi Atua orŕe nousnin, ko mapun
esebel erres reŕe nai juljul nga mutori,
ko oto tevi verusen se jinibb se Atua nir.

⁵ Mian ko anglo ela nai juljul sen, ko
ososle tweni nabb sopen nga n̄in reŕe
nawot, ko evijreni tweni vini iel ngatan.
Ko belver orrorrorr ko ever, ko navil evil,
ko nar̄i en̄i.

Anglo ivij aruwi davö

⁶ Mian ko anglo ebut nga martori davö
ebut artori metmete nga paruwir.

⁷ Ko anglo nga womunen owi davö sen.
Ko bebje aes arvitvitan oto tevi nabb nga
muror ko tevi drra, arirpe naus nga mus.

Ko poro dan itul ni ko, ko nabb nen osli
tweni itolin. Ko poro nai itul ni ko, ko
nabb nen osli tweni itolin. Ko osli tweni
mösmös ŕetŕeti.

⁸ Mian ko anglo erwen owi davö sen. Ko
nanu san erpe botwen nga milep ein, ko
arwirre van reŕe dis. Ko poro dis lat nen
itul, ko lat nen itolin erieni evi drra.

⁹ Ko poro nanu itul nga marmaur reŕe
dis, ko itolin emij. Ko poro drrav itul, ko
itolin nabb osli, ein lokloksi.

¹⁰ Mian ko anglo itolin owi davö sen. Ko
moju nga milep san, nga muror erpe nasul,
evitan vini iel ngatan; ko evitan van reŕe
nuwi seser ko mete nuwi nir. Ko poro
nuwi seser itul, ko olokloksi itolin; ko poro
mete nuwi itul, ko olokloksi itolin.

¹¹ Ko moju nen, nisen ko botut. Ni ko
ololi nuwi nga mivitan ren emelmel; ko
jinibb elep, daron nga marmini, ko armij,
suri emelmel erpe ŕesu newri.

¹² Mian ko anglo ivajin owi davö sen.
Ko nial devjen itul e ko itolin omotmot, ko
navöl devjen itul e ko itolin omot, ko moju
devjen itul e ko itolin omot. Ko reŕe nat
nga n̄irin, devjen eru bbong nat erin re
nuru, ko devjen san nat opong ren. Ko
reŕe nat nga mupong, devjen eru bbong
omor; ko devjen san emalik.

¹³ Mian ko nuklu kele, ko nulesi ikel
san orow mare jer, ko erij drrelan ean
mare, owra “Wurru! Wurru! Wurru!
Pisij ŕerŕer re nir nga marlik iel ngatan
daron nga davö itul nga marjipon anglo
paruwir!”

9

¹ Mian ko anglo elmen owi davö sen. Ko
nulesi moju san nga mivitan pa reŕe dan.
Ko arla ki san tevi moju nen nga ŕitasi
bbulwil nga nabbön mijkie.

² Mian ko moju nen etasi bbulwil. Ko
nousni nabb nga milep ous pelari ren, ko
ous ore nial ko melrin, ololi nat emalik.

³ Ko nato nga marok-rowrow re mösmös
arow pelpelari reŕe nousin nen, arwi-
jwaji reŕe dan. Ko derteren ser otoe nga
paraji jinibb ŕisij erpe netu nuŕet.

⁴ Ko arwer orer nga sete paruror lokloksi
mösmös rreŕnga rao nai rreŕnga nanu
tama san nga mimaur, ko paraji kis bbong
jinibb nga nabböl se Atua sete mibbölji
borngir.

⁵ Ko arwer orer nga sete paraji pinir, ko
parlolir parunge nevrut kobong pijpari
navöl pielim. Milnge liwer ererer erpe
milnge liwe netu nuŕet.

⁶ Ko reŕe navöl nga elim ngok nir,
jinibb ngok nir parpepej sel tama san nga
partor pini lwenir e, ko sete mara-tor sweri

^E 8:1 Nabböl evi nanu san nga marlai tuwi nga marbbölji ore naul e nga puloli jinibb nawon sete pieveve.

rragrag san; parmerreni lengleng parmij, ko parrelenge parmij.

⁷ Ko nato nen nir arirpe os nga martur vivöngsur tera nuval. Nuval ser re batur arirpe nuval se numal nga marmajing gol e, ko nor arirpe no jinibb.

⁸ Rao batur arirpe rao batu nesevin, ko liwer arirpe liwe bae.

⁹ Ko nanu san erpe delrurr oto ore morkor, ko drrela naber arirpe drrela kat nir ne nuval nga os mareveir nga paran re nuval.

¹⁰ Nerurer otoe, erpe nerure növi, nesip ser arto rer; ko derteren ser nga parloli jinibb parunge nevrut pijpari navöl pielim arto re nerurer.

¹¹ Numal ser otoe, ko ni evi anglo nga mimetmete bbulwil nen. Ni nisen renge nale se nñeri Isrel nir, Apaton, ko renge nale se nñeri Gris nir, evi Apolion, nga muwra puwra: Jinibb nga mokter pinipni jinibb.

¹² Ngok evi nanu itolin nga parsij përpër nir nga miplari womu, ko eru orjipon malum.

Anglo ouwnon owi davö sen

¹³ Mian ko anglo ouwnon owi davö sen. Ko nurnge drrelan san eplari renge bongsin nga ivij ne nawot nga mivi gol nga mutur re no Atua.

¹⁴ Ko drrelan owrai tevi anglo ouwnon nen owra "Kuptelasi tweni anglo ivij nga marile totonir martur renge jeli nuwi seser nga milep lupretes."

¹⁵ Ko ni ean etlasi twenir. Anglo nga ivij nga, tuwi pa arok-tur tera sia ngel, navöl ngel, nabong ngel, ko mete nial ngel, nga parevji pini jinibb nir; parloli jinibb pivi meling pítitlu, ko parevji tweni meling itolin re nir pëtpeti.

¹⁶ Ko nurnge arwera tweni jinibb ne nuval nir evis nga marsakel re os nga marpitevi anglo nga ivij nga; nir ejpari milian ongut varu (200 000 000).

¹⁷ Ko numatur lesi bori suk malum, ko nulesi os nen nir ko jinibb nir nga marsakel rer. Aruri sunsun ne delrurr arto re morkor. Ko delrurr nen nir arsongsong erpe nabb, ko arejejen temijpal erpe nuwi seser nga milep, ko aringango temijpal, erpe salpa. Ko batu os nen nir arirpe batu laeon. Ko nabb ein peleplari renge jingor, ko nousni nabb ous peleplari re jingor, ko salpa kele aringango peleplari re jingor.

¹⁸ Ko nabb nga mñin nen ko nousni nabb nen ko salpa nen artor pini meling itolin re jinibb pëtpeti.

¹⁹ Suri os nen nir, derteren ser oto renge jingor, ko re kele nerurer. Nerurer arirpe

nuñet, suri batur otoe, nga marok-ajaji lokloksi jinibb.

²⁰ Ko jinibb nga sete marmij e nanu nga marsij ngok nir, nolor sete arlululwi renge murrun nga marsij ser; ko sete armosie nga parlot tevi demij, ko tevi atua ne gerisen nga nir kobbong marta rrongrrongvi gol, silva, bras, nevöt, ko nai. Atua ne gerisen nen nir sete arongwos parkulkulu, sete arongwos parungrunge, ko sete arongwos parivel.

²¹ Ko jinibb nen nir nolor sete arlululwi renge murrun nga martor pinipni jinibb, nga marloli botut, nga marloli nñisij tevi nesevin, ko nga marvevna.

10

Anglo nga mutori naul nga welili san

¹ Mian ko nulesi anglo kele san nga derteren sen mutoe orow jubbul renge melrin vini ngatan e. Ni ori nabor erpe sunsun sen, ko liwaliw san oto rrale batun. Non erpe nial, ko belan nuru orirpe nabur ne naim eru nga morin.

² Ko ni otori naul nga welili san nga mieveve jile renge nevren. Ko otur, belan rres renge dis, ko belan mair renge dan.

³ Ko everus, drrelan ean mare; drrelan erpe drrela laeon nir nga margorr. Mikail musuw, ko belver ever weli vabut.

⁴ Belver miver jile, ko otomori bolul; ko drrelan san eplari re melrin, ko owra "Kupsilveni nanu nga belver muwrai ngok, sete kupuli tweni."

⁵ Mian ko anglo nen nga mñlesi nga mutur renge dis ko renge dan ojuji melrin e nevren rres,

⁶ ko nga puloli nale sen píteter, owra nise Atua nga mimaur tuwi ngok vini, nga muloli melrin ko iel ngatan ko dis ko nanu ijile nir nga marmaur rengor. Ko anglo owrai owra "Setemun nanu san oto ore.

⁷ Ko daron nga anglo ebutun puwi davö sen, ko Atua puloli norrorrmien sen nga muto silveni nga muwrai pa tevi propet sen nir nga marivi jinibb ne majingen sen nir tuwi."

⁸ Mian ko drrelan nga mornge renge melrin erij tevik kele, owra "Kupan kupla naul nen nga muto renge nevre anglo nga mutur renge dis ko renge dan."

⁹ Ko nuan ji anglo nen, ko nungoni naul nen. Ko ni owrai tevik, owra "Kuplai ko kuprroi. Renge jingom ko purrun pirpe narllu sukabak, ko depaim ma pïkarkar e."

¹⁰ Ko nulai jin, ko nurroi. Ko re jingok, orrun erpe narllu sukabak; ko nurrolmi, ko depaik ekarkar e.

¹¹ Mian ko arwerai tevik, "Pivesan kele nik kupwera tweni nale se Atua suri jinibb

ne vanu elep wor, jinibb ne nale elep wor, ko numal elep wor.”

11

Jinibb eru nga morij se Atua

¹ Mian ko arlai mavir san tevik nga mivi norrngov. Ko arwerai tevik, “Kupan kuprrongvi Naim On se Atua ko nawot nen, ko kupeve nir evis nga marlot rengen.

² Ko sete kuprrongvi norrngov ne lolo naworr ne Naim On, suri evi pa se jinibb ne vare nir. Ko nir parloli Ngaim On Jerusalem setemun puon pijpari navöl pingavöl pivij drromon pieru (42).

³ Ko inu bokoni jinibb suk eru nga porij suk. Ko bak kobbong pivi sunsun se nuru, pirpe nga jinibb maruri daron nga martaur. Ko nuru porwera tweni nale se Atua renge nabong nen nir nga mivi nuvasngavöl vesan bbulin pungut pivaru drromon pingavöl puouwon (1260).”

⁴ Ko nuru ngok porirpe duru olip eru, ko porirpe nasul eru nga marusi nuru re no Atua Numal ne iel ngatan.

⁵ Ko poro san puwra pulokloksi nuru, ko nabb puror pelari re jingo nuru ko pusli pini. Ko pipok devje nuval se nuru nir parmij.

⁶ Ko nuru derteren se nuru otoa nga porwer ore naus sete mia-us renge daron nga morwerwer renge nale se Atua. Ko derteren se nuru oto kele renge mete nuwi nir, nga porienir parivi drra. Ko derteren se nuru otoa nga parloli nanu nga parsij kele pilep parpelpelari iel ngatan.

⁷ Ko daron nga pora-wera tweni jile vajin nale se nuru, ko nanu rrum nen nga miplari renge bbulwil nga nabbön mijkie pipalpal tere nuru. Ko ni pirevji pini nuru.

⁸ Ko nibe nuru pormatur renge sel renge ngaim nga milep Jerusalem, ngaim nga Iesu nai pelaot nga murrul ren mutur ren. Ngaim nen, nisen eru kele ni le: Sotom ko Ijip, suri murrun osorsan tevi nir nga marlik renge lat nga eru ngok tuwi.

⁹ Ko jinibb elep, jinibb ne vanu p̄et̄p̄eti nir, metka p̄et̄p̄eti nir, ko nale p̄et̄p̄eti nir parini parmeteni nibe nuru, pijpari nabong p̄itul totoklai ko devje nabong kele san. Ko parwer ore nga partevni nuru.

¹⁰ Ko jinibb nir ne iel ngatan parir lenglengen suri laru nga eru ngok mormij. Ko parlila merrenjen tevir lululweni, suri nuru daron nga mormaur malume, ko nale se nuru ololi jinibb nir arunge esij.

¹¹ Mian ko nabong itul nga ko devjen arasi vajin, ko Atua ela lweni sowi nuru tevi nuru, ko ortur imare. Ko jinibb jijle nga marlesi nuru armetutu lenglengen.

¹² Ko nuru orunge drrelan san eplari renge melrin, owra “Koporini iel mare!”

Ko renge no devje nuval se nuru, nuru oril van mare renge nabor san, oran re melrin.

¹³ Ko moroka-van mare, ko nam̄i nga milep em̄i. Ko renge Jerusalem, devjen san omotoptop, ko devjen esiw arres bbong. Ko jinibb armij, nir ejpari nuvasngavöl vabut (7000). Ko jinibb m̄inij nen nir armetutu lenglengen ko arsurövi Atua nga milep re melrin.

¹⁴ Ngok evi nanu erwen nga m̄isij p̄er̄p̄er nga miplari; ko san ojpon malum, ko otomori jer pa piplari.

Anglo ebutun owi davö sen

¹⁵ Mian ko anglo ebutun vajin owi davö sen. Ko nurnge drrelan sopor renge melrin aran mare, arwera “Batu vanu nir ne iel ngatan arini vajin renge nevre Numal Atua se kerr ko re nevre Kristo sen nga mukoni. Ko ni pimetmet nir tuwi ngok vini.”

¹⁶ Ko b̄irterawarrend ngavöl eru drromon ivij nga marsakel renge nai seksakel ser renge no Atua arjiol van ngatan armatur ko arsurövi Atua, arwera

¹⁷ “Numal Atua ne derteren jile, nik nga kumlik tuwi pa vini, kem namwera erres wor elep tevi nik nga kumsa raji lweni derteren som nga milep, ko kumetmete vajin nanu jijle nir.

¹⁸ Jinibb ne vare nir arlolal lenglengen suri nabong ne nik lolaren som evini pa, daron nga kupwera suri lat nga puto suri tevi jinibb jijle nir nga marmij, ko daron kele nga nik kupla nowli jinibb som nir, propet nir ko jinibb som jijle nir nga martorim, jinibb nga marlelep nir ko jinibb nga welili nir. Ko daron evini pa nga kuplokloksi nir nga marlokloksi iel ngatan.”

¹⁹ Ko Naim On se Atua nga renge melrin et̄pir, ko jinibb nir arlesi bokis nga miviseni marongen se Atua tevi m̄ieri Isrel nir tuwi. Mian ko navil evil, belver orrorrorr ko ever, nam̄i em̄i, ko bebje aes nga marlelep nir arvitvitan ngatan.

12

Nesevin ko drakon

¹ Mian ko nanu nga m̄inijnij nawone san eplari renge melrin. Nesevin san ori nial erpe sunsun sen, ko ejingteni Belan nuru re navöl, ko nuvan sen nga renge batun evi moju esngavöl drromon eru.

² Otomori puwosi bipi sen, ko engirr erave nga murrnge bipi piak.

³ Mian ko nanu nga m̄inijnij nawone kele san eplari re melrin. Drakon san, erpe mokoblab ko elep temijpal asi mokoblab. Osongsong, ko batun ebut ko batin esngavöl, ko nuvan se numal arto renge batun nga ebut ngok.

⁴ Ko drakon ewirrleni neruren ko erevji tweni moju elep rengo melrin arvitvitan vini ngatan. Ko poro moju nir meling itul e, ko san evitan, eru orjipon, san evitan, eru orjipon. Ko drakon otur re no nesevin nen, owra "Natum poka-iak tweni, ko borroi!"

⁵ Mian ko nesevin owosi natun norman san. Ko natun norman nen pia-metmete vanu nir ko putori nai nga mivi delrrurr nga pivrralir e. Ko arteseni tweni van ji Atua e ko nai seksakel sen.

⁶ Ko nesevin owlu van rengo lolo merwer, rengo lat san nga Atua ololi metmete terai nga ni pilik ren. Ko iok parmetmete ni pijpari nabong pivi 1260.

⁷ Mian ko nuval nga milep san eplari re melrin. Maekel ko anglo sen nir arval tevi drakon ko anglo sen nir.

⁸ Ko drakon esaro esij, ko setemun orongwos pilik re melrin, nir anglo sen nir.

⁹ Ko arwirre tweni vini iel ngatan, nir anglo sen nir. Drakon nga milep nen evi numet nen nga mïkrekrasi Iv tuwi. Nisen ko Demij, ko nisen tuwen nen evi Setan. Ko ni ko ok-kerkerasi jinibb ne iel ngatan pëtpeti.

¹⁰ Mian ko nurngo drrelan san rengo melrin ean mare, ko owra "Lelingenok vajin Atua se kerr ela mauren tevi kerr. Lelingenok vajin Atua eisi dewsin erpe Numal. Lelingenok vajin Kristo sen nga mukoni eviseni derteren sen. Suri ni nga mutur re no Atua ko ewer lokloksi tasi kerr nir nutrin ko nutpong, arwirr tweni pa rengo melrin.

¹¹ Ko nir arevji rengo drra Natu Sipsip ko rengo weretunen nga marok-werwer ren. Ko sete arrorrmi alje mauren ser, armarong bbong parmij suri.

¹² Niko, nik, melrin, kuþir, ko kami jijle nga kamlik rengo. Ko waru kobbong rengo iel ngatan ko rengo dis. Suri Demij evinuk re kamru ko ni ololar lenglengen, suri orongwose nga daron sen omrrol bbong nga mijpon."

¹³ Ko drakon ololar nga marwirre vini ngatan e, ko oji nesevin nga mivasus nga.

¹⁴ Ko ikel san nga milep arla naben nuru tevi nesevin nga purow van rengo lolo merwer san nga Atua muloli teraie. Ko iok parmetmete pijpari sia þitul ko devje sia kele san, nga drakon sete orongwos pijpari.

¹⁵ Mian ko drakon ololi nuwi eseser elep rengo jingon, owra pujri tweni nesevin nga.

¹⁶ Ko dan ela se nesevin; emawor ko emni tepe nuwi nen.

¹⁷ Ko drakon ololarsi nesevin elep, ko evel owra pipalpal tevi natu nesevin mïnij

nen nir, nir jijle nga marosuri nale se Atua ko weretunen nga Iesu muwra tweni.

¹⁸ Ko drakon otur rengo jeli dis.

13

Nanu rrum eru

¹ Ko nulesi nanu rrum san eplari rengo dis. Ni batin esngavöl ko batun ebut. Nuvan se numal arto rengo batin nir, ko rengo batun nir aruli nais sisamis rer nga marwer lokloksi Atua.

² Nanu rrum nen erpe puskat ko elep asie. Belan nuru orirpe þela nanu rrum nen bea, ko jingon erpe jingo laeon. Ko drakon ela derteren sen nga milep tevi nanu rrum nen, ko ela kele nai seksakel sen tevi.

³ Ko nanu rrum nen batun san erpe arevji evter nga pimij, ko emaur luwi pa. Ko jinibb jijle nir ne iel ngatan artaole ko arvitu suri nanu rrum nen.

⁴ Ko jinibb jijle nir arsurövi drakon, suri mïla derteren sen tevi nanu rrum nen. Ko arsurövi kele nanu rrum nen, ko arwera "Isi erpe nanu rrum? Isi orongwos pipalpal tevi?"

⁵ Ko Atua elngilngi nanu rrum nen þirij melmelas ko ewer lokloksi Atua. Ko Atua elngilngi puloli derteren sen pijpari navöl pingavöl pivij drromon þieru (42).

⁶ Ko etipatun þirij þisij tere Atua ko Atua nisen, ko lat nga mïlik e, ko nir nga marlik rengo melrin.

⁷ Ko Atua elngilngi pian pipalpal tevi jinibb se Atua, ko pivevjr. Ko Atua elngilngi nga pimetmete jinibb jijle nir ne vanu pëtpeti nir, nale pëtpeti nir, ko metka pëtpeti nir.

⁸ Jinibb jijle nir nga marlik iel ngatan parsurövi, ko nir nga maruli niser rengo naul ne mauren se Natu Sipsip nga marevji pini, sete parsurövi. Nir ko, aruli niser jile musuw, ko iel ngatan mia-pelari.

⁹ 'Kupmurrong, nik nga nolo borom mutoe!

¹⁰ Si nga parrul totoni ko wor, ko parrul totoni. Ko si nga parevji pini e nesip nuval, parevji pini ko. Ko ngok, kami jinibb se Atua, kaptur þiterter ko kaposuri þirres.'

¹¹ Mian ko nulesi nanu rrum kele san nga miplari rengo dan. Ni batin eru erpe bati natu sipsip, ko drrelan erpe drrela drakon.

¹² Ko ni ela derteren ji nanu rrum nga womunen. Ko otur re no nanu rrum nga batun nen mimaur luwi, ko on tertere jinibb jijle nga marlik iel ngatan nga parsurövi.

¹³ Nanu rrum nga erwen nga ololi nanu nga marinijnij nawone nir. Ololi nabb ein

pelari re melrin evini iel ngatan, jinibb jijle nir arlesi.

¹⁴ Ko ekrekrasi jinibb jijle nir suri nanu nga Atua elngilngi pulolir rengo no nanu rrum nga womunen. Ko owrai tevir nga parsavi nai san purrongrongvi nanu rrum nen nga nesip nuval erevji, ko emaur bbong.

¹⁵ Ko nanu rrum nga erwen nga, Atua elngilngi nga pimabbös van rengo nai nen nga puloli pimauro. Ko nai nen orongwos piri j vajin, ko orongwos pivevji pini si nga mumusus pusrövi.

¹⁶ Ko nanu rrum nen on tertere jinibb p̄et̄peti nir, jinibb nga welili nir, jinibb nga marlelep nir, nir nga nijor ser milep, nir nga nijor ser mijkie, demij maur nir, ko nir nga marivel sisarow, nga parlingi nabil san puto rer, rengo nevrer rres rreknga rengo borngir.

¹⁷ Ko poro san sete ela nabil nen, ko ni sete orongwos puwulwule nanu san, ko sete orongwos puwli nanu san. Ko nabil nen evi neveveien^F ne nise nanu rrum nen.

¹⁸ Si nga norongwosien sen mutoe orongwos purongwose bbong. Si nga batun muwlu orongwos purongwos neveveien nen evi neveveien ne nais sev. Suri evi neveveien ne nise jinibb ko san. Ko neveveien nen evi ongut vawon bbulin ngavöl ouwon drromon ouwon (666).

14

Natu Sipsip ko jinibb sen nir

¹ Mian ko nuklu ko nulesi Natu Sipsip mutur rengo botwen Saeon. Ko ni eptevi jinibb sen nir 144,000 nga maruli ni nisen ko Tata sen nisen rengo borngir.

² Ko nurngo drrelan san eplari rengo melrin erpe drrela dis nga milep nga n̄ir̄r̄r̄r̄re rengo botunmal, ko erpe kele belver nga miver milep, ko erpe kele drrela nevis tingting nir nga marok-kinkinji.

³ Ko nir 144 000 artur rengo no Atua nga n̄is̄akel rengo nai seksakel sen, ko rengo no netun vanu ivij, ko Birterawarng nir; ko arok-la nubo nga mimerr san, nga nir kis kobbong arongwos parongwose. Atua owli twenir rengo iel ngatan arivi sen.

⁴ Nir ko arivi jinibb on nga sete aran ji nesevin nabong san. Ko arivitu suri Natu Sipsip ngabe ngabe nga ni pian e. Atua owli twenir, ko nir parirpe sulsulen womunen vajin van ji Atua ko Natu Sipsip.

⁵ Sete nale gerisen san eplari rengo jingor nabong san, ko arivi jinibb nga marmomsawos marres jijle.

⁶ Mian ko nulesi anglo kele san orow mare, ko okwerwer rengo nospen nga n̄ir̄res nga muto tuwi ngok vini tevi jinibb jijle nir ne iel ngatan, ne vanu p̄et̄peti nir, nale p̄et̄peti nir, ko metka p̄et̄peti nir.

⁷ Ko anglo nen erij drrelan ean mare, owra “Kaptori Atua, ko kapsurövi. Suri daron evini le pa nga ni p̄iwer sesesre lat nga puto suri tevi jinibb jijle nir. Kapsurövi ni nga muloli melrin, iel ngatan, dis, ko mete nuwi nir.”

⁸ Mian ko anglo kele san evijuri nga womunen, ko owra “Ngaim nga milep Bapilon eil jubbul pa, esij p̄et̄peti. Suri ni ololi jinibb jijle nir armini norro sen nga m̄iterter, ko arlengleng e, ko arvijuri sel nga marsij sen nir.”

⁹ Ko anglo itolin vajin evijuri anglo nga womu nuru. Ko ni ekail, drrelan ean mare, owra “Nir nga marsurövi nanu rrum nen ko nai nga marsavi rrongrongvi, ko nga marla nabil nen rengo borngir rrek rengo nevrer,

¹⁰ nir ko parmini norro ne lolaren se Atua, nga mivi norro kiskis nga m̄iterter temijal, sete arkisi nanu san e. Erpok ko nir parlesi lolaren tera se Atua, parunge p̄isij rengo nabb nga n̄in ko nga muror peleplari re nevöt nga nisen salpa, rengo no anglo nir nga maron ko rengo no Natu Sipsip.

¹¹ Ko nousni nabb nen pus tuwi ngok vini. Ko nir nga marsurövi nanu rrum nen ko nai nga marsavi rrongrongvie, ko nir nga marlai nabil nen, nabb nen puslir tetajer nutrin ko nutpong, sete pumosi sopen nabong san.

¹² Ko ngok jinibb se Atua nir nga marosuri nale se Atua ko nga marlingi nolor rengo Iesu partur p̄iterter ko wor.”

¹³ Mian ko nurngo drrelan san eplari rengo melrin, ko owra “Kupuli nanu ngel: Neiren rengo nir nga marmij suri marmajing se Numal Atua, etipatun le pa ngel pian pijpari bongsi iel ngatan.” Ko Nernin erij weli, owra “Pirpok ko. Nir parmosi rengo belaken ser, ko partori suri wene majingen ser puto tevir.”

Anglo nga martori nesip netkiß ser

¹⁴ Mian ko nulesi nabor nga muow san, ko san nga mirpe jinibb esakel ren. Ko nuvan nga mivi gol oto re batun, ko otori nesip netkiß nga suri san oto re nevrer.

¹⁵ Ko anglo kele san eivare re Naim On, ko everus mare jer van ji ni nga n̄is̄akel re nabor, owra “Kupla nesip netkiß som, kupan kupta wit, suri armirr pa. Daron evini pa, ko jinibb ne iel ngatan nir arirpe naut ne wit nga m̄itra pa, ko daron evini nga parta twenir ko.”

Anglo itul

¹⁶ Ko ni nga mīsakel renge nabor ela nesip netkiḅ sen ko eta iel ngatan e, ko eta tweni wit ne iel ngatan nir ko esraker.

¹⁷ Mian ko nulesi anglo kele san mivare renge Naim On nga renge melrin; ko ni keke otori nesip netkiḅ nga muso san.

¹⁸ Ko anglo kele san, nga mok-metmete nabb nga mīin, evel re nawot vini. Ko everus van ji anglo nga mutori nesip netkiḅ nen, ko owra “Kupla nesip netkiḅ som, kupan kupta tututweni wene grep nir ne orsel ne iel ngatan. Armirr arpongpong ko pa.”

¹⁹ Ko anglo nen ela nesip netkiḅ sen, ko eta iel ngatan e; ko eta tututweni wene grep nir renge gar, ko otuwer van renge merremrre besin nga milep temijpal san. Ko iok parbbōtbbōt rer nga puloli suwer pīseseer tweni. Ngok ko vajin evi lolaren se Atua.

²⁰ Besin nen oto vare re ngaim, ko suwer nga marbbōtbbōt kirkirsir arsong-song peleplari, arseseer arivi drra. Drra nen eseseer peleplari van ngasu, erpe norngov nen ejpari 1600 statia (ngok evi 300 kilomita). Ko orron erpe poro jinibb san putur ren, ko pijpari nowen mare.

15

Jinibb se Atua nir arsurōvi

¹ Mian ko nulesi nanu nga mīinijnje kele san renge melrin, ko nutaol lenglengen e. Anglo ebut artori nanu ebut nga marsij. Nir ko parvinvini ore nanu nga marsij nir nga partor kemkarne jinibb nir, suri poro parpelari jile, ko lolaren se Atua pusuwsuw vajin.

² Mian ko nulesi sale nga mivilvil mīrres san, nabb nga mīin eksiksi tevi. Ko nulesi jinibb nir nga marevji nanu rrum nga neveveien^G nen evisen nisen, ko nai nga marsavi rrongrongvie. Ko jinibb nen nir artur renge jeli sale nen. Artori nevis tingting nga Atua mīlai tevir,

³ ko arok-la nubo se Moses, jinibb ne majingen se Atua, ko evi kele nubo se Natu Sipsip. Ko arlai erpel: “Numal Atua ne derteren jille, Nik majingen som arlelep arres, nik batu numal ne vanu jille nir. Sel som nir armomsawos arres, arivi weretunen.

⁴ Numal, isi sete orongwos pimtutue nik? Isi pumus pusrōvi nise? Nik kusan bbong kuon. Jinibb ne vanu pētḗeti nir parini parsurōvim, suri jinibb jille nir arlesi murrun som nir nga marmomsawos marres.”

Besin ebut nga marwun saute lolaren se Atua

⁵ Mian ko nulesi devji nga mivi Naim On nga muto renge melrin etḗir.

⁶ Ko anglo nga ebut nga martori nanu ebut nga marsij nga arivare rengen. Aruri sunsun nga marow titis marres, ko ar-tatuwe netatuw ne gol re morkor.

⁷ Mian ko san renge netun vanu nga ivij nga elai besin ebut tevi anglo nir nga marwun saute lolaren se Atua, nga mimaur tuwi ngok vini.

⁸ Ko nousni nabb osongni Naim On pētḗeti, nga mus pelari renge nosrōvien ko derteren se Atua. Ko sete san orongwos pian loloim re Naim On, pijpari nga nanu ebut nga marsij nga anglo ebut martorir parsuwsuw.

16

¹ Mian ko nurnge drrelan san ean mare, eplari renge Naim On ko owrai tevi anglo ebut nga, owra “Kapan kapjivreni tweni besin ebut nga marwun saute lolaren se Atua, parmejivjiv van re jinibb totoklai nir.”

² Ko anglo nga womunen evan ko ejivreni tweni besin sen van re jinibb totoklai nir. Ko garen lele nga marsij nir ko marerngis arap pelari renge nibe jinibb nir nga nabil se nanu rrum nen muto rer, ngok nir nga marsurōvi nai nga marsavi rrongrongvie.

³ Mian ko anglo erwen ejivreni tweni besin sen van renge dis. Ko dis erieni evini erpe drra jinibb nga mimij. Ko nanu jille renge dis armij.

⁴ Mian ko anglo itolin ejivreni tweni besin sen van renge nuwi seser nir ko mete nuwi nir, ko arieni arivi drra.

⁵ Ko nurnge drrela anglo nga mimetmete nuwi nir owrai owra “Nik nga kumon, nga kumlik lelingen ngel ko kumlik tuwi pa. Kutor aljer osorsan kobbong tevi nanu nga marlolir.

⁶ Suri nir arevji pini jinibb on nir drrar emejivjiv, ko drra propet kele nir; ko niko nik kula drra tevir parmini. Mirpok ngok osorsan kobbong.”

⁷ Mian ko nurnge drrelan san nga miplari renge nawot ko owra “Numal Atua ne derteren jille! Kutor alje jinibb nir renge sel nga marivi weretunen ko marsorsan mīrres.”

⁸ Mian ko anglo ivajin ejivreni tweni besin sen van renge nial, ko esne lokloksi jinibb nir erpe nabb nga mīin.

⁹ Esne lokloksir, ko arwer lokloksi nise Atua, nga mimetmete nanu nga marsij nen nir. Ko armusus nolor pulululwi ko parsurōvi.

¹⁰ Mian ko anglo elmen ejivreni tweni besin sen van renge nai seksakel se nanu rrum nen. Ko nat emalik renge batun vanu sen, ko jinibb nir araji nemer suri arunge garen ser otor kemkamier.

¹¹ Ko arwer lokloksi Atua ne melrin suri marunge m̄isij, ko suri garen ser. Ko ejki, sete nolor arlululwi renge sel nga marsij sen.

¹² Ko anglo ouwnon ejivreni tweni besin sen van renge nuwi seser nga milep Iupretes. Ko nuwi emes, ko sel otoa vajin se numal nir nga parivel renge Is ko vini.

¹³ Mian ko nulesi neñin itul nga marsij nga marirpe prok. San eplari renge jingo drakon, san eplari renge jingo nanu rrum, ko san eplari renge jingo propet ne gerisen san.

¹⁴ Nir ko arivi neñi demij nir nga marongwos parloli nanu nga marinijnij nawone nir. Ko nir arivel van ji batu numal ne iel ngatan jille nir, nga puloli parkorti re nuval renge nabong nga milep se Atua ne derteren jille.

¹⁵ Ko Iesu owra “Kapmurrong! Inu devel silveni vinuk tirpe jinibb venao san, ko dea-taolsi kami. Jinibb nga mimetmet m̄irres, ko sete muri tweni sunsun sen ko ematur bbong elelea, ni purnge p̄irres, ko sete orongwos pivel malmal re no jinibb nir ko pimanun.”

¹⁶ Mian ko neñin nga itul nga artekai numal nir ne iel ngatan arini korti lat sansan. Lat nen, nisen renge nale se m̄eri Isrel nir evi Amaketen, nga muwra puwra Botwen nga milep ne Mekito.

¹⁷ Mian ko anglo ebutun ejivreni tweni besin sen van renge ling. Ko drrelan san ean mare, eplari renge nai seksakel nga renge Naim On, ko owra “Osuw le pa!”

¹⁸ Ko navil evil, belver ever, ko nam̄i nga milep temijpal san em̄i. Setewor jinibb san elesi wor nam̄i nga milep mirpok nabong san, nenen elep asi p̄etp̄eti.

¹⁹ Ko Jerusalem omoworwor devjen itul e, ko ngaim ne vanu p̄etp̄eti nir arsj p̄etp̄eti. Ko Atua sete emalie Babilon, otorrlai, ololi emni norro ne lolaren sen nga milep.

²⁰ Ko norour jille nir arm̄etaw ko botwen nir arjijki.

²¹ Ko motpo aes nga marlelep nga marrow ejpari kilo ngavöl elim (50) arvitvitan renge jinibb nir. Ko nir arwer lokloksi Atua, suri evi nanu nga m̄isij milep.

17

Nesevin ne sel nga m̄isij nga m̄isij

¹ Ko san renge anglo nga ebut nga martori besin ebut evini jik ko owrai tevik owra “Kupini, ko kuplesi partor alje

nesevin ne sel nga m̄isij nga m̄isij. Nesevin nen evi ngaim nga muto mori nuwi seser elep.

² Ko batu numal ne iel ngatan nir arloli esij pa tevi nesevin nen. Ko jinibb nir ne iel ngatan armini norro sen ko arlengleng e, ko arvijuri sel nga marsij sen nir.”

³ Ko derteren se Neñin On orrul totonik, ko anglo nen owosik van renge lolo merwer. Ko iok nulesi vin nga. Ni esakel renge nanu rrum nga musongsong san. Nanu rrum nen, batun ebut ko batin esngavöl, ko aruli nais nga marwer lokloksi Atua renge niben p̄etp̄eti.

⁴ Ko vinnen ori sunsun nga nulsen m̄irres p̄elak, nga nulsen eru e, tuwen osongsong ko tuwen opongpong e. Ko ni ojroi ni e nanu nga marivi gol nir, ko nevöt nga marres nir, ko perel. Ko otori biles ne gol nga muwun saute nanu nga marsij p̄erp̄er nir nga marivi wene sel nga marsij sen nir.

⁵ Ko renge borngin aruli nale nga muto tepi san ren, evi nais san, ko owra puwra ‘Babilon nga milep, tasu se nesevin ne sel nir ko batu murrun nga marsij p̄erp̄er nir ne iel ngatan.’

⁶ Ko nulesi vinnen elengleng e mimni drra jinibb se Atua nir, ko drra nir nga marevji pinir suri marosuri Iesu.

Melesi, ko nutaol lenglengen.

⁷ Ko anglo owrai tevik, owra “Suri sev kutaol? Inu bowra visviseni tevim nale nga muto tepi suri vinnen ko nanu rrum nga ni m̄isakel ren nga batun ebut ko batin esngavöl.

⁸ Nanu rrum nen emaur ko wor womu, ko mian ko emij pa. Ko otomori piprai kele renge bbulwil nga nabbön mijkie; ko sete pipriv kele, ko parevji pini pimij kele. Ko nir nga niser mijkie renge naul ne mauren nga maruli tweni jile pa, mian ko iel ngatan mia-pelari, nir nen ko partaol lenglengen daron nga marlesi nanu rrum nen, suri emaur ko wor womu, mian ko emij pa, ko eplari luwi kele vajin.

⁹ Iok poro jinibb san orongwose, ko m̄ernen norongwosien sen elep ko. Nanu rrum nen, batun nga ebut nga arivi botwen ebut nga nesevin nga m̄isij nen elik renger, ko arivi kele batu numal ebut.

¹⁰ Ko renge batu numal nga ebut nga, nir elim arjiki pa, ko eru orjipon. Nuru tuwen otori derteren sen malum, ko nuru tuwen setewor eplari. Ko daron nga piapelari e, ko ni putori derteren sen re daron kobbong sapon.

¹¹ Ko nanu rrum nen nga mimaur ko wor womu, ko emij pa, ni womu evi nir san renge nir nga ebut ngok; ko eplari luwi kele vajin, ko evi vajin numal owalin kele. Ko sete pipriv, ko parevji pini kele pimij.

¹² Ko batin esngavöl nga kumlesir arivi batu numal esngavöl nga setewor arla derteren ser, ko mian ko para-lai ko. Ko parpitevi nanu rrum nen, para-ivi numal re mete nial sansan.

¹³ Nir nga esngavöl ngel, norrorrmien ser evi sansan bbong. Ko nir parla dert-eren ser, parlingi re nevre nanu rrum,

¹⁴ ko nirnir nanu rrum nen vajin parval tevi Natu Sipsip. Ko Natu Sipsip evi Batu Numal ne batu numal p̄et̄peti nir. Ni everus pae jinibb sen nir, otobbobbuer, ko nir arosuri ni erres. Ko ni pipetevi jinibb sen nen nir ko paran parval tevi numal nga esngavöl nga, ko parevjir.

¹⁵ Ko anglo owrai keke tevik, owra “Nuwi nir nga kumlesir nga nesevin nga m̄isij m̄ilik morir arivi jinibb ne vanu nir, ko ne metka nir, ko ne nale nir.

¹⁶ Ko batin esngavöl nga kumlesir ko nanu rrum parungasi nesevin nga m̄isij nen. Ko nir parrange tututweni joron p̄et̄peti, ko vinnen putur malmal. Ko nir parurro vison ko parsuli p̄inivniv.

¹⁷ Suri Atua elngi pa re nolor nga parloli nanu nga murrormi nir, ko nga parini korti ko parlai derteren ser tevi nanu rrum, pijpari nga nale se Atua nir para- pelari.

¹⁸ Ko nesevin nen evi ngaim nga milep nen nga mimetmete numal nir ne iel ngatan.

18

Ngaim nga milep Bapilon eil jubbul, esij p̄et̄peti

¹ Mian ko nulesi anglo keke san ojubbul re melrin vini. Ni derteren sen elep, ko ni erinrin ko omor vaseni iel ngatan p̄et̄peti.

² Ko erij drrelan ean mare, owra “Ngaim nga milep Bapilon eil jubbul, evitan pa esij p̄et̄peti! Evi vajin sise demij ko nem̄in nga marsij nir, ko numön lele nga marsij nir artur pa ren.

³ Suri jinibb ne vanu p̄et̄peti nir armini pa norro sen nga m̄iterter ko arlengle e, ko arvijuri sel nga marsij sen nir. Ko batu numal ne iel ngatan nir arloli esij tevi; ko jinibb nir ne iel ngatan nga marok-wulwule nijor nir, nevöt ser elep vajin suri ni murrn nga mimrreni nanu jijle.”

⁴ Mian ko nurnge drrelan keke san eplari rege melrin, ko owra “Jinibb suk nir, kapivare ko wor rege Bapilon. Sete kap-korti tevi rege nololien sen nga marsij nir. Kapwolu lingi, suri Atua putor kemkan̄e rege nanu nga marsij nir nga parini jin.

⁵ Nololien sen ousuni kortonir, owu jipari melrin. Ko Atua elesi sel sen nga marsij ngok ko elngi pa rege norrorrmien sen nga puloli nanu san tevi.

⁶ Kapkele tevi pusorsan pirpe ni muloli tevi kami. Ko nanu nga muloli pa tevi kami vesan, kapkele pivaru tevi. Kapjivi norro nga m̄iterter re biles min̄in sen, pimni norro nga derteren sen m̄iasi varu rege norro nga m̄ilai tevi kami.

⁷ Ni eramet, ko ololi ni luwi nisen ean mare. Kaploli ni purnge p̄isij ko p̄iting vajin. Suri tetajer ni nolon okan mare, ko okwera ‘Inu le, numal san. Diwen suk sete ernij lingik, ko sete b̄eting nabong pisan.’

⁸ Suri muwrai mirpok, ni p̄ilesi mesien, dingen, ko numer, rege bbong nabong pisansan, ko nabb p̄iani pini. Suri Numal Atua nga m̄iwer sesesre lat nga puto suri tevi, ni derteren sen elep.

⁹ Ko batu numal ne iel ngatan nir nga tetajer marir e nijor sen nga marres nir ko markorti tevi vinnen Bapilon rege sel nga marsij sen nir, parting pilep daron nga parlesi nousni nabb nga p̄iani.

¹⁰ Artur tuwi ngasu, suri armetutu nir keke tarin, ko arwera “Warru! Warru! Ngaim nga milep Bapilon nga m̄iterter! Renge mete nial sansan bbong artor-rlaim!”

¹¹ Ko jinibb nir ne iel ngatan nga marok-wulwule nijor nir partengsi keke, suri san ejkimun nga pokwuli tweni nijor ser nir.

¹² Setemun san okwuli gol ser, silva ser, nevöt ser nga marres nir, ko perel nir. Ko setemun san okwuli kalik ser nga marres nir, nga marow titis, ko nga marpongpong, ko nga marsongsong, ko kalik nga mivi silik marmalum m̄irres. Setemun san okwuli nai ser nga mapur m̄irres, ko nai nir nga marsavi rege liwe elepen, ko rege nai nga nowlin mian mare, ko rege bras, ko rege delrrurr, ko rege nevöt nen nga m̄iterter m̄irres ko muow;

¹³ ko rao nanu nir nga mapur m̄irres, erpe sinamon ko spaes ko insens, ko mir ko prangkingsens. Setemun san okwuli norro, oel, plaoo, ko wit ser. Setemun san okwuli buluk, sipsip, os ko kat ser, ko setemun san okwuli jinibb nir nga marivi demij maur.

¹⁴ Ko nir nga marok-wulwule nanu ngok nir parwerai tevi vinnen Bapilon: “Nijor nga marres nir nga kumlingi nolom rer arjijki pa. Nanu nga marinrin nir ko nga nowlir milep arwolu lingim, ko setemun kuma-lesir keke.”

¹⁵ Ko nir nga marok-wulwule nanu nir rege Bapilon ko marok-lai nevöt nga milep rengen partur tuwi ngasu, suri armetutu nir keke tarla norongen nga m̄isij. Ko arting nga arting lenglengen, armesmasorr e, ko arwera

¹⁶ “O, warru, warru temijpal wor rege nik, ngaim nga milep. Seveling nga, komok-uri sunsun som nga nulser marres, nga marsongsong ko nga marpongpong

mīrres, ko arivi kalik nga marres. Seveling nga komok-juroi nik e nanu nga marivi gol nir, ko nevōt nga marres nir, ko perel.

¹⁷ Ko renge mete nial sansan bbong, nijor som nga marres nir arjijki pa.”

Ko numal ne drrav nir tevi jinibb nir nga marsa renge drrav nen nir ko jinibb nga marmajing renge drrav nir, artur tuwi ngasu,

¹⁸ ko arlesi nousni nabb nga mīani ngaim nga milep nen, ko arkail arwera “Sete pa ngaim san elep ko erres osorsan tevi nga ngok!”

¹⁹ Ko arker a maw arjijreni renge batur, ko arting nga arting lenglengen, armes-masorr e, ko arwera “O, warru, warru temijpal wor renge nik ni ko, ngaim nga milep. Jinibb nir nga drrav ser marok-wolwolu renge dis arla nevōt nga milep jim. Ko renge mete nial sansan bbong, nijor som nga marres nir arjijki pa.”

²⁰ Ko nik, melrin, kuḗir, ko jinibb on se Atua nir, ko aposol nir, ko propet nir. Suri Atua otorrlai suri nanu nga ni muloli tevi kami.

²¹ Mian ko anglo san nga derteren se milep owosi nevōt nga milep san ko ewirre van renge dis. Ko owrai owra “Bapilon, nik kuvi ngaim nga milep san. Ko parwirrem pia-irpok, ko sete san ḗilesim kele.

²² Re sisom, jinibb nga ḗitetnije nevis tingting pijki mun, ko jinibb nga ḗila nubo pijki mun, ko jinibb nga puwi nabbu pijki mun, ko jinibb nga puwi davō pijki mun. Metusu san pijki mun, ko setemun parunge drrela nevōt nga milep nga mipis worwor jelangi wit marok-ivi plaoa.

²³ Setemun parlesi moro nasul re sisom, ko setemun parunge drrela jinibb parkarkar re daron nga marloli totkoi. Ko seveling nga, jinibb som nir nga marok-wulwule nanu nir, nijor ser elep asi nir ḗetḗeti nga renge iel ngatan. Ko botut som ekrekrasi jinibb ne vanu jikle nir. Nanu ngok nir arvinvini ore nga evi bongsin ko vajin.”

²⁴ Atua otorrlai Bapilon erpok suri drra propet nir ko drra jinibb se Atua nir eseser rengen, tevi drra jinibb jikle nir nga martor pinipnir iel ngatan.

19

Nir nga renge melrin arla nubo

¹ Mian ko nurunge drrelan san erpe jinibb delung nga milep drrelar re melrin, ko arwera “Rapsurōvi Atua! Ni ela mauren tevi kerr, nisen ean mare, ko derteren jikle arivi se ni ko.

² Ni ewer sesesre lat nga puto suri tevi jinibb jikle nir renge sel nga mimetet musorsan mīrres. Ko ni otorrlai nesevin ne sel nga mīsij nga mīsij nen nga mulokloksi iel ngatan renge sel nga marsijsen nir, ko ekle lweni nga ni mutor pini jinibb se Atua nir.”

³ Ko vesan kele arkail, arwera “Rapsurōvi Atua! Nousni nabb nga mīani ngaim nga milep pus tuwi ngok vini.”

⁴ Ko ḗirtera nga ngavōl eru drromon ivij nga, ko netun vanu nga ivij nga arjiol van ngatan armatur ko arsurōvi Atua nga mīsakel renge nai seksakel sen. Ko arwera “Pirpok ko! Rapsurōvi Atua!”

Nanen ne totkoi en se Natu Sipsip

⁵ Mian ko drrelan san eplari renge nai seksakel se Atua, owra “Kapsurōvi Atua se kerr, kami jinibb sen nir, kami nga kammētutue ni, kami nga kamwelili ko kami nga kamlelep.”

⁶ Mian ko nurunge drrelan san erpe jinibb delung nga milep drrelar, ko erpe kele drrela dis bburbbur nga mīrre rre re botunmal, ko erpe belver okver. Ko nurunge arwera “Rapsurōvi Atua! Ni evi Numal, ko otori derteren jikle.

⁷ Rraḗir, rrapusasi nisen pian mare. Suri daron evini pa nga Natu Sipsip ḗilesi nesen sen.^H Ko nesen sen etriv pa.

⁸ Ko arlai pa sunsun nga muow titis, ori pa”. Nesevin nen orrongrongvi jinibb se Iesu nir, ko sunsun nen orrongrongvi murrun nga marres nga marloli.

⁹ Ko anglo owrai tevik, owra “Kupuli tweni nanu ngel: Neiren renge nir nga marveruser parini renge nanen ne totkoi en se Natu Sipsip.” Ko owrai kele owra “Ngok arivi nale se Atua, ko arwertun.”

¹⁰ Mian ko nujiol vitan numatur renge ḗelan, nuwra bosrōvi; ko ni owra “Pijki, pijki! Inu kele nuvi jinibb ne majingen se Atua erpe nik ko tasi kerr nir nga martori totoni nale se Iesu. Kupsurōvi Atua kobbong pisan. Suri nale se Iesu evi batu nale se propet nir.”

San esakel renge os nga muow

¹¹ Mian ko nulesi melrin eteri wukari etḗir. Ko nulesi os nga muow san, ko san esakel rengen. Ni nisen ko ‘Mer nga mokwera nanu ko mokweretun, puloli suri pirpe muwrai.’ Ni okwer sesesre lat nga puto suri tevi jinibb nir renge sel nga musorsan mīrres, ko eval renge sel momsawos nen.

¹² Ko meten nuru orirpe nabb nga mulumelum pelpelari ren, ko ori nuvan elep renge batun. Ko aruli nais san renge

^H 19:7 Natu Sipsip orrongrongvi Iesu, ko nesen sen evi kerr kalesia.

niben, ko ni esan kobbong orongwos nais nen.

¹³ Ko sunsun sen eþelpalos þetþeti drra. Ko nisen ko 'Nale se Atua'.

¹⁴ Ko jinibb nuval nir ne melrin arvijuri. Nir arsakel rengo os nga marow nir, ko aruri sunsun nga marwokwok marres, arow titis.

¹⁵ Ko nesip nuval san nga muso varrvarr okpelari rengo jingon, ko ni pipalpal e ko putor kemkamē jinibb ne vanu nir. Ko ni pimemet vanu nir tevi nai delrurr san, ko pibbōtbbōt kirkirsi wene grep nir. Ngok orrongvi lolaren nga milep se Atua ne derteren jijle.

¹⁶ Ko aruli nais san rengo sunsun sen ko rengo jakin, nga muwra 'Batu Numal se numal þetþeti nir.'

¹⁷ Mian ko nulesi anglo kele san otur rengo nial. Ko ni everus drrelan ean mare van ji numōn nga marow mare nir, ko owra "Kapini, kapser korti rengo nanen nga milep se Atua.

¹⁸ Kapini kaptisasi viso batu numal nir, viso batu jinibb ne nuval nir, ko viso jinibb ne nuval nir, viso os nir, ko viso nir nga marsakel rer, viso jinibb jijle nir, demij maur, nir nga marivel sisarow, jinibb nga marlelep, ko jinibb nga welili nir."

¹⁹ Ko mian ko nulesi nanu rrum nen eptevi batu numal nir ne iel ngatan ko jinibb ne nuval ser nir, arser korti nga parval tevi Ni nga mīsakel rengo os nga muow ko tevi jinibb sen nir.

²⁰ Ko jinibb sen nir aran arrul totoni nanu rrum nen, tevi propet ne gerisen nga muloli nanu nga marinijnj nawone nir re non. (Nanu ngok nir arkerkerasi jinibb nir nga marla nabil ne nanu rrum ko nir nga marsurōvi nai nga marsavi rrongrongvi nanu rrum nen e.) Ko nanu rrum nen ko propet ne gerisen nen arwir maur nuru rengo nabb nga geken milep nga salpa muror ren.

²¹ Ko jinibb nir se nuru, nesip nuval nga mokpelari rengo jingo ni nga mīsakel rengo os nga muow esari pinipnir. Ko numōn nir artistasi visor, artasi, artasi, artasi, mian ko arup vajin.

20

Jinibb nga parpitevi Kristo parmetmete vanu nir pijpari sia pivi 1000 pusuw

¹ Mian ko nulesi anglo san ojubbul re melrin vini. Ko ni otori ki ne bbulwil nga nabbōn mijkie, ko dil delrurr nga milep san.

² Ko orrul totoni drakon nen, nga mivi nurīet nga tuwi mīkrekrasi Iv. Nisen ko Demij, ko nisen tuwen nen evi Setan. Ko anglo eka totoni dil delrurr nen e, ko þisre

totoni pirpok pijpari sia pivi nuvasngavōl vesan (1000) pusuw.

³ Ko anglo ewirre van rengo bbulwil nen, ko eplaji ore tevi ki. Eplaji ore jile, ko ebbōlji ore nabbōl e, nga sete san orongwos þitasi metali nen. Ko ngok Demij sete orongwos pivel ko þikrekrasi jinibb nir pijpari nga sia 1000 nen pusuw. Ko poro sia nen nir parsuw vajin, ko ni pivel sisarow vajin nabong pievis bbong.

⁴ Mian ko nulesi nai seksakel sopor. Ko nir nga marsakel rer, derteren ser otoa nga parwer sesesre lat nga puto suri tevi jinibb nir. Ko nulesi neñin nir nga marta otvi batur suri arwerwer rengo nale weretunen se Iesu ko se Atua. Nir armusus parsurōvi nanu rrum nen rreknga nai nga marsavi rrongrongvie, ko armusus parlingi nabil ne nanu rrum rengo borngir ko rengo nevrer; ko jinibb artor pinir suri. Ko Atua ololi armaur luwi, ko parpitevi Kristo, parmetmete vanu nir pijpari sia 1000 pusuw.

⁵ Ngok evi womunen nga Atua muloli jinibb marmaur luwi kele re mijen. Ko jinibb nūnij nen nir nga marmij, sete parmaur luwi pijpari nga 1000 sia nen para-asi.

⁶ Neiren rengo jinibb on nir nga Atua nīsa raji wowomue nir mirpok. Mijen erwen nga vitunen sete orongwos pijparir. Ko parivi jinibb ne sulsulen se Atua ko se Kristo, ko parpitevi ni nga parmetmete vanu nir, pijpari sia 1000 nen pusuw.

Arevji kemkamē Demij

⁷ Mian ko sia 1000 nen poro parsuw vajin, ko Demij pivel sisarow rengo naim ne nekaien sen.

⁸ Ko ni pivel van ko þikrekrasi metka se Gok ko Makok, ngok arivi jinibb ne vanu jijle nir iel ngatan. Ko ni þiser kortonir lat sansan tera nuval, nir elep nga elep, erpe deþinan ne ngalu.

⁹ Mian ko nulesi arivel otvi iel ngatan ko artur ore rrale þetþeti lat nga jinibb se Atua nir marlik e, ko ngaim nga Atua mimrreni. Ko nabb oror pelari rengo melrin ko eanir þetþeti.

¹⁰ Mian ko Demij, nga mīkrekrasir, arwirre van rengo nabb nga geken milep nga salpa muror ren, lat nga marwirre jile pa nanu rrum nen ko propet ne gerisen nen van ren. Ko nir parungo nevrut iok nutrin ko nutpong pijpari tuwi ngok vini.

Atua ewer sesesre lat nga puto suri tevi jinibb jijle nir

¹¹ Mian ko nulesi nai seksakel nga muow nga milep san, ko Atua esakel ren. Iel ngatan ko melrin orñetaw vesan lingi non, oran orjiki jer.

¹² Ko nulesi jinibb nir nga marmij, jinibb nga marlelep ko jinibb nga marwelili, martur re no Atua. Ko anglo nir areveve naul sopor, mian ko areveve naul ne mauren. Ko renga naul nen nir, aruli tweni nanu jijle nir nga jinibb nir marlolir. Ko Atua emteni naul nen nir, mian ko ewer sesesre lat nga puto suri tevi jinibb nir.

¹³ Ko jinibb nir nga marmij renga dis arivare renga dis, ko arini. Ko jinibb jijle nir nga marmij arini. Mijen sete orongwos purrul totonir, arivel lingi ko arini renga nai seksakel se Atua. Ko Atua emteni naul nen nir nga maruli tweni nanu jijle nir nga jinibb nir marloli renga, mian ko ewer sesesre lat nga puto suri tevi nir p̄t̄p̄eti.

¹⁴ Mian ko mijen ko lat nga jinibb nga marmij nir marlik e, anglo ewirre nuru van renga nabb nga geken milep. Nabb nga geken milep nen evi mijen erwen nga vitunen.

¹⁵ Ko jinibb jijle nir nga niser sete marto renga naul ne mauren, arwirrer van renga nabb nen.

21

Melrin nga mimerr ko ngatan nga mimerr

¹ Mian ko nulesi melrin nga mimerr san ko ngatan nga mimerr san. Melrin nga womu ko ngatan nga womu orjijki pa, ko dis ejki mun.

² Ko nulesi Ngaim On, Jerusalem nga mimerr, ojubbul re melrin ji Atua vini. Ko ni erpe nesevin nga mutori nijor nga marinrin nga muwra pian ji diwen sen.

³ Ko nurnga drrelan nga milep san eplari renga nai seksakel, owra “Lelingenok Atua ololi liken sen vajin tevi jinibb. Ni pilik tevir, ko nir parivi ni jinibb sen. Atua ko pilik tevir, ko pivi Atua ser.

⁴ Ni pitwasi tweni nir jijle suwen meter. Mijen pijki mun, dengen pijki mun, ko norongen nga m̄isij pijki mun. Nanu nga tuwi nir parjijki.”

⁵ Mian ko Atua nga m̄ilik re nai seksakel sen owra “Kuplesi! Nuloli nanu jijle arivi kele nanu nga marmerr.” Ko owrai kele tevik owra “Kupuli tweni nanu ngel, suri nale ngel nir arweretun ko orongwos jinibb parosurir.”

⁶ Ko owra “Osuw le! Inu nuvi batu nanu jijle, ko nuvi kele bongsi nanu jijle. Inu nuwowomu jerjer, ko inu bea-vivitu jerjer. Poro san nolon pimesmes, ko inu bemarkonge pimni nuwi nga mipleplari renga mete nuwi ne mauren, ko pimni nawone.

⁷ Jinibb nga mirevji devje nuval parlai nanu ngel jik: Inu bevi Atua ser, ko nir parivi inu natuk.

⁸ Ko jinibb nga marmetutu, jinibb nga sete marosuri, ko jinibb nga marok-loli murrun lenglengen, ko jinibb nga marok-tortor pinipni jinibb, ko jinibb nga marok-loli m̄isij tevi nesevin, ko jinibb ne botut nir, ko jinibb nga marok-surōvi demij nir, ko jinibb nga markerkeris, nir ko lat nga nir pivi nabb nen nga geken milep nga muror tevi salpa. Ngok evi mijen erwen nga vitunen.

Jerusalem nga mimerr

⁹ Ko san renga anglo nga ebut nga bonevis martori besin ebut nga nanu nga marsij nir marwun rer evini jik ko owra “Kupini, ko beviseni teim nesen se Natu Sipsip nga mia-lik jin.”

¹⁰ Ko derteren se Nerfin On orrull totonik, ko anglo nen owosik van renga drromo botwen nga milep san. Ko eviseni Jerusalem tevik, Ngaim On, nga mujubbul re melrin ji Atua vini.

¹¹ Ko erinrin renga moron nga mokpelari tetajer ji Atua. Erinrin erpe nevōt nga m̄irres san, erpe jaspera nga m̄imerer kemkarie.

¹² Ko nawot nen elep, owu mare, ko epriv. Ko metali ne nawot esngavōl drromon eru, ko anglo esngavōl drromon eru armetmeter. Ko renga metali nen nir aruli nise botnabe esngavōl drromon eru se m̄eri Isrel nir.

¹³ Ko nawot nen devjen ivij arto rrale ngaim, ko metali itutlu arto renga devjen nga ivij ngok nir. Itul re devjen nga van renga Is e, ko itul renga devjen nga van renga Saot e, ko itul renga devjen nga van renga Not e, ko itul renga devjen nga van renga Wes e.

¹⁴ Ko nawot nen ejngot renga nevōt nga marlelep esngavōl drromon eru. Ko renga nevōt nga esngavōl drromon eru nen aruli nise aposol esngavōl drromon eru se Natu Sipsip.

¹⁵ Ko anglo nga m̄irij tevik otori norngov nga mivi gol nga purrongvi ngaim, metali nir, ko nawot nen.

¹⁶ Ko norngov ne devjen nga ivij nga arsorsan, arivi 12 000 statia (ngok evi 2 400 kilomita). Ko owu mare kele ejpari 12 000 statia.

¹⁷ Ko anglo orrongvi kele nawot, ko emtul ejpari 144 kiubit (ngok evi 65 mita). Kiubit nen evi kiubit nga marok-rongvi nanu nir renga tetajer.

¹⁸ Ko nawot nen evi jaspera, nevōt nga m̄irres p̄elak san. Ko ngaim armajinge gol nga m̄imerer m̄irres p̄elak erpe glas.

¹⁹ Ko nevōt nga marlelep nga nawot ne ngaim m̄ijngot ren arivi nevōt nga marres lele nir. Nga womunen evi jaspera, nga

vitunen evi sapaea, nga mivi itolin evi akat, nga mivi ivajin evi emeral,

²⁰ nga mivi elmen evi onikis, nga mivi ouwnon evi kanilian, nga mivi ebutun evi ialakwoj, nga mivi owalin evi malakaet, nga mivi eswen evi topas, nga mivi songvölön evi kalsetoni, nga mivi drromon san evi takwaes, ko nga mivi drromon erwen evi ametis.

²¹ Ko metali nga esngavöl drromon eru nen arsavi ko arlolir re perel. Perel nen nir arlelep lenglengen ko arpepriv. Sansan kobbong orongwos parloli metali nen e san. Ko sel nga muwlu otvi liven ne ngaim, armajinge gol nga mĩnĩerer mĩrres pelak erpe glas.

²² Ko Naim On san ejki rengo Ngaim, suri Naim On nen evi Numal Atua ne Derteren Jijle, ko Natu Sipsip.

²³ Ko sete emrreni nial rrek navöl, suri moron se Atua omor rengo, ko Natu Sipsip evi nasul nen.

²⁴ Ko jinibb nir parivel bburbbur rengo moron. Ko batu numal nir ne iel ngatan parlai nijor ser nir paran rengo.

²⁵ Ko metali nen nir partepir tetajer, suri nutpong pijki iok.

²⁶ Ko nanu nga marlelep ko nga marres pelak nir se jinibb jijle nir parwosir vini rengo.

²⁷ Ko sete nanu san nga purro pian ren, rreknga jinibb san nga muloli nanu nga mĩsij, rrek nga mĩkrekris. Nir kis kobbong nga niser marto rengo naul ne mauren se Natu Sipsip, nir ko paran rengo.

22

¹ Ko anglo nen eviseni kele nuwi seser ne mauren tevik. Evilvil peleplari rengo nai seksakel se Atua ko se Natu Sipsip.

² Ko eseser van, eseser suri live sel ne ngaim. Ko rengo jelin ko jelin, nai ne mauren artur ren. Ko arwen navöl jijle re navöl esngavöl drromon eru re sia. Ko raon arivi roi ne mesien nga parla tweni mesien se jinibb jijle nir.

³ Ko sete nanu san oto rengo ngaim nga Atua owra evi nanu nga mĩsij. Ko nai seksakel se Atua ko se Natu Sipsip oto rengo ngaim, ko jinibb sen nir parsurövi.

⁴ Nir parlesi Ni non, ko paruli nisen rengo borngir.

⁵ Ko setemun nat pupong, ko setemun nial p̄sin, ko setemun parsuli nasul. Suri Numal Atua ko vajin pivi moron ser. Ko nir parivi numal ko parmetmete nanu jijle nir tuwi ngok vini.

Iesu pulwi vini

⁶ Mian ko anglo owrai tevik, owra “Nale ngel nir arweretun ko orongwos jinibb

puosurir. Ko Numal Atua, nga mokla Neñin sen tevi propet nir; okoni anglo sen nga piviseni tevi jinibb sen nir sev nga piapelari sete ngasu.”

⁷ “Kuplesi! Bevinuk sete ngasu! Ko neiren rengo nir nga marosuri nale ngel nir rengo naul ngel nga Atua mĩlair.”

⁸ Inu le, Jon, nurunge ko nulesi nanu ngel nir. Ko daron nga mornger ko m̄lesir jile osuw, ko nujiol vitan numatur rengo bela anglo nga mivisenir tevik, nuwra bosrövi.

⁹ Ko ni owra “Pijki, pijki pa! Suri inu kele nuvi jinibb ne majingen kobbong erpe nik ko tuwam nir nga marivi propet, ko nir jijle nga marosuri nale nir nga marto rengo naul ngel. Kupsurövi Atua kobbong pisan.”

¹⁰ Ko ni owrai tevik kele, owra “Sete kupsilveni nale se Atua nir nga marto rengo naul ngel, suri daron nen evini mori nga nanu jijle ngel nir para-pelari.

¹¹ Si nga murrun m̄sij p̄plake p̄plok tajer ko wor, ko si nga murrun murro, p̄plake p̄plok tajer ko wor. Ko si nga murrun m̄rres p̄plok tajer ko wor, ko si nga muon, p̄plok tajer ko wor.”

¹² Ko Iesu owra kele, “Bevinuk sete ngasu! Ko botori tevik jinibb jijle nir nowlir, ko belai tevi jinibb jijle nir pusor-san tevi murrun nga marloli.

¹³ Inu nuvi batu nanu jijle, ko nuvi kele bongsi nanu jijle. Inu nuwowomu jerjer, ko inu bea-vivitu jerjer kele. Inu nutipatune nanu nir, ko inu bea-vinvini orer.

¹⁴ Neiren rengo nir nga parrawe sunsun ser ko parviter vajin nga parurro wene nai ne mauren, ko parasi re metali ko paran laut.

¹⁵ Ko vare rengo ngaim, nir nga marok-loli murru lenglengen, nir nga marok-loli botut, nir nga marok-loli m̄sij tevi nesevin, nir nga marok-tor pinpini jinibb, nir nga marok-surövi demij nir, ko nir nga nolor marto suri gerisen.”

¹⁶ “Inu le, Iesu, nukoni anglo suk nga puwrowrai nanu ngel nir tevi kami kalesia nir. Inu nuvi metka se Devet. Inu nuvi moju nutrin nga mimor m̄rres.”

¹⁷ Neñin On tevi ni nga mirpe nesen se Kristo^I orwera “Kupini.” Ko jinibb jijle nir nga parunge nale ngel parwera kele, “Kupini.” Kupini, nik nga nolom mimesmes; nik nga kumrreni kupla nuwi ne mauren, kupini kupla nawone, nowlin ejkie.

Nale nga vitu jer

¹⁸ Inu le Jon, nusususur metu tevi kami jijle nga kamrunge nale se Atua nga marto rengo naul ngel: Poro san p̄ilngi nawone

nale kele san puto tevi nale ngel nir, ko Atua p̄ilngi kele nanu nga marsij nir nga naul ngel mus̄pe surir, partor kemkam̄e m̄nernen.

¹⁹ Ko poro san p̄ila tweni bebje nale san nga muto renge nale se Atua nga marto renge naul ngel, ko Atua p̄ila tweni jin wene nai ne mauren nga moro p̄ilai, ko

setemun m̄nernen pian laut ne Ngaim On nga naul ngel mus̄pe suri.

²⁰ Ko ni nga muwra nale ngel arivi weretunen owra “Nuwretun, bevinuk sete ngasu!” Pirpok ko. Kupini, Numal Iesu.

²¹ Ko ngel evi bongsi nale suk, nga Numal Iesu piptevi kami jijle renge nalol nga m̄irres p̄elak sen. Remse kami.